


Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto

New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files dated 29 Jan 2022
bc03f416-faf8-5000-bfb5-5ca8a3fa98cf

Contents

SAN MATEO	1
SAN MARCOS	112
SAN LUCAS	176
SAN JUAN	290
HECHOS	364
ROMANOS	465
1 CORINTIOS	512
2 CORINTIOS	561
GÁLATAS	591
EFESIOS	611
FILIPENSES	626
COLOSENSES	636
1 TESALONICENSES	646
2 TESALONICENSES	654
1 TIMOTEO	659
2 TIMOTEO	671
TITO	680
FILEMÓN	686
HEBREOS	689
SANTIAGO	725
1 SAN PEDRO	737
2 SAN PEDRO	750
1 SAN JUAN	759
2 SAN JUAN	769
3 SAN JUAN	771
JUDAS	773
APOCALIPSIS	778

Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi
(Lc 3.23-38)*

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnēnē. Davidpijinē pijinia Abrahampijinē pemomoxiyajuvēnēnē. ² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnēnē pevēnē Judá. Judápijinē pematapijinēbeje, pejuyapijivi ata, xaina. ³ Judápijinē juya pexēnatobeje xaina. Itsanē pevēnē Fares. Itsanē Zara. Bajaraponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram. ⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón. ⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isaí. ⁶ Isaípijinē juya pexēnato xaina. Pevēnē David. Bajaronēmi nacuaevetsinēmi. Davidpijinē yacajērēta Uriáspijinē pijavami. Nexata bajarapajivibeje juya pexēnato xainabeje. Pevēnē Salomón. ⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa. ⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías. ⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acáz. Acázpijinē juya pexēnato xaina. Pevēnē Ezequías. ¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías. ¹¹ Josíaspijinē juya pexi xaina. Pexiyajuvēnēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecēbiaya caponatsi Babilonia nacuyabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel. ¹³ Zorobabelpijinē juya pexēnato xaina. Pevēnē Abiud. Abiudpijinē juya pexēnato xaina. Pevēnē Eliaquim. Eliaquimpijinē juya pexēnato xaina. Pevēnē Azor. ¹⁴ Azorpijinē juya pexēnato xaina. Pevēnē Sadoc. Sadocpijinē juya pexēnato xaina. Pevēnē Aquim. Aquimpijinē juya pexēnato xaina. Pevēnē Eliud. ¹⁵ Eliudpijinē juya pexēnato xaina. Pevēnē Eleazar. Eleazarpijinē juya pexēnato xaina. Pevēnē Matán. Matánpijinē juya pexēnato xaina. Pevēnē Jacob. ¹⁶ Jacobpijinē juya pexēnato xaina. Pevēnē José. Bajaraponēmi María pamona. Bajarapovami Jesús pena, ponē yabara: “Cristo, ponē Dioso athēbēvetsica itorobatsi jivi pecanepaenexa,” jaitsi.

¹⁷Nexata Abrahampijinēmita petaxuxuabicujinae jivi penaexanaponaejava, trecenēta naexana Davidpjinē. Bajaraxuacujinae icatsia Davidpjinēmita petaxuxuabicujinae jivi penaexanaponaejava, trecenēta icatsia naexana Jeconíaspjinē. Pamatacabi Israel nacuapijivi cobecēbiaya caponatsi Babilonia nacuyabelia, naexana Jeconíaspjinē. Bajaraxuacujinae icatsia Jeconíaspjinēmita petaxuxuabicujinae jivi penaexanaponaejava, trecenē pijavata naexana Jesucristo jane baja, ponē Dioso athēbēvetsica itoroba jivi pecapanepaenexa.

Pacuenia Jesús naexana yabara pelivaisi
(Lc 2.1-7)

¹⁸Jesucristo ita naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajēnaeyabeje, María nayapētane penacoxitsijava Espiritu Santo pejamatabēcueneta. ¹⁹José, María jane baja pamonanexa, bitso penajamatabēcuenereviabinē. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bēpēnēa jamatabējumai tsaponaponae:

—Itsanējavabelia María nacoxta. Nexata ajumejibia copatsianajē. Apo pitsinē baja tsane María tajavanexa, jamatabējai picani bēpēnēa tsaponaponae José.

²⁰Pamatacabi abaxē José bajarapacuenia najamatabēxainaponapona, majitsinaebota José tsitanaitajētatsi Dioso pitorobinētsica, ángel. Nexata ángel jumaitsi Joséjavabelia:

—José, xamē raja Davidpjinē pemomomē. Pētsa cjunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabēcueneta nacoxta. ²¹Bajarapova exanaena penacuetonēyo. Vēnērubianame bajarapanacuetonēyo Jesús. Tsipaji raja bajaraponē capanepaena daxita pijajivi pibisiacuene pexanaeneconimivecua. ²²Bajarapacuenia María penacuetonēyo exanaena pecopiapatsinexa pacuenia baja cajena bajayata Diosojumepaebinēmi profetanēmi Dioso pejamatabēcueneta tajēvelia vajunupaeba. Profetanēmi bajayata tajēvelia bajarapanacuetonēyo yabara jumaitsi mapacueniaje:

²³Petiriva apo naperabēquenatsinejeva pebijavabelia, nacoxtsiana. Exanaena penacuetonēyo. Vēnērubianatsi Emanuel. “Emanuel,” pejaijume: “Dioso nacayajava,” pejaijume, jai bajayata tajēvelia profetanēmi Dioso pejamatabēcueneta, jai ángel majitsinaebota Joséjavabelia.

²⁴Nexata José piamajitsinaecujinae naēcota. José jumecovēnēta pacuenia itorobatsi ángel. Nexata baja José pijaboyaberena María barēpata pijavanexa. ²⁵Itsiata abaxē José apo imoxoyobi pijava penamataxainae-nacuetonēyo pevecuanaexanaevajēnaeyatsi. Bajarapanacuetonēyo jane baja José vēnēruba JESUS.

2

Pacuenia tulupu perubenaejava pecanaēcobivi najetarubena petaenexa Jesúsnyō yabara pelivaisi

¹Jesús naexana Belén tomarata, Judea nacuata peecaetomarata. Bajarapamatacabi nacuaevetsinē Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaēcobivi, pata

tajēnacua javavetsina. Pata Jerusalén tomarajavabetsina. ² Tulupu perubenaajava pecanaēcobivi yanijobapona jivijavabelia:

—¿Detsa jota barēecatsi panacuetonēyo naexana judíovi pepo pevetsinēnexa? Payapētaniji bajaraponēyo penaexanaejava. Tsipaji baja cajena pataniji bajaraponēyo penaexanaejavata penaitajētsituluputo. Bajarapatuluputo pataniji patajanacuatareca. Bajaraxuata paponainajē mabetsinaje patataenexa bajaraponēyo, bajaraponēyo pitabarata yaiyataeya patamatabacabēta patatonubenaenexa, jai tsaponae jivijavabelia tulupu perubenaajava pecanaēcobivi.

³ Nexata Herodes, Judeanacua pevetsinē, vënëlivaisitane tulupu perubenaajava pecanaēcobivi bajarapacuenia pejumaitšaponaejave jivijavabelia Jesúsniēyo yabara. Nexata Herodes bitso najamatabēxaina. Daxita Jerusalén tomarata pejinavanapaevi ata bitso najamatabēxaina.

⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitši penacaetuatsivijavabelia:

—Bajayata profetanē tajēvelia itša vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitši Herodesjavabelia:

—Belén tomarata raja naexanaeyapaeba, Judea nacuata peecae-tomarata. Bajayata baja cajena Diosojumepaebinēmi profetanēmi tajēvelia vajunupaeba bajaraponē penaexanaejavanexa Belén tomarata. Bajayata Diosojumepaebinēmi profetanēmi peyaquinaelivaisita bajaraponē penaexanaejavanexa yabara tajēvelia jumaitši mapacueniaje:

⁶ Belén tomarata naexanaena jivi pepo pevetsinēnexa. Bajaraponē jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Beléntomara cajena bitso peyayataetomaratsi tsane, jai baja cajena mapacueniaje bajayata tajēvelia Diosojumepaebinēmi profetanēmi peyaquinaelivaisita, jai penacaetuatsivi Herodesjavabelia.

⁷ Bajaraxuacujinae Herodes muetsia junata tajēnacuaavetsina pepatsivi, tulupu perubenaajava pecanaēcobivi. Nexata Herodes jumaitši tulupu perubenaajava pecanaēcobivijavabelia:

—¿Detsa baja pajuametobeje xaina bajarapatuluputo penaitajētsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitši tulupu perubenaajava pecanaēcobivijavabelia:

—Paponaremelia Belén tomarabelia. Xaniavaetsia pajaitsianame bajaraponēyo. Itša pacaxitajarabianame, panevajunucaponaeremena. Nexata xanē ata nalianē tsane. Yaiyataeya tamatabacabēta tonanucaejitsianē bajaraponēyo pitabarata, jai Herodes tulupu perubenaajava pecanaēcobivijavabelia.

⁹ Nexata jane baja tulupu perubenaajava pecanaēcobivi ponalia Belén tomarabelia. Nexata bajarapamonae namutualia penajetarubenaajavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matabanajetarucatsi. Matapania itsajota Jesúsniēyo pena barēecatsi pematatsēnēatsia, bajarapatuluputo rucojopa.

10 Tulupu perubenaejava pecanaëcobivi itsa tane bajarapatuluputo, bitso barëya. 11 Nexata bajarapamonae boyalia itsa joneya, tane Jesúsnyëo, pena yajava. Nexata tulupu perubenaejava pecanaëcobivi yayataeya pematabacabëta tonubenajunua Jesúsnyëo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsnyëo rajuta orojavanë. Rajutanua petuxujuvijavabeje. Itsajava inciensovënëjawa. Itsajava mirravënëjawa. 12 Bajaraxuacujinae tulupu perubenaejava pecanaëcobivi meravi majitsinaebota Dioso itavetatsi penaviabiyaniwa nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnyëo Egipto nacuyabelia yabara pelivaisi

13 Tulupu perubenaejava pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ángel Joséjavabelia.

14 Nexata José nonotapuna. Piamajitsinaemeravi baja José barëpona Jesúsnyëo, pena yajava. Barënajetabajirava Egipto nacuyabelia. 15 Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenejë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi

16 Nacuaevetsinë Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsnyëo yabara. Itsiata tulupu perubenaejava pecanaëcobivi caxitajarabi ata Jesúsnyëo, apo vajunucaponaeremena Herodesjavabelia. Nexata Herodes itsa yapëtane tulupu perubenaejava pecanaëcobivi apo pevajunucaponaeremena, caxitajarabi ata Jesúsnyëo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjawa ata. Daxita papebinacuetoxi abaxë apo xainae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnyëo picani peyajavabeyaxuabinexatsi. Tsipaji tulupu perubenaejava pecanaëcobivi Herodesjavabelia tsipaeba paepatota taxuxuaba petaejawa tuluputo. 17 Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena

Diosojumepaebinēmi profeta Jeramíaspijinē bajayata tajēvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinē peyaquinaelivaisita tajēvelia jumaiti mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabēxainaejava. Tsipaji pexi totēpaenatsi, jai bajayata tajēvelia profeta Jeramíaspijinē peyaquinaelivaisita pecoxibeponaejavanexatsi yabara bajarapatomarata.

¹⁹ Nacuaevecsiniē baja Herodes pepuatēpae, Dioso icatsia pijaánel itoroba Joséjavabelia. Nexata ánel meraví majitsinaebota José tsitanaitajētatsi Egipto nacuata. ²⁰ Nexata ánel jumaiti Joséjavabelia:

—José, nonotapunare. Barēponaename baja tsiquirinēyo, pena yajava. Barēnaviaremelia baja icatsia Israel nacuyabelia. Tēpa rabaja ponē picani jamatabēbeyaxuabatsi tsiquirinēyo, jai ánel majitsinaebota Joséjavabelia.

²¹ Nexata baja José nonotapuna. Barēpona tsiquirinēyo, pena yajava. José icatsia barēnaviata Israel nacuyabelia. ²² Nacuaevecsiniēmi Herodespijinē pexēnato pevēnē Arquelao. Nexata Arquelao eveta Judeanacua paxa pevēnamuto. Nexata José ita vēnēlivaisitane nacuaevecsiniēmi Herodespijinē pexēnato pevetsijava Judeanacua, José cujunava Jesúsniēyo pebarēponaejava Judea nacuyabelia. Majitsinaebota José Dioso itavetatsi Jesúsniēyo pebarēponaeyaniva Judea nacuyabelia. Nexata José barēpona Jesúsniēyo Galilea nacuyabelia. ²³ José ita barēpata Jesúsniēyo Galilea nacuyabelia, Nazaret tomarata barēpatajopa pebarēcaenexa Nazaret tomarata. Bajarapacuenia José Nazaret tomarata ita barēca Jesúsniēyo, copiapata jane baja pacuenia baja cajena bajayata Diosojumepaebivimi profetavi tajēvelia jumaiti. Diosojumepaebivimi profetavi bajayata baja cajena tajēvelia jumaiti Jesús yabara mapacueniaje: “Ponē Dioso itorobijitsiatsica jivi pecapanepaenexa, bajaraponē yabara jivi jumai tsane: ‘Mara ponēje Nazaret tomarapijinēje,’ jai tsane,” jai baja cajena bajayata tajēvelia profetavimi Jesús yabara.

3

Pacuenia Juan jivibautisabinē Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús ita baja xaina bejamatabēcuene treinta pavaibeje, Juan jivibautisabinē najetaruca Judea nacuatustojava. ² Juan jivibautisabinē Dioso pitorobilivaisi jivi tsipaebanajetaruca. Jumai tsanajetarucacae mapacueniaje:

—Dioso rabaja pijajivi pevetsimatacabinexa, imoxoyo baja pevajēnae pecopiapatsinexa. Nexata baja pacopabare pibisiacuene paneexanabiabijava. Panajamatabēcuenepēnēyorore Diosojavabelia, jai tsanajetarucacae Juan jivijavabelia.

³ Bajarapacuenia Juan Dioso pitorobilivaisi jivi ita tsipaebanajetaruca, copiapata jane baja pacuenia Diosojumepaebinēmi profeta, Isaíaspijinē, bajayata tajēvelia yaquina Juan pelivaisi. Juan jivibautisabinē Dioso pitorobilivaisi jivi petsipaebanajetarucacaejavanexa yabara,

yaquina. Profeta Isaíaspijinē peyaquinaelivaisita tajēvelia jumaitsi mapacueniaje:

Tanejumelivaisipaebinē vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaexananua namuto. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeyarena,” jai tsane tanejumelivaisipaebinē, jai profeta Isaíaspijinē bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

⁴ Juan naxatata camellonata pexanaejava. Naepacēta cuerobocoto. Pexaejava ēbosese, jabēra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopijivi ata. ⁶ Nexata bajarapamonae pibisiacuene pexanaejavami, roviaia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaētoxfaneto pata Juanjavaberena pebautisabinexa picani Juan. Bajarapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaena, jamatabējai.

Nexata Juan itsa tane ayaibitsaētoxfaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—jPanejamatabēcuenenavēxaniabivi! Pacuenia jomo rēcēpa itsa tane isoto petajuenajetarucaejava, bajara saya paitsimē. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovēnētavanapare. Nexata daxitajivi pacayapētaena pepacuene baja panecopabijava pibisiacuene paneexanabiabijavami. Pacayapētaenanua panenajamatabēcuenē pēnēyorotsijava Diosojavabelia. ⁹ Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caējēpatsi jivi pexanaenexa mapailbotonēmi ataje, Abrahampijinē bepemomoxi Dioso petaenexa. Nexata bajarapamonae ata Dioso itsa apo jumecovēnētsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰ Peubinaenē pexainaenē itsa apo tonacuaitsitsi pexaniacuai, nicata sipalita daxita ponaenē apo tonacuaitsitsi pexaniacuai. Nexata baja penicatsicujinae itsa niona bajaraponaenē, caetuata. Xuaba isotojavabelia. Nexata bajaraponaenēmi tajuatsi. Bajara pijinia pacuenia paxamē ata Dioso pacaxuabiana infernojavabelia papecatajuenexa, Dioso apo panejumecovēnētsivi. ¹¹ Xanē raja saya jivi bautisabaponajē merata. Tspaji baja bajarapamonae copaba pibisiacuene pexanabiabijava. Najamatabēcuenepēnēyorotanua Diosojavabelia. Itsiata baitsi jane ponē tacovēverena najetarucaena, tabautisabivi Espiritu Santo

tsijamatabějoneyaexanaenatsi, pitarunutsicotia yajava. Xaně raja saya beveliajamataběcueneněñe bajaraponěvecua. Nexata bajaraponě vecuaauraně pijazapato ata tatocaponaeñexa bepijajivitoněcuenianě. ¹² Arrozxainaně baja itsa vereta arroz pesiricaejava, jěaba arroz pejëabijavata pepitsinexa ěpexu. Nexata pijaarroz pejëabijavata, saicaya tsatapona ěpexu pesivecua. Nexata ěpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamě ata Dioso pejumecověñětsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonaē pijinia Dioso pejumecověñětsivi, Dioso capanepaenatsi pijanacuayabetsia. Pamonaē pijinia Dioso apo jumecověñětsi, Dioso naneconitsiaexanaenatsi daxitamatacabijavabelianexa apo pevereverecaeisotojavabelia, jai Juan daxita bajarapamonaējavabelia.

Pacuenia Juan bautisaba Jesús yabara pelivaisi

(Mr 1.9-11; Lc 3.21-22)

¹³ Jesús naropota Galilea nacuajavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴ Juan picani apo jitsipae pebautisabijava Jesús. Juan nexata jumaiti Jesúsjavabelia:

—¿Detsa xuajitsia patame tacabautisabinexa? Xamě rajane biji xaně benebautisabame, jai Juan Jesúsjavabelia.

¹⁵ Itsiata Jesús jumaiti Juanjavabelia:

—Aeconoxae itsiata pacuenia baja cavajětatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan bautisaba Jesús. Jesús pebautisabicujinaetsi nonotajuna men-evetsina. Bajarapaepatota Jesús tane athěbětatsia itaboxo penapatsijava. Nexata Jesús tane Espiritu Santo perunaējavatsica beucucuto. Tsimatarunaicatsi. ¹⁷ Nexata Juan jumetane athěběvetsica Dioso pejumaitisijava: “Mara poně taxěnato tasivaněje. Sivajamataběcuenebarěyaně bitso,” pejaijava.

4

Pacuenia Jesús jamataběcueneějěbatsi dovathi yabara pelivaisi

(Mr 1.12-13; Lc 4.1-13)

¹ Jesús pebautisabicujinaetsi, Espiritu Santo ponaeyaexanatsi petusato nacuayabelia. Bajarabelia ponaeyaexanatsi pejamataběcueneějěbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamataběcueneějěbinexatsi Jesús picani pibisiacuene pexanaenexa. Dovathi jumaiti Jesúsjavabelia:

—Itsa pepacuene Dioso pexěnatomě, itorobare mapaibotoněje penaexanaenexa pan, jai dovathi.

⁴ Jesús nexata jumaiti dovathijavabelia:

—Jume raja. Dioso raja pejumelivaisibaxutota jumaiti mapacueniaje: “Jivi raja apo namatavenonae ěpexaejava pexaenexa. Jivi raja

namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi Jerusalén tomara-belia. Barëjunayatsi templobo matatuyabetsia. ⁶ Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremea irabereca. Bajarapacuenia jirevaremea irabereca tsipaji xamë nitsacueneyaniva pecaevecsina Dioso pejumelivaisibaxutota jumaitsi mapacueniaje:

Dioso itorobianica pijaángelevi pecaevecsina. Nexata ángelevi pecobeta cayotsiana pecataxutsaquitsianiva ibotonëjavabelia,

jai Dioso pejumelivaisibaxutota xamë pecaevecsina ángelevi, jai dovathi Jesúsjavabelia.

⁷ Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata exanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

⁸ Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexainaejava yajavatsitajëtatsi. ⁹ Nexata icatsia dovathi jumaitsi Jesúsjavabelia:

—Ayaijamatabëcuenenënë netaeya taitabarata nematabacabëta ita netonucajunuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mr 1.14-15; Lc 4.14-15)

¹² Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuyabelia. ¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabulónvënë nacuabeje Neftalivënë nacuabejejavata. Capernaumtomara eca pucaxanetoitapata. ¹⁴ Bajarapacuenia Jesús ita patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

15-16 Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapêtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaêtoxanetonê apo judíovi, bitso apo yapêtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapêtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabêcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajêvelia Isaíaspijinê peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

17 Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajênae pecopiapatsinexa. Nexata baja pacopabare pibisiacuene paneexanabiabijava. Panajamatabêcuenepeñeyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponêbeje dujuai peyamatajucabiabivi yabara pelivaisi

(Mr 1.16-20; Lc 5.1-11)

18 Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanêbeje nacaebananêbeje, Simónbeje Andrésbeje. Simón itsavênê Pedro. Bajaraponêbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. 19 Nexata Jesús jumaitsi Simónbeje Andrésbejejavabelia:

—Naxanitsia. Panepênaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

20 Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepêta.

21 Bajaraxuacujinae icatsia bebeliayo pevajênaeyabelia Jesús barêpona. Icatsia taenuta anijanêbeje nacaebananêbeje, Zebedeo pexênatobeje. Bajaraponêbeje Santiagobeje Juanbeje. Pijajeraênêta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. 22 Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepêta.

Pacuenia Jesús livaisi tsipaeba jivi ayaibitsaêtoxanetojavabelia yabara pelivaisi

(Lc 6.17-19)

23 Jesús jane baja najetaruca daxita Galilea nacujava. Dioso pitorobilivaisi tsipaebapona judíovi penacaetuatabiabinêjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimí. 24 Nexata daxita Siria nacujava pejinavanapaevi ata vênêlivaisitanetsi Jesús. Jesús tocpatatsi daxitaviriavitane pexainaevi.

Tocapatatsinua dovathi peyjavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pēnaponatsi jivi ayaibitsaētoخانeto Galilea nacuapijivi, Decápolis nacuapijivi ata, Jerusalén tomarapijivi ata, Judea nacuapijivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi

(Lc 6.20-23)

¹ Jesús itsa tane jivibitsaētoخانeto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. ² Nexata Jesús taxuxuaba livaisi petsipaebijava. ³ Jesús jumaitsi pijajivijavabelia mapacueniaje:

—Jamatabēcuenebarēya tsavanapae tsane pamonaē picani mapanacuata yajamatabēcuenebējai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ Jamatabēcuenebarēya tsavanapae tsane pamonaē picani mapanacuata bejamatabējiobi tsavanapae itsamonae pibisiacuene petoexanae aetsi. Bajarapamonae Dioso jamatabēcuene yavenonaenatsi.

⁵ Jamatabēcuenebarēya tsavanapae tsane pamonaē apo jamatabēbējai tsabiabi mapanacuata, itsacueniababiabi atatsi itsamonae. Apo cuenecanaviatabiabinua. Bajarapamonae jinavanapaena Dioso pijanacuatsia pacuenia Dioso najumecapanepaeya jumaitsi bajarapamonae yabara.

⁶ Jamatabēcuenebarēya tsavanapae tsane pamonaē mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuenē.

⁷ Jamatabēcuenebarēya tsavanapae tsane pamonaē mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

⁸ Jamatabēcuenebarēya tsavanapae tsane pamonaē mapanacuata ēpexaniacuene pexanaenexa najamatabēxainabiaba. Bajarapamonae taena Dioso.

⁹ Jamatabēcuenebarēya tsavanapae tsane pamonaē mapanacuata penaitoyavimi ata, nabarajamatabēcuene xanepanaeyaexanapona. Bajarapamonae yabara: “Taxi,” jai tsane Dioso.

¹⁰ Jamatabēcuenebarēya tsavanapae tsane pamonaē mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

¹¹ Patajajivixae mē, itsamonae pibisiacuenia itsa pacabaracuaicuaijai, itsiata pajamatabēcuenebarēyamē tsavanapae tsane. Bajarapamonae pacabejiobiaexanae ata tsane, najumetsēnētsiaya pacabaracuaicuaijai atanua tsane, itsiata pajamatabēcuenebarēyamē tsavanapae tsane.

¹² Bajara tsipaji pacuenia panevajēnaeyapijivimi ata, Dioso jumepaebivimi profetavi, bajayata bejiobiaexanatsi. Nexata pasivajamatabēcuenebarēyamē tsavanapae tsane paxamē ata bajarapacuenia itsa pacaexanaena. Tsipaji raja athēbētatsia

itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi

(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepayajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ 'Pacuenia piaitayotsicotia itayota piaitaquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame piagamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata pecaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Pëtsa panesivajamatabëjumaitsimë: “Maponë patajopaje piajibia-ayaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebaona piajibiaexanaenexa,” panesivajamatabëjamë pëtsa. Apo patajopaenë tajibiayaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje. ¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitane toyo ata, Dioso apo ithothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi,

itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajara-paneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi

(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. ²² Itsiata baitsi jane xanë pacatsipaebatsi mapacueniaje. Pajivi baranaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiyaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajara-paneconi yabara nutsianatsi itsajota nacaetuatabiaba tomara pevetsivi. Nexata naneconitsiyaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiyaexanaenatsi inferno isotojavabelia.

²³ Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacueni paneexanaejava, nexata mapacuenia paexanaenameje. ²⁴ Altarvënëjava pitabarata abaxë papueneri ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuai cuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuai cuaijamërebeje papecanutsiyaniva jueznë pitabarata. Tspají raja jueznë itorobijitsipa policiavi panijaneconi yabara papecacaponanexa penaneconitsivi pejebabiabiboyabelia. Nexata

policíavi pacananeconitsiaexanetsipa penaneconitsivi pejebabiabibota. ²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojobinë itsava pejaitsyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibit-saëtoخانetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai. ²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxuabinexa bajarapaitaxuto, padaxitaperabëtojivimë Dioso papexacuabiyanima infiernojavabelia. ³⁰ Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papexacuabiyanima infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinë pijava pexuabiyanima yabara pelivaisi

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibit-saëtoخانetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copluya toyaquinae cuyalatoxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinëta penajumecopatsilivaisi. ³² Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixae, nacojobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi

33 Icatsia Jesús jumaitsi petsutoyenepanajavata pijajivi ayaibit-saētoخانetojavabelia:

—Paxamē rabaja payapētaneme pacuenia bajayata Moiséspijinē jumaitsi panijasalinaivimijavabelia. Panijasalinaivimi pena-jumetsēnētsiyaniva, bajayata Moiséspijinē panijasalinaivimijavabelia jumaitsi mapacueniaje: “Itsa baja pepacueene najumecapanepaeya panavajunupaebame xua paexanaejitsiamē, itsamonae papeca-jumexaniataenexa itsa pajumaitsimē: ‘Xaniajanē raja. Cajumaitsitsi mapacueniaje Dioso pitabarata,’ itsa pajamē, pētsa epatua panajamatabēcopatame bajaraxua paexanaenejevamē,” jai bajayata Moiséspijinē panijasalinaivimijavabelia. 34 Itsiata baitsi jane xanē mapacuenia pacaitorobatsije. Najumecapanepaeya itsa panavajunupaebame xua paexanaejitsiamē, roviaalia panavajunupaebare. Pētsa pematatsēnēa itsajumeyo ata yajava pajumaitsimē jivi papecajumexaniataenexa. Papecajumexaniataenexa itsajivi pētsa pajumaitsimē mapacueniaje: “Xaniajanē raja. Cajumaitsitsi mapacueniaje Dioso pitabarata,” pajamē pētsa. Pētsa pajumaitsimēnua: “Xaniajanē raja. Cajumaitsitsi mapacueniaje athēbēnacua pevēnēta,” pajamē pētsa. Tsipaji bajarajotatsia Dioso eca pijatronovēnējavata, itsajota ecabiaba pitorobinexa pijajivi. 35 Pētsa pajumaitsimēnua: “Xaniajanē raja. Cajumaitsitsi mapacueniaje mapairaje pevēnēta,” pajamē pētsa. Tsipaji raja Dioso pijaira. Pētsa bajarapacuenia pajumaitsimē Jerusaléntomara ata pevēnēta. Tsipaji Jerusaléntomara Dioso pepo nacuaevevtsinē pijatomara. 36 Pētsa pajumaitsimēnua: “Xaniajanē cajena. Itsa apo xaniajanē tsane, nexata nacaevetsianajē tanematathinaxuabinexamē tatēpaenexa,” pajamē pētsa. Tsipaji panematabocoto ata Dioso eveta. Nexata paxamē apo pacacājēpae caematanatoyo ata panenamatananiojaiyaexanaenexa, penanamatanatsaejaiyaexanaenexa ata. 37 Itsa pepacueene paexanaejitsiamē, “Jājā, exanaenajē,” pajamēre roviaalia. Itsa apo pajamatabēexanaemē, “Jume, apo exanaenē tsane,” pajamēre roviaalia. Pematatsēnēa pētsa pajumaitsimē itsajumeyo ata jivi papecajumexaniataenexa. Tsipaji bajarapajume dovathi pejamatabēcueneta pajumaitsimē tsipae, jai Jesús pijajivijavabelia.

Pacuenia Jesús pijajivi muxujioba pecuenecanaviatsiyaniva itsajivi itsacueniabi atatsi yabara pelivaisi

(Lc 6.29-30)

38 Icatsia Jesús jumaitsi petsutoyenepanajavata pijajivi ayaibit-saētoخانetojavabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitsi. Bajayata Dioso Moiséspijinēta penajumecopatsilivaisi jumaitsi mapacueniaje: “Pajivi itsanē itaxutobijianatsi, juya bajarapajivi namatamoitaxutobijiana. Pajivi ata itsanē vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinēta penajumecopatsilivaisi. 39 Itsiata baitsi jane xanē mapacuenia pacaitorobatsije. Itsanē itsa jamatabēpacabia, pētsa panayajivibame. Itsanē itsa pacaitabarapacabiaxuaba anaeya, nexata icatsia itsanenia ata papecaitarapacatxuabinexa, panaitabaracaever. 40 Itsajivi itsa pacaneconitsijitsia jueznējavabelia paneamoneyabijamatabēcuenē

papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. ⁴¹ Vajabitsaē itsa pacacaponaeayaexana pijajava anijakilómetrobejecuenia, nexata patocaponare pematatsēña ata. Cuatro pakilómetrobejecuenia ata patocaponare. ⁴² Bitso bepejibijivi itsa pacavajēta itsacuenejavayo, parajure. Itsa pacacovaeta, patsicopare. “Jume,” pajamē pētsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibit-saētoxañetovabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitsi mapacueniaje: “Pasivamēre papecayapētaenē bitso. Paitoyamēre papecaitoiyavi,” jai bajayata Dioso Moiséspijinēta penajumecopatsilivaisi. ⁴⁴ Itsiata baitsi jane xanē mapacuenia pacaitorobatsije. Pasivamēre papecaitoiyavi ata. Pamonaē ata pibisiacuenia pacabaracuaicuaijai, bajarapamonae paxamē xaniavaetsia pabaracuaicuaijamēre. Pamonaē ata pacaitoya, bajarapamonae pexaniacuene patoexanare. Pamonaē ata pibisiacuenia pacabijatane, pibisiacuene pacaexanaē ata, patovajēre Diosojavabelia peyavenonaenexatsi. ⁴⁵ Bajarapacuenia nexata paneaxa, athēbētatsia peecaenē, papeximēcuenia patsitajinavanapaename. Bajaraponē, paneaxa, yavenonabiaba daxitajivi. Nexata pexaniajamatabēcuenevi, pibisiajamatabēcuenevi ata, najēpaeya pijapabianē petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamē tsipae ēpapecaasivavi, nexata pexaniacuene apo paxainaemē tsipae Diosojavabelia. Pataneme rabaja. Gobierno pejamatabēcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopi-apitsipame ēpaneyapētaevi, nexata pexaniacuene apo paexanaemē tsipae pamonaē Dioso apo pejumecovēñetsivivecua. Tsipaji Dioso apo pejumecovēñetsivi ata xaniavaetsia copiapitabiaba peyapētaevitsi. ⁴⁸ Pacuenia jamatabēcueneitsi pejamatabēcuenexanepanaenē, paneaxa, athēbētatsia peecaenē, bajara paxamē ata pajamatatabēcueneitsimēre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibit-saētoxañetovabelia:

—¡Xania baja tsane! Pētsa pexaniacuene paexaname saya jivi papecacuenetaenexa, “Maponē bitso pexaniajamatabēcuenenēje,” papecasivajamatabējainexa saya paneexanaejava yabara. Bajarapacuenia itsa paexanaejitsipame, nexata paneaxa, athēbētatsia peecaenējavabelia, apo paxainaemē tsipae itsacuenejavayo ata, pexaniacuenejavayo, papecarajutsinexa athēbētatsia. ² Bajaraxuata itsa payavenoname bepejibivivi, pētsa panavajunupaebame daxitajivijavabelia

paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabibonéjava, callejava ata. Bajarapamonae navajunupaebabiaba bepejiobivi peyavenonaejava, behexaniajamatabécuenevi saya petaenexatsi jivi. Xaniajané pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xainae tsane athëbëtatsia perajutsijavanexatsi. ³ Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata. ⁴ Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi

(Lc 11.2-4)

⁵ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judíovi penacaetuatabibonéjava, calle penaepacaxitajarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajané pacuenia pacatsipaebijitsiatsi. Pamonae bajarapacuenia exanabiaba, bajarapacuenia pexanaexae, Diosojavabelia apo xainae tsane athëbëtatsia perajutsijavanexatsi. ⁶ Nexata paxamë Diosojavabelia itsa pavajëcame, pacaenëmë canacujitsia, pajonemeya panijaboyalía. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

⁷ Itsa pavajëcame Diosojavabelia, pëtsa napëna pavajëcame saya piapianexa panevajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabécuenenavëxaniabiaya jamatabëjumai tsabiabi: “Itsa bitso apia vajavajëcaejava Diosojavabelia, nexata matapania Dioso nacajumetaena vajavajëcaejava,” jamatabëjai tsabiabi Dioso apo peyapëtaevi. ⁸ Pëtsa bajarapacuenia paxamë pajamatabécuenëitsimë. Panevajëcaevajënaeya ata raja paneaxa, Dioso, yapëtane xua panamatavenoname. ⁹ Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi.

¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxaejavanexa pacuenia panamatavenonajë. ¹² Panevecuaajibiaexanare pibisiacuene pataexanaenonimi. Pacuenia paxanë pajamatabécuenëcaevajë, pabarajamatabécuenëxanepananua, itsamonae paxanëjavaberena

pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuene xanepanarena. ¹³ Panevecuatsare dovathi patanejamatabëcueneëjëbiyaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi neveysijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje ita pavajëcame Diosojavabelia,

jai Jesús pijajivijavabelia.

¹⁴ Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, ita pajamatabëcuenecaevianame, ita pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua. ¹⁵ Paxamë ita apo pajamatabëcuenecaevimë tsane itsamonae pibisiacuene papecaexanaejava, ita apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenua tsane, pitabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajëtaƀona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibit-saëttoxanetojavabelia:

—Ita apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia ita vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevisi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevisi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba. ¹⁷ Paxamë ita apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenua xaniavaetsia. ¹⁸ Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayajjava pexainaenexa athëbëtatsia yabara pelivaisi

(Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Pëtsa pacaetuataponame ayajjava panexainaejavanexa mapanacuataje. Tsi-paji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi. ²⁰ Dioso jane xaniavaetsia patonacuenebavanapare. Nexata Diosojavabelia ayajjava pexaniacuene paxainaename athëbëtatsia. Nexata bajarajotatsia apo pacatobijianae tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹ Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjavanapaename, jai Jesús pijajivijavabelia.

Pacuenia vajaitaxuto belámparabë yabara pelivaisi

(Lc 11.34-36)

²²⁻²³ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioba bitso pejitsipaeyaniva palata yabara pelivaisi

(Lc 16.13)

²⁴ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejjavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

Pacuenia Dioso pijajivi eveta mapanacuataje yabara pelivaisi

(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënjavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁶ Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa

bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa.²⁷ ¿Detsa jane ponë paxamëyajuvënënë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ 'Bajaraxuata pëtsa bitso pasivanajamatabëxainame ëpananaxatabijavanexa. Pacanaëjëre pacuenia vitsabapona pematono vayafjava. Bajarapamatono apo natsijumanacuenebi. Penaxatatsijavanexa ata apo natsijumaexanae.²⁹ Bajayata nacuaevevtsinëmi Salomónpijinë, bitso pexainaenëmi. Naitabëtsiaya naxatababiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitabë mapamatonotoxije.³⁰ Paxamë bevelia panejumecovënëtsivi Dioso, asaëya bepajumecovënëtame Dioso papecaevevtsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabijecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata Dioso pacaxatabiana piaitabëjava itsa pajumecovënëtame Dioso.³¹ Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa.³² Pamona Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpanaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname.³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panotoxananapanaxanae pacuenia Dioso pacaitoroba. Nexata Dioso pacarajutsiana daxita xua panamatavenoname.³⁴ Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjaitsi xua meravia pitsijavata nacatocopiapatsijitsia, jai Jesús pijajivijavabelia.

7

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi

(Lc 6.37-38, 41-42)

¹ Icatsia Jesús jumaitsi petsutoyenepanajavata pijajivi ayaitbit-saëttoxanetojavabelia:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaiçuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso

bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapëtaenejevamë, pëtsa pabaracuaicuaijamë macpacueniaje: “Bajarapitsicuenene pexanaevi Dioso naneconitsiaexanaenatsi,” pajamë pëtsa. Tshipaji paxamë ata bajarapitsicuenene itsa paexaname, itsamonae pijinia bajarapacuenia pacabaracuaicuaijai tsipae. ³ Bjaraxuata paxamë pepacuenene bepaneaneconijibivi nataeya pëtsa pamuxujibame itsajivi pijaneconi yabara. Tshipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë. ⁵ Yamaxëitorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonaepatsipaebi atamë, apo yaityatae bajarapalivaisi. Tshipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaepo yaityatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaep, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëtaaponaejitsia yabara pelivaisi

(Lc 11.9-13; 6.31)

⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—PavajëtaPONARE Diosojavabelia bajayajebi ata pacuenia bajayajebi ata pajaitsipame panecaxitarabinexa itsa pacatonaxuaba itsacuenejavayo. PavajëtaPONARE Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. ⁸ Bjarapacuenia asaëyata pavajëtaPONARE Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitarababiaba. Pajivi ata baupa docodocotabiaba, tobaupatabiabatsi.

⁹ Paxamë papebijivimë panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto. ¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bjaraponë pacarajutsiana pexaniacuene itsa pavajëtame.

¹² Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bjarapajamatabëcuene jëpa Dioso Moiséspijinëta

penajumecopatsilivaisi. Diosojumepaebivimi profetavi peyaquinaeliv-
aisianë ata jëpa bajarapajamatabëcuene, jai Jesús pijajivijavabelia.

Tsiquiribaupayo epatajërëtsialia yabara pelivaisi
(Lc 13.24)

¹³ Icatsia Jesús jumaitsi petsutoyenepanajavata pijajivi ayaibit-
saëtoxanetojavabelia:

—Pajonemeya tsiquiribaupayojavalia panepatsinexa Dioso
pijanacuayabelia. Tsipaji pinijibaupa, pinijinamutonua, pata
infernojavabelia. Nexata jivi ayaibitsaëtoxanetonë bajaraxuayo
jonepona. ¹⁴ Pabaupa tsiquiribaupayo, tsiquirinamutonua,
bajarapanamuto pata matababi apo pevereverecejava pexainaevi
pijanacuayabelia. Nexata saya caejiviyobeje bajaraxuayo jonepona, jai
Jesús pijajivijavabelia petsutoyenepanajavata.

Pacuenia peubinaënë itsa nacuita, nayapëtane pavirianaecuene
yabara pelivaisi
(Lc 6.43-44)

¹⁵ Icatsia Jesús jumaitsi petsutoyenepanajavata pijajivi ayaibit-
saëtoxanetojavabelia:

—Xania panayajivitaema. Pamonaë saicayacuenia Dioso pejumeliv-
aisivecua jivi tsipaebapona, bajarapamonae najumetsënëtsiaya pacaju-
mai tsabiabi: “Paxanë raja Dioso patanitorobicuenia livaisi jivi patsipae-
baponajë,” pacajai tsabiabi. Bajarapamonae Dioso pejumecovënëtsivi
cuenecataeya najonena paxamëjavaberena. Itsiata baitsi jane pacue-
nia nevëthë pianaepanaevi jamatabëcueneitsi, bajara jamatabëcueneitsi.
Jamatabëpacacopatsiaexana Dioso panejumecovënëtsijavami. ¹⁶ Vaxaitsi
rabaja yapëtanetsi mapacueenje. Peubinaenë itsa nacuita, yapëtanetsi
ponaecuai xanepana vajaxaenexa. Nexata bajaraponaë cuaixanetsi.
Ponaë pijinia pibisiacuai nacuita, yapëtanetsi piabejecuene. Nexata
bajaraponaë apo cuaixaetsi. Nexata pacuenia peubinaënë itsa nacuita,
nayapëtane ponaecuai xanepana vajacuaixaenexa, bajara pijinia pacue-
nia paxamë payapëtaename pacuenia jamatabëcueneitsi bajarapamonae
itsa pacuetaename xua exanavanapa. Uvaru apo paucutsimë cucu-
nanaeta. Higovënëcuaïto ata apo paucutsimë jomovaënaeta. ¹⁷ Nexata
ponae pexanianae, pexaniacuai pijinia nacuita vajaxaenexa. Ponaë
pijinia pibisianae, ëpiabejecuai nacuita. ¹⁸ Pexanianae pexaniacuai
nacuita. Apo nacuitsi piabejecuai. Pibisianae pijinia apo nacuitsi
pexaniacuai. ¹⁹ Daxita ponaenë nacuita pibisiacuai, apo vajaxaecuai,
yapëtanetsi. Nexata daxita bajaraponaenëmi nicatatsi. Nexata tajui-
tatsi isotota. ²⁰ Bajara pijinia pacuenia paxamë ata payapëtaename
itsa pacuetaename xua exanavanapa pamonaë saicayacuenia Dioso
pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara
pelivaisi
(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibit-
saëtoxanetojavabelia:

—Daxita pamonaë: “Tajatuxanenë,” tanejaivi ata, itsa apo jume-
covënëtsi tsane taxa Dioso, athëbëtatsia peecaenë, nexata apo jone
tsane taxa Dioso pijanacuayabetsia. Itsiata pamonaë exanavanapa

taxa, athëbëtatsia peecaenë, pejitsipaecuenia, ëbajarapamonae jonena taxa pijanacuayabetsia. ²² Pamatacabi copiapatsiana pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumlahtsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pini-jicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi. ²⁵ Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. ²⁷ Tsipaji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata homi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabëcuenenabenajaca. ²⁹ Jesús pejumetaevitsi bitso jamatabëcuenenabenajaca tsipaji Jesús livaisi tsipaeba pinijijamatabëcuene pexainanëcuenia. Apo tsipaebi pacuenia judíoivi pecujarubivi tsipaebabiaba.

8

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mr 1.40-45; Lc 5.12-16)

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi. ² Nexata imoxoyotatsi bajayajebi bitso peperabëtsabanaenë. Pitabarata pematabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaējēpa raja tanejamatejemayaexanaenexamē. Itsa jitsipame, nejamatejemayaexanare mapavitanevecuaje, jai bitso peperabētsabanaenē.

³ Nexata Jesús pecobeta perabējayalia bitso peperabētsabanaenē. Jesús jumaitsi bajaraponējavabelia:

—Jājā, jitsipajē cajena. Jamatejemamē rabaja, jai Jesús bajayajehi bitso peperabētsabanaenējavabelia.

Bajarapacuenia Jesús pejumaitsijavata peperabētsabanaenēmi baja perabēxanepananajereca. ⁴ Nexata icatsia Jesús jumaitsi bajaraponējavabelia:

—Nejumetaema. Pētsa tsipaebame itsajivijavabelia ata tacajamatejemayaexanaejava. Naitajētsiaremelia jane sacerdotenējavabelia, tem-plobota penacuenebinējavabelia. Nexata jivi yapētaena pepacuenē baja pecavecuaajibijava niavitanejavami. Diosonexa rajuremelia ofrenda sacerdotenējavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainēmi Moiséspijinē nacaitoroba. Nexata sacerdotenē cataena pecavecuaajibijava baja niavitanejavami, jai Jesús bajaraponējavabelia.

Pacuenia vajabitsaē pijacapitán pijabota petonacuenebaponapon-aenētsi, Jesús tojamatejemayaexana yabara pelivaisi

(Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaēvi pijacapitán Jesús imoxoyorenatsi pevajētsinexatsi.

⁶ Vajabitsaēvi pijacapitán bitso ayaicuenia vajēta Jesúsjavabelia. Jumaitsi: —Petuxanenē, tajajivitonē raja tajabota camata boboca. Bitso cuenabatsi. Pinijicuenia navixaetaeyabiaba, jai.

⁷ Nexata Jesús jumaitsi capitánjavabelia:

—Xanē ponaenajē nijaboyabelia. Nexata catojamatejemayaexanaenatsi nijajivitonē, jai Jesús.

⁸ Nexata capitán jumaitsi Jesúsjavabelia:

—Petuxanenē, xanē raja bitso beveliajamatabēcuenenēnē xamēvecua. Nexata apo xanepanae tsipae nejonejava tajaboyabelia. Nexata saya maveliaje ėnijume itorobare. Nexata tajajivitonē netojamatejema tsane. ⁹ Xanē ata xainajē taneitorobabiabivi taneitorobicuenia tajumecovēnētabibinexa. Xanē ata juya xainajē vajabitsaēvi tajajivi taitorobicuenia tanetoexanabiabinexa. Nexata itsa itorobajē caenē vajabitsaenē peponaenexa, bajaraponē ponabiaba. Itsa junarenajē itsanē vajabitsaenē pepatsinexa xanējavaberena, bajaraponē patabiabarena. Itsa itorobajē tajajivitonē tanetoexanaenexa itsacuenējavayo, nexata netoexanabiaba. Bajara pijinia pacuenia xamē ata nexanaenexa cacaējēpa. Nexata saya maveliaje ėnijume itorobare saya ėnijumeta tajajivitonē tane-tojamatejemayaexanaenexamē, jai capitán Jesúsjavabelia.

¹⁰ Jesús itsa jumetane bajarapacuenia capitán pejumaitsijavatsi, nexata Jesús jamatabēcuenenabenajaca. Nexata Jesús jumaitsi pepēnagonaevitsijavabelia:

—Xaniajanē pacuenia pacatsipaebijitsiatsi. Israel nacuapijivi nejumecovēnētsi ata, itsiata caeto ata apo caxitajarabaxuabinē xanējavaberena bitso tanesivanajamatabēcuenecopatsinē pacuenia mapacapitán nesivajamatabēcuenecopatsiaya jumaitsije. ¹¹ Nexata pacatsipaebatsi paneyapētaenexa. Apo judíovi ata raja, ayaiBITSaētoXanetonē

daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana. ¹² Itsiata baitsi jane judíovi, pamonaepicani Dioso athëbëtsia toxaniavaetsi peyajavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infiernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanajamatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi

(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. ¹⁵ Nexata Jesús cobejayata peromaebanuaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mr 1.32-34; Lc 4.40-41)

¹⁶ Itsa baja ajena meravitsia, Jesúsjavaberena tocapatatsi ayaibitsaëto dovathi peyajavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebini profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaíaspijinë Jesús yabara.

Pacuenia picani Jesús jamatabëpënaponatsi itsamonae yabara pelivaisi
(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronaevatsi, pijajivi junata pepënaxuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaenatsi cajena, jai.

²⁰ Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenucuaeraevetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexa. Baratsui ata pematapananë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacuaeraevetabiabijitsianë, jai Jesús judíovi pecujarubinëjavabelia.

21 Nexata Jesús pijajiviyajuvënënë jumaitsi Jesúsjavabelia:

—Tajatuxanenë, caeapatoyo abaxë necopare tamëthëtsinexa taxa petëpaenë, jai.

22 Jesús nexata jumaitsi pijajivitonëjavabelia:

—Naxanitsia. Nepënaponare. Copare matakabi apo peverevereaejava apo pexainaevinexa pemëthëcaenexatsi nijamonaemi itsa tëpa, jai Jesús pijajivitonëjavabelia.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mr 4.35-41; Lc 8.22-25)

23 Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. 24 Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëabereca mera epabajarabapona. Itsiata Jesús jamatejema majitanuca. 25 Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

26 Nexata Jesús jumaitsi pijajivijavabelia:

—¿Detsa xujitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. 27 Nexata Jesús pijajivi ita tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponanëbeje, Jesús vecuacapsapa Gerasa nacuata yabara pelivaisi

(Mr 5.1-20; Lc 8.26-39)

28 Jesús pijajivi barëpata pucaxaneto itsapanabelia, Gerasa nacuyabelia. Jesús ita pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponanëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. 29 Nexata dovathivi peyajavaponaponanëbeje vavajaiibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaemat-acabinexavajënaeya patame patanenaneconitsiaexanaexamëbeje? jaiibeje Jesúsjavabelia dovathivi peyajavaponaponanëbeje.

30 Nexata bajarajota, imoxoyo petsutojavata, marranobitsaëtoxaneto xaevanapa. 31 Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoxanetojavabelia, jai.

32 Nexata Jesús jumaitsi dovathivijavabelia:

—Paponare baja panejonenexa marranobitsaëtoxanetojavabelia, jai.

Nexata bajaraponēbeje dovathivi vecuapitsapatsibeje. Nexata baja marranobitsaētoخانetojavabelia junua dovathivi. Nexata daxita bajara pamarranobitsaētoخانetomi cujinaeyeca. Pucaxaneto itapajanitua-reca mōthopareca. Bajarajota daxita marranobitsaētoخانetomi meneta bubuna.

³³ Bajara pamarranobitsaētoخانetomi pevetavanapaevi, rēcēpeca. Itsa bajarapamonae Gadara tomarabelia pata, tsipaeba pacuenia tane. Tsi-paebanua pacuenia Jesús dovathivi vecuacapsapa dovathivi peyavaponaponaenēbeje. ³⁴ Nexata daxita bajarapatomarapijivi ponarena Jesúsjavaberena. Nexata ita tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajētatsi. Ponare baja patajanacuavecua, jai bajarapamonae Jesúsjavabelia tsipaji cujunavatsi.

9

Pacuenia Jesús jamatejemayaexana petabusipacuenabinētsi yabara pelivaisi

(Mr 2.1-12; Lc 5.17-26)

¹ Jesús runareca jera ēnēabereca. Nicabilia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinētsi. Pacamayota bocabiaba, yavētacarapatatsi. Jesús jamatabēcueneypētane pacuenia sivanajamatabēxainatsi petocapatsivitsi. “Nacatojamatejemayaexanaenatsi cajena,” pesivajamatabējaijavatsi Jesús jamatabēcueneypētane. Bajaraxuata petabusipacuenebinētsijavabelia Jesús jumaitsi mapacueniaje:

—Tajabanānē, jamatabēcuenebarēyamēre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinētsijavabelia.

³ Nexata judíovi pecujarubivi ita jumetaeyena bajarapacuenia Jesús pejumaitsijava, najamatabēxainena.

—Maponē Jesúsje Dioso apo pejitsipaecuenia cuaicuajai, jamatabējai tsenae judíovi pecujarubivi Jesús yabara.

⁴ Jesús jamatabēcueneypētane judíovi pecujarubivi bajarapacuenia pesivanajamatabēxinaejavatsi. Nexata Jesús jumaitsi judíovi pecujarubivijavabelia:

—Panesivanajamatabēxainame xanējavaberena pibisijamatabēcuene. ⁵ Paxamē apo pacacaējēpae ata itsajivi pibisiacuene pexanaeneconipanevecuaajibiaexanaenexa, pacacaējēpa picani saya jema panejumaitsinexa petabusipacuenebinētsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapētae tsipae saya jema panejumaitsijava. Itsiata baitsi jane ita apo pacacaējēpae panejamatejemayaexanaenexa petabusipacuenebinētsi, acuenebi panejumaitsinexa bajaraponējavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimē ata, ita apo jamatejema tsipae bajaraponē, nexata daxitajivi pacayapētaejitsipa apo papecacajēpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjêpa tavecuaa-jibiaexanaenexa itsajivi pibisiacuene pexanaeconomyi ata pacuenia baja exanajê maponêjavabeliaje. Nexata patanecueneyapêtaenexamê tanecaëjêpacuene tavecuaa-jibiaexanaenexa itsajivi pibisiacuene pexanaeconomyi ata, pataema pacuenia jamatejemayaexanaejitsianê maponêje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinêtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumait्सijavata, petabusipacuenabinêmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamonae jumait्सi Diosojavabelia:

—Diosomê, bitso ayaijamatabêcuenenêmê. Tsipaji jivi caëjêpaeyaexaname pinijicuene pexanaenexa, jai.

Pacuenia Jesús pijajivitonênexa junata Mateo yabara pelivaisi
(Mr 2.13-17; Lc 5.27-32)

⁹ Jesús baja vecuapona itsajota jamatejemayaexana petabusipacuenabinêtsi. Nexata Jesús penajetarucaejavata taeyeta Mateo. Mateo gobierno pejamatabêcuene impuestomatamo pematamoyanijobabiabinê. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumait्सi Mateojavabelia:

—Mateo, nepênaponare, jai.

Jejai Mateo. Nexata nonotapuna. Mateo baja napona Jesús pepêta.

¹⁰ Nexata Mateo junata Jesús pebarênabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaêto gobierno pejamatabêcuene jivijavabelia impuestomatamo petomatamoyanijobivi. Itsamonae ata nanabane, piamatabêcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuenia, jamatabêcuenenavêxaniabiaya jumait्सi Jesús pijajivijavabelia:

—Papecacujarubinê rabaja Jesús naneconita Diosojavabelia. Tsipaji gobierno pejamatabêcueneta impuestomatamo pematamoyanijobabiabivijavata, piamatabêcuenebejevijavatanua, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumait्सijava. Nexata Jesús jumait्सi fariseovijavabelia:

—Pevaëbinê raja apo vaëbi pejamatabêjemavi. Pevaëbinê raja piavitanevi vaëba. Bajara pijinia xanê ata itsinë. Sivapatajopajê tajunatsinexa pibisiajamatabêcuenevi pecapanepaenexatsi Diosojavabelia. ¹³ Paponare. Palebianame Dioso pejumelivaisibaxuto. Nexata payapêtaename pajamatabêcuene yabara jumait्सi Dioso pejumelivaisibaxutota mapacueniaje: “Jitsipajê paneitaxutotsoniataejava itsamonae. Apo jitsipaeñê saya patanetobeyabiabijavamê dajubicuene ofrendacuenia patanerajutabiabinexamê,” jai Dioso pejumelivaisibaxutota. Xanê raja apo sivapatajopaenê tajunatsinexa pamonaê baja aneconijibi tsavanapae. Biji rajane sivapatajopajê tajunatsinexa pijaneconi pexainaevi. Junataponajê bajarapamonae pecopabinexa pibisiacuene pexanaejava penajamatabêcuenepênêyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajëtaþona Diosojavabelia pexaejava apo pexaeyabiabixae yabara pelivaisi
(Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenë, paxanë pataxaejava apo paxaeyabiabinë pamatacabibeje pavajëtaþonajë Diosojavabelia. Bajara pijinia itsi fariseovi ata pamatacabibeje vajëtaþona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtaþona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifistajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsi-paji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaþona. Itsiata pamatacabixanë necaponae bajaraþomonaevexa, nexata jane baja bajarapamatacabibeje pexaejava apo xae tsane bitso tanesivanajamatabëxainaeaxae, jai Jesús Juan pijajivijavabelia.

¹⁶ Nexata Juan pijajivi perujumatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijamatabëcuenebeje pexainaeayaniva, perujumatabëcuene baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinxaxa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsi-paji perujubocodoruanë apo yanayeretsi tsipae. Tsi-paji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaxuata bepaca pejanavinoranë pejanabocodoruanëjavabelia. Nexata vinoranë peyaxanepanexa bajayajebi ata pejanabocodoronëta, jai Jesús Juan pijajivijavabelia.

Bजारapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujumatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi tosaëyaexana Jairo pexënatovayo,
petëpaevayomi, yabara pelivaisi
(Mr 5.21-43; Lc 8.40-56)

18 Jesús livaisi petsipaebanucaejavata Juan pijajivijavabelia, judíovi penacaetuatabiabibo pevetsinē parena Jesúsjavaberena. Nexata bajaraponē Jesús pitabarata yaiyataeya pematatabacabēta nucajunua. Jumaitsi Jesúsjavabelia:

—Taxēnatovayo rabaja aeconoxae netotēpa. Itsiata baitsi jane itsa poname tajaboyabelia, nexata itsa netoperabējayatsianame necobeta, icatsia netoasaē tsane, jai bajaraponē Jesúsjavabelia.

19 Nexata Jesús nonotapuna. Judíovi penacaetuatabiabibo pevetsinē pepēta Jesús, pijajivi yajava, napona. 20 Nexata Jesús namutua penajetarucaejavata, pepēnēverena imoxoyotatsi petiriva, piavitaneva. Bajarapova pijanacue ne pecapunaecujinaetsi doce baja pavaibeje xaina. Nexata bajarapova Jesús pepēnēvelia ponataba, jivibitsaētoxaneto tuat-uajējavalia. Nexata bajarapova tojayataba Jesús penaxatatsijavacopia. 21 Bajarapacuenia tojayataba Jesús penaxatatsijavacopia tsipaji bajarapova jamatabējumaitsi mapacueniaje:

—Itsa tojayatabianajē Jesús penaxatatsijavacopia, nexata tavitanjavami nevecuaajibi tsane, jamatabējai bajarapova.

22 Nexata Jesús napēnēyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabēcuenebarēyamēre. Xamē nesivajamatabējumaitsimē: “Itsa tojayatabianajē Jesús penaxatatsijava, nexata tavitanjavami nevecuaajibi tsane,” nesivajamatabējamē. Bajaraxuata jamatejemamē baja, jai Jesús bajarapovajavabelia.

Bajarapacuenia Jesús pejumaitsijavata bajarapova jamatejema baja. 23 Bajaraxuacujinae Jesús jane baja pata judíovi penacaetuatabiabibo pevetsinē pijaboyabelia. Nexata Jesús itsa pata, tane pevajēnae pepatsivi, flauta piobivinexa itsabelia caponaejitsia petēpaevayo pemēthēsinexa piobinexa. Tanenua jivi bitso pinijicuenia pematantueyabavanapaejava petēpaevayo.

24 Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tēpae. Saya raja majita, jai Jesús tsipaji yapētane Jesús piasaēyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitsijava. 25 Jesús nexata bajarapamonae bovecua pitsapaeyaexana. Nexata itsaxuayolia petēpaevayo boca, Jesús joneya. Cobepita petēpaevayo. Bajarapovayo baja namatacota. 26 Nexata daxita bajarapanacuapijivi Jesús vēnēlivaisitanetsi piasaēyaexanaejava petēpaevayomi.

Pacuenia Jesús itaxutoxaniavaeta bitso pitaxutotsēcēnaenēmibeje yabara pelivaisi

27 Itsa baja Jesús pona judíovi penacaetuatabiabibo pevetsinē pijabovecua, anijanēbeje bitso pitaxutotsēcēnaenēbeje Jesús pēnaponatsi. Bajaraponēbeje vavajaiya jumai tsaponaebeje Jesúsjavabelia:

—¡Jesús, Davidpijinē pemomo, paneitaxutotsoniataemabeje! jaiibeje tsaponae Jesúsjavabelia.

28 Itsa baja Jesús joneya pabojavabelia pona, nexata bajaraponēbeje pēnajoneyatsibeje. Nexata Jesús bajarajota jumaitsi bajaraponēbejejavabelia:

—¿Payapëtanemebeje tsaja tanecaëjÿpaecuene patacaitaxutox-anepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsibeje Jesúsjavabelia:

—Jājā, payapëtanijibeje cajena, jaibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuenecopatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutox-anepanaeyaexana, bitso pitaxutotsëcënaenëmibeje, nexata icatsia itsamonae Jesús tocaparenatsi apo pecuaicuaijainë. Bajaraponë dovathi peyajavaponaponaenë. ³³ Nexata apo pecuaicuaijainë Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamona:

—Caeto ata cajena Israel nacuata itsajivi ata apo tae mapitsicueneje, najai bajarapamona.

³⁴ Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomaranëjava, tsiquiritomaraxijava ata. Nexata bajarapatamaranëjava judíovi penacaetuatabiabibonëjava pex-anialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevim. ³⁶ Jesús jivi itsa tane, itaxutobejiobiatane. Tsipaji jivi bitso baja cajena cuerana. Apo caëjÿpaetsinua jivi penatoexanaenexa itsacueneyavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeye, sivajamatabëjai Jesús.

³⁷ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxaneto. Itsiata baitsi jane

Dioso panetonacuenebivi pacaejiviyomëbeje saya. ³⁸ Bajaraxuata Dioso-javabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi

(Mr 3.13-19; Lc 6.12-16)

¹ Jesús pijajivi ayaibitsaëtoxanetoyajuvënëvi junata saya doce ponëbeje Jesús pebarënacatuatsinexa. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitavirivavitane pecapunaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedo pexënatobeje. ³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëajavabelia canajetsijitsiatsi Jesús pijavajabitsaë pecobeyabelia pebeyaxuabinoxatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajënaeya jumaitsi pijajivijavabelia mapacueni-aje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. ⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. ¹⁰ Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsi itsanëjavabelia tonacueneba, bajarapajivi juya pexaejava barajutatsi.

¹¹ Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaeiname, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane. ¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtime, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtime Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaejavënae, bajarapatomara panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. ¹⁵ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodomatomarapijivimi, Gomorra tomarapijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaeponaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyanivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. ¹⁷ Xania baja tsane. Patajajivixaemë raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacaponaena. Judíovi penacaetuatabibonëjava pacajumatitibabeyabiabiana penaneconitsivi pejumaconitabiabimacata. ¹⁸ Patajajivixaemë pacanubiananua nacuaevetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaejavabelia, apo judíovi ata pitabarata. ¹⁹ Itsiata baitsi jane itsa pacanubiana nacuaevetsivi pitabarata, pëtsa pajamatabëbëjamë panenayajivicuaicuaijainexa bajarapamonaejavabelia. Tspaji raja paepatota panayajivicuaicuaijamëjitsia, bajarapaepatota Dioso pejamatabëcueneta pacacuaicuaijaiyaexanaena. ²⁰ Itsa panayajivicuaicuaijamë tsane, paxamë panijacuata apo pacuaicuaijamë tsane. Espiritu Santo raja pacacuaicuaijaiyaexanaena.

21 'Itsamonae pematapijivi, pejuyapijivi ata, canajetsiana nacuaevevtsivijavabelia pebeyaxuabinexatsi. Itsamonae naxocixanajetsiana nacuaevevtsivijavabelia pebeyaxuabinexatsi. Itsamonae canajetsiana paxa, pena ata, nacuaevevtsivijavabelia pebeyaxuabinexatsi. 22 Daxita nacuapijivi pacaitoya tsane patajajivixaemē. Pajivi bejiobiaexanae atatsi tsane, itsiata itsa casaē tsaponaponae tsane tanejumeconvēnētsijava, bajarapajivi capanepaenatsi Dioso pijanacuayabetsia. 23 Itsa patomarata pacabejiobiaexanaena, bajarapatomaravecua parēcēpecaename itsatomarabelia. Xaniajanē pacuenia pacatsipaebijitsiatsi. Daxita Israel nacuata penaetomaranējava abaxē patsipaebiveretsinejevamē pexanialivaisi, xanē, Daxitajivi Pematapijinēnē, itacarajeta icatsia patsianicajē.

24 'Itsajivi ata apo jamatabēcuenematatoxenetsi pecujarubinētsi. Itsajivi ata pijinia itsanē itsa pijajivitonē, apo jamatabēcuenematatoxenetsi pijatuxanenē. 25 Pacuenia pecujarubinē itsamonae copiaya bejiobiaexanatsi, bajarapacuenia icatsia bajaraponē pecujarubivi ata bejiobiaexanaenatsi. Pacuenia petuxanenē copiaya bejiobiaexanatsi, bajarapacuenia icatsia pijajivitonē ata cotocaevi bejiobiaexanaenatsi. Xanē panijatuxanenēnē: “Beelzebú, daxita dovathivi pijatuxanenē,” nejai tsabiabi itsamonae. Nexata pijinia patajajivixaemē bitso pibisiavēnēta paxamē ata cotocaevi pacajunatabiabiana, jai Jesús pijajivijavabelia.

Pacuenia Jesús pijajivi tsipaeba pecujunaviyaniva pebeyaxuabijavatsi yabara pelivaisi

(Lc 12.2-7)

26 Icatsia Jesús jumaitsi pijajivijavabelia:

—Pētsa pacujunavame jivi, pacaatiobi ata. Daxita xua jivi muetsia pibisiacuene exana, bexējavabelia cueneyapētaeponaenatsi daxitajivi. 27 Palivaisianē muetsia vajaepatojavata pacatsipaebaponatsi, bajarapalivaisianē paxamē pinijijumeta patsipaebaponaename jivi penacae-tuatabiabijavata. 28 Pētsa pacujunavame jivibevevi ata. Bajarapamonae pacabeyaxuabi ata tsipae, acuenebi matavējēa papecaitsacueniabinxaxa pepo panejamatabēcuenējavabelia. Biji rajane pacujunavare Dioso, ponē caējēpatsi papecaxuabinxaxa infiernojavabelia papecabeyaxuabicujinae.

29 'Anijanēbeje baratsuitoheje namatamota saya caepalatanēyo. Itsi-ata baitsi jane caenē ata baratsuito Dioso pepēya jemata muetsia apo jopaetsica petēpaenē. Tspaji paneaxa, Dioso, asiva baratsui ata. 30 Dioso cajena bitso pacaasiva baratsui matatoxenetsia. Nexata panematana-toxi ata, caematanatoyo canacujitsia, Dioso namataējēta. 31 Bajaraxuata pētsa pacujunavame itsacuenejavayo ata. Tspaji paxamē Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi

(Lc 12.8-9)

32 Icatsia Jesús jumaitsi pijajivijavabelia:

—Daxita pamonae tajajivi, jupa pitabarata itsa navajunupaebiana tajajivicuene, xanē ata vajunupaebianajē bajarapamonae tajajivicuene

taxa, athëbëtatsia peecaenëjavabelia. ³³ Pamonae jumai tsane itsamonaejavabelia: “Xanë cajena Jesús apo pijajivitonënë,” jai tsane, nexata pijinia bajarapamonae yabara xanë jumaitsinë tsane taxa Diosojavabelia: “Mara pamonae apo tajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi
(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpae pejinavanapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonae ata. Napijavajabitsaë tsane namataenetsia. ³⁵ Xanë apo tanenajuajumecovënëtsixaebeje, pebibeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. ³⁶ Nexata xanë apo tanenajuajumecovënëtsixae, caejivi canacujitsia bepijavajabitsaëjivi taenatsi pijamonaejivi ata.

³⁷ Pajivi nejumecovënëtsi ata, apo niasiva tsane paxa, pena ata, pi-asivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënatoyobeje xanë apo pi-asivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepënaponae tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejiobiaexanaeyanivatsi, pebeyaxuabiyaniavatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonae xaniavaetsia copiapita Jesús pijajivi yabara pelivaisi
(Mr 9.41)

⁴⁰ Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

42 Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacuene matamotsianatsi Dioso, jai Jesús pijajivijavabelia.

11

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi

(Lc 7.18-35)

¹ Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuta penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaëjava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupae-bapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaëjava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua tsipaebaponajë bepejiobivijavabelia. Daxita bajaraxua taexanaponaëjava patanetaejavamë, patsipaebianame Juanjavabelia. ⁶ Pajumaitsimënuu tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan pona-pona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ⁸ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiya pexaniajava penaxatatsinë? Paxamë rabaja payapëtaneme mapacuenieje. Pamonae naitabëtsiya pexaniajava naxatabiaba, bajarapamonae jinavanapa nacuanë pevetsivi pijabonëjava. ⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja

pepo profetanë, Diosojumepaebinë, pataneme. Nexata saya bevelia profetanë apo pataemë. ¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitisijava ata xanëjavaberena Juan yabara, Dioso pejumelivaisibaxutota jumaiti mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucaejavanexa yabara.

¹¹ Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliamatabëcuenenjivi ata, itsa nejumecovënëta tacapanepaejavanexa, bajarapajivi ayaijamatabëcuenenjivi Dioso exanaenatsi Juan matatoxenetsia.

¹² Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetarucaejava mapamatacabijavaberena ataje, ayaibitsaëtoxfaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyaniva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaebona itsamatacabi Dioso pijajivi pevetsijavanexa. Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaiti mapacueniaje: “Elíaspijinë icatsia patsiana,” jai. Bajarapacuenia tajëvelia itsa jumaiti, Juan jivibautisabinë yabara jumaiti. Tsipaji pacuenia jamatabëcuenetsi profeta Elíaspijinë, bajara jamatabëcuenetsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaiti jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcuenetsimë tsavanapae? Jumaitsinë meta tsane paxamë yabara mapacueniaje: “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. ¹⁷ Pevavajaijavata bajumaiti: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcuenetsi pamonae aeconoxae jinavanapa mapanacuataje,” janë meta tsane paxamë yabara. ¹⁸ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “Juan raja dovathi yajavaponapona!” pajamë tsabiabi jamatabëcuenenavëxaniabiaya. ¹⁹ Bajaraxuacujinae

icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajëna. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maçonëje! Ayaijava xaeyabiaba. Ayaira matavëjëa apaeyabiabanua piatijabinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata piamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajajamatabëcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovënëtsitsi yabara pelivaisi

(Lc 10.13-15)

²⁰ Itsatamaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatamaranëpijivi apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patamaranëpijivijavabelia:

²¹ ¡Bitso bepajiohimë tsane paCorazín tomarapijivimë! ¡Bitso bepajiohimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapit-sipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi.

²² Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena.

²³ Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata

exanaponajë, nexata Sodoma tomarapijivimi copabijitsipa pibisiacue pexanaejava. Najamatabëcuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacue pexanaeconi yabara. Nexata abaxë mapamatacabi ataje jivi jinavanapaejitsipa bajarapatomarata. ²⁴ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

Pacuenia Jesús pijajivi junata pejamatabëcuenesaëyaexanaenexa pejamatabëcuenecueranaejavavecua yabara pelivaisi
(Lc 10.21-22)

²⁵ Jesús pevajëtsijavata paxa Diosojavabelia jumaitsi:

—Axa, nevetsinë athëbëtsatia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamona bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecumatayatame bitso peyapëtaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicuene yabaraje. ²⁶ Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcuenetsinë, Dioso pexënatonë. Caenë taxa Dioso nejamatabëcueneyapëthane. Itsajivi ata apo jamatabëcueneyapëtae pacuenia taxa Dioso jamatabëcuenetsi. Caenënë xanë, pexënatonë, jamatabëcueneyapëtaniji. Pamona tojitsipajë tayapëtaeyaexanaenexa pacuenia taxa Dioso jamatabëcuenetsi, bajarapamonae ata yapëtaeyaexanaponaenajë. ²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacue paneexanabiabijava yabara, xanëjavaberena paponare paneajamatabëcuenesaënexa icatsia. ²⁹ Bueyubeje banavësjumacaevetabeje petsivësjumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuenecaevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneyapëtaeponaename. Tsipaji xanë xaniavaetsia pacatsipaebaponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame paneajamatabëcuenesaënexa icatsia. ³⁰ Pacuenia bueyu tsivësjumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

*Pacuenia Jesús pijajivi trigoxu namutua siricanajetarubena penacuer-
aevetsimatacabita yabara pelivaisi*

(Mr 2.23-28; Lc 6.1-5)

¹ Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso piajani. Nexata trigoxu siricanajetarubena. Xuxaeyabuatapona. ² Nexata fariseovi tane Jesús pijajivi pesiricanajetarubenaëjava trigoxu. Nexata fariseovi jumaitsi Jesúsjavabelia:

—Taema mapamonaëje. Dioso Moiséspijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaëjava, itsiata ajena penacueraevetsimatacabixae, nijajivi apo bexanae mapacuenëje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? ⁴ Davidpijinë joneya Dioso pijatemploboyalia. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa it-samonaë ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaëjava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane. ⁸ Nexata xanë, Daxitajivi Pematapijinënë, netoxanepana cajena tatsipaebinxua xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

*Pacuenia Jesús jamatejemayaexana pebi pecobetsaquenaenë yabara
pelivaisi*

(Mr 3.1-6; Lc 6.6-11)

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiabiboyalia. ¹⁰ Nexata bajarajota pebi naeca, pecobetsaquenaenë. Itsamona fariseovi bajarajota jamatabëneconitatsi Jesús. Nexata Jesús naitaxutocae vetatsi xua yabara neconitsijitsiatsi. Nexata fariseovi Jesús jamatabëcuenejëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, pacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane? ¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaitsi pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaevjavami baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi

¹⁵ Jesús jamatabëcueneyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëttoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyaniava itsamonaevjavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebiyaniava itsamonaevjavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaevjavanexa daxita pibisiacuene pexanaevi. ¹⁹ Bajaraponë itsajivijavabelia ata apo jumeanaentsi tsane. Livaisi itsa tsipaebapona, pinijijumeta apo vavajai tsane. ²⁰ Pamona xanë tajumelivaisi pejumecovënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. ²¹ Nexata daxitajivi, apo judíovi ata, sivanajamatabëcuenecopatsianatsi bajaraponë pecapanepaenexa,

jai bajayata tajëvelia profeta Isaíaspijinë Dioso pejumlahitsijava Jesús yabara. Bajarapacuenia bajayata tajëvelia jumaitsi Isaíaspijinë peyaquinaebaxutota.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaitsi Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumlahitsijava, fariseovi jumaitsi jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

²⁵ Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaënë taejitsipatsitsi pijajivi. Itsa jamatabëcuene vecuaxainaejitsipa pijajivi. Pesaë ata apo xainaponae tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumlahitsijava xanë yabara. ²⁸ Espíritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

²⁹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalialia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ 'Bjaraxuata pacatsipaebijitsiatsi, Dioso caējēpatsi daxitajivi pibisiacuene pexanaeconimi pevecuaajibiaexanaenexa. Pibisiacuenia jivi Dioso baracuaicuajiai ata, bajarapaneconi ata Dioso caējēpatsi pevecuaajibiaexanaenexa. Itsiata baitsi jane pajivi pibisiacuenia baracuaicuajiai Espiritu Santo, pacuenia paxamē pajumaitsimē, Dioso apo vecuaajibiaexanae tsane bajarapaneconi. ³² Pajivi pibisiacuenia nebaracuaicuajiai ata, xanē, Daxitajivi Pematapijinēnē, bajarapaneconi ata itsiata Dioso vecuaajibiaexanaenatsi itsa vajēta Diosojavabelia. Itsiata baitsi jane pajivi pibisiacuenia baracuaicuajiai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenē itsa nacuaita, nayapētane pavirianaecuene yabara pelivaisi

(Lc 6.43-45)

³³ Icatsia Jesús jumaitsi fariseovijavabelia:

—Pexaniavirianaenē itsa ubatsi, nacuaita pijinia pexaniacuai. Ponae pijinia pibisianaē, nacuaita pibisiacuai. Caevirianaē canacujitsia yapētanetsi itsa nacuaita. ³⁴ Bajara pijinia pacuenia paxamē ata dovathi papijajivimē, panayapētaneme paneajamatabēcuenebejejava. Nexata apo pacacaejēpae panecuaicuajiajainexa pexaniacuene yabara. Pajamatabēcuene bēpēnēa panejamatabēēthētota panajamatabēxainame, panecuibovojuotsina pitsapa panecuaicuajiajainexa. ³⁵ Itsamonae pijinia majamatabēcueneitsije. Pacuenia vjaubinae, pexaniae, pexaniacuai pijinia nacuaita, bajara pijinia jamatabēcueneitsi itsamonae. Ponē pexaniajamatabēcuenenē, pexaniacuene yabara cuacuajiai. Tsipaji pexaniajamatabēcuene xaina pejamatabēēthētota. Ponē pijinia pibisiamatabēcuenenē pibisiacuene yabara cuacuajiai. Tsipaji pibisiamatabēcuene najamatabēxaina pejamatabēēthētota. ³⁶ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaēvi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuajiajjava yabara. ³⁷ Pibisiacuenia panecuaicuajiajjava yabara Dioso pacananeconitsiaexanaena. Pexanialivaisi itsa pacuaicuajiamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

Pacuenia pibisiamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi

(Mr 8.12; Lc 11.29-32)

³⁸ Fariseovi, judiōvi pecujarubivi ata, jumaitsi Jesúsjavabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacuene Dioso athēbēvetsica peccatorobinēcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaēvi, Dioso panejumecovēnētsijavami panecopabivi. Paneitorobame picani Dioso pesaēta pinijicuene taexanaejava patacatsitaexanaenexa pataneyapētaexamē Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava pacatsitajētsianatsi. ⁴⁰ Bajayata

Jonáspijinē boca ayainē dujuainē pēnēta acueyabi pamatacabibeje, acueyabi pameravibeje yajava. Bajara pijinia pacuenia xanē ata, Dax-itajivi Pematapijinēnē, bocaenajē mēthēta acueyabi pamatacabibeje, acueyabi pameravibeje yajava. ⁴¹ Bajayata Nīnive tomarapijivimi itša jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabēcuenepēnēyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nīnive tomarapijivimi nonobapunaena Diosojavabelia papecaneconitsinexa Dioso apo panejumecovēnētsivi. Xanē majotaje ponaponajē, bitso ayaijamatabēcuenenēnē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panajamatabēcuene pēnēyorotsimēnua pibisiacuene paneexanaejavavecua. Bajaraxuata ayaineconi paxainame Diosojavabelia. ⁴² Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nototapunaena Diosojavabelia papecaconitsinexa Dioso apo panejumecovēnētsivi. Bajarapova pacaneconitsiana. Tsipaji bajayata bajarapovami tajē nacuatabuverena ata muxunarena pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē majotaje ponaponajē, bitso ayaijamatabēcuenenēnē Salomónpijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panenamuxunaevetsimēnua. Bajaraxuata Dioso pacananeconitsiaexanaena, jai Jesús tajēvelia fariseovijavabelia, judíovi pecujarubivijavabelia ata.

Pacuenia dovathi jivitonē pevejamatabēpitsapaecujinaetsi, icatsia naviarena pecovēyaberena petsijamatabēcaenexatsi icatsia yabara pelivaisi (Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itša vejamatabēpitsapa jivitonē, nexata dovathi jinaruta petseviiranējava. Jaitapona itsanējavabelia petsijamatabējonenexa penacueraevetsinexa bajaraponējavata. Itša apo caxitajarabi ponējavabelia tsijamatabējonejitsia, nexata dovathi jamatabējumaitsi: ⁴⁴ “Naviatsianajē meta icatsia tajabomijavabelia, paboverena pitsapajē,” jamatabējai dovathi, ponējavaverena pitsapa icatsia petsijamatabējonexatsi. Dovathi baja caevēa itša naviarena, caxitajaraba peyjavaponaponaenēmitsi. Nexata peyjavaponaponaenēmitsi pejamatabēēthēto, dovathi tane bepēnēsajinecaebo, bepēnēxaniavaetetsibo, bepiracajuetetsibo. ⁴⁵ Nexata dovathi icatsia sivapona peyjavapatsinexarena itsadovathivi, siete ponēbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabējumuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxē caenē itša tsijamatabēecatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaē aeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi

(Mr 3.31-35; Lc 8.19-21)

⁴⁶ Jesús abaxè jivi livaisi itsa tsipaeba bo ènètuatuajëalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabèbarècuaicuaijaisi picani Jesús. ⁴⁷Nexata itsajivi Jesús tsipaebatsi.

—Patajatuxanenè, ena raja, nejuyapijivi yajava, nuca bojumaverena. Bajarapamonae pina jitsipa pecabarècuaicuaijajava, jaitsi Jesús.

⁴⁸ Nexata Jesús jumaisi petsipaebijivitsijavabelia:

—¿Detsa pitsijamatabècuenevi taena, tajuyapijivinua? jai Jesús.

⁴⁹ Nexata Jesús pecobeta itaropita pijajivi. Jumaisi petsipaebijivitsijavabelia:

—Mara jane pamonae taenajivije, tajuyapijivinua. ⁵⁰ Tsipaji raja pajivi exana taxa, athèbètatsia peecaenè, pitorobicueniatsi, bajarapajivi cajena tajuyapijinè, tajuyapijiva, taenanua, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinè pelivaisicuenia yabara pelivaisi

(Mr 4.1-9; Lc 8.4-8)

¹ Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata. ²Nexata pucaitapata jivi ayaibitsaètoxaneto Jesús itaxutuanacaetuatatsi. Nexata Jesús runareca jera ènèabereca. Ecareca jera ènètareca. Daxita jivibitsaètoxaneto nubena tajetabovelia. ³Nexata Jesús daxitacuene livaisianè tsipaeba jivijavabelia. Jesús jumai tsaponae bajarapamonaejavabelia mapacueniaje:

—Peubinè pona pabiabelia peubinexa. ⁴ Nexata itsa pata pabita, peubixu pexucayabajabarabicuenia ubanajetaruca. Pexucayabajarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵Itsaxu pijinia othopa ibopananèjumata, itsajota bitso ira apo aitayaè. Nexata bajarapaxu bepijia juva. Tsipaji bitso ira apo aitayaè. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanèebacabomijavata. Nexata peubixu xanèebotonè caecuenia itsa yajava juva, bitso xanèebotonè maticènènatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsi nacuita. Itsabotonè capitsapa cien paxutoyobeje tsaponae. Itsabotonè capitsapa treinta paxutoyobeje tsaponae. ⁹ Pajivi jamatabènejumeyapètane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebijavabelia.

Pacuenie yabara Jesús jivijavabelia livaisi tsipaeba ècomparacióncuenia yabara pelivaisi

(Mr 4.10-12; Lc 8.9-10)

¹⁰ Jesús pijajivi imoxoyotatsi. Nexata Jesús pijajivi jumaisi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame êcomparaciõncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacuenë. ¹² Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana. ¹³ Bajaraxuata livaisi itsa tsipaebajë bajarapamonae, êcomparaciõncuenia tsipaebajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. ¹⁴ Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. ¹⁵ Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipana palivaisi jumetaena. Pejamatabëthëtojavavetsina jumeyapëtaejitsipa. Nexata xanëjavaberena najamatabëcuenepëñëyorotsipa perujumamatabëcuenecua. Nexata xanë jamatabëcuene xanepanaeyaexanaejitsipajë,

jai bajayata tajëvelia Isaíaspijinë peyaquinaelivaisita xua yabara tsipaebajë bajarapamonae apo tanejumeyapëtaejavaexa yabara.

¹⁶ Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi

(Mr 4.13-20; Lc 8.11-15)

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapëtaenexa pajamatabëcuene xaina palivaisi pacatsipaebatsi pabita peubinë pelivaisicuenia. ¹⁹ Pamonae jumetae ata Dioso pejumelivaisi, itsiata itsa

apo jumeyapētae pejamatabēēthētota, bajarapamonae bepiothopaexu pabi tuatuaējəva penajetarucaenamutojumata. Nexata najetaruca dovathi. Nexata bajarapamonae tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi. ²⁰ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barēyaya jumecovēnēta. ²¹ Itsiata baitsi jane pacuenia irabereca apo atabunepepiareca paxu othopa ibopananējumata, nexata nabijiana, bajara tsijamatabēcueneitsitsi bajarapamonae Dioso pitorobilivaisi. Tsipaji pepacuene pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopiapatatsi daxita petoayapēbejecuenetsi, itsa yalivaisibatsinua Dioso pitorobilivaisi yabara, nexata pejumecovēnētsijava bajarapalivaisi bepijia copaba. Pevajēnaeyabelia apo jumecovēnētavanapae. ²² Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabēcueneenatsi mapanacuapijicuene yabaraje. Tsipaji najamatabēxaina ayaijava palata pexainaenexa. Nexata pijacuata najamatabēcuenyamaxēitojoroba. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonae. Tsipaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapētanenua. Nexata pevajēnaeyabelia tsijamatabēcuenevitsabaponatsi Dioso pitorobilivaisi. Nexata pacuenia peubijava capitsapa itsabotonē cien paxutoyobeje tsaponae, itsabotonē sesenta paxutoyobeje tsaponae, itsabotonē treinta paxutoyobeje tsaponae, bajara tsijamatabēcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuaējə piabejejava juva yabara pelivaisi

²⁴ Dioso apo pejumecovēnētsivi, pamonaē najinavanapa Dioso pejumecovēnētsivijavata, itsamatacabi Dioso naneconitsiaexanaena. Nexata jivi peyapētaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaētoxanetojavabelia. Jesús jumaitsi mapacueniaje:

—Mara pacuene jēpaje Dioso pijajivi pevetsijavaje. Pabi pexainaenē, ēpexaniaviriatrigoxu uba pijapabita. ²⁵ Itsiata baitsi jane daxitajivi pe-majitsijavata meravi, pabi pexainaenē pijavajabitsaēnē tojunuatsi pijapabita. Nexata toubatsi trigo tuatuaējəva pibisiaviriajava, betrigobotonē pecataejava. Bajaraxuacujinae vemaxēpona baja. ²⁶ Nexata trigoxu juva. Vitsaba. Itsa baja trigobotonē namatonota, nexata matapania bajarajota nayapētane pibisiaviriajava yajava penamatonotsijava. ²⁷ Nexata pabi pexainaenē pijajivi pata petsipaebinexatsi. Pabixainaenē pijajivi jumaitsi: “Nijapabita ubame ēpexaniaviriatrigoxu. ¿De tsaeta pacuenia pitsapa pibisiaviriaxu pibisiajava peyajavajuvinexa trigoxa?” jai pabixainaenē pijajivi. ²⁸ Nexata pabixainaenē jumaitsi

pijajivijavabelia: “Tajavajabitsaenë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunaejava?” jai. ²⁹ Itsiata baitsi jane pabixainaenë jumaitsi pijajivijavabelia: “Jume. Tsipaji panexunaejavata payajavaxunaejitsipame trigobotonë. ³⁰ Copatsianatsi abaxë penacuaitsinexa. Nexata penotsimat-acabi itorobianajë tanetonotsivi copiaya pecaetuatsinexa piabejevava. Pepacunuanë exanaena. Bajaraxuacujinae bajaraxua tajuitsiana. Bajaraxuacujinae ëtrigoxu netonotsiana taetabiabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëttoxanetojavabelia.

Pacuenia mostazaxutoyo pejuvicujinae, mostazanae bepíjia vitsaba yabara pelivaisi

(Mr 4.30-32; Lc 13.18-19)

³¹ Jesús livaisi tsipaeba comparacióncuenia jivi ayaibitsaëttoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëttoxaneto naexanaena. Pabi pexainaenë mostazaxu uba pijapabita. ³² Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana bajaraponaemaxërananëjava. Bajara pijinia itsane jivi ata. Bepíjia ayaibitsaëto Dioso pijajivi naexanaena, jai Jesús jivi ayaibitsaëttoxanetojavabelia.

Pacuenia pan pexanaematabënexa, levaduravënëjava fufunaeyaexana yabara pelivaisi

(Lc 13.20-21)

³³ Jesús livaisi tsipaeba comparacióncuenia jivi ayaibitsaëttoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjépa daxita panmatabëjava, bajara pijinia itsi Dioso pijajivi pevetsijava. Yacaëjépaena daxitanacuanëjava. Petiriva pan pexanaenexa, acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjépa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjépa daxitanacuanëjava Dioso pijajivi pevetsicuenia, jai Jesús jivi ayaibitsaëttoxanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona ëcomparacióncuenia. ³⁵ Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicue ne Dioso nacua pexanaejavaveliacujinae itsajivi ata abaxë apo yapëtae, jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëttoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëttoxanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiavirijava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiavirijava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecaevanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. ⁴⁰ Nexata pacuenia piabejjava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje pevereverecaematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamona pibisiacue ne pexanabiabivi. Pamonae ata itsamonaevavabelia pibisiacue ne exanaeyaexana, bajarapamonae ata taevetsinacua netovecuajutsiana tajaángelevi. ⁴² Bajarapamonae xuabianatsi infiernojavabelia. Bajarajota nuena. Navonosiniana bitso penavixaetaexae. ⁴³ Pamonae jumecovënëtsiajinavanapa Dioso pitorobicueniatsi, bajarapamonae perabënnaitayotsiana taxa Dioso pijanacuatatsia. Pacuenia matacabipijjuameto naitayota, bajarapacuenia perabënnaitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

⁴⁴ Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëjavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataaceteta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexinaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanua, xuanë bajaraponë bajarapaira

yacomuata, bajara pijinia itsi Dioso pijajivi pevetsijava. Bitso xanepana. Bitso namatamotana, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

—Pacuenia itsi bitso pexaniavirijava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecana-jetarutsinë jaitapona pexaniavirijavanë juya pecanajetaponaenexa. ⁴⁶ Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexinae-javami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. ⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecaemat-acabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. ⁵⁰ Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexinaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanalivaisianë jivijavabelia petsipaebinxexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi

(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviata pevitsabinacuayabelia. Nexata Jesús pevitsabinacuata

taxuxuaba livaisi petsipaebijava judíovi penacaetuatabiabibota. Nexata pejumetaevitsi sivajamatabêcuenenabenajacatsi. Nexata bajarapamonae Jesús jamatabêcuenaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponê nacujaruba peyapêtaenexa mapalivaisije? ¿De tsaeta pacuenia caêjêpatsi mapacuenia Dioso pesaêta pinijicuene pexanaenexaje? ⁵⁵ Maponêje vaxaitsiyajuvênênê, carpinteronêmi pexênato. Maponêje María pexênato. Bajaraponê pejuyapijivi, Santiago, José, Simón, Judas. ⁵⁶ Papetiriavi ata vajatomarata jinavanapa, maponêje pejuyapijivi. ¿Detsa verena nexata capitsapa palivaisianê nacatsipaebapona maponêje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovênêtsitsi. Bajaraxuata Jesús Dioso pesaêta pinijicuene pexanaejava bajaratomarata bitso apo tsitaexanae.

14

Pacuenia Juanpijinê jivibautisabinêmi beyaxuabatsi yabara pelivaisi (Mr 6.14-29; Lc 9.7-9)

¹ Herodes, Galileanacua pevetsinê. Nexata Herodes Jesús vênêlivaisitanetsi Dioso pesaêta pinijicuene pexanaponaejava. ² Nexata Herodes pijajivijavabelia jamatabêcuenenavêxaniabiaya jumaitsi Jesús yabara:

—Juanpijinêmi raeta jivibautisabinêmi icatsia asaê petêpaecujinae. Bajaraxuata caêjêpatsi Dioso pesaêta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxê Juanpijinê itsa asaê, Herodes pijajivi, vajabitsaêvi, itoroba Juanpijinê pevaetabinexatsi. Nexata vajabitsaêvi Juanpijinê cobecêtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabêcueneta. Herodíasva picani copiata pita Felipe, Herodes pejuyapijinê. Nexata Herodes pejuyapijinê pijava yacajêrêta. ⁴ Nexata Herodes pejuyapijinê pijava peyacajêrêtsixae, Juanpijinê abaxê itsa apo vaetabitsi, Herodes muxujioba. Juanpijinê jumaitsi Herodesjavabelia:

—Acuenebi raja nejuyapijinê pijava nepitsijava, jai Juanpijinê Herodesjavabelia.

⁵ Bajarapacuenia Juanpijinê Herodes pemuxujibixae, Herodes picani jamatabêbeyaxuabatsi Juanpijinê. Itsiata baitsi jane abaxê apo beyaxuabitsi. Tsipaji Herodes cjunava jivi. Daxitajivi Juanpijinê yapêtanetsi Diosojumepaebinecuene. ⁶ Nexata Herodes itsa najamatabênápita penaexanaematacabi, fiesta exana. Herodes junata jivi ayaibitsaêto. Nexata bajarapafiestamatacabi pejionêyo, pijava pexênatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barêitajitsipa peyavajibijava pejionêyo. ⁷ Nexata Herodes najumecapanepaeya pexaniajajumeta jumaitsi pejionêyojavabelia:

—Xua jitsipame nevajëtsianame. Nexata itsa nevajëtsianame, it-sacunejava ata carajutsianatsi, jai Herodes najumecapanepaeya pe-jionëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejionëyo itsa jumaitsi, Herodes bejamatabëjiobi tsanajetsireca. Herodes nexata acunebi: “Jume,” pejaijava. Tsipaji baja najumecapanepaeya jumaitsi pejionëyojavabelia pexaniajajumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë. ¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodiasva yapëtane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinexa Juanpijinë pebeyaxuabijavatsi.

*Pacuenia Jesús pexaejava rajuta cinco mil ponëbeje yabara pelivaisi
(Mr 6.30-44; Lc 9.10-17; Jn 6.1-14)*

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëttoxaneto yapëtane itsabelia Jesús pona. Nexata pijatomaranë vecuapona. Matatsënëa najetarubena pepëjajitsivitsi Jesús. ¹⁴ Itsa Jesús nonotajuna jeravecua, tane jivibitsaëttoxaneto. Nexata Jesús itaxuto-bejiobiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacopona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia.

²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. ²¹ Pamonae pexaejava xane, ayaibitsaëtoxaneto. Cinco mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtatsi.

Pacuenia Jesús mene itaboxoya najetaruca yabara pelivaisi
(Mr 6.45-52; Jn 6.16-21)

²² Jesús jivi ayaibitsaëtoxaneto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta peniavibijava, Jesús junaya petsutojumabetsia caenë pevajëtsinexa Diosjavabelia. Nexata Jesús yameravibatsi bajarapatsutojumatatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matacabijitsia, Jesús pijajivi pecovëvelia imoxoyotanjataruca. Jesús najetaruca mene itaboxoya. ²⁶ Jesús pijajivi ita tanetsi mene itaboxoya penajetarucaejava, nabenjaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalía, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalía pepatsinexa Jesúsjavabelia. ³⁰ Itsiata baitsi jane Pedro ita tane jovibo piasejjava, bitso cujunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepíjia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumaebiataneme? jai Jesús.

³² Nexata baja Jesúsbeje Pedrobeje jera ënëabelia ita nonoliabeje, joviboxanetomi baja ajibi tsaxuabi. ³³ Nexata daxita jerata peponaevi pematabacabëta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi
(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi ita yapëtanetsi Jesúscuene, nexata

daxita bajarapanacuajava vajunupaebatsi pepatsijava. Nexata toca-patatsi daxita piavitanevi Jesúsjavaberena. ³⁶ Piavitanevi pecapatsivi pinijucuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje peca-tojayatsinexa nenaxatatsijavacopia, jai tsabiabi.

Nexata daxita pamonae Jesús penaxatatsijavacopia tojayataponatsi, jamatejema tsaponae piavitanejavavecua.

15

Pacuenia Jesús tsipaeba xua jivi jamatabëcuenebijianatsi yabara pelivaisi (Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesúsjavabelia:

²—Jesús, nijajivi naneconita Diosojavabelia. Tsipaji nijajivi apo jume-covënëtsiajinavanapae vajasalinaivi pijacuene. Nijajivi itsa xane pexae-java, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane paxamë jivi pamuxubijiapenetaabiabame peyaiyataeyaniva paxajivi, penajivi ata. Paxamë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata Dioso pejumaitsi-jume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejitsipaena saya pijumeta. Itsiata pepo tanejitsipae-jamatabëcuene nevecuatajë tsane. ⁹ Saya baitsi bajarapamonae pijajumaitsitata tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane, jai tajëvelia Isaíaspijinë

peyaquinaelivaisita Dioso pejumaitsijava paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeypëtaenexamë pat-acatsipaebilivaisi. ¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijnanaetsi. Apo vënananeconitsi Diosojavabelia. Baitsi rajane xua jivi pecuibota pibisiacuena cuacuaijai, bajara jane xua jivi bajamatabëcuenebijnatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, çyapëtaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetojavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipaebame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijnanaetsi,” jamë, jai Pedro Jesúsjavabelia.

¹⁶ Nexata Jesús jumaitsi:

—çPaxamë ata tsarovia abaxë apo panejumeyapëtaemë? ¹⁷ Daxitacuene xua jivi xane pecuibovojotota, junua pecotsorotubareca. Bajaraxuacujinae vecuapitsapatsi. ¹⁸ Baitsi rajane xua jivi pecuibuatsina pitsapa pecuacuaijainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijnatsi. ¹⁹ Tsipaji rabaja jivi pejamatabëëthëtovavetsina pitsapa pibisiacuene penajamatabëxainanexa. Pitsapa jivi pebeyaxuabijamatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petirivijavabelia pebi penaperabëquenetsiatæ jamatabëcuenenexa. Pitsapa penacobetoxotsijamatabëcuenenexa. Pitsapa itsamonae pexanaejava yabara najumetsënëtsiaya pepaebijamatabëcuenenexa. Pitsapa itsamonae yabara najumetsënëtsiaya pebaracuacuaijai jamatabëcuenenexa. Daxita bajarapajamatabëcuene pitsapa jivi pejamatabëëthëtovavetsina. ²⁰ Daxita bajarapajamatabëcuene jivi jamatabëcuenebijnatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijnanaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Piniijumeta bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonaë Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiy-ataeya pematabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenon-
aenexa. Abaxë copiaya veyavenonajë tajanacuapijivi, judíovi. Xamë
copiaya itsa cayavenonaejitsipatsi, nexata pacuenia pejevaxi pexae-
javaminexa yacajërëtsipajë tarajutsinexa avirixijavabelia, bajara itsinë
tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi
ata baxane pexainanenëtsi pexaeyecaemesa bëxëpanareca piothopaepërë.
Bajara pijinia pacuenia itsiata itsanacuapijiva atanë, neyavenonare, jai
bajarapova Jesúsjavabelia.

²⁸ Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia
pecayavenonaenexa! Nexata pacuenia jumaitsimë, bajarapacuenia
Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta to-
jamatejematsi baja pijabotalia.

*Pacuenia Jesús jamatejemayaexana ayaibitsaëtoxfaneto piavitanevi
yabara pelivaisi*

²⁹ Itsa panacuata eca Tiro tomarabeje Sidón tomarabeje, Jesús baja
vecuapona. Nexata Jesús najetaruca Galilea pucaxaneto muxubërëa.
Nexata Jesús petsutojumabetsia junaya. Nexata petsutojumatsia Jesús
ecojopa. ³⁰ Nexata jivi ayaibitsaëtoxfaneto pata Jesúsjavaberena. Tocap-
atatsi pejayujayunaevi. Tocapatatsinua bitso pitaxutotsëcënaevi. Toca-
patatsinua apo pecuaicuaijaivi. Tocapatatsinua penabejenaevi. Toca-
patatsinua ayaibitsaëtoxfaneto piavitanevi. Bajarapamonae tojebatsi Jesús
pitabarata. Nexata Jesús jamatejemayaexana daxita bajarapamonae.

³¹ Nexata jivi jamatabëcuenenabenajaca itsa tane pecuaicuaijaijava apo
pecuaicuaijaivimi. Jesús xanepanaeyaexana penabejenaevimi ata.
Xanepanaeyaexana pejayujayunaevimi ata. Itaxutoxanepanaeyaexana
bitso pitaxutotsëcënaevimi ata. Nexata jivi itsa tane bajarapacueni,
jumaitsi Diosojavabelia: “Diosomë, bitso ayaijamatabëcuenenëmë, paIs-
rael nacuapijivinë patajaDiosomë,” jai bajarapamonae.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi

(Mr 8.1-10)

³² Jesús jivi ayaibitsaëtoxaneto pënjajinavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipañë taitorobijava peponaenexa pijabonëjavabelia. Namuto epatua meta cuenabijitsipatsi piäjani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibitsaëtoxanetoje? Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata. ³⁶ Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetojavabelia. ³⁷ Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë.

³⁸ Pamona pexaejava xane, ayaibitsaëtoxaneto. Cuatro mil ponëbeje namatajëtatsi xaniavaetsia. Petiriavi, pejevaxi ata, apo namatajëtsitsi.

³⁹ Pexaecujinae pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuayabelia.

16

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonae Jesús jamatabëcuenejëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuene athëbëvetsica pitorobinëcuenetsitsica.

² Nexata Jesús jumaitsi bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tsipaji itaboxo tsobia,” pajamë tsabiabi. ³ Pamatacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayajitsia daxita matacabi. Tsipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tsipaji itarërëbo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë,

itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisiajamatabëcuene xaina pamona copaba Dioso pejumecovënëtsiyavami. Bajarapamonae picani nitoroba Dioso pesaëta pini-jicuene taexanaejava tatsitaexanaenexa tanyapëtaenexa pepacuene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mr 8.14-21)

⁵ Jesús pijajivi nicabilia puca itsapanabelia. Nexata nacofënëta pamarue. Apo caponae pan. ⁶ Nexata Jesús pijajivi muxujioba pejumecovënëtsiyaniva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueni-aje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsiyaniva. ⁷ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaijai bajarapacuenia Jesús pejumaitsijume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponae,” panajamë? ¡Apo payapëtaemë tsipaji tanecaëjëpaejava taexanaenexa pan itsa namatavenonatsi! ⁹ Paxamë abaxë apo panejumeyapëtaemë. ¿Apo panajamatabënapitsimë tsipaji pacuenia exanajë pamatacabi pan namatavenonatsi? Tsicobetsanajë cinco papanbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë?

¹⁰ ¿Apo panajamatabënapitsimëna tsipaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajaramatacabi pavënëbame peyajuvënënacopabijavanë bemapirecuenia pexanaejavanë? ¹¹ Itsa pacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapëtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi

(Mr 8.27-30; Lc 9.18-21)

¹³ Jesús, pijajivi yajava, najetaruca Cesarea de Filipovënë tomaramux-unenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁴ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremiaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënë icatsia asaë,” jai tsabiabi itsamonae xamë yabara, jai Jesús pijajivi.

¹⁵ Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

¹⁷ Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenabarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenënë. Biji rajane taxa, athëbëtatsia peecaenë, cayapëtaeyaexana. ¹⁸ Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenënë. Nexata dovathi apo jamatabëcuenematatoxenetsitsi tsane. ¹⁹ Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuapijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebianiva itsajivijavabelia ata: “Mara ponë Cristoje, Dioso athëbëvetsica pitorobinëtsica jivi peapanepaenexa,” pejaiyaniva.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mr 8.31-9.1; Lc 9.22-27)

²¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi maticabita, icatsia asaënë tsane, jai Jesús tajëvelia pijajivijavabelia.

22 Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

23 Nexata Jesús Pedrovecua napënëyorotaxuaba. Taenuca pijajivi penaevjavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Nejamatabëcuenejëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

24 Nexata Jesús jumaitsi pijajivijavabelia:

—Pajivi jitsipa tanepënaponæjava, bajarapajivi copatsi pejitsipaecuenia penajamatabëxainabiabjavami. Exanaponaponæ taitorobicuenia. Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesæ taponaponænaenexa. Nexata jane baja xuacujinae nepënaponæna. 25 Pajivi exanaponapona penatojitsipaecuenia, apo xainæ tsane matacabi apo peverevereæjava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainæna matacabi apo peverevereæjava. 26 Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainæ ata, mapanacuapijicueneje, itsiata nacuerata. Tsipaji pexainæcuene apo capanepæ tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyanaiva Diosovecua. 27 Xanë, Daxitajivi Pematapijinënë, yajavapatsianicajë taxa Dioso pijapenivenivenæcotia. Yajavapatsianicajënuu tajaängelevi. Nexata matamotaponaenajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexainævi. 28 Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajaivi ayaibitsaëtöxaneto naexanaena. Nexata paxamëyajuvënëvi pepuatae tsane xanë tajajivi ayaibitsaëtöxaneto taevetsijava, tæpaena, jai Jesús pijajivijavabelia.

17

Pacuenia Jesús caepatoyo perabënivenivenataba yabara pelivaisi (Mr 9.2-13; Lc 9.28-36)

1 Jesús petëpæjavanexa tajëvelia penavajunupaebicujinae, seis pamacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan. 2 Nexata petsutojumatsia Jesús perabënivenivenareca bajarapamonæ pitabarata. Pacuenia matacabipijijuumeto banaitayota, bajarapacuenia Jesús itabaranaitayota. Penaxatatsijavareca, daxita nivenivenæya niojai. 3 Nexata bajarajota Jesús pijajivi tane bajayata petëpaenëmibeje, Moiséspijinëbeje Elíaspijinëbeje. Jesús barëcuaijaijaisi bajaraponëbeje. 4 Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxæ panebarëponame! Itsa jitsipame, paca-toexanaenatsi acueyabi pabobërëtobeje. Itsabobërëto xamënexa tsane.

Itsabobērëto Moisésnexa tsane. Itsabobērëto Elíasnexa tsane, jai Pedro Jesúsjavabelia.

⁵ Itsa abaxë Pedro cuaicuaijai tsanucae, penaitayotsiitarërëbo mataacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Dioso pejumaitisijava: “Mara ponë taxënato, tasivanëje. Bitso sivajamatabëcuenebarëyanë. Pajumetaema bajara-ponë,” pejaijavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumaitisijavatsica, irataeya othopa irata. Jesús pijajivi bitso najunaviaca. ⁷ Nexata Jesús imoxoyolia pijajivi. Jayalia. Jumaitsi pijajivijavabelia:

—Panonobapunare. Pëtsa pajunavame, jai Jesús pijajivijavabelia.

⁸ Nexata Jesús pijajivi itsa naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaenë tsane tatëpacujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpacujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

¹¹ Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Xaniajai rabaja pacuenia judíovi pecujarubivi jumaitsi. ¹² Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijini pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

¹³ Nexata Jesús pijajivi jumeyapëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mr 9.14-29; Lc 9.37-43)

¹⁴ Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaibitsaëttoxaneto. Nexata pebi Jesús imoxoyorenatsi. Bajaraponë Jesús yaiyataeya pematatabacabëta nucajunua Jesús pitabarata. Bajaraponë jumaitsi Jesúsjavabelia:

¹⁵ —Jesús, netoitaxutotsoniataema taxënatonëyo. Netodevacaibababatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia. ¹⁶ Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tane-tojamatejemayaexanaenexa, jai bajaraponë Jesúsjavabelia.

¹⁷ Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaējēpae pejevaxinē panevecuacapitsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaënë tsaponapnae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

¹⁸ Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

¹⁹ Bajaraxuacujinae Jesús pijajivi barëcuaicuaijaiti pijaepatojavata. Jesús pijajivi jumaiti:

—Patajatuxanenë, ¿detsa xuajitsia meta paxanë apo panecaējēpae patavecuacapitsapaenexa dovathi? jai Jesús pijajivi.

²⁰ Nexata Jesús jumaiti pijajivijavabelia:

—Apo pacacaējēpae pejevaxinë panevecuacapitsapaenexa dovathi. Tsiipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaējēpaejitsipa Dioso pesaëta pinijicuenene paneexanaenexa. Nexata itsa pajumaitsimë tsiipae mapatsutoxanetojavabeliaje: “Vecu-natixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsiipae itsa pepacuenexaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsiipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. ²³ Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaejava petëpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

²⁵ Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaevetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevetsivi pijajivi yanijobabiaba impuestomatamo? ¿Nacuaevetsivi tsaja pijamonaejavabelia? Itsa jume, ¿saicayavijavabelia tsaja, nacuaevetsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevetsivi raja pijajivi impuestomatamo yanijobabiaba saicayavijavabelia, nacuaevetsivi pevetsinacuata pejinavanapaevijavabelia. Apo yanijobabiabi nacuaevetsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevetsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatomotsinexa impuestomatamo templobo pevetsivijavabelia taxa Dioso pijatemploboxae. ²⁷ Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetovjavabelia. Ejëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamatamotsinexabejë impuestomatamo xanë tamatomotsinexa, xamë ata nematomotsinexa. Nexata bajarapalatanëyo caponaename impuestomatamo nematomotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënëne panevecuaayaijamatabëcuenenë?” jai Jesúsjavabelia yabara pelivaisi

(Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënëne bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuatuajëta nuteta pejevaxinëyo. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuene copata Diosojavabelia Dioso pevetsinexatsi. Nexata paxamë itsa apo panajamatabëcuene pënëyorotsimë tsane perujumatabëcuene vecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë

natae, pacuenia mapapejevaxinëyo jamatabëcueneitsije. ⁵ Pajivi copiapita tanejumecovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi
(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi. ⁷ ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitocaponiena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ 'Bajaraxuata panecobeta, panetaxuta ata, pibisiacuene itsa paexaname, panacobecacure. Panataxucaure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaesotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi
(Lc 15.3-7)

¹⁰ Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabibinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjere mapacueneje. Pebi xinaejitsipa cien ponëbeje oveja. Nexata itsa toyajuvënënxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. ¹³ Xaniajanë pacuenia pacatsipaebijitsiatsi. Bajaraponë itsa caxitarabijitsipa pijaoveja, petonaxuabinëmitsi, bitso barëyataejitsipa.

Nexata noventa y nueve ponēbeje, apo petonaxuabivitsi, pesivajamatabēcuenebarēyajava, matatoxenetsia bitso sivajamatabēcuenebarēya tsipae petonaxuabinēmitsi. ¹⁴ Bajara pijinia pacuenia paneaxa ata, athēbētatsia peecaenē, apo jitsipae pevecuanaxuabinexatsi caejivi ata mapitsipejavaxijivixi ataje, tanejumecovēnētsivi, jai Jesús pijajivibelia.

Pacuenia Dioso pejumecovēnētsijivi bebarajamatabēcuenexanepana, it-sacueniabi atatsi itsajivi, yabara pelivaisi
(Lc 17.3)

¹⁵ Icatsia Jesús jumaitsi pijajivijavabelia:

—Itsanē Dioso pejumecovēnētsinē pibisiacuene papecatoexanaejava, itsa pavēnēlivaisitaename, xaniavaetsia payanijobianame caenējavata. Nexata xaniavaetsia itsa panabarēcuaijaijamebeje, panabarajamatabēcuene xanepanaenamebeje. ¹⁶ Xaniavaetsia itsa apo pacabarēcuaijaijajai tsane, nexata Dioso pejumecovēnētsinē pajunatsianame caenē, anijanēbeje ata, paneyajavaponaenexa pibisiacuene papecatoexanaenējavabelia pemuxujobinexatsi. Nexata bajaraponēbeje pacajumetaena xaniavaetsia panebarēcuaijaijajava pibisiacuene papecatoexanaenējavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. ¹⁷ Ponē pibisiacuene pacatoexana, itsa apo namuxunaevetsi tsane paneyajavaponaenēbeje ata pemuxujobijava, nexata daxita Dioso pejumecovēnētsivi penacaetuatsijavata, payanijobianame papibisiacuene pacatoexana. Nexata ponē pibisiacuene pacatoexanaena, daxita Dioso pejumecovēnētsivi muxujobianatsi. Bajaraponē itsa apo namuxunaevetsi tsane, muxujobi atatsi Dioso pejumecovēnētsivi, nexata bajaraponē pataename Dioso apo pejumecovēnētsinēcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athēbēnacuatatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athēbēnacuatatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanēmēbeje itsa panajamatabēcuenejēpamebeje xua pavajētsijitsiamēbeje Diosojavabelia, nexata taxa, athēbētatsia peecaenē, pacajumecovēnētsianabeje xua pavajētamebeje. ²⁰ Tspaji itsajota anijajivibeje, acueyabi ata, nacaetuata, tanejumecovēnētsivi, bajarajota xanē bajarapamonae yajavaecaenajē, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenē, panetsipaebame rabaja. Panejumaitsimē mapacueniaje: “Itsajivi Dioso pejumecovēnētsijivi pibisiacuene itsa pacaexanaena, pajamatabēcaevianame. Barajamatabēcuenexanepanaeya pataename. Itsa pavēnēlivaisitaename pibisiacuene papecatoexanaejava, xaniavaetsia payanijobianame caenējavata. Nexata xaniavaetsia itsa panabarēcuaijaijamebeje, panabarajamatabēcuene xanepanaenamebeje,” panejamē. ¿Detsa xuabeje pibisiacuene nexanae ata, pibisiacuene

netoexanae atanua, jamatabëcaevianajë barajamatabëcuenexanepanaeya tataanexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinë. Biji rajane siete pase-tentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponë apo jitsipae pebarajamatabëcuenexanepanaenexa itsanëjavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaevetsinë pijajivijavabelia baexana. Nacuaevetsinë jitsipa piamoneyabivitsi pematamotsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarëparenatsi ponë bitso ayaijava amoneyabatsi, baitsi millones de pesos piamoneyabinëtsi. ²⁵ Nexata bajaraponë apo xainae pematamotsijavanexatsi. Nexata nacuaevetsinë itoroba pijajivi. Jumaitsi: “Mara ponë bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajara-pacuenia pitsianajë tsiquirijavayo ata taneamoneyabijavamatamo,” jai nacuaevetsinë pijajivijavabelia. ²⁶ Nexata ponë amoneyaba, nacuaevetsinë pitabarata pematabacabëta nucajunua. Pinijicuenia vajëta nacuaevetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevetsinë itaxutotsoniatane piamoneyabinëtsi. Nexata nacuaevetsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevetsinë piamoneyabinëtsijavabelia. Bajaraxuacujinae copata baja penaviatsinexa. ²⁸ Nexata bajaraponë penaviatsinexa, ajena pitsapalia nacuaevetsinë pijabovecua, caxitajarabaxuaba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetasaca asaëyata. Jumaitsi bajaraponëjavabelia: “Nematamore taneamoneyabijavamë,” jai. ²⁹ Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponë piamoneyabinëtsi apo itaxu-totsoniatæ. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹ Nexata nacuaevetsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamona bitso najamatabëxaina. Nexata nacuaevetsinë pijajivi ponalia petsipaebinexa bajaraxua pijatuxanenëjavabelia. ³² Nexata nacuaevetsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocapatatsi,

nacuaevevtsinē jumaitsi bajaraponējavabelia: “Niajamatabēcuenebejenē baja rovia. Catoiquinatsi rabaja picani taneamoneyabijavamē. Tsipaji pinijicuenia nevajētame. ³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinē,” jai nacuaevevtsinē. ³⁴ Nexata nacuaevevtsinē bitso baraanaepana millones de pesos piamoneyabinētsijavabelia. Nexata nacuaevevtsinē jumaitsi pijajivijavabelia: “Bajaraponē pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ēpematamoveretsijavabelianexa daxita taneamoneyabijava,” jai nacuaevevtsinē, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamē ata taxa, athēbētatsia peecaenē, pacaexanaena, itsa apo pajamatabēcaevimē tsane panebarajamatabēcuene xanepanaenexa pamonaē pacaitsacueniaba, jai Jesús pijajivijavabelia.

19

Pacuenia Jesús jivi livaisi tsipaeba penacojiobinē pijava pexuabiyaniava yabara pelivaisi

(Mr 10.1-12; Lc 16.18)

¹ Jesús pijajivi pemuxujiobicujinae pebarajamatabēcuene xanepanaenexa itsamonae itsacueniabi atatsi, Jesús baja pona Galilea nacuavecuā. Jesús nexata pata Judea nacuayabelia, Jordánmene itsapanabelia. ² Jivi ayabitsaētoxaneto pēnaponatsi. Bajarajotalia Jesús jamatejemayaexana piavitanevi.

³ Nexata fariseovi Jesús imoxoyorenatsi. Jamatabēcueneējēbiaya yanijobatsi. Jesús bijiaya itsa jumeconaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa itsacuenējavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimē tsipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniaje: “Pebi itsa nacojioba pijavajavabelia, banatsata paxavecuā, pena atavecuā. Nexata Dioso tane anijajivimibeje becaejivi,” jai Dioso pejumelivaisibaxutota. ⁶ Nexata Dioso apo tae beanijajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinē copata penacojiobinē petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabēcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponē pijava xuaba, itsanējavabelia bajarapova pevitota pibisiacuenē apo

vecuaexanae atatsi, bajaraponë naneconita Diosojavabelia pijava pexu-abixae. Nexata pijava pexuabinë ita nacojioba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuena totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, pova abaxë Dioso totanetsi itsanë pijavacuena, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Ita bajarapacuenia pebi apo tocopatsitsi itaxutojema pijava pexu-abinexa, nexata meta baja apo benacojiobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamonae Dioso jamatabëcuene yavenonatsi. ¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuene caëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

*Pacuenia Jesús jumaitsi pejevaxijivixijavabelia yabara pelivaisi
(Mr 10.13-16; Lc 18.15-17)*

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponaenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamonae jitsipa pejonejava Dioso pijanacuayabetsia, bajara pijinia pacuenia jumeabinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacu-jitsia. Bajaraxuacujinae Jesús baja pona bajarapanacuavecua.

*Pacuenia pevëjëato, bitso pexainaenë, cuaicuaijai Jesúsjavabelia yabara pelivaisi
(Mr 10.17-31; Lc 18.18-30)*

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa matababi apo pevereverecaejava? jai pevëjëato.

¹⁷ Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matacabi apo peveverecaeyava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

¹⁸ Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaeyava yabara najumetsënëtsiaya paebame. ¹⁹ Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

²⁰ Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua neto-saica abaxë taexanaenexa? jai pevëjëato.

²¹ Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaeyava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaeyava Dioso pijanacuatatsia. Bajaraxuacujinae nepënaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsi-
java, najamatabëxainaeaya baja vecuapona Jesús. Tsipaji pevëjëato daxi-
tacuene bitso pexainaenë. Nexata pevëjëato apo jamatabëjumecovënëtsi
palivaisi Jesús tsipaeba.

²³ Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë, tsiayapëbejetsi bitso penajamatabëcuenecopatsinexa Dioso-
javabelia pecapanepaenexatsi Dioso pijanacuayabetsia. ²⁴ Icatsia
matavëjëa pacajumaitsiatsi. Pacuenia camello acuenebi pejonejava
palutaetoitaxutovojotualia, bajara pijinia pacuenia bitso pexainaenë
acuenebi tsane pejonejava Dioso pijatomarabetsia, jai Jesús pijajivijav-
abelia.

²⁵ Jesús pijajivi itsa jumetane bajarapacuenia Jesús pejumaitsijava,
bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaeivi ata
itsa apo panepae tsane Diosojavabelia? jai.

²⁶ Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojav-
abelia. Caenë Dioso caëjëpatsi. Dioso raja caëjëpatsi daxitacuene pex-
anaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxinae-
javami. Nexata baja pacapënanjavanapatsi. ¿Detsa xua meta panerajut-
siana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatacabi paxamë ata, doce paponëmëbeje patanepënaninavanapaevimë, paenaename, pacanenëmë canacujitsia, panijatronota vajanajuaevetsinexa xua evetsianajë. Nexata paxamë paenaename jueznëcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijinëmi pexi, doce ponëmibeje, pemomoxi. ²⁹ Daxita pamonaetajamatabëcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonaerajutsianatsi ayaijava bitso pepuenetsijavanëmi mata-toxenetsia. Caejavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabi apo peverevereaejava. ³⁰ Pamonaeeconoxae mapamatacabitaje ayaijamatabëcuenevi tanetsi, bajarapamonaetsamatacabi Dioso beveliajamatabëcuenevi exanaenatsi. Pamonaepijinia mapamatacabitaje beveliajamatabëcuenevi tanetsi, bajarapamonaetsamatacabi Dioso ayaijamatabëcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi

¹ Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijavapijanacuatatsia, jëpa mapalivaisije. Pabixaneto pexainaenë ponapona. Ajena matacabi tsarucapona, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonaee. Nexata itoroba pijapabiabelia petonacuenebinexatsi. ³ Bajaraxuacujinaejumeto baja tajë itsa rucaina, a las nueve, naropota icatsia. Taenuba tomara tuatuajëta pebijivi, saya jema pejinavanapaevi. ⁴ Nexata jumaitsi bajarapamonaeejavabelia: “Paxamë ata paponaremeliatajapabiabelia. Panetonacuenebianame. Pacamatamotsianatsi rajaxaniavaetsia,” jai pabixainaenë. ⁵ Nexata bajarapamonaeeata ponalia petonacuenebinexatsi. Bajaraxuacujinae, matonejeepatota, junata icatsia itsamonaee. Bajarapamonaeeata ponalia petonacuenebinexatsi. Bajaraxuacujinae, bejamatabëcuene a las tres, junata icatsia itsamonaee. Bajarapamonaeeata ponalia petonacuenebinexatsi. ⁶ Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatuajëareca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaitsi bajarapamonaeejavabelia: “¿Detsa xuajitsia saya daxitamatacabi pajinavanapame panacuenebinejevamë?” jai. ⁷ Nexata bajarapamonaeejumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaitsi: “Paxamë ata paponaremeliatajapabiabelia patanetonacuenebinexamë. Pacamatamotsianatsi rajaxaniavaetsia,” jai pabixainaenë. Nexata bajarapamonaeejejai. Ponalia petonacuenebinexatsi. ⁸ Nexata baja juameto itsa

tabujuniya, pabixainaenē jumaitsi pijajivitonējavabelia: “Junare baja tanetonacuenebivi. Matamobare baja. Copiaya matamobare pamona pepacotocaevi pejonevi. Pamona pepacopiaya pejonevi cotocaevi matamobaname,” jai pabixainaenē pijajivitonējavabelia. ⁹ Nexata pamona pepacotocaevi junua a las cinco penacuenebinexa, parena pematamobinexatsi. Nexata caenē canacujitsia matamobatsi caedenario. ¹⁰ Nexata daxita pamona bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamona jamatabējumaitsi: “Caedenario meta pematatsēnēa vaxaitsi nacamatamobiana. Tshipaji copiaya vaxaitsi junuatsi vajanacuenebinexa,” jamatabējai bajarapamona. Itsiata baitsi jane bajarapamona ata, caenē canacujitsia, matamobatsi caedenario tsapona. ¹¹ Nexata bajarapamona penacuenebimatamo baja itsa nota, baraanaepana pabixainaenējavabelia. ¹² Jumaitsi bajarapamona: “Mapamona cotocaevi pepatsivi, nacueneba saya caehora. Paxonē baja rovia ayaicuenia panacuenebajē. Icotia daxitamatacabi panetsajava. Itsiata mapamona matamobame pacuenia panematamobame,” jai bajarapamona. ¹³ Itsiata baitsi jane pabixainaenē jumaitsi bajara pamonaeyajuvēnēnējavabelia: “Itsacuenējavayo ata pibisiacuene apo pacaexanaetsi. Patacajunatsijavata patanetonacuenebinexamē, caedenario pacatsipaebatsi patacamatamotsinexa patanetonacuenebimatamomē. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonējavabelia. Pamona cotocaevi junua tanetonacuenebinexa, bajarapamona ata matamobajē pacuenia pacamatamobatsi. Bajarapacuenia matamobajē pacuenia xanē jitsipajē. ¹⁵ Tajapalataxae, netoxanepana pacuenia jitsipajē tarajutsinexa. ¿Pacobecaēbame tsaja bajarapamona ayaijava tarajutsixae? jai pabixainaenē petonacuenebivitsi yajuvēnēnējavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamona mapanacuata ayaijamatabēcuenevi tanetsi, bajarapamona itsamatacabi Dioso beveliajamatabēcuenevi exanaenatsi. Pamona pijinia mapanacuata beveliajamatabēcuenevi tanetsi, bajarapamona itsamatacabi Dioso ayaijamatabēcuenevi exanaenatsi. Bajarapacuenia Dioso exanaena tshipaji picani jivi ayaibitsaētoxaneto Dioso junata. Itsiata bajarapamonaeyajuvēnēni, caejiviyobeje saya, Dioso jumecovēnēta, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaēto yajava, najetaruca namutua, itsamona yajava. Nexata bajarapamonaevecua epijajivi, doce ponēbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajarajotalia xanē, Daxitajivi Pematapijinēnē, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judiōvi pecujarubivi pecobeyabelia ata. Nexata xanē neneconitsiana tanebeyaxuabinexa. ¹⁹ Bajaraxuacujinae icatsia necanajetsiana itsanacuaverena pepatsivi pecobeyabelia.

Bajarapamonae necanecaponaena. Nejumatitibabena penaneconitsivi pejumaconitabiabimacata. Bjaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bjarapova pematabacabëta nucajunua Jesús pitabarata. Vajëta pexaniacuene petoexanaenexatsi.

²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevetsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaëjëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebejiobiaexanaenexa? ¿Pacacaëjëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsiibeje:

—Jājā, panecaëjëpabeje cajena, jaiibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabejiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtaemebeje panenacaenexabeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëthane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonae jamatabëcuenebaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamona jina vanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. ²⁶ Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. ²⁷ Ponë paxamëyajuvënënë

jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. ²⁸ Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxaneto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana bitso pitaxutotsëcënaenëbeje, apo petaenëbeje, yabara pelivaisi

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaëto pënaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsëcënaenëbeje, apo petaenëbeje. Nexata bajaraponëbeje itsa jumetanebeje bajarapanamutua imoxoyo Jesús penajetarucajava, vavajaibeje tsecae.

—Jesús, Davidpijinë pemomomë, paneitaxutotsoniataemabeje! jaiibeje tsecae pitaxutotsëcënaenëbeje.

³¹ Jivi picani jumeitavetatsibeje pemoyanexabeje tsecae. Itsiata biji bitsoyo orijibia vavajaibeje tsecae.

—Jesús, Davidpijinë pemomomë, paneitaxutotsoniataemabeje! jaiibeje tsecae Jesúsjavabelia.

³² Nexata Jesús muxunanucojopa. Junata pitaxutotsëcënaenëbeje. Jesús jumaitsi bajaraponëbejejavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponëbeje jumaitsidebeje Jesúsjavabelia:

—Jesús, pajitsipajëbeje pataitaxutoxanepanaejavabeje, jaiibeje tsecae.

³⁴ Nexata Jesús itaxutotsoniatane bajaraponëbeje. Jesús itaxutojyata bajaraponëbeje. Bajarajota caecuena bajaraponëbeje itaxutoxanepanabeje baja. Nexata bajaraponëbeje Jesús pepëta naponabeje.

21

Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonëbejejavabelia mapacueniaje:

² —Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “¿Detsa xuajitsia burrobeje paisinamebeje?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinaelivaisita jumaitsi mapacueniaje:

⁵ Pajumaitsimē tsane Jerusalén tomarapijivijavabelia: “Pataename pepo paneevetsinē paxamējavaberena penajetarucaejava. Beveliajamatabēcuenēcuenia najetarucaena. Pejanaburroyota yapatana-jetarucaena,” pajamē tsane Jerusalén tomarapijivijavabelia, jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje. ⁷ Yamaēya carenabeje burro, pexēnatonēyo yajava. Nexata bajarapaburrobeje Jesús pijajivi tsijumajeba pijacama,” pajamē tsane Jerusalén tomarapijivijavabelia, jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayailbitsaētozaneto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayiataeya pecopiapitsinexatsi. ⁹ Jesús penajetarucaejavata jivi ayailbitsaētozaneto Jesús pevajēnaeya namataxainaea najetarubena. Itsabitsaētozaneto Jesús pecovēya cotocaevana-jetarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponēje, pepo nacuaevecsiniemi Davidpijinē pemomo! ¡Dioso yavenonaenatsi maponē najetarucaje nacua pevetsinēnexa Dioso pejamatabēcueneta! Nexata vaxaitsi pexaniajamatabēcuenē rajutatsi Diosojavabelia, jai tsanajetarubena bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomara-pijivi jamatabēcuenenabenajaca. Nexata nayanijoba.

—¿Detsa meta maponē najetarucaje? najai bajarapamonae.

¹¹ Nexata jivi jumaitsi:

—Jesús ra manajetarucaje, Diosojumepaebinē profetanē. Galilea nacuata pecaetomara, Nazaret tomarapijinē, jai bajarapamonae.

*Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi
(Mr 11.15-19; Lc 19.45-48; Jn 2.13-22)*

¹² Jesús itsa pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinē profetanē. Galilea nacuata pecaetomara, Nazaret tom bajarapamonae Jesús pitsapaeyaexana templobovecua. Palata pecambiabiabivini ata pijamesanēmi Jesús topēnēyorobajaraba. Ucucu pecanajetabiabivi ata penabiabijavanēminua topēnēyorobajaraba.

¹³ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja jivi xanējavaberena penavajēcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamē yamaxētojobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsēcēnaevi, pejayujayunaevinua. Nexata Jesús bajarapamonae xanepanaeyaexana. ¹⁵ Templobota nubena sacerdotevi. Nubena judíovi pecujarubivina. Bajarapamonae taenubena Jesús pitaxutoxanepanaeyaexanaejava pitaxutotsēcēnaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevava-jaijavata pejumaitsijava Jesús yabara: “¡Dioso yavenonaenatsi maponēje, pepo nacuaevetsinēmi Davidpijinē pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

¹⁶ Nexata bajarapamonae jumaiti Jesúsjavabelia:

—¿Tsipaji apo jumetaemē mapapejevaxi xamē yabara pejumaitsaponaejavaje? ¿Apo necajumeitavetsi? jai.

Nexata Jesús jumaiti bajarapamonaejavabelia:

—Jājā. Jumetaniji picani. Itsiata apo jumeitavetsinē. ¿Paxamē tsipaji Dioso pejumelivaisibaxuto apo palebimē paneyapētaenexa pacuenia tajēvelia jumaiti xanē yabara bajarapapejevaxi pevavajaijavanexa? Dioso pejumaitisijava xanējavaberena, tajēvelia Dioso pejumelivaisibaxutota jumaiti mapacueniaje:

Pejevaxi, mitopaenacuetoxi ata, naxēanaeyaexanaename penaxēanaejavata xamējavaberena pecajumaitisinxaxa: “Ayaijamatabēcuenenēmē bitso,” pecajainexa, jai Dioso pejumelivaisibaxutota xanējavaberena Dioso pejumaitisijava. Bajaraxuata mapapejevaxije jumaiti bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higeranae piacuaijibixae yabara pelivaisi (Mr 11.12-14, 20-26)

¹⁸ Jesús pijajivi Betania tomarata pebarēmajitsicujinae, meravia pitsijavata, bajayacunua, Jesús pijajivi barēlia icatsia Jerusalén tomarabelia. Jesús nexata namutua penajetarucaejavata, piajani. ¹⁹ Jesús nexata taenuta higeranae namuto muxuneneta. Nexata Jesús imoxoyolia higeranae, pecuai itsa xaina, pexaenexa. Pecuai itsiata apo xinae higeranae. Ēpebaxu saya tsanuca. Bajaraxuata nexata Jesús jumaiti higeranaejavabelia:

—¡Xamē baja apo nacuaitsimē tsane! jai Jesús.

Bajarapacuenia Jesús pejumaitisijavata, bepimia higeranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponae bepimia tēpanajerecaje? najai.

²¹ Nexata Jesús jumaiti pijajivijavabelia:

—Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, nexata paxamē ata pacacaējēpaejitsipa paneexanaenexa pacuenia exanajē mapahigeranaejavabeliaje. Itsiata ēbajarapacuenē paneexanaenexa, apo pacacaējēpae tsipae. Pematatsēnēa itsacuenejavanēnua paneexanaenexa, pacacaējēpaejitsipa. Nexata itsa pajumaitsimē tsipae mapatsutojavabelia

ataje: “Natixire majotavecuaje. Pucaxanetojavabelia jopare,” ita pajamë tsipae, pacajumecovënëtsipa. Nexata mapatsuto ataje paneitorobicuena pacajumecovënëtsipa. ²² Nexata daxitacuene xua pavajëtsianame Diosojavabelia, pasivajamatabëjumaitsimë tsane mapacueniaje: “Xua vajëtajë Diosojavabelia, pepacuene Dioso nejumecovënëtsiana,” pasivajamatabëjamë tsane. Nexata xua pavajëtsianame Diosojavabelia, Dioso pacajumecovënëtsiana, jai Jesús pijajivijavabelia.

Pacuenia Jesús cajëpatsi daxitacuene pexanaenexa yabara pelivaisi
(Mr 11.27-33; Lc 20.1-8)

²³ Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaiti Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobopanabovecuaje? jai bajarapamonae Jesúsjavabelia.

²⁴ Nexata Jesús jumaiti bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuene. ²⁵ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata ëpamonae nabarëcuaicuaijai. Najumaiti:

—¿De meta pacuenia jumecanaviatsianatsi? Vaxaitsi ita jumai tsi-paetsi: “Dioso raja pejamatabëcueneta,” ita jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabëcueneta Juanpijinë jivi bautisabaponapona,” ita jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabëjumaiti: “Juanpijinë raja pepacuene Diosojumepaebinëmi,” sivajamatabëjai, najai sacerdotevi, judíovi pijaancianovi yajava.

²⁷ Nexata saya bajarapamonae jumaiti Jesúsjavabelia:

—Apo payapëtaenë ponë Juanpijinë itorobatsi jivi pebautisabapon-aenexa, jai.

Nexata Jesús jumaiti bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

Pacuenia Jesús jivi livaisi tsipaeba anijanëbeje pexënatobeje pexainaenë pelivaisicuenia yabara pelivaisi

²⁸ Jesús icatsia jumaiti sacerdotevijavabelia, judíovi pijaancianovijavabelia ata:

—Panejumecanaëjëtsianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatojavabelia jumaiti: “Taxënato, ajena netonacuenebianame tajauvabacabota,” jai pexënatojavabelia. ²⁹ Nexata bajaraponë paxajavabelia jumaiti: “¡Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaiti: “Xanë baja rovia pibisiajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja

penacuenebinē. ³⁰ Bajaraxuacujinae pexēnatobeje pexainaenē pona icatsia itsanē pexēnatojavabelia. Bajaraponējavabelia ata jumaitsi: “Taxēnato, ajena netonacuenebianame tajauvabacabota,” jai pexēnatojavabelia. Nexata jejai itajara pexēnato. Itsiata apo ponaē. ³¹ ¿Detsa ponē bajaraponēbejeyajuvēnēnē paxa jumecovēnēta? jai Jesús bajarapamonaejavabelia.

Nexata bajarapamonae jumaitsi Jesúsjavabelia:

—Copiata ponē paxa itorobatsi, apo jejai ata, itsiata paxa tonacueneba, bajaraponē paxa jumecovēnēta, jai.

Nexata Jesús jumaitsi bajarapamonaejavabelia:

—Xaniajanē pacuenia pacatsipaebijitsiatsi. Bajara pijinia itsane pamonae copabiana pibisiacuene pexanabiabijavami, pamonae najamatabēcuenepēnēyorotsiana Diosojavabelia. Impuestomatamo gobierno pejamatabēcuenē petomatamoyanijobabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia pibisiacuene pexanabiabijavamevecua. Itsiata baitsi jane paxamē apo pajonemē tsane. ³² Juanpijinē jivibautisabinē patajopa Dioso pejumelivaisi papecatsipaebinxexa panenajamatabēcuenē pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētisimē bajarapalivaisi. Itsiata bajarapalivaisi jumecovēnēta impuestomatamo gobierno pejamatabēcuenē pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovēnēta bajarapalivaisi. Paxamē patae atamē bajarapamonae pejumecovēnētisijava, itsiata apo panajamatabēcuenepēnēyorotsimē panejumecovēnētisinxexa Dioso, jai Jesús bajarapamonaejavabelia.

Pacuenia exana pijamatabēcuenēbejevi, itsanē pijauvabacabo petoevetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenē pijairata uba ayaiabacoboxaneto uvavēnējava. Bajaraxuacujinae pijaira matatoyorotsia, ibopanaxanetonē mataropotsia pefaratsijavata, yacaranata. Bajarapayacaranatsijava athēbēabetsia apia jivitonē mata-toxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabijavanexa. Bajaraxuacujinae pijauvabacabo tuatuajēta exananuta piapiabotsia, penacuaitsimatacabi itsa tonaveretatsi, athēbēyo pevetabiabecaenexa pijauvabacabo.

’Nexata bajaraponē itsamonae evetsiaexana pijauvabacabo. Uvabacabo pexainaenē jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvabacabo pexainaenē petoevetsivitsijavabelia. Nexata uvabacabo pexainaenē tajē nacuayabelia pona. ³⁴ Itsa baja uvabacabo pexainaenē yapētane pecopiapatsijava uvacuai penaveretsimatacabi penotsinexa, nexata uvabacabo pexainaenē

itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvabacabo pexainaenë pijajivi uvabacabo petoevetsivitsi totaicsi. Caenë bajarapamonaeyajuvënënë toconibabiatsi. Itsanë pepacuene tobeyaxuabatsi. Itsanë ibotonëta totseconatsi. ³⁶ Nexata uvabacabo pexainaenë icatsia itsabitsaëto pijajivi itorobalia. Bajara icatsia pacuenia exana uvabacabo pevetsivi.

³⁷ 'Nexata uvabacabo pexainaenë itoroba icatsia pexënato jane baja. Uvabacabo pexainaenë jamatabëjumaitsi: "Netoyaiyataena meta taxënato," jamatabëjai. ³⁸ Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonaenajumaitsi: "Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi. ³⁹ Nexata icatsia uvabacabo pexainaenë pexënato ata tovaetabatsi. Caponaliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavabelia, judiovi pijaancianovijavabelia ata. Jesús jumaitsi:

—Uvabacabo pexainaenë itsa patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaeyavabelia.

⁴¹ Nexata bajarapamonaenajumaitsi Jesúsjavabelia:

—Pijauvabacabo raeta pexainaenë apo itaxutotsoniatae tsane. Nexata verebiabiana bajarapamonaemi pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonaenajumaitsi nota, tsicobetsatsianatsi pacuenia baja tocaëjëtatsi uvabacabo pexainaenë perajutsinexatsi, jai bajarapamonaenajumaitsi.

⁴² Nexata Jesús jumaitsi bajarapamonaeyavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsailbo matatoxenetsia. Vajatuxanenë Dioso raja exanaena bajarapacuenia. Nexata bitso nacatsita pexaniacuene tsane bajarapacuenia,

jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenë icatsia itsamonae evetsiaexanaena, bajara pijinia pacuenia Dioso exanaena paxamëjavabelia. Xua picani Dioso pacaevetsiaexana, copiarucaena.

Nexata juya itsamonae Dioso evetsiaexanaena bajaraxua, pamonaenajumaitsi xaniavaetsia jumecovënëta Dioso pitorobicueniatsi. ⁴⁴ Pamonaenajumaitsi apo nejumecovënëtsi Dioso pexënatocuenenë, bajarapamonaenajumaitsi bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso

yanabejiobita, bajara itsane. Pamonaē naneconitsiaexanaenajē, bajarapamonaē pepacuene naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaējavabelia.

⁴⁵ Sacerdotevi penamatacatorobivi, fariseovi yajava, itsa jumetane bajarapacuenia Jesús pejumaitsijava, bajarapamonaē jamatabējumai tsenae: “Vaxaitsi yabara raeta jumaitsi,” jamatabējai tsenae bajarapamonaē. ⁴⁶ Nexata picani bajarapamonaē Jesús jamatabēvaetabatsi. Itsiata bajarapamonaē jamatabējumaitsi: “Bajaraponē jivi tanetsi Diosojumepaebinēcuene. Nexata nacaitsacueniabijitsipa vaxaitsi itsa vaetabijitsipatsi maponēje,” jamatabējai tsenae bajarapamonaē. Bajaraxuata Jesús apo vaetabitsi.

22

Pacuenia Jesús jivi livaisi tsipaeba penacasabifiesta pexanaenē pelivaisicuenia yabara pelivaisi

(Lc 14.15-24)

¹⁻² Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamonaē peypātaenexa pacuenia itsamatacabi itsijitsia, pamatacabi Dioso pijajivi evtsiana. Jesús jumaitsi mapacueniaje:

—Pepo nacuaevetsinē fiesta exana pexēnato petonacasabifiestanexatsi. ³ Nexata nacuaevetsinē jumaitsi pijajivijavabelia: “Pamonaē baja tajēvelia junatajē, patsipaebare baja tanetopatsinexarena fiestanexa jane baja,” jai nacuaevetsinē pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinē pijajivi naviabarena petsipaebinexa pijatuxanenējavabelia. ⁴ Nexata nacuaevetsinē itsamonaē icatsia pijajivi itorobalia pesivaponaenexalia. Nacuaevetsinē jumaitsi pijajivijavabelia: “Pajumaitsimē tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponae remelia,’ pajamē tsane tajunatsivijavabelia,” jai nacuaevetsinē pijajivijavabelia. ⁵ Itsiata baitsi jane bajarapamonaē icatsia sivaponaē atalia, nacuaevetsinē pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa. ⁶ Itsamonaē nacuaevetsinē pijajivi taicatsi. Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevetsinē bitso baraanaepana pejunatsivimijavabelia. Nexata nacuaevetsinē itorobalia vajabitsaēvi pebenexa pamonaē tobeyejebatsi pijajivi. Itorobanua pijatomaranēmi ata petotajuitsinexa. ⁸ Bajaraxuacujinaē nacuaevetsinē icatsia pijajivijavabelia jumaitsi: “Daxitacuene baja picani veretejebiaexana jē taxēnato penacasabifiestanexa. Itsiata baitsi jane tajunatsivimi apo netopatsirena. ⁹ Paponae remelia pinijicallexanetonējavabelia. Nexata daxita pamonaē pacaxitajarabaponaenae bajarapacallexanetonējava, pajunataponaenae taxēnato penacasabifiestajavaberena pepatsinexa,” jai nacuaevetsinē pijajivijavabelia. ¹⁰ Nexata nacuaevetsinē pijajivi ponalia. Najetarubena callexanetonējava. Junatapona daxita pamonaē caxitajarabapona. Junatapona

piajamatabëcuenebejevi, pejamatabëcuenexanepanaevi ata. Nexata bajarapamonae barëpona fiesta pexanaebojavabelia. Nexata pabota fiesta exana, vënëca jivi.

¹¹ 'Nexata nacuaevevtsinë jonena bajarapaboyarena petaenexa petopatsivitsi. Daxita pamona topatatsi, jumapata xua banaxataba itsa pona penacasabifiestajavabelia. Nexata nacuaevevtsinë taenuta bajarajota itsanë, saicayavirijava penaxatatsinë. Apo naxatatsi xua naxataba daxita. ¹² Nexata nacuaevevtsinë jumaitsi bajaraponëjavabelia: “¿Detsa xuajitsia najunuame apo nenaxatatsinë pacuenia daxita naxataba penacasabifiestajavaberena penajonevi?” jai nacuaevevtsinë. Nexata bajaraponë moya nuca. ¹³ Nexata nacuaevevtsinë jumaitsi mesa pevetsivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevevtsinë. ¹⁴ Pacuenia fiesta pexanaenë ayaibitsaëttoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëttoxaneto junata pijajivinexa. Itsiata saya caejiviyobeje jumecovënëtatatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabëcueneëjëbiaya yanijobatsi impuestomatamo pe-matamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarëcuaicuajainexa. Bajarapamonae jamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevevtsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabi-abame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. ¹⁷ Panetsipaebare pacuenia najamatabëxainame mapacune yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁸ Itsiata baitsi jane Jesús jamatabëcueneypëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame? ¹⁹ Panetsitajëre pitsipalatanëyota pamatamotabi-abame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. ²⁰ Jesús itsa tane bajarapapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënua, ruca mapapalatanëyojumataje? jai Jesús.

²¹ Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënua, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinē pija-
java. Parajutabiabianame pijinia saicaya Diosojavabelia Dioso pijajava,
jai Jesús.

²² Nexata Jesús xaniavaetsia ita jumecanaviata, bajarapamonae ja-
matabēcuenenabenajaca bajarapacuenia Jesús pejumaitsijavata. Nexata
baja copatatsi Jesús jamatabēcuenējēbiaya peyanijobijavatsi. Naviaba
baja bajarapamonae.

*Pacuenia Jesús tsipaeba jivi petēpaecujinae icatsia piasaējavanexa yabara
pelivaisi*

(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae
jamatabēcuenenavēxaniabiaya jumai tsabiabi: “Petēpaevi rabaja
petēpaecujinae, icatsia apo asaē tsane,” jai tsabiabi. Nexata saduceovi
imoxoyorenatsi Jesús. Saduceovi Jesúsjavabelia jumaitsi mapacueniaje:

²⁴ —Jesús, Moiséspijinē bajayata vajanacatoyaquinaelivaisi, jumaitsi
mapacueniaje: “Ponē pematapijinē pepua penacojobinē baja, totēpatsi
pexi xainaenejeva, nexata juyapijinē bepita pematapijinēmi pijavami.
Bajarapacuenia juyapijinē bepita pematapijinēmi pijavami pexi pex-
ainaenexa bajarapovajavabelia. Nexata pexi ita xainabeje, bematapi-
jinēmi pexi petaenexa daxitajivi,” jai Moiséspijinē bajayata vajanacato-
yquinaelivaisi. ²⁵ Nexata jinavanapa ēnacaemonae siete ponēbeje pax-
anējavata. Pepo matapijinē copiaya nacojoba. Nexata bajaraponē pijava
vecuatēpa pexi xainaenejeva. Nexata pematapijinēmi pepēnarucaenē
pita pematapijinēmi pijavami. ²⁶ Nexata icatsia bajaraponē ata tēpa
pexi xainaenejeva bajarapovajavabelia. Nexata icatsia itsanē tuatu-
ajēmatapijinē pita bajarapova. Bajara icatsia ponē ata tēpa pexi xainaene-
jeva bajarapovajavabelia. Bajarapacuenia tēpa daxita siete ponēmibeje
nacaemonae, bajarapova pepitaponaevi. Itsiata itsanē ata pexi apo
xinae bajarapovajavabelia. ²⁷ Bajaraxuacujinae bajarapova ata tēpa
baja. ²⁸ “Jivi raja petēpaecujinae, Dioso icatsia asaēyaexanaenatsi,” jamē.
¿Detsa nexata ponē bajarapomonaeyajuvēnēnē pijava tsane bajarapova
bajarapamatacabi? Daxita pamonaē siete ponēmibeje nacaemonae
pitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamē saya pajamatēbēcuenenavēxaniabame. Paxamē raja apo
payapētaemē pacuenia Dioso pejumelivaisibaxutota jumaitsi. Apo
payapētaemēnua pacuenia Dioso caējēpatsi daxitacuene pexanaenexa.
Bajaraxuata jamatabēcuenenavēxaniabiaya paneyanijobame: “¿Detsa
ponē pitsiana bajarapova?” panejamē. ³⁰ Pamatacabi raja
petēpaevimi Dioso icatsia asaēyaexanaenatsi, apo nacojobi baja
tsane. Bajarapamatacabita itsajivi ata pexēnatoyo apo canajetsi
tsane pebijavabelia petonacojobinexatsi. Bajarapamonae

nacojobinejeva, jinavanapaena athēbētatsia pacuenia ángelevi
jinavanapa. ³¹ Itsa pepacuene paxamē xaniavaetsia paneyanijobame
paneyapētaenexa Dioso icatsia piasaēyaexanaejavanexatsi petēpaevimi,
nexata pacatsipaebianatsi. Paxamē rabaja payapētaneme pacuenia
bajayata Dioso jumaitsi. Abraham baja peputēpae, Isaac ata baja
peputēpae, Santiago ata baja peputēpae, bajarapamonae yabara
bajayata Dioso jumaitsi Moiséspijinējavabelia mapacueniaje: ³² “Xanē

rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpævimi yabara. Bajarapacuenia Dioso pejumaitsixae, nayapëtane bajarapamonæ bajayata tæpæ ata, Diosovecua apo penaxuabijava. Aeconoxæ ata bajarapamonæ Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëttoxaneto itsa jumetane bajarapacuenia Jesús pejumaitsixava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuajainexa. Nexata fariseovi najumejaita pacuenia yanijobijitsia Jesúsjavabelia.

³⁵ Nexata fariseoviyajuvënënë, judíovi pecujarubinë, Jesúsjavabelia jamatabëcuenëjëbiaya yanijoba. Jumaitsi Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepæbivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mr 12.35-37; Lc 20.41-44)

⁴¹ Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

⁴² —¿Detsa pacuenia pasivanajamatabëxainaename Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

⁴³ Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexë nato. Bajayata Dioso pejumlahitsijava Cristo yabara, Davidpijinë Espiritu Santo pejamatabëcueneta tajëvelia jumlahsi mapacueniaje:

⁴⁴ Dioso jumlahsi tajatuxanenëjavabelia:

“Ecare abaxë tacujanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai bajayata tajëvelia Davidpijinë mapacueniaje Cristo yabara.

⁴⁵ Nexata Davidpijinë bajayata Cristo yabara: “Tajatuxanenë,” itsa jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexë nato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexë natocue.

⁴⁶ Nexata itsanë ata fariseoviyajuvënënë Jesús apo jumepitsitsi cae-jumeyo ata. Bajaraxuacujinae fariseovi, saduceovi ata, cjunava Jesúsjavabelia baja jamatabëcuenëjëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi

(Mr 12.38-40; Lc 11.37-54; 20.45-47)

¹ Jesús jumlahsi jivi ayaibitsaëtojavabelia, pijajivijavabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeayaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonae pacatsipaebapona. Itsi-ata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonae bajarapacuenia pacatsipaeba, itsanë ata bajarapamonaeyajuvënënë apo jamatabënajinae pexanaenexa bajarapacuenia. ⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia piajumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabibibota, jitsipabiaba penaenexa peyaiyataevitsi penaenexa petsinubijavanëta. ⁷ Bajarapamonae bitso jitsipabiaba jivi pebajacobinexatsi yayiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumlahsi jivi ayaibitsaëtoxanetojavabelia, pijajivijavabelia ata:

—Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tsipaji daxita paxamë bepanacaejmonaemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacucujarubinënexa. ⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsipaji caenë paneaxa paxainame, ponë eca athëbëtatsia. ¹⁰ Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tsipaji xanë, caenënë Cristonë, patacaevetsinë. ¹¹ Ponë paxamëyajuvënënë pacavecuayajamatabëcuenenë, bajaraponë pacayavenonabiaba padaxitamë. ¹² Pajivi daxitajivi matatoxenetsia pijacuata ayajamatabëcuenejivi natane, bajarapajivi itsamatacabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayajamatabëcuenejivi Dioso exanaenatsi, jai Jesús jivi ayaibitsaëttoxanetojavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabetsia.

¹⁴ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Yamaxëitojorobiaya pavecuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajajamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamonae Dioso apo pejumecovënëtsivi.

¹⁵ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infernojavabelia.

¹⁶ ¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamonae! Nexata paxamë panecujarubijamatabëcueneta bajarapamonae pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuenë. Cajumaitsi cajanë templo pevënëta,’ jai, apo itsacuenë.

Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobopijiorojavanë pevënëta,’ jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia,” pajamë tsabiabi jivijavabelia.¹⁷ Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yayiyanetsi. Tsipaji bajarapaorojavanë templobopijiorojavanë.¹⁸ Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi altarvënëjava pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsitsi altarvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia,” pajamë tsabiabinua jivijavabelia.¹⁹ Paneamatabocotajivi, bepaneitatsëcënavanapaevinua panejamatabëëthëtota. Biji rajane beyaiyatanetsi altarvënëjava, bajarapaaltarvënëjavajumata pebuatsiofrenda matatoxenetsia. Bajarapaofrenda ata yayiyanetsi. Tsipaji altarvënëjavajumata boca.²⁰ Pajivi jumaitsi: “Cajumaitsitsi altarvënëjava pevënëta,” jai, caecuenia yajavavënëjona bajarapaaltarvënëjavajumata pebocaeofrenda.²¹ Pajivi pijinia najumecapanepaeya jumaitsi pejumexaniataenexatsi: “Cajumaitsitsi templobo pevënëta,” jai, caecuenia yajavavënëjona bajarapatemplobota peponaxanaenë Dioso.²² Pajivi pijinia najumecapanepaeya jumaitsi pejumexaniataenexatsi: “Cajumaitsitsi athëbëtatsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

²³ ¡Paxamë jivi paneyamaxëitojorobivi! ¡Paxamë judiövi panecujarubivi, pafariseovimënu, ayaineconi panatsixainame Diosojavabelia! Pane-nacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuene pane-toexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia.²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë Dioso najumecopata pejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa

panejumecovënëtsinexa, caranata panamuxujematame. Nexata panecujarubivi panecujarubicuena pexanavanapaexae, panecujarubivi ata naneconita Diosojavabelia pacuena paxamë pananeconitame Diosojavabelia.

²⁵ ¡Paxamë jivi paneyamaxëtojobrovi! ¡Paxamë judíovi panecujarubivi, pafariseovimëna, ayaineconi panatsixainame Diosojavabelia! “Najamatabëcuenebjianaejitsipajë Diosojavabelia,” panejamatabëjaitabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaicuena. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainaenexa ayaijava ëpaxamënexa.

²⁶ Paxamë pafariseovimë, bepaneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuena paxamë ata copiaya Dioso pacajamatabëcuenequiatsi panejamatabëcuenuirajibinexa. Nexata bajaraxuacujinae pacajamatabëcueneçajëpaena paneexanaenexa ëpexaniacuene pacuena Dioso pacaitoroba.

²⁷ ¡Paxamë saya jivi paneyamaxëtojobrovi! ¡Paxamë judíovi panecujarubivi, pafariseovimëna, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajayatsinexa. Bajara pijinia paxamë ata Dioso patsitajamatabëcueneitsimë. ²⁸ Itsamonae naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëtojobrobinexa. Itsajava ata pematatsënëa pibisiacuene paneexanaenexa, panajamatabëxainabiabame.

²⁹ ¡Paxamë saya jivi paneyamaxëtojobrovi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapapofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapapofetavimi. Pamonaemi ata bajayata tëpa, pamonae aneconijibia pejinavanapae-vimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. ³⁰ Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaye: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonaemi beyaxuababiaba profetavimi. Bajarapamonaemi papemomoxixaemë, pacuena bajarapamonaemi jamatabëcueneitsi, ba-

jara paxamē ata pajamatabēcueneitsimē. ³² Paxamē ata papibisiajamaatabēcuenevixaemē, xanē ata jamatabēpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamē bitso pibisiacue ne paneexanaevi! Pacuenia jomo rēcēpeca ita tane petajuena jetaruaejava isoto, bajara paitsimē. Itsiata apo papanepaemē tsane infiernovecua panijaneconi yabara. ³⁴ Paxamē picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacue ne peyapētae yaexanaevitsi. Pacatoitorobianatsinua picani xanē talivaisi papecatsipaebivinexa. Itsiata baitsi jane bajarapamonaeyajuvēnēvi itsamonae pabeyaxuabaponaename. Itsamonae cruzajavabelia pacobematabiaxuababiabianame. Itsamonae pajumatitibabeyabiabianame penaneconitsivi panejumaconitabiabimacata judíovi penacaetuatabiabibonējava. Itsamonae pabaraponabiabianame ita tomaranējavabelia ata panebejiobiaexanaenexa. ³⁵ Bajarapacuenia nexata paxamē ayaineconi panatsixainaename Diosojavabelia. Daxita pamonaē aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinēta. Bajaraxuacujinae icatsia pevajēnaeyabelia beyaxuabapona itsamonae ata, Dioso pitabarata aneconijibia pejinavanapaevimi. Nexata bexēajavaberena ata Berequiaspijinē pexēnatomī, Zacariáspijinē, panijasalinaivi beyaxuaba. Zacariáspijinēmi panijasalinaivimi beyaxuaba templobopanabota, templobobeje altavēnējavabeje tuatua jēta. ³⁶ Xaniajanē pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabēxainaeya sivanua Jerusalén tomarapijivi yabara pelivaisi

(Lc 13.34-35)

³⁷ Jesús najamatabēxainaeya sivanua Jerusalén tomarapijivi. Jumaitsi pesivanuejavata mapacueniaje:

—¡Pajerusalén tomarapijivimē, pabeyabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacacapanepaenexa picani panijaneconivecua! ¡Itsiata baitsi jane paxamē apo pajejamē cajena!

³⁸ Panejumetaema. Dioso rabaja pacacopata papecaevetabibijavami. Nexata baja panijatemplobota Dioso apo ponaponaē. ³⁹ Xaniajanē pacuenia pacatsipaebijitsiatsi. Paxamē rabaja apo panetaemē tsane matavējēa. Matapania ita panejumecovēnētsianame Cristonēcunenē, Dioso taneitorobinētsica, icatsia panetaename. Itsa panesivajamatabējumaitsimēnua tsane: “Dioso, bitso yavenonare maponē najetarucaje, nejamatabēcueneta penajetarucaenē,” ita

panesivajamatabějämě tsane xaně yabara, nexata jane baja icsatsia panetaename ita patsianicajě, jai Jesús mapacueniaje najamataběxainaeja pesivanuejavata Jerusalén tomarapijivi.

24

Pacuenia Jesús pijajivi tajěvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxaneně, templobo nataema pemuxuneneta penaeboxanetoně ata, jai.

² Nexata Jesús tajěvelia vajunupaeba itsamatacabi itsanacuapijivi bajarapaboxanetoněmi pepenetsijavanexatsica. Jesús jumaitsi pijajivijavabelia mapacueniaje:

—Xaniajaně pacuenia pacatsipaebijitsiatsi. Daxita raja paboxanetoně pataneme, bajarapaboxanetoněmi itsamatacabi itsanacuapijivi penetsianica irabetsica. Nexata paibotoně catsanaruba mapaboxanetonětaje, itsaiboto ata pejumavereca apo boca tsane, jai Jesús tajěvelia pijajivijavabelia.

Pacuenia itsijitsia Jerusalén tomarata, daxitanacuanějava ata, mapanacua pecopiarucaevajěnaeje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaeně apaaxayo. Jesús ita eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxaneně, pajitsipajě patanetsipaebinxamě patayapětaenexa paepatota copiapatsijitsia xua vajunupaebame. ¿Detsa peneta pitsicuene pataenajě icsatsia ita patsijitsiamětsica? ¿Detsa peneta pitsicuene pataenajě mapanacua ata ita vereverecaejitsiaje? jai Jesús pijajivi.

⁴ Nexata Jesús tajěvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pětsa panacopatame itsajivi ata papeyamaxěitojorobinexa. ⁵ Tsipaji raja peyamaxěitojorobinexa, ayaibitsaěto patsiana hexaně itajara tsane. Bajarapamonae najumetsěnětsiaya jumai tsane: “Xaně raja Cristoně, athěběvetsica Dioso taneitorobinětsica jivi tacapanepaenexa,” jai tsane. Bajarapamonae jivi ayaibitsaěto yamaxěitojorobiana. ⁶ Vajabitsaě pexanaejava imoxoyonacuanějava, tajěnacuanějava ata, pavěnělivaisitaename. Itsiata pětsa pajunavame. Bajara peneta itsane mapanacua pevereverecaevajěnaeje. Itsiata baitsi jane bepija bajarapamatacabi mapanacuaje abaxě apo vereverecajuni tsane. ⁷ Mapanacuaje pevereverecaevajěnaeje peneta copiya itsaviriavi nabena itsaviriavijavabelia. Itsanacuaněpijivi pijinia nabena itsanacuaněpijivijavabelia. Ayaijaniboxaneto najetarucaena itsanacuanějava. Vitanecuene ata najetarucaena itsanacuanějava. Ira najěabiana ayaicuenia itsanacuanějava. ⁸ Daxita bajarapacuenie ita pataename, saya abaxě taxuxuabaponaena piayaicuenie, jai Jesús pijajivijavabelia tajěvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponae naacuaeavetsivijavabelia papecabebiobiaexanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë. ¹⁰ Nexata bajarapamatacabi jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaeavetsivi pecobeyabelia. ¹¹ Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipaebivicuenia tsipaebaponaena. Bajarapamonae yamaxëitorobiana jivi ayaibitsaëtoxaneto. ¹² Jivi pibisiacuene pexanavanapaevi, pevajënaeyabelia ayaibitsaëtoxaneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vererecaponaena. ¹³ Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. ¹⁴ Itsamonae daxita nacuanëjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejanexa. Bajaraxuacujinae jane baja mapanacua vererecaenajaje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusaleñ tomarata. Jesús jumaitsi pijajivijavabelia mapacueniaje:

—Diosojumepaebinëmi profeta Danielpijnë piayaicuene tajëvelia pevajunupaebilivaisi bajayata yaquina. Xua panijatamaranëmi vererecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë itsa pataename bajarapapiayaicuene penuecajava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia. ¹⁷ Pajivi pijabojumata athëbëyo ecaya, itsa vënëlivaisitaena bajarapapiayaicuene penuecajava templobota, bajarapajivi perunaecujinaetsica, bepimia najetabajiraviana. Pëtsa joneya pijaboyaliala pejutsinexa pecobecovë. ¹⁸ Pajivi pijinia nacuenebaponaena pijapabita, itsa vënëlivaisitaena bajarapapiayaicuene penuecajava templobota, bepimia najetabajiraviana. Pëtsa naviata pijaboyabelia pejutsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajëvelia Diosojavabelia pavajëcare piayapëbejematacabi papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso patocopatsiana bitso nabejiobitsiaya paneponaeyaniva. Pavajëcarenu penacueraevetsimatacabi bajarapapiayaicuene papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi

bitso nabejiobitsiaya pejinavanapaematacabianēminexa bitso jivi nabejiobitsia pejinavanapaeyaniva. Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianēminexa, caejivi ata apo asaē tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianēminexa, jai Jesús pijajivijavabelia tajēvelia pevajunupaebijavata papiayaicuene itsamatacabi copiapatsijitsia mapanacuataje.

²³ Icatsia Jesús tajēvelia navajunupaeba icatsia pepatsijavanexatsica. Jesús jumaiti pijajivijavabelia mapacueniaje:

—Nexata itsajivi yamaxēitojorobiaya itsa pacajumaiti tsane: “Pataema. Mara Cristo nucaje,” itsa pacajai tsane, pētsa pajumecovēnētame. Itsa pacajumaitsinua tsane: “Bajarajota nuca Cristo,” itsa pacajai tsane, pētsa pajumecovēnētame. ²⁴ Itsamonae jumai tsane: “Xanē raja Cristonē,” jai tsane. Itsiata jemajai tsane. Itsamonae jumai tsane: “Diosojumepaebinēnē raja, profetanēnē,” jai tsane. Itsiata jemajai tsane. Bajarapamonae itajara exanaena pinijicuene pexanaejavanē peyamaxēitojorobinexa saya jivi. Nexata bajarapacuenia itsamonae yamaxēitojorobaponaenatsi. Itsiata pamonaē pepacuenie Dioso pijajivi, Dioso pitapetsivitsi, bajarapamonae apo yamaxēitojorobi tsanetsi. ²⁵ Tajēvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pētsa paponaremelia. Itsa pacajumaitsinua tsane: “Cristo raja ponapona mapañēyatuucutsibotaje. Naxanitsia. Panataename,” itsa pacajai tsane, pētsa pajumecovēnētame. ²⁷ Payapētaneme rabaja mapacuenieje. Yamaxē itsa nivejai tsajuni athēbēvetsica, caecuenia jivi bacotiatane daxitajava. Bajara pijinia peneta pacuenia daxitanacuanēpijivi caecuenia netaena pamatacabi patsianicajē xanē, Daxitajivi Pematapijinēnē. ²⁸ Payapētaneme rabaja mapacuenie ataje. Quequeremonae bepījia bayapētane itsajota petuxutsaebine boca. Nexata bajarajota bepījia banacaetuaena. Bajara pijinia pacuenia daxitanacuanēpijivi tajajivi bepījia yapētaena tapatsijavatsica. Nexata bepījia nacaetuaenaena xanējavaberena, jai Jesús pijajivijavabelia tajēvelia penavajunupaebijavata icatsia pepatsijavanexatsica.

Pacuenia Jesús tajēvelia navajunupaeba icatsia pepatsijavanexatsica petēpaecujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajēvelia navajunupaeba itsamatacabi icatsia pepatsijavanexatsica. Jesús jumaiti pijajivijavabelia mapacueniaje:

—Xanē tapatsivajēnaetsica jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaemat-acabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athēbētatsia, najēabiana. Xaniavaetsia apo rubenae tsane. ³⁰ Bajaraxuacujinae jane baja xanē athēbēvetsica najetarucaenajē, Daxitajivi Pematapijinēnē. Nexata daxitaviriavi mapanacupijivi natsinuenā pecajunavi pijaneconi yabara. Nexata bajarapaepatota, xanē, Daxitajivi Pematapijinēnē, jivi netaena athēbēvetsica itarērēbota tanajetarucaejava. Patsianicajē daxitacuene taevetsinexa. Tanivenivenaecotia

yajavapatsianicajë. ³¹ Bajaraxuacujinae trompeta itsa najumetsiana ayaijumeta, itorobianajë tajaángelevi. Angelevi daxitanacuanëjavaverena xanëjavaberena netocaetuatsiana tajajivi, pamonaë Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica.

³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabita je jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonaë jane baja vereverecaena. ³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonaë, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. ³⁸ Pamatacabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonaë. Itsamonaë pexënatoyonë pebijavabelia canajetapona petonacojobinexatsi. Bajarapamonaë jamatejema saya jinavanapa. Nexata bajarapamatacabi Noépijinë ëpijamonaë pinijibarcoxanetojavabelia barëjunua. ³⁹ Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najuacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

42 Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. 43 Pacanaëjère mapacuenie. Bo pexainanënë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. 44 Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi

(Lc 12.41-48)

45 Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bjarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bjaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bjaraponë pijatuxanenë pijajivi pecovëta toevetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. 46 Bjaraponë bitso barëya tsane pamatacabi pijatuxanenë patsiana, xaniavaetsia pijajivi peto-evetaponaponaexae pecovëta. 47 Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bjaraponë evetsiaexanaenatsi daxita xua xaina pijatuxanenë. 48 Itsa bjaraponë piamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucae tsane bajayajebi,” jamatabëjai tsipae. 49 Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piaitajibivita. 50 Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. 51 Nexata bjaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bjarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bjarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata

jamatabëcueneaitavaya apo necopiaevetavanapae tsane. Bajarapacuene yabara pacatsipaebianatsi mapalivaisije. Diez papejanavabeje yapëthane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifiestajavabelia. ²⁻⁴ Bajarapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicaponae itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona. ⁵ Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bajaraxuacujinae ayaimeravi tuatuajëta jumetane pevavajaijava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejaijava jumetane. ⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana. ⁸ Nexata papetiriavi apo tsicaponae aceiteranë, jumaitsi aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamona. ⁹ Itsiata aceiteranë petsicaponaevi jumaitsi: “Jume. Apo caëjëpae. Paxanë ata meta apo panetocaëjëpae tsipae. Paponaremelia. Panijacuata pecomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa. ¹⁰ Nexata papetiriavi aceiteranë apo tsicaponae pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicapona pijalámparabëxinexa, nazona baja penacasabifiestanexa pexanaebojavabelia. Pejonecujinaelia baupaxatata. ¹¹ Bajaraxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubenae bojumavelia. ¹² Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavanapaename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenë pelivaisicuenia yabara pelivaisi
(Lc 19.11-27)

14 Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonae tajajivi, panet-onacuenebianame. Nexata pamatacabi icatsia patsianicajë, pacuenia pacasivanajamatabëxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë ita pon-aejitsiata tajënacuyabelia, junata pijajivi. Evetsiaexana pijapalata peto-evetsinexatsi pecovëta.

15 Caenë canacujitsia evetsiaexanapona petocanacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyabelia.

16 Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacincio mil ponëbeje. Nexata baja daxitata diez mil ponëbeje caejavata. 17 Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. 18 Itsiata baitsi jane ponë tovetata mil ponëbeje, pona pematayatsinexa pijatuxanenë pijapalata. Matayatsia mëthëteta irata.

19 Bexëa nexata najetaruca petuxanenë. Junata pijajivi peyapëtaenexa pacuenia tovetatsi pecovëta pijapalata. 20 Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia:

“Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacincio mil ponëbeje, xua nacanabajë bajarapapalatata,” jai bajaraponë pijatuxanenëjavabelia. 21 Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainae. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. 22 Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia:

“Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalatata,” jai bajaraponë pijatuxanenëjavabelia. 23 Nexata petuxanenë jumaitsi: “Xanepana rabaja. Xaniavaetsia netoebetaponaponame. Itsajamatabëcuene apo najamatabëxainae. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. 24 Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia:

“Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcueneta ayaijava palata pecatopit-sapaenexa. Bajara pijinia pacuenia xanë ata nevecuapitsipame xua nacanabijitsipajë nijapalatata ita canacuenebijitsipajë. 25 Bajaraxuata junavajë. Ponajë irata tamatayatsiamëthëtetsinexa

25 Bajaraxuata junavajë. Ponajë irata tamatayatsiamëthëtetsinexa

nijapalata. Bajara manijapalata catocanaviatatsije,” jai bajaraponē pijatuxanenējavabelia. ²⁶ Nexata petuxanenē jumaitsi: “Tajajivitonē atamē, itsiata ajamatabēcuenebejemē. Afaetabimēnu. Xamē baja cajena yapētaneme tajajivi taubiaexanabiabijava, taubiaexanabiabijava nexata bajarapamonae pejamatabēcueneta ayaijava palata tanetopitsapaenexa. ²⁷ Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabēcuene netocanaviatsipa tajapalata pematatsēnēa,” jai petuxanenē pijajivitonējavabelia.

²⁸ Nexata petuxanenē jumaitsi bajarajota penubenaevijavabelia: “Pavecuapire bajarapamil ponēbeje. Nexata juya parajure ponējavabelia xaina diez mil ponēbeje. Tsipaji bajaraponē caējēpatsi tanetoevetsinexa pematatsēnēa. ²⁹ Tsipaji pajivi ayaijava baja xaina, pematatsēnēa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponē tajajivitonēje, itsacuenējavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenē, jai Jesús comparacióncuenia pijajivijavabelia.

Bajarapacuenia Jesús jumaitsi pamonaē pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara pelivaisi

³¹ Jesús tajēvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanē, Daxitajivi Pematapijinēnē, icatsia itsa najetarucaenajē daxitanacua taevetsinexa, ángelevi nematatoyoronaeya yajavanajetarucaenajē. Nexata ecaenajē tajapenivenivenaetronovēnējavata. ³²⁻³³ Nexata daxitanacuanēpijivi caetuatsianatsi taitabarata. Tsataponaenajē bajarapamonae. Oveja pevetsinē ovejavecua chivo saicaya tsatapona. Nexata oveja pevetsinē petsavenonēnia chivo nubenaeyaexana. Pecujuanēnia pijinia oveja nubenaeyaexana. Bajara pijinia pacuenia xanē tsataponaenajē Dioso apo pejumecovēnētsivi, Dioso pejumecovēnētsivivecua. Dioso apo pejumecovēnētsivi tatsavenonēnia nubenaeyaexanaenajē. Dioso pijinia pejumecovēnētsivi tacujuanēnia nubenaeyaexanaenajē. ³⁴ Nexata jumaitsinē tsane tacujuanēnia penubenaevijavabelia, Dioso pejumecovēnētsivi: “Naxanitsia. Paxamē taxa papecaitaxutotsoniataevi. Payajavajinavanapaename taxa pijanacuatatsia, itsajotatsia pacatoxaniavaeta tajēvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamē taxaejava panerajutame. Itsa mera jitsipajē, panerajutame mera. Itsanacuaverena itsa patajē, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenē, papatame patanevetsinexamē. Itsa neeta penaneconitsivi pejebabiabibota, papatame patanetaenexamē,” janē tsane tacujuanēnia penubenaevijavabelia. ³⁷ Nexata bajarapamonae nejumai tsane: “Tajatuxanenē, ¿detsa pacujinae niajanijavata patajaccarajutsi nexaejava?” nejai tsane. ¿Detsa pacujinae mera nejitsipaejavata patajaccarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinē patajaccopiapitsi

xaniavaetsia?” nejai tsane. Itsa jume, nejumai tsane: “¿Detsa pacujinae pijajibijavata bitso nenaxatatsijava patajocarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

⁴¹ Nexata tatsavenononia penubenaevi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo pevereverecaesotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenononia penubenaevijavabelia. ⁴⁴ Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae nijanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponanë patacataenexa?” nejai tsane bajarapamonae. ⁴⁵ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamonae ponaena penaneconitsiajinavanapaenexa dexitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matacabi apo pevereverecaesotojavava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

26

Pacuenia picani Jesús pijavajabitsaë jamatabëvaetabatsi yabara pelivaisi
(Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueni-aje:

²—Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necana-jetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinu. Nacaetuata judíovi pijaancianovinua. Daxita bajarapamonae nacaetuata Caifásvënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënësilivaisita picani Jesús jamatabëvaetabatsi pebeyaxuabinoxatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitacueni-abiyaniva, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pe-livaisi

(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata. ¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nextata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nextata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nextata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nextata bajaraxuacujinae Judas Jesús naitaxutocaevevsia ponapona. Nextata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajërëabinejeva pexanaepan. Nextata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nextata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainanëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nextata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainanëjavabelia, jai Jesús pijajivijavabelia.

¹⁹ Nextata baja Jesús pijajivi pona pacuenia Jesús jumaitsi. Nextata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

²⁰ Nextata baja ajena meraviyotsia, Jesús pijajivi, doce ponëbeje, barëca mesa muxuneneta. ²¹ Nextata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nextata Jesús pijajivi bejamatabëjiobireca. Nextata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nextata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia.

²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijcuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nextata xanepanaejitsipa bajaraponë

itsa apo naexanae tsipae. Tshipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

²⁶ Pexaeyenaevavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pija-jivi. Jesús jumaitsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. ²⁸ Tshipaji tajana othopaena jivi ayaibitsaëtoxaneto pibisiacuene pexanaeneconi pevecuaajibiaexanaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapae-natsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

(Mr 14.26-31; Lc 22.31-34; Jn 13.36-38)

³⁰ Jesús pijajivi barënaexëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tshipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara peflabivajënaeya, nayavajunuaxainaename taja-jvivotonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajvivotonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia Getsemanívënëjavata yabara peliv-
aisi*

(Mr 14.32-42; Lc 22.39-46)

³⁶ Jesús pijajivi pecunameravita yajavapata Getsemanívënëjavata. Barajajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjiobireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajio-bicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caepatoyo ata paneaitavatse-naenexa? ⁴¹ Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsi-paji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajio-bicueneta tatëpaejavanaxa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsi-paji baja Jesús

pijajivi bitso itamajitsipana. ⁴⁴ Nexata abaxë bajarapamonae pemajitanubenaevavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi
(Mr 14.43-50; Lc 22.47-53; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuajai tsanucea pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëttoxaneto. Bajarapamonaeyajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pijaancianovinia. ⁴⁸ Judas pebarërenavajënae bajarapamonae, copiaya baja cajena Judas tsi-paeba pacuenia bajarapamonae yapëtaejitsia Jesúsucue. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaronë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarërenavajënae.

⁴⁹ Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuni-aya bajacobatsi Judas jane baja pematacanajetarucaevi peyapëtaenexa Jesúsucue. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtsi xaniavaetsia pecaponaenexatsi.

⁵¹ Bajarajota Jesús pijajiviyajuvënënë pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsi-paji pamonaenamaxëvanita espadata, daxita bajarapamonae juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa taneitoitorobinexatsica, nexata tavajëtsiepatota netoitorobijitsipaica bitso ayaibitsaëttoxanetonë ángelevi. ⁵⁴ Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsi-pae pacuenia Dioso pejumelivaisibaxutota tajëvelia neva-junupaeba pacuenia nevaetabijitsia tanebeyaxuabinexa, jai Jesús pija-jivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamē meta panetaneme betanacobetoxotsinē. Bajaraxuata pacaponeame espadanē, naebonē yajava, patanevaetabinexamē pacuenia pavaetababiabame penacobetoxotsinē. Xanē caematacabi canacujitsia Dioso pejumelivaisi paxamējavabelia pacatsipaebabiabatsi templobota. Itsiata bajarapamatacabi apo panevaetabimē. ⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajēvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaē pevaetabijavatatsi, daxita Jesús pijajivi xuabarēcēpecatsi pacuenia baja cajena Jesús tajēvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús pevaetabivitsi caponaliatsi Caifás pijaboyabelia. Bajaraponē Caifás sacerdotevi pepo penamatacaitorobinē. Nexata Caifás pijabota nacaetuana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonae pecovēya tajiyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaē exanatsi.

⁵⁹ Nexata bajarapabo enētuatuajēta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarēcuaicuaijai. Bajarapamonae nayanijoba.

—¿Jipatsa yapētane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsēnētsiaya picani peneconitsilivaisinexa, jaita penajumetsēnētsilivaisita picani Jesús pebeyaxuabinexatsi. ⁶⁰ Ayaibitsaēto pata penajumetsēnētsilivaisi pepaebinexa Jesús yabara. Itsiata caelivaisi ata najumejēpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanēbeje caelivaisi najumejēpaeya neconitatsibeje.

⁶¹ Jumaitsibeje bajaraponēbeje Jesús yabara:

—Maponē jumaitsije: “Xanē necaējēpa taxuabinexatsica Dioso pijatemplobo. Necaējēpanua acueyabi matacabita icatsia taveretetsinexa itsabo,” jai maponēje, jai beje bajaraponēbeje Jesús yabara.

⁶² Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapētaemē tsaja itsalivaisiyo ata nejumecanaviatsinexa? ¿Xaniajai tsabaja pacuenia maponēbeje caneconitsiajumaitsibeje? jai sacerdotevi pepo penamatacaitorobinē.

⁶³ Jesús itsiata moya. Nexata bajaraponē icatsia jumaitsi Jesúsjavabelia:

—Caitorobatsi caecuenia tanenavajunupaebinexamē nexaniajaijumeta. Itsajume, Diosojavabelia naneconitsianame.

Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

⁶⁴ Nexata Jesús jumaitsi:

—Jājā, xanë rabaja pacuenia nejumaitsimë. Nexata icatsia pacajumaitsi. Paxamë raja panetaename xanë, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucajava athëbëvetsica itarërëbota, jai Jesús.

⁶⁵ Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Mara ponë Dioso apo pejitsipaecuenia cuaicuaijaije. Dioso bepexënato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsënëa baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuaicuaijaijava. ⁶⁶ ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabarat-saquiababeponatsi pecobethaitonëta. Itsamonae itabarapacabiaxu-ababiabatsi. ⁶⁸ Nexata bajarapamonae jumai tsaponae Jesúsjavabelia:

—¡Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacabiaxuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi

(Mr 14.66-72; Lc 22.56-62; Jn 18.15-18, 25-27)

⁶⁹ Itsa abaxë Jesús sacerdotevi pepo penamatacaitorobinë pijabo ënëtuatujëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponaponame Jesúsata, Galilea nacuapijinëta, jai.

⁷⁰ Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

⁷¹ Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesúsataje, Nazaret tomarapijinëta, jai bajarapova.

⁷² Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsi. Apo yapëtaenë cajena bajaraponë, jai.

⁷³ Bajaraxuacujinae icatsia, caeepatoyocujinae, bajarajota penube-naevi cujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Piniicuenia Pedro nua.

27

Pacuenia Jesús caponaliatsi Pilatojavabelia yabara pelivaisi
(Mr 15.1; Lc 23.1-2; Jn 18.28-32)

¹ Ajena baja matabi tsarucaponae, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi. ² Nexata Jesús cobecëtsiaya caponaliatsi nacuaeavetsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamata-motsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. ⁴ Judas jumaitsi bajarapamonaejavabelia:

—Pibisiacueña baja rovia exanajë. Bajaraponë itsacueñjavayo ata apo exanaeñjeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëttoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabi-abicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

⁷ Nexata bajarapamonae najamatabëjêpa bajarapapalatanëanêta pecomuatsinexa ira. Nexata bajarapamonae bajarapapalatanëanêta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa têpa Jerusalén tomarata, bajarapairata pemêthëtabiabinexa. ⁸ Bajaraxuata mapamatacabijavaberena ataje vënëruba bajarapaira mapejumaitsivënëje: “Ppapalata pejamatabëcueneta jivitonë beyaxuabatsi, bajarapapalata pecomuatsiira,” pejaivënë vënëruba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremíaspjinë bajayata tajëvelia vajunupaeba bajarapapalata. Profeta Jeremíaspjinë baja cajena bajarapapalata yabara tajëvelia jumaitsi mapacueniaje: “Israelnacula pevetsivi rajutsiana jivitonë pecana-jetsinëjavabelia treinta ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana. ¹⁰ Nexata bajarapapalatanëanêta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspjinë tajëvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi
(Mr 15.2-5; Lc 23.3-5; Jn 18.33-38)

¹¹ Jesús nutatsi nacuaevetsinë Pilato pitabarata. Nexata Pilato jumaitsi Jesúsjavabelia:

—¿Xamë tsaja judíovi pepo nevettsinë? jai Pilato.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapêtae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi
(Mr 15.6-20; Lc 23.13-25; Jn 18.38-19.16)

¹⁵ Nacuaevetsinë Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenë, Barrabásvënë. Bajaraponë bitso piacujirubejenëcuene yapêtanetsi daxitajivi. ¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponë pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

¹⁹ Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitisirena mapacueniaje: “Copare bajaraponë, ponë itsacueneneconiyo ata apo penaneconitsinë. Ajena raja, meravi, amajitsinaebejenë bajaraponë yabara,” jaitsirena Pilato pijava. Nexata picani Pilato jamatabëcopata Jesús.

²⁰ Itsiata baitsi jane bajarapaepatota sacerdotevi penamatacaitorobivi, judïovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinoxatsi, jai tsaponae bajarapamonae.

²¹ Nexata nacuaeavetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapitsapaenexa? jai Pilato. Nexata bajarapamonae jumaitsi:

—Panetocapitsapare Barrabás, jai.

²² Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

²³ Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

²⁴ Pilato tane pïajumesaëjava bajarapamonae. Muxujiobi ata, apo jumecovënëtsitsi. Bitsoyo biji caranata bajarapamonae jamatabënanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapëtaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatabëcueneta apo beyaxuabiaexanaenë tsane maponëje, pianeconijibinë. Paxamë panejamatabëcueneta pabeyaxuabiaexanaename, jai Pilato.

²⁵ Nexata daxita bajarapamonae jumaitsi:

—¡Itsa bajaraponë pianeconijibinë Diosojavabelia, nexata bajaraponë patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

²⁶ Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaëvi ayaicuenia Jesús pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

²⁷ Nexata baja Pilato pijajivi, vajabitsaëvi, Jesús caponaliatsi nacuaevetsinë Pilato pijaboxanetojavabelia. Nexata bajarajota Jesús matatoyorotsia nacaetuatatsi daxita vajabitsaëvi. ²⁸ Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava benacuaevetsinëcuenia petaenexatsi. ²⁹ Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsicoberutatsinua naebo pecujanenia benacuaevetsinëcuenia petaenexatsi. Nexata bepeyaiyataecueniatsi bajarapamonaе pematabacabëta tonubenatsi Jesús pitabarata. Quenetsiataeya jumai tsaponaeysi:

—¡Bajaco, judíovi pepo pevetsinë! jai tsaponaeysi bajarapamonaе.

³⁰ Suabaponatsi. Vecuapitatsi naebo. Bajarapanaebota mataconitarababiabatsi. ³¹ Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaishi

(Mr 15.21-32; Lc 23.26-43; Jn 19.17-27)

³² Vajabitsaëvi Jesús itsa caponaliatsi tomaravecua, namutota caxitaraba Simónvënënë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

³³ Jesús caponaliatsi Gólgotavënë tsojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejaijume. ³⁴ Bajarajota picani Jesús rajutatsi vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë itsa natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi. ³⁶ Bajaraxuacujinae vajabitsaëvi bajarajota evetena penaitaxutocaevetsinexatsi Jesús. ³⁷ Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi

peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonena rutatsi. ³⁹ Jesús pecobematabiabarutatsijavatatsi cruzajavabelia, bajaraxuayo penajetarubenaevi Jesús itaropitsiaya bi-jataeyabiabatsi. ⁴⁰ Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matabacaba icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Èpamonae najumaitsi:

⁴² —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo caëjëpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene. ⁴³ Bajaraponë pina najamatabëcuenecopata Diosojavabelia peyavenonaenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponëbeje penacobetoxotsinëbeje Jesús yajavacobematabiabarutatsi, bajaraponëbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi
(Mr 15.33-41; Lc 23.44-49; Jn 19.28-30)

⁴⁵ Jesús baja itsa tēpaejitsia, ajena matonejejitsia, daxita nacuanëjava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aëjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsiyume: “TajaDioso, tajaDioso, ¿detsa xuajitsia baja tajaepato necopatame?” pejaijume.

⁴⁷ Nexata itsamonae bajarajota penubenaevi bijiaya jumetane bajarapacuenia Jesús pejumaitsiyava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Diosojumepaebinëmi, jai bajarapamonae.

⁴⁸ Nexata bajarapamonaeyajuvënënë bepijia cujinaelia pecarenanexa esponjavënëjava. Nexata esponjavënëjava jabutaba piajatuvinorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutuinxexa picani bajaraxua. ⁴⁹ Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocaponaeya.

⁵⁰ Icatsia Jesús pinijicuenia aėjai. Bajaraxuacujinae jane baja Jesús tēpanajereca. ⁵¹ Paepatota Jesús tēpanajereca, bajarapaepatota templo bo ěnētuatujǎelia peyatuućutarutsipana, ayaipapaěběrěpanaxaneto, titititica tuatujǎereca, athěběvetsicacujinae irabereca. Ira najěaba. Ibotoxanetoně ata sarapajunujunua. ⁵²⁻⁵³ Ayaibitsaěto Dioso pepua pejumecověnětsivi petěpaevimi peměthěaně ata napananubena. Nexata Jesús acueyabi matakacaba icatsia itsa asaě petěpaecujinae, pamonaě peměthěaně napananubena, bajarapamonae ata cotocaevi asaě. Nexata pitsapa měthěvetsina. Nexata bajarapamonae pona Jerusalěn tomarabelia. Bajarajotalia naitajěbapona jivi ayaibitsaětojavabelia.

⁵⁴ Jesús cruzata petěpaějavata vajabitsaěvi pijacapitěn, pijajivi yajava, nuca. Taenubena Jesús petěpaějava. Jesús petěpaějavata ira najěaba. Nexata bajarapamonae itsa tane ira penajěabijava, itsajavaně ata itsa taepona, bajarapamonae bitso junava. Jumaitsi:

—Matsaena poně těpaje, pepacuene baja rovia Dioso pexěnato, jai bajarapamonae.

⁵⁵ Bajarajota petirivibitsaěto xaneto tajiyoverena taenubena Jesús petěpaějava. Bajarapapetirivi Jesús pepěta napona Galilea nacuaverena, Jesús peyavenonaevimitsi. ⁵⁶ Bajara papetirivibitsaěto xaneto tuatujǎeta nanubena mapamataběxěyoje. Itsava Marĭavěněva, Magdala tomarapijiva. Itsava icatsia Marĭavěněva. Bajarapova Santiagobeje Josěbeje pena. Itsava pijinia Saloměvěněva. Bajarapova pijinia Santiagobeje Juanbeje pena. Bajarapova Saloměvěněva, Zebedeo pijava.

Pacuenia Jesús petěpaeně měthětatsi yabara pelivaisi
(Mr 15.42-47; Lc 23.50-56; Jn 19.38-42)

⁵⁷ Itsa baja caniviyotsia, Josě, Arimatea tomarapijině, pona nacuaevetsině Pilatojavabelia. Bajaraponě Josě bitso pexainaeně pexinaějava. Josě jumecověnětaponapona Jesús Cristocuene. ⁵⁸ Nexata Josě itsa pata nacuaevetsině Pilatojavabelia, vajěta petocopatsinexatsi peměthětsinexa Jesús petěpaeně. Nexata Pilato itoroba pijajivi petocopatsinexatsi. ⁵⁹ Nexata Josě cruzajavavetsica pitsica Jesús petěpaeně. Mataquionaeya daxitaněreca matakacěba pexaniaviria piapiasěbanapanata, piaxuirajibipanata. ⁶⁰ Bajaraponě Josě, pamatakabi těpa peměthětsinexatsi picani, iboitapajanitojavata pinijibovaju toexanabuatatsi cajena. Nexata bajarapaibovajulia Josě buata Jesús petěpaeně. Nexata bajaraxuacujinae pinijibopanaxaneto Josě tixirena. Yavajuvěpaacatabuata. Nexata baja Josě naviata pijaboyabelia. ⁶¹ Bajarajota ibovaju itapajavata eecabeje anijavabeje ěMarĭavěněvabeje. Itsava Marĭa, Magdala tomarapijiva.

Pacuenia vajabitsaěvi Jesús peměthě evetavanapa yabara pelivaisi

⁶² Pascuafiesta pejonematakabinexa pevajěnaeya pamatakabi, judĭovi baja banacuenevereta penacuenebijava. Nexata baja pamatakabi judĭovi banacuenevereta penacuenebijava, bitso baja itsa caniviyotsia, sacerdotevi penamatakaitorobivi, fariseovi ata, ponalia Pilatojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatakabi abaxě bajaraponě asaě tsaponaponae bitso najumetsěnětabiaba. Jumai tsabiabi: “Tatěpaecujinae, acueyabi matakacaba, icatsia asaěně tsane,” jai tsabiabi. Bajarapejumaitsi java paxaně apo panacofěnětsině. ⁶⁴ Nexata nijajivi itorobare bajaraponě

pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matacabijavabelia, bajaraponë pecapaebimatacabijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejajjava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëviye, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaevi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitjavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetaavana-paenexa.

28

Pacuenia Jesús petëpaecujinae icatsia asaë yabara pelivaisi
(Mr 16.1-8; Lc 24.1-12; Jn 20.1-10)

¹ Judïovi baja penacueraevetsimatacabi itsa verevereca, meravia pitsijavata, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia. ² Jemata ira najëaba. Tsipaji Dioso pijaängel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. ⁴ Vajabitsaë, pamonaevetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitsi petirivabejejavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucae majotaje. Asaë rabaja icatsia pacuenia baja cajena tajëvelia jumaitsi. Parenamërebeje panetaenexabeje itsajota picani bu-atatsi. ⁷ Bajaraxuacujinae paliamëbeje tsane bepïjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapali-vaisiyo xainajë patacatsipaebinxabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinxabeje Jesús pijajivijavabelia. ⁹ Bajarapovabeje namutualia pecujinaejinaenajetarucæjavatabeje, Jesús jemata tsitanitajëtatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematabacabëta nucajunuabeje.

Sitaicaliabeje yaiyataeya Jesús pecopiapitsinexabeje bajarapacuenia.
 10 Jesús nexata jumaitsi bajarapovabejejavabelia:

—Pëtsa pajunavamebeje. Paliamërebeje tajajivijavabelia. Pajumait-simëbeje tsane tajajivijavabelia: “Jesús raja jumaitsi. Paponeremelia pina Galilea nacuyabelia. Baja pina jotalia pacacaxitajarabiana Jesús,” pajamëbeje tsane tajajivijavabelia, jai Jesús.

Pacuenia vajabitsaëvi navajunupaeba yabara pelivaisi

11 Paepatota ëMaríavënëvabeje naviatabeje Jesús pebuatsiibovajutsi-javavelia, vajabitsaëvi, Jesús pemëthë pevetsiviyajuvënëvi, pona tomara-belia. Bajarapamonae tsipaeba sacerdotevi penamatacaitorobivijavabelia pacuenia tane bajarapamonae. 12 Nexata sacerdotevi penamata-caitorobivi pona judíovi pijaancianovijavabelia penabarëcuaiquajainexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenejëpa. Nexata bajarapamonae rajuta ayaijava palata vajabitsaëvijavabelia. 13 Bajarapamonae jumaitsi vajabitsaëvijavabelia:

—Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonae juta Jesús petëpaenë,” pajamë tsane. 14 Nexata nacuaeveitsinë Pilato itsa jumetaena mapajumeje, paxanë itsiata pacayavenonaenatsi itsacue ne papecaexanaeyaniva, jai bajarapamonae vajabitsaëvijavabelia.

15 Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaëvi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjjava yabara pelivaisi

(Mr 16.14-18; Lc 24.36-49; Jn 20.19-23)

16 Jesús pijajivi once ponëbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapaebatsi. 17 Nexata bajarapatsutojumata Jesús pijajivi itsa taenuta Jesús, yaiyataeya pitabarata pematabacabëta tonubena. Itsiata itsamonae Jesús pijajiviyajuvënëvi jamatabëcuene navëxaniabiaya jamatabëjumaitsi:

—Apo Jesús meta, jamatabëjai.

18 Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacue ne athëbëtatsia, daxita mapanacujava ataje, taevetsinexa. 19 Nexata pacaitorobatsi. Paponare daxitanacuanëjjava daxitanacuanëpijivi tajumelivaisi patane-totsipaebinexamë tanejumecovënëtsinexa. Bajarapamonae pabautis-abaponaename taxa pevënëta, xanë ata pexënatonë tavënëta, Espiritu

Santo ata pevënëta. ²⁰ Bajarapamonae patsipaebaponaename pe-
jumecovënëtavanapaenexa daxita pacuenia pacaitorobatsi. Pëtsa pana-
cofënëtae daxitamatacabi patacayajavaponaponaejava. Nacua pev-
ereverecaejavabelianexa ata pacayajavaponaponaenatsi, jai Jesús pija-
jivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexënatō pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumaisijava pexënatōjavabelia. Dioso jumaisi pexënatōjavabelia mapacueniaje:

Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. ³ Nexata tanejumelivaisipaebinë vavajai tsane petusato nacuata. Jumaisi tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatōjavabelia pejumaisijava Juan jivibautisabinë jivijavabelia Dioso pejumelivaisi petsipaebanajetarucæjavanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepënyorore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayaibitsaëtoxaneto Judea nacuapijivi, Jerusalén tomarapijivina, muxunaponabiabatsi Juan petsipaebilivaisi penamuxunaevetabibinexatsi. Nexata bajarapamonae pibisiacuene pexanaejavami, rovia alia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbosesë, jabëra yajava. ⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë bepijajivitonënë tanatanexa. Nexata auranë pijazapato ata tataxujonotsinexa. ⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espiritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucæjavanexa.

Pacuenia Juan bautisaba Jesús yabara pelivaisi
(Mt 3.13-17; Lc 3.21-22)

⁹ Jesús najetaruca Nazaret tomaraverena, Galilea nacuata peecae-tomaraverena. Nexata Juan bautisaba Jesús Jordán meneta. ¹⁰ Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. ¹¹ Jesús jumetanenua athëbëvetsica Dioso pejumaitsijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

Pacuenia Jesús jamatabëcuenejëbatsi dovathi yabara pelivaisi
(Mt 4.1-11; Lc 4.1-13)

¹² Jesús Juan pebautisabicujinaetsi, bepijiayo Espíritu Santo pon-aeyaexanatsi petusato nacuayabelia. ¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi
(Mt 12.12-17; Lc 4.14-15)

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacuajavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsi-matacabinexa. Nexata pacopabare pibisiacuene paneexanabiabijava. Panajamatabëcuenepeñëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi
(Mt 4.18-22; Lc 5.1-11)

¹⁶ Jesús najetaruca Galilea pucaxaneto itapaya. Nexata Galilea-puca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje. ¹⁷ Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyjavaponaponaeñe Jesús jamatejemayaexana yabara pelivaisi
(Lc 4.31-37)

²¹ Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³ Bajarajota pebi dovathi peyjavaponaponaeñe naeca. Nexata bajaraponë Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexani-ajamatabëcuenenëmë, jai dovathi peyjavaponaponaeñe Jesúsjavabelia.

²⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua. ²⁷ Nexata daxitajivi bajarapacuenene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneneje? ¿Detsa mapitsipejanacujarubicueneneje? ¡Maponëje Jesús, beDioso pitorobinëtsitsica! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vënëlivaisitanetsi Dioso pesaëta pinijicuenene pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Lc 4.38-39)

²⁹ Jesús baja pitsapa judíovi penacaetuatabiabibovecua. Nexata Santiagobeje Juanbeje Jesús yjavapona. Jesúsbana napona Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesúsbana pevajënae romaebanucatsi camata. Nexata itsamonae bepíjia Jesús tsipaebarecëpatsi bajarapova peromaebanucaevatsi. ³¹ Nexata Jesús imoxoyotabilia peromaebanucaevatsi. Cobeyotsiaya maticota. Nexata bajarajota peromaebanucaevatsi vecuaajibi tsanajetsitsireca baja domae. Nexata bajarapova Jesúsbana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi

(Mt 8.16-17; Lc 4.40-41)

³² Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyjavajinavanapaevinua. ³³ Daxita tomarapijivi Jesús pepatsibota baupjavaberena nacaetuata. ³⁴ Nexata Jesús jamatejemayaexana ayaibitsaëto daxitacuenevitane pexainaevimí. Vecuacapitsapanua dovathi peyjavajinavanapaevi. Jesús apo tocopatsi dovathi pecuaicuaijainexa jivijavabelia pevajunupaebiyani-vatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi
(Lc 4.42-44)

³⁵ Pepo bajayacunua, abaxë itsa apo napebetsi matakabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matakabi baja. ³⁶ Itsa baja matakabi, Simónbana Jesús pëjaitaponalia. ³⁷ Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹ Nexata daxita Galilea nacujava Jesús jivi tsipaeba pona Dioso pitorobilivaisi judiovi penacaetuatabibonëjava. Jesús jivi dovathi vecuacapsapapanua.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi
(Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

⁴¹ Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴² Bajarapacuenia Jesús pejumaitisjavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi. ⁴³ Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

⁴⁴ —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.

2

Pacuenia Jesús jamatejemayaexana petabusipacuenabinëtsi yabara pe-livaisi

(Mt 9.1-8; Lc 5.17-26)

¹ Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. ² Nexata jivibitsaëttoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponëbeje parena, camayota peyavëtaranajetarubenaevi petabusipacuenebinëtsi. ⁴ Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenebinëtsi. ⁵ Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajjavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeneconimi cavecuaajibiexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitsiyava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷ —Maponëje Jesús Dioso apo pejitsipacuenia cuaicuaijai. Itsanë ata cajena apo caëjëpaetsi itsajivi pibisiacuene pexanaeneconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamonae.

⁸ Jesús jamatabëcueneyapëtane bajarapamonae jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconimi tavecuaajibiaexanaenexa. ⁹ Paxamë apo pacacaëjëpae ata itsajivi pibisiacuene pexanaeneconimi panevecuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsiyava. Itsiata baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaecuene tavecuaajibiaexanaenexa itsajivi pibisiacuene

pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

11 —Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

12 Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatatabëcuenenë. Caeto ata abaxë mapit-sicue ne pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënënë yabara pelivaisi
(Mt 9.9-13; Lc 5.27-32)

13 Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. 14 Bajaraxuacujinae penajetarucaejavata Jesús taeyeta Levívënënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

15 Nexata Leví junata Jesús pebarënanabinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuene jivijavabelia impuestomatamo pematamoyanijobabiabivi. Itsamonae ata nanabane pijamatatabëcuenebejevi. Nexata Jesús pijajivi nabarëca bajarapamonaejavata. 16 Nexata fariseovi, judíovi pecujarubivinia, Jesús taeyetatsi daxita bajarapamonaejavata pijajivi penabarënanabaneaejava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, pijamatatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

17 Itsa Jesús jumatane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava penajamatatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëta pona Diosojavabelia pexaejava apo pexaeyabiabixae yabara pelivaisi
(Mt 9.14-17; Lc 5.33-39)

18 Itsamatacabi Juan pijajivi, fariseovi pijajivinia, pexaejava apo xaevanapae pamatacabibeje Diosojavabelia vajëcapona. Nexata itsamonae

Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeyabiabi pamatacabibeje Diosojavabelia vajëtapona? jai Jesús peyanijobivitsi.

¹⁹ Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamona. ²⁰ Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamona pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara pijinia itsi tajajivi ata. Tayajavapononaepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevuca, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

²¹ Nexata bajarapamona perujumatabëcuene baja pecopabinexa, Jesús livaisi tsipaeba comparacióncuenia bajarapamona pejumecovënëtsinexa ëpejanalivaisi, Jesús petsipaebilivaisi. Bajarapamona anijamatabëcuenebeje pexainaeyaniva perujumatabëcuene baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetjavabelia. Itsa catsatarutsipa pejanapanata perujunaxatatsiesetjavabelia, nexata pejanapana yanarotsipa perujuesetjavaverena. Nexata biji bitso pinijivojoto titinaejitsipa. ²² Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamona pejumecovënëtsinexa ëpejanalivaisi, Jesús petsipaebilivaisi, perujumatabëcuene baja penacopabinexa.

Pacuenia Jesús pijajivi namutua siricanajetarubena trigoxu penacueravetsimatacabita yabara pelivaisi

(Mt 12.1-8; Lc 6.1-5)

²³ Judiovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuatapona. ²⁴ Nexata fariseovi jumaitsi Jesúsjavabelia:

—¡Taema mapacuenieje! Dioso Moiséspijinëta penajumecopatsilivaisita vajanacaitavetsicuenie, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo hexanae mapacuenieje, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimē tsipaji Dioso pejumelivaisibaxuto paneyapētaenexa pacuenia vajasalinainēmi Davidpijinē, pebarēponaponaevi yajava, exana pamatacabi bitso piajani? ²⁶ Davidpijinē joneya Dioso pijatemploboyalia pamatacabi Abiatarpijinē daxita sacerdotevi penamatacaitorobinē tsaponaponaē. Nexata Dioso pijatemploboēnēta, mesajumata, bobena Diosonexa ofrendacuenia petojebipanbēanē. Bajarapapanbēanē itsajivi ata apo tocopatsitsi pexaenexa penaneconitsiyaniwa Diosojavabelia. Ēsacerdotevi picani tocopatatsi pexaenexa. Davidpijinē apo sacerdotenē ata, xae ata bajarapapanbēanē pijajivi barē, itsiata apo vēnananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsi-paji Dioso yapētane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianē. ²⁸ Nexata xanē, Daxitajivi Pematapijinēnē, netoxanepana cajena tatsipaebinexa pacuene xanepana jivi pexanaenexa penacuer-aevetsimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaquenaenē yabara pelivaisi

(Mt 12.9-14; Lc 6.6-11)

¹ Penacueraevetsimatacabita Jesús joneya judíoivi penacaetuatabiabi-boyalia. Nexata bajarajota pebi naeca pecobetsaquenaenē. ² Nexata Jesús naitaxutocaevetatsi fariseovi petaenexatsi pecobetsaquenaenē pejamatejemayaexanaejava penacueraevetsimatacabita. Nexata Jesús pecobetsaquenaenē itsa jamatejemayaexana penacuer-aevetsimatacabita, “Jesús raja naneconita Diosojavabelia. Tsi-paji penacueraevetsimatacabita nacueneba,” pejainexa bajarapamonae.

³ Nexata Jesús jumaitsi pecobetsaquenaenējavabelia:

—Nonotapunare. Nucare mapamonae pitabarataje, jai.

⁴ Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexani-acuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. ⁵ Nexata Jesús anaeya naēcota bajarapamonae. Bajaraxuacujinae Jesús bejamatabējiobireca. Tsi-paji yapētane piajamatabēcuenetajajava fariseovi. Nexata Jesús jumaitsi pecobetsaquenaenējavabelia:

—Namaxērovire, jai.

Nexata pecobetsaquenaenē namaxērovita. Bajarajota cobex-anepananajereca baja. Pecobetsaquenaējavami ajibi. ⁶ Nexata fariseovi itsa tane Jesús pecobexanepanaeyaexanaejava pecobetsaquenaenē, fariseovi anaepana. Nexata bajarapabovecua pitsapa. Pona penabarēcuaicuaijainexa nacuaevevtsinē Herodes pijajivijavabelia. Bajarapamonae najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pēnaponaliatsi ayaibitsaētoخانeto Galilea nacuapijivi. ⁸ Nexata Jesús pēnaponaliatsi Judea nacuapijivinu, Jerusalén tomarapijivinu, Idumea nacuapijivinu, Jordánmene itsapanaverenapijivinu, imoxoyo Tiro tomaravecua pejinavanapevinu, imoxoyo Sidón tomaravecua pejinavanapevinu. Daxita bajarapamonae Jesús pēnaponaliatsi tsipaji Jesús vēnēlivaisitanetsi Dioso pesaēta pinijicuene pexanaponaejava. ⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaētoخانeto Jesús bitso matacēnēnaponatsi, nexata bajarapamo ēnēabereca Jesús perunaenexareca. ¹⁰ Jesús baja ayaibitsaēto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyajavajinavanapevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aējai tsabiabi.

—Xamē tsaena Dioso pexēnatomē, jai tsabiabi dovathi peyajavajinavanapevi.

¹² Nexata Jesús jumeitaveta bajarapamonae. Jumaitsi:

—“Dioso raja pexēnato,” pajamē pētsa xanē yabara itsajivijavabelia, jai Jesús bajarapamonaejavabelia.

Pacuenia Jesús pijajivi ayaibitsaētoخانetoyajuvēnēvi itapeta saya doce ponēbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaibitsaētoخانetoyajuvēnēvi, doce saya ponēbeje, itapeta apóstolevinexa. Jesús pitapetsivajēnae apóstolevinexa, junaya petsutojumabetsia. Bajaravetsica Jesús junatanuca ponēbeje jamatabēitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia. ¹⁴ Nexata Jesús caetuata caebitsaētoyo, doce ponēbeje pijajivi, pepēnajinavanapevinexatsi. Jesús itorobijitsianua bajarapamonae daxitanacuanējava jivi petsipaebanajetarubenaenexa Dioso pitorobilivaisi. ¹⁵ Jesús pijajivi jamatabēcuenecaējēpaeyaexana Dioso pesaēta pejamatejemayaexanapon-aenexa piavitanevi. Jamatabēcuenecaējēpaeyaexananua Dioso pesaēta dovathi jivi pevecuacapsaponaenexa. ¹⁶ Jesús pijaapóstolevi, doce ponēbeje, mapevēnēanēje. Copiaya ponē pevēnē Simón. Bajaraponē Jesús vēnēruba itsavēnē, Pedro. ¹⁷ Itsanē Santiago. Itsanē Juan. Santiagobeje Juanbeje nacaebananēbeje, Zebedeo pexēnatobeje. Bajaraponēbeje Jesús vēnēruba Boanerges. “Boanerges,” itsa jai, bajarapamonae pijajumeta mapajumetaje pejumaitsijume: “Yamaxē pexēnatobeje,” pejaijume. ¹⁸ Itsanē pevēnē Andrés. Itsanē Felipe. Itsanē Bartolomé. Itsanē Mateo. Itsanē Tomás. Itsanē Santiago, Alfeo pexēnato. Itsanē Tadeo. Itsanē Simón, celotenē. ¹⁹ Itsanē Judas Iscariote. Bajaraponē bexējavabelia Jesús canajetsijitsiatsi pijavajabitsaē pecobeyabelia pebeyaxuabinexatsi.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta, Jesús dovathi jivivecua capitsapona,” jai yabara pelivaisi

(Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaëto^xaneto nacaetuata. Nexata acuenebi Jesús pijajivi pebarëⁿabanijava. ²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijava, Jesús pijamonae vënëⁿlivaisitanetsi. Nexata Jesús pijamonae ponarena Jesúsjavaberena pebarëⁿponaenexatsilia picani.

²² Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamonae jamatabëcuenenavëxaniabiaya pejumaitsijava pecanaëjëtsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaejitsipa, nexata Beelzebú bepjavajabitsaë taejitsipa pijajivi. ²⁴ Pacanaëjère mapacujeje. Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. ²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepjavajabitsaënë taejitsipatsi pijajivi. Nexata apo sivaajamatabëcuenesaë tsipae pexanaponaevanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

²⁸ Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. ²⁹ Itsiata baitsi jane pajivi pibisiacuena baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matacabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaitsi tsipaji Jesús Espíritu Santo yajavaponapona atatsi, judíovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Lc 8.19-21)

³¹ Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia.

³² Nexata pamonaē Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenē, ena raja, nejuyapijivi yajava, nuca patapēnēverena. Cajaita raja xamē, jai bajarapamonae Jesúsjavabelia.

³³ Nexata Jesús jumaitsi bajarapamonaejavabelia:

—¿Detsa pitsijamatabēcuenevi taena, tajuyapijivina? jai Jesús.

³⁴ Bajaraxuacujinae Jesús naēcota pematatoyorotsiaenaevitsi. Jumaitsi bajarapamonaejavabelia:

—Mara jota pamonaē xanējavata penaevije, bajarapamonae jane taenajivi, tajuyapijivina. ³⁵ Tsipaji raja pamonaē exana pacuenia Dioso itorobatsi, bajarapamonae jane baja tajuyapijivi, taenajivina, jai Jesús bajarapamonaejavabelia.

4

Pacuenia Jesús jivi livaisi tsipaeba peubinē pelivaisicuenia yabara pelivaisi

(Mt 13.1-9; Lc 8.4-8)

¹ Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaētōxaneto nacaetuata itsajota Jesús livaisi tsipaebanuca. Nexata Jesús runareca jera ēnēabereca. Ecareca jera ēnētareca. Daxita jivibitsaētōxaneto tajetabovelialia nubena. ² Nexata Jesús daxitacuene livaisianē tsipaeba jivijavabelia. Jesús jumai tsaponae bajarapamonaejavabelia mapacueniaje:

³ —Panenamuxunaevere mapalivaisije. Peubinē pona pabiabelia peubinexa. Nexata itsa pata pabita, peubixu pexucayajabajarabicuenia ubanajetaruca. ⁴ Nexata pexucayajabajarabijavata itsaxu othopa pabi tuatujējjava, penajetarucaenamutojumata. Nexata bajara-jota pata baratsui. Xane bajarapaxumi juvinejeva. ⁵ Itsaxu pijinia othopa ibopananējumata, itsajota bitso ira apo aitayaē. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsi-paji irabereca bitso apo atabunepepiareca. ⁷ Itsaxu pijinia othopa xanēebacabomijavata. Nexata peubixu xanēebotonē caecuenia itsa yajava-juva, bitso xanēebotonē matakēnēnatsi peubijavami. Nexata peubijava apo xainae pecuai. ⁸ Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonē capitsapa treinta paxutobeje tsaponae. Itsabotonē capitsapa sesenta paxutobeje tsaponae, jai Jesús bajarapalivaisi petsipaebivijavabelia.

⁹ Nexata icatsia Jesús jumaitsi jivibitsaētōxanetojavabelia:

—Pajivi jamatabēnejumeyapētane patacatsipaebilivaisi, nenamuxu-naevetsi xaniavaetsia, jai Jesús.

Pacuenie yabara Jesús jivijavabelia livaisi tsipaeba ēcomparacióncuenia yabara pelivaisi

(Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaëtoخانeto baja Jesús vecuana-
naviabatsi. Nexata Jesús pijaepato barënacopata doce ponëbeje pijajivi,
itsamonae itsiata yajava. Nexata bajarapamonae Jesús yanijobatsi.
Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

¹¹ Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso pajajivimë papecaevetsijava. Bajarapacuenae abaxë daxitajivi apo yapëtae. Baitsi ra saicaya pamonaee apo tajajivi, tsipaebajë livaisianë ècomparacióncuenia. ¹² Bajaraxuata nexata bajarapamonae tae ata Dioso pesaëta pinijicuenae taexanaejava, itsiata apo yapëtae pajamatabëcuene yabara exanajë pinijicuenae taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuene copatsiyaniava Dioso javabelia pibisiacuenae pexanaeconimi Dioso pevēcuaajibiaexanaeyanivatsi, jai Jesús.

Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi

(Mt 13.18-23; Lc 8.11-15)

¹³ Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. ¹⁵ Pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ¹⁶ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ¹⁷ Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuenae pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavanapae. ¹⁸ Pacuenia pijinia paxu

othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹ Itsiata baitsi jane bitso jamatabëcueneenatsi mapanacuapijicuene yabara. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovsitabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavana-pae. ²⁰ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelivaisicuenia yabara pelivaisi

(Lc 8.16-18)

²¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—Itsjivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbéyo etsia daxitaboënë pitayotecaenexa. ²² Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. ²³ Pajivi jamatabënejumeyapëtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjëre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. ²⁵ Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicuenie yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayabajaranajetaruca. ²⁷ Peubinë peubicujinae vemaxëmajitabiaba meravi canacujitsia. Naëcotabiaba matacabita. Bajarapacuenia panepapona matacabianë. Nexata pijinia peubixu pabita

juva. Vitsabapona. Itsiata baitsi jane peubinē apo yapētae pacuenia peubixu pijacuata juva. ²⁸ Ira raja pejamatabēcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tsiapaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepijia vitsaba yabara pelivaisi

(Mt 13.31-32; Lc 13.18-19)

³⁰⁻³¹ Jesús icatsia jumaitsi doce ponēbeje pijajivijavabelia, itsamonaejavabelia ata:

—¿De meta xua pelivaisi jēpa Dioso pijajivi bepijia ayaibitsaētoخانeto penaexanaejavanexa? Jivi meta peyapētaenexa ayaibitsaētoخانeto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajē. Jumaitsinē meta tsane: “Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaētoخانeto naexanaena. Mostazaxu raja bitso tsiquirixutoxi daxita peubixuvecua. ³² Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenē matatoxenetsia. Nexata baratsui ata pematapenanē exana mostazanaemaxērananējavata. Bajara pijinia itsane jivi ata. Bepijia ayaibitsaēto Dioso pijajivi naexanaena,” janē meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ēcomparacióncuenia yabara pelivaisi

(Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ēcomparacióncuenia. Pacuenia baja jivi caējēpatsi pejumeyapētaenexa, bajarapacuenia Jesús tsipaebabiaba. ³⁴ Jesús ēcomparacióncuenia livaisi tsipaebabiaba bajarapamonaejavabelia. Itsiata saicaya Jesús ēpijajivijavabelia xaniavaetsia yapētaeyaxanabiaba pajamatabēcuenē xaina daxita bajarapalivaisianē.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pēnaponatsi itsajeranēta. ³⁷ Nexata pinijijoviboxaneto jemata najetaruca. Nexata malataca jera enēaberena mera epabajarabapona. Nexata baja jera enēaberena mera vēnēcaponā. ³⁸ Jesús itsiata majitanuca jamatejema jeratabufejavavetsina. Namatabēxēyaētānuca penamatabēxēyaētābiabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenē, vaxaitsimi rabaja yaothopaenatsi! ¿Apo jamatabēcuenebējamē tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itave-taxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Dax-itapuca baja nexata vainae ecaxuaba. ⁴⁰ Nexata Jesús jumaitsi pijajivi-javabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacueni petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponaponaenë, Jesús vecuacapitsapa Gerasa nacuata yabara pelivaisi

(Mt 8.28-34; Lc 8.26-39)

¹ Jesús pijajivi barëpata pucaxaneto itsapanabelia, Gerasa nacuayabelia. ² Nexata Jesús jerajavavetsina nonotajuna. Pebi dovathivi peyajavaponaponaenë, cujitabarenatsi jivimëthëanëjavaverena. ³ Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. ⁴ Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibi axuababiaba. Nexata cadenamaëtomi tsiquirijavaxi exanapenatabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. ⁵ Bajaraponë petsutonëjava, jivi petëpaevi pemëthëcaejava, matabijebi, meravijebi yajava, ponaponabiaba. Vavajai tsabiabaponapona. Ibotonëjavabelia natsaquibajarababiabaponapona. ⁶ Bajaraponë itsa taetaba Jesús penajetarucaejava, nexata tajëverena cujinaeponarena Jesúsjavaberena. Jesús pitabarata pematabacabëta nucajunua. ⁷ Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata. Nejamatabëcuenebejiobitsipame, jai dovathivi peyajavaponaponaenë Jesúsjavabelia.

⁸ Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaëjavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

⁹ Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëtoxanetonë, jai dovathivi peyajavaponaponaenë.

¹⁰ Nexata dovathivi pinijicuenia vajëta Jesúsjavabelia itsairabelia pe-jutsiyanivatsi bajarapairavecua. ¹¹ Nexata bajarajota, imoxoyo petsu-tojavata, marranobitsaëtoxaneto xaevanapa. ¹² Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare pata-jonenexa bajara pamarranobitsaëtoxanetojavabelia, jai dovathivi.

¹³ Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxanetojavabelia dovathivi junua. Bajara pamarranobitsaëtoxaneto jinavanapa anijamil-beje ponëbeje. Nexata daxita marranobitsaëtoxanetomi cujinaeyeca. Pucaxaneto itapajanituareca othopareca. Nexata daxita marranobit-saëtoxanetomi meneta bubuna.

¹⁴ Bajara pamarranobitsaëtoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuene. ¹⁵ Nexata dovathivi peyajavaponaponanemi bajarapa-monae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. ¹⁶ Pamonae cuenetanetsi Jesús pejamatejemayaex-anaejava dovathivi peyajavaponaponanemi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxanetojavabelia. ¹⁷ Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

¹⁸ Jesús baja itsa runareca jera ënëabereca, ponë dovathivi peya-javaponaponanemi, bitso picani navajëca Jesús pepëta penaponanexa. ¹⁹ Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicue Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponanemijavabelia.

²⁰ Nexata baja dovathivi peyajavaponaponanemi pona. Taxuxuaba penavajunupaebijava papinijicue Jesús exanatsi. Bajaraponë nava-junupaebapona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mt 9.18-26; Lc 8.40-56)

²¹ Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi. ²² Nexata bajarajota napatajopa Jairovënënë. Bajaraponë judíovi penacaetuatabiabibo pevetsiviyajuvënënë. Jairo itsa taetaba Jesús, nexata Jairo pematatabacabëta yayataeya Jesús pitabarata nucajunua. ²³ Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pex-aniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴ Jejai Jesús. Jesús nexata napona Jairo pepëta. Nexata jivibitsaëtoxfaneto Jesús pepënaponaevitsi matatoyorotsia cënënanajetarubenatsi. ²⁵ Bajarapajivibitsaëtoxfaneto tuatuajëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavailbeje xaina. ²⁶ Bitso nexata bajarapova bejiobi pexainacuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitane cuene. Biji caranata pevajënaeyabelia capunaponatsi piavitane cuene. ²⁷ Nexata bajarapova jumetane itsamonae pecuaicuajijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënevëlia, jivibitsaëtoxfaneto tuatuajëalia. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰ Jesús ata nayapëtane pesaëta pejamatejemayaexanaejava pepënyëabelia. Nexata pejayatabijavatatsi Jesús napënyëorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaitsi:

—Taneme rabaja jivibitsaëtoxfaneto pecacënënanajetarubenaejava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penaxatatsijava. ³³ Nexata bajarapova neconecojai tsanucae pecajunavi penayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayaberena. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. ³⁴ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya exanëjavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaëtoxfaneto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. ³⁸ Itsa baja Jesús palia Jairo pijaboyabelia, tane jivibitsaëto pinijijumeta pemataneuyabijava petëpaevayo. ³⁹ Jesús itsa joneya boyalia, jumaitsi bajarapamonaejavabelia:

—Pëtsa bitso pamatanueyabame. Pejanava raja apo tēpae. Saya raja majitanuca, jai Jesús tsipaji yapētane Jesús piasaēyaexanaejavanexa bajarapovayo.

⁴⁰ Bajarapacuenia Jesús pejumaitsijava, bajarapamonae saya jume-capocaponatsi. Nexata daxita Jesús bovecua pitsapaeyaexana. Itsaxuyolia petēpaevayo boca, Jesús barējoneya caejiviyobeje saya. Jesús saya barējoneya mapamatabēxēyoje: petēpaevayo paxa, pena, Jesús pijajivi, acueyabi ponēbeje. Bajarapamatabēxēyo saya Jesús barējoneya. ⁴¹ Nexata Jesús petēpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejaijume.

⁴² Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyjavajonevilia pinijicuenia jamatabēcuenenabenajaca bajarapacuenie itsa tane. ⁴³ Nexata Jesús pinijicuenia jumaitsi:

—Pëtsa itsajivi ata patsipaebame mapacueneye, jai Jesús.

Bajaraxuacujinae Jesús jumaitsi pejanavayo penajavabelia:

—Nexēnatovayo pexaejava rajure, jai.

6

Pacuenia Jesús naviata pijanacuayabelia, Nazaret tomarabelia, yabara pelivaisi

(Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecuca. Naviata pijanacuayabelia, pevitsabitarabelia. ² Judíovi penacueraevetsimatatabita Jesús taxuxuaba jivi livaisi petsipaebijava judíovi penacuetuatabiabibota. Ayaibitsaētoxaneto pejumetaevitsi sivajamatabēcuenenabenajacatsi. Nexata bajarapamonae Jesús jamatabēcuenaebiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponē capitsapa mapajamatabēcuenelivaisije? ¿Detsa pacuenia meta yapētane daxita mapacueneye? ¡Pitsipinijicuenie maponē exanaje, vaxaitsi abaxē caeto ata apo taetsi! ¡Matapania matanetsije! ³ Maponēje vaxaitsiyajuvēnēnē. Carpinteronē. María pexēnato. Bajaraponē peyuyapijivi Santiago, José, Judas, Simón. Papetiriavi ata vajatamarata jinavanapa, bajaraponē peyuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi.

⁴ Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yayiyataeyabiabatsi. Itsiata pijanacuapijivi, pijaviriavi, pijamonae ata, apo yayiyataeyabiabitsi, jai Jesús.

⁵ Nexata Jesús bajarajota jivi ayaibitsaētojavabelia pinijicuenie pexanaejava apo tsitaexanae. Tsipaji apo jumecovēnētsitsi. Saya caejiviyobeje piavitanevi pecobeta jayata. Jamatejemaya exana. ⁶ Nexata Jesús bitso najamatabēxaina. Tsipaji jivi apo jumecovēnētsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Lc 9.1-6)

⁷ Jesús junata pijajivi doce ponëbeje penacætuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjêpaejamatabëcuenetsi jamatabëcuenecaëjêpaeyaexana dovathi peyajavajinavanapaevi pevecuacapitsapaponaenexa. ⁸ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejala ata pacaponame panijanamutonexa. Pëtsa pacaponame panemarue ata, dorota, palata ata. Ënaeboyota saya pacaponare. ⁹ Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. ¹⁰ Itsajota papatabiabianame, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponae name, bajarapabovecua papitsapae name. ¹¹ Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebillivaisi, nexata paponae name bajarapatomaravecua. Paneponae vajënae bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Dioso javabelia penaneconitsicue ne apo papecaciapitsixae papecanamuxunaevetsinexa panetsipaebillivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹² Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabëcuenepënëyorore Dioso javabelia, jai tsaponae.

¹³ Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinë jivibautisabinëmi beyaxuabatsi yabara pelivaisi

(Mt 14.1-12; Lc 9.7-9)

¹⁴ Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumaitsi java Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjêpatsi Dioso pesaëta pinijicue ne pexanaenexa,” pejaijava itsamonae jamatabëcuenenavëxaniabiaya Jesús yabara, Herodes jumetane.

¹⁵ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara:

—Dioso jumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

¹⁶ Bajarapacuenia itsamonae jamatabëcuenenavëxaniabiaya pejumait-saponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanjë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

¹⁷ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalía. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ¹⁸ Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

¹⁹ Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi. ²⁰ Tsipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuaijai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba. ²¹ Nexata pamatacabi Herodes najamatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayabitsaëtoxaneto penabaninexa. Junata Herodes pijajivi, pamonaë tovetatsi pijairanë. Junata vajabitsaëvi pevetsivinau. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi. ²² Herodíasva toyapëxanepanatsi tsipaji pexënatoyo joneya Herodes pejunatsivi pebarënanabaneceajavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejonëyo peyavajibijava. Nexata Herodes najumecapanepaeya pexaniajajumeta jumaitsi pejonëyojavabelia:

—Nevajëre xua jitsipame. Carajutsianatsi raja. ²³ Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najumecapanepaeya pejonëyojavabelia.

²⁴ Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaitsi:

—Juan jivibautisabinë pematabocoto vajëre, jai.

²⁵ Nexata bepíjia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶ Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejajava. Tsipaji baja Herodes najumecapanepaeya jumaitsi pejionëyojavabelia pexaniajajumeta daxita pejunatsivi pitabarata. ²⁷ Nexata Herodes bepimia itoroba vajabitsaënë petocarenanexatsi Juan pematabocoto. ²⁸ Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

²⁹ Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtsatsi.

Pacuenia Jesús pexaejava rajuta cinco mil ponëbeje yabara pelivaisi (Mt 14.13-21; Lc 9.10-17; Jn 6.1-14)

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. ³¹ Nexata Jesús jumaitsi bajarapamonaejavabelia:

—Naxantsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëttoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënanabinexa, apo cuenecaëjëpabiabitsi. ³² Nexata Jesús ëpijajivi jerata yajavapona itsabelia jivi ajibi. ³³ Itsiata jivi ayaibitsaëttoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. ³⁴ Itsa baja Jesús bana nonobajunaya jeravecua, Jesús tane jivibitsaëttoxaneto. Nexata Jesús bajarapamonae itaxutobejibiatane. Nexata Jesús bajarapamonae sivajamatabëjumaisi mapacueniaje:

—Pacuenia baitsi ovejabitsaëttoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Itsa baja bitso caniviyotsia, Jesús pijajivi cujibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae. ³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponae ajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyoobeje dujuainëyoobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaëttonë natsanaeya ena. Caebitsaëtota enapona

cien pajivibeje. Itsabitsaëtota enapona cincuenta pajivibeje. Bajara-pacuenia caebitsaëto canacujitsia enapona. ⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane. ⁴³ Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xubeje bemapirecuenia pexanaejavanë. ⁴⁴ Pamonae pexaejava xane, ayaibitsaëttoxaneto. Itsiata ëpebijivi namataëjëtatsi cinco mil ponëbeje.

Pacuenia Jesús mene itaboxoya najetaruca yabara pelivaisi

(Mt 14.22-27; Jn 6.16-21)

⁴⁵ Jesús jivi ayaibitsaëttoxaneto pexaejava perajutsicujinae, Jesús pijajivi bepjiia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. ⁴⁶ Itsa baja jivi napëvereta penaviabijava, Jesús junaya pet-sutojumabetsia pevajëtsinexa Diosojavabelia. ⁴⁷ Itsa baja bitso mervavi, Jesús pijajivi pucaxaneto itapavecua tajë baja yanajetarubenalìa. Jesús abaxë bajarapaepatota caenë nacopatanucarena pucaxanetoitapatarena. ⁴⁸ Nexata Jesús tane pijajivi petoayapëbejevatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotana-jetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi itsa tanetsi mene itaboxoya penajetarucaejava, Jesús pijajivi jamatabëjumaitsi:

—iPetëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta. ⁵⁰ Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepjiayoy jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiaya tane, pan tsiquirijavayomi ata, jivibitsaëttoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenepexanaenexa. Abaxë bajarapamonae ajamatabëcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

(Mt 14.34-36)

⁵³ Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta.

⁵⁴Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesús cuene. ⁵⁵Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi pijacamaxita yavëtarapatatsi itsajota jivi jumetane Jesús pepatsijava. ⁵⁶Jesús pata tsiquiritomaraxijava, pinijitomaranëjava ata, tomarapënyëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

Pacuenia Jesús tsipaeba xua jivi jamatabëcuenebijnanatsi yabara pelivaisi (Mt 15.1-20)

¹⁻⁴Daxita judíovi catsiteca pijasalinaivimi pijacuene. Judíoviyajuvënëvi, pamonaë fariseovi naexana, bajarapamonaë bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonaë pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinaë, bajarapamonaë pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonaë pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonaë tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonaë tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonaë jumaitsi Jesúsjavabelia:

—Jesús, nijajivi naneconita Diosojavabelia. ⁵Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonaë Jesúsjavabelia.

⁶Jesús nexata jumaitsi bajarapamonaëjavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinaelivaisita jumaitsi mapacueniaje:

Bajarapamonaë nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁷Saya baitsi bajarapamonaë pijajumaitsiata tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonaë saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitisijava paxamë yabara Isaíaspijinë peyaquinaelivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuenepacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹ Apo pajumecovënëtsimë Dioso pitorobilivaisi vajasalinaivi pijacuenepanecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanjë,” pajamatabëjamë tsabiabi. ¹⁰ Bajayata Dioso najumecopata Moiséspijinëta. Bajarapalivaisi jumaitsi: “Axa yayataema. Ena ata yayataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ¹¹⁻¹² Itsiata baitsi jane paxamë jivi pamuxubijapenetabiabame peyayataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ¹³ Nexata caranata Dioso pejumaitisijume: “Axa yayataema. Ena ata yayataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanējumeyapëtaenexamë. ¹⁵ Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi. ¹⁶ Pajivi jamatabënejumeyapëtanepacatsipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuenepaxaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹ Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaexanaenexapacuenia daxitacuenepaxaejava xae ata, apo pibisiacuenepaxaejava xae ata, apo pibisiacuenepaxaejava xae ata,

²⁰ Icatsia Jesús jumaitsi:

—Baitsi rajane jivi pejamatabëëthëtovetsina, papibisiajamatabëcuenepitsapa, bajara baitsi jane xua jivi jamatabëcuenebijianatsi.

²¹ Tsipaji rabaja jivi pejamatabëethëtojavavetsina pitsapa pibisiacue ne penajamatabëxainae naxa. Pitsapa pebi pijava pevecuanamatayajitsi jamatabëcuenenaxa. Pitsapa petiriavijavabelia pebi penaperabëquenetsiatæ jamatabëcuenenaxa. Pitsapa jivitonë pebeyaxuabijamatabëcuenenaxa. ²² Pitsapa penacobetoxotsijamatabëcuenenaxa. Pitsapa itsamonæ pecobecovë penaxainæyabijamatabëcuenenaxa. Pitsapa piacujirubejajamatabëcuenenaxa. Pitsapa itsamonæjavabelia peyamaxëitojorobijamatabëcuenenaxa. Pitsapa itsamonæ pexainæcuene pecobecaëbijamatabëcuenenaxa. Pitsapa itsajivi pibisiacuenia pebaracuaicuajai jamatabëcuenenaxa. Pitsapa ayaijamatabëcuenejivi penataejamatabëcuenenaxa. Pitsapa saya jema peponaponæjamatabëcuenenaxa. ²³ Daxita bajarapajamatabëcuene jivi pejamatabëethëtojavavetsina pitsapa. Nexata bajarapacuene jivi jamatabëcuenebijanatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. ²⁵ Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayiyataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofeniciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

²⁷ Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenaxa. Xamë copiaya itsa cayavenonæjitsipatsi, nexata pacuenia pejevaxi pexæjavaminexa yacajërëtsipajë tarajutsinexa avirixijavabelia, bajara itsinë tsipæ, jai Jesús bajarapovajavabelia.

²⁸ Itsiata baitsi jane bajarapova ajumesaë tsaponæ. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexæpanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapæjavatsi dovathi.

Pacuenia Jesús jamatejemayaexana bitso siyanë, apo pejumetaenë, pijumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyané, bitso apo pejumetaené, piajumecécené. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponėje pejumetaenexa, pecuaicuaijainexanua, jai bajarapamonae.

³³ Nexata Jesús jivivecua bajaraponé barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejajjume Jesús pijajumeta, mapajumetaje pejumaitsijjume: “¡Muxuvojorucaremelia!” pejajjume.

³⁵ Bajarapacuenia Jesús pejumaitsijavata, bajaraponé muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. ³⁶ Nexata Jesús jumaitsi bajaraponé petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivi-javabelia. ³⁷ Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponé, Jesús, daxitacuenevitane pexinaeivi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijajava, cuaicuaijaiyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi

(Mt 15.32-39)

¹ Itsamatacabi Jesús jivibitsaëtoxfaneto muxunanacaetuatatsi. Nexata bajarapamonae penabaninexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. ³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xinae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbêbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsica-caepan rajutapona pijajivijavabelia. Nexata juya Jesús pijajivi bajara-papan tsicobetsana daxitajivi pexaenexa. ⁷ Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajara-padujuainëxi. ⁸ Daxitajivibitsaëtozaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. ¹⁰ Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuyabelia.

Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

¹¹ Fariseovi Jesúsjavaberena pata. Bajarapamonae jamatabëcuenejëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

¹² Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³ Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mt 16.5-12)

¹⁴ Jesús pijajivi nacofënëta pamarue. Nexata saya caepanbëyo capona jerata. ¹⁵ Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënëtsiyaniva.

¹⁶ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaijai bajarapacuenia Jesús pejumaisijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaxae, najai Jesús pijajivi.

¹⁷ Jesús pijajivi jamatabécueneyapètane bajarapacuenia jamatabécuenenavèxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimè: “Baja raeta pacuenia Jesús nacajumaitsi pan apo vajacaponaxae,” panajamè? Paxamè abaxè apo panejumeyapètaemè xua yabara pacajumaitsi. Pajamatabécuenetajamè bitso. ¹⁸ Pan yabara raja apo pacajumaitsi. Pan ita namatavenonaejitsipatsi, necaèjèpa taexanaenexa. ¿Apo panajamatabènapitsimè tsi-paji pacuenia exanajè pamatacabi pan namatavenonatsi? ¹⁹ Pacujinae epatsicajè cinco papanbëmibeje panetsicobetsanaenexa cinco mil ponèbejejavabelia, bajarapacujinae peyajuvènècopabijavanè, ¿detsa xuabeje pavènètame bemapirecuenia pexanaejavanè? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavènètajè, jai.

²⁰ Jesús icatsia jumaitsi:

—Pacujinae epatsicajè siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvènècopabijavanè, ¿detsa xuabeje pavènètame bemapirecuenia pexanaejavanè? jai Jesús.

Nexata Jesús pijajivi jumaitsi:

—Siete xuabeje pavènètajè, jai.

²¹ Nexata Jesús jumaitsi pijajivijavabelia:

—¿Panejumeyapètaneme tsabaja pan yabara apo patacajumaitsijava? Xanè pacajumaitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsi panejumecovènètsianiva fariseovi petsipaebilivaisi, panejumecovènètsianiva nacuaevetsinè ata Herodes. Tsi-paji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsècènaenè, apo petaenè tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsècènaenè, apo petaenè. Pinijcuenia vajècatsi Jesús pitaxutojayatsinexa bajaraponè pitaxutoxanepanaenexa. ²³ Nexata Jesús cobepita. Barèpona pesaicaeyojavabelia, tomarapènèyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaèjèpa tsabaja netaejava? jai Jesús.

²⁴ Nexata bajaraponè naècota. Jumaitsi:

—Taniji pebijivi pejinavanapaejava. Itsiata saya benetsita naejavanè, jai bajaraponè.

²⁵ Nexata icatsia Jesús itaxutojayata. Bajara jane xaniavaetsia naitaxutobatsiaya naècota. Itaxutoxanepana jane baja. Xaniavaetsia baja tane. ²⁶ Nexata Jesús jumaitsi bajaraponèjavabelia:

—Naviare nijaboyabelia. Pètsa abaxè poname tomarabelia. Pètsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi

(Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaevavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënëmi icatsia asaë,” jai tsabiabi xamë yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso peccaitorobinëtsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mt 16.21-28; Lc 9.22-27)

³¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi maticabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuajamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaevjavabelia. Nexata Jesús napënëyorotsia jumai tsanucac Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaevava, bajarapajivi copatsi pejitsipacuenia pexanaenexa penajamatabëxainabiabijavami. Exanaponaponaev

taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. ³⁵ Pajivi exanapona penatojitsipaecuenia, apo xainae tsane matababi apo peverevereaejava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matababi apo peverevereaejava. ³⁶ Pajivi exanapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueeneje, itsiata nacuerata. Tsi-paji pexainacuene apo capanepae tsanetsi Diosojavabelia. ³⁷ Tsi-paji acuenebi tsane itsajivi ata pematamotsinexa penaxuabiyaniwa Diosovecua. ³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatababi icatsia patsianicajë. Baitsi pamatababi xanë, Daxitajivi Pematapijinënë, ángelevi yajava, patsianicajë, pamatababi yajavapatsianicajënuwa taxa Dioso pijapenivenivenaectotia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

Pacuenia Jesús caeepatoyo perabënivenivenataba yabara pelivaisi (Mt 17.1-13; Lc 9.28-36)

² Jesús petëpaevanexa tajëvelia penavajunupaebicujinae, seis pamatabibejecujinae, Jesús pijajivi, acueyabi ponëbeje, barëpona pinijit-sutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatsia Jesús perabënivenivena bajarapamonae pitabarata. ³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjēpaetsi bajarapacuenia peniojaiyaexanaenexa. ⁴ Jesús pijajivi bajarajota tane jemata penaitajëtsijava bajayata petëpaenëmibeje, Elíaspijinëbeje Moiséspijinëbeje. Jesús barëcuaicuaijaitsi bajaraponëbeje. ⁵ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaëjëtsinejeva. Tsi-paji bitso bajarapamonae najunaviaca. Nexata apo yapëtae pacuenia jumaitsiatsia. ⁷ Nexata daxita bajarapamonae pematatsënëvetsica itarërëbo mataacataxabatsi. Nexata bajarapamonae jumetane bajarapaitarërëbojavavetsica Dioso pejumaitsiyava.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivijavabelia.

⁸ Bajarajota bajarapamonae itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpacujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponëbeje, jumecovënëta pejumaitsicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpacujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspjinë, petëpacujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitsi pijajivijavabelia:

—“Copiata Elíaspjinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinë tavajënaeya jivi jamatabëcuenexanetanajetaruca. Xanë, Daxitajivi Pematapijinënë, athëbëvetsica Dioso nitoroba jivi tacapanepaenexa. Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsiatsi. Elíaspjinë rabaja patajopa. Pepatsicujinae baja exanatsi daxita pacuenia jamatabëexanatsi. Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mt 17.14-21; Lc 9.37-43)

¹⁴ Jesús pijajivi, acueyabi ponëbeje, petsutojumabetsia pebarëponaecujinae, icatsia barënaviatsica. Itsamonae Jesús pijajivi pepuenetsivijavabetsica, barënaviatsica. Nexata Jesús tane pijajivi jivibitsaëtoxaneto pevajënae pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerëcëpa Jesús, daxita jamatabëcuenëbarëyaya cujinaeyeca Jesúsjavabelia pebajacobinexatsi Jesús. ¹⁶ Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenë bajarapajivi bitsaëtoxanetoyajuvënënë jumaitsi Jesúsjavabelia:

—Jesús, mara picani taxënatonëyo, dovathi peyjavaponaponanëyo, catocanajetarucatsije. Maponëyoje dovathi apo netonatsipaebiaexanaetsi. ¹⁸ Itsa raja dovathi vaetababiabatsi, irata xuababiabatsi. Nexata bajarajota pecuibothamu tsabiabi. Vonoquirajainua tsabiabi. Daxitanëyo aperabëbaba tsatababiabireca. Picani raja nijajivijavabelia jumaitsinë: “Panetovecuacapsapare dovathi,” janë. Itsiata bajarapamonae apo caëjëpaetsi tanetovecuacapsapaenexa, jai bajaraponë Jesúsjavabelia.

¹⁹ Jesús nexata jumaitsi pijajivijavabelia:

—¡Paxamë baja rovia apo pajumecovënësimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapsapaenexa dovathi. ¿Detsa paepatojebi abaxë paxamëjavata ponaponanajë? ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënësinexamë? Panetocarenamëre pejevaxinë, jai Jesús pijajivijavabelia.

²⁰ Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tēpajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pit-sapa pecuibuatsina. ²¹ Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuabicujinaetsi mapacueneye? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi. ²² Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëjëpa itsacuenia ata taneyavenonaenexamë, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

²³ Nexata Jesús jumaitsi pejevaxinë paxajavabelia:

—Pajivi jumecovënëta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinë paxa aëjai. Jumaitsi:

—¡Jumecovënëtajë baja cajena! ¡Neyavenonare bitso orijibia tajumecovënësinexa! jai bajaraponë Jesúsjavabelia.

²⁵ Nexata Jesús itsa tane jivibitsaëtoxfaneto penacaetuataponaejava Jesúsjavaberenä, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo ne-jumetaeyaexanaenënuä. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberenaje, jai Jesús dovathijavabelia.

²⁶ Nexata dovathi pejevaxinë icatsia aëjaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonae bajarajota jumaitsi:

—Pejevaxinë rabaja tēpa, jai bajarapamonae.

²⁷ Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

²⁸ Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapsapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panaxaejava apo paxaemē tsipae panevajētsinexa asaēyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 17.22-23; Lc 9.43-45)

³⁰Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacuajava. Jesús jitsipa pijajivi pebarēnajetarucaenexa bajaraxuayo itsajivi ata yapētaenejevatsi. ³¹Tsipaji Jesús pebeyaxuabijavanexatsi, tajēvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matababita, icatsia asaēnē tsane, jai tsaponae Jesús pijajivijavabelia.

³²Itsiata pijajivi apo jumeyapētaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponē vaxaitsiyajuvēnēnē nacavecuayaijamatabēcuenenē bitso?” najai tsanajetarubenaē yabara pelivaisi

(Mt 18.1-5; Lc 9.46-48)

³³Jesús pijajivi barēpata Capernaum tomarata. Jesús pijajivi pebarēpatsicujinae, boyalia itsa barējoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴Nexata Jesús pijajivi moya. Tsipaji Jesús pijajivi namutua najumaitsi tsanajetarubenaē:

—¿Detsa ponē vaxaitsiyajuvēnēnē nacavecuayaijamatabēcuenenē bitso? najai tsanajetarubenaē Jesús pijajivi.

³⁵Nexata Jesús eca. Junata pijajivi, doce ponēbeje. Jumaitsi pijajivijavabelia:

—Pajivi jitsipa ayaijamatabēcuenējivi penaexanaenexa daxitajivi matatoxenetsia, bajarapajivi beveliajamatabēcuenējivi natae peyavenonaenexa daxitajivi, jai Jesús pijajivijavabelia.

³⁶Bajaraxuacujinae Jesús cobepita pejevaxinēyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷—Pajivi copiapita tanejumečovēnētsijiviyo, mapitsipejevaxinēyo ataje, xanē taniji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyjavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vēnēlivaisitane itsanē dovathi jivivecua pecapitsapaejava Jesús pevēnēta yabara pelivaisi

(Mt 10.42; Lc 9.49-50)

³⁸Jesús pijajivitonē, Juan, jumaitsi Jesúsjavabelia:

—Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanējajuvēnēnē. Nexata paitavetajē bajaraponē dovathi jivivecua pecapitsapaponaējava, jai Juan.

³⁹Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi piniijcuene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia. ⁴⁰ Tsipaji raja pajivi pibisiacueni apo najamatabëxainae vaxaitsijavaberena, bajarapajivi nacajamatabëcuene yavenona. Bajarapajivi bevaxaitsijamatabëcuenejivi. ⁴¹ Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixae më, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacueni pexanaeyaexanaeyaniva yabara pelivaisi

(Mt 18.6-9; Lc 17.1-2)

⁴² Icatsia Jesús jumaitsi pijajivijavabelia:

—Pajivi pibisiacueni exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacueni pexanaeyaexanaenexa tanejumecovënëtsivijavabelia, abaxë pibisiacueni exanaeyaexanaenexa, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujäëreca. Bajarapajivi bexuarecatsi bitso penaneconitsiyaniva Diosojavabelia pibisiacueni itsa exanaeyaexana tanejumecovënëtsiviyajuvënëvi. ⁴³ Bajaraxuata panecobeta pibisiacueni itsa paexaname, panacobe-caucure. Itsiata xanepana panejonenexa cobemataxucaeja apo pevevererecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. ⁴⁴ Bajarajota apo tēpae oro, jivivixae vi. Isotocotia ata apo itaxupae caeto ata. ⁴⁵ Itsa panetaxuta ata pibisiacueni paexaname, panataxucaucure. Itsiata xanepana panejonenexa taxumataxucaeja apo pevevererecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶ Bajarajota apo tēpae oro, jivivixae vi. Isotocotia ata apo itaxupae caeto ata. ⁴⁷ Paneitaxutota ata panetaejava yabara pibisiacueni itsa paexaname, panaitaxutocajure. Itsiata xanepana panejonenexa pacaeitaxutojivimë apo pevevererecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸ Bajarajota apo tēpae oro, jivivixae vi. Isotocotia ata apo itaxupae caeto ata.

⁴⁹ Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenexanepanaenexa, daxita Dioso pijajivi ata jamatabëcueneëjëbianatsi mapanacuataje. ⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamë ata pajamatabëcueneitsimë tsipae Diosojavabelia, itsa apo pavecuapanepaemë tsipae papecajamatabëcuene ëjëta ponaejava. Nexata pajamatabëcuenesaëmëre panejamatabëcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacueni pexanaeyaexanaeyaniva.

10

Pacuenia Jesús jivi livaisi tsipaeba penacojiobinē pijava pexuabiyanima yabara pelivaisi

(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuyabelia. Bajaraxuacujinae Jordánmene itsapanabelia, paira, Jesús pona. Bajara-jotalia icatsia jivibitsaëtoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetarucaenē. ² Nexata fariseovi Jesús cujibarenatsi petsipaebilivaisi yabara jamatabëcueneējëbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyanima? jai Jesús.

⁴ Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabëxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabëxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabëcuene livaisitajaxae. ⁶ Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. ⁷ Bajaraxuata pebi itsa nacojioba pijavajavabelia, banatsata paxavecua, pena atavecua. ⁸ Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. ⁹ Bajaraxuata itsanē ata apo hexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barënacopata bota, nexata Jesús pijajivi yanijobatsi bajarapacueni yabara. ¹¹ Nexata Jesús jumaitsi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponē pexuabiva pepo pijavacuenia totanetsi. ¹² Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxë Dioso totanetsi pamonacuenia, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi

(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

14 Nexata Jesús itša tane bajarapacuenia pijajivi pejumaitšjava, Jesús jamatabëcueneanaepanaxuareca. Jumaitši pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. 15 Xaniajanë pacuenia pacatsipaebijitsiatsi. Mapitsipejevaxijivixije itša jumecovënëta palivaisi tsipaebatsi, bajumecovënëta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

16 Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponaе:

—Dioso xaniavaetsia caevetsiana, jai tsaponaе.

Pacuenia pevejëato, bitso pexainaenë, cuaicuaijai Jesúsjavabelia yabara pelivaisi

(Mt 19.16-30; Lc 18.18-30)

17 Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaеjitsia. Nexata baja Jesús itša naropotšijitsia, pevejëato cujinaerucarena Jesúsjavaberena. Jesús pitabarata pe-matabacabëta nucajunua. Jumaitši pevejëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bex-anajë taxainaenexa matacabi apo pevereverecaejava? jai pevejëato.

18 Nexata Jesús jumaitši pevejëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. 19 Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitši mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonaе pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexinaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevejëatojavabelia.

20 Nexata pevejëato jumaitši Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevejëato.

21 Nexata Jesús asivaya tane pevejëato. Jumaitši:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiovivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejio-biaexanae ata, cabeyaxuabijitsia atanua tajumelivaisi yabara, nijamatabëcuenesaе tsaponaponaenexa. Nexata jane baja xuacujinae nepënaponaename, jai Jesús pevejëatojavabelia.

22 Nexata pevejëato itša jumetane bajarapacuenia Jesús pejumaitšjava, najamatabëxainaeya baja vecuapona Jesús. Tsipaji pevejëato daxitacuene bitso pexainaenë. Nexata pevejëato apo jamatabëjumecovënëtsi palivaisi Jesús tsipaeba.

²³ Nexata pevejëato pecovëta Jesús pijajivi matatoyorotsia naëcota. Jumaitsi:

—iPamonae bitso daxitacuene pexainaevi, tsiayapëbejetsi penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabëcuenenabenajaca itsa jumetane bajara-pacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexinaejavanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia. ²⁵ Pacuenia camello ayainëxae, acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

²⁶ Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁷ Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia.

³⁰ Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabianatsinua. Itsiata bailsi jane bexëajavabelia xainaena matabi apo pevereverecejava. ³¹ Pamonae aeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi,

doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. ³³ Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinia, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. ³⁴ Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matakabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi

(Mt 20.20-28)

³⁵ Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaiibeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevevetsinexa. Itsanë naecaena necujanenia. Itsanë naecaena netsavenonenia, jaiibeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëtamebeje. ¿Pacacajëpabeje tsaja panenacaevevetsinexabeje papecabebiobi-aexanaenexabeje pacuenia xanë nacaevetsianajë tanebejiobi-aexanaenexa? ¿Pacacajëpabeje tsaja panenacaevevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejejavabelia.

³⁹ Nexata Santiagobeje Juanbeje jumaitsibeje:

—Jājā, panecajëpabeje cajena, jaiibeje.

Nexata icatsia Jesús jumaitsi Santiagobeje Juanbejejavabelia:

—Paxamëbeje pacabebiobiaexanaenabeje pacuenia xanë nebejiobi-aexanaena. Pacabeyaxuabianabejenua pacuenia xanë nebeyaxuabiana. ⁴⁰ Itsiata baitsi jane xua panevajëtamebeje panenaecaenexabeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso épitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

⁴¹ Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajarapamonae jamatabëcuenebaraanaepana Santiagobeje Juanbejejavabelia. ⁴² Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevevetsivi exana. Eveta caenacua canacujitsia. Nexata nacuaevevetsivi pijajivicuena eveta pamonaen jinavanapa pevetsinacuanëjva. Nexata bajarapanacuanë

pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. ⁴³ Pëtsa paxamë bajarapamonae cuenejëpaeya bajarapacuenia paexaname itsamonaëjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijavitonëcuenia bepacayavenonabiaba. ⁴⁴ Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijavitonëcuenia bepacayavenonabiaba. ⁴⁵ Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëttoxaneto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaëyaexana Bartimeo, bitso pitaxutotsëcënaenë, apo petaenë, yabara pelivaisi

(Mt 20.29-34; Lc 18.35-43)

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaëttoxaneto yajava, pitsapa Jericó tomaravecua. Nexata Bartimeovënënë, Timeo pexënato, eca namuto muxuneneta. Bartimeo, bitso pitaxutotsëcënaenë, apo petaenë. Jivijavabelia amoneya palata pevajëcabiabinë. ⁴⁷ Nexata Bartimeo ita jumetane Nazaret tomarapijinë Jesús imoxoyo penajetarucaëjava, vavajai tsecae.

—¡Jesús, Davidpijinë pemomomë, nitaxutotsoniataema! jai tsecae Bartimeo.

⁴⁸ Nexata picani itsamonaë jumeitavetatsi Bartimeo pemoyanexa. Itsiata bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunsativirena jumaitsi Bartimeojavabelia:

—Najamatabësäëtaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavabarena. ⁵¹ Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsëcënaenë, jumaitsi Jesúsjavabelia:

—Jesús, jitsipajë taitaxutoxanepanaëjava, jai.

⁵² Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanaëyaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponë Jesús pepëta napona.

11

Pacuenia Jesús pata Jerusalén tomarata yabara pelivaisi
(Mt 21.1-11; Lc 19.28-40; Jn 12.12-19)

¹ Jesús baja pijajivi barëimoxoyotanaJETARUCA Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. ² Jesús jumaiti pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papat-siaremeliabeje, pataenutsianamebeje burro, pecëtanutsinëtsi. Bajara-paburro itsajivi ata abaxë apo jumaponae. Paisinaenamebeje. Payamaëcarenamëbeje tsane. ³ “¿Detsa xuajitsia paisinamebeje burro?” ita pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Nexata Jesús pijajivitonëbeje liabeje. Caxitajarabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponëbeje jumaitisibeje pacuenia baja Jesús itorobatsibeje. Nexata tocopatatsibeje pecaponaenexabeje. ⁷ Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajara-pajumata Jesús ecaya. ⁸ Jesús penajetarucaenamutojavarena jivi ayaibitsaëttoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayi-ataeya Jesús pecopiapitsinexatsi. ⁹ Jesús penajetarucaejavata jivi ayaibitsaëttoxaneto Jesús pevajënaeya namataxainaeya najetarubena. Itsabitsaëttoxaneto Jesús pecovëya cotocaevanajetarubena. Daxita bajaramonae vavajai tsanajetarubena. Jumai tsanajetarubena:

—¡Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca! ¹⁰ ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubena bajaramonae.

¹¹ Nexata jane baja Jesús patajopa Jerusalén tomarata. Templobovalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tshipaji baja caniviyotsia.

Pacuenia Jesús bijataenuta higuerae piacuaijibixae yabara pelivaisi (Mt 21.18-19)

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piajani. ¹³ Jesús namutovecua tajiyotalia higuerae yabaxua taenuta. Nexata Jesús taeyojopalia bajaraponae pecuai perubenaeyava. Itsa Jesús pata bajaraponaejavabelia, ëpebaxu saya tsanuca. Tshipaji cajena abaxë apo penacuaitsimatacabi. ¹⁴ Nexata Jesús jumaiti higueraejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higueranaejavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi

(Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiabibiabivi ata pijamesanëmi Jesús topënyorobajaraba. Ucuu pecanajetabiabivi ata penabiabijavanëminua topënyorobajaraba. ¹⁶ Jesús apo tocopatsi itsajivi ata itsacueneyava pecaponaenexa templobojava. ¹⁷ Jesús livaisi tsipaeba. Jumaitsi bajara-jota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivinua, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajaramonae cjunavatsi Jesús. Tspaji daxitajivi jamatabëcuenenabenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higueranae tēpanuca yabara pelivaisi

(Mt 21.20-22)

²⁰ Jesús pijajivi barëmajita Betania tomarata. Nexata bajayacunua Jesús icatsia, pijajivi yajava, najetaruca pecovënamutua. Bajarapamonae taenuta higueranae baja petēpanucaejava daxita yatabutopaya. ²¹ Nexata Pedro najamatabēnapita higueranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenë, jica, taema. Ponae higueranae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaitsi pijajivijavabelia:

—Paxamë bitso pajumecovënëre Dioso papecatoexanaenexa pacuenia pavajëtame. ²³ Xaniajanë pacuenia pacatsipaebijitsiatsi. Itsa pajamatabējumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, pacajumecovënëtsipa mapatsuto ataje. Nexata itsa pajumaitsimë tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia, pacajumecovënëtsipa. Itsa pajumecovënëtsianame Dioso papecatoexanaejavanexa, itsa panajamatabëxainamenamenua Dioso epapecajumecovënëtsijavanexa, xua pavajëtsianame Diosojavabelia, Dioso pacajumecovënëtsiana. ²⁴ Bajaraxuata pacajumaitsi. Daxita xua pavajëtsianame Diosojavabelia, pasivajamatabējumaitsimë tsane: “Xua vajëtajë Diosojavabelia, pepacue Dioso nejumecovënëtsiana,” pasivajamatabëjamëre. Nexata xua pavajëtsianame Diosojavabelia, Dioso

pacajumecovënëtsiana. ²⁵ Itsajivi pibisiacuene papecaexanaejava, pajamatabëcuenecaevare panevajëtsijavata Diosojavabelia. Nexata pabarajamatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuenecaeviana paxamë ata pitabarata pibisiacuene paneexanaejava. ²⁶ Paxamë ita apo pajamatabëcuenecaevimë tsane itsanë pibisiacuene papecaexanaejava, ita apo pabarajamatabëcuenexanepanaemënu tsane, nexata pijinia paneaxa, athëbëtatsia peecaenë, apo jamatabëcuenecaevi tsane paxamë pitabarata pibisiacuene paneexanaejava. Apo pacabarajamatabëcuenexanepanaenu tsane, jai Jesús pijajivijavabelia.

Pacuenia Jesús cajëpatsi daxitacuene pexanaenexa yabara pelivaisi
(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús ita ponapona templobota, nexata sacerdotevi penamatacaitorobivi, judíovi pecujarubivinu, judíovi pijaancianovinua, parena Jesúsjavaberena. ²⁸ Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Ita paxamë panejumecaviatsianame, nexata xanë juya pacatsipaebianatsi ponë nitoroba taexanaenexa bajarapacuenë. ³⁰ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

³¹ Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi ita jumai tsi-paetsi: “Dioso raja pejamatabëcueneta,” ita jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ³² “Jivi raja saya pejamatabëcueneta Juanpijinë jivi bautisabaponapona,” acuenëbi vajajajava. Tsi-paji mapatomarapijivije ayaibitsaëtoxaneto Juanpijinë yabara sivajamatabëjumaitsi: “Juanpijinë raja pepacuenë Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

³³ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabapon-aenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenë, jai Jesús.

12

Pacuenia exana pijamatabëcuenëbejevi, itsanë pijauvabacabo petoëvet-sivi, yabara pelivaisi

(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenē pijairata uba ayaibacaboxaneto uvavēnējava. Bajaraxuacujinae pijaira matatoyorotsia ibopanaxanetonē mataropot-sia pefaratsijavata yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuaibarēmene pecayujucabiabi-javanexa. Bajaraxuacujinae pijauvabacabo tuatujēta exananuta pi-apiabotsia, penacuaitsimatacabi ita tonaveretatsi, athēbēyo pevetabi-abecaenexa pijauvabacabo. Nexata bajaraponē itsamonae evetsiaex-ana pijauvabacabo. Uvabacabo pexainaenē jumaitsi petoevetsivitsi-javabelia: “Pamatacabi cuainaveretsiana, natsicobetsatsianatsi. Pa-matacabi raja cuainaveretsiana, tajajivitonē itorobiarenajē xua pane-totsatsianame tanetopitsinexa,” jai uvabacabo pexainaenē petoevetsiv-itsijavabelia. Nexata uvabacabo pexainaenē tajē nacuyabelia pona.² Itsa baja uvabacabo pexainaenē yapētane pecopiapatsijava uvacuai pe-naveretsimatacabi penotsinexa, nexata uvabacabo pexainaenē itoroba pijajivitonē. Itoroba petoevetsivitsijavabelia petsicobetsatsinexatsi.³ Nexata uvabacabo pexainaenē pijajivitonē tovaetabatsi. Toconibabi-atsi. Petoconibabecujinaetsi cobesa naviatsiaexanaliatsi.⁴ Itsiata uvabacabo pexainaenē icatsia itoroba itsanē pijajivitonē petsicobet-satsinexatsi. Bajaraponē ata icatsia tomatajorobiaxuabatsi. Pibisiacue-nia tobijatanetsi.⁵ Itsiata icatsia uvabacabo pexainaenē itoroba itsanē pijajivitonē. Bajaraponē jane baja tobeyaxuabatsi. Bajaraxuacujinae abaxē icatsia uvabacabo pexainaenē itoroba itsamonae. Bajarapamon-aeyajuvēnēvi itsamonae totsaquibabiatsi. Itsamonae tobeyejebatsi.

⁶ Abaxē uvabacabo pexainaenē icatsia pitorobinexa, caenē tona-copatatsi. Pexēnato bitso piasivanē. Nexata jane baja uvabacabo pexainaenē pexēnato icatsia itoroba. Uvabacabo pexainaenē ja-matabējumaitsi: “Tajauvabacabo tanetoevetsivi tajajivi apo netoyaiy-atae ata, itsiata meta taxēnato netoyaiyataena,” jamatabējai uvaba-cabo pexainaenē.⁷ Itsiata uvabacabo petoevetsivitsi uvabacabo pex-ainaenē pexēnato ata, apo toyaiyataetsi. Itsa tane uvabacabo pexainaenē pexēnato, bajarapamonae najumaitsi: “Mara ponēje paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi.⁸ Nexata icatsia uvabacabo pexainaenē pexēnato ata tovaetabatsi. Icatsia pexēnato ata tobeyaxuabatsi. Petēpaenē xuabatsi bajarapauvabacabo pēnēyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenē pijauvaba-cabo petoevetsivitsijavabelia? Uvabacabo raja pexainaenē patsiarena. Verebiabiana daxita bajarapamonaemi. Nexata icatsia itsamonae evet-siaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumaitsi:

—Payapētaneme rabaja pacuenia Dioso pejumelivaisibaxutota tajēvelia jumaitsi xanē yabara. Iboto pelivaisicuenia Dioso pejumelivaisibaxutota jumaitsi xanē yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia nayaētsiana botabu daxita

itsaibo matatoxenetsia. ¹¹ Vajatuxanenë Dioso raja exanaena bajarapacuenë. Nexata nacatsita pexaniacuenë bitso tsanë bajarapacuenë, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹² Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitsiyava bajarapamonae yabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonae vecuapona.

Pacuenia Jesús jamatabëcuenejëbiaya yanijobatsi impuestomatamo pematamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberenä. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevetsinëjavabelia. ¹⁴ Nexata bajarapamonae pata Jesúsjavaberenä. Bajarapamonae jamatabëcuenejëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcuenejëbiaya Jesúsjavabelia.

¹⁵ Itsiata baitsi jane Jesús jamatabëcueneypëtane bajarapamonae jamatabëcuenejëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcuenejëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënuä, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënuä, jai.

¹⁷ Nexata Jesús jumaitsi bajarapamonaejavabelia:

—Nexata parajutabianame Romanonacua pepo pevetsinë pijajava. Parajutabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsiyavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petēpaecujinae icatsia piasaējavanexa yabara pelivaisi

(Mt 22.23-33; Lc 20.27-40)

¹⁸ Saduceovi saicaya itsalivaisi xaina. Bajarapamonae jamatabēcuenenavēxaniabiaya jumai tsabiabi: “Petēpaevi rabaja petēpaecujinae, icatsia apo asaē tsane,” jai tsabiabi. Nexata saduceovi imoxoyorenatsi Jesús. Saduceovi jumaiti Jesúsjavabelia mapacueniaje:

¹⁹ —Jesús, Moiséspijinē bajayata vajanacatoyaquinaelivaisi, jumaiti mapacueniaje: “Ponē pematapijinē pepua penacojobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. ²⁰ Nexata jinavanapa ēnacaemonae siete ponēbeje. Pepo matapijinē copiaya nacojoba. Nexata bajaraponē pijava vecuatēpa pexi xainaenejeva. ²¹ Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatuajēmatapijinē pita bajarapova. Bajaraponē ata icatsia tēpa pexi xainaenejeva bajarapovajavabelia. ²² Bajarapacuenia tēpa daxita siete ponēmibeje nacaemonae, bajarapova pepitaponaevi. Itsiata itsanē ata pexi apo xinae bajarapovajavabelia. Bajaraxuacujinae belia bajarapova ata tēpa baja. ²³ “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapamonaeyajuvēnēnē, pijava tsane bajarapova bajarapamatacabi? Daxita pamonaē siete ponēmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaiti saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaiti. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. ²⁵ Pamatacabi raja petēpaevimi Dioso icatsia asaēyaexanaenatsi, apo nacojobi baja tsane. Bajarapamatacabi itsajivi ata pexēnatoyo apo canajetsi tsane pebijavabelia petonacojobinexatsi. Bajarapamonae nacojobinejeva, jinavanapaena athēbētatsia pacuenia āngelevi jinavanapa. ²⁶ Itsa pepacuenē paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaiti. Bajarapabaxutota jumaiti pacuenia Moiséspijinē Dioso barēcuaiacuajaiti tsiquirinaemēyo petajueyecaecotijavaverena. Abraham baja peputēpae, Isaac ata baja peputēpae, Jacob ata baja peputēpae, bajarapamonae yabara bajayata Dioso jumaiti Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara. ²⁷ Bajarapacuenia Dioso pejumaitisixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Nexata paxamē itsa pajumaitisimē: “Petēpaevi rabaja petēpaecujinae, icatsia apo asaē

tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi
(Mt 22.34-40)

²⁸ Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

²⁹ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemoximë, pajumetaema. Vajatuxanenë rabaja caenë Dioso. ³⁰ Bajaraponë panijatuxanenë, panijaDioso, daxita panejamatabëéthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita paneesaëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³¹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

³² Nexata icatsia judíovi pecujarubinë jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³ Bejumecovënëtatsi Dioso daxita vajajamatabëéthëtojavavetsina, daxita vajanajamatabëxainaesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajutabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

³⁴ Jesús itsa jumetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

—Tsiquirijavayo catosaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcuenejëbiaya livaisi apo yanijobitsi.

Pacuenia Jesucristo yabara Davidpjinë bajayata tajëvelia: “Tajatuxanenë,” jai, yabara pelivaisi
(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi peca-panepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. ³⁶ Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje:

Dioso jumaitsi tajatuxanenëjavabelia: “Ecare abaxë tacujuanenia. Vecat-sivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

³⁷ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexë nato, nayabarajai Jesús judíovi pecujarubivi pecanaëjëtsinexa Cristo Dioso pexë natocuene.

Nexata jivibitsaëtoxaneto Jesús pejumetaevitsi jumebareyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejumecovënëtsiyaniva. Bajarapamonae jitsipabiaba tomara tuatuajëjava piapiajavanë penaxatabiabavanapaenexa jivi peyayataenexatsi. Jitsipabiabanua bitso yayataeya pebajacobinexatsi callejava. ³⁹ Bajarapamonae itsa najoneyabiaba judíovi penacae-tuatabibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyayataevitsi penaenexa petsinubijavanëta.

⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi

(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaeivi, caejivi canacujitsia, ayaijava palata jepona. ⁴² Bajarajota napata pamona pevecuatëpaevatsi, bepejiobiva. Nexata bajarapona najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia

perajutsinexa Diosojavabelia, bajaraxuayo bitso Dioso sivajamataböcuenebarëya daxita xua itsamonae jia bajarapacajonita matatovenetsia. ⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejibiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mt 24.1-2; Lc 21.5-6)

¹ Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapabotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapabotoxanetonëmije itsaiboto ata pejumavereca apo boca tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

⁴ —Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

⁵ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaenae. Pëtsa panacopatame itsajivi ata papeyamaxëitojorobinexa. ⁶ Tsipaji raja peyamaxëitojorobivinexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

⁷ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaenae. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. ⁸ Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëabiana ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuenie itsa pataenae, saya abaxë taxuxuabaponaena

piayaicuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabiabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi.

¹⁰ Nexata daxitanacuanëpijivijava patsipaebanajetarubenaename pecapanepaelivaisinexatsi. ¹¹ Itsa pacataicaena papecaneconitsinexa nacuaevetsivijavabelia, pëtsa pajamatabëcuenebëjamë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espiritu Santo pacacuaicuaijayaexanaena. Paxamë baitsi panejamatabëcueneta apo pacuaicuaijamë tsane.

¹² Bajarapamatacabi patajajivixaemë, panacaemonaë atomë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. ¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacuaa pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia.

¹⁵ Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepjjia najetabajiraviana. Pëtsa joneya pijaboyaliala pejutsinexa pecobecovë. ¹⁶ Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepjjia najetabajiraviana. Pëtsa naviatata pijaboyabeliala pejutsinexa penaxatabijava.

¹⁷ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ¹⁸ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene.

Nexata pamatacabi paręcēpecaename, pexaniamatacabi Dioso pacatocopatsiana bitso nabejobitsiaya paneponaeyaniva. ¹⁹ Tsipaji raja bajarapamatacabi bitso jivi bejobi tsane. Pabejobicuene abaxē jivi caeto ata apo tae Dioso nacua pexanaecujinae, bajarapabejobicuene taena. Bajaraxuacujinae icatsia itsamonae bejobiaexanae atatsi tsane, itsiata bajarapacuenia bitso apo bejobiaexanaetsi tsane. Tsipaji Dioso epatua yatuucutsiana jivi bitso nabejobitsiaya pejinavanapaematacabianēminexa, bitso jivi nabejobitsia pejinavanapaeyaniva. ²⁰ Dioso epatua itsa apo yatuucutsi tsipae bitso jivi nabejobitsiaya pejinavanapaematacabianēminexa, caejivi ata apo asaē tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejobitsiaya pejinavanapaematacabianēminexa, jai Jesús pijajivijavabelia tajēvelia pevajunupaebijavata papiayaicuene itsamatacabi copiapatsijitsia Jerusalén tomarata.

²¹ Icatsia Jesús tajēvelia vajunupaeba pacuenia itsamatacabi mapanacuataje patsijitsia peyamaxēitorobivi Dioso pejumecovēnētsivi peyamaxēitorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxēitorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pētsa pajumecovēnētame. Itsa pacajumaitsi tsane: “Bajarajota nuca Cristo,” itsa pacajai tsane, pētsa pajumecovēnētame. ²² Itsamonae jumai tsane: “Xanē raja Cristonē,” jai tsane. Itsiata jemajai tsane. Itsamonae jumai tsane: “Diosojumepaebinēnē raja, profetanēnē,” jai tsane. Itsiata jemajai tsane. Bajarapamonae itajara exanaena pinijicuene pexanaejavanē peyamaxēitorobinexa saya jivi. Nexata bajarapacuenia itsamonae yamaxēitorobaponaenatsi. Itsiata pamonae pepacuene Dioso pijajivi, Dioso pitapetsivitsi, bajarapamonae apo yamaxēitorobi tsanetsi. ²³ ¡Xania baja tsane! Xanē rabaja pacatsipaebatsi tajēvelia daxitacuene panenayajivitaenexa, jai Jesús pijajivijavabelia tajēvelia pevajunupaebijavata pacuenia itsamatacabi mapanacuataje patsijitsia peyamaxēitorobivi Dioso pejumecovēnētsivi peyamaxēitorobinexatsi.

Pacuenia Jesús tajēvelia navajunupaeba icatsia pepatsijavanexatsica petēpaecujinae yabara pelivaisi

(Mt 24.29-35, 42, 44; Lc 21.25-36)

²⁴ Jesús tajēvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanē tapatsivajēnaetsica, jivi taena pecujunavicuene. Jivi nabejobitsiaya jinavanapaena. Nexata jivi nabejobitsiaya pejinavanapaematacabicujinae matacabipijijuameto aitaquiri tsane. Meravipijijuameto ata aitaquiri tsane. ²⁵ Tulupu ata othopaenica irabetsica. Daxitacuene, xua rubena athēbētatsia, najēabiana. Xaniavaetsia apo rube-nae tsane. ²⁶ Nexata bajarapaepatota xanē, Daxitajivi Pematapijinēnē, jivi netaena athēbēvetsica itarērēbota tanajetarucajava. Patsianicajē daxitacuene taevetsinexa. Tanivenivenaecotia yajavapatsianicajē. ²⁷ Bajaraxuacujinae ángelevi itorobianajē, pamonae taja-jivi, Dioso pitapetsivitsi, daxitanacuanējavaverena tanetocaetuatsinexa xanējavaverena, jai Jesús pijajivijavabelia tajēvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹ Bajara pijinia pacuenia peneta itsa pataenae pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. ³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. ³¹ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsjivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, angelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. ³⁴ Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaevanexatsi pecovëta. Nexata pijajiviyajuvënënë itoroba baupa pevetsinënexa petoetevetababinexatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoetevetabianame baupa matapania tapatsimatacabijavabelianexa,” jai bo pexainaenë. ³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatujëta ata patsipajë. Matacabivëpata ata patsipajë. Bajayacunua ata patsipajë. ³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitajarabijitsipatsi panemajitsijavata. ³⁷ Palivaisi pacatsipaebatsi paxamëjavabelia, daxitajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

14

Pacuenia picani Jesús pijavajabitsaë jamatabëvaetabatsi yabara pelivaisi (Mt 26.1-5; Lc 22.1-2; Jn 11.45-53)

¹ Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabejevajënaeya, sacerdotevi penamatacaitorobivi, judíovi pecujarubivinuua, najumejaita picani bajarapafiestajava pevaetabinoxatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. ² Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacueni-abiyaniva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. ⁴ Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenon-aenexa, najai tsenae ëpamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ⁷ Daxitamatacabi raja bepejiobivi jinavanapa itsaxuayo pajinavanapame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. ⁸ Mara papetirivaje pexaniacuene netoexana pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. ⁹ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exanaxanëjavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.14-16; Lc 22.3-6)

¹⁰ Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹ Nexata sacerdotevi penamatacaitorobivi itsa tane bajarapacueni, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetapon-aponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxu-abivajënaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹² Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponae najë patacamitsaexanaenexa pascua fiestamat-acabi pexaejava nexaenexa? jai Jesús pijajivi.

¹³ Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajara-bianamebeje mera canalito pecanajetarucaenë. Bajaraponë papënanajetarucaenamebeje. ¹⁴ Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia. ¹⁵ Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatujë tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

¹⁶ Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pe-barëxaenexa, bajaraponëbeje exanabeje jane baja.

¹⁷ Itsa baja meravitsia, Jesús patajopa bajarajota pijajivi, doce ponëbeje, yajava. ¹⁸ Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹ Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰ Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane.

²¹ Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bjaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³ Bjaraxuacujinae icatsia Jesús copavënëjavata yapita pijajivi pe-barëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bjaraxuacujinae pijajivi bajarapora rajuta. Daxita Jesús pijajivi bajarapora apa.

²⁴ Jesús pijajivijavabelia jumaitsi:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁵ Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuataatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi (Mt 26.30-35; Lc 22.31-34; Jn 13.36-38)

²⁶ Jesús pijajivi barëanaxëana Diosojumevajianë. Bjaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ²⁷ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tshipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ²⁸ Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

²⁹ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívënëjavata yabara pelivaisi (Mt 26.36-46; Lc 22.39-46)

³² Jesús, pijajivi yajava, pata Getsemanívënëjavata. Bjarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca. ³⁴ Nexata Jesús jumaitsi pijajivi acueyabi ponëbejjavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejjavabelia.

³⁵ Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyantvatsi. ³⁶ Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajio-bicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaëjëpae tsabajarovia caeepatoyo ata paneaitavatsenaenexa? ³⁸ Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. ⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia. ⁴¹ Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara pelivaisi
(Mt 26.47-56; Lc 22.47-53; Jn 18.2-11)*

⁴³ Jesús pijavajabitsaë pevaetabijavatanexatsi, cuaicuajiai tsanucea pijajivijavabelia. Nexata bajarapaepatota patanajetaruca Judas, Jesús

pijajivi doce ponëbejeyajuvënënemi. Judas pënanajetarubenatsi jivi ayaibit-saëtöxaneto. Bajarapamonaeajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaronë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. ⁴⁶ Nexata jane baja Jesús pijavajabitsaë vaetabatsi. Cobecëtsia xaniavaetsia.

⁴⁷ Bajarajota Jesús pijajiviyajuvënënë pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁴⁸ Nexata Jesús jumaitsi pvaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi. ⁵² Nexata pevëjëato sábanana naisinaxuaba. Najetabajirava jumasënë.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinë pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ěnětuatuajěta sacerdotevi penamatacaitorobivi, judĭovi pijaancianovi ata yajava, judĭovi pecujarubivi ata yajava, nabarěcuaicuajai. Bajarapamona nayanijoba.

—Ĵipatsa yapětane Jesŭs pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamona apo caxitajarabi itsaneconi ata Jesŭs pi-janeconi. ⁵⁶ Itsamonae saya penajumetsěnětsilivaisi paeba Jesŭs yabara. Itsiata caelivaisi najuapaebi ata, najumejěpaeya apo paebi bajarapamona. ⁵⁷ Itsamonae nonobapuna. Penajumetsěnětsilivaisi paeba Jesŭs yabara. Penonobapunaeviyajuvěněně jumaitsi mapacueniaje:

⁵⁸ —Paxaně raja, pamataběxěyo panubenajě majotaje, pajumetaniji Jesŭs pejumaitsijava. Bajaraponě jumaitsi: “Xaně raja xuabianicajě mapatemploboje, jivi pexanaebo. Acueyabi matababita icatsia itsabo veretetsianajě. Jivi apo pexanaebo tsane,” jai maponě Jesŭsje, jai penonobapunaeviyajuvěněně.

⁵⁹ Itsiata daxita bajarapamona najumejěpaeya apo paebi.

⁶⁰ Nexata jane baja sacerdotevi pepo penamatacaitorobině nonotapuna bajarapamona pitabarata. Nexata jumaitsi Jesŭsjavabelia:

—ĴApo yapětaemě tsaja itsalivaisiyo ata nejumecanaviatsinexa? ĴXaniajai tsabaja pacuenia mapamona caneconitsiajumaitsije? jai Jesŭsjavabelia sacerdotevi pepo penamatacaitorobině.

⁶¹ Jesŭs itsiata moya. Apo jumepitsi cajena. Nexata icatsia sacerdotevi pepo penamatacaitorobině jumaitsi Jesŭsjavabelia:

—ĴXamě tsabaja pepacuene Cristomě, athěběvetsica Dioso pecaitorobinětsica jivi necapanepaenexa? ĴXamě tsaja, Dioso pexěnatomě? jai.

⁶² Nexata Jesŭs jumaitsi bajaraponějavabelia:

—Jăjă, xaně rabaja. Paxamě raja panetaename, Daxitajivi Pematapijiněně, taecaejava Dioso pecujanenia, daxitajamataběcuene pecaějěpaenětsi. Panetaenamenua tanajetarucaejava athěběvetsica itarěrěbota, jai Jesŭs.

⁶³ Bajarapacuenia Jesŭs pejumaitsijava itsa jumetane, sacerdotevi pepo penamatacaitorobině penaxatatsijava anaeya titinaxuaba. Bajarapacuenia titinaxuaba pianaepanaexae Jesŭs pejumaitsijava yabara. Nexata sacerdotevi pepo penamatacaitorobině jumaitsi daxita penacaeuatsivijavabelia:

—Pijacuata rabaja pejumaitsijumeta naneconita. Pematatsěněa apo namatavenonaetsi itsamonae vajanacatsipaebinexa paneconi yabara maponěje naneconitsiaexanaejitsiatsi. ⁶⁴ Paxamě rabaja pajumetaneme maponěje Dioso apo pejitsipaecuenia pecuaicuajijava. Tsipaji Dioso bepexěnato nataeya cuaicuajai. ĴDetsa nexata paxamě pajamataběitsimě? jai sacerdotevi pepo penamatacaitorobině daxita penacaeuatsivijavabelia.

Nexata daxita penacaeuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamona Jesŭs yabara.

⁶⁵ Nexata bajarapamonaeviyajuvěněvi Jesŭs itabarasuabatsi. Bajaraxuacujinae papaěběrěpanata itaxutocětatsi. Pitaxutocětsicujinaetsi itabaratsaquibabeponatsi pecobethaitoněta. Nexata bajarapamona jumai tsaponae Jesŭsjavabelia:

—jVēnējonare ponē caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabiaxuabatsi Jesús.

Pacuenia jane baja Pedro nayavajunuaxaina Jesús pijajivitonēcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxē Jesús sacerdotevi pepo penamatacaitorobinē pijabo ēnētuatuajēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinē pijabota penacuenebiva. ⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumait-sitsi:

—Xamē ata rabaja naponaponame Jesústa, Nazaret tomarapijinēta, jaitsi.

⁶⁸ Nexata Pedro itsiata nayavajunuaxaina Jesús pijajivitonēcuene. Nextata Pedro jumaitsi bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumaitsimē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonaе bajarajota nubena, bajarapamonaejavabelia bajarapova jumaitsi:

—Mara ponēje Jesús pijajiviyajuvēnēnēje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapētaenē cajena bajaraponē, jai.

Bajaraxuacujinae, icatsia caeepatoyocujinae, bajarajota penubenaеvi Pedro jumaitssitsi:

—Xaniajai raeta baja cajena. Xamē Jesús pijajiviyajuvēnēnēmē. Tsipaji rabaja Galilea nacuapijinēmē. Galilea nacuapijivi pecuaicuaijaicuenia cuaicuaijamē, jaitsi.

⁷¹ Nexata Pedro pejumexaniataenexatsi, ajumesaēya jumaitsi:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena ponē yabara panejumaitsimē, jai Pedro.

⁷² Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumaitssitsi: “Anijajumebeje vacara pefiabivajēnaeya, nayavajunuaxainaename tajajivitonēcuenēmē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabēxaina Jesús pejumaitsijumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Lc 23.1-5; Jn 18.28-38)

¹ Ajena baja matababi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsēnēa itsamonae bajarapitsijamatabēcuenevi

yajavanacaetuata penabarëcuaicuaijainexa. Bajaraxuacujinae bajarapamonae Jesús cobecëtsiaya caponaliatsi nacuaeavetsinë Pilatojavabelia.
² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jãjã, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamonae bajarapitsijamatabëcuenevi yajta-caitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-31; Lc 23.13-25; Jn 18.38-19.16)

⁶ Nacuaeavetsinë Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ⁷ Pamatacabi Jesús naneconitsiaexanatsi, bajarapamatacabi Barrabásvënënë jivi pebarëbevi barënaneconitsiaponapona penaneconitsivi pejebabiabibota. Barrabás, itsamonae yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. ⁸ Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pa-judíovimë pepo papecaevetsinë? jai Pilato.

¹⁰ Bajarapacuenia Pilato jumaitsi tsipaji yapëtane pajamatabëcuene yabara sacerdotevi penamatacaitorobivi tocaponarenatsi Jesús. Pilato jamatabëcuenyapëtane sacerdotevi penamatacaitorobivi Jesús pecueneitoyaxaetsi petocaponaejavatsirena. ¹¹ Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarájainëjavabelia? jai Pilato judíovijavabelia Jesús yabara.

¹³ Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

¹⁵ Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabëcuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumaititibenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

¹⁶ Nexata baja vajabitsaëvi Jesús caponaliatsi nacuaevevetsinë Pilato pijaboxanetojavabelia. Nexata bajarajota nacaetuata daxita vajabitsaëvi. ¹⁷ Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevevetsinë banaxatata, bajaraxua xatatatsi benacuaevevetsinëcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. ¹⁸ Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

¹⁹ Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata. ²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Lc 23.26-43; Jn 19.17-27)

²¹ Alejandrobeje Rufobeje paxa, Simónvënënë, Cirene tomarapijinë. Nexata Simón najetarua vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijsiatsi, peyavenonaeyacaponaeenexa.

²² Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitisijume: “Jivimatasipatsuto,” pejaijume. ²³ Bajarajota picaní Jesús rajutatsi vinora piapaenexa, pematajërëabira mirravënëjavata, bitso penavixaetaeyaniva pecobematabiabiavatatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia. ²⁶ Bajarajota Jesús pematabocoto matatsënëyo

yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. ²⁸ Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenëcuenia,” jai baja cajena tajëvelia Dioso pejumelivaisibaxutota Jesús yabara.

²⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matabibita icatsia veretetsianajë itsabo,” jamë. ³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ëpamonae najumaitsi:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo caëjëpaetsi.

³² Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponae aeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)

³³ Jesús baja itsa tēpaejitsia, ajena matonejejitsia, daxita nacuajava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. ³⁴ Nexata icatsia paepatota nacua napebeta, bajarapaepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejaijume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

³⁶ Nexata bajarapamonaeajuvënënë piajatuvonorayalia bepijia jabutaxuaba esponjavënëjjava. Bajaraxuacujinae esponjavënëjjava naeboupita cëtaruta. Toyotsiatsi picani Jesús petsutsuninexa bajaraxua.

Ponë picani Jesús toyotsiatsi bajaraxua petsutsuninexa, bajaraponë jumaiti penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijinë itsa najetaruca cruzavecua penutsinexatsitsica Jesús, jai bajaraponë capocaponaeya.

³⁷ Jesús icatsia pinijicuenia aėjai. Bajaraxuacujinae jane baja Jesús tēpanajereca. ³⁸ Paepatota Jesús tēpanajereca, bajarapaepatota templobo ēnētuaatujēalia peyatuucutarutsipana, ayaipapaēbērēpanaxaneto, titititica tuatujāereca, athēbēvetsicacujinae irabereca. ³⁹ Nexata paepatota Jesús tēpanajereca, vajabitsaēvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaējajjava. Taenucanua Jesús petēpanajetsjavareca. Nexata vajabitsaēvi pijacapitán jumaiti:

—Matsaena ponë tēpaje, pepacue ne baja rovia Dioso pexēnato, jai.

⁴⁰ Bajarajota petiriavibitsaētoxaneto tajiyoverena taenubena Jesús petēpaejava. Bajarapapetiriavi tuatujēta nanubena mapamatabēxēyoje. Itsava Mariāvēnēva, Magdala tomarapijiva. Itsava Salomévēnēva. Itsava icatsia Mariāvēnēva. Bajarapova Santiagobeje Josébeje pena. Bajaraponë Santiago, pevējēato abaxë itsanē Santiagovēnēnēvecua. ⁴¹ Pamatacabi abaxë Jesús ponapona Galilea nacuata, bajarapapetiriavi Jesús pēnājinavanapatsi peyavenonaenexatsi. Papetiriavibitsaētojavata Mariabana nanubena, bajarapapetiriavi ata Mariabana Jesús najuapēnaponarena Galilea nacuaverena Jerusalén tomarabereca.

Pacuenia Jesús petēpaenē mēthētatsi yabara pelivaisi

(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea tomarapijinē, judíovi pevetsinē, peyaiyataenētsi. Bajaraponë José copiaevetaponapona pecopiapatsijava pamatacabi caenē Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevājēnaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueneura ata, najamatabēsaēta. Nexata lia nacuae vetsinē Pilatojavabelia. Nexata José vajēta Pilatojavabelia petocopatsinexatsi Jesús petēpaenē pemēthētsinexa. ⁴⁴ Nexata Pilato jamatabējumaiti:

—Xaniajai tsamē rabaja Jesús tēpa, jamatabējai tsipaji abaxē bajaya-jebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaēvi pijacapitán. Nexata Pilato yanijoba vajabitsaēvi pijacapitánjavabelia, Jesús petēpae cuene Pilato peyapētaenexa. ⁴⁵ Nexata vajabitsaēvi pijacapitán tsipaeba Pilatojavabelia.

—Jesús rabaja capanepaeya tēpa, jai.

Nexata jane baja Pilato José tocopatatsi cruzajavavetsica pepitsinexa Jesús petēpaenē. ⁴⁶ Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petēpaenē. Daxitanēreca mataquionaeya matakacēba pexaniaviria piapiasábanapanata. Bajaraxuacujinae itsajota cajena José iboitapajanitojavata pinijiibovaju exanaeyaexanabuata petēpae vi pebuataponaenexa, bajarapaibovajualia José buata Jesús petēpaenē. Bajaraxuacujinae pinijiibopanaxaneto José tixirena. Yavajuvēpaacatabuata. ⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buata si petēpaenē.

16

Pacuenia Jesús petēpaecujinae icatsia asaē yabara pelivaisi
(Mt 28.1-10; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, acueyabi povamaxēto comuata petuxujuvira. Itsava Mariávēnēva, Magdala tomarapijiva. Itsava Salomévēnēva. Itsava icatsia Mariávēnēva. Bajarapova Santiago pena. Bajarapamonae petuxujuvira comuata peperabēexabinexa picani Jesús petēpaenē. ² Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubenaē:

—¿Jipatsa meta nacatotixitsiana Jesús peyavajuvēpa acatabuatsiibopanaxanetotsi? najai tsanajetarubenaē bajarapamonae.

⁴ Nexata bajarapamonae itsa imoxoyotabuatapona, naēcobarēcēpalia ibovajujavabelia. Nexata taeyabuata ibopanaxanetomi petixitabuatsijavalia ibovajuvēpavecua. Bajarapaibopana bitso pinijiiibopanaxaneto. ⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevějēato. Bajaraponē naxatateca piapiajava penioponaejava. Nexata petiriavi najunaviaca. ⁶ Nexata pevějēato jumaitsi petiriavijavabelia:

—Pētsa panajunaviacame. Paxamē picani pajaitame Jesús, Nazaret tomarapijinē, ponē cobematabiabarutatsi cruzajavabelia. Asaē rabaja icatsia bajaraponē petēpaecujinae. Ajibi rabaja tsarucacae majotaje. Pataema jane itsajota picani buatatsi. ⁷ Paponare baja. Patsipaebianame pijajivijavabelia, Pedrojavabelia ata. Pajumaitsimē tsane bajarapamonaejavabelia: “Jesús pina panevajēnaeyabelia pona Galilea nacuyabelia. Baja pina jotalia pacaxitajarabianame Jesús pacuenia baja pacajumaitsi,” pajamē tsane pijajivijavabelia, jai pevějēato petiriavijavabelia.

⁸ Nexata saya bajarapapetiriavi rēcēpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

Pacuenia Jesús petēpaecujinae, icatsia itsa asaē, tsitanaitajēta María Magdala tomarapijivajavabelia yabara pelivaisi
(Jn 20.11-18)

⁹ Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaē petēpaecujinae. Bajarapamatacabi copiata Jesús tsitanaitajēta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxē Jesús apo beyaxuabitsi. ¹⁰ Nexata María, Magdala tomarapijiva, Jesús petsitanaitajētsicujinaetsi, pona Jesús pijajivijavabelia. Nexata María pevājēnae Jesús pijajivi abaxē vēnueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. ¹¹ María jumaitsi Jesús pijajivijavabelia:

—Jesús rabaja icatsia asaē petēpaecujinae. Taniiji rabaja tajacuata, jai. Itsiata Jesús pijajivi apo jumexaniataetsi María.

Pacuenia Jesús petēpaecujinae icatsia itsa asaē, tsitanaitajēta pijajivitonēbejavabelia yabara pelivaisi
(Lc 24.13-35)

¹² Jesús pijajivitonēbeje najetarucabeje namutua. Nexata Jesús pija-jivitonēbeje namutua penajetarucæjavatabeje, Jesús tsitanaitajēta beitsanēcuenia pijajivitonēbejejavabelia. ¹³ Nexata Jesús pijajivitonēbeje itsa tanebeje Jesús, naviatecabeje. Nexata pacuenia tanebeje Jesús, tsipæbabeje itsamonæ Jesús pijajivijavabelia. Itsiata bajarapamonæ apo jumexaniataetsibeje.

Pacuenia Jesús petēpaecujinae, icatsia itsa asaē, pijajivi itoroba pex-anialivaisi jivi petsipaebanajetarubenaenexa daxitanacuanējava yabara pelivaisi

(Mt 28.16-20; Lc 24.36-49; Jn 20.19-23)

¹⁴ Bexējajavabelia icatsia Jesús tsitanaitajēta pijajivi once ponēbejejavabelia penabanenæjavata mesata. Nexata Jesús pinijicuenia muxujioba pijajivi piajamatabēcuenetajaxæ. Muxujiobanua apo pejumecovēnētsixæ petsipaebijavatsi pamonæ tane Jesús icatsia piasaējava petēpaecujinae. ¹⁵ Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶ Pajivi jumecovēnētsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovēnētsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷ Pamonæ peneta jumecovēnētsiana bajarapalivaisi, mapacuenia exanavanapaenæje. Tavēneta jivivecua capitsapaponaena dovathi. It-saviriajumetanua, apo penatsipaebijumemi ata, jemata natsipaebiana. ¹⁸ Bajarapamonæ jomo pecobeta pitsi ata tsane, apæ atanua tsane jivi petēpaeyaexanaera, itsiata apo tēpæ tsane. Bajarapamonæ itsa nacobebuat-siana piavitanejivi pematatsēnēvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petēpaecujinae, icatsia itsa asaē, naviaata baja athēbēabetsia yabara pelivaisi

(Lc 24.50-53)

¹⁹ Vajatuxanenē Jesús livaisi petsipaebicujinae pijajivijavabelia, Dioso baja pesaēta catsiatsi athēbēabetsia. Nexata athēbētatsia Jesús eca Dioso pecujanenia penajuaevetsinexabeje daxitacuenæ. ²⁰ Nexata jane baja Jesús pijajivi daxitanacuanējava jivi tsipaebanajetarubena bajarapapexanialivaisi. Nexata daxita pamonæ jumetaeyabiabatsi, jumecovēnētabiabatsi pexaniajailivaisi petsipaebicuenæ. Tsipaji Jesús pijajivi jamatabēcueneyavenonabiaba Jesús pijajivi pinijicuenæ pexanaenexa jivijavabelia livaisi petsipaebabiabijavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoy aquinaejava Teófilovënëñjavabelia, yabara pelivaisi

¹⁻² Pamatacabi abaxë Jesús ponapona mapanacuataje, jivi ayaibit-saëtoxaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranëjava Jesús pelivaisi, pexanialivaisi. Nexata tomaranëjava Jesús pelivaisi pejumetaevi, ayaibitsaëto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. ³ Nexata xanë ata mapatacabitaje yanijobaponajë bajarapalivaisi daxita peypätaevijavabelia. Yanijobaponajë xaniavaetsia tayapëtaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamë ata xaniavaetsia neyapëtaenexa daxita bajarapalivaisi, Jesucristo pelivaisi. Netsitanepana tacatoyaquinaenexa daxita bajarapalivaisi neyapëtaenexa pacuenia jumai tsaponae caelivaisi canacujitsia Jesús pexanaponaejavanë yabara, caejava canacujitsia. ⁴ Copiaya baja picani itsamonae catsipaeba bajarapalivaisi. Itsiata icatsia xanë catoyaquinatsi neyapëtaenexa jane baja xaniavaetsia bajarapalivaisi pexaniajailivaisicue.

Pacuenia ángel tajëvelia jumaitsi Zacaríasjavabelia: “Nexënatonëyo raja xainaename,” jai yabara pelivaisi

⁵ Pamatacabi abaxë Herodes eveta Judeanacua, bajarapamatacabi ponapona sacerdotenë Zacarías. Bajaraponë sacerdotevi Abíasvënëviyajuvënëñë. Zacarías pijava pevënë Elisabet. Bajarapova sacerdotenëmi Aarónpijinë pemomoxiyajuvënëva. ⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovënëtsiaya ponaponabeje pacuenia Dioso itorobatsi judíovi xaniavaetsia pejinavanapaenexa. ⁷ Itsiata bajarapajivibeje pexi apo xainaabeje. Tsipaji Elisabet mavecova. Nexata bajarapajivibeje bitso baja perujujiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicue Dioso pitabarata. Pasemanata daxita sacerdotevi, Abíasvënëvi, nacobenaevetsijitsia templobo, bajarapasemana Zacarías daxitasemana nanacuenebijitsia templobota. ⁹ Nexata abaxë sacerdotevi petaxuxuabivajënaeya penacuenebijava, pijacujirucuenia exana penayapëtaeponaenexa xua caenë canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapëtane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëñjava, petuxujuvijava. Bajaraxuata Zacarías joneya temploboyalia petajuitsinexa jane baja inciensovënëñjava temploboënëalia. ¹⁰ Paepatota Zacarías

tajuitanuca inciensovënëjava temploboënëalia, jivi ayaibitsaëttoxaneto templobojumavelia vajëcanubena Diosojavabelia. ¹¹ Nexata Zacarías temploboënëalia, altarpvënëjava muxuneneta, tsitanaitajëtatsi ángel. Paaltarpvënëjavajumata incienso tajuitabiaba Diosonexa, bajarapaaltarpvënëjava pecujuanenia pamuxunenejavata, Zacarías taenuta ángel. ¹² Nexata Zacarías itsa taenuta ángel, apo yapëtae pacuenia exanaejitsia Zacarías. Bitso jamatabëcuenenajunaviaca. ¹³ Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan. ¹⁴ Pinijicuenia, jivi ayaibitsaëto yajava, barëyamë tsane bajaraponëyo itsa catonaexanaena. ¹⁵ Tsipaji bajaraponëyo ayaijamatabëcuenenë tsane Dioso pitabarata. Apo apae tsane piataneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana. ¹⁶ Bajaraponë, Juan, Israel nacuapijivi najamatabëcuenecopatsiaexanaena Diosojavabelia. ¹⁷ Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisiajamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Itsa taxënato xainaiejitsianë, ¿detsa peneta pitsicuene taenajë tayapëtaenexa? Tsipaji rabaja xanë perujunënë. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebinexa mapapexanialivaisije. ²⁰ Xanë saya nejumeaebame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaëjépae tsane necuaicuaijajajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

²¹ Bajarapaepatota jivi templobo jumavelia evetanubenatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepijia apo pitsapaerena templobovecua? najai bajarapamonae.

²² Itsa jane baja Zacarías pitsaparena templobovecua, apo caëjépaeitsi pecuaicuaijajajava. Nexata pamonaevetanubenatsi templobo jumavelia, najumaitsi:

—Zacarías raeta bemajitsinaebota temploboënëlia itsacuene tane, najai.

Nexata Zacarías apo pecaējēpaexaetsi pecuaicuajijava, pecobeta tsi-
paeba besiyānēcuenia jivi peyapētaeayaexanaenexa.

²³ Itsa baja Zacarías vereta penacuenebijava templobota pamat-
acabibeje itorobatsi penacuenebinexa, naviatā baja pijaboyabelia.
²⁴ Bajaraxuacujinae Zacarías pijava, Elisabet, nacoxita jane baja. Nexata
bajarapova penacoxitsijava itsa yapētane, cinco pajuametobejecuenia
itsajavabelia pijabovecua apo ponaponae. ²⁵ Elisabet jamatabējumaitsi:

—Dioso raja taneitaxutotsoniataexae, neyavenona tanacoxitsinexa
mapacueniaje. Nexata baja apo auranē tsane tacoxibijava yabara,
jamatabējai Elisabet.

Pacuenia ángel tajēvelia jumaitsi Maríajavabelia yabara pelivaisi

²⁶ Elisabet baja seis pajuametobeje pepuaxainae penacoxitsicujinae,
Dioso icatsia itoroba pijaángel Gabriel. Pijaángel itoroba Nazaret tomara-
belia, Galilea nacuata peecaetomarabelia. ²⁷ Dioso itoroba ángel pet-
sipaebinxā Maríajavabelia. María abaxē pebi apo pequenetsiataevatsi.
Ángel pepatsivajēnaeya Maríajavabelia, Mariabeje baja cajena Josébeje
nabarēcuaijuvēnē José. ²⁸ Ángel nexata joneya María peponaponae-
bota. Ángel jumaitsi Maríajavabelia:

—María, cabajacobatsi. Pexaniajamatabēcuenia Dioso pecataeva.
Dioso cayajavaponaponae. Bitso cayavenonaena xamē daxita nevēna
petiriavi matatoxenetsia, jai ángel.

²⁹ Nexata María itsa jumetane bajarapacuenia ángel pejumaitsijavatsi,
María jamatabējumaitsi:

—¿Detsa meta pitsijamatabēcuenē yabara nejumaitsi ángel mapacueni-
aje? jamatabējai María.

³⁰ Icatsia ángel tajēvelia jumaitsi Maríajavabelia:

—María, pētsa junavame. Tsi-paji raja Dioso pexaniajamatabēcuenia
catane. ³¹ Xamē raja nacoxitsianame. Cavecuanaexanaena raja
pebinēyo. Bajaraponēyo vērūbianame Jesús. ³² Bajaraponēyo
ayaijamatabēcuenē tsane. “PinijiDioso, athēbētatsia peecaenē,
mapexēnatoje,” jaitsi tsane jivi. Nexata vajatuxanenē Dioso
nacuaevetsinē exanaenatsi. Pacuenia pijasalinainēmi Davidpijinē
bajayata nacuaevetsinēmi, bajara icatsia itsane. ³³ Bajaraponē evetsiana
Israel nacuapijivi daxita matabijavabelianexa, jai ángel tajēvelia
Maríajavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajē? Xanē raja tamona apo xainaenē, jai
María ángeljavabelia.

³⁵ Ángel nexata tajēvelia jumaitsi Maríajavabelia:

—Espíritu Santo raja patsianica xamējavabetsica. Nexata Espíritu Santo
Dioso pesaēta caevetsiana. Bajaraxuata panacuetonēyo cavecuanaex-
anaena, tsatsianatsi Diosonexa. “Dioso ra mapexēnatoje,” jaitsi tsane jivi.
³⁶ Nijamonaeva ata Elisabet, perujuva ata, exanaena penacuetonēyo.
“Mavecova raja,” jai atatsi jivi, itsiata baja penacoxitsicujinae xaina baja
seis pajuametobeje. ³⁷ Dioso raja caējēpatsi daxitacuenē pexanaenexa,
jai ángel tajēvelia Maríajavabelia.

³⁸ Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumlahsimë, bajara-pacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caemata-cabibejecujinae, María pona petsutonënacuada peecaetomarabelia. Bajarapatomara eca Judea nacuada. ⁴⁰ Nexata María joneya Zacarías pijaboyalía. Bajacobanuta pijamonaeva Elisabet. ⁴¹ María itsa bajacobanuta Elisabet, nexata Elisabet peyacotajinaenacuetoyo tsicotonayucutajarabatsi. Nexata jane baja Elisabet tsijamatabëvënëcatsi Espíritu Santo. ⁴² Nexata Elisabet Espíritu Santo itorobatsi pinijijumeta Maríajavabelia pejumlahtsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. ⁴³ Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? ⁴⁴ Itsa nebajacobanutame, tayacotajinaenacuetoyo nayucutajaraba pebarëyaxae. ⁴⁵ Barëyamë Dioso pecajumaitsucuenia nejumlahcovënëtsiva. Tsipaji pepacune catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

⁴⁶ Nexata María jumaitsi Elisabetjavabelia:

Tajamatabëëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. ⁴⁷ Sivajamatabëcuenebarëyanë Dioso tanecapanepaenënexa. ⁴⁸ Sivajamatabëcuenebarëyanë. Tsipaji pijajivitovanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaiyuene pexanaejavanë. Dioso raja apo pejitsipaenë jivi pibisiacuene pexanaejava. ⁵⁰ Daxita pamonaë Dioso yayataena, bajarapamonaë juya Dioso itaxutotsoniataeyabiabiana. ⁵¹ Dioso raja pecaëjëpaenëtsi pinijicuene ata pexanaenexa pecobeta. Pamonaë jamatabëjumlahtsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonaë Dioso nacayajatsiaexana baja. ⁵² Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata. ⁵³ Pamonaë pijinia bitso piäjani, bajarapamonaë Dioso rajuta pexanianabanijava. Pamonaë pijinia bitso pexinaevi mapanacuapijicuene, bajarapamonaë Dioso apo pejumlahcovënëtsixae, bajarapamonaë Dioso apo rajutsi. ⁵⁴ Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. ⁵⁵ Bajarapacuenia Dioso pijajivi itaxutotsoniataeyabiaba daxitamatabijavabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainëmi

Abrahampijinējavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviata pijaboyabelia.

Pacuenia Juan naexana jivibautisabinēnexa yabara pelivaisi

⁵⁷ Juameto baja ecaica, pajuametota Elisabet penacuetu vecuanaexanaejitsiatsi. Penacuetonēyo jane baja vecuanaexanatsi. ⁵⁸ Itsa Elisabet yapētane Dioso pitaxutotsoniataecuenetsi, bitso Elisabet jamatabēcuenebarēya. Daxita pamonaē ata ena imoxoyo, pijabo muxuneneta, bajarapova pijamonaeyajuvēnēvi ata, sivajamatabēcuenebarēyatsi. ⁵⁹ Itsa baja penacuetonēyo caesemana xaineca penaexanaecujinae, Elisabetbeje Zacaríasbeje pexēnatonēyo perabēcaucutsiaexanabeje judíovicuenia. Baitsi boupiperabēcaucutsiaexanabeje. Nexata daxita bajarapamonae pata Elisabetbeje Zacaríasbejejavaberena. Bajarajota picani penacuetonēyo tovēnērubijitsiatsibeje paxa pevēnēcuenia paxa picani pevēnēxainaenexa. ⁶⁰ Itsiata Elisabet jumaitsi pamonaējavabelia picani tovēnērubijitsiatsibeje:

—Jume. Pevēnē raja tsane Juan, jai Elisabet bajarapamonaejavabelia.

⁶¹ Nexata bajarapamonae jumaitsi:

—¿Detsa xuajitsia jitsipame bajarapavēnē? Itsanē ata cajena nijamonaeajuvēnēnē apo xainae bajarapavēnē, jai bajarapamonae Elisabetjavabelia.

⁶² Nexata bajarapamonae penacuetonēyo jane baja paxa junata. Pecobeta yanijoba pavēnē Zacarías jitsipa petovēnērubinexatsi. ⁶³ Nexata Zacarías vajēta tablapayo peyaquinaenexa. Nexata yaquinaruta: “Juan rabaja pevēnē,” pejaiitane. Nexata daxita bajarapamonae jamatabēcuenenabenajaca. ⁶⁴ Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomē, ayaijamatabēcuenenēmē bitso, jai tsaponae.

⁶⁵ Daxita pamonaē bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabēcuenenabenajaca. Itsamonae bajarapanacuata petsutonējava penaevi ata, daxita bajarapamonae ata, vēnēlivaisitane bajarapacuenē yabara. ⁶⁶ Daxita pamonaē jumetane bajarapacuenē yabara, apo nacofēnētsi. Jamatabēnajanavanapabiaba bajarapacuenē. Nexata bajarapamonae nayanijobabiaba.

—¿De meta jamatabēcueneitsi tsane bajarapanacuetonēyo itsa vitsabi-ana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonēyo.

Pacuenia Zacarías tajēvelia jumaitsi yabara pelivaisi

⁶⁷ Zacarías, Juan jivibautisabinēnexa paxa, tsijamatabēvēnēcatsi Espíritu Santo. Nexata Zacarías Espíritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabēcuene rajutatsi vaxaitsi pepo vajatuxanenējavabelia, Israel nacuapijivitsi vajaDiosojavabelia. Tsipaji pijajivitsi nacatoitorobianica vajanacapanepaenēnexa vajaneconivecua.

69 Dioso cajena nacatoitorobianica pinijicuene pexanaejava pecaējēpaenētsi vajanacacapanepaenexa. Bajaraponē Dioso pijajivitonēmi Davidpijinē pemomoxiyajuvēnēnē tsane. ⁷⁰ Bajayata Diosojumepaebivimi profetavi, Dioso pitorobicueniatsi pejinavanapaevi, tajēvelia najumecapanepaeya jumaitsi bajaraponē vajanacacapanepaejavanexa yabara. ⁷¹ Tajēvelia profetavimi najumecapanepaeya jumaitsi bajaraponē vajanacacapanepaejavanexa vajavajabitsaēvivecua, daxita vajanacaitoyavi atavecua. ⁷² Dioso nacaitaxutotsoniataena pacuenia tajēvelia najumecapanepaeya jumaitsi vajasalinaivimijavabelia. Dioso cajena apo nacofēnētsi pacuenia najumecapanepaeya jumaitsi vajasalinaivimijavabelia. ⁷³ Bajayata copiaya bajarapacuene yabara Dioso najumecapanepaeya jumaitsi vajasalinainēmi Abrahampijinējavabelia. ⁷⁴ Dioso baja najumecapanepaeya jumaitsi vajanacacapanepaenexa vajavajabitsaēvecua. Bajarapacuenia Dioso nacacapanepaena ajunavijibia vajatonacuenebavanapaenexa. ⁷⁵ Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenejevatsi Dioso pítabarata vajaasaētsavanapaepato abaxē mapanacuataje, jai Zacarías jivijavabelia tajēvelia pevajunupaebijavata Jesús Dioso pitorobijavanexatsitsica vajanacacapanepaenexa.

⁷⁶ Icatsia Zacarías jumaitsi pexēnatonēyojavabelia mapacueniaje: Taxēnatonēyo, xamē yabara itsamonae jumai tsabiabi tsane: “Mara ponēje pinijiDioso, athēbētatsia peecaenē, pijaprofetanēje,” jai tsabiabi tsane. Xamē raja itsaxuayo pepo petuxanenē najetaruaejitsia, pevājēnaeya jivi tsipaebanajetaruaename pesivanajamatabēcuenecopatsinexa bajaraponējavabelia pamatacabi bajaraponē najetaruaena. ⁷⁷ Tsipaebanajetaruaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeconimi Dioso vecuaajibiaexanaenatsi. ⁷⁸ Dioso vajanacaitaxutotsoniataexae, nexata nacayapētaeyaexanaena vajanacacapanepaenēnaxa athēbēvetsica pepatsijavanexatsica. ⁷⁹ Nexata bajaraponē jivijavabelia itsa tsipaebanajetaruaena pexaniajailivaisi, jamatabēcueneitayotsiana daxita pijamatabēcueneitaquirivimi. Baitsi pamonae picani cjunava petēpaejava, bajaraponē petsipaebilivaisi pejamatabēcueneta, bajarapamonae yapētaena jamatabēcuenexanepanaeya pejinavanapaenexa,

jai Zacarías pexēnatonēyojavabelia tajēvelia pevajunupaebijavata Jesús jivijavabelia Dioso pejumelivaisi petsipaebanajetaruaejavanexa.

⁸⁰ Nexata jane baja xuacujinae Juan jivibautisabinēnaxa vitsabanajetarua. Yajavaajamatabēcuenesaē baja cajena tsanajetaruae Dioso pejumelivaisi yabara. Nexata baja Juan itsa penaveretsinē, ponapona petusato nacuata. Matapania itsa taxuxuabijitsia jivi petsipaebinexa Jesús pelivaisi, naitajēta jivijavabelia pevēnēlivaisitaenexatsi daxita Israel nacuapijivi.

*Pacuenia Jesús naexana yabara pelivaisi**(Mt 1.18-25)*

¹ Imoxoyo baja pevajënae Jesús penaexanaejavanexa. Nexata bajarapamatacabijava Romanonacua pepo pevetsinë, Augusto, taxuxuaba pijajivi pitorobijava jivi petonamataëjëtsinexatsi. Jumaitsi pijajivijavabelia:

—Daxitajivi, pamonae taevetsinacuanëjava jinavanapa, panetona-mataëjëtsianame, jai.

² Bajarapamatacabi pijinia nacuaeetsinë Cireniovënënë saicaya itsanacua eveta, Siriavënënacua. ³ Nexata nacuaeetsinë Augusto pevetsinacuanëjava penaetomaranëta pejinavanapaevi, apo jinavanapae ëpijatomaranëjava. Itsamonae najinavanapa itsatomaranëjava. Bajaraxuata pamonae najinavanapa itsatomaranëjava, caejivi canacujitsia, pijasalinaivimi pijatomaranëjavabelia pona. Bajarapamonae pona penamataëjëtsinexatsi pijasalinaivimi pijatomaranëjava.

⁴ Bajaraxuata José ata barëpona Belén tomarabelia. José barënaropota Nazaret tomarata, Galilea nacuata peecaetomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona. ⁵ José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaexatsi. ⁶⁻⁷ Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevajënaebeje baja jivi yavënëca. Nexata apo nayacaëjëpaetsibeje bajarapabota penaecaenexabeje. Bajaraxuata patabeje dajubi pevetabiabibota. Nexata dajubi pevetabiabibota María jane baja vecuanaexanatsi penacuetonëyo, copiaya penacoxitsinacueto. Barëca dajubi pevetabiabibota. Jumaquioneta papaëbërëpanaxita. Buateta dajubi pexaejavanexa pemitsaothocabiabimoënëta.

Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabit-saëtonë. ⁹ Jemata oveja pevetsivi tsitanaitajëtsatsi Dioso pijaángel. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia. ¹⁰ Nexata ángel jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. ¹¹ Ajena rabaja, mapameravitaje, naexana baja daxitajivi pecapanepaenënexa. Naexana Belén tomarata, patomarata bajayata nacuaeetsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi pecapanepaenexa. ¹² Paneyapëtaenexa pacuenia pacatsipaebatsi, penacuetonëyo pataeyabuatetsianame mapacueniaje. Penacuetonëyo pataeyabuatetsianame papaëbërëpanaxita pejumaquion-aenacuetonëyotsi. Boquecaena dajubi pexaejava pemitsaothocabiabimoënëta, jai ángel oveja pevetsivijavabelia.

¹³ Bajara saya jota jemata oveja pevetsivi tsitanaitajëtsatsi ayaibit-saëtoxaneto ángelevi, copiaya petsipaebiángelnëtsijavata. Bajarapamonae

ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

¹⁴ ¡Dioso, athëbëtatsia peecaenë, pinijicuene rabaja exana! Pamonae Dioso jumecovënëta, Dioso sivajamatabëcuenebarëyatsi. Daxita bajarapamonae jamatabëcuenexanepanaeya jinavanapaeyaexanaena Dioso,

jai ángelevi penaxëanaejavata.

¹⁵ Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiángelnëtsica nacatsipaeba, najai oveja pevetsivi ángelevi pecovëta.

¹⁶ Nexata bajarapamonae bepjiayo ponalia Belén tomarabelia. Pata itsajota Mariabeje Josébeje barëecabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. ¹⁷ Oveja pevetsivi itsa taeyabuateta penacuetonëyo pacuenia baja cajena ángelnë tsi-paebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuateta. ¹⁸ Nexata daxita pamonae jumetane oveja pevetsivi pepaebilivaisi, jamatabëcuenenabenajaca. ¹⁹ María baja cajena pejamatabëëthëtota yapëtaeponapona daxita bajarapacueni yabara. ²⁰ Oveja baja pevetsivi naviabaponalia. Oveja pevetsivi namutualia jumai tsanajetarubena Diosojavabelia:

—Diosomë, bitso ayaijamatabëcuenenëmë. Pexaniajamatabëcuene pacarajutatsi patanetoexanaexaemë pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsi-paebatsi.

Pacuenia Jesúsñëyo caponaliatsi temploboyabelia yabara pelivaisi

²¹ Jesúsñexa penaexanaecujinae, ocho maticabita, perabëcaucutatsi judíovicuenia. Baitsi boupiperabëcaucutatsi. Vënërubatsinua jane baja pevënë pexainaenexa. Vënërubatsi “Jesús,” pejaivënëta. Tsi-paji baja cajena abaxë María nacoxitsinejeva Jesúsñexa, tajëvelia ángel jumaitsi Mariájavabelia: “Bajaraponëyo vënërubianame Jesús,” jai.

²² Nexata jane baja tocopiajopatsibeje Josébeje Mariabeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judíovi pexanaenexa penacuetonëyo itsa tonaexanatsi. Nexata Jerusalén tomarabelia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavabelia penajamatabëcuene xaniavaetsinexa Diosojavabelia. Rajutabejenua penacuetonëyo Diosojavabelia pijajivitonënexa petonacuenebinexa itsa penaveretsinë. ²³ Bajarapacuenia Josébeje Mariabeje exanabeje tsi-paji Dioso Moiséspijinëta penajumecopatsilivaisi jumaitsi: “Penacasajivibeje pexi itsa xainabeje, nexata copiaya panacuetonëyo xainabeje, totsatsibeje Dioso pijajivitonënexa,” jai. ²⁴ Josébeje Mariabeje rajutabeje ofrenda Diosojavabelia pacuenia Dioso Moiséspijinëta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

²⁵ Bajarapamatacabi ponapona Jerusalén tomarata Simeónvënënë. Bajaraponë jumecovënëtsiaponapona pacuenia Dioso pejumelivais-ibaxutota jumaitsi. Nexata bajarapamatacabi Israelnacua eveta

Romano nacuaverena èpepatsivi. Nexata Romano nacuaverena pepatsivi pevetsixae Israelnacua, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabècueneta petovecuajutsinexatsi Israelnacua pevetsivi. Nexata baja Romano nacuaverena pepatsivi, pevécuapitsapaenexa Israelnacua pevetsicue. Espíritu Santo yajavaponaponatsi Simeón. ²⁶ Nexata Espíritu Santo pejamatabècueneta Simeón tajèvelia yapètaeyaexanatsi pacuenia Simeón petèpaevajènae taejitsia Cristo, ponè Dioso athèbèvetsica itorobiapaebica jivi pecapanepaenexa. ²⁷ Nexata Espíritu Santo pejamatabècueneta Simeón joneyaexanatsi temploboyabelia. Bajaraxuata Simeón tane Mariabeje Josébeje pebarèjonejavatabeje Jesúsnyo temploboyarena pexanaenexabeje pacuenia Dioso Moiséspijinèta penajumecopatsilivaisi itorobatsibeje. ²⁸ Nexata Simeón isapita Jesúsnyo. Pexaniajamatabècuene rajuta Diosojavabelia. Pexaniajamatabècuene Simeón perajutsijavata Diosojavabelia, Simeón jumaitsi mapacueniaje:

²⁹ Tajatuxanenè, baja rajane netocopatsianame nijajivitonènè jamatabècuenexanepanaeya tatèpaenexa. Tsipaji baja netaeyaexanane pacuenia baja cajena tajèvelia najumecapanepaeya nejumaitsimè. ³⁰ Taitaxutota rabaja taniji maponèje, ponè itorobimica jivi pecapanepaenènexa xamèjavabelia. ³¹ Ponè itorobimica jivi pecapanepaenènexa, daxitajivi taenatsi. ³² Maponèje petsipaebilivaisita, pamonae apo judíovi ata, jamatabècueneitayotsiana. Yapètaeyaexanaena pacuenia jamatabècueneitsimè. Nexata maponèje pejamatabècueneta apo judíovi yayataena nijajivi judíovi,

jai Simeón templobota Diosojavabelia pexaniajamatabècuene perajutsijavata Jesúsnyo yabara.

³³ Nexata Josébeje Mariabeje itsa jumetanebeje bajarapacuenia Simeón pejumaitsijava Jesúsnyo yabara, jamatabècuenenabenajacabeje. ³⁴⁻³⁵ Bajaraxuacujinae Simeón tovajèta Diosojavabelia peyavenonaenexatsibeje Josébeje Mariabeje, Jesúsnyo yajava. Bajaraxuacujinae Simeón jumaitsi Marijavabelia:

—Mapanacuetonèyoje, Dioso itapetatsi. Maponèje petsipaebilivaisi jivi ayaibitsaètoxfaneto apo jumecovènètsi tsanetsi. Nexata jivi ayaibitsaètoxfaneto naxuabiana, Israel nacuapijivi. Ayaibitsaètoxfaneto pijinia jumecovènètsianatsi. Nexata pijinia ayaibitsaètoxfaneto capanepaena. Maponèje Dioso pesaèta pinijicue pexanaejava, tsitaexanaena jivi peyapètaenexa Dioso pitorobinètsitsica. Maponèje itajètsiana pacuenia jivi ayaibitsaètoxfaneto, caejivi canacujitsia, bèpènèa pibisiajamatabècuene najamatabèxainabiaba. Jivi ayaibitsaètoxfaneto apo jumecovènètsi tsanetsi. Pibisiaacuenia saya baranatsipaebianatsi. María, xamè nexata pepo nejamatabèèthètojavavetsina bitso sivajamatabècuenebèjamè tsane itsa yapètaename pacuenia exanaejitsiatsi, jai Simeón Marijavabelia Jesús yabara tajèvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavènèva. Bajarapova Fanuelpijinè pexènatoyo, Aserpijinè pemomoxiyajuvènèva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxè itsa pejanava.

Penacasabicujinae siete pavaibeje pepuaxainae pamonajavabelia, vecuatēpatsi pamonā. Itsajavabelia apo vecuaponabiabi templobo. Mat-acabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajēcabiaba Diosojavabelia. ³⁸ Nexata bajarapova ata pata itsajota Josébeje Mariabeje nucabeje templobota. Simeón pisanucaejavata Jesúsñeyo, isataenuta bajarapova. Nexata bajarapova pexaniajamatabēcuene rajuta Diosojavabelia Jesúsñeyo yabara. Romano nacuaverena pepatsivi Israelnacua pevetsixae, Israel nacuapijivi copiaevetavanapa Dioso pejamatabēcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamonaē copiaevetavanapa Dioso pejamatabēcueneta petovecuajutsinexatsi Israelnacua pevetsivi, daxita bajarapamonaejavabelia, bajarapova tsipaebabiaba Jesúsñeyo pelivaisi.

Pacuenia Jesús ponapona Nazaret tomarata pebarēnaviatsicujinaetsi templobojavaverena yabara pelivaisi

³⁹ Josébeje Mariabeje Jerusalén tomarata templobota exanaeveretabeje baja daxita pacuenia Dioso Moiséspijinēta penajumecopatsilivaisi itorobatsibeje. Nexata baja pijatomarabelia Jesúsñeyo barēnaviatabeje, Nazaret tomarabelia, Galilea nacuata peecaetomarabelia. ⁴⁰ Nexata jane baja Jesúsñeyo vitsaba Nazaret tomarata. Ajamatabēcuenesaē tsaponae Dioso pijacuene yabara. Jamatabēcuenevitsabaponanua. Dioso yavenonaponatsi ayaicuenia.

Pacuenia Jesúsñeyo templobota barēcuaijai judíovi pecujarubivijavabelia yabara pelivaisi

⁴¹ Caevai canacujitsia Josébeje Mariabeje ponabiababeje Jerusalén tomarabelia. Ponabiababeje pascuavēñēfiesta penataeyabiabinexabeje. ⁴² Nexata baja Jesúsñeyo doce pavaibeje itsa xaina, barēponabeje icatsia Jerusalén tomarabelia pascuafiesta penataenexa. ⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonējavabelia. Nexata Jesúsñeyo nacopatantalialia Jerusalén tomaratalia. Mariabeje Josébeje abaxē apo yapētaeabeje Jesúsñeyo pevecuacopatsijavatsiliabeje. ⁴⁴ Jamatabējumaitsiabeje saya:

—Jesúsñeyo raeta nanajetaruca vajanajuaponaevita, jamatabējaibeje. Bajaraxuata caematacabi baja pepuaponaēbeje namutua, itaxanabeje Jesúsñeyo. Nexata yanijobabeje pijamonaējavabelia, peyapētaevitsibejejavabelia ata. ⁴⁵ Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsñeyo.

⁴⁶ Acueyabi matacabita caxitajarababeje templobota. Jesúsñeyo naeca judíovi pecujarubivi tuatuañeta. Jumetaeyeca bajarapamonae penabarēcuaijaiailivaisi. Nexata Jesúsñeyo yanijobapona bajarapamonae penabarēcuaijaiailivaisi yabara. ⁴⁷ Nexata daxita Jesúsñeyo pejumetaeyenaevitsi, taeyena Jesúsñeyo xaniavaetsia pejumeyapētaejava judíovi pecujarubivi penabarēcuaijaiailivaisi. Taeyenanua xaniavaetsia pejumecanaviataponaejava, abaxē tsiquirinēyovajēto ata. Bajaraxuata jamatabēcuenenabenajaquena bajarapamonae. ⁴⁸ Josébeje Mariabeje itsa tanebeje bajarajota Jesúsñeyo penaecaejava, nexata jamatabēcuenenabenajacabeje. María nexata jumaitsi:

—Taxēnato, ¿detsa xuajitsia panevepēnacoparemenabeje? Paxanēbeje patacajaitarutsijavatabeje, bitso pacaitaxanatsibeje, jai María.

⁴⁹ Nexata Jesúsnēyo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsi-pamebeje raja mapabotaje. Tsipaji raja xanē taxa Dioso pijacuene taexanaenexa mapabotaje, nejamatabēcueneenabiaba, jai Jesúsnēyo.

⁵⁰ Itsiata bajarapajivibeje apo jumeyapētaebeje pajamatabēcuene yabara jumaitsi Jesúsnēyo.

⁵¹ María baja cajena pejamatabēēthētota yapētaeponapona daxita bajarapacuenia yabara. Nexata baja bajarapajivibeje pepēta Jesúsnēyo napona baja Nazaret tomarabelia. Nazaret tomarata Jesúsnēyo xaniavaetsia jumecovēnētsiaponapona pacuenia Josébeje Mariabeje itorobabiababeje. ⁵² Jesús abaxē vitsabanajetaruca. Jamatabēcuene vitsabanajetarucanua. Nexata Dioso pexaniajamatabēcuenia tanetsi. Daxita pamonaē Jesúsnēyo yapētanetsi, pexaniajamatabēcuenia tanetsi.

3

Pacuenia Juan jivibautisabinē jivi livaisi tsipaeba petusato nacuata yabara pelivaisi

(Mt 3.1-12; Mr 1.1-8; Jn 1.19-28)

¹ Pamatacabi pepo nacuaevevtsinē Tiberiovēnēnē xaina quince pavaibeje pevetsicujinae Romanonacua, bajara pijinia pamatacabi itsanacuanē eveta itsamonae. Bajarapamatacabi nacuaevevtsinē Poncio Pilato eveta Judeanacua. Bajara pijinia pamatacabi nacuaevevtsinē Herodes eveta Galileanacua. Bajara pijinia pamatacabi Herodes pejuyapijinē, nacuaevevtsinē Felipe, eveta Itureanacua, Traconitenacua yajava. Bajara pijinia pamatacabi nacuaevevtsinē Lisantias eveta Abilianianacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinēbeje tsaponaponaē. Bajara pijinia pamatacabi Juan, Zacarías pexēnato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanēta pejinavanapaevijava. Juan jumai tsanajetarucaē jivijavabelia:

—Panajamatabēcuenepeñēyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeconimi, jai tsanajetarucaē Juan jivijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinēmi profeta Isaíaspijinē bajayata tajēvelia yaquina Juan yabara. Juan jivibautisabinē Dioso pitorobilivaisi jivijavabelia petsipaebanajetarucaējavanexa yabara, yaquina. Profeta Isaíaspijinē peyaquinaelivaisita tajēvelia jumaitsi mapacueniaje:

Tanejumelivaisipaebinē vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucaējitsia petuxanenē. Batoroviaexananua namuto. ⁵ Daxita namutua pafotonē rubena, atsa baothoca penamatajēpaeyaexanaenexa namuto. Daxita petsutonēmi, pinijiibotsutoxanetonēmi ata, banamatajēpaeyaexana. Baroviayaexananua penatoxorotsinanutomi ata. Banamatajēpayaexananua namutua

pebobenaemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya panamëjavaberena. ⁶ Nexata daxitanacuanëpijivi yapëtaena Dioso pecapanepaejavanaxatsi pijaneconiveca.”

jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucaejavanexa yabara.

⁷ Jivi ayaibitsaëtoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan jumaitsi bajarapamonaejavabelia:

—¡Panejatabëcuenenavëxaniabivi! Pacuenia jomo rëcëpeca itsa tane isoto petajuenajetarucajava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexaveca. ⁸ Itsa pajitsipame Dioso papecapanepaejava, pacopabare pibisiacuene paneexanabiabijava. Dioso pajumecovënëtsi ajinavanapare.

Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae papecapanepaenexa Diosojavabelia. Dioso baja cajena caëjêpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecapanepaenexa Dioso. ⁹ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae, itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

¹² Gobierno pejamatabëcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërërame. Pëtsa najumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamatapona papecaitorobivi, jai Juan vajabitsaëjavabelia.

¹⁵Jivi itsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonaë Juan itsa tanetsi, bajarapamonaë jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonaë Juan yabara.

¹⁶Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tataxujonotsinexa bepijajivitonëcuenianë. ¹⁷Arrozzainaenë baja itsa vereta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereacaisotojavabelia, jai Juan daxita bajarapamonaejavabelia.

¹⁸Bajarapacuenia ayailivaisianëta Juan muxujobapona jivi. Tsipae-banajetaruca pexanialivaisi pecapanepaelivaisinexatsi Diosojavabelia. ¹⁹Bajaraxuacujinaë icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaejavanë ata, itaveta Juan. ²⁰Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejëbabiabibota peetsinexatsi.

*Pacuenia Juan bautisaba Jesús yabara pelivaisi
(Mt 3.13-17; Mr 1.9-11)*

²¹Juan pevaetabivajënaetsi penaneconitsivi pejëbabiabibota peetsinexatsi, jivi bautisabapona. Bajarapamatacabi Juan

bautisaba Jesús ata. Jesús pebautisabicujinaetsi itsa vajëta Diosojavabelia, athëbëtätsia itaboxo napatsia. ²² Athëbëvetsica Espiritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumaitisijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

*Jesucristo pijasalinaivimi pevënëanë yabara pelivaisi
(Mt 1.1-17)*

²³ Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexënatö. José paxapijinë pevënë Elí. ²⁴ Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. ²⁵ José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. ²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Jösec. Jösec paxapijinë pevënë Judá. ²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. ²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. ²⁹ Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. ³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. ³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. ³² Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. ³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. ³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor. ³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. ³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec. ³⁷ Lamec paxapijinë pevënë Musalén. Musalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán. ³⁸ Cainán paxapijinë pevënë Enós. Enós paxapijinë pevënë Set. Set paxapijinë pevënë Adán. Adán paxapijinë Dioso pexanaenëtsi.

Pacuenia picani Jesús jamatabëcueneëjébatsi dovathi yabara pelivaisi
(Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicuji-naetsi. Tsijamatabëvënëcatsi bitso Espiritu Santo. Nexata Espiritu Santo ponaeyaexanatsi petusato nacuyabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piajani. Dovathi nexata jamatabëcueneëjébatsi pibisiacuene picani pexanaenexa. ³ Dovathi jumaiti Jesúsjavabelia:

—Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaiti dovathijavabelia:

—Jume raja. Dioso raja pejumelivaisibaxutota jumaiti mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matababi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijitsutoxanetovabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë. ⁶ Nexata icatsia dovathi jumaiti Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexinaejava. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë. ⁷ Ayaijamatabëcuenenënë netaeya taitabarata nematabacabëta ita netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaiti dovathijavabelia:

—Dovathi, nevécuanatixire. Dioso raja pejumelivaisibaxutota jumaiti mapacueniaje: “Daxitajivi vajëcae pematabacabëta caenë, pepo petuxanenë Diosovabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaiti Jesúsjavabelia:

—Itsa pepacuene Dioso pexënatomë, jirevaremeca irabereca.

¹⁰ Bajarapacuenia jirevaremeca irabereca. Tsipaji xamë peitsacueneyaniva pecaevetsinexa, Dioso pejumelivaisibaxutota jumaiti mapacueniaje:

Dioso itorobianica pijaángelevi pecaevetsinexa. ¹¹ Nexata ángelevi pecobeta cayotsiana pecataxutsaquitsiyaniva ibotonëjavabelia, jai Dioso pejumelivaisibaxutota xamë pecaevetsinexa ángelevi, jai dovathi Jesúsjavabelia.

¹² Jesús nexata icatsia jumaiti dovathijavabelia:

—Jume raja. Dioso raja pijinia pejumelivaisibaxutota jumaiti mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaiti: ‘Xanë Dioso jamatabëcueneëjëtsianajë. Nexata natoexanaenajë pacuene bitso netsiayai tatëpaenexa. Itsiata Dioso

neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava, 'apo bejamatabëjai," jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcuenejëbiveretatsi pibisiacuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatatabëcuenejëtsinexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja itsa naviatu petusato nacuaverena, Galilea nacuyaberena, Espíritu Santo pesaë yajavaponapona. Nexata daxita Galilea nacuapijivi vënëlvivaisitanetsi Jesús. ¹⁵ Judíovi penacaetuatabiabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: "Maponëje bitso ayaijamatatabëcuenenë," jai tsabiabi.

Pacuenia Jesús naviatu pijatomarabelia, Nazaret tomarabelia, yabara pelivaisi

(Mt 13.53-58; Mr 6.1-6)

¹⁶ Nexata Jesús naviatu pevitsabitomarabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimat-acabita Jesús najoneya judíovi penacaetuatabiabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabiabibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. ¹⁷ Nexata Jesús tsicoberutatsi profeta Isaíaspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaiti mapacueniaje:

¹⁸ Dioso pijaEspíritu Santo netsijamatabëeca. Tsipaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatatabëcuenejiovijavabelia. Nitorobanua tajamatatabëcuenexaniavaetsinexa bajarapamonae pibisiacuene pexanabiabineconi yabara bepeyajamatatabëcuenejiovijavavecu. Nitorobanua tajamatatabëcuenexaniavaetsinexa pamonaepijamatatabëcueneitaquirivi, pamonaebaxë apo yapëtaepexaniajailivaisi. Nitorobanua tacapanepaenexa pamonaepijamatatabëcuenebejiovitabiabatsi pijavajabitsaë. ¹⁹ Nitorobanua tatsipaebinexa pacuenia baja Dioso najamatatabëcuenevereta pecapanepaenexa pijajivi,

pejaiitanejavata tajëvelia Jesús yabara Isaíaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabiabibota penacuenebinëjavabelia. Bajaraxuacujinae Jesús baja icatsia ecareca. Daxita pamonaepijajivi penacaetuatabiabibota ena, Jesús asaëyata taeyenatsi. ²¹ Nexata icatsia Jesús jumaiti bajarapamonaejavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaiti, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

²² Nexata daxitajivi pexaniajamatabëcuenia Jesús yabara cuaicuajiai. Jamatabëcuenenabenajaca pexanialivaisi Jesús petsipaebixae. Nexata bajarapamonae Jesús jamatabëcuenaeabiatanetsi. Nexata bajarapamonae nayanijobena. Najumaitsi:

—¿Matsa baja ponë Josépijinë apo pexënatotoje? najai tsenae bajarapamonae Jesús yabara.

Tsipaji saya bajarapamonae jamatabëjumai tsenae:

—Josépijinë raja pexënatoto, jamatabëjai tsenae.

²³ Nexata Jesús jamatabëcueneyapëtane pacuenia sivanajamatabëxainatsi bajarapamonae. Nexata Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsiatsi. Pacuenia pajumaitsimë tsabiabi pajiviyojavabelia pajamatabëcuenaeabiataneme, bajara pijinia pacuenia xanëjavaberena ata panejumaitsimë tsane patanejamatabëcuenaeabiataexaemë. Panejumaitsimë tsane mapacueniaje: “Pacuenia pacavënëlivaisitanetsi Dioso pesaëta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuatabiabibota penaevijavabelia.

²⁴ Icatsia Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsiatsi. Itsanë ata Diosojumepaebinëmi profetanë pijanacuapijivi apo jumecovënëtsitsi petsipae-bilivaisi. Jamatabëcuene aebiataeyabiabatsi pijanacuapijivi. ²⁵ Bajayata profetanëmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanë ata pinijicuene apo exanaenë tsane tavitsabitomarata. Bajayata, abaxë pamatacabi profeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabi janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae. ²⁶ Itsiata Elíaspijinë Dioso apo itorobitsi peyavenonaenexa bajarapamonaeyajuvënëva. Elíaspijinë Dioso itorobatsi peponaenexa Sarepta tomarapivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata. ²⁷ Bajayata, Elíaspijinë pevënamuto, profeta Eliseopijinë donapona Israel nacuata. Bajayajebi bitso peperabëtsabanaevi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaeviyajuvënënenë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuaverena pepatsinë, jamatejemayaexana, jai Jesús judíovi penacaetuatabiabibota penaevijavabelia.

²⁸ Nexata bajarapamonae itsa jumetane bajarapacuenia Jesús pejumaitsijava, bitso Jesús baraanaepanatsi bajarapamonae.

²⁹ Bajarapamonae nonobapuna. Vaetabatsi Jesús. Caponaliatsi tomarajumabelia.

Patsutoyenepanata eca Nazarettomara, bajarapatsutojumabetsia Jesús caponayatsi pexuabinexatsireca picani bajarapatsuto itapajanitovareca. ³⁰ Itsiata baitsi jane Jesús bajarapamonae tuatuajëta najetarucæ ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

Pacuenia pebi, dovathi peyajavaponaponaeñe, Jesús jamatejemayaexana yabara pelivaisi

(Mr 1.21-28)

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. ³² Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

³³ Bajarajota judíovi penacaetuatabiabibota pebi, dovathi peyajavaponaponaeñe, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexani-ajamatabëcuenenëmë, jai dovathi peyajavaponaponaeñe Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita daxita bajarapamonae pitabarata. Dovathi baja pebi vecuapitsapatsi itsiata itsacuenexanaenejevatsi. ³⁶ Nexata daxitajivi bajarapacuenexa itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsisica! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Mr 1.29-31)

³⁸ Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucaejavatsi. ³⁹ Jesús nexata cujilia peromaebanucaevatsi. Vecuaitaveta peromaebijavatsi. Nexata bajarajota peromaebanucaevatsi domae baja vecuajibi tsanajetsitsireca. Bajarapova baja jamatejema. Nexata bajarapova Jesúsbana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitaviriavitane pexainaevi, tocpatatsi Jesúsjavaberena. Jesús nexata perabëjayataponae caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. ⁴¹ Itsamonae ayaibitsaëto, dovathi peyajavajinavanapaevi, Jesús vecuacapsapapona. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocpatabiabi pecuaicuaijainexa petsipaebiyanima itsamonaejavabelia. Tsipaji

dovathi xaniavaetsia yapētanetsi Cristo athēbēvetsica Dioso pitorobijavatsi jivi pecapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Mr 1.35-39)

⁴² Bajayacunua, ajena baja matacabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pējaitatsi. Yapēnapatatsi itsajota Jesús eca. Asivatsi bajarapamonae Jesús pevecuaponae yaniva itsajavabelia. ⁴³ Nexata Jesús jumaitsi bajarapamonaejavabelia:

—Itsatomaranējava ata raja tsipaebijitsianē pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinxajivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacujava livaisi jivi tsipaebanajetaruca judíovi penacaetuatabibonējava.

5

Pacuenia dujuai bitso ayaijavaxaneto juta peyamatajucaejava yabara pelivaisi

(Mt 4.18-22; Mr 1.16-20)

¹ Itsamatacabi Jesús nuca Genesaret pucaxaneto itapata. Nexata jivi ayai bitsaētoxaneto cēnēnaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaeivi Simónbana vecuanonobajunarēcēpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ēnēabereca, Simón pijajera ēnēabereca. Jesús itoroba Simón jera peyatorotsinexatsilia tsiquirijavayo puca tuatuaējōjavabelia. Jesús eca jeraēnēta. Nexata Jesús jera ēnējavaverena livaisi tsipaebeca bajarapajivi bitsaētoxanetojavabelia. ⁴ Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubuajavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajē rabaja picani meravijehi. Itsiata apo payamatajutsinē caenēyo ata. Itsiata pacuenia paneitorobame, pacopatsiarecajē dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaēucuucuae. ⁷ Nexata itacovaebarena penajuayamatajucaeivi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vēnēta bajarapamobeje dujuai. Imoxo dujuai peyabubunae bajarapamobeje. ⁸ Nexata Simón Pedro itsa tane bajarapacuenē, pematabacabēta tonuca Jesús pitabarata. Jumaitsi Jesúsjavabelia:

—Tajatuxanenē, nevecuanatixire. Tsipaji xanē pibisiacuene taexanaenē, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucaevi yajava bitso jamatabëcuenenabenajaca, bitso ayaijjaxaneto dujuai peyamatajutsixae. ¹⁰ Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënapona baja Jesús.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mt 8.1-4; Mr 1.40-45)

¹² Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pe-matabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatumaxanë, cacaëjëpa raja tanejamatejemayaexanaenexamë mapavitanevecuaje. Itsa jitsipame, nejamatejemayaexanare mapavitan-
evecuaje, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ¹⁴ Nexata Jesús jumeitaveta bajayajebi bitso peperabëtsabanaenëmi petsipaebiyaniiva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacueni baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayabitsaëto pevënëlivaisitaeyanivatsi.

¹⁵ Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaistanetsi, ayabitsaëtoxaneto patapona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecu. ¹⁶ Itsiata Jesús itsajavata jivivecu natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranējavaverena, Judea nacuata penaetomaranējavaverena ata, Jerusalén tomaraverena ata. Nexata bajarapamatacabi Jesús Dioso pesaëta caējëpaeyaexanatsi jivi pejamatejemayaexanaenexa piavitanejavavecu. ¹⁸ Nexata bajarajota Jesúsjavaberena pebijivi camayota yavëtarapararena petabusipacuenabinëtsi. Bajarapamonae picani bajaraponë boyalia yavëtararajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabet-sia cajunaya. Bomatatu javavetsica vojoexana. Nexata bajarapavo-jotuatsica petabusipacuenabinëtsi camayota yacopatsicatsi jivi tuatujëatsica Jesús pitabarayatsica. ²⁰ Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajjavatsi Jesús jamatabëcueneyapëtane. Bajaraxuata petabusipacuenabinëtsijavabelia Jesús jumaitsi mapacueniaje:

—Pibisiacune rabaja nexanaeconimi cavecuaajibiaexanatsi, jai Jesús bajaraponējavabelia.

²¹ Nexata judíovi pecujarubivi, fariseovinua, itsa jumetaeyena Jesús pejumaitsijava bajarapacuenia, najamatabëxainena bëpënëa mapacueniaje:

—¿De meta maponëje? Maponëje Dioso apo pejitsipaecuenia cuaicuaijai. Itsanë ata cajena apo caējëpaetsi itsajivi pibisiacune pexanaeconimi pevecuaajibiaexanaenexa. Caenë Dioso caējëpatsi itsajivi pibisiacune pexanaeconimi pevecuaajibiaexanaenexa, jamatabëjai tse-nae bajarapamonae bëpënëa Jesús yabara.

²² Nexata Jesús jamatabëcueneyapëtane bajarapamonae bëpënëa pesivanajamatabëxainenaexa bajarapacuenia. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaējëpa jivi pibisiacune pexanaeconimi tavecuaajibiaexanaenexa. ²³ Paxamë apo pacacaējëpae ata itsajivi pibisiacune pexanaeconimi panevecuaajibiaexanaenexa, pacacaējëpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsi rabaja pibisiacune nexanaeconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa pepacune apo pacacaējëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponējavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacajëpaecune panejamatejemayaexanaenexa bajaraponë, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaējëpa tavecuaajibiaexanaenexa itsajivi pibisiacune pexanaeconimi ata pacuenia baja exanajë maponējavabeliaje. Nexata patanecueneyapëtaexamë tanecaējëpaejava tavecuaajibiaexanaenexa itsajivi pibisiacune pexanaeconimi ata, pataema pacuenia jamatejemayaexanaejitsianë maponëje, jai Jesús bajarapamonaejavabelia.

Nexata icatsia Jesús jumaitsi petabusipacuenebinëtsijavabelia:

—Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitsijavata, petabusipacuenebinëmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucæjavata namutua, Diosojavabelia jumai tsanajetarucæ: “Diosomë, pexaniacuene netoexaname,” jai tsanajetarucæ bajaraponë. ²⁶ Nexata daxita pamonaë tane petabusipacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonae jumaitsi Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaitsi:

—Ajena, mapamatacabitaje, tanetsi Dioso pinijicuene pexanaejava, najai bajarapamonae.

*Pacuenia Jesús pijajivitonënexa junata Levívënënë yabara pelivaisi
(Mt 9.9-13; Mr 2.13-17)*

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucæjavata taeyeta Levívënënë. Bajaraponë pematamoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajara-jota nacuenebabiaba. Pënapona Jesús.

²⁹ Bajaraxuacujinae Leví pijabota napata Jesús. Nexata Leví pini-jifesta toexana Jesúsnexa. Tsipaji Leví jamatabëcuenebarëya Jesús pejunatsixaetsi pijajivitonënexa. Nexata Leví pijabota naena ayaibit-saëto jivijavabelia impuestomatamo pematamoyanijobivi gobierno pejamatabëcuene. Itsamonaë ata Leví pijabota naena mesa muxuneneta.

³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuajiaitsi Jesús pijajivijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuene impuestomatamo pematamoyanijobabiabivijavata, piagamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús itsa jumetane fariseovi, judíovi pecujarubivinua, pebaracuaicuajiajavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja pivitanevi vaëba. ³² Bajara pijinia xanë ata itsinë. Apo sivapatajopaenë tajunatsinexa pamonaë baja aneconijibi tsavanapae.

Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtaþona Diosojavabelia pexaejava apo pexaeyabiabixae yabara pelivaisi

(Mt 9.14-17; Mr 2.18-22)

³³ Fariseovi, judíovi pecujarubivinu, jumaitsi Jesúsjavabelia:

—Juan pijajivi, fariseovi pijajivinu, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamona.

³⁴ Jesús nexata comparacióncuenia jumaitsi bajarapamonaejavabelia:

—Pamonaen junatatsi penacasabifistajavabelia penanabaninexa, apo atsobi pexaejava itsa abaxë yajavaecatsi pejananacasabinë. ³⁵ Itsiata baitsi jane itsa pejananacasabinë tsimaxëpatsipatsi pijavajabitsaë pevecuacaponae nexatsi itsajavabelia, nexata pecovëta bajarapamona apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaepato abaxë apo atsobabiabi pexaejava pamatacabibeje Diosojavabelia vajëtaþona. Itsiata pamatacabi xanë necaponaena bajarapamonaevecta, nexata jane baja bajarapamatacabi pexaejava apo xae tsane bitso tanesivanajamatabëxainaeaxa, jai Jesús peyanijobivitsijavabelia.

³⁶ Nexata bajarapamonaen perujumatabëcuene baja penavecuacopatsinexa, Jesús livaisi tsipaeba comparacióncuenia, bajarapamonaen pejumecovënëtsinexa ëpejanalivaisi, Jesús petsipaebilivaisi. Bajarapamonaen anijajamatabëcuenebeje pexainaeayaniva, perujumatabëcuene baja penavecuacopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsarutsinexa perujunaxatatsiesetojavabelia. Itsa caucutsipa pecatsarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana perucaejava perujunaxatatsiesetojavabelia. ³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. ³⁸ Bajaraxuata bepacae pejanavinoranë pejanabocodoruanëjavabelia. ³⁹ Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaejavabelia comparacióncuenia. Bajarapacuenia Jesús jumaitsi comparacióncuenia tsipaji bajarapamonaen catsiteca perujumatabëcuene. Nexata Jesús jitsipa bajarapamonaen pejumecovënëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi

(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigo pabianějava. Nexata Jesús pijajivi piajanixae, trigoruaně siricanajetarubena. Xunacobenacaquiatanajetarubena. Xuxaeyabuata-pona. ² Nexata fariseoviyajuvěněvi jumaiti Jesús pijajivijavabelia:

—Paxamě raja paexaname Dioso Moiséspijiněta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemě mapacueniaje, jai fariseovi Jesús pijajivijavabelia.

³ Jesús nexata jumaiti fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tspiji bitso piajani. ¿Apo palebimě tspiji Dioso pejumelivaisibaxuto paneyapětaenexa pacuenia vajasalinainěmi Davidpijině, pebarěponaponaevi yajava, exana pamatacabi bitso piajani? ⁴ Bajaraponě Davidpijině joneya Dioso pijatemploboyalia. Nexata Dioso pijatemplobēnēta, mesajumata bobena Diosonexa ofrendacuenia petojebipanbēaně. Bajarapapanbēaně itsajivi ata apo tocopatsitsi pexaenexa penaneconitsiyaniva Diosojavabelia. Ěsacerdotevi picani pexaenexa tocopatatsi. Davidpijině apo sacerdoteně ata, pijajivi barěxae ata bajarapapanbēaně, itsiata apo vėnananeconitsi Diosojavabelia, jai Jesús fariseovijavabelia.

⁵ Icatsia pematatsěněa Jesús jumaiti fariseovijavabelia:

—Xaně, Daxitajivi Pematapijiněně, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsaquenaeně yabara pelivaisi

(Mt 12.9-14; Mr 3.1-6)

⁶ Itsamatacabi Jesús joneya judíovi penacaetuatabiabiboyalia judíovi penacueraevetsimatacabita. Nexata bajarajota Jesús jivi livaisi tsi-paeba. Bajarajota pebi pecujanenia pecobetsaquenaeně, naeca. ⁷ Nexata Jesús naitaxutocaevetenatsi judíovi pecujarubivi, fariseov-inua, petaenexatsi Jesús pejamatejemayaexanaejava pecobetsaquenaeně judíovi penacueraevetsimatacabita. Nexata Jesús pecobetsaquenaeně itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonae. ⁸ Nexata Jesús yapětane pacuenia bajarapamonae sivanajamataběxainatsi. Nexata Jesús jumaiti pecobetsaquenaenějavabelia:

—Nonotapunare. Nucare majotaje mapamonae pitabarataje, jai Jesús.

Nexata pecobetsaquenaeně nonotapuna. Nuca bajarapamonae pitabarata. ⁹ Nexata Jesús jumaiti penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matotoyorotsia naěcoba daxita pamonaenaja bajarajota. Jesús jumaiti pecobetsaquenaenějavabelia bajarapamonae pitaběnejeva:

—Namaxěrovire, jai Jesús.

Nexata baja pecobetsaquenaeně namaxěrovita. Bajarajota cobexanepananajereca baja. Pecobetsaquenaevajami ajibi. ¹¹ Nexata judíovi

pecujarubivi, fariseovinua, itsa tane Jesús pecobexanepanaeyaexanae-
java pecobetsaquenaenë, bitso anaepana. Nexata jane baja najumejaita
pacuenia Jesús beyaxuabijitsiatsi.

*Pacuenia Jesús pijajivi ayaibitsaëtoxanetoyajuvënëvi itapeta saya doce
ponëbeje apóstolevinexa yabara pelivaisi*

(Mt 10.1-4; Mr 3.13-19)

¹² Jesús pijajivi ayaibitsaëtoxanetoyajuvënëvi, doce saya ponëbeje,
itapeta apóstolevinexa. Jesús pitapetsivajënaeya apóstolevinexa,
junaya petsutojumabetsia pevajëtsinexa Diosojavabelia. Nexata
Jesús meravijebi bajarapatsutojumatatsia vajëtapona Diosojavabelia.
¹³ Bajayacunua, ajena baja matababi tsarucapona, Jesús junata daxita
pijajivibitsaëtoxaneto bajaraponëjavabelia. Nexata bajarajota itapeta
pijajivibitsaëtoxanetoyajuvënëvi, doce saya ponëbeje. Bajarapamonae
Jesús vënëruba apóstolevi. ¹⁴ Pamonae Jesús itapeta apóstolevinexa
mavevënëanëje. Copiaya ponë, pevënë Simón. Bajaraponë Jesús
vënëruba itsavënë, Pedro. Itsanë Andrës, Simón Pedro jane baja
pejuyapijinë. Itsanë Santiago. Itsanë Juan. Itsanë Felipe. Itsanë
Bartolomé. ¹⁵ Itsanë Mateo. Itsanë Tomás. Itsanë Santiago, Alfeo
pexënato. Itsanë Simón, celotenë. ¹⁶ Itsanë Judas, Santiago pejuyapijinë.
Itsanë Judas Iscariote. Bajaraponë bexëjavabelia Jesús canajetsijitsiatsi
pijavajabitsaë pecobeyabelia pebeyaxuabinexatsi.

Pacuenia Jesús jivi ayaibitsaëtoxaneto livaisi tsipaeba yabara pelivaisi
(Mt 4.23-25)

¹⁷ Jesús baja, pijajivi ayaibitsaëtoxaneto yajava, runaica
petsutojumavetsica. Nexata epatua petsutoyenepanajavata, itsajota
ira namatajëpa, Jesús yajavanuca pijajivi ayaibitsaëtoxaneto. Bajarajota
nexata jivi nacaetuata ayaibitsaëtoxaneto. Bajarapamonae Judea
nacuapijivi, itsamonae Jerusalén tomarapijivi, itsamonae Tiro tomarabeje,
manuameneitapata ecabeje. Daxita bajarapatomaranëpijivi
nacaetuata pejumetaenexa Jesús petsipaebilivaisi. Bajarapamonae
patanua Jesús pejamatejemayaexanaenexa piavitanejavavecua.
¹⁸ Bajarapamonaeyajuvënëvi itsajamatabëcuene tsabiabi dovathi
pejamatabëcueneta. Bajarapamonaenua Jesús jamatejemayaexana.
¹⁹ Daxita pamonae bajarajota nacaetuata, Jesús picani jamatabëjayabatsi.
Tsipaji Jesús daxitajivi piavitanejavavecua jamatejemayaexanapona
pecaëjëpaejamatabëcuenetatsi.

*Pacuenia Jesús pijajivi tsipaeba Jesús pijajivi peja-
matabëcuenebarëyajavanexa, apo pejamatabëcuenebarëyajavanexanua, yabara
pelivaisi*

(Mt 5.1-12)

²⁰ Jesús pijajivi naëcota asaëya. Jumaitsi bajarapamonaejavabelia:

—Panajamatabëcuene copabame baja Diosojavabelia panepo-
nenexa Dioso pijatomarabetsia. Bajaraxuata paxamë bepane-
jamatabëcuenejibivimi panijaneconi yabara, aeconoxae baja
pajamatabëcuenebarëyamë Diosojavabelia.

²¹ Pajitsipame Dioso pijacuene. Pajamatabëcuenebarëyamë baja. Tsi-
paji Dioso athëbëtatsia pacarajutsiana daxitacuene xua panamatavenon-
ame.

'Paneyanuevimi pibisiacuene paneexanaeneconi yabara, pacave-cuaajibiaexana baja bajarapaneconi. Bajaraxuata itsamatacabi pajamatabëcuenebarëyamë tsane.

²² 'Xanë, Daxitajivi Pematapijinënë, patajajivixamë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuenia pacabijatae ata tsane, pibisiacuenia pacabaracuaicuaijai ata tsane, itsiata pasivajamatabëcuenebarëyamë tsane. ²³ Bajarapacuenia pacaexanae ata tsane, itsiata pasivajamatabëcuenebarëyamë tsane. Tspaji raja Dioso athëbëtatsia pacarajutsiana bitso pexaniacuene jivi papecaitojamatabëcuene. Pamonae pacaitoya tsane, bajarapamonae pijasalinaivimi bajayata itoya Diosojumepaebivimi profetavi. Nexata bajarapamonae pijasalinaivimi bajayata bejiobiaexanapona Diosojumepaebivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

²⁴ 'Daxitacuene mapanacuata panexinaevi, Dioso bitso ayaicuenia pacabejiobiaexanaena. Tspaji pacabarëyamë tsavanapae ëpanexinaejava mapanacuataje.

²⁵ 'Bitso bepajamatabëcuenejobimë tsane daxitacuene mapanacuata panenatojitsipaecuene panexinaevi. Pasivajamatabëcuenebarëyamë picani tsavanapae panexinaejava. Itsiata baitsi jane itsamatacabi itsa patëpaename, panetëpaecujinae panajamatabëxainaname ayaicuenia.

'Bepajamatabëcuenejobimë tsane panejëajëajitsabiabivi sivabarëyaya mapanacuapijicunejë. Paneasaëtsavanapaepato abaxë mapanacuataje panesivajamatabëcuenebarëya tsabiabixae bajarapacueni, panetëpaecujinae bitso payanueni pibisiacuene paneexanaeneconi.

²⁶ 'Mapanacuapijivi pexaniacuenia pacabaracuaicuaijai tsabiabi saicayacuenia Dioso pejumelivaisivecua panetsipaebixiae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejobimë tsane. Tspaji pacuenejëpame bajayata pamonaemi jinavanapa. Bajarapamonaemi bajayata jivi tsipaebabiaba saicayacuenia Dioso pejumelivaisivecua. Nexata bajarapamonaemi pexaniacuenia baracuaicuaijaiti tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Mt 5.38-48; 7.12)

²⁷ Icatsia Jesús jumaiti petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitojavi ata. Pexaniacuene patoexanare pamona pacaitoya. ²⁸ Payavenonare pamona pacabijatane pibisiacuenia. Pamonae pacabaracuaicuaijai pibisiacuenia, patovajëre Diosojavabelia peyavenonaenexatsi.

²⁹ Itsajivi itsa pacaitabarapacabiaxuaba anaeya, nexata icatsia itsanenia ata patonaitabaracaevere papecaitarapacabiabuabina. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papeyacajërëtsinexa. ³⁰ Pajivi itsacuenejavayo amoneya

pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. ³¹ Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia, jai Jesús pijajivi ayaibitsaëttoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Tsipaji pïajamatabëcuenebejevi ata, pamonaë asivatsi, banamataenetsianasiva. ³³ Pexaniacuene itsa patoexanaejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji pïajamatabëcuenebejevi ata, pexaniacuene batoexana penajamatabëcuenejëpævijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji pïajamatabëcuenebejevi ata, batsicopata penajamatabëcuenejëpævijavabelia, pamonaë jamatabëcuene yapëtane baja petocanaviatsinexatsi. ³⁵ Nexata pasivamëre panijavajabitsaë ata. Bajarapamonaejavabelia pexaniacuene patoexanare. Bajarapamonae patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexanavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë pïajamatabëcuenebejevi ata. Itsamonae Dioso yavenonaë atatsi, itsiata apo canaëjëtsi Dioso peyavenonaëjavatsi. Bajarapamonae apo canaëjëtsi ata Dioso peyavenonaëjavatsi, itsiata tsiteca Dioso itaxutotsoniataeyabiaba. ³⁶ Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsaëttoxanetojavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi

(Mt 7.1-5)

³⁷ Icatsia Jesús jumaitsi pijajivi ayaibitsaëttoxanetojavabelia petsutoyenepanajavata:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuajiamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuajiai tsane pibisiacuene paneexanaejava yabara. Itsamonae pibisiacuene pacaexanaë ata, pajamatabëcuene caevare. Pabarajamatabëcuene xanepanarena. Nexata pijinia Dioso pitabarata pibisiacuene paneexanaejava Dioso jamatabëcuene caeviana. Pacabarajamatabëcuene xanepanaenanua. ³⁸ Parajutaponare itsamonaejavabelia penamatavenonaëjavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

³⁹ Jesús icatsia comparacióncuenia tsipaeba bajarapamonaejavabelia mapalivaisije:

—Ponè bitso itaxutotsécëna, apo caējëpaetsi pematacaponaenexa itsanè, ponè pijinia bitso itaxutotsécëna. Itsa matacaponaejitsipa, nexata najuajopaejitsiparecabeje bajaraponëbeje caemèthëxanetojavareca. ⁴⁰ Itsajivi pijinia itsa nacujaruba, yapëtae ata baja penacujarubijava, apo jamatabëcuenematatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenëjëpabeje pecujarubinëtsibeje, jai Jesús pijajivijavabelia.

⁴¹ Jesús pijajiviyajuvënëvi pepacuene bepianeconijibivi natane. Nexata ita cujirutane itsamonae itsacuenejavayo pexanaejava, jumai tsabiabi: “Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaitsabiabixae, Jesús pijajivi piurabinexa jumaiti mapacueniaje:

—Pëtsa paxamë pepacuene bepianeconijibivi nataeya pamuxujibome itsajivi pijaneconi yabara. Tshipaji raja apo payapëtaemë paxamë ata pijinia paneconivajëto paxainame. ⁴² Nexata paxamë ata ayaineconixaneto ita paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenëvi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabibijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenë ita nacuita, nayapëtane pavirianaecuene yabara pelivaisi

(Mt 7.17-20; 12.34-35)

⁴³ Icatsia Jesús jumaiti pijajivi ayaibitsaëtoxanetojavabelia pësutoyenepanajavata:

—Pexaniavirianaenë ita ubatsi, nacuita pijinia pexaniacuai. Apo nacuaitsi pibisiacuai. Ponae pijinia pibisianaë, apo nacuaitsi pexaniacuai. ⁴⁴ Caevirianaë canacujitsia yapëtanetsi ita nacuita. Higovënecuaito apo paucutsimë cucunanaeta. Uvaru pijinia apo paucutsimë saya pejuviënëbotota. ⁴⁵ Bajara pijinia itsi jivi ata. Pexaniajamatabëcuenenë pexaniacuene yabara cuaicuaijai. Tshipaji pexaniajamatabëcuenë xaina pejamatabëëthëtota. Pibisiajamatabëcuenenë pijinia pibisiacuene yabara cuaicuaijai. Tshipaji pibisiajamatabëcuenë najamatabëxaina pejamatabëëthëtota. Nexata pacuene yabara pebi pecuaibovojotota cuaicuaijai, bajarapacuene pitsapa pejamatabëëthëtovavetsina, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaiti pijajivi ayaibitsaëtoxanetojavabelia pësutoyenepanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia? ⁴⁷⁻⁴⁸ Pajivi xanëjavaberena pata tanenamuxunaevetsinexa, tanejumecovënëtsinexanua, bajarapajivi apo nacueratsi tsane. Bajarapajivi piatajairata bo bepexanaenë

tsane. Bajarapajivi yabara pacatsipaebianatsi. Bo pexanaenēnexa, peyapētaexae itsajota pijabo exanaejitsia pebubutsijavanexa, nexata naesituru atajaya xaniavaetsia mēthēca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaētsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mēthēca piatajairata. Nexata bajaraponē apo nacueratsi bo pexanaejava. ⁴⁹ Pajivi nejumetae ata tsane tatsipaebilivaisi, itsiata itsa apo nejumecovēnētsi tsane tatsipaebilivaisi, nacueratsiana. Bajara-pajivi tajetabota bo bepexanaenē tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava. Tsipaji bo peveretetsicujinae, mene avajubuatsica. Nex-ata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaē pijacapitán pijabota petonacuenebaponapon-aenētsi, Jesús tojamatejemayaexana yabara pelivaisi
(Mt 8.5-13)

¹ Jesús baja itsa najumevereta pijajivi ayaibitsaētoxfaneto livaisi petsi-paebijava petsutoyenepanajavata, pona baja Jesús Capernaum tomara-belia. ² Capernaum tomarata ponapona Romano nacuapijinē, vajabit-saē pijacapitán. Bajaraponē pijajivitonē, bitso piasivanē, toavitanetsi. Totēpaejitsiatsi baja. ³ Bajaraponē capitán vēnēlivaisitanetsi Jesús pe-jamatejemayaexanaponaejava piavitanevi. Nexata capitán jumaitsi judíovi pijaancianovijavabelia:

—Panetojunaremelia Jesús. Pabarēpatsiaremena tajaboyaberena tane-tojamatejemayaexanaenexa tajajivitonē, jai capitán judíovi pijaan-cianovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

—Bajaraponē capitán bitso pexaniajamatabēcuenenē. Nexata to-jamatejemayaexanaename pijajivitonē. ⁵ Tsipaji raja bajaraponē nacaasiva vaxaitsi judíovitsi. Matamota cajena pijapalatata vajanaca-toexanetsinexa vajanacaetuatabiabibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonae pepēta. Itsa baja imoxoyotana-jetarubena capitán pijabo, nexata capitán icatsia peyapētaevitsi itoroba Jesús pemataenenaenexatsi. Capitán peyapētaevitsi itoroba Jesúsjavabelia pejumaitsinexa mapacueniaje:

—Petuxanenē, pētsa paremena tajaboyaberena. Apo caquenetsi-ataejitsipaetsi. Beveliajamatabēcuenenēnē raja saya xanē xamēvecua. Nexata apo xanepanae tsipae nenajonejava tajaboyaberena. ⁷ Apo nejamatabēcuenecaējēpaenua taponaejava xamējavabelia ata. Saya ba-jaraverena itorobare ěnijume. Nexata tajajivitonē netojamatejema tsane. ⁸ Xanē ata xainajē taneitorobabiabivi taneitorobicuenia tajume-covēnētabiabinexa. Xanē ata juya xainajē vajabitsaē, tajajivi, taitoro-bicuenia tanetoexanabiabinexa. Nexata itsa itorobajē caenē vajabit-saēnē peponaenexa, bajaraponē ponabiaba. Itsa junarenajē itsanē vajabitsaēnē pepatsinexa maberena je, bajaraponē patabiabarena. Itsa

itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, cacajëpa. Nexata saya bajaraverena ënijume itorobare saya ënijumeta tajajivitonë taneotajmatejemayaexanaenexamë, jai capitán mapacueniaje petonajumeitorobijume Jesúsjavabelia.

⁹ Jesús ita jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumaitsije, jai Jesús capitán yabara. ¹⁰ Nexata baja pamona capitán itorobalia Jesús petsipaebinexatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonë pejamatejemanë.

Pacuenia pamona pevecuatëpaevatsi pexënato Jesús toasaëyaexana, petëpaenëmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, it-samona yajava, ayaibitsaëttoxaneto. ¹² Itsa baja Jesús patanajetaruca Naín tomara imoxoyojavata, nexata camataenenatsi petëpaenë pecanajetarubenaevi. Bajarapamona petëpaenë tomaravelia capit-sapa pemëthëtsinexa tomarapënëyabelia. Ponë tëpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, ita caponaliatsi pemëthëtsinexatsi, tomaraverena jivi ayaibitsaëttoxaneto pënaponatsi. ¹³ Nexata Jesús ita tane bajarapova, tsitabejibitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús kujitabalia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevjëato, xanë raja cajumaitsitsi. Namatacore, jai Jesús.

¹⁵ Nexata baja petëpaenëmi namatacota. Cuaicuaijai. Jesús baja tocanaviata piasaenë penajavabelia. ¹⁶ Nexata daxita petaevitsi jamatabëcuenenabenajaca. Najumaitsi bajarapamona:

—Dioso bitso ayaijamatabëcuenenë. Piniijamatabëcuene pexainaenë, profeta, nacatsitanajamatabëcueneitajëta. Dioso pinijicuene pexanaejava ata nacatsitajëta vajataenexa, najai bajarapamona Jesús yabara.

¹⁷ Daxita Judea nacuapijivi, imoxoyo nacuanëjava ata pejinavana-paevi, Jesús vënëlvivaisitanetsi xua exana.

Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi

(Mt 11.2-19)

¹⁸ Juan jivibautisabinë naneconitsia ponapona penaneconitsivi peje-babiabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa

Jesúsjavabelia. ¹⁹ Juan pitorobivajënae pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsijavanexatsica?” jai raja Juan, jaibeje jane baja Jesúsjavabelia.

²¹ Nexata bajaraponëbeje pitabëta Jesús jamatejemayaexanapona ayaibitsaëttoxaneto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexananua pamona bitso itaxutotsëcëna. ²² Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanamebeje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua, tsipaebaponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia. ²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëbijava jovibota? ²⁵ Itsa apo paponamëlia panetaenexa musuli penajëbijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamona naitabëtsiaya pexaniajava naxatababiaba, pamona ata nabanebiaba pexanianabanijavanë, bajarapamonae jinavanapa nacuanë pevetsivi pijabonëjava. ²⁶ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme,

pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ²⁷ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaisijava ata xanëjavaberena, Dioso pejumelivaisibaxutota jumaiti mapacueniaje:

Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetarucaejavanexa yabara.

²⁸ Juan ayaijamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayaijamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

²⁹ Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae. ³⁰ Itsiata fariseovi, judíovi pecujarubivinia, namuxujemata bajarapalivaisi. Nexata picani pacuenia Dioso tojtisipatsi bajarapamonae pexanaenexa, apo exanae. Nexata Juan apo bautisabi bajarapamonae.

³¹ Jesús icatsia jumaiti jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: ³² “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaiti: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonaе aeconoxae jinavanapa mapanacuataje,” janë meta tsane paxamë yabara. ³³ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajëna. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piatajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaе ata pijamatabëcuenebejevi, barënajamatabëcuenejëpa,” pajamë tsabiabi xanë yabara. ³⁵ Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso

pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacueni pepo pexaniajajamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. ³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuviaceitera. Bajarapova capata bajarapaaceitera Jesús petsitaxuepacaenexa. ³⁸ Nexata bajarapova Jesús petaxusalibënenia, pematabacabëta nucajunua petsitaxuepacaenexa jane baja bajarapaa-ceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematnata taxuiquica. Bajaraxuacujinae yaiyataeya taxutsutsune. Tsitaxuepaca jane baja petuxujuviaceitera. ³⁹ Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumatsi mapacueniaje:

—Itsa peneta pepacueni maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

⁴⁰ Nexata Jesús jumatsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumatsi:

—Jesús, netsipaebare, jai.

⁴¹ Nexata Jesús jumatsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje. ⁴² Nexata bajaraponëbeje apo xainabeje juya petocanaviatsinexabeje petsicopatsimatamotsibeje. Nexata palata petsicopatsinë jumatsi bajaraponëbejejavabelia: “Iquinajë baja bajaraxuami pataniamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejejavabelia? jai Jesús Simónjavabelia.

⁴³ Simón nexata jumatsi Jesúsjavabelia:

—Ponë meta picaní ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumatsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumatsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junuajë nijaboyaberena. Itsiata yaiyataeya xaniavaetsia apo necopiapitsimë. Apo nerajutsimë mera ata tanataxuiatsinexa. Mapovaje netaxuquiata baja pitaxutobarëmeneta. Netaxuquicanua pematnata. ⁴⁵ Xamë nijabota patsi atanë, apo nitabaratsutsunimë

tanecopiapitsinexamë xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaejava. ⁴⁶Xamë xaniavaetsia tanecopiapitsinexamë, apo netsimataepanaemë aceitera. Mapovaje netsitaxuepaca pexaniapetuxujuviaceitera. ⁴⁷Nexata catsipabatsi neyapëtaenexa mapacueneje. Mapovaje pinijicuenia nesivajamatabëcuenebarëya. Tsipaji ayaineconi ata pibisiacuene pexanaeconi, vecuaajibiaexanajë. Pajivi saya tsiquirineconiyo vecuaajibiaexanajë, pibisiacuene pexanaeconi, nayapëtane. Tsipaji saya bajarapajivi tsiquirijavayo nesivajamatabëcuenebarëya, jai Jesús Simónjavabelia.

⁴⁸Nexata Jesús jumaitsi petirivajavabelia:

—Pibisiacuene rabaja nexanaeconi cavecuajibiaexanatsi, jai Jesús.

⁴⁹Itsamonae ata, pamonae Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponëje? Jamatabëcuenenavëxaniabiaya natane bepejamatabëcuenecajëpænëtsi jivi pibisiacuene pexanaeconi pevecuaajibiaexanaenexa, najai tsenae bajarapamonae.

⁵⁰Nexata Jesús jumaitsi petirivajavabelia:

—Dioso pecapanepaeva tsane pibisiacuene nexanaeconimivecua. Tsipaji nesivanajamatabëcueneocopatame xanëjavaberena. Jamatejema baja ponare. Cavecuajibiaexanatsi rabaja pibisiacuene nexanaeconi, jai Jesús petirivajavabelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

¹ Simón pijabota Jesús penanabanicujinae, najetaruca pini-jitomaranëjava, tsiquiritomaraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca. ² Jesús yajavanajetaruca petiriavinua, papetiriavi dovathi vecuacapitsapa yajuvënëvi. Papetiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajarapapetiriaviyajuvënëva, caeva pevënë María, Magdala tomarapijiva. Bajarapova Jesús vecuacapitsapa siete ponëbeje dovathivi. Bajarapadovathivi Jesús pevecuacapitsapaecujinae, María pënaponatsi. ³ Itsava pevënë Juana, Cuzavënënë pijava. Bajaraponë Cuzavënënë, nacauevetsinë Herodes pijajivitonë. Itsava pevënë Susana. Bajarapapetiriavi pematatsënëa, itsapetiriavi, ayaiBITSaëto, yajavanajetaruca Jesús. Bajarapapetiriavi pexainaepalatayajuvënëjava, rajuta Jesúsjavabelia. Nexata xuaxi Jesús pijajivi barënamatavenona pebarëcomuatsinexa bajarapapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi

(Mt 13.1-9; Mr 4.1-9)

⁴Jivi naropoba tomanarëjavaverena. Pata Jesúsjavaberena petanexatsi. Itsa baja ayaiBITSaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ —Peubinē pona pabiabelia peubinexa. Nexata itsa pata pabita, peubixu pexucayabajabarabicuenia ubanajetaruca. Nexata itsaxu othopa pabi tuatujējava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva barsatsui xane. ⁶ Itsaxu pijinia othopa ibopananējumata, itsajota bitso ira apo aitayaē. Nexata bajarapaxu juvi ata, tsaquenapona. Tsipaji ira tseva. ⁷ Itsaxu pijinia othopa xanēebacabomijavata. Nexata peubixu xanēebotonē caecuenia itsa yajavajuva, bitso xanēebotonē matakēnēnatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuita. Itsabotonē capitsapa cien paxutoyobeje ata, jai Jesús jivi ayabitsaētoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabējumeyapētane patacatsipaebilivaisi, nenamuxu-naevetsi xaniavaetsia, jai Jesús bajarapalivaisi petsipaebivijavabelia.

Pacuene yabara Jesús jivijavabelia livaisi tsipaeba ēcomparacióncuenia yabara pelivaisi

(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia: —Palivaisi jivijavabelia tsipaebame peubinē pelivaisicuenia, pajamatabēcuene xaina, patayapētaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamē rabaja xaniavaetsia Dioso pacayapētaeyaexana Dioso papijajivimē papecaevetsijava. Bajarapacuene abaxē daxitajivi apo yapētae. Bajaraxuata bajarapamonae itsa tsipaebajē livaisi, ēcomparacióncuenia tsipaebaponajē. Nexata bajarapamonae tae ata Dioso pesaēta pini-jicuene taexanaejava, itsiata apo yapētae pajamatabēcuene yabara exanajē pinijicuene taexanaejava. Namuxunaevetsi ata tatsipaebilivaisi, itsiata apo jumeyapētae pajamatabēcuene xaina tatsipaebilivaisi, jai Jesús pijajivijavabelia.

Pacuenia Jesús yapētaeyaexana pijajivi pajamatabēcuene xaina palivaisi tsipaeba peubinē pelivaisicuenia yabara pelivaisi

(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

—Mara pajamatabēcuenelivaisi xainaje, palivaisi pacatsipaebatsi pabita peubinē pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabēthētota. Dioso pitorobilivaisi jivi itsa tsipaebatsi, tsijamatabēubatsi Dioso pitorobilivaisi. ¹² Nexata pacuenia itsi pabita peubixu, paxu othopa pabi tuatujējava penajetarucaenamutojumata, bajara tsijamatabēcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabēubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabējumeyapētae, petsijamatabēubilivaisitsi dovathi baja vecuapitatsi bajarapalivaisimi. Vecuapitatsi pevājēnaeyabelia Dioso pejumecovēnētsiyaniva, Dioso pecapanepaeyanivatsi pibisiacuene pexanaeconivecua. ¹³ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi.

Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepiarea paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caepatoyo jumecovënëta bajarapalivaisi. Nexata paepatota dovathi jamatabëcueneëjëtatsi, copaba baja bajarapalivaisi pejumecovënëtsijavami. ¹⁴ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayajava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovitsabitsi pejamatabëthëtota. Nexata pacuenia itsi pabita piacuajibibotonë, bajara itsi bajarapamonae. Tsipaji Dioso xaniavaetsia apo tojinavanapae. ¹⁵ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcuenexuirajibi. Ëpexaniajamatabëcuene najamatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi

(Mr 4.21-25)

¹⁶ Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecaenexa. ¹⁷ Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Mr 3.31-35)

¹⁹Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tsipaji bitso jivi ayaibitsaëto Jesús matatoyorotsia vënëcatsi. ²⁰Nexata pamonaë Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bajarapamonae pina jitsipa pecataejava, jai Jesúsjavabelia.

²¹Nexata Jesús jumaitsi daxita bajarapamonaejavabelia:

—Pamonaë jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mt 8.23-27; Mr 4.35-41)

²²Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Bubunaejitsia baja bajarapamo. ²⁴Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. ²⁵Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi itsa tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenë, Jesús vecuacapitsapa Gerasa nacuata yabara pelivaisi

(Mt 8.28-34; Mr 5.1-20)

²⁶Jesús pijajivi barëyaëta pucaxaneto itsapanabelia, Gerasa nacuayabelia. Gerasanacua boca puca itsapanaverena, Galileanacua pecanacujitsialia. ²⁷Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë bajayajebi baja jumasa ponaponabiaba. Pijabota apo ponaponaë. Jivimëthëanëjavata saya ponaponabiaba. ²⁸Nexata bajaraponë itsa pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacue bitso cavajëtatsi.

Nejamatabëcuenebejiobitsipame, jai dovathivi peyjavaponaponaenë Jesúsjavabelia.

²⁹ Bajarapacuenia jumaitsi dovathivi peyjavaponaponaenë tsipaji Jesús jerjavavetsina penonotajunaejavata, dovathivi peyjavaponaponaenë pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyjavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatubabelia. ³⁰ Nexata Jesús jumaitsi bajaraponëjavabelia:

—¿Detsa pavënëme? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoxaneto tsi-jamatabëjinavanapatsi. ³¹ Bajarapadovathivi vajëta Jesúsjavabelia infiernojavabelia Jesús pitorobianiva. ³² Nexata bajarajota, imoxoyo pet-sutojavata, marranobitsaëtoxaneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxanetojavabelia, jai dovathivi.

Jesús nexata pevajëtsicueniatsi tocopata. ³³ Nexata dovathivi pebi vecuapitsapecatsi. Nexata marranobitsaëtoxanetojavabelia baja junua dovathivi. Nexata daxita bajarapamarranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³⁴ Marrano pevetsivi itsa tane bajarapacuenia, rëcëpeca. Pona, pacuene tane, petsipaebineca tomarapijivijavabelia, petsipaebineca vayafotusatojava penaevijavabelia ata. ³⁵ Nexata jivi ponarena petaenexa bajarapacuenia. Jivi itsa parena Jesúsjavaberena, taeyeta dovathivi peyjavaponaponaenëmi peecaeyava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. ³⁶ Pamonae cuenetanetsi Jesús pejamatejemayaexanaeyava dovathivi peyjavaponaponaenëmi, bajarapamonae paeba pepatsivijavabelia daxita pacuenia tane. ³⁷ Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaeyetsia baja. ³⁸ Nexata dovathivi peyjavaponaponaenëmi bitso picani navajëca Jesúsjavabelia penaponaenexa picani Jesús pepëta.

—Petuxanenë, netocopare tanaponaenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹ —Ponare nijamonaejavabelia. Tsipaebianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mt 9.18-26; Mr 5.21-43)

⁴⁰ Jesús icatsia pecovëyaberena naviarena jerata pucaxaneto itsapanaverena. Nexata jivi ayabitsaëtoxaneto copiapitatsi barëyaya. Tsipaji baja cajena copiaevetavanapatsi pepatsijavarena.

⁴¹ Nexata bajarajota napatajopa Jairovënënë. Bajaraponë judíovi penacatuatabiabibo pevetsinë. Jairo pematatabacabëta yaiyataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxaneto Jesús pepënaponaevitsi matatoyorotsia cënënanajetarubenatsi.

⁴³ Bajarapajivibitsaëtoxaneto tuatuajëta, itsava pijanacuene pecapunaevatsi nanajetaruca. Bajarapova pijanacuene pecapunaecujinaetsi, doce baja pavaibeje xaina. Beyajiobi tsabiabi bajarapajana. Daxita pexainaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitaneevua. ⁴⁴ Nexata bajarapova ponataba Jesús pepënëvelia, jivibitsaëtoxaneto tuatuajëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamatejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëtane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematatabacabëta tonucajunua Jesús pitabarata. Bajarapova nexata navajunupaeba daxitajivi tuatuajëta pacuene yabara tojayataba Jesús penaxatatsijava. Navajunupaebanua pacuenia jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexēnatoyo rabaja tēpa. Pētsa baja matavējēa jamatabēitonotaponame Jesús, jai bajaraponē Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pētsa najamatabēxainame. Najamatabēcuenecopare saya ēxanējavaberena. Nexēnatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaibitsaēto penajonenexa Jesús pepēta petēpaevayo pebocaejavabelia. Tocopata saya penajonenexa mapamatabēxēyoje. Pedro, Santiago, Juan, petēpaevayo paxa, pena, bajara saya pamatabēxēyo tocopata penajonenexa Jesús pepēta. Pamonae Jesús pevajēnae ena Jairo pijabota, bajarapamonae Jesús pitsapaeyaexana. ⁵² Daxitajivi pinijicuenia matanueyaba petēpanucaevayo. Nexata Jesús jumaitsi:

—Pētsa pamatanueyabame. Pejanava raja apo tēpae. Saya raja majitanuca, jai Jesús bajarapamonaejavabelia tsipaji yapētane Jesús pi-asaēyaexanaejavanexa bajarapovayo.

⁵³ Bajarapacuenia Jesús pejumaitsijava, bajarapamonae saya Jesús jumecapocaponatsi. Tsipaji bajarapamonae yapētane bajarapovayo baja picani pepacuenē petēpaejava. ⁵⁴ Nexata Jesús petēpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitsijavata, petēpanucaevayomi nonotabapuna. Asaē baja icatsia petēpaevayomi. Nexata Jesús jumaitsi pejanavayo penajavabelia:

—Nexēnatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabēcuenenabenajacabeje. Nexata Jesús jumaitsi bajarapajivibejejavabelia:

—Pētsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponēbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabēcuene caējēpaeyaexanatsi rabaja papeca-caējēpaejamatabēcuene dovathi peyajavajinavanapaevi ata panevecuacapsapaponaenexa. Pacajamatabēcuene caējēpaeyaexanatsinua piavitanevi ata panejamatejemayaexanapon-aenexa. ² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaname, jai Jesús pijajivijavabelia.

³ Jesús jane baja pijajivi penaropobivajēnae, Jesús jumaitsi pijajivijavabelia mapacueniaje:

—Pētsa itsacuenējava ata pacaponame panijanamutonexa. Pētsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pētsa anijacamisabeje

pacaponame. ⁴ Itsa papatabiabianame tomarata, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponae name, bajarapabovexa papitsapaename. ⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Pan-vecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosjavabelia penaneconitsicue ne apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacue ne pexanae neconimivecua. Jamatejemayaexanaponanua piavitanevi daxitajava.

Pacuenia Juanpijinë jivibautisabinëmi beyaxuabatsi yabara pelivaisi
(Mt 14.1-12; Mr 6.14-29)

⁷ Herodes, Galileanacua pevetsinë, vënëlivaisitanetsi daxita Jesús pinijicue ne pexanaponaejava. Nexata Herodes najamatabëcuenepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumait-saponaejava Herodes pejumetaexae, najamatabëcuenepatajërërëcaeya najamatabëxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvënëne, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumait-saponaejava Jesús yabara, Herodes jumetane.

⁹ Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicue ne pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

Pacuenia Jesús pexaejava rajuta cinco mil ponëbeje yabara pelivaisi
(Mt 14.13-21; Mr 6.30-44; Jn 6.1-14)

¹⁰ Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. ¹¹ Itsiata baitsi jane jivi ayaibitsaëttoxaneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba

bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje cujibare-natsi. Jumaitsitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavanua namitsavajëtsiana. Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

¹³ Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

¹⁴ Bjarapajivibitsaëtöxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtönë, bejamatabëcuene cincuenta ponëbeje tsaponae caebitsaëtöta, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja daxita jivibitsaëtöxaneto. ¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetöxaname. Panerajutame pataxaejava, jai Jesús.

Bjaraxuacujinae Jesús pan epatsicacapona, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. ¹⁷ Daxita xaniavaetsia nabane. Bjaraxuacujinae jivi peyajuvënëcopabejebijavanë, Jesús pijajivi vënëba doce xuabeje bemapirecuenia pexanaejavanë.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi

(Mt 16.13-19; Mr 8.27-29)

¹⁸ Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsäeta xanë ponënë? jai Jesús pijajivijavabelia.

¹⁹ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepabinëmi raeta. Profeta Eliäspjinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepabivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁰ Nexata icatsia Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso peccaitorobinëtsica jivi necapanapaenexa. Xamë cajena Dioso pexënatomë, jai Pedro Jesúsjavabelia.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mt 16.20-28; Mr 8.30-9.1)

²¹ Jesús jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesús raja Dioso pexë nato,” pajamë pëtsa, jai Jesús.

²² Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane xanë Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi maticabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

²³ Bajaraxuacujinae Jesús jumaitsi daxitajivijavabelia:

—Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponapona taitorobicuenia. Bajarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena.

²⁴ Pajivi exanaponapona penatojitsipaecuenia, apo xainae tsane maticabi apo peverevereaejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena maticabi apo peverevereaejava.

²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuepe xainae ata mapanacupijicueeneje, itsiata nacuerata. Tsipaji pexainaecuene apo capanepae tsanetsi Diosojavabelia.

²⁶ Pajivi tajajivitonë ata, navënëlivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënu Dioso pijaängelevi.

²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

Pacuenia Jesús caepatoyo perabënivenivenataba yabara pelivaisi

(Mt 17.1-8; Mr 9.2-8)

²⁸ Jesús petëpaejavanexa tajëvelia penayajunupaebicujinae, bejamatabëcuene ocho pamatacabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia. ²⁹ Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajëta anijanëbeje,

ponēmibeje bajayata tēpa. Bajaraponēbeje Jesús barēcuaiquaijaitsi. Bajaraponēbeje tsaena Moiséspijinēbeje Elíaspijinēbeje. ³¹ Bajaraponēbeje matatoyorotsia nivenivenabeje. Jesús bana nabarēcuaiquaijai Jesús petēpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacueni yabara nabarēcuaiquaijai. ³² Pedrobana penajuajinavanapaevi bitso itamajitsipanae ata, itsiata naēcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarēcuaiquaijavatsi Jesús. ³³ Itsa baja Moisésbeje Elíasbeje Jesúsvecua ponaejitsiatsibeje, nexata bajarapaepatota Pedro jumai tsaxuabi Jesúsjavabelia:

—¡Patajatuxanenē, pijacuaxae panebarēponame! Pacatoexanaenatsi acueyabi pabobērētobeje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro.

Pedro xaniavaetsia najamatabēxainaenejeva, bajarapacuenia jumaitsi. ³⁴ Pedro abaxē itsa cuaiquaijai tsanucae, itarērēbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarērēbo. ³⁵ Nexata bajarapaitarērēbojavavetsica Dioso jumaitssit-sica:

—Mara ponē taxēnato, tasivanēje. Bajaraponē panamuxunaevere, jaittsica Dioso itarērēbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitssijavetsica, Jesús pijajivi tane caenē baja Jesús penucaejava bajarajota. Jesús pijajivi tae ata bajarapacueni, moya saya jinavanapa. Bajarapamonae abaxē apo tsipaebi itsamonaejavabelia, tae ata bajarapacueni.

*Pacuenia Jesús jamatejemayaexana pejevaxinē, dovathi peyajavapon-
aponaenē, yabara pelivaisi*

(Mt 17.14-21; Mr 9.14-29)

³⁷ Jesús pebarēcuaiquaijaicujinae Moisésbeje Elíasbeje, pijajivi acueyabi ponēbeje yajava, naviatsica petsutojumavetsica. Nexata mataenenatsi jivi ayaiBITSaētoXaneto. ³⁸ Nexata caenē bajarapajivi bitsaētoXanetoyajuvēnēnē pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxēnatonēyo. Caenēyo rabaja tsipaji xainajē. ³⁹ Dovathi vaetababiabatsi. Nexata jemata aējai tsabiabi. Tēpajoneyaexanabiabatsi. Daxitanē neconecojaija aperabēbaba tsatababiabireca. Nexata bajarajota pecuibothamu tsabiabi. Bitso bejiobiaexanabiabatsi. Dovathi abaxē apo jamatabēcopatsitsi. ⁴⁰ Picani raja nijajivijavabelia jumaitsinē: “Panetovecuacapitsapare dovathi,” janē. Itsiata apo caējēpaetsi tanetovecuacapitsapaenexa, jai bajaraponē Jesúsjavabelia.

⁴¹ Nexata Jesús jumaitsi daxita pijajivijavabelia:

—¡Paxamē baja rovia apo pajumecovēnētšimē Dioso papecayavenon-
aejavanexa! Bajaraxuata apo pacajamatabēcuenecaējēpae pejevaxinē
panevecuacapitsapaenexa dovathi. ¡Paneajamatabēcuenetajavi baja rovia!
¿Detsa paepatojebi abaxē paxamējavabelia ajamatabēcuenesaēnē tšapon-
aponaē tsane patanejumecovēnētšinexamē? jai Jesús daxita pijajivijav-
abelia.

Nexata Jesús jumaitsi pejevaxinē paxajavabelia:

—Barērenamēre nexēnatonēyo, jai Jesús.

⁴² Ajena pejevaxinē imoxoyotabarena Jesúsjavaberena, dovathi icatsia irata xuabatsi pejevaxinē. Daxitanē aperabēbaba tsatabireca. Nexata

Jesús itaveta dovathi pejevaxinē pevecuapitsapaenexatsi. Nexata baja Jesús jamatejemayaexana pejevaxinē. Tocanaviata baja pejamatejemanē paxajavabelia. ⁴³ Daxitajivi bitso jamatabēcuenenabenajaca Dioso pesaēta Jesús pevecuacapitsapaexae dovathi bajaraponēyo.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 17.22-23; Mr 9.30-32)

Jivibitsaētoxfaneto Jesús jamatabēcuenearēyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

⁴⁴—Xaniavaetsia panenamuxunaevere. Pētsa panacofēnētame. Xanē, Daxitajivi Pematapijinēnē, necanajetsiana itsamonaē pecobeyabelia, jai Jesús pijajivijavabelia tajēvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeypētae xua yabara Jesús jumaitsi. Baitsi bajarapamonae Dioso apo tocopatsitsi pejumeypētaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponē vaxaitsiyajuvēnēnē nacavecuayaijamatabēcuenenē bitso?” najai tsanajetarubenaē namutua yabara pelivaisi
(Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubenaē bajarapamonae:

—¿Detsa ponē vaxaitsiyajuvēnēnē nacavecuayaijamatabēcuenenē bitso? najai tsanajetarubenaē Jesús pijajivi.

⁴⁷ Nexata Jesús pijajivi jamatabēcueneyapētane pacuenia najamatabēxaina. Nexata Jesús cobepita pejevaxinēyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumecovēnētsijiviyo, mapitsipejevaxinēyo ataje, xanē taniji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyajavacopiapita. Nexata pētsa bepaayaijamatabēcuenenē panataneme. Tsipaji ponē paxamēyajuvēnēnē beveliajamatabēcuenenē natane paxamēvecua, bajaraponē bitso ayaijamatabēcuenenē taenatsi Dioso daxita paxamē matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vēnēlivaisitane itsanē dovathi jivivecua pecapitsapaejava Jesús pevēnēta yabara pelivaisi
(Mr 9.38-40)

⁴⁹ Jesús pijajivitonē, Juan, jumaitsi Jesúsjavabelia:

—Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanēyajuvēnēnē. Nexata paitavetajē bajaraponē dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabēcuenē apo najamatabēxainae vaxaitsijavaberenā, bajarapajivi nacajamatabēcueneyavenona. Bajarapajivi bevaxaitsijamatabēcuenējivi. Bajaraxuata pētsa baja paitavetame bajaraponē xanē tavēnēta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia. ⁵² Jesús nexata pevajënaeyabelia pijajivitonëbeje natsivajënaeitroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocovaetsinexabeje pabota picani Jesús patsijitsia. ⁵³ Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia. ⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspjinë vajëta Diosojavabelia Dioso pitorobinexatsica isotocotia peverebiabinexa pijamatabëcuenenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamona apo jitsipae pecacopiapitsijava? jai beje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcueneyapëtaemëbeje Espíritu Santo, ponë pacayajavaponaponabeje. ⁵⁶ Xanë, Daxitajivi Pematapijinënë, apo patsinëtsica taveribiabinexa jivi. Biji rajane patsicajë tacapanepaenexa jivi pibisiacuene pexanaeconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi (Mt 8.19-22)

⁵⁷ Jesús pijajivi namutua peyajavanajetarucaejavata, judíovi pecujarubinë jumaitsi Jesúsjavabelia:

—Jesús, itsabelia poname, capënaponaenatsi cajena, jai judíovi pecujarubinë.

⁵⁸ Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namopi jamëthëanë xaina pepatabiabinexa pemajitabiabinexanua. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë, itsajota nacueraevetabiabijitsianë, jai Jesús.

⁵⁹ Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caeepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

⁶⁰ Jesús nexata jumaitsi bajaraponëjavabelia:

—Copare matacabi apo pevereverecaejava apo pexainaevinexa pemëthëcaenexatsi nijamonaemi itsa tëpa. Xamë saicaya nepënaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

⁶¹ Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaejava. Itsiata abaxë caeepatoyo necopare tanapëjibinexa tajabota pejinavanapaevijavabelia, jai bajaraponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabēnainabiaba pijaperujamatabēcuene, xua exanabiaba, bajarapajivi apo caējēpaetsi xaniavaetsia Dioso petonacuenebinexa pitorobicueniatsi. Tsipaji najamatabēcueneepatajērērēcaeya nacueneba, jai Jesús bajaraponējavabelia.

10

Pacuenia Jesús pijajivi itoroba, setenta ponēbeje, Dioso pejumelivaisi jivi petsipaebanajetarubenaenexa yabara pelivaisi

¹ Jesús icatsia itsamonae itapeta pijajivinexa, setenta ponēbeje. Bajarapamona Jesús itoroba anijanēbeje tsaponae Jesús pevajēnaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomaranēja, tsiquiritomaxijava ata, itsaxuayo Jesús najetarucaejitsia. ² Jesús pijajivi penaropobivajēnae, Jesús jumaiti pijajivijavabelia mapacueniaje:

—Xaniajanē pacuenia pacatsipaebijitsiatsi. Ayaipabi pexainaenē caecuenia uba ayaijava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxē bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabēcuene copavivinexa. Abaxē sajina ayaibitsaēto xaneto. Itsiata baitsi jane paxamē Dioso panetonacuenebivi pacaeviviyomēbeje saya. Bajaraxuata Diosojavabelia pavajēre icatsia Dioso pijajivi pematatsēnē itsamonae pitorobinexa papecayavenonaenexa. ³ Paponare

baja Dioso pejumelivaisi jivi panetsipaebanajetarubenaenexa. Panayajivitaeyajinavanapanaenae. Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianae panaevi nevēthē tuatuajēata, bajarapaitsimē tsane. ⁴ Pētsa pacaponame itsacuenejava ata, doro ata, palata ata, zapato ata. Itsa pabajacobianame itsajivi namutoepatota, pētsa bajayajebi pabarēcuaicuaiajamē tsanunubenaenae panenajematsiyaniva.

⁵ Itsa pajonejitsiamē itsamonae pijaboyalía, panejonevajēnaelia copiaya pajumaitsimē tsane Diosojavabelia: “Dioso, yavenonare mapabopijivije jamatabēcuene xanepanaeya pejinavanapaenexa,” pajamē tsane copiaya Diosojavabelia. ⁶ Bajarapabo pexainaenē itsa jitsipaena pejamatabēcuene xanepanaeyaexanaenexatsi Dioso, nexata bajaraponē jamatabēcuene xanepanaeyaexanaenatsi Dioso.

Itsa apo muxujitsipae tsane bajarapacuenia panejumaitsijava, nexata Dioso apo jamatabēcuene xanepanaeyaexanae tsanetsi bajaraponē. ⁷ Itsajota papatabiabianame, caebota pamajitabianame. Pētsa panatixitaponame itsaboxijavabelia. Aurajibia paxaeyabianamenua xua pacaabata bajarapabota. Pētsa pauramē panaxaejava papecarajutsijava yabara. Tsipaji panetsipaebixae patacaitorobilivaisi, pacarajutsiana panaxaejava. Tsipaji itsajivi itsa tonacueneba itsanējavabelia, barajutatsi pexaejava. ⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaenae xua pacaabata.

⁹ Bajarapatomarata pajamatejemayaexanaenae piavitanevi. Pajumaitsimē tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajēnae pecopiapatsinexa,” pajamē tsane. ¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaenae.

Pajumaitsimē tsane bajarapatomarapijivijavabelia mapacueniaje: ¹¹ “Panijatomarapijiatsapērē patataxuta rubena. Nexata panavetaxuvarēbajē. Bajarapacuenia panavetaxuvarēbajē panenayapētaenexa Diosojavabelia pananenconitsijava. Pananeconitame Diosojavabelia. Tsipaji apo panecopiapitsimē patanenamuxunaevetsinexamē palivaisi picani pacatsipaebijitsiatsi. Itsiata panenamuxunaevere paneyapētaenexa mapalivaisije. Dioso daxita pijajivi pevetsimat-acabinexa, imoxoyo baja pevajēnae pecopiapatsinexa,” pajamē tsane. ¹² Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajētota bajayata Dioso naneconitsiaexana Sodoma tomarapijivimi, bajarapaneconivajēto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponēbejejavabelia.

Pacuenia Jesús jumaitsi patomarabejepijivi Dioso xuabijitsia infernojavabelia apo pejumecovēnētsixaetsi yabara pelivaisi
(Mt 11.20-24)

¹³ Icatsia Jesús jumaitsi pijajivijavabelia, setenta ponēbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaēta taexanaejavanē, xua itsajivi ata apo caējēpaetsi pexanaenexa, bajarapatomarabejepijivi tae ata, itsiata apo nejumecovēnētsi. Apo copabi pibisiacuene pexanabiabijava. Apo najamatabēcuenepēnēyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajēta bajarapitsipinijicuene itsa tsitaexanaejitsipajē, nexata bajarapamonaemi copabijitsipa pibisiacuene pexanaejava. Najamatabēcuenepēnēyorotsipa Diosojavabelia. Bajarapamonaemi nexata pibisiacuene pexanaebiabineconi bitso yajamatabēcuenebējai tsipae. Nexata Diosojavabelia petsitanajamatabēcuenetajētsinexa peyajamatabēcuenebējaijiva pibisiacuene pexanabiabineconi, naxatabijitsipa piayopapaēbērējavanē. Enaejitsipa irata. Ipumana ata natsimataothocaejitsipa bitso peyajamatabēcuenebējaixae pibisiacuene pexanabiabineconi. ¹⁴ Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaēta taexanaejavanē, apo nejumecovēnētsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajētota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajēto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata. ¹⁵ Capernaum tomarapijivi picani najamatabēxaina Dioso pecaponaejavatsi athēbēabetsia. Itsiata baitsi jane bajarapamonae apo tanejumecovēnētsixae, Dioso xuabianatsi infernojavabelia, jai Jesús Corazín tomarabeje Betsaida tomarabejepijivi yabara.

¹⁶ Icatsia Jesús jumaitsi pijajivijavabelia, setenta ponēbejejavabelia:

—Pajivi pacanamuxunaevetsiana, bajarapajivi taenajē xanē tanenamuxunaevetsijava. Pajivi pacanayajiviitavetsiana, bajarapajivi taenajē xanē tanenayajiviitavetsijava. Bajarapajivi Dioso ata taenatsi Dioso

penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomaranëjava. Saicaya navecuanajetarubena anijanëbeje tsaponae.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonae jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejumecovënëtabiaba, jai bajarapamonae Jesúsjavabelia.

¹⁸ Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica. ¹⁹ Xanë baja cajena pacajamatabëcuene caëjëpaeyaexanatsi papecacaëjëpaejamatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. ²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamë tsavanapae Dioso papijajivixamë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejevavelia.

Pacuenia Jesús jamatabëcuenebarëya yabara pelivaisi

(Mt 11.25-27; 13.16-17)

²¹ Jesús bitso jamatabëcuenebarëyayaexanatsi Espiritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayajamatabëcuenenëmë bitso,” cajaitsi. Tsipaji pamonae bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacupijilivaisije. Bajarapalivaisi vecuamatayatame bitso penacujarubivi ata mapanacupijicuene yabaraje. Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcueneyapëtae. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë, xanë pexënatonë, jamatabëcueneyapëtaniji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

23 Nexata Jesús napënëyorota. Ēpijajivijavabelia jumaitsi:

—Paxamē baja pajamatabēcuenebarēyamē panetaexae pacuene baja pataeponame. 24 Xaniajanē pacuenia pacatsipaebijitsiatsi. Bajayata ayaibitsaēto profetavimi necopiaevetavanapa picani tanetaenexa tapatsijavatsica. Nacuaevetsivimi ata necopiaevetavanapa picani tane-taenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabējumetaeyabiabanua picani palivaisianē baja aeconoxae paxamē pacatsipaebaponatsi. Itsiata apo jumetaenejeva bajarapalivaisinē, bajarapamonaemi tēpa baja, jai Jesús pijajivijavabelia.

Pacuenia pexaniajamatabēcuenenē, Samaria nacuapijinē, yavenona it-sanē yabara pelivaisi

25 Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinē nonotapuna. Bajaraponē Jesúsjavabelia jamatabēcueneējēbiaya jumaitsi:

—Jesús, ¿detsa xua exanaenajē Dioso tanerajutsinexa matacabi apo peverevereaejava? jai judíovi pecujarubinē.

26 Nexata Jesús jumaitsi judíovi pecujarubinējavabelia:

—¿Detsa jane jumaitsi bajarapacuene yabara bajayata Dioso Moiséspijinēta penajumecopatsilivaisi jivi pejumecovēnētsinexa? jai Jesús.

27 Nexata judíovi pecujarubinē jumaitsi Jesúsjavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Daxita panejamatabēēthētojavavetsina, daxita panejamatabēcueneta ata, daxita panesaēta ata, daxita panenajamatabēxainaesaēta ata, pasivamēre panijatuxanenē panijaDioso. Pasivamēre itsajivi ata pacuenia paxamē panijacuata panasivamē,” jai bajayata Dioso Moiséspijinēta penajumecopatsilivaisi, jai judíovi pecujarubinē Jesúsjavabelia.

28 Nexata icatsia Jesús jumaitsi judíovi pecujarubinējavabelia:

—Xaniavaetsia nejumecanaviatame. Bajarapacuenia exanaponaponare. Nexata pepacuene xainaename matacabi apo peverevereaejava, jai Jesús.

29 Itsiata baitsi jane judíovi pecujarubinē bijiaya jumecovēnēta bajarapalivaisi. Asivaya apo tae itsamonae ata. Bajaraxuata judíovi pecujarubinē matavējēa jumaitsi Jesúsjavabelia:

—¿Detsa nexata pitsijivi asivanē tsane? jai judíovi pecujarubinē.

30 Nexata icatsia Jesús jumaitsi judíovi pecujarubinējavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajērēbabiabivi, bajaraponē epatua vaetabatsi. Daxita pecobecovē yacajērētatsi. Penaxatabijavanēmi ata yacajērētatsi. Nexata pinijicuenia conibabiatsi. Puenetabuatatsi picani petēpanucaenexa bajarajota.

31 Nexata bajarapanamutua sacerdotenē najetaruca, templobota penacuenebabiabinē. Nexata sacerdotenē bajaraponē itsa taeyabuata, matavaquetanucapona. Pona baja rovia. 32 Bajaraxuacujinae icatsia bajarapanamutua itsanē, templobota penacuenebabiabinē, najetaruca. Bajaraponē taenucajopa. Bajaraxuacujinae matavaquetanucapona. Pona baja icatsia rovia bajaraponē ata. 33 Bajaraxuacujinae icatsia bajarapanamutua Samaria nacuapijinē najetaruca. Nexata bajaraponē

itsa taeyabuata, tsitabejibitsi bitso. ³⁴ Nexata bajaraponë cujilia. Vajënëvaēba aceiterata, vinorata yajava. Vajënēcēba papaēbērēpanaxita. Bajaraxuacujinae Samaria nacuapijinē pijaburrojumata buatsia. Nexata bajaraponē capona jivi pepatabiabiboyabelia. Bajarajota Samaria nacuapijinē eveta xaniavaetsia. ³⁵ Meravia pitsijavata Samaria nacuapijinē itsa baja ponaejitsia itsabelia najetaruca, juta anijapalatanēbeje, bitso penamatamotsinēbeje. Matamota bajarapabo pexainaenē. Jumaitsi bajaraponējavabelia: “Netoevetsianame maponēje. Itsa matamovereverecaena, pematatsēnēa nevetsimatamo, bajarapapalata icatsia caevēarena camatamotsianatsi,” jai Samaria nacuapijinē bo pexainaenējavabelia, jai Jesús mapacueniaje judíovi pecujarubinējavabelia.

³⁶ Bajaraxuacujinae judíovi pecujarubinējavabelia Jesús yanijoba bajarapalivaisi yabara. Jumaitsi mapacueniaje:

—Pamonaē, acueyabi ponēmāxēto, taeyabuata pecobecovē peyacajērētsinētsi. ¿Detsa ponē bajarapamonaeyajuvēnēnē asivaya tane bajaraponē? jai Jesús.

³⁷ Nexata judíovi pecujarubinē jumaitsi Jesúsjavabelia:

—Ponē pitaxutotsoniataexae yavenona, bajaraponē asivaya tane, jai judíovi pecujarubinē Jesúsjavabelia.

Nexata Jesús jumaitsi judíovi pecujarubinējavabelia:

—Ponare baja. Xamē ata bajarapacuenia asivaya itaxutotsoniataeyabianame itsamonae ata, jai Jesús judíovi pecujarubinējavabelia.

Pacuenia Jesús jumaitsi Martabeje Mariabeje pijabota yabara pelivaisi

³⁸ Jesús, pijajivi yajava, najetaruca pevajēnaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavēnēva. Nexata Marta pijabota Jesús napata. ³⁹ Marta pejuyapijiva xaina, Mariāvēnēva. Nexata María eca Jesús pitabarata penamuxunaevetecaenexa Jesús petsipaebilivaisi. ⁴⁰ Nexata Marta bitso jamatabēcueneenatsi penacuenabijava, Jesús pexaejavanexa ata pemit-saexanaenexa. Nexata Marta cujilia Jesús. Jumaitsi:

—Tajatuxanenē, tajuyapijiva netocopata caevanē taexanaenexa daxita xua exanaejitsianē. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

—Marta, xamē bitso cajamatabēcueneena nexanaenexa daxita xuanē jamatabēexaname. ⁴² Caejava bitso xanepana nexanaenexa, tanenamuxunaevetsinexamē. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajērētsijavatsi tatsipaebilivaisi pejumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajēcaejitsia yabara pelivaisi

(Mt 6.9-15; 7.7-11)

¹ Jesús vajētabiaba Diosojavabelia. Nexata itsamatacabi, itsa baja Jesús najumevereta pevajētsijava Diosojavabelia, Jesús pijajiviyajuvēnēnē jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabi-aba pijajivi pacuenia vajëtabiabijitsia Diosojavabelia, bajara pijinia pacuenia xamë ata panejumecujarubare pavajëtabiabijitsianë Diosojavabelia, jai Jesús pijajiviyajuvënënë.

² Jesús nexata jumaitsi pijajivijavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane:

Taxamë, athëbëtatsia neecaenë, jitsipajë pecayaiyataejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanapanapenexa mapanacuapijivi ataje. ³ Caematacabi canacujitsia panerajure pataxaejavanexa pacuenia panamatavenonajë. ⁴ Panebarajamatabëcuene xanepanarena nitabarata pibisiacuene pataexanaejava. Nexata panevecuaajibiaexanare pibisiacuene pataexanaeconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcuenecaevajë. Nexata pabarajamatabëcuene xanepanajë. Panevecuatsare dovathi patanejamatabëcuenejëbivaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia,

jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënënë meravi tuatujëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje. ⁶ Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso piyani. Itsiata xanë apo xainaenë itsacuenejavayo ata pexaejava tarajutsinexa,” jai tsipae paxamëyajuvënënë meravi tuatujëta peyapëtaenëtsijavabelia. ⁷ Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caeamata. Nexata acuenebi tanonotapunaejava tacarajutsinexa xua nevajëta. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa. ⁸ Xaniajanë pacuenia pacatsipaebijitsiatsi. Bajaraponë apo jamatabënonotapunae ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaeaxaetsi. ⁹ Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabaupadocodotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa. ¹⁰ Bajarapacuenia asaëyata pavajëtabiabianame

Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatš, jai Jesús pijajivijavabelia comparacióncuenia.

¹¹⁻¹² Icatsia Jesús jumaitš pijajivijavabelia:

—Paxamë papebijivimë, panexi panexainaevi. Panexënatonëyo itša pacavajëta panbë, apo panacoxirajutsimë tsipae iboto. Itša pacavajëta dujuainëyo, apo panacoxirajutsimë tsipae jomo. Itša pacavajëta vacarato-bëto, apo panacoxirajutsimë tsipae aqueto. ¹³ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itša pavajëtame. Bajaraponë rajutsiana Espiritu Santo daxita pamonaevajëtatsi, jai Jesús pijajivijavabelia.

Pacuenia itsamonae Jesús yabara jamatabëcuenenavëxaniabiaya jumaitš: “Beelzebú raja pesaëta Jesús dovathi jivivecua capitsapapona,” jai yabara pelivaisi

(Mt 12.22-30; Mr 3.20-27)

¹⁴ Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itša vecuacapitsapa, natsipaeba baja. Jivibitsaëtoxaneto petaevi bajarapacueni, bitso jamatabëcuenenabenajaca. ¹⁵ Itsiata baitsi jane itsamonae fariseovi Jesús baracuaicuaiaitsi pibisiacuenia.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuenenavëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcueneëjëbiaya itorobatsi pinijicuene Dioso pesaëta pexanaejava Jesús petsitaexanaenexa. Bajarapacuenia picani itorobatsi fariseovi peyapëtaenexa pepacuene Jesús Dioso pitorobinëcuenetsitsica. ¹⁷ Itsiata Jesús jamatabëcueneyapëtane pacuenia fariseovi sivanajamatabëxainatsi. Nexata fariseovijavabelia Jesús jumaitš mapacueniaje:

—Nacaenacuapijivi ata itša navecuanatsanaejitsipa penasivanavajabitsaëtsinexa, nexata namataenetsia naverebiabijitsipa daxita bajarapamonaevajëtatsi. Bajara pijinia pacuenia nacaemonaevajëtatsi. Itša navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonaevajëtatsi. ¹⁸ Bajara pijinia itsipae dovathi ata. Dovathi jivivecua itša capitsapaponaevajitsipa pijajivi, dovathivi, nexata bepijavajabitsaëtaejitsipa pijajivi. Itsajamatabëcuene vecuaxainaejitsipa pijajivi. Pesaëta apo xainaponaevajëtatsi. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitšimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. ¹⁹ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itša capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitšijava xanë yabara. ²⁰ Espiritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi mata-toxenetsia, Jesús icatsia comparacióncuenia jumaitsi fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonaë peyacarëjëtsiyaniavatsi pecobecovë. Nexata daxita pecobecovë xaniavaetsia tobobenaëjitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaitsi mapacueniaje:

—Itsiata baitsi jane itsa najetarucaejitsipa itsanë bitso piasaënë box-ainaenë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenia dovathi pejamatabëcueneamoneyabijava yabara.

²³ Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajara-pajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa, jai Jesús fariseovijavabelia.

Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëcaenexatsi icatsia yabara pelivaisi (Mt 12.43-45)

²⁴ Icatsia Jesús jumaitsi fariseovijavabelia:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa dovathi penacueraevetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi. ²⁵ Dovathi baja caevëa itsa naviarena, caxitajaraba peyajavaponaponaenëmitsi. Nexata peyajavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetetsibo. ²⁶ Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëcatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabëcuenebarëya yabara pelivaisi

²⁷ Itsa abaxë Jesús livaisi tsipaeba fariseovijavabelia, petiriva bajara-pajivi bitsaëttoxanetoyajuvënëva pinijijumeta vavajai tsaxuabi. Jumaitsi Jesúsjavabelia:

—jJamatabëcuenebarëya baja cajena ena, pecanavitaniabiva, pecavitsat-siva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamë rabaja. Itsiata baitsi jane pamonaë jumetane Dioso pe-jumelivaisi, nexata itsa jumecovënëta bajarapalivaisi, bajarapamonaë

jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi
(Mt 12.38-42; Mr 8.12)

²⁹ Jivi ayaibitsaëtöxaneto Jesús itsa matatoyorotsia nacaëtuatatsi, nexata Jesús jumaitsi:

—Pamonae aeconoxae jinavanapa, bitso pibisiajamatabëcuenevi. Bजारapamonae picani nitoroba Dioso pesaëta pinijicuene taexanaejava tatsitaexanaenexa, taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaebinëmi profeta Jonáspijinë exanatsi, bajara épitsicuene taneexanaejava, tsitajëtsianajë. ³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tsipaji ayaiacuene exanatsi Dioso. Bajara pijinia pacuenia xanë ata, Daxitajivi Pematapijinënë, pinijicuene Dioso nexanaena. Nexata daxita pamonae aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica. ³¹ Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bजारapamonae nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonae aeconoxae jinavanapa, Dioso apo pejumecovënëtsivi. Bजारapova neconitsiana tsipaji bajayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaebilivaisi.

Xanë raja majotaje ponaponajë, bitso ayaijamatabëcuenenënë Salómopijjinëmi matatoxenetsia. Itsiata baitsi jane pamonae aeconoxae jinavanapa mapanacuataje, apo nenamuxunaevetsi. Bजारaxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëtöxanetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuenepënëyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonae aeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenënë Jonáspijinëmi matatoxenetsia. Itsiata baitsi jane pamonae aeconoxae jinavanapa mapanacuataje, tsipaebi atanë Dioso pejumelivaisi, apo najamatabëcuenepënëyorotsi pibisiacuene pexanaejavavecua. Bजारaxuata Dioso naneconitsiaexanaenatsi bajarapamonae, jai Jesús jivi ayaibitsaëtöxanetojavabelia tajëvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabë yabara pelivaisi
(Mt 5.15; 6.22-23)

³³ Icatsia Jesús jumaitsi jivibitsaëtöxanetojavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cajoniëñealia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecaejitsia. ³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae. ³⁵ Panayajivitaema xua panajamatabëxainabiabame, papecajamatabëcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëttoxanetojavabelia.

Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi

(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalía. Naeca mesa muxuneneta penanabaninexa. ³⁸ Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús. ³⁹ Nexata Jesús jumaitsi fariseovijavabelia:

—Paxamë pafariseovimë panecaxaevajënae plato, taza ata, naniavelia bapaquiataeme xaniavaetsia panijacuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaejavanënexa papecajamatabëcuene bijianaeyaniva picani, itsiata pananeconitaponame Diosojavabelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua. ⁴¹ Pejanajamatabëcuene itsa paxainaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

⁴² Icatsia Jesús jumaitsi fariseovijavabelia:

—iPaxamē pafariseovimē ayaineconi panatsixainame Diosojavabelia! Panenacanabijava diez xuabejeyajuvēnējava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvēnējava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamē, pepacue ne apo pajitsipaemē Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabēxainamē. Bajaraxua picani paxamē bepanajamatabēxainame panetoexanabiabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—iPaxamē pafariseovimē ayaineconi panatsixainame Diosojavabelia! iTsipaji bepaayajamatabēcuenevimē panataeyabiabame! Judíovi penacaetuatabibonējava itsa panajoneyabiabame, pajitsipabiabame paneenaenexa peyaiyataevitsi penaenexa petsinubijavanēta. Pajitsipabiabamenua jivi papecabajacobinexa callejava bitso yaiyataeya, jai Jesús fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—iPaxamē judíovi panecujarubivi, paxamē ata pijinia pafariseovimē, ayaineconi panatsixainame Diosojavabelia! Paxamē itajara jivi bepatsita pexaniajamatabēcuenevimē tsabiabi pibisiajamatabēcuene panexainae vi ata. Pacuenia itsamona e pona jivi pemēthēanē matatsēnēa apo peyapētaexae xua xaina bēpēnēareca, bajara pijinia itsi pamona e pacayaiyatane apo peyapētaexae pacuenia pajamatabēcuenebejemē bēpēnēa. Bajarapamonae pacayaiyatane tsipaji apo yapētae bajarapamonae bēpēnēa panejamatabēcuenebejjava, jai Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitsijavata, judíovi pecujarubiviyajuvēnēnē jumaitsi Jesúsjavabelia:

—Jesús, itsa mapacuenia jumaitsimēje, paxanē yabara ata pibisiacuenia jumaitsimē, jai Jesúsjavabelia judíovi pecujarubiviyajuvēnēnē.

⁴⁶ Jesús nexata jumaitsi judíovi pecujarubinējavabelia:

—iPaxamē ata, judíovi panecujarubivi, ayaineconi panatsixainame Diosojavabelia! Palivaisianē ayapēbeje itsajivi ata pejumecovēnētsinexa, bajarapalivaisianē jivi patsipaebabiabame pejumecovēnētsinexa. Bajarapalivaisianē patsipaebabiabi atamē itsamona e pejumecovēnētsinexa, paxamē itsiata apo panajamatabēxainamē paneexanaenexa bajarapacuenia, jai Jesús judíovi pecujarubinējavabelia.

⁴⁷ Icatsia Jesús jumaitsi judíovi pecujarubivijavabelia:

—iPaxamē judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamē bajarapaprofetavimi pemēthēanējumavereca bonē paexanajebame, jivi itsa tane bajarapabonē, penajamatabēnapitabiabinexa bajarapaprofetavimi.

⁴⁸ Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprofetavimi pemëthëanëjumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaitsi paxamë yabara mapacueniaje: “Bajarapamonaejavabelia toitorobianajë profetavi. Toitorobianajënuua apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejioibiaexanabiabiananua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara. ⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamë aeconoxae mapamatacabitaje panejinavanapaevi. ⁵¹ Panijasalinaivimi profetavimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprofetavimi ata. Nexata bexëajavabereña ata icatsia panijasalinaivimi beyaxuaba Zacariaspijinëmi. Zacariaspijinëmi panijasalinaivimi beyaxuaba templobopanabota, baitsi templobobeje altarvënëjavabeje petuatajëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—jPaxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamë paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaevevtsinëjavabelia.

12

Pacuenia Jesús tsipaeba jivi pejumecovënëtsianiva fariseovi petsipae-bilivaisitsi yabara pelivaisi

¹ Penacaetuataponaejavata jivi pepo ayaibitsaëtoxaneto cajena tsaponae, baitsi miles pajivibeje. Nexata jivi nataxucuetsabataxubapona. Nexata Jesús pijajivijavabelia copiaya tsipaeba livaisi, pejumecovënëtsianiva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” itsa janë, peyamaxëitojorobilivaisi yabara pacajumaitsitsi. Fariseovi raja bepacsitsita pexaniajamatabëcuenevi itajara tsane, pibisiajamatabëcuene pexainaevi ata. ² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabi xaniavaetsia yapëtaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

Pacuenia Jesús tsipaeba pijajivi pecujunaviyaniva jivivevi yabara pelivaisi

(Mt 10.26-31)

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinea. ⁵ Biji rajane pacatsipaebijitsiatsi panecujunavinea Dioso. Tsipaji Dioso cajëjëpatsi papecaxuabinea infiernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënënë. ⁷ Paxamë rabiji bitso Dioso pacaasiva baratsui matatoxenetsia. Tsipaji panamatamotame baratsui matatoxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namatajëta. Bajaraxuata pëtsa pacujunavame itsacuenejava ata, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi

(Mt 10.32-33; 12.32; 10.19-20)

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaë tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinënë, vajunupaebianajë tajajivicuene Dioso pijaängelevi pitabarata. ⁹ Pamonaë jumai tsane itsamonaejavabelia: “Xanë cajena Jesús apo pijajivitonënë,” jai tsane, bajarapamonae yabara juya xanë, jumaitsinë tsane: “Mara pamonaë cajena apo tajajivije,” janë tsane Dioso pijaängelevi pitabarata, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi pibisiacuene nebaracuaicuaijai ata, xanë, Daxitajivi Pematapijinënë, bajarapaneoni yabara itsa navajëta Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuena baracuaicuaijai Espiritu Santo, bajarapajivi bajarapaneoni Dioso apo vecuaajibiaexanaetsi tsane, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judíovi penacaetuatabiabibojavabelia ata, papecayanijobinexa, pëtsa pajamatabëcuenebëjamë panenayajivicuaicuaijajavanexa yabara. ¹² Tsipaji raja bajarapaepatota, Espíritu Santo pacacuaicuaijaiyaexanaena pacuenia panayajivicuaicuaijamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainaeayaniva ayaijava pexainaejava pexainanenexa yabara pelivaisi

¹³ Jivi ayaibitsaëtóxanetoyajuvënënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

¹⁴ Jesús nexata jumaitsi bajaraponëjavabelia:

—Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobetsatsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayaijava panexainanenexa. Tsipaji jivi pexainaejava ayaijava xainae ata tsipae, bajarapamonae pexainaejava yabara jamatabëcuenexanepanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueni-aje:

—Ponapona bitso riconë. Pijapabianë tocapitsapabiabatsi ayaijava pexainaecuene. ¹⁷ Riconë nexata jamatabëjumaitsi: “¿De meta pacuenia exanaenajë? Netoajibi baja rovia taetaponaejavabelianexa taubijava,” jamatabëjai riconë. ¹⁸ Riconë nexata icatsia jamatabëjumaitsi: “Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava. ¹⁹ Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacuer-aevetsianajë. Pexaniacuene nabanebiabianajë. Pexaniaviriaranënuamatavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë. ²⁰ Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tēpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopiapatsianatsi pamonae ayaijava natocaetuatapona ëpamonae pexainanenexa. Bajarapamonae itsiata pepacuene bepejiobivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabara pelivaisi
(Mt 6.25-34)

²² Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Pëtsa pasivana-jamatabëxainame ëpanexaejava panevënajinavanapænexa. Pëtsa

pasivanajamatabëxainamenua ëpanenaxatabijavanexa ata. ²³ Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁴ Pacanaëjère pacuenia baratsui apo ubi pexaejavanexa. Apo notsinua penaveretaponaejava. Apo xainaenua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsui monae matatoxenetsia papecarajutsinexa daxita xua panamatavenoname! Bjaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. ²⁵ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuenecueratsipa pejamatabëcuenebëjajava penavitsabiaexanaejavanexa. Tsipaji apo tonamatamotsitsi bjaraxua. ²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bjaraxuata apo bepajamatabëcuenebëjamë itsacuenëjavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

—Pacanaëjère pacuenia bitso pexaniamatono pitsapa, mapamatonoje. Bjarapamatono apo natsijumanacuenëbi. Penaxatatsijavanexa ata apo natoexanae. Bajayata nacuaevevtsinë Salomónpijinë bitso pexainaenëmi. Naitabëtsiaya naxatabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aita bë mapamatonotoxije. ²⁸ Paxamë, bevelia Dioso panejumecovënëtsivi, asaëya bepajumecovënëtame Dioso papecaevevtsijava. Ajena pitsijavata vayafota tanetsi pexaniaponamatantoxi. Bjaraxuacujinae, caematacabibejucujinae, tajuatsi baja bjarapaponamatantoximi. Pacuenia Dioso aita bëyaexana ponamatantoxi, bajara pijinia pacuenia paxamë ata itsamatacabi Dioso pacaxatabiana piita bëjava. ²⁹ Bjaraxuata pëtsa pasivana-jamatabëxainavanapame ëpanexaejavanexa, ëpanematavëjëapaejavanexa ata. Biji rajane pajumecovënëtavanapare Dioso. ³⁰ Pamonae Dioso apo pejumecovënëtsivi, bitso sivanajamatabëxainabiaba ëpexaejavanexa, ëpenaxatabijavanexa ata. Itsiata baitsi jane paneaxa Dioso paxainame. Bjaraponë yapëtane daxita xua panamatavenoname. ³¹ Bjaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenëbavanapaenexa itsamatacabi ayajava pexainaenexa athëbëtatsia yabara pelivaisi

(Mt 6.19-21)

³² Icatsia Jesús jumaitsi pijajivijavabelia:

—Tajamonae, paxamë patajajivimë pacaëjiviyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bjaraponë evetsiana daxitacuene. ³³ Pacanajere panexainaeyajuvënëjava, bitso paneasivajava ata. Nexata bjarapapalata parajutsianame bitso bepejibivijavabelia. Nexata

juya Dioso athëbëtatsia pacarajutsiana bitso penamatamotsijava, apo pevereverecaejava. Bajarajotatsia acunenibi pejonejava penacobetoxotsivi papecayacajërëtsinexa. Itsanë ata ajibi papecatoucubaxaenënexa.³⁴ Panacuatatsia pacatoxaniavaeta panexainaexavanexa, bajarapanacua panejamatabëëthëtovetsina pajamatabëñajinavanapaename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabëcuenexaniavaetsiaya pevajënae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata najamatabëcuenexaniavaetsiaya panecopiaevetavanapaename.³⁶ Payapëtaneme rabaja mapacuenije. Petuxanenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiaevetavanapatsi. Nexata petuxanenë jemata meravi najetarucæ ata, baupa itsa docodocota, nexata bajarapamonæ bepïjia tobaupata pijatuxanenë.³⁷ Bajarapamonæ barëya pijatuxanenë naëcotsiaya pecopiaevetavanapæjavata pepatsixæ. Xaniajanë pacuenia pacatsipaebijitsiatsi. Nexata petuxanenë pijajivi caecuenia petobaupatsixaetsi, petuxanenë pijajivi sivajamatabëcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonæ bepïjajivitonë nataeya rajuta pexæjava pijajivi.³⁸ Meravi tuatuajëta petuxanenë patsi ata, itsa jume, matababivëpata patsi ata, nexata petuxanenë pijajivi naëcotsiaya pecopiaevetavanapæjavata pijatuxanenë pecaxitarabixætsi, petuxanenë pijajivi barëya.³⁹ Pacanaëjère mapacuenije. Bo pexainaenë itsa yapëtaejitsipa paepatota meravi pijabojavaberena patsijitsia pecobecovë petonacobetoxotsinënexatsi, nexata apo majitsi tsipæ. Vajënaeetecæejitsipa meravijebi. Apo copatsi tsipæ pijaboyaberena petojoneyanivatsi penacobetoxotsinënexa.⁴⁰ Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipaji xanë, Daxitajivi Pematapijinë, paepatota apo panejamatabëñajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicuenia, yabara pelivaisi

(Mt 24.45-51)

⁴¹ Pedro jumaitsi Jesúsjavabelia:

—Tajatuxanenë, ¿palivaisi aeconoxæ panetsipaebame, baja tsaja palivaisi ëpaxanë panijajivinexanë? Itsa jume, ¿itsamonænexa ata tsaja yajava? jai Pedro.

⁴² Jesús nexata jumaitsi Pedrojavabelia:

—Mara pejamatabëcueneitsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenëbaponapona pijacuene, maitsije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë

pepatsimatacabijavabelianexa. Bajaraponē pijatuxanenē pijajivi pecovēta toevetaponapona xaniavaetsia. Toabataponapona pexaejava caematacabī canacujitsia pacuenia itorobatsi pijatuxanenē.⁴³ Bajaraponē bitso barēya pamatacabī pijatuxanenē pata xaniavaetsia pijajivi pecovēta petoevetaponaponaexae.⁴⁴ Xaniajanē pacuenia pacatsipaebijitsiatsi. Ponē bajarapacuenia xaniavaetsia tonacueneba pijatuxanenē pecovēta, bajaraponē icatsia evetsiaexanatsi daxita xua xaina pijatuxanenē.⁴⁵ Petuxanenē pijajivitonē ita piajamatabēcuenebejenē tsipae, nexata bajaraponē pijatuxanenē pecovēta jamatabējumai tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonaē evetsiaexanatsi xaniavaetsia picani petoevetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponē ayaijava pexaejava xaeyabiabijitsipa. Aitajibinua tsabiabi tsipae.⁴⁶ Nexata itsajota apo jamatabēnajinaē tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabī pinijicuenia naneconitsiaexanaena pamonaē Dioso apo pejumecovēnētsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponē itsanē pijajivitonē, yapētaē ata picani pacuenia itorobatsi pijatuxanenē petoexanaenexa, itsiata ita apo toexanaē pijatuxanenē pitorobicueniatsi, bajaraponē pinijicuenia jumaconibabejitsipatsi ayaicuerobocotota.⁴⁸ Ponē ata pijinia itsanē pijajivitonē, ita apo jumeyapētaē xaniavaetsia petoexanaenexa pacuenia pijatuxanenē itorobatsi, nexata pijatuxanenē pitorobicueniatsi saicayacuenia ita toexana, bajaraponē ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajara-pajivi yabara vaxaitsi basivajamatabējumaitsitsi: “Juya meta mapajivije ayaijava rajutabiabiana itsamonaejavabelia,” basivajamatabējaitsti. Pajivi pijinia evetsiaexanatsi ayaijava, bajarapajivi pevetsiaexanaenētsi sivajamatabējumaitsitsi: “Ita netocanacuenebiana taevetsiaexanaejava, ayaijava netopitsapaena,” sivajamatabējaitsti pevetsiaexanaenētsi, jai Jesús pijajivijavabelia.

Pacuenia Jesús apo penajuajumecovēnētsixae, nacaemonae ata apo najamatabēcuenejēpae tsane yabara pelivaisi

(Mt 10.34-36)

⁴⁹ Icatsia Jesús jumaitsi pijajivijavabelia:

—Xanē raja patajopajē daxitanacuapijivi pibisiacuene pexanaeneconi yabara tasivatēpaenexa. Nexata bajarapamonaeya-juvēnēvi itsamonae nejumecovēnētsiana. Nexata nacaemonae ata apo najamatabēcuenejēpae tsane. Itsa baja capanepaeya cruzata daxitajivi sivatēpaejitsipajē, jamatabēcuenebarēyanē baja tsipae.⁵⁰ Itsiata baitsi jane abaxē netosajina bajaraxua yabara tanejamatabēcuenejētsinexa tanebeyaxuabijavata. ¡Bitso baja rovia najamatabēxainajē! ¡Matapania nebeyaxuabiana, jamatabēcuenecaevianajē!⁵¹ Pētsa panesivajamatabējumaitsimē mapacueniaje: “Jesús rabaja patsica mapanacuayabetsicaje daxitajivi mapanacuataje najamatabēcuenejēpaeya pejinavanapaeyaexanaenexa,”

panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaefavabelia apo nejumecovënëtsi, nacaemonae ata. Itsamonae napijavajabitsaë tsane. Nexata apo najamatabëcuenejëpae tsane. ⁵² Ajena mapamatacabijavaveliacujinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavanapaevi ata, apo najamatabëcuenejëpae tsane xanë apo tanenajuajumecovënëtsixaebeje. Pamonaе cinco pajivibeje nacaemonae, bajarapamonaeyajuvënëvi, acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsiana. Acueyabi pajivibeje apo nejumecovënëtsi tsane. ⁵³ Bajarapabopijivi, paxabeje pexënatobeje, apo najamatabëcuenejëpaebeje tsane xanë apo tanenajuajumecovënëtsixaebeje. Petirivabeje pijinia, penabeje pexënatoyobeje ata, apo najamatabëcuenejëpaebeje tsane xanë apo tanenajuajumecovënëtsixaebeje. Pamebeje pecopenabeje ata apo najamatabëcuenejëpaebeje tsane xanë apo tanenajuajumecovënëtsixaebeje, jai Jesús pijajivijavabelia.

Pacuenia Jesús asaëya jivi muxujioba apo pecanaëjëtsixae Jesús Dioso pexënatocuene yabara pelivaisi

(Mt 16.1-4; Mr 8.11-13)

⁵⁴ Jesús icatsia jumaitsi jivi ayaibitsaëtoxanetojavabelia:

—Itsa pataneme vaëvetsica itarërëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaba. ⁵⁵ Itsa pataneme jovibo pepitsapaejava epatajërëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi. ⁵⁶ Nexata itsamonae pacatane bepatsita pexaniajamatabëcuenevimë itajara, papibisiajamatabëcuenevi atamë. Payapëtaeyabiabame pacuenia matacabi itsijitsia itarërëbo pepitsapaejava panetaeyabiabixae. Bajarapacuenia picani payapëtaeyabiabame. Itsiata baitsi jane patae atamë daxita xua xanë ata exanaponajë, caranata xanë apo paneyapëtaemë Dioso athëbëvetsica taneitorobinëcuenetsica, jai Jesús jivi ayaibitsaëtoxanetojavabelia.

Pacuenia penaneconitsijivi xaniavaetsia bebarëcuaicuajijai pajivijavabelia naneconita penasivajamatabëxanepanaenexabeje, peneconitsiyanivatsi jueznëjavabelia, yabara pelivaisi

(Mt 5.25-26)

⁵⁷ Jesús icatsia jumaitsi jivi ayaibitsaëtoxanetojavabelia:

—Pacanaëjëre panijacuata paneexanaenexa pacuene xanepana. ⁵⁸ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuajijamërebeje panenasivajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuajijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi

pejebabiabibota. ⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaiBITSaëtOXanetojavabelia.

13

Pacuenia jivi benajamatabëcuenepëñëyorota pibisiacuene pexanabiabi-javavecua yabara pelivaisi

¹ Itsamonae jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamonaе baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaevecsine Pilato pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuta, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonae Jesúsjavabelia.

² Jesús nexata jumaitsi bajarapamonaejavabelia:

—“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja? ³ Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinexatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepëñëyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename. ⁴ Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloévënëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja? ⁵ Jume baja cajena. Bajarapamonaemi ata picani bitso pibisiacuene apo exanae pijatamarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepëñëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaejavabelia.

Pacuenia Jesús jivi livaisi tsipaeba piacuaijibihigueranae pelivaisicuenia yabara pelivaisi

⁶ Jesús jivi livaisi tsipaeba piacuaijibihigueranae pelivaisicuenia. Jesús jivi piacuaijibihigueranae pelivaisicuenia petsipaebijavata, pijaperujumatabëcuene apo penavecuacopatsivi yabara Jesús jumaitsi mapacueniaje:

—Pebi pijapabi tuatuajëta caenae peubinae xainanuta, higeravënënae. Nexata picani taeyojopalia bajaraponaе penacuaitsijava. Itsiata baitsi jane apo nacuaitsi. ⁷ Nexata jumaitsi pijapabi petoevensinëtsijavabelia: “Taema maponaеje. Acueyabi picani pavaibeje

taeyopajë tacuainotabiabinexa maponaecuaije. Itsiata acuaijibi tsabiabi. Nexata baja netonicataxuare. Apo becopatanutsitsi bajarapona. Ira caranatanua saya,” jai pijapabi pexainenë. ⁸ Itsiata baitsi jane pijapabi petoevetsinëtsi jumaitsi: “Copatanutsianatsibeje abaxë mapavaije. Nexata bacatuirabianajë bacatasitoxita. ⁹ Baja raeta xuacujinae xanepanaena. Nexata aeconoxae pavai nacuaitsiana. Nexata aeconoxae pavai ata itsa apo nacuaitsi tsane, nexata jane baja caticataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamona. Pijaperujumatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabi judíovi penacueraevetsimatacabita, Jesús jivi livaisi tsipaeba judíovi penacatuatabiabibota. ¹¹ Bajarajota naeca petiriva. Dovathi pejamatabëcueneta bajarapova dieciocho pavaijebe xaina penajumafurutsicujinae. Nexata apo caëjëpaetsi tsiquirijavayo ata penaepasirovitsijava. ¹² Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuajibi, jai Jesús bajarapovajavabelia.

¹³ Jesús tsimatanacobebeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsapona. Diosojavabelia:

—¡Diosomë, bitso pexaniacuene netoexaname ayaijamatatabëcuenenëxaem! jai tsapona. Diosojavabelia.

¹⁴ Itsiata baitsi jane judíovi penacatuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacatuatabiabibo pevetsinë jamatabëjumaitsi:

—Jesús nacueneba penacueraevetsimatacabita. Jesús apo jume-covënëtsi patajasalinaivi patanitavetsicuene, jamatabëjai.

Nexata judíovi penacatuatabiabibo pevetsinë najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava hepatatsi vajanacajamatejemayaexanaenexa. Nexata abaxë penacueraevetsimatacabita apo bepatsitsi vajanacajamatejemayaexanaenexa, jai judíovi penacatuatabiabibo pevetsinë najumejematsiaya jivijavabelia.

¹⁵ Nexata Jesús jumaitsi judíovi penacatuatabiabibo pevetsinëjavabelia:

—Paxamë saya jivi paneyamaxëitojorobivi. Bepatsita pexania-jamatabëcuenevimë itajara itsamona, papibisiajamatabëcuenevi atamë. Paxamë ata panacuenebabiabame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa. ¹⁶ Mapovaje Abrahampijinë pemomoxiyajuvënëva jamatejemayaexana. Tsipaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaijebe. Bajaraxuata

penacueraevetsimatacabita ata jamatejemayaexanajë pīatanecueneve-cua, jai Jesús judíovi penacaetuatabiabibo pevetsinëjavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonaē. Itsamonaē pijinia Jesús siva-jamatabëcuenebarëyatsi pinijicuene Dioso pesaëta pexanaponaejavanë yabara.

Pacuenia mostazaxutoyo pejuvicujinae, mostazanae bepīia vitsaba yabara pelivaisi

(Mt 13.31-32; Mr 4.30-32)

¹⁸ Jesús jumaitsi jivijavabelia:

—¿De meta xua pelivaisi jëpa Dioso pijajivi bepīia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepīia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepīia vitsaba. Bepīia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepīia ayaibitsaëtoxaneto naexanaena Dioso pijajivi, jai Jesús jivijavabelia.

Pacuenia pan pexanaematabënexa, levaduravënëjava fufunaeyaexana yabara pelivaisi

(Mt 13.33)

²⁰ Icatsia Jesús jumaitsi jivijavabelia:

—¿De meta palivaisi jëpa pecacaëjëpaejava Dioso pijajivi pevetsicuenē daxitanacuanëjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicuenē peyacaëjëpaejava daxitanacuanëjava? ²¹ Levaduravënëjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobononë matajërëaba levaduravënëjavata. Nexata pan pexanaematabënexa, ayaimatabë.

Tsiquiribaupayo epatajërëtsialia yabara pelivaisi

(Mt 7.13-14, 21-23)

²² Jesús jivi livaisi tsipaebanajetaruca pinijitomaranëjava, tsiquirito-maraxijava ata, pepatsinexa Jerusalén tomarabelia. ²³ Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmère bitso panevajënaeyabelia itsamatacabī athëbëtatsia panejonenexa tsiquiribaupayojavalia. Jivi picani itsamatacabī athëbëtatsia ayaibitsaëtoxaneto jamatabëjonena tsiquiribaupayojavalia. Itsiata apo caëjëpaetsi tsane pejonenexa. ²⁵ Bo pexainaenë itsa nonotapunaena baupa pexatatsinexa, paxamë bo jumapënëvelia panubenaename. Nexata picani panejonenexa pabaupadocodocot-sianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. ²⁶ Nexata paxamë pajumaitsimë tsane:

“Xamë baja cajena panebarënanabame. Panebarëmatavëjëaapamenua. Patajatomaranëjava ata baja cajena jivi livaisi tsipaebabiabame,” pajamë tsane. ²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane. ²⁸ Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsipaji paxamë Dioso pijanacuavecua panenaxuabinexa pacaxuabiana infiernojavabelia. ²⁹ Itsaviriajumevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia. ³⁰ Pamonae aeconoxae mapamatacabitaje ayaijamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonaeyajuvënëvi, ayaibitsaëttoxaneto, itsamatacabi Dioso ayaijamatabëcuenevi exanaenatsi, jai Jesús daxitajivijavabelia.

Pacuenia Jesús najamatabëxainaeya sivanua Jerusalén tomarapijivi yabara pelivaisi

(Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaeveltsinë raja Herodes cabeyaxuabiapaeba, jai fariseovi.

³² Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitojorobabiabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. ³³ Diosojumepaebivimi profetavimi beyejabiabatsi Jerusalén tomarata. Tsipaji profetavi acuenibi saicayatomarata petëpaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabëxainaeya sivanua Jerusalén tomarapijivi. Jerusalén tomarapijivi Jesús najamatabëxainaeya pesivanuejavata, jumaitsi mapacueniaje:

—¡Pajerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacacaetuatsinexa, patacapanepaenexa picani panijaneconivecua! ¡Itsiata baitsi jane paxamë apo pajejamë cajena! ³⁵ Panejumetaema. Dioso rabaja pacacopata

papecaevetabiabijavami. Nexata baja panijatemplobota Dioso apo ponaponae. Xaniajanë pacuenia pacatsipaebijitsiatsi. Paxamë baja apo panetaemë tsane matavëjêa. Matapania itsa panejumecovênêtame Cristonêcuenenê, Dioso taneitorobinêtsica, icatsia panetaename. Itsa panesivajamatabêjumaitsimënuua tsane: “Dioso, bitso yavenonare maponë najetarucaje. Bajaraponë nejamatabêcueneta najetaruca,” itsa panesivajamatabêjamë tsane, nexata jane baja icatsia panetaename itsa patsianicajê, jai Jesús mapacueniaje najamatabêxainaeya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

¹ Itsamatacabi, judíovi penacueraevetsimatacabita, Jesús pona fariseovi penamatacaitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. ² Nexata Jesús pitabarata eca pebi, daxitanë peyajinaenë. ³ Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. ⁵ Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramêthêareca, nexata penacueraevetsimatacabita ata, bepíjia pajutarêcêpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanêta penaenexa penatsiitapetsiyaniva yabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanêta penaenexa mesa muxuneneta. Nexata Jesús muxujioba bajarapamonae beveliajamatabêcuenevi penataenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanêta. Tsípaji itsanë ayaijamatabêcuenenê paxamë matatoxenetsia itsa najunatatsi, napatsipa. ⁹ Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabêcuenevi penaenexa petsinubijavanêta. ¹⁰ Itsa pacajunata, paenaename beveliajamatabêcuenevi penaenexa petsinubijavanêta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanêta ecare,” itsa pacajai tsane, paenaename

bajaraxuanëta. Nexata bajarapacuenia daxita mesa muxuneneta pane-najuaenaevi pacataena papecayiyataejava papecajunatsinë. ¹¹ Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsifariseonëtsijavabelia:

—Itsa junatame itsamonae nebarënanabinexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabinexa ënijamonae. Pëtsa junatame ënijamonaeviriavi ata. Pëtsa junatame ëricovi, pamonaevi nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarënanabinexa. Nexata bajarapacuenia canamatamotsipa bajarapamonae. ¹³ Itsa junatame itsamonae fiesta nebarëxanaenexa, junatsianame bepejiovivi, penabejenaevi ata, pejayujayunaevi ata, bitso pitaxutotsëcënaevi ata. ¹⁴ Nexata bajarapacuenia pepacue ne jamatabëcuenebarëyamë tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonaevi tëpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijifiesta pexanaenë pelivaisicuenia yabara pelivaisi

(Mt 22.1-10)

¹⁵ Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënëne jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënëne.

¹⁶ Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nexata tajëvelia junatsiaexana jivi ayailbitsaëtoxfaneto petopatsinexatsi. ¹⁷ Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. ¹⁸ Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacue ne toexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ¹⁹ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu. Pexaniacue ne toexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ²⁰ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamonaevi picani fiesta pexanaenë junata, peponaeyaniva

saya tonajumeitorobarenatsi pijajivitonëta. ²¹ Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarebelia. Junatanajetarucaename jivi piniijallexanetonëjava, tsiquiricallexijava ata. Junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. ²² Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanajë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia. ²³ Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. ²⁴ Pamonaepicani copiata junatajë penanabaninexa, caenë ata bajarapamonaeyajuvënë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviyajuvënëjavabelia jivi peyapëtaenexa itsamona Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaevajënaeyatsi yabara pelivaisi

(Mt 10.37-38)

²⁵ Jivibitsaëttoxaneto Jesús pënjajnavanapatsi. Nexata Jesús napënëyorota bajarapamonaevjavabelia. Jesús jumaitsi mapacueniaje:

²⁶—Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piisivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penasivajava ata, matatoxenetsia, nexata bajaraponë apo tajajivitonë tsane. ²⁷ Ponë xanë yabara itsamona jamatabëpebeyaxuabixaetsi, jamatabëpebejiobiaexanaexaetsinua, nexata pecajunavi itsa apo nepënaponaev tsane, bajaraponë apo tajajivitonë tsane. ²⁸ Paxamëyajuvënë ita jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya. ²⁹ Itsa apo najamatabëcueneveretsi tsipae copiaya, nexata bo pexanaevajava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi. ³⁰ Baracuaicuajitsi tsipae: “Bajaraponë picani taxuxuaba pijabo pexanaevajava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi. ³¹ Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte

mil ponëbejejavabelia?” jamatabëjai tsipae copiaya. ³² Nexata bajara-pacuenia penajamatabëxainaeucujinae, bajaraponë yapëtaejitsipa apo pebarëcuenecaëjêpaejavatsi pebarëbenexa pijavajabitsaënë pijajivijavabelia. Itsa abaxë tajê pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje. ³³ Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepënëyorotsinexa daxita pexainaejavavecua, nexata acuenebi tajajivi taexanaenexa, jai Jesús jivi ayaibitsaëttoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë itsa copatsipa Jesús pejumecovënëtsijavami yabara pelivaisi

(Mt 5.13; Mr 9.50)

³⁴ Jesús icatsia comparacióncuenia jumaitsi jivi ayaibitsaëttoxanetojavabelia mapacueniaje:

—Yajo abaxë itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi. ³⁵ Itsacueniejavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, itsa tsibacathoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë itsa copatsipa Jesús pejumecovënëtsijavami. Nexata Diosovecua naxuabijitsipa.

15

Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi

(Mt 18.10-14)

¹ Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamonae pata penamuxunaevetsinexa Jesús petsipaebilivaisi. ² Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuajitsi. Bajarapamonae najumaitsi mapacueniaje:

—Mara ponëje naneconita Diosojavabelia. Tsipaji copiapitabiaba piamatabëcuenebejevi ata. Naxaeyabibanua pexaejava bajarapamonae, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuajiaxaetsi, Jesús bajarapamonaejavabelia livaisi tsipaeba mapacueniaje:

⁴ —Paxamëyajuvënëni xainaejitsipa cien ponëbeje oveja. Nexata itsa toyajuvënënxuabijitsipatsi caenë, oveja pexainanë petusatota puenetsipa noventa y nueve ponëbeje. Nexata jaitsipa petonaxuabinëtsi

matapania pecaxitajarabijavabelianexa. ⁵ Nexata oveja pexainaenē itsa baja caxitajarabijitsipa petonaxuabinēmitsi, barēyataejitsipa. Boyaberena vētarapatsipa petonaxuabinēmitsi. ⁶ Nexata oveja pexainaenē petonaxuabinēmitsi itsa capatsipa boyaberena, junatsipa peyapētaevitsi. Junatsipa pijabo muxuneneta imoxoyo penaevi ata. Nexata oveja pexainaenē jumai tsipae bajarapamonaejavabelia: “Panecobenabarēyamēre. Tsipaji tajaovejajo, tanetonaxuabinēyomi picani, caxitajarabajē baja,” jai tsipae oveja pexainaenē bajarapamonaejavabelia. ⁷ Xaniajanē pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, itsa copatsiana pibisiacuene pexanabiabijava, itsa najamatabēcuenepēnēyorota Diosojavabelia, bajara pijinia pacuenia sivabarēyatsi tsane athēbētatsia pejinavanapaevi. Bajarapajivi, athēbētatsia pejinavanapaevi, sivabarēyatsi tsane noventa y nueve pajivibeje Dioso pitabarata pianeconijibitsavanapaevi pesivabarēyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanēyo pelivaisicuenia yabara pelivaisi

⁸ Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xinaejitsipa diez ponēbeje palatanēanē, bitso penamatamotsinēanē. Nexata itsa toyajuvēnēnaxuabijitsipatsi caenē, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanētsi, copatsipa pejaitsijava. ⁹ Itsa baja caxitajarabijitsipa petonaxuabipalatanēmitsi, nexata junatsipa peyapētaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarēyamēre. Tsipaji tajapalatanēyo, tanetonaxuabinēyomi picani, caxitajarabajē baja,” jai tsipae petiriva bajarapamonaejavabelia. ¹⁰ Xaniajanē pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabēcuenepēnēyorotsiananua Diosojavabelia, bajara pijinia pacuenia athēbētatsia ángelevi sivabarēyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinē paxavecua naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

—Pebi xaina anijanēbeje pexēnatobeje. ¹² Nexata juyapijinē jumaitsi paxajavabelia: “Axa, xuanē picani netocopatame tapitsinexa nevēnamuto, bajaraxuanē abaxē apo tēpae atamē, nerajure baja tajajavanexa,” jai juyapijinē. Nexata pexēnatobeje pexainaenē pexēnatobejevavabelia rajuta daxita pexainaejavanēmi. ¹³ Nexata paxa perajutsicujinaetsibeje, caematacabibejecujinae, juyapijinē canajeta daxita pexainaejavanēmi pecaetuatsinexa palata. Bajaraxuacujinae jane baja pona tajēnacuayabelia. Bajarajotalia pibisiacuene exanaponapona. Nexata vereta daxita paxa perajutsijavanēmitsi. ¹⁴ Nexata daxita bajarapanacuapijivi janibocuene tsipatatsi. Bajaraponē peveretsicujinae daxita pijapalatami, bitso namatavenona pexaejava. ¹⁵ Nexata jaita penacuenibinexa bajarapanacuata peecaenējavabelia.

Bajaraponē itorobatsi pijairanējava petoebetaponaponae nexa pijamarrano. ¹⁶ Nexata bajaraponē bitso piagianixae, pepenenexa picani ayaijava jamatabēxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavanexa. ¹⁷ Nexata belia bajaraponē xaniavaetsia najamatabēxaina. Jamatabējumaitsi mapacueniajē: “Taxa pijabota pexaejava ayaijava xaina pijajivi ayaibitsaēto piabatsinexa. Tonacopatabiabatsi ayaijava pexaejava. Itsiata xanē majotaje tēpaejitsianē baja tajani. ¹⁸ Nexata taxajavabelia naviatsianajē. Jumaitsinē meta tsane taxajavabelia: ‘Axa, pibisiacuene exanajē Diosojavabelia, xamējavabelia ata. ¹⁹ Abejenē raja. Auranē baja rovia xamējavabelia: “Taxēnato,” tanejamējava. Nexata saya nijajivitonēnē nexanare,’ janē meta tsane taxajavabelia,” jamatabējai juyapijinē. ²⁰ Nexata baja naviata paxajavabelia.

’Itsa abaxē tajēverena najetaruca, pexēnato pexainaenē copiatane. Nexata bajaraponē pexēnato itaxutobejiobiatane. Mataenetsia cujinaejinalia pexēnato. Nacoxivaetabaruca. Copiapitsiaya itabaratsut-sunexuaba pexēnato. ²¹ Nexata bajaraponē jumaitsi paxajavabelia: “Axa, pibisiacuene raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: “Taxēnato,” tanejamējava,” jai paxajavabelia. ²² Itsiata baitsi jane pexēnato pexainaenē bajarajota jumaitsi pijajivijavabelia: “Naxanitsia. Bepijiayo taxēnato patocaponaremena daxita matatoxenetsia pexaniapana, penajumaxu-abipana. Pajumaacare bajarapapanata. Anillonua pacobesixatare. Zapatonua pataxuxatare. ²³ Penasitsinē becerro papiremelia. Pabeyaxuabianame vajaxaenexa. ¡Fiesta exanaenatsi vajabarēyanexa! ²⁴ Tsipaji raja maponē taxēnatoje: ‘Tēpa meta baja,’ sivajamatabējanē picani. Itsiata tsaena ponapona. ‘Naxuaba meta baja,’ sivajamatabējanē picani. Itsiata baja icatsia patajopa,” jai pexēnato pexainaenē pijajivijavabelia. Nexata taxuxuaba fiesta pexanaejava.

²⁵ ’Bajarapamatacabi matapijinē pabiabelia nacuenebaponapona. Nexata penaviatsinē bo itsa imoxoyotanajetaruca, jumetane música. Jumetanenua peyavajibijava. ²⁶ Nexata bajaraponē junata paxa pijajiviyajuvēnēnē. Jumaitsi: “¿Detsa pitsicuene yabara fiesta paexaname?” jai matapijinē. ²⁷ Nexata paxa pijajivitonē jumaitsi: “Nejuyapijinē baitsi patajopa. Axa nexata paneitoroba patabeyaxuabinexa becerro, penasitsinē. Jamatejema tsaena ponapona nejuyapijinē,” jai bajaraponē matapijinējavabelia. ²⁸ Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: “Naxanitsia. Najonemeya,” jai pexēnatojavabelia. ²⁹ Nexata matapijinē jumaitsi paxajavabelia: “Jume. Bajayajebi baja rovia catonacuenebaponaponatsi xanē. Caeto ata cajena apo cajumeapajejaitsi. Itsiata baitsi jane caeto ata apo nerajutsimē chivoyo ata fiesta tabarēxanaenexa tayapētaevi. ³⁰ Itsiata aeconoxae patajopa baja nexēnato, ponē vereta nijapalatami petiriavijavabelia. Nexata tobeyaxuabame becerro, penasitsinē,” jai matapijinē paxajavabelia. ³¹ Nexata bajaraponē jumaitsi pexēnatojavabelia: “Taxēnato, xamē cajena xanējavata ponapona name daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarēyanexa. Tsipaji nejuyapijinē: ‘Tēpa meta baja,’ tasivajamatabējainēmi, itsiata tsaena asaē. Penaxuabaponaponaenēmi icatsia

baja patajopa,” jai bajaraponë pexënatojavabelia, jai Jesús mapalivaisiei fariseovijavabelia, judíovi pecujarubivijavabelia ata.

16

Pacuenia pijatuxanenë pecobecovë petoevetsinë toveretapona pevetsi-aexanaejavanësi yabara pelivaisi

¹ Jesús pijajivijavabelia livaisi tsipaeba. Jumaitsi mapacueniaje:

—Petuxanenë, bitso pexainanë, ponapona. Bajaraponë xaina pijajivitonë petoevetsinexatsi pecobecovë. Itsiata pepëya pijajivitonë pecobecovë toveretaponatsi. Nexata itsamonae tsipaebatsi pepëya pijajivitonë pecobecovë petoveretaponaejavatsi. ² Nexata petuxanenë pijajivitonë junata. Jumaitsi pijajivitonëjavabelia: “Xamë pina tapëya netoveretaponame tacaevetsiaexanaejava. Pabaxutojavabelia matamoyaquinarubame xuanë canajetaponame tacobecovë, xuanënu netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjêa apo netoevetsimë tsane tacobecovë,” jai petuxanenë pijajivitonëjavabelia. ³ Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënae jamatabëjumaitsi: “¿De tsaeta xua exanaenajë? Tajatuxanenë baja necapitsapaejitsia pecobecovë tatoevetaponaponaejavavecua. Apo necaëjêpae tsane tanacuenebinexa pabi tajacuata tanaevetsinexa. Bitso auranënu tsipae itsamonaejavabelia amoneya tavajëtaponaenexa palata tanamitsacomuatabiabinexa taxaejava. ⁴ Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaecujinae, bajarapamonae pijaboyabelia itsa ponaenajë, xaniavaetsia necopiapitsiana. Nexata bajarapamonaejavata naponaponaenajë,” jamatabëjai bajaraponë. ⁵ Nexata bajaraponë junata daxita pamonae abaxë amoneyabatsi. Nexata pamonae amoneyabatsi, bajarapamonae, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaitsi: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë. ⁶ Nexata ponë amoneyabatsi, jumaitsi: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaitsi piamoneyabinëtsijavabelia: “Bevelia saya catocopatsinatsi. Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya cuatrocientos pagalónbejenexa bepíjia yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. ⁷ Bajaraxuacujinae icatsia itsanë topatatsi. Nexata icatsia jumaitsi bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaitsi: “Camoneyabatsi abaxë tacarajutsinexa cien pabultobeje trigoxubultonë,” jai. Nexata bajaraponë jumaitsi piamoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi,

xaniavaetsia pecopiapitsinexatsi pijabota penaponaponaenexa, pijatuxanenē itsa navecuacapsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanet-uaurataponae baxutonētsi. ⁸ Bajaraxuacujinae pijatuxanenējavabelia pona perajutsinexa jane baja bajarapabaxutonē. Nexata pijatuxanenē jumaittsi: “Xamē baja rovia pibisiacuene exaname. Itsiata baitsi jane naitatsacaxae, exaname pacuenia catoxanepanaejitsia nevajēnaeyabelia,” jaitsi pijatuxanenē. Nexata pacuenia pijatuxanenē pepēya pecobecovē petocanajetabiabinē ajamatabēcueneitatsaca, bajara pijinia pacuenia Dioso apo pejumecovēnētsivi ajamatabēcueneitatsaca Dioso pejumecovēnētsivi matatoxenetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaittsi pijajivijavabelia:

—Pacamuxujiobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenē pecobecovē petoevetsinē, pesivajamatabēcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenē pecapitsapaecujinaetsi, bajara pijinia pacuenia paxamē ata athēbētatsia paxainaename papecasivajamatabēcuene xanepaenaevi. Nexata pamatacabi patēpame, itsajota apo panamatavenonaemē palata, Dioso pacopiapitsiana apo pevereverecaebonējavatatsia, jai Jesús pijajivijavabelia.

¹⁰ Icatsia Jesús jumaittsi pijajivijavabelia:

—Pajivi xaniavaetsia toeveta tsiquirijavayo ata itsanē pecobecovē, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanē pecobecovē, bajarapajivi bijiaya toevetsipa ayaijava ata. ¹¹ Itsanē pecobecovē, mapanacuapijicueneje, palata ata, xaniavaetsia itsa apo patoevetsimē tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxenetsiaje. ¹² Itsa xaniavaetsia apo patoevetsimē tsipae itsanē pecobecovē, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaittsi pijajivijavabelia:

—Itsajivi ata acuenebi caecuenia petonacuenebijava anijanēbeje pijatuxanenēbeje. Caenējavabelia jitsipaejitsipa petonacuenebijava. Itsanējavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipae-bilivaisi pijajivijavabelia. Nexata fariseovi jumecapocaponatsi Jesús. ¹⁵ Jesús nexata jumaittsi fariseovijavabelia:

—Paxamē pajitsipabiabame jivi pejumaitsinexa paxamē yabara: “Fariseovi raja pexaniajamatabēcuenevi,” pejainexa. Itsiata baitsi jane Dioso pacajamatabēcuenepētane pexaniajamatabēcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinēta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinē jivibautisabinēmi pepatsivajēnaeya, jivi xaina Dioso Moiséspijinēta penajumecopatsilivaisi pejumecovēnētsinexa. Bajayata Diosojumepaebivi profetavi ata petsipaebilivaisianē ata, xaina jivi pejumecovēnētsinexa. Itsiata Juanpijinē pepatsicujinae, pexanialivaisi tsipaebaponajē. Tsipaebaponajē Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuae, itaboxo yajava, jemata vereverecaena. Itsiata baitsi jane palivaisi Dioso Moiséspijinēta najumecopata, bajarapacuenia apo vereverecae tsane. Nexata daxita pacuene yabara tajēvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinē pijava pexuabiyaniva yabara pelivaisi

(Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponē pijava xuaba, nexata icatsia itsava itsa pita, bajaraponē pibisiacuene exana pevitota. Nexata naneconita Diosojavabelia. Tsipajī pepo pijavavecua jaita itsava. Dioso cajena abaxē bajaraponē pexuabiva pepo pijavacuena totanetsi. Ponē ata itsanē pexuabiva pita, bajaraponē ata pibisiacuene exana pevitota. Nexata naneconita Diosojavabelia. Tsipajī itsanē pijava yacajērēta, pova abaxē Dioso tanetsi itsanē pepo pijavacuena, jai Jesús fariseovijavabelia.

Bitso riconē Lázaro beje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenē, riconē, ponapona. Daxitamatacabi naxatabiaba bitso pexaniavirijavanē. Pexaejava, pexaniavirijava, xaeyabiaba.

²⁰ Riconē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiobinē, Lázarovēnēnē, boquecabiaba. Lázaro daxitanē perabētsabana.

²¹ Lázaro picani jamatabēxaeyabiaba riconē pexaeyabiabijavata piothopaepērē mesa bēxēpanareca. Avirixi ata patabiaba itsajota Lázaro hocabiaba. Petsabanaejava raebabiabatsi.

²² Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinē petēpaecujinae ponapona. Bajaraxuacujinae riconē ata tēpa. Mēthētatsi.

²³ Riconēmi petēpaecujinae pata petēpaevi pepatabiabinacuayabelia. Nexata bajarapanacuata riconēmi bitso navixaetaeya bejiobi tsaponapona. Nexata riconēmi athēbēa benaēcotsia. Tajētatsia taenuta Abraham penucaejava. Lázaro nucaya Abraham pemuxunenetatsia.

²⁴ Nexata riconēmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarētocainejebiaexanaejitsia. Bitso jamatabēfaenajē mapatajutaje,” jai riconēmi.

²⁵ Nexata Abraham jumaitsi riconēmijavabelia: “Tamomo, najamatabēnapire. Pamatacabi pinaena abaxē asaēmē tsaponapona nenaexanaeirata, ēpexaniacuene picani

xainame. Lázaro pijinia pamatacabi abaxë asaë tsaponaponae, bitso picani bejiobi. Itsiata juya mapamatacabije pexaniacuenia majotsaje catsuponapona. Xamë biji navixaetaeya ponaponame. ²⁶ Itsajivi jamatabëponae ata bajarabereca, acuenebi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamë ata apo pacacaëjêpae panepanepaenexa mabetsinaje,” jai Abraham. ²⁷ Nexata icatsia riconëmi jumaitsi Abrahamjavabelia: “Amo Abraham, pexaniacueni cavajëtatsi. Tonajumeitorobianame Lázarota taxa pijaboyabelia. ²⁸ Bajarajotalia xainajë cinco ponëbeje tajuyapijivi. Xaniavaetsia Lázaro tsipaebiana. Muxujiobiana bajarapamonae ata peponaeyaniva mapanavixaetaeyabiabinacuaya berenaje,” jai riconëmi Abrahamjavabelia. ²⁹ Nexata icatsia Abraham jumaitsi riconëmijavabelia: “Bajarapamonae baja xaina Moiséspijinë peyaquinaelivaisianë. Diosojumepaebivimi profetavi ata peyaquinaelivaisianë ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovënëtsiana bajarapamonae peyaquinaelivaisianë,” jai Abraham riconëmijavabelia. ³⁰ Riconëmi icatsia jumaitsi Abrahamjavabelia: “Jume raja. Apo jumecovënëtsi tsane cajena bajarapalivaisianë. Itsiata itsajivi itsa asaë tsane petëpaecujinae penaviatsinexa pecovëyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabëcuenepënëyorotsiana Diosojavabelia,” jai riconëmi Abrahamjavabelia. ³¹ Nexata icatsia Abraham jumaitsi riconëmijavabelia: “Nejuyapijivi itsa apo jumecovënëtsi Moiséspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petëpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabëcuenejëbjitsiatsi pibisiacuene pexanaenexa yabara pelivaisi

(Mt 18.6-7, 21-22; Mr 9.42)

¹ Jesús jumaitsi pijajivijavabelia:

—Xanë tajajivixae, itsamonae jamatabëcuenejëbabiabianatsi pibisiacuene pexanaenexa. Nexata itsamonae pejamatabëcueneta tajajivi pibisiacuene exanaena. Nexata pajivi pejamatabëcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. ² Itsamonae Dioso pejumecovënëtsivi, abaxë bepejevaxijamatabëcuene xaina Dioso pejumecovënëtsijava yabara. Nexata apo ajamatabëcuenesaë. Nexata pajivi tajajivijavabelia pibisiacuene jamatabëexanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetovabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuat-uajëareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia. ³ Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanē Dioso panenajuajumecovēnētsivi pibisiacuene itsa pacaexanaena paxamējavaberena, bajaraponē xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuene, pajamatabēcuenecaevianame pibisiacuene papecaexanaejava. Pabarajamatabēcuenexanepanaename bajaraponē. ⁴ Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuene, itsiata pajamatabēcuenecaevianame. Pabarajamatabēcuenexanepanaename bajaraponē, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenē, paneyavenonare: “Xanē cajena necaējēpa daxitacuene taexanaenexa,” nejaitsabiabijava orijibia patacajume-covēnētsinexa, jai Jesús pijaapóstolevi.

⁶ Nexata Jesús jumaitsi pijaapóstolevijavabelia:

—Tsiquirijavayo ata xanē yabara itsa pajamatabējumaitsimē tsipae: “Xaniajai cajena. Jesús caējēpatsi daxitacuene pexanaenexa,” itsa pajamatabējamē tsipae, nexata paxamē ata pacacaējēpaejitsipa ayaicuene paneexanaenexa. Nexata itsa pajumaitsimē tsipae mapanaejavaxanetojavabeliaje: “Yatabutopaya natixire. Nucaename pucaxaneto tuat-uajētalia,” itsa pajamē tsipae, nexata naejava ata pacajumecovēnētsipa cajena, jai Jesús pijaapóstolevijavabelia.

Pacuenia itsajivi pijatuxanenē pitorobicueniatsi toexanabiaba yabara pelivaisi

⁷ Jesús icatsia jumaitsi pijaapóstolevijavabelia:

—Paxamējajuvēnēnē xainaejitsipa pijajivitonē. Nexata itorobijitsipa petonacuenebaponaponaenexatsi. Nexata bajaraponē pijatuxanenē ira petocueponaponaecujinae, patsipa pijatuxanenē pijaboyaberena. Itsa jume, baca petoebetaponaecujinae patsipa. Nexata paxamējajuvēnēnē petuxanenēxae, pijajivitonējavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonējavabelia. ⁸ Jume baja cajena. Biji rajane jumai tsipae pijajivitonējavabelia: “Netoexanare taxaevajanexa. Nexata abaxē nevetanucaename tanabanijavata. Bajaraxuacujinae xamē nabanianame,” jai tsipae pijajivitonējavabelia. ⁹ “Xanepana rabaja. Pexaniacuene bitso netoexaname,” apo jai tsabiabinua pijajivitonējavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonē tsaponapona. Nexata pacuenia pijatuxanenē itorobatsi, bajaraponē exanabiabijitsipa. ¹⁰ Bajarapacuenia paxamē ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimē tsane: “Vaxaitsi saya vajatuxanenē pijajivitsi. Nexata vajanacaitorobicuenia toexanavanapatsi,” panajamē tsane. Pētsa panajumaitsimē: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamē pētsa, jai Jesús pijaapóstolevijavabelia.

Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitajarababeje, bajaraxuayo Jesús najetaruca. ¹² Itsa baja Jesús patsijitsia tsiquiritomarayojavabelia, mataenenatsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaothopatsi. ¹³ Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajëtsianame sacerdotevijavabelia papecaperabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabëxanepananajetarubena. ¹⁵ Daxita bajarapamonae peperabëxanepanaevajava itsa tane, nexata caenë saya bajarapomonaeyajuvënënë naviateca Jesúsjavabelia. Bajaraponë namutua ayaijumeta Diosojavabelia jumai tsanajetaruca: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” jai tsanajetaruca bajaraponë Diosojavabelia.

¹⁶ Bajaraponë itsa pata Jesúsjavabelia, pematatababëta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponë Samaria nacuapijinë. ¹⁷ Nexata Jesús jumaitsi bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanajë. ¿Detsa meta xuajitsia daxita apo najuapatsi? ¹⁸ Maponëje caenë saicaya nacuapijinë, apo judionë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinë yabara.

¹⁹ Nexata Samaria nacuapijinëjavabelia Jesús jumaitsi:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaevanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi

(Mt 24.23-28, 36-41)

²⁰ Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota. ²¹ Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamë tuatujëta, jai Jesús fariseovijavabelia.

²² Nexata Jesús itsamatacabi mapanacuaje pevetsijavanexa, tajëvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaename patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevetsicuene. ²³ Nexata itsamonae pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame. Pëtsa pamuxunaponamenua bajarapamonae pepëta. ²⁴ Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁵ Itsiata copiaya ayaicuenia navixaetaeya bejiobinë tsane. Mapanacuataje pejinavanapaevi apo nejumecovënëtsina tsane Dioso athëbëvetsica taneitorobinëcuenetsica. ²⁶ Pacuenia bajayata jemata itsi pamatacabi Noëpijinë ponapona, bajara icatsia jemata itsane pamatacabi xanë, Daxitajivi Pematapijinënë, jemata icatsia patsianicajë. ²⁷ Bajayata pamatacabi Noëpijinë ponapona, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noëpijinë ëpijamonae pinijibarcojavabelia barëjunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinë ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianë. Pijabonë ata exanapona. ²⁹ Itsiata baitsi jane pamatacabi Lotpijinë Sodomatomara vecuapitsapa, jemata athëbëvetsica pinijicuenia isotonë othopaica. Othopaica pitarutsiibotonëna. Nexata daxita Sodoma tomarapijivimi tajuatsti. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanë, Daxitajivi Pematapijinënë, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

³¹ Icatsia Jesús jumaitsi pijajivijavabelia:

—Pamatacabi xanë jemata patsianicajë, itsajivi ata pëtsa sivanajamatabëxaina mapanacuapijicueneje. Nexata pajivi athëbëyo bojumatatsia ecaya, perunaecujinaetsica, pëtsa sivanajamatabëxaina pijaboëñëalia pebobenaevanë pejutsinexa. Pajivi pijinia pijapabita nacuenebaponapona, pëtsa najamatabëxaina penaviatsinexa pijaboyabelia. ³² Panajamatabënapire pacuenia bajayata Lotpijinë pijavami exanatsi. Lotpijinë pijavami pesivanajamatabëxainaexae mapanacuapijicuene, napijivitaeyojopa. Nexata baja tëpa. ³³ Pajivi exanaponapona penatojitsipaecuenia, apo xainae tsane matacabi apo peverevereceajava. Itsiata baitsi jane pajivi xanë tajamatabëcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereceajava, jai Jesús pijajivijavabelia.

³⁴ Icatsia Jesús jumaitsi tajëvelia pijajivijavabelia:

—Xaniajanë pacuenia pacatsipaebijitsiatsi. Pamatacabi patsianicajë, bajarapameravi anijanëbeje majitanucaenabeje caecamata. Itsanë tane-

jumecovënëtsinē tsane. Itsanē apo tanejumecovënëtsinē tsane. Nexata tanejumecovënëtsinē pitsianatsi ángelnē. Apo tanejumecovënëtsinē copatabuatsianatsi. ³⁵ Anijavabeje pijinia najuacuabanucaeabeje caejavata. Nexata tanejumecovënëtsiva pitsianatsi. Apo tanejumecovënëtsiva copatanutsianatsi. ³⁶ Anijanēbeje pijinia najuanacuenebanucaeabeje pabita. Nexata tanejumecovënëtsinē pitsianatsi. Apo tanejumecovënëtsinē copatanutsianatsi, jai Jesús tajëvelia pijajivijavabelia.

³⁷ Jesús nexata pijajivi itsa jumetane bajarapacuenia Jesús pejumaitsi-java, bajarapamonae jumaitsi Jesúsjavabelia:

—Patajatuxanenē, ¿detsa jota bajarapacuenia yajuvënëpitsianatsi? jai Jesús pijajivi.

Nexata Jesús jumaitsi tajëvelia pijajivijavabelia:

—Pacuenia quequeremonae bepijia yapëtane itsajota petuxutsaebinē boca bajarajota penacaetuatsinexa, bajara pijinia pacuenia daxita taja-jivi bepijia yapëtaena tapatsijavatsica penacaetuatsinexa xanëjavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi

¹ Jesús pijajivi livaisi tsipaeba mapacueniaje Jesús pijajivi jamatabëcuenecueranaenejeva pevajëtabiabinexa Diosojavabelia. ² Nexata Jesús jumaitsi pijajivijavabelia:

—Tomarata ponapona jueznē. Bajaraponē pevetsinē jivi penaneconitsiaexanaecuene. Bajaraponē Dioso apo cujunavi. Jivi ata apo cujunavi. ³ Bajarapatomarata ponapona pamona pevecuatëpaevatsi. Bajara-pova ponabiaba jueznëjavabelia pejumaitsabiabinexa: “Naneconitsiaexanare ponē xanëjavaberena naneconita. Naneconitsiaexanare pacuenia caitoroba nijatuxanenē bajarapitsivi nenaneconitsiaexanaenexa,” pe-jaitsabiabinexa, bajarapova ponabiaba jueznëjavabelia. ⁴ Itsiata abaxë bajayajebi jueznē apo jamatabëcueneyavenonae bajarapova. Belia baja bexëa jueznē jejai. Nexata jueznē jamatabëjumaitsi: “Dioso picani apo cujunavinē. Jivi ata picani apo cujunavinē. ⁵ Itsiata mapovaje tanejamatabëitonotabiabixae, yavenonaenajë pacuenia nitorobabiaba. Nexata baja bajarapova matavëjëa apo patabiabinexa tsane xanëjavaberena tanecueranaeyaexanaenexa,” jamatabëjai jueznē, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabëcuenetsi jueznē, pibisiajamatabëcuenenē ata. Yavenona bajarapova asaëya pevajëcabiabixaetsi. ⁷ Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajëtabiabiana Diosojavabelia matabijebi, meravi yajava. Dioso cajena apo cuenenajematsi tsane itsa yavenonaena pijajivi. ⁸ Xaniajanë pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuene pexanaeyanivatsi. Pamatacabi xanë, Daxitajivi Pematapijinënë, icatsia patsianicajë, ¿caxitajarabianajë tsaja abaxë tanecopiaevetavanapevi? jai Jesús pijajivijavabelia.

Pacuenia itsanë fariseonë, itsanë impuestomatamo gobierno pejamatabëcuene pematamoyanijobinë, vajëtabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabëjumai tsabiabi: “Vaxaitsi cajena pexaniajamatabëcuenevitsi itsamonaevēcua. Itsamonae bitso nacavecuapibisiajamatabëcuenevi,” jamatabëjai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

¹⁰ —Anijanëbeje tsiabeje templobojavabetsia pevajëtsinexabeje Diosojavabelia. Caenë fariseonë. Itsanë gobierno pejamatabëcuene impuestomatamo pematamoyanijobabiabinë. ¹¹ Nexata fariseonë nuca. Fariseonë pevajëtsijavata Diosojavabelia, bitso bepexaniajamatabëcuenenë nataeya jumaitsi mapacueniaje: “Diosomë, pexaniajamatabëcuene carajutatsi. Tsipaji pacuenia itsamonae jamatabëcueneitsi tsenae, bajara xanë apo jamatabëcueneitsinë. Yamaxëitojorobiaya jivi apo tavecuanacobetoxotsinë. Apo tacujirubejenë cajena. Apo tajaitsinë itsava tajavavecua. Pacuenia maponëje gobierno pejamatabëcuene impuestomatamo pematamoyanijobabiabinë jamatabëcueneitsije, bajara xanë apo tajamatabëcueneitsinë. ¹² Caesemana canacujitsia, anijamatacabibeje, najamatabëcuenexaniavaetsiaya ponaponabiabajë xaenejevanë taxaejava tacavajëtsinexa xamëjavabelia. Daxita pacuene nacanabajë, diez xuabejeyajuvënëjava, caejava, xamëjavabelia carajutabiabatsi ofrendacuenia,” jai mapacueniaje fariseonë templobota pevajëtsijavata Diosojavabelia. ¹³ Nexata ponë gobierno pejamatabëcuene impuestomatamo pematamoyanijobabiabinë, pevajëtsijavata Diosojavabelia tajjyo nucalia piauraxae. Athëbëabetsia ata penavëyotsijava cujunava. Namëpabëbenuca pecobeta pejamatabëbëjaixae pibisiacuene pexanaeconi yabara. Nexata bajaraponë Diosojavabelia pevajëtsijavata jumaitsi mapacueniaje: “¡Diosomë, nitaxutotsoniataema! ¡Pibisiacuene cajena bitso xanë exanabiabajë!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Ponë gobierno pejamatabëcuene impuestomatamo pematamoyanijobabiabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeconimi. Nexata baja bajaraponë naviaata pijaboyabelia planeconijibinë. Ponë fariseonë, navajëtsi ata Diosojavabelia, itsiata pijaneconi yajava naviaata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaevēcua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaevēcua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

Pacuenia Jesús jumaitsi pejevaxijivixijavabelia yabara pelivaisi (Mt 19.13-15; Mr 10.13-16)

¹⁵ Itsamonae pejevaxijivixi tocapataponatsi Jesús pecobeta pejayataponae nexa. Nexata Jesús pijajivi itsa tane bajarapacueni, Jesús pijajivi

itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

¹⁶ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberenä. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonaë jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁷ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonaë jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonaë jumeabinejeva xaniavaetsia jumecovënëtsiana Dioso pejumelivaisi, bajarapamonaë jonena Dioso pijanacuayabetsia. Itsiata baitsi jane pamonaë Dioso pejumelivaisi jumeabinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevejëato, bitso pexainaenë, cuaicuaijai Jesúsjavabelia yabara pelivaisi

(Mt 19.16-30; Mr 10.17-31)

¹⁸ Pevëjëato, judiövi pevetsinë, yanijoba Jesúsjavabelia. Pevëjëato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicueene exanaenäj taxainaenexa matakabi apo pevereverecejave? jai pevëjëato.

¹⁹ Nexata Jesús jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ²⁰ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²¹ Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjëato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejava nexanaenexa. Canajere daxita nexainaejavami. Bajarapamatamomi tsicobetsanaenename bepejiobivi. Bjaraxuacujinae nepënaponaenename. Nexata bajarapacuenia xainaenename bitso nexainaecueene Dioso pijanacuatatsia, jai Jesús pevëjëatojavabelia.

²³ Bajarapacuenia Jesús itsa jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacueene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba. ²⁴ Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—¡Pamonae bitso daxitacuene pexainaeivi, tsiayapëbejetsi bitso penajamatabëcuene copatsinexa Diosojavabelia pecapanepaenexatsi Dioso pijanacuayabetsia! ²⁵ Pacuenia camello acuenebi pejonejava palutae-toitaxutovojotualia, bajara pijinia pacuenia bitso pexainaeivi acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexainaeivi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacueni jivi apo caëjëpaetsi pexanaenexa, bajarapacueni Dioso caëjëpatsi pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënjinanapatsi, jai Pedro.

²⁹⁻³⁰ Jesús nexata jumaitsi:

—Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexëjavabelia petëpaecujinae ata Dioso rajutsianatsi matacabi apo peverevereaejava, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Mr 10.32-34)

³¹ Jesús itsamonaevécua ëpijajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinënë, talivaisi tajëvelia yaquina. Pacuenia nexanaejitsia, daxita bajarapalivaisi bajayata profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita jane baja bajarapacueni Jerusalén tomaratalia netocopiapatsiana. ³² Itsanacuaverena pepatsivi pecobeyabelia necanajetsiana tanebeyaxuabinexa. Bajaramonae necanecaponaena. Nebijataena pibisiacuenia. Nesuabiana. ³³ Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³⁴ Itsiata Jesús pijajivi apo jumeyapëtae pajamatabëcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsëcënaenë, Jericó tomarapijinë, yabara pelivaisi

(Mt 20.29-34; Mr 10.46-52)

³⁵ Jesús imoxoyotanajetaruca Jericótomara. Nexata namuto muxuneneta eca bitso pitaxutotsëcënaenë, apo petaenë. Bajaraponë amoneya palata vajëcabiabeca jivijavabelia. ³⁶ Nexata bitso pitaxutotsëcënaenë itsa jumetane jivibitsaëtoxaneto pecuaicuaijai tsanajetarubenaeejava namutua, bajaraponë epajunateca.

—¿Detsa xua pajaitame? jai tsecae bajaraponë.

³⁷ Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo najetarucaje, jai jivi.

³⁸ Nexata pitaxutotsëcënaenë vavaji tsecae.

—¡Jesús, Davidpijinë pemomomë, nitaxutotsoniataema! jai tsecae bajaraponë.

³⁹ Nexata picani itsamona, Jesús pevajënaeya penajetarubenaevi, jumeitaveta bajaraponë pemoyanexa. Itsiata biji bitsoyo orijibia vavaji tsecae.

—¡Davidpijinë pemomomë, nitaxutotsoniataema! jai tsecae pitaxutotsëcënaenë.

⁴⁰ Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsëcënaenë, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsëcënaenëjavabelia:

⁴¹ —¿Detsa xua jitsipame tacaexanaenexa? jai Jesús.

Nexata bitso pitaxutotsëcënaenë jumaitsi Jesúsjavabelia:

—Jesús, jitsipajë taitaxutoxanepanaejava, jai pitaxutotsëcënaenë.

⁴² Jesús nexata jumaitsi pitaxutotsëcënaenëjavabelia:

—Itaxutoxanepaname rabaja. Tsipaji nesivajamatabëjumaitsimë mapacueniaje: “Jesús nitaxutoxanepanaeyaexanaena,” nesivajamatabëjamë, jai Jesús pitaxutotsëcënaenëjavabelia.

⁴³ Bajarapacuenia Jesús pejumaitsijavata, bitso pitaxutotsëcënaenëmi xaniavaetsia baja tane. Nexata bajaraponë napona baja Jesús pepëta. Bajaraponë namutua jumai tsanajetaruca Diosojavabelia:

—¡Diosomë, bitso pexaniacuene netoexaname! jai tsanajetaruca bajaraponë.

Pamona, ata tane bajaraponë pitaxutoxanepanaejava baja, daxita bajarapamona, ata Diosojavabelia jumai tsanajetarubena:

—¡Diosomë, bitso ayaijamatabëcuenenëmë! jai tsanajetarubena Diosojavabelia.

19

Pacuenia nabarëcuaicuaijabeje Jesúsbeje Zaqueobeje yabara pelivaisi

¹ Jesús najetaruca Jericó tomarajava. ² Jericó tomarata ponapona Zaqueovënënë. Bajaraponë gobierno pejamatabëcuene impuestomatamo pematamoyanijobabiabivi penamatacaitorobinë. Zaqueo bitso pexainaenë pexinaejava. ³ Nexata Zaqueo jamatabëtane Jesús. Itsiata apo caëjëpaetsi petaejava. Tsipaji Zaqueo petoyaeacënëyo. Jivibitsaëttoxaneto matatoyorotsia nubenatsi Jesús Zaqueo pevajënae. ⁴ Nexata Zaqueo cunjinaeponalia jivibitsaëttoxaneto pevajënaeyabelia Jesús peponaenamutua-belianexa. Junaya naejavatsia athëbëvetsica petaenucaenexa Jesús penajetarucaejava. ⁵ Nexata Jesús namutua itsa imoxoyotanajetaruca, itsa ponaeta Zaqueo athëbëyo nucaya, bajaraponaejavatsia Jesús naëcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianë, jai Jesús.

⁶ Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús. ⁷ Daxita pamonae Jesús matatoyorotisia najetarubenatsi, itsa tane bajarapacuenae, Jesús baracuaicuaijaitsi tsanajetarubena. Èpamonae najumaitsi tsanajetarubena Jesús yabara:

—Jesús raja naponaponaejitsia Zaqueo pijabota, caranata pibisiacuenae pexanaenë pijabota, najai tsanajetarubena bajarapamonae Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenë nejumetaema. Tsatsianejë namatajëpaeya taxainaijava tarajutsinexa bepejiobivijavabelia. Pamonae yamaxëitojorobiaya vecuanotajë tamatamoyanijobijavata impuestomatamo, bajarapamonae tocanaviabianajë. Nexata tayamaxëitojorobijamatabëcuene bajarapamonae rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.;

⁹ Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanexa Diosojavabelia. Tsi-paji baja nijamonae barëjumecovënëtame Dioso. Zaqueo, xamë Abrahampijinë pemomo amamë, abaxë picani Dioso apo catae Abrahampijinë pemomomëcuenia. Itsiata baitsi jane ajena baja Diosojavabelia nenajamatabëcuenecopatsixae, Dioso jane baja catane pepacuenae Abrahampijinë pemomomëcuenia. ¹⁰ Xanë, Daxitajivi Pematapijinënë, siva-patajopajë tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

Oro palatanëanë, diez ponëbeje, yabara pelivaisi

(Mt 25.14-30)

¹¹ Zaqueo pijabota itsamonae namuxunaevetena Jesús petsipaebilivaisi Zaqueojavabelia. Pamonae namuxunaevetena, jamatabëcuenenavëxaniabiaya jamatabëjumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copijopaena jane baja daxita Dioso pijajivi pevetsijava,” jamatabëjai tsenae bajarapamonae. Bajarapacuenia jamatabëjumai tsenae tsipaji baja Jerusaléntomara imoxoyo ecalia Jesús pepatsinexa. ¹² Bajaraxuata Jesús livaisi tsipaeba bajarapamonaejavabelia. Jesús jumaimatabëcuenenavëxaniabiaya jamatabëjumai tsenae: “Imoxoyo rabaja ecaliatsi mapacueniaje:

—Petuxanenë ponapona pijanacuata. Nexata pepo nacuaevetsinë tonajumeitorobarenatsi tajënacuaeverena. Petonajumeitorobijumetsirena jumaitsirena mapacueniaje: “Ponaename maberenaje nacua nevetsinënexa tacaexanaenexa nijanacua nevetsinexa. Bajaraxuacujinae naviatsiaremelia nijanacua jane baja nevetsinexa,” jaitsirena petonajumeitorobijumetsirena. ¹³ Nexata petuxanenë peponaevajënae, junata pijajivi, diez ponëbeje. Nexata petuxanenë pijajivi evetsiaexana pijapalatanëanë, oronëanë, bitso penamatamotsinëanë. Caenë canacujitsia caepalatanë evetsiaexanapona. Nexata petuxanenë pijajivi jumaitsi pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayajiva tsaponae tsane tajapalata,” jai petuxanenë pijajivijavabelia. Bajaraxuacujinae pona jane baja. ¹⁴ Itsiata

baitsi jane pevetsinacuatanexa pejinavanapaevi, bitso itoyatsi petuxanenë. Nexata bajarapamonae petuxanenë pecovëvelia itsamonaie itorobalia, itsajotalia petuxanenë nacua pevetsinënexa exanaejitsiatsi, bajarajotalia pejumaitsinexa: “Apo pajitsipaenë bajaraponë patanevetsinënexa patajanacuata,” pejainexa petuxanenë yabara. ¹⁵ Itsiata baitsi jane petuxanenë pijanacua baja pevetsinënexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenë pepatsicujinaerena, junata icatsia pijajivi peyapëtaenexa jane baja pacuenia caenë canacujitsia pijapalatanëanë pijajivi tocanacuenebatsi pecovëta. ¹⁶ Copiaya pepatsinë jumaiti pijatuxanenëjavabelia: “Tajatuxanenë, nijapalatanë, taneevetsiaexanaenëmë, catopitsapa baja diez ponëbeje. Nexata baja daxitata once ponëbeje,” jai. ¹⁷ Nacuaevevtsinë nexata jumaiti pijajivitonëjavabelia: “Xanepana rabaja. Xaniavaetsia netoetaponaponame. Tsiquirijavayo ata xaniavaetsia netoetaponaponame,” jai nacuaevevtsinë pijajivitonëjavabelia. ¹⁸ Icatsia itsanë pijatuxanenë pijapalatanë petoevtsinë pata. Nexata bajaraponë jumaiti: “Tajatuxanenë, nijapalatanë, taneevetsiaexanaenëmë, catopitsapa baja cinco ponëbeje pematatsënëa,” jai. ¹⁹ Nacuaevevtsinë nexata jumaiti pijajivitonëjavabelia: “Xamë icatsia cinco patomarabeje netoetaponaponame,” jai nacuaevevtsinë pijajivitonëjavabelia. ²⁰ Nexata icatsia itsanë pijatuxanenë pijapalatanë petoevtsinë pata. Jumaiti pijatuxanenëjavabelia: “Tajatuxanenë, mara nijapalatanëje, taneevetsiaexanaenëmë. Pañuelopanayota yamatacëtsiaya catoevetatsi. ²¹ Bajarapacuenia catoevetatsi tsipaji cacujunavatsi. Nijamatabëcuenesaënë. Xamë apo itaxutobejiobiataeyabiabimë nijajivi, pamonae catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonsinexa apo neubiaexanaejava ata,” jai pijatuxanenë pijapalatanë petoevtsinë. ²² Nexata nacuaevevtsinë jumaiti pijajivitonëjavabelia: “iAcujirubejemë xamë! Bijiaya netoetame. Naneconitame bajarapacuenia tanejumaitsijavamë yabara. Xamë baja cajena yapëtaneme tajamatabëcuenesaënëjava tajajava yabara. Pacuenia itorobabiabajë tajajivi tanetopitsinexa apo tajajava ata, yapëtaneme baja. Pacuenia ata itorobabiabajë tanetonotsinexa apo taubiaexanaejava ata, yapëtaneme baja. ²³ Xanepanaejitsipa xamë banco pevetsivi itsa netocanacuenebiaexanaejitsipame tajapalatanë. Nexata banco pevetsivi aeconoxae tajapalatanë netocanaviatsipa. Nexata pecacovaetsijamatabëcuene itsajava palata netoyajavacnaviatsipa,” jai nacuaevevtsinë pijajivitonëjavabelia. ²⁴ Nexata nacuaevevtsinë jumaiti pijajivijavabelia: “Tajapalatanë panetovecuapire maponëje. Nexata juya parajure ponë xaniavaetsia netoeveta tajapalatanë. Bajaraponë xaniavaetsia netocanacueneba. Nexata baja pematatsënëa diez papalatanëbeje netopitsapaeyaexana. Nexata taevetsiaexanaenëta once ponëbeje,” jai nacuaevevtsinë. ²⁵ Nexata nacuaevevtsinë pijajivi jumaiti pijatuxanenëjavabelia: “Patajatuxanenë, bajaraponë xaina baja ayajava. ¿Detsa xuajitsia rajutsijitsiamë pematatsënëa?” jai pijajivi. ²⁶ Nexata nacuaevevtsinë jumaiti pijajivijavabelia: “Pacatsipaebatsi rabaja. Pajivi baja ayajava xaina, pematatsënëa icatsia itsajava rajutsianatsi.

Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaë, pamonaë picani apo jitsipae mapanacua taevetsijavaje, bajarapamonae pacaponaremena maberena je patanevecuaverebiabinexamë taitabëta,” jai nacuaevevetsinë pijajivijavabelia, jai Jesús livaisi petsipaebijavata Zaqueo pijabota.

*Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Jn 12.12-19)*

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. ²⁹ Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatamarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatamarayobeje, nexata itoroba pijajivitonëbeje bajarapatamarayobejevabelia. ³⁰ Jesús jumaitsi pijajivitonëbejevabelia:

—Paponarebeje mapatomarayo ecaliajevabelia. Itsa rabaja papsiaremeliabeje, pataenutsianamebeje burro pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. ³¹ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona,” pajamëbeje tsane, jai Jesús pijajivitonëbejevabelia.

³² Nexata Jesús pijajivitonëbeje liabeje. Pacuenia Jesús jumaitsi, bajarapacuenia caxitajarabanucabeje burro. ³³ Nexata itsa isinabeje, burro pexainaevi jumaitssibeje:

—¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonëbeje jumaitssibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaibeje.

³⁵ Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya. ³⁶ Jesús itsa yanajetaruca burrota, panamutovelial Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanë namutua tsivajënaeyerequejebaponatsi yayataeya pecopiapitsinexatsi. ³⁷ Patsutojumata olivonaenë nubena, bajarapatsutojavatsica namuto namatonocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaëtoxaneto, Jesús pijajivi yajava, vavajai tsanajetarubenaë. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubenaë bajarapamonae.

Bajarapacuenia vavajai tsanajetarubenaë tsipaji bajarapamonae cunjirutaeyabiaba Jesús Dioso pesaëta ayaicuene pexanaponaejavanë. ³⁸ Bajarapamonae jumai tsanajetarubenaë Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaëyaja jinavanapa daxita pamonaë athëbëtatsia jinavanapa! ¡Pinijicuene rabaja exana Dioso! jai tsanajetarubenaë namutua daxita Jesús pijajivi.

³⁹ Nexata fariseovi najetarubena bajarapajivibitsaëtoxaneto tuatu-ajëta. Nexata fariseovi jumaiti Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

⁴⁰ Nexata Jesús jumaiti fariseovijavabelia:

—Xaniajanë pacuenia pacatsipaebijitsiatsi. Mapamonaaje moya itsa najetarubenaejitsipa, nexata juya ibotonë vavajai tsenae tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaiti Jerusalén tomarapijivi yabara mapacueni-aje:

—jBitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacueni jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacueni.

⁴³ Nexata tocopiapsiansi pibisiamatacabi. Pijavajabitsaë tsimaxëpatsiansi. Nexata pijatomara matatoyorotsia foto yacaranatsia cuerutsiansi petsimaxënubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsiansi pijavajabitsaë. ⁴⁴ Nexata irabetsica topenetsiansi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo boca tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinetsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinu, yabara pelivaisi

(Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalialia. Nexata templobota Jesús tane pecanajetabiabivi, pecomuacabiabivinu. Nexata daxita bajarapamona Jesús pitsapaeyaexana templobovecua.

⁴⁶ Jesús jumaiti bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaiti mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa, panacaetuatabi-abame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipae-babiaba bajarapatemplobota. Nexata sacerdotevi penamatacaitorobivi, judíovi pecujarubivinu, tomaraevetsivinu, najumejaita picani Jesús pebeyaxuabinoxatsi. ⁴⁸ Itsiata acuenebi Jesús pebeyaxuabijavatsi. Tsi-paji Jesús itsacueneneconi ata apo xainae. Daxitajivi yaiyatanetsi. Jesús jivi petsipaebilivaisianë xaniavaetsia namuxunaevetabiabatsi.

20

Pacuenia Jesús caëjëpatsi daxitacuene pexanaenexa yabara pelivaisi
(Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanalivaisi jivi pecapanepaelivaisinexatsi pibisiacue ne pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivinua, judíovi pijaancianovinua. ² Nexata bajarapamonae jumaitsi Jesúsjavabelia:

—Panetsipaebare cajena. ¿Jipatsa pejamatabëcueneta pecanajetabiabivi, pecomuacabiabivinua, capitsapame mapatemplobovecuaje? jai.

³ Jesús nexata jumaitsi bajarapamonaejavabelia:

—Xanë copiaya caejumeyo pacayanijobianatsi patanejumecanaviatsinexamë. ⁴ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

⁵ Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsi paetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisianë?” nacajai tsipae. ⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabeyejebinexa. Bajarapacuenia nacabeyejebijitsipa tsipaji daxitajivi Juanpijinë yabara sivajamatabëjumaitsi: “Juanpijinë raja pepacue ne Diosojumepaebinëmi,” sivajamatabëjai, najai sacerdotevi penamatacaitorobivi, judíovi pecujarubivinua, judíovi pijaancianovinua.

⁷ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabapon aenexa, jai.

⁸ Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba tacapit sap aenexa bajarapamonae templobovecua, jai Jesús.

Pacuenia exana pijamatabëcuenebejevi, itsanë pijauvacabo petoevetsivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaebijava jivijavabelia. Jumaitsi macpacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae itsamonae evetsiaexana pijauvacabo. Jumaitsi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajënacuyabelia pona bajayajebi pijajibitsarucaenexa.

¹⁰ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobes naviatsiaexanaliansi. ¹¹ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliansi. ¹² Itsiata uvabacabo pexainaenë icatsia

itoroba itsanë pijajivitonë. Icatsia bajaraponë ata tomatajorobabiatsi. Uvabacabopënyabelia xuabatsi.

¹³ Nexata uvabacabo pexainaenë jamatabëjumaitsi: “¿Detsa nexata xua exanaenajë? Itorobianajë cajena taxënato, tasivanë. Itsa raeta itorobianajë taxënato, bajarapamonae netoyaiyataena,” jamatabëjai uvabacabo pexainaenë. ¹⁴ Itsiata baiatsi jane uvabacabo petoevetsivitsi, uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje itsamatacabi paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ¹⁵ Nexata uvabacabo pexainaenë pexënato ata tovaetabatsi. Caponaliatsi bajarapauvabacabo pepënyabelia. Bararapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? ¹⁶ Uvabacabo raja pexainaenë, patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaitsijava, bajarapamonae jumaitsi:

—¡Dioso pëtsa copata bajarapacuenia pexanaenexa paxanëjavaberena! jai bajarapamonae.

¹⁷ Nexata Jesús asaëyata naëcota bajarapamonaejavabelia. Jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia,

jai tajëvelia Dioso pejumelivaisibaxutota xanë yabara.

’Bajarapacuenia tajëvelia Dioso pejumelivaisibaxutota itsa jumaitsi, judíovi penamatacaitorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

¹⁸ Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuene naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

Pacuenia Jesús jamatabëcueneëjëbiaya yanijobatsi impuestomatamo pematomatsijava yabara pelivaisi
(Mt 22.15-22; Mr 12.13-17)

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeypêtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabêvaetabatsi. Itsiata bajarapamonae abaxê apo vaetabitsi. Tsipaji cujunava jivi. ²⁰ Nexata itsamatacabi bajarapamonae itorobarena pijajivi yaenebi-aya petonamuxunaevetsinexatsi Jesús. Nexata bajarapamonae pija-jivi bepexaniajamatabêcuenevi itajara jinavanapa Jesúsjavata. Bajara-pamonae namuxunaevetena Jesús jivi livaisi petsipaebijavata. Biji-aya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuaevetsinêjavabelia peneconitsinexatsi. ²¹ Nexata bajarapamonae jamatabêcuenejëbiaya jumaitsi Jesúsjavabelia mapacueniaje:

—Jesús, pacayapêtanetsi jivi pepacuene pexaniajailivaisi netsipaebi-ava. Daxitajivi, ricovi ata, bepejiojivi ata, najêpaeya yayataeya pexaniajailivaisi tsipaebiabame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinêjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabêcuenejëbiaya Jesúsjavabelia.

²³ Itsiata baitsi jane Jesús jamatabêcueneypêtane bajarapamonae jamatabêcuenejëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabêcuenejëbame? ²⁴ Panetsitajêre palatanêyo, jai Jesús.

Nexata bajarapamonae tsitajêtatsi palatanêyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevênênu, ruca mapapalatanêyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinê pitabara, pevênênu, jai.

²⁵ Nexata Jesús jumaitsi bajarapamonaejavabelia:

—Nexata parajutabianame Romanonacua pepo pevetsinê pija-ava. Parajutabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabêcuenejëbiaya peyanijobijavatsi. Caranata bajarapamonae jamatabêcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petêpacujinae icatsia piasaêjavanexa yabara pelivaisi

(Mt 22.23-33; Mr 12.18-27)

²⁷ Saduceovi saicaya itsalivaisi xaina. Bajarapamonae jamatabêcuenenavêxaniabiaya jumai tsabiabi: “Petêpaevi rabaja petêpacujinae, apo asaê icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

28 —Jesús, Moiséspijinē bajayata vajanacatoyaquinaelivaisi, jumaitsi mapacueniaje: “Ponē pematapijinē pepua penacojiobinē baja, itsa tēpa pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. 29 Nexata jinavanapa ēnacaemonaē, siete ponēbeje. Pepo matapijinē copiata nacojioba. Nexata bajaraponē pijava vecuatēpa pexi xainaenejeva. 30 Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. 31 Nexata icatsia itsanē tuatujēmatapijinē pita bajarapova. Bajara icatsia ponē ata tēpa pexi xainaenejeva bajarapovajavabelia. Bajarapacuenia daxita baja siete ponēbeje, nacaemonaemi, pitaponae ata bajarapova, itsiata itsanē ata pexi apo xinae bajarapovajavabelia. Bajarapacuenia daxita siete ponēmibeje tēpa. Verevereca baja. 32 Belia baja bajarapova ata tēpa. 33 “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapamonaeyajuvēnēnē, pijava tsane bajarapova bajarapamatacabi? Daxita pamonaē siete ponēmibeje, nacaemonaemi, pitapona picani bajarapovami, jai saduceovi Jesúsjavabelia.

34 Nexata Jesús jumaitsi saduceovijavabelia:

—Aeconoxae mapanacuataje pebijivi, petiriavi ata, nacojiobapona. Itsamonae pexēnatoyonē pexainaevi pebijavabelia canajetapona petonacojiobinexatsi. 35 Itsiata baitsi jane pamonaē Dioso itapetatsi, apo pevereverecaenacuatsia jinavanapaena. Bajarapamonae petēpaecujinae, Dioso icatsia asaēyaexanaenatsi. Bajarapamonae bajarapanacuatsia apo nacojiobi baja tsane. Bajarajotatsia itsajivi ata pexēnatoyo apo canajetsi tsane pebijavabelia petonacojiobinexatsi. 36 Bajarapamonae acuenebi tsane petēpaejava. Tsipaji bajarapamonae jinavanapaena athēbētatsia pacuenia ángelevi jinavanapa. Bajarapamonae baja Dioso pexi tsane. Tsipaji baja petēpaecujinae Dioso icatsia asaēyaexanaenatsi. 37 Moiséspijinē bajayata yaquina pacuenia Dioso tsipaebatsi tsiquirinaemēyo petajueyecaecotiajavaverena. Nexata Moiséspijinē peyaquinaelivaisita, jumaitsi pacuenia Dioso icatsia asaēyaexanaejitsia petēpaevimi. Nexata Moiséspijinē nacayapētaeyaxana Dioso icatsia piasaēyaexanaejavanexa petēpaevimi. Tsipaji baja Abraham peputēpae, Isaac ata baja peputēpae, Jacob ata baja peputēpae, bajarapamonae yabara bajayata Moiséspijinē peyaquinaelivaisita jumaitsi mapacueniaje: “Xanē rabaja Abraham pijaDiosonē, Isaac ata pijaDiosonē, Jacob ata pijaDiosonē,” jai baja cajena Dioso bajayata Moiséspijinējavabelia. 38 Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Daxita petēpaevi Dioso cajena apo tsitatēpaetsi, jai Jesús saduceovijavabelia.

39 Nexata judíovi pecujarubivi jumaitsi Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

40 Bajaraxuacujinae saduceovi cjunava baja icatsia peyanijobijava Jesúsjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaitsi judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatocuene? Jivi saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijinë pemomo tsane,” jai tsabiabi. ⁴² Davidpijinë bajayata tajëvelia pejumaitsijava Cristo yabara Salmosvënëbaxutota, jumaitsi mapacueniaje:

Dioso jumaitsi tajatuxanenëjavabelia: “Ecare abaxë tacujuanenia.

⁴³ Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai Salmosvënëbaxutota Davidpijinë bajayata pejumaitsijava Cristo yabara.

⁴⁴ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tshipaji baja cajena Cristo saicaya Dioso pexënato, nayabarajai Jesús judíovi pecujarubivijavabelia, judíovi pecujarubivi pecanaëjëtsinexa Cristo Dioso pexënatocuene.

Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxë daxitajivi namuxunaevetatsi Jesús petsipaebilivaisi, Jesús jumaitsi pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebapona panejumecovënëtsiyaniva. Bajarapamonae jitsipabiaba tomara tuatuajëjava piapiajavanë penaxatabiabanapanexa jivi peyayataenexatsi. Jitsipabiabanua bitso yayiyataeya pebajacobinexatsi callejava. Bajarapamonae itsa najoneyabiaba judíovi penacetuatabiabilonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyayataevitsi penaenexa petsinubijavanëta.

⁴⁷ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobcovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús pijajivijavabelia judíovi pecujarubivi yabara.

21

Pacuenia ofrenda rajuta Diosojavabelia pamona pevecuatëpaevatsi yabara pelivaisi

(Mr 12.41-44)

¹ Templobota Jesús cobetane bitso pexainaevi ayaijava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia. ² Bajarajota Jesús cobetanenua pamona

pevecuatêpaevatsi, bepejiobiva, penajejava anijapalatanëyobeje. Bajarapova najia anijapalatanëyobeje piamatamobinëyobeje. ³ Jesús nexata jumaitsi pijajivijavabelia:

—Xaniajanê pacuenia pacatsipaebijitsiatsi. Mapovaje pamona pevecuatêpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. ⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajëvelia tsipaeba pijajivi itsamatacabi itsanacuapijivi pexuabijavanexatsica templobo yabara pelivaisi

(Mt 24.1-2; Mr 13.1-2)

⁵ Jerusalén tomarata templobo itabëtsiaya exaneta pexaniaviriai-botonëta. Jivi Diosojavabelia ofrendacuenia perajutsijavanê ata, templobota itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarëcuaiçuaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajivijavabelia mapacueniaje:

⁶—Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonê caeiboto ata pejumavereca apo boca tsane, jai Jesús pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mt 24.3-28; Mr 13.3-23)

⁷ Jesús pijajivi jumaitsi:

—Patajatuxanenê, pajitsipajê patanetsipaebijavamê patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajê itsa copiapatsijitsia xua jumaitsimê templobo yabara? jai Jesús pijajivi.

⁸ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papeçayamaxëitojorobinexa. Tsipaji raja peyamaxëitojorobinexa, ayaibitsaëto patsiana bexanê itajara tsane. Bajarapamonae najumetsënëtsiaya jumai tsane: “Xanê raja Cristonê, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. ⁹ Vajabitsaë pexanaejava imoxoyonacuanëjava, tajënacuanëjava ata, pavënëlvivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuajebaxê apo pevererecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰ Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuae peveverecaevajënae, peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. ¹¹ Ira najëabiana ayaicuenia nacuanëjava. Nacuanëjava ayaijaniboxaneto najetarucaena, piavitaneuene yajava. Itaboxotatsia pitsapaena piayaijunavicuene, pinijicuene pexanaejavanë yajava, jai Jesús pijajivijavabelia.

¹² Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenie pecopiajopaevajënaeya patajajivixaemë, pacataicaena. Pacabejiobiaexanaena. Pacacaponena judíovi penacaeuatabibonëjavabelia papecanconitsinexa. Penaneconitsivi pejebabiabibota pacajebiana. Patajajivixaemë, pacanubiana presidentevi pitabarata, nacuaevecsivi pitabarata ata. ¹³ Nexata bajarajota xanë talivaisi, pexanialivaisi, patsipaebianame xaniavaetsia.

¹⁴ Nexata pëtsa tajëvelia panatsinajamatabëxainame pacuenia panayajivicuaicuaijamëjitsia bajarapamonaejavabelia. ¹⁵ Tsipaji paepatota panayajivicuaicuaijamëjitsia, bitso peyapëtaevicuenia pacacuaicuaiyaexanaenatsi. Nexata caenë ata panijavajabitsaenë

apo caëjëpaetsi tsane papecajumecanaviatsinexa. ¹⁶ Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevecsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacacanajetsiana. Nexata pacayajuvënëbeyaxuabiana. ¹⁷ Daxitajivi pacaitoya tsabiabi tsane patajajivixaemë. ¹⁸ Itsiata baitsi jane pepo panejamatabëcuenelivaisi bajarapamonae apo itsacueniabi tsane. ¹⁹ Itsa pajamatabëcuenesaemë tsavanapae tsane, nexata matacabi apo peveverecaevajava paxainaename, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

²⁰ Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara peveverecaenexa,” pajamatabëjamë tsane. ²¹ Nexata bajarapamatacabi Judea nacuata pejinavanapaevi, itsa tane bajarapacuenie, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecua. Itsamonae pijinia, Jerusalén tomarapijivi, bajarapamatacabi Jerusalén tomarapënëyabelia itsa jinavanapa, apo benaviabirena pijaboyaberena. ²² Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota. ²³ Bajarapavajabitsaëmatacabi bitso ayaicuenia bejiobi tsane mapanacuapijivije. ¡Papetiriavi penacuetoyacotajinavanapa, bitso bejiobi tsane bajarapamatacabi bitso nabejiobitsiaya peponaexae tsane! ¡Papetiriavi ata mitopaenacuetoxi

isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. ²⁴ Bajarapavajabitsaëmatacabi itsanacuaverena Jerusalén tomarapijivi vajabitsaë tsimaxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapijivimi, caponaenatsi itsanacuanëjavabelia. Nexata bajaraxuacujinae itsanacuanëpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42-44; Mr 13.24-37)

²⁵ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Matacabipijijuametotatsia, xua naitajëtsiana, meravipijijuametotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cujunaviana. Daxita nacuanëpijivi bitso najunaviacaena itsa jumetaena manuaeneta pinijimalataca bitso penajumetsijava. ²⁶ Daxitanacuanëjava bitso jivi najamatabëxainaena itsa taena piayaicuene petocopiajopaejavatsi. Nexata daxita nacuanëjava jivi tēpajoneyabiabiana pecajunavi. Daxita xua athëbëtatsia rubena, najëbiana. Xaniavaetsia apo rubenae tsane. ²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenivenaecotia yajavapatsianicajë. ²⁸ Itsa pataename pecopiajopæjava bajarapacuenie, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabebiobia exanaebiavamivecua, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higeranae, itsavirianaenë ata. ³⁰ Itsa baja imoxoyo pevajënae tsaaponae vai pejonejavanexa, bajaraponaenë pejanabaxu juva. Nexata bajarapacuenia payapëtaneme vai baja imoxoyo pevajënae pejonejavanexa. ³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaename imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae

jane baja vereverecaena. ³³ “Itaboxo, ira yajava, tsitecaena daxitamatacabijavabelianexa,” jamatabējai ata tsane itsamonaē, itsiata jamatabēcuenenavēxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsēnētšinē tsane. Nexata xua yabara pacatsipaebatsi, pacuenia baja najumecapanepaeya jumaitsinē, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pētsa panajamatabēxainame pibisiacuene paneexanaenexa, paneaitajibinexa ata. Pētsa pasivana-jamatabēxainame maēpanacuapijijamatabēcuenenje. Belia bajarapacuenia paneexanavanapaejavata, jemata copiapatsipa tapatsimatacab-inexatsica. ³⁵ Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanē tapatsimatacabinexatsica, jemata daxitanacuanējava copiapatsiana. ³⁶ Bajaraxuata nayajivitaeya pajinavanapaename. Daxitamatabi canacujitsia panayajivivajēcabiabianame Diosojavabelia paneajamatabēcuenesaē tsaponanexa, panevecuapanepaponaenexa daxita papibisiacuene pacatocopiapataponaena. Daxita bajarapapibisiacuene panevecuapanepaecujinae ata, pavajēcabiabianame Diosojavabelia. Nexata pamatacabi xanē, Daxitajivi Pematapijinēnē, patsianicajē, papeca-cājēpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata patsutojumata olivonaenē nubena, bajarapatsutojumata Jesús majitabiaba. ³⁸ Daxita bajayacunua canacujitsia jivi patabiaba templobota penamuxunaevetabibinexatsi Jesús petsipaebilivaisi.

22

Pacuenia Judas pona Jesús pijavajabitsaē pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajēnae pejonenexa pascuavēnēfiesta. Bajarapafiestamatacabi jivi baxane levadurata matajērēabinejeva pexanaepan.

² Sacerdotevi penamatacaitorobivi, judíovi pecujarubivinua, najumejaita pacuenia picani bajarapamonae Jesús beyaxuabijitsiatsi. Itsiata abaxē bajarapamonae Jesús apo beyaxuabitsi. Tsipaji bajarapamonae jivi cujunava.

³ Nexata dovathi tsijamatabējunuatsi Judas. Judas, ponē vēnērubatsi itsavēnē, Iscariote. Bajaraponē Jesús pijajivi, doce ponēbejeyajuvēnēnē.

⁴ Judas yapētane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarēcuaicuajainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata bajarapamonae barēya. Rajutsiapaebatsi palata. ⁶ Jējai Judas. Nexata Judas Jesús naitaxutocaevetsia ponapona. Paepatota Judas toyapēxanepanatsi, perajutsinexa jane baja Jesús bajarapamonae pecobeyabelia. Bajarpacuenia Judas najamatabēxaina pexanaenexa itsajota bitso jivi apo navitsi.

Pacuenia Jesús barēnabane pijajivi pecopiarutsinabani baja pebeyaxu-abivajēnaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavēnēfiesta, pafiestamatacabi jivi baxane levadurata matajērēabinejeva pexanaepan. Bajarapamatacabi ovejaxi babia pexaenexa pascua fiestamatacabi. ⁸ Nexata Jesús itoroba pijajivitonēbeje, Pedrobeje Juanbeje. Jesús jumaitsi pijajivitonēbejejavabelia:

—Paponarebeje paneexanaenexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonēbejejavabelia.

⁹ Nexata Pedrobeje Juanbeje jumaitsidebeje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xaenatsi? jaibeje.

¹⁰ Jesús nexata jumaitsi pijajivitonēbejejavabelia:

—Tomarabelia itsa papatsianamebeje, pacaxitajarabi-anamebeje mera canalito pecanajetarucaenē. Bajaraponē papēnanajetarucaenamebeje. Pabota bajaraponē joneyojopaena, bajarapabota panapatsianamebeje. ¹¹ Nexata pajumaitsimēbeje tsane bajarapabo pexainaenējavabelia: “Vajanacacujarubinē raja Jesús jumaitsi: ‘¿Detsa jota pēnēyatuucutsibo eca, pabota tajajivi barēxaejitsianē xua jivi baxane pascua fiestamatacabi?’ jai raja Jesús,” pajamēbeje tsane bajarapabo pexainaenējavabelia. ¹² Nexata athēbēabetsia anijairabeje pexainaebojavata, pacatsitajētsianabeje. Bajarapaboēnēta, athēbēyotsia paira, ayaiēnētatuatujē tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonēbejejavabelia.

¹³ Nexata jane baja bajaraponēbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascua fiestamatacabi, daxita Jesús pijajivi pebarēxaenexa, bajaraponēbeje exanabeje jane baja.

¹⁴ Itsa baja copiajopa pexaepatotanexa, Jesús, pijajivi doce ponēbeje, apóstolevi, yajava, eca mesa muxuneneta. ¹⁵ Nexata Jesús jumaitsi pijajivijavabelia:

—Tatēpaevajēnae bitso jitsipajē patacayajavaxaejava mapapascua fiestamatacabi pexaejavaje. ¹⁶ Xaniajanē pacuenia pacatsipaebijitsiatsi. Matavējēa rabaja mapanacuataje apo xaenē tsane pascua fiestamatacabi pexaejava. Matapania daxita patajajivimē Dioso itsa pacapanepaena panijaneconivecua, bajara jane icatsia matapania taxa Dioso pijanacuataatsia xaenajē pascua fiestamatacabi pexaejava, jai Jesús pijajivijavabelia.

¹⁷ Nexata Jesús copavēnējavata yapita pijajivi pebarēpaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamē mapacopataje.

¹⁸ Xaniajanē pacuenia pacatsipaebijitsiatsi. Matavējēa rabaja mapanacuataje apo apaenē tsane uvacuaira. Matapania itsa copiajopaena daxita Dioso pijajivi pevetsimatacabi, apaenajē icatsia, jai Jesús pijajivijavabelia.

¹⁹ Bajaraxuacujinae Jesús pita panbē. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabianameje patanenajamatabënapitabiabinexamë, jai Jesús pijajivijavabelia.

²⁰ Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëpaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeconimivecua. Mapacapaejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponëjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje. ²² Xanë, Daxitajivi Pematapijinë, tēpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

—¿De meta ponë vaxaitsiyajuvënënë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënënë nacavecuaayaijamatabëcuenenë? najai Jesús pijajivi.

²⁵ Nexata Jesús jumaitsi pijajivijavabelia:

—Nacuaeavetsivi pacuenia jamatabëpacaitoroba panetoexanaenexa, ajumesaëya pacaitorobabiaba papijajivimë, bajarapamonae pevetsinacuanëjava panejnavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayanacuaeavetsinë, bitso pexaniacuene nacatoexanabiaba,” panejainexa. ²⁶ Pëtsa paxamë bajarapamonae cuenejēpaeya bepaayaijamatabëcuenevimë panataneme. Ponë raja peneta paxamëyajuvënënë daxita paxamë pacavecuaayaijamatabëcuenenë, bajaraponë peneta daxitajivi bepijajivitonëcuenia yavenonaena. ²⁷ Mapanacuata petuxanenë itsa xaeyeca mesata, petuxanenë jamatabëcueneevetatsi pijajivitonë. Tsipaji petuxanenë ayaijamatabëcuenenë pijajivitonë matatonenetsia. Itsiata xanë bajarapitsijamatabëcuene apo xainanë. Ponaxonajë paxamëjavata daxita paxamë bepanijajivitonëncuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivixaemë, pacaexana. Bajarapacuenia pacaexanae ata

tsane, itsiata apo panenavecuacopabimë tsane. Tsitecaeya paneyajavajinavanapame. ²⁹ Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa. ³⁰ Nexata paxamë pacamatabëcuenecaëjëpaena taevetsinacuatatsia tajamesata panenanabaninexa, panenamatavejëaapaenexanua. Paenaename jueznëcuenia pananeconitsiaexanaenexa pijaneconi pexainaevi. Nexata pananeconitsiaexanaename Israelpijinëmi pexi, doce ponëmibeje, pemomoxiyajuvënëvi, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

(Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso cajamatabëcueneëjëbiana tanenavecuacopatsinexamë. Pacuenia arrozxainaenë arrozxu jëaba pesi pevecuaxuabinexa, bajara pijinia pacuenia pecaxuabinexa xanëvecua cajamatabëcueneëjëbiana dovathi. ³² Itsiata baitsi jane catovajëtatsi Diosojavabelia necopatsiyanima tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponaename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayajavatëpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiabivajënaeya nayavajunuaxainaename tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

Pacuenia baja itsa imoxoyo pevajënae Jesús pebeyaxuabinexatsi, tsi-paeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeyanima doro, palata ata, zapato ata. ¿Bajarapamatacabi panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenejava ata bajarapamatacabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada. ³⁷ Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconitsiaexanaenatsi bepibisiacuene pexanaenëcuenia,” jai

tajëvelia xanë yabara Diosojumelivaisibaxutota. Nexata bajarapacuenen imoxoyo baja pevajënae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenë, mara nijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajëta Diosojavabelia Getsemanívenëjavata yabara pelivaisi

(Mt 26.36-46; Mr 14.32-42)

³⁹ Jesús pitsapa bovecua. Pacuenia ponabiaba, bajarapacuenia icatsia pona petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. ⁴⁰ Jesús pijajivi itsa barëpata bajarapatsutojumabelia, Jesús jumaitsi pijajivijavabelia:

—Pacajamatabëcueneëjëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyaniya patanejumecovënëtsijavamë, jai Jesús.

⁴¹ Nexata Jesús pijajivi vecuanatixilia bejamatabëcuene treinta metro. Jesús nucajunua pematabacabëta pevajëtaponaenexa Diosojavabelia.

⁴² Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajio-bicueneta. Itsa jitsipame, necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsiname, jai Jesús pevajëtsijavata Diosojavabelia.

⁴³ Nexata Jesús athëbëpijiángel tsitanaitajëtatsi pejamatabëcuene asaëyaexanaenexatsi. ⁴⁴ Jesús pebeyaxuabijavanexatsi yabara, bitso natsinajamatabëxaina. Nexata Jesús bitso orijibia asaëyata vajëtapona Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

⁴⁵ Jesús pevajëtsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabëxainaexa, cuerana. ⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaponare Diosojavabelia, dovathi pejamatabëcueneta pacajamatabëcueneëjëbi ata paneajamatabëcuenesaënexa, jai Jesús pijajivijavabelia.

Pacuenia Jesús vaetabatsi pijavajabitsaë yabara pelivaisi

(Mt 26.47-56; Mr 14.43-50; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuajai tsanuca pijajivijavabelia. Nexata bajarapaepatota jivi ayaibitsaëttoxaneto, Jesús petsimaxëponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, matacanajetaruca bajarapamonae. Nexata Judas najetabalia Jesúsjavabelia. Itabaratsutsuniaya bajacobatsi.

⁴⁸ Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxitajivi Pematapijinënë, tanecanajetsinexamë tajavajabitsaë pecobeyabeliaje? jai Jesús.

⁴⁹ Jesús pijajivi itsa tane pacuenia Jesús exanaejitsiatsi, nexata bajara-pamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujanenia pamuxuyoroto. ⁵¹ Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyoroyatataba. Jesús baja muxuyororuta icatsia bajaraponë. ⁵² Pamonaë Jesús tsimaxëpatatsi, itsamonaë sacerdotevi penamatacaitorobivi, itsamonaë templobopijipolicíavi penamatacaitorobivi, itsamonaë judíovi pijaancianovi. Bajarapamonaë caponaëjitsiatsilia Jesús. Nexata Jesús jumaitsi bajarapamonaëjavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁵³ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piajamatabëcuene itaquiriyaexanaenë, papecaitorobixae, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonaë pecovëvelia tajiyo pënanajetaruca. ⁵⁵ Nexata pabota Jesús capatatsi, bajarajota, panabo tuatuajëta, vajabitsaë isoto itajuruteta. Bajarapamonaë isoto matatoyorotsia ena. Pedro nexata naitaxutocaevetsiaya naeca bajarapamonaëjavata. ⁵⁶ Nexata bajarapabota penacuenebiva, Pedro itsa taeyetatsi penanonopecaëjavata isoto muxuneneta, naitaxutobabatsia asaëya taenucatsi. Nexata itsamonaëjavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesússta naponaponaje. Tsipaji rabaja bajaraponë ata Galilea nacuapíjinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitisjavata, vacara baja fiaba. ⁶¹ Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabēnapitajaraba Jesús pejumaitisjavatsi: “Pedro, ajena, mapameravitaje, vacara pefiabivajēnaeya nayavajunuaxainaename tajajivitonēcuenemē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaijavatsi Jesús, najamatabēnapitajaraba Pedro. ⁶² Nexata baja Pedro pitsapalia bopanaxabovēcua. Pinijicuenia nua.

Pacuenia Jesús pijavajabitsaē capocaponatsi yabara pelivaisi
(Mt 26.67-68; Mr 14.65)

⁶³ Pamonae Jesús vaetabatsi, capocaponatsi. Itabaratsaquiababeponatsi pecobethaitonēta. ⁶⁴ Papaēbērēpanata itaxutocētatsi. Pitaxutocētsicujinaetsi icatsia itabaratsaquiababeponatsi pecobethaitonēta. Nexata bajarapamonae jumai tsaponae Jesúsjavabelia: —iVēnējonare ponē caitabaratsaquiababa! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.59-66; Mr 14.55-64; Jn 18.19-24)

⁶⁶ Ajena baja matacabi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumaiti Jesúsjavabelia:

⁶⁷—Panetsipaebare. ¿Xamē tsabaja rovia Cristomē, athēbēvetsica Dioso pecaitorobinētsica jivi necapanepaenēnexa? jai bajarapamonae.

Nexata Jesús jumaiti bajarapamonaejavabelia:

—“Xanē rabaja Cristonē, athēbēvetsica Dioso taneitorobinētsica jivi tacapanepaenexa,” pacajai atatsi tsipae, itsiata apo panejumecovēnētismē tsipae. ⁶⁸ Itsalivaisiyo pacayanijobi atatsi tsipae, itsiata apo panejumecanaviatsimē tsipae. Apo panecopatsimēnua tsipae. ⁶⁹ Itsiata baitsi jane tavajēnaeyabelia xanē, Daxitajivi Pematapijinēnē, ecaenajē taxa Dioso pecujuanenia patanajuaevetsinexabeje daxitacuene. Bajaraponē pecaējēpaenētsi daxitajamatabēcuene, jai Jesús bajarapamonaejavabelia.

⁷⁰Nexata daxita bajarapamonae jumaiti Jesúsjavabelia:

—¿Xamē tsabaja Dioso pexēnatomē? jai bajarapamonae.

Nexata Jesús jumaiti bajarapamonaejavabelia:

—Jājā, xanē rabaja pacuenia panejumaitsimē. Bajaraponēnē, jai Jesús.

⁷¹Nexata bajarapamonae najumaiti:

—Ajibi rabaja abaxē vajeavetaponaejava jivi neconitsiaya vajanaatsipaebaeponaenexa pacuene yabara naneconitsiaexanaejitsiatsi maponēje. Vaxaitsi rabaja vajacuata jumetanetsi pacuenia maponēje cuaicuaijai Dioso apo pejitsipaecuenia. Tsipaji beDioso pexēnato natane, najai bajarapamonae.

23

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Jn 18.28-38)

¹ Daxita judíovi pijaancianovi nonobapuna. Sacerdotevi penamat-
acaitorobivi ata nonobapuna. Judíovi pecujarubivi ata nonobapuna.
Nexata bajarapamonae Jesús caponaliatsi itsaboyabelia, Judeanacua
pevetsinè Pilato pijaboyabelia. ² Bajarajota Pilato pitabarata bajarapa-
monae neconitsiaya jumaitsi Jesús yabara:

—Mara ponèje naneconita. Tshipaji muxubijiapenetapona jivi pi-
anaepanaenexa nacuaevetsivijavabelia. Paneitavetaponanua pata-
matamotsiyaniwa Romanonacua pepo pevetsinè pejamatabècueneta im-
puestomatamo pataneyanijobijava. Jumai tsaponaenua: “Xanè raja
Cristonè, nacua taevetsinè,” jai tsaponae maponèje, jai bajarapamonae
Jesús yabara neconitsiaya Pilatojavabelia.

³ Nexata Pilato jumaitsi Jesúsjavabelia:

—¿Xamè tsaja judíovi pepo nevetsinè? jai.

Nexata Jesús jumaitsi Pilatojavabelia:

—Jājā, xanè rabaja pacuenia nejumaitsimè, jai Jesús Pilatojavabelia.

⁴ Pilato nexata jumaitsi sacerdotevi penamatacaitorobivijavabelia,
jivi ayaibitsaètoxanetojavabelia ata:

—Apo caxitajarabinè cajena itsacujiruneconi ata pexainaejava
maponèje, paneconi yabara naneconitsijitsia, jai Pilato.

⁵ Itsiata bajarapamonae ajumesaè. Orijiibia neconitsia jumaitsi Jesús
yabara:

—Bajaraponè daxita Judea nacuapijivi muxubijiapenetapona bajara-
pamonae pianaepanaenexa Judeanacua pevetsivijavabelia. Taxuxuaba
cajena bajaraponè bajarapacuenè pexanaejava Galilea nacuata. Nexata
maberena ataje bajarapacuenia icatsia exanapona, jai bajarapamonae
Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonae peneconitsijavatsi Jesús, nexata
Pilato jumaitsi bajarapamonaejavabelia:

—¿Matsa ponèje Jesús, Galilea nacuapijinèje? jai Pilato.

⁷ Nexata bajarapamonae tsipaeba Pilatojavabelia Jesús
Galilea nacuapijinècuene. Nexata Pilato itoroba pijajivi Jesús
pecaponaenexatsilia Herodesjavabelia. Tshipaji Herodes Galileanacua
pevetsinè. Bajarapamatacabi Herodes ponapona Jerusalén
tomarata. ⁸ Nexata Herodes itsa tane Jesús, barèya. Tshipaji

Herodes vènèlivaisitaeyabiaba Dioso pesaèta Jesús pinijicuene
pexanaponaejavanè. Nexata Jesús pinijicuene pexanaejava Dioso
pesaèta jamatabètane Herodes. ⁹ Nexata Herodes ayaicuenia
yanijobapona Jesúsjavabelia. Itsiata Jesús apo jumepitsi caejumeyo
ata. ¹⁰ Bajarajota nubena sacerdotevi penamatacaitorobivi, judíovi
pecujarubivi yajava. Bajarapamonae ayaijumeta neconitaponatsi
Jesús Herodesjavabelia. ¹¹ Nexata Herodes, pijajivi yajava, Jesús
capocaponatsi. Bitso pexaniajava, xua nacuaevetsinè banaxatata,
bajaraxua Jesús quenetsiataeya xatatatsi. Bajarapacuenia Jesús
quenetsiataeya xatatatsi pepo nacuaevetsinècuena petaenexatsi.
Bajaraxuacujinae icatsia canaviabarenatsi Pilatojavaberena.

¹² Pilatobeje Herodesbeje naitoyabeje picani. Itsiata bajarapamatacabi
nabarajamatabècuenexanepanabeje. Naxaniababeje baja.

Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-26; Mr 15.6-15; Jn 18.39-19.16)

¹³ Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata. ¹⁴ Nexata Pilato jumaitsi bajarapamonaejavabelia Jesús yabara:

—Paxamé panetocapatame maponėje. “Mara ponėje naneconita. Tsipaji muxubijiapenetapona jivi pianaepanaenexa nacuaeavetsivijavabelia,” panejamé. Itsiata baitsi jane xanē picani tajacuata yanijobajē xaniavaetsia paneitabēta. Nexata xua yabara paneconitame, ajibi picani. Maponėje itsacujiruneconi ata apo xainae, paneconi yabara naneconitsijitsia. ¹⁵ Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponėje, paneconi yabara beyaxuabijitsiatsi. ¹⁶ Nexata tajajivi itorobianajē bajaraponē saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajē, jai Pilato bajarapamonaejavabelia.

¹⁷ Caevai canacujitsia, pascuavēnē fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pilato copatabiaba ponē jivi vajētatsi pecopatsinexa. Nexata bajarapacuenia copatabiaba jivi pesivajamatabēcuene xanepanaenexatsi. ¹⁸ Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonaе caecuenia vavajai Jesús yabara. Bajarapamonaе pevavajaijavata, Jesús yabara jumaitsi Pilatojavabelia mapacueniaje:

—¡Majane ponē beyaxuareje! ¡Barrabás jane panetocapitsapare! jai bajarapamonaе.

¹⁹ Bajaraponē Barrabás Jesús pevajēnaeya bajarapatomarata barēnabia gobierno pijajivijavabelia. Nexata Barrabás jivitonē beyaxuaba. Bajaraxuata naneconitsiaponapona penaneconitsivi pejebabiabibota. ²⁰ Pilato picani jamatabēcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. ²¹ Itsiata baitsi jane bajarapamonaе orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonaе Pilatojavabelia.

²² Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuene exana maponėje? Apo caxitajarabinē cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajē bajaraponē saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajē peponaenexa baja, jai Pilato.

²³ Itsiata bajarapamonaе ajumesaē. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonaе Pilatojavabelia.

Nexata bajarapamonaе, sacerdotevi penamatacaitorobivi yajava, bitso pevavajaitsaponaexae, belia baja Pilato jejai. ²⁴ Nexata baja Pilato tocopata pacuenia bajarapamonaе vajētatsi. ²⁵ Nexata Pilato itoroba

pijajivi Barrabás, ponë jivitonë beyaxuaba, pecapitsapaenexatsi pepit-sapaenexa baja penaneconitsivi pejebabiabibovecua. Caranata Jesús, pianeconijibinë, pebeyaxuabinexatsi Pilato itoroba pijajivi.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Jn 19.17-27)

²⁶ Vajabitsaë itsa caponaliatsi Jesús cruzajavabelia pecobematabi-abarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabarutsijitsiatsi, petocaponenexa. Nexata bajarapacruza Simón tovëtacaranajetaruca Jesús pecovëya.

²⁷ Jesús pënanajetarubenatsi, jivi ayaibitsaëtoxaneto. Bajarapamonaeya-juvënëvi, petiriavi ayaibitsaëto, Jesús bitso pënuayababuataponatsi ayai-jumeta. ²⁸ Nexata Jesús napënëyorota. Jumaitsi bajarapapetiriavijavabelia:

—Paxamë petiriavi, pajerusalén tomarapijivimë, pëtsa panepënuayabame xanë. Paxamë jane panatsinuema. Panexi ata patsinuema. ²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso itsa nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejitsipa pinijibotsutonë itsa nacamatacënëbajarabijitsipa,” najai tsane jivi. ³¹ Xanë itsacujiruneconi apo xinae atanë, nebejiobiaexanaena itsa necobematabiabarutsiana cruzajavabelia. Nexata pamonaë pibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabi, jai Jesús bajarapapetiriavijavabelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje pijamatabëcuenebejenëbeje vajabitsaë caponatsibeje Jesús peyajav-abeyaxuabinexatsibeje. ³³ Itsa baja capaliatsi Jivimatasipavënë tsutojavabelia, nexata cruzajavabelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia. ³⁴ Jesús baja cruzajavabelia pepuacobematabiabarutsi, jumaitsi paxa Diosojavabelia:

—Axa, mapamonaëje itaxutotsoniataema. Vecuaxuare paneconi xaina pibisiacuene taneexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaë, pamonaë Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. ³⁵ Bajarajota daxitajivi taenubena. Judiovi pevetsivi Jesús capocaponatsi. Bajarapamonaë capocaponaëya jumaitsi Jesús yabara:

—Ëitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai pepacuene Cristo, Dios

athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsiatsi piajatuvinora piapaenexa Jesús. ³⁷ Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latínjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. ³⁹ Itsanë piagamatabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavabelia.

⁴⁰ Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucae penajuananeconitsinëbejejavabelia:

—¿Dioso tsaja apo cununavimë netëpaenexa, cacobematabiabi ata nijaneconi yabara mapacueniaje? ⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexaibeje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

⁴³ Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyjavaponaponaename paraísojavatatsia, jai Jesús bajaraponëjavabelia.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Jn 19.28-30)

⁴⁴ Jesús baja itsa tēpaejitsia, matonejeepatota, daxita nacuanëjavaitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. ⁴⁵ Paepatota Jesús tēpanajereca, bajarapaepatota templobo ënëtuatuajëalia pënëyatuucutarutsipana, ayaipa-paëbërëpana, tuatuajëatsica titititicaica. ⁴⁶ Nexata Jesús ayaijumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinë, vajabitsaë pijacapítán, itsa tane daxita bajarapacueni, bajaraponë Diosojavabelia jumaitsi:

—Diosomë, bitso ayaijamatabëcuenenëmë. Xaniajai tsaena baja. Maponë tēpaje, planeconijibinë, jai vajabitsaë pijacapítán.

⁴⁸ Daxita pajivibitsaëtóxaneto taenubena pacuenia Jesús jumaliverevereca, bajarapamonae bitso najamatabëxainaeya naviaba pijabonëjavabelia. ⁴⁹ Daxita pamonaë Jesús peyapëtaevitsi, pebijivi, petiriavi ata, pamonaë Galilea nacuaverena pënaponatsi, tajiyojavaverena taenubena, petaenexa Jesús pebeyaxuabijavatsi.

Pacuenia Jesús petēpaenē buata tsi ibovajualia yabara pelivaisi
(Mt 27.57-61; Mr 15.42-47; Jn 19.38-42)

⁵⁰ Jerusalén tomarata ponapona José, Arimatea tomarapijinē. Bajaraponē pexaniajamatabēcuenenē, xaniavaetsia peponaponaenē Dioso pitabarata. Bajaraponē judíovi pevetsinē. ⁵¹ José copiaevetaponapona pecopiajopaejava pamatacabi caenē Dioso evetsijitsia daxita pijajivi mapanacuataje. Nexata José apo jamatabēcuenejēpae pacuenia judíovi exana Jesúsjavabelia. ⁵² José nexata lia nacuaevetsinē Pilatojavabelia. Vajēta petocopsinexatsi pemēthētsinexa petēpaenē Jesús. ⁵³ Bajaraxuacujinae José cruzajavavetsica pitsica Jesús petēpaenē. Daxitanēreca mataquionaeya matacacēba pexaniaviria piapiasábanapanata. Nexata cajena itsajota José iboitapajanitojavata pinijiibovaju toexanabuatatsi petēpaevi pebuataponaenexa, bajarapaibovajualia buata Jesús petēpaenē. Bajarapavajualia abaxē itsajiviyo ata petēpaejiviyo José apo buatsi. ⁵⁴ Pamatacabi José bajarapacuenia vajēta Pilatojavabelia Jesús petēpaenē pemēthētsinexa, bajarapamatacabi judíovi penacuenebija banacuenevereta baja pecopiajonevajēnaeya penacueraevetsimat-acabinexa. Nexata paepatota José ibovajualia buata Jesús petēpaenē, bajarapaepatota José baja tocopiapataponatsi penacueraevetsimat-acabinexa.

⁵⁵ Papetiriavi Jesús pēnaponatsi Galilea nacuaverena, bajarapapetiriavi tajiyo José pecovēya najetarubena. Nexata bajarapapetiriavi tane Jesús petēpaenē José pebuatsijava bajarapaibovajualia. ⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petēpaenē peperabēexabinexa. Nexata abaxē bajarapapetiriavi nacueraeveta judíovi penacueraevetsimat-acabita pacuenia itorobatsi Dioso Moiséspijinēta bajayata penajumecopatsilivaisi.

24

Pacuenia Jesús petēpaecujinae icatsia asaē yabara pelivaisi
(Mt 28.1-10; Mr 16.1-8; Jn 20.1-10)

¹ Judíovi baja penacueraevetsimat-cabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petēpaenē pebuatsiibovajutsijavabelia. Patuxujuvijava xaniavaeta Jesús petēpaenē peperabēexabinexa, caponalia Jesús petēpaenē peperabēexabinexa jane baja picani. Itsapetiriavi yajava ponalia peyanabinexatsi. ² Itsa baja palia, nexata bajarapapetiriavi tane Jesús petēpaenē pebuatsiibovajutsi peyavēpaacatsiibopanaxanetomi petixitanutsijavalia. ³ Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petēpaenē, pepo petuxanenē Jesús. ⁴ Nexata bajarapapetiriavi bitso jamatabēcuenenajunaviaca. Apo yapētae pacuenia exanaejitsia. Bajarajota nexata bajarapapetiriavi taenuta anijanēbeje ángelnēbeje. Bajaraponēbeje penaxatatsijavabeje nivenivena bitso. ⁵ Bajarapapetiriavi bitso cujanava bajarapaángelnēbeje. Nexata pecajunavi pematabacabēta irataeya bobena. Nexata bajarapaángelnēbeje jumaitsi petiriavijavabelia:

—¿Detsa xuajitsia petëpaenë pebuatsijavatatsi, pajaitame? Bajara-
ponë asaë baja icatsia. ⁶ Bajaraponë majotaje ajibi baja tsaru-
cae. Dioso rabaja icatsia asaëyaexanatsi. Panajamatabënapire pacue-
nia pacotsipaeba Galilea nacuata pamatacabi abaxë asaë tsapon-
aponae. ⁷ Bajaraponë baja cajena tajëvelia pacajumaitsi: “Xanë, Daxi-
tajivi Pematapijinënë, necanajetsiana pibisiajatabëcuenevi pecobeya-
belia. Nexata bajarapamonae cruzajavabelia necobematabiabarut-
siana tanebeyaxuabinexa. Itsiata baitsi jane tanebeyaxuabicujinae,
acueyabi matacabita, icatsia asaënë tsane,” pacajai baja cajena tajëvelia
Jesús ita abaxë pamatacabi pacayajavaponapona, jai ángelnëbeje petiri-
avijavabelia.

⁸ Nexata bajarapapetiriavi najamatabënapita pacuenia Jesús
tajëvelia jumaitsi. ⁹ Nexata baja bajarapapetiriavi naviabarena Jesús
petëpaenë pebuatsiibovajutsijavaverena. Nexata bajarapapetiriavi
tsipaeba daxita bajarapacune yabara once ponëbeje, Jesús
pijaapóstolevijavabelia. Tsipaebanua daxita itsamonae Jesús
pijajivijavabelia ata. ¹⁰ Bajarapapetiriaviyajuvenëvi itsava Mariävënëva.
Bajarapova Magdala tomarapijiva. Itsava pijinia Juanavënëva.
Itsava pijinia icatsia Mariävënëva. Bajarapova Santiago pena.
Itsapetiriavi yajava tsipaeba bajarapacune yabara apóstolevijavabelia.
¹¹ Bajarapapetiriavi apóstolevijavabelia tsipaebi ata bajarapacune
yabara, itsiata apóstolevi apo jumexaniataetsi. Apóstolevi saya
bajarapalivaisi yabara jamatabëjumaitsi: “Saya meta bajarapapetiriavi
pijacuata exana bajarapalivaisi,” jamatabëjai apóstolevi.

¹² Itsiata baitsi jane Pedro pitsapalia bovecua. Nexata cujinaejinalia
Jesús petëpaenë pebuatsiibovajutsijavabelia. Nexata Pedro bajarapaibo-
vajualia ita naëcolia, taeyejeba pebobenaejava bajarajota daxitanëreca
Jesús mataquionaeya pematacacëbipanamitsireca. Nexata baja Pedro
naviata boyaberena. Najamatabëxaina bajarapacune yabara.

*Pacuenia Jesús petëpaecujinae icatsia ita asaë, pijajivitonëbeje
pëcaxitajarabaxuaba, Emaús tomarabelia peponaenëbeje, yabara pelivaisi
(Mr 16.12-13)*

¹³ Pamatacabi bajarapapetiriavi tane ángelnëbeje, bajarapamatacabi
Jesús pijajivitonëbeje Jerusalén tomaravelia naropotabeje. Ponabeje
Emaús tomarabelia. Bajarapatomara eca once pakilómetrobeje Jerusalén
tomaravecua. ¹⁴ Bajaraponëbeje baracuaicuaijabeje tsanajetarucacae
daxita pacuene copiapata. ¹⁵ Itsa abaxë bajarapalivaisi cuaiicuaijai
tsanucaponaebeje, Jesús pëcaxitajarabalia. Nexata Jesús muxunenianaje-
taruca bajaraponëbeje. ¹⁶ Bajaraponëbeje tae atabeje Jesús, itsiata apo
yapëtaebeje Jesúsucune. ¹⁷ Nexata Jesús yanijoba bajaraponëbejejavabelia.
Jesús jumaitsi:

—¿Detsa pitsicune pabaracuaicuaijamëbeje tsanucaponae
namutua? ¿Detsa xuajitsia bepajamatabëcuenejibimëbeje? jai Jesús
bajaraponëbejejavabelia.

¹⁸ Bajaraponëbeje itsanë pevënë Cleofas. Nexata Cleofas jumaitsi
Jesúsjavabelia:

—Daxitajivi baja cajena yapëtane pacuene copiapata Jerusalén
tomarata mapamatacabitaje. ¿Xamë tsaja caenëmë apo nijanayapëtae
bajarapacune, naponaponae atamë bajarapatomarata? jai Cleofas
caranata Jesúsjavabelia.

19 Nexata Jesús jumaitsi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitsi Jesúsjavabelia:

—Jesúspijinë raja, Nazaret tomarapijinëmi, profetanëmi. Pinijicuene exanapona Dioso pesaëta. Bitso xaniavaetsia jivi pexanialivaisi tsi-paebapona. Nexata daxitajivi sivajamatabëcuenebarëya bajaraponëmi. Dioso ata sivajamatabëcuenebarëyatsi. ²⁰ Nexata sacerdotevi penamat-acaitorobivi, vajanacaevetsivi yajava, canajetatsi Jesúspijinëmi. Canajetaxuabatsi Jesúspijinë cruzajavabelia pecobematabiabarutsinexatsi pebeyaxuabinoxatsi. ²¹ Paxanë picani bajaraponëmi yabara pajamatabëjumaitsinë: “Bajaraponë nacavecuacapitsapaena itsanacuaverena pepatsivi, pamonaë apo judíovi, vajanacayanacuaevevtsijavavecua pepitsapaenexa,” pajamatabëjanë tsavanapae picani Jesúspijinë yabara. Nexata Jesúspijinë pebeyaxuabicujinaetsi, ajena baja xaina acueyabi pamatacabibeje. ²² Paxanëyajuvënëvi, petiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petëpaenë bebuatsiibovajutsijavabelia. ²³ Itsiata apo caxitajarababuatsi bajarajota Jesús petëpaenë. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnëbeje. Ángelnëbeje pina nexata jumaitsidebeje petiriavijavabelia: “Jesús rabaja asaë tsaponaponae icatsia,” jai pina. ²⁴ Nexata itsamonae paxanëjuvënëvi pona Jesús petëpaenë bebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petëpaenë apo taeyabuatsi, jaibeje Jesúsjavabelia Emaús tomarabelia peponaenëbeje.

²⁵ Nexata Jesús jumaitsi bajaraponëbejejavabelia:

—¡Paxamëbeje saya paneajamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë. ²⁶ Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta pecaenexa, nayabarajai Jesús bajaraponëbejejavabelia.

²⁷ Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaitsi Jesús yabara.

²⁸ Itsa baja imoxoyotanajetarubena patomarata bajaraponëbeje pat-sijitsiabeje, Jesús itajara rovia bepeponaejitsia bajaraponëbejevecua. ²⁹ Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsidebeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. ³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje.
³¹ Bajarajota matapania bajaraponëbeje yapëtanebeje Jesúsucue. Itsi-
 ata baitsi jane bajarajota vecuacaevatsibeje Jesús. Apo taebeje baja
 matavëjëa.

³² Nexata bajaraponëbeje najumaitsibeje:

—Nanutua vajanacavanavajunu paebanucaponaejavatabeje
 pacuenia jumaitsi Diosojumelivaisibaxutota, bitso muxunaja-
 matabëcuenebarëyatsibeje, najaiibeje bajaraponëbeje.

³³ Nexata bajarajota bepijia naropotabeje Emaús tomaravecua. Navi-
 atabeje baja Jerusalén tomarabelia. Nexata Jerusalén tomarabelia itsa
 patabeje, caxitajarababeje penacaetuatsijavata once ponëbeje apóstolevi,
 itsamonae yajava Jesús pijajivi. ³⁴ Nexata penacaetuatsivi jumaitsi
 bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponae.
 Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje ba-
 jarapamonaejavabelia pacuenia namutoepatualia pëcaxinatsibeje Jesús.
 Tsipaebabejenua pacuenia matapania yapëtanebeje Jesúsucue, pitabëta
 itsa epatsënëquejeba panbë.

*Pacuenia Jesús petëpaecujinae tsitanaitajëta pijajivijavabelia yabara pe-
 livaisi*

(Mt 28.16-20; Mr 16.14-18; Jn 20.19-23)

³⁶ Ponëbeje Emaús tomaraverena patabeje, tsipaebabeje Jesús pijajivi-
 javabelia pacuenia tanebeje Jesús Emaús tomaratalia. Nexata bajara-
 paepatota Jesús tsitanaitajëta pijajivijavabelia. Jesús jemata nuca pijajivi
 tuatujëta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae
 Jesús yabara.

³⁸ Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota
 pajumeaebame icatsia tasaëjava? ³⁹ Panecobetaema. Tataxubeje ata
 pataema. Xanë rabaja maje. Panejayabare. Paneyorobarena xani-
 avaetsia. Petëpaenëmi raja peneta pejumape avijibi. Asijibinua. Apo
 perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaitsi mapacueniaje, nacobeitajëta pijajivijavabelia.
 Nataxuitajëta yajava. ⁴¹ Jesús pijajivi bitso tsitapexaniacuenetsi. It-
 siata baitsi jane Jesús pijajivi abaxë apo jumexaniatae xaniavaetsia
 Jesúsucue. Jesús nexata jumaitsi pijajivijavabelia:

—¿Paxainame tsabaja itsacueniejavayo patanerajutsinexamë
 taxaenexa? jai Jesús.

⁴² Nexata Jesús pijajivi rajutatsi pesebidujuaijavayo, jabëperiyo yajava.
⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús
 jumaitsi pijajivijavabelia:

—Mapacuene taneexanaejavanexa yabaraje, pacatsipaebabiabatsi
 baja cajena tajëvelia pamatacabi abaxë pacayajavaponaponatsi. “Pacue-
 nia bajayata tajëvelia xanë yabara jumaitsi Moiséspijinë peyaquinae-
 baxutota, Diosojumepaebivimi profetavi peyaquinaebaxutota ata,
 Salmosvënëbaxutota ata, bajarapacuenia netocopiapatsiana,” pacajaitsi
 tsabiabi baja cajena pamatacabi abaxë pacayajavaponaponatsi.

Daxita rabaja bajarapacuene netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara. ⁴⁶ Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matababita, icatsia Dioso niasaëyaexanaejitsia tatëpaejavavecu. ⁴⁷ Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaenename daxitajivi penajamatabëcuenepënëyorotsinexa Diosojavabelia, pibisiacuene pexanaenecomimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaenename daxitanacuanëjava. ⁴⁸ Paxamë rabaja pataneme daxita pacuene netocopiapata. Nexata jivi patsipaebaponaenename daxita bajarapacuene yabara. ⁴⁹ Espiritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatabëjonenexa. Abaxë pajinavanapaenename majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuene paneexanaponaenexa, paponanename jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

(Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso. ⁵¹ Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—¡Vajatuxanenë bitso ayajamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomara-belia. ⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacuenejavayo ata mapanacuataje, Cristo baja cajena ponapona athëbëtsia. Cristo raja paxa Dioso pejamatabëcuenelivaisiitajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena.

² Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. ³ Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneitayota pexaniajailivaisita. ⁵ Pacuenia pecotia itayota piitaquirijavata, bajarapacuenia Cristo petsipaebilivaisita jivi jamatabëcueneitayota. Nexata dovathi, jivi piagamatabëcuene itaquiriyaexanaenë, apo cajëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaebinxaxa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. ⁸ Juan raja jivi apo pejamatabëcueneitayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. ⁹ Bajaraponë Cristo jamatabëcueneitayotsiana daxitajivi. Bajaraponë xaniajai jivi pejamatabëcueneitayotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocuene. ¹² Itsiata itsamonae jumecovënëtsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuene, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatujëta. Bajaraponë vënërubatsi Jesús. Paxanë payapëtaniji Cristo ayaijamatabëcueneenëcuene. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuaijai ëpexaniajailivaisi. ¹⁵ Bajaraxuata Juan,

Jesús itsa vajunupaebanajetaruca jivijavabelia, jumai tsanajetaruca mapacueniaje:

—Baja rajane maponë yabara pacajumaitsitsije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetaruca Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuenenacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. ¹⁸ Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuaponaponabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipabanajetaruca jivijavabelia yabara pelivaisi

(Mt 3.11-12; Mr 1.7-8; Lc 3.15-17)

¹⁹ Judíovi, Jerusalén tomarapijivi, Juanjavabelia itoroba sacerdotevi, itsamonae templo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso peccaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia roviafia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia patayapëtaenexa ponëcuenëmë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tatumaitsijavanexa, bajayatami tajëvelia yaquina profeta Isaíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵—Itsa xamë apo Cristomë, apo Elíaspijinëmënu, apo profetanëmënu, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamona.

²⁶Juan nexata jumaitsi:

—Xanë saya bautisabaponajë ëmerata. Itsiata paxamë tuatuajëta ponapona ponë apo payapëtaemë. ²⁷Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaevavabelia Jesús yabara.

²⁸Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹Fariseovi pijajivi Juan peyanijobicujinaetsi peyapëtaenexatsi ponëcuenene, meravia pitsijavata, Juan taetaba Jesús penajetarucæjaya Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepijaovejayo tsane. Pacuenia jivi ovejayo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacævetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuenene pexanaeconimi. ³⁰Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatabëcuenenë bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucæje, jai Juan jivijavabelia Jesús penajetarucæjavata.

³²Icatsia Juan jumaitsi jivijavabelia Jesús yabara:

—Xanë taniji Espiritu Santo perunaevavatsica athëbëvetsica beucucuto. Nexata tsmatanacopatsicatsi bajaraponë. ³³Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espiritu Santo perunaevavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espiritu Santo,” nejai baja cajena copiata Dioso. ³⁴Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

Pamona copiyaya Jesús yajavaponapona yabara pelivaisi

³⁵Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶Itsa Juan tane Jesús pexenetanajetarucæjavatsi, nexata Juan jumaitsi pijajivitonëbejevavabelia:

—Pataemabeje. Mara ponë najetarucæje, Dioso bepijaovejayo tsane, jai Juan pijajivitonëbejevavabelia Jesús pebeyaxuabijavanexatsi yabara, tsipaji Jesús tocopiaatsijitsiatsi pacuenia Dioso tocopatatsi.

³⁷Nexata Juan pijajivitonëbeje itsa jumetanebeje bajarapacuenia Juan pejumaitisjava, Juan pijajivitonëmibeje pënaponabeje Jesús. ³⁸Jesús napënëyorotojopa. Taenucajopa. Yanijoba bajaraponëbejevavabelia.

—¿Detsa xua pajaitamebeje? jai Jesús.

Nexata bajaraponëbeje jumaitsibeje:

—Petuxanenë, ¿detsa jota ecame? jaibeje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoeapatota. Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponaponae Jesúsjavata.

⁴⁰ Bajaraponëbejeyajuvënë itsanë pevënë Andrés. Andrés raja Simón Pedro pejuyapijinë. ⁴¹ Andrés nexata bepimia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonae pijajumeta: “Mesías,” itsa jai, mapajumetaje pejumaitsi: “Cristo, ponë athëbëvetsica Dioso itorobijitsiatsica jivi pecapanepaenexa,” pejajume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitsi: “Pedro,” pejajume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuyabelia. Jesús nexata peponaevajënae, caxitajarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje. ⁴⁵ Felipe nexata pona pejaitsinexa Natanael. Itsa baja Felipe caxitajaraba, jumaitsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponae, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucejavatsi, nexata Jesús Natanael yabara jumaitsi pijajivijavabelia:

—Mara ponë najetaruceje, Israelpijinë pemomo, Dioso pitabarata xaniavaetsia peponaponaenë. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higuerae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacua pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higuerae bëxëpanata,” tacajaixae, jamatabëjumaitsimë xanë yabara: “Maçonëje Dioso cajena pexënato,” jamatabëjamë. Xamë taename bajarapacuenene matatoxenetsia Dioso pesaëta pinijicuenene taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenene jane baja neyapëtaename Dioso pexënatocuenenë, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaängelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinënëjavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinë nacasaba yabara pelivaisi

¹ Jesús pebarëcuaicuajicujinae Natanael, acueyabi pamatacabibecujinae, Caná tomarapijinë exana penacasabifistanexa. Galilea nacuata eca Canátomara. Jesús pena naponapona fiesta pexanaejavata. ² Nexata Jesús pijajivi nabarëjunatatsi penacasabifistajavabelia. Jesús nexata pijajivi nabarëpata penacasabifistajavabelia. ³ Fiesta pexanaenë itsa baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatojavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajarapacuenene? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonë. Cae canalitota mera caëjëpaponna bejamatabëcuenene quince pagalónbeje. Nexata bajarapacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabanivajënae. ⁷ Jesús nexata jumaitsi mesa pevetsivijavabelia:

—Pavënëbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piupiyorotoxijava copabapona.

⁸ Nexata Jesús jumaitsi bajarapamonaejavabelia:

—Papuare tsiquirirayo. Patocaponaremilia fiesta pevetsinë pepajainexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinë pajane bajarapora, merami pexanaevinora. Bajaraponë abaxë apo yapëtae itsaverena capitsapa bajarapavinora. Itsiata mesa pevetsivi yapëtane mera pevënëbixae bajarapacanalitonëta.

Pepajanícujinae vinora, fiesta pevetsinē junata fiesta pexanaenē, ponē pejananacasabinē. ¹⁰ Nexata fiesta pevetsinē jumaitsi pejananacasabinējavabelia:

—Mapavinoraje bitso xanepana. Daxita pamonae fiesta pexanaevi, copiaya batsanaeyaexana pexaniavinora. Nexata baja fiesta pexanaenē pejunatsivi itsa apa ayaijava, cotocaevi batsanaeyaexana bevelia penamatamotsivinoranē. Tsipaji baja ayaijava piapaexae, cotocaevi apae ata beveliara, apo yapētae beveliaracuene. Itsiata baitsi jane xamē bajarpacuenia apo exanaemē. Evetame abaxē cotocaevi patanerajutsinexamē pexaniavinora, jai fiesta pevetsinē pejananacasabinējavabelia.

¹¹ Bajarapapiniñicuene Dioso pesaēta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaēta pinijicuene pexanaponaejava. Bajarajota jane baja Jesús najamatabēcueneitajēta Dioso pesaēta ayaiacuene pexanaejava pecaējēpaenēcuenetsi. Nexata pijajivi orijibia sivanajamatabēcuenecopabaponatsi. Jesús pijajivi jamatabējumaitsi:

—Xaniajai rabaja. Pepacuene Cristo, ponē copiaevetavanapatsi pepatsijavatsica vajanacacapanepaenexa, jamatabējai.

¹² Bjaraxuacujinae Jesús baja pona Capernaum tomarabelia. Yajavapona pena, pejuyapijivinuua, pijajivinuua. Capernaum tomarata caematacabibeje jinavanapa.

Pacuenia Jesús Jerusalén tomarata templobovecua pitsapaeyaexana pecanajetsivi, pecomuacaevinua, yabara pelivaisi

(Mt 21.12-13; Mr 11.15-18; Lc 19.45-46)

¹³ Judíovi baja pijafiesta pexanaenexa, toimoxoyotsi pascuavēnēfiesta. Bjaraxuata Jesús pona Jerusalén tomarabelia. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. ¹⁵ Jesús itsa tane bajarapacuene, nexata quiobataba peyorotsimacanexa. Nexata Jesús daxitajivibitsaēto capitsaparena temploboēnēverena. Bjarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topēnēyorobajaraba. ¹⁶ Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pētsa pacanajetame mapaboēnētaje, taxajavabelia jivi penavajēcaebota! jai Jesús.

¹⁷ Nexata Jesús pijajivi itsa jumetane bajarapacuenia Jesús pejumaitsijava, jumenajamatabēnapita pacuenia Dioso pejumelivaisibaxutota jumaitsi. Bjarapacuenia Jesús pexanaponaejavanexa yabara, tajēvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajē Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi itsa tane Jesús jivi pecapitsapaejava temploboēnēverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboēnēvecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaēta patacayapētaenexa Dioso pecaitorobinēcuenē, jai judíovi Jesúsjavabelia.

¹⁹ Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matababita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeypëtae xua yabara Jesús jumaitsi. Bajaraxuata judíovi jumaitsi mapacueniaje:

—Xamë acueyabi matababita apo matabotsimë tsipae. Itsamonae baja cajena mapatemploboxanetoje peveretsinexa, nacueneba cuarenta y seis pavaibeje, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebijava mapacueniaje: “Itsiata baitsi jane tatëpaecujinae, acueyabi matababita, icatsia asaënë tsane,” pejaijava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

Pacuenia Jesús jamatabëcueneyapëtane daxitajivi yabara pelivaisi

²³ Pamatababi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëttoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuene xaniavaetsia apo jumecovënëtsi. ²⁴ Bajaraxuata Jesús apo yajavaponaponae bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. ²⁵ Jesús apo namatavenonae itsajivi petsipaebinxatsi peyapëtaenexa pacuenia jamatabëcuenetsi jivi. Tsipaji Jesús pejamatabëcueneyapëtaenë pacuenia daxitajivi jamatabëcuenetsi.

3

Pacuenia Jesús barëcuacuajai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënënë. ² Nexata Nicodemo meravivi pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponapona tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjëpaetsi rabaja icatsia pejonenexa pena pecototualia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espíritu Santo petsijamatabëecaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. ⁷ “Xamë ata baja cajena icatsia benaexaname bepejananaexanaejiviyoocuenia,” tacajajava yabara, pëtsa jamatabëcuenenabenajacame. ⁸ Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeyaexanatsi bepejanaexanaejivicuenia, jai Jesús Nicodemojavabelia.

⁹ Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰ Jesús nexata jumaitsi:

—Xamë picani Israel nacuapijivi necujarubinë. ¿Itsiata tsaja apo jumeyapëtaemë palivaisi catsipaebatsi? ¹¹ Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi patsipaebaponajëbeje. Xua pepacuenia patanijibeje, bajaraxua ata jivijavabelia patsipaebaponajëbeje. Itsiata baitsi jane patatsipaebilivaisianëbeje, apo panejumecovënëtsimë. ¹² Catsipaebi atatsi xua Dioso exanapona mapanacuataje, itsiata apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtatsia? jai Jesús.

¹³ Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athëbëtatsia. Caenë, Daxitajivi Pematapijinë, caëjëpatsi jivi petsipaebinexa pacuenia itsi athëbëtatsia. Tsipaji baja cajena bajaraponë athëbëvetsica pepatsinë. Tsipaji baja cajena athëbëtatsia peponapon-aenë. ¹⁴ Bajayata petusato nacuata jivi ayaibitsaëto yatëpapona jomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. ¹⁵ Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena maticabi apo pevereverecejave, nayabarajai Jesús pijacuata Nicodemojavabelia.

Pacuenia Dioso exana piavaxae mapanacuapijivije yabara pelivaisi

¹⁶ Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexë nato mapanacuayabetsicaje mapanacuapijivije Diosovecua penaxuabiyani. Pamona sivanajamatabëcopata Dioso pexë natojavabelia, apo naxuabi tsane. Bajarapamonae maticabi apo pevereverecejave, Dioso rajutsianatsi. ¹⁷ Dioso apo itorobitsica pexë nato mapanacuayabetsicaje mapanacuapijivije pijaneconi yabara

penaneconitsiaexanaenexa. Biji rajane Dioso itorobica pexēnato, pejamatabēcueneta Dioso pecapanepaenexa mapanacuapijivije pibisiacuene pexanaeconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

—Pajivi sivanajamatabēcopata Daxitajivi Pematapijinējavabelia, bajarapajivi Dioso apo naneconitsiaexanaetsi tsane pibisiacuene pexanaeconimi yabara. Pajivi apo sivanajamatabēcopatsi Daxitajivi Pematapijinējavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabēcopatsi pepo caenē Dioso pexēnatojavabelia. ¹⁹ Ponē Daxitajivi Pematapijinē, bepecotia picani. Tsipaji jivi tsipaebapona pexaniajailivaisi jivi pejamatabēcuenēitayotsinexa. Itsiata mapanacuapijivi apo jitsipae pejamatabēcuenēitayotsinexatsi. Jitsipa saya piitaquirijamatabēcuenē. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. ²⁰ Daxita pamonaē pibisiacuene pexanavanapaēvi, apo jitsipae Daxitajivi Pematapijinē pejamatabēcuenēitayotsinexatsi. Bajaraxuata Daxitajivi Pematapijinējavabelia apo patsi. Tsipaji cujunava peyapētaeayaexanaeyanivatsi penaneconitsijava Diosojavabelia pibisiacuene pexanaecononi yabara. ²¹ Pamonaē jumecovēnēta Dioso pexaniajailivaisi, bajarapamonae apo cjunavi. Bajarapamonae pata Daxitajivi Pematapijinējavabelia pejamatabēcuenēitayotsinexatsi. Bajarapamonae jitsipa daxitajivi peyapētaenexatsi Dioso peyavenonaponaejavatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinē vajunupaeba Jesús yabara pelivaisi

²² Jesúsbeje Nicodemobeje pecuaicuajiaicujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barēponapona. Bajarapamonae bautisabapona jivi. ²³ Juan pijinia itsamonae bautisabapona Enón tomarata. Enóntomara eca Salimtomara imoxoyojavata. Bajarajota Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponaēvi, Juan bautisabapona. ²⁴ Bajarapacuenia Juan jivi bautisabapona abaxē itsa apo etsitsi penaneconitsivi pejebabiabibota.

²⁵ Nexata Juan pijajiviyajuvēnēvi anaeya najumenotsiaya cuaicuajjai judiónējavabelia. Juan pijajivi jumaitsi:

—¿De meta ponē itsa nacabautisaba, nacajamatabēcuenexaniavaetsiana Dioso vajanacabarajamatabēcuenē xanepanaenexa? jai Juan pijajivi judiónējavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponē caxitajarabame Jordánmene itsapanatalia, ponē vajunupaebame paxanējavaberena, bajaraponē ata aeconoxae jivi bautisabapona. Nexata daxitajivi bajaraponējavabelia pona, jai Juan pijajivi.

²⁷ Nexata Juan jumaitsi pijajivijavabelia:

—Xuavajēto xaina caejivi canacujitsia, Dioso perajutsixaetsi xaina. ²⁸ Pamatacabi jumaitsinē tsabiabi jivijavabelia: “Xanē raja apo Cristonē, ponē Dioso athēbēvetsica itorobijitsiatsica jivi pecapanepaenexa.

Saya raja taneitorobinē Cristo pevājēnaeya, talivaisipaebanajetarucaenēnexa,” itsa janē, paxamē ata panejumetaeyabiabame. ²⁹ Ponē pita petiriva pijavanexa, nacasaba. Nexata pejananacasabinē pepayētaenētsi, namuxunaevetanuca imoxoyo. Bajaraponē ata nabarēya itsa jumetane pejananacasabinē pebarēyajava. Bajara pijinia pacuenia xanē ata aeconoxae bitso jamatabēcuenebarēyanē, itsa vēnēlivaisitaniji jivi peponaejava Jesúsjavabelia. ³⁰ Pevājēnaeyabelia jivi ayaibitsaētoخانeto Jesús pēnaponaenatsi. Xanē nexata tanepēnaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athēbēvetsica pepatsijava yabara pelivaisi

³¹ Icatsia Juan jumaitsi pijajivijavabelia:

—Athēbēvetsica pepatsinē, bitso cajena ayaijamatabēcuenenē daxitajivi matatoxenetsia. Pamonaē naexana mapanacuataje, bajarapamonae saya mapanacuapijivije. Nexata saya cuaicuajai ēmapanacuapijicuene yabaraje. Itsiata baitsi jane ponē athēbēvetsica pepatsinē, bajaraponē daxitajivi matatoxenetsia bitso ayaijamatabēcuenenē. ³² Bajaraponē picani tsipaeba jivijavabelia pacuene tane athēbētatsia. Tsipaebanua picani palivaisi ata jumetane athēbētatsia. Itsiata baitsi jane daxitajivi jumeaebatsi petsipaebilivaisianē. ³³ Pajivi jumecovēnēta athēbēvetsica pepatsinē pepaebilivaisi, bajarapajivi Dioso ata yabara jamatabējumaitsi: “Dioso cajena pexaniajailivaisi pepaebinē,” jamatabējai. ³⁴ Ponē Dioso itorobatsi, bajaraponē tsipaeba jivijavabelia Dioso pitorobilivaisi. Tsipaji Dioso rajutatsi Espiritu Santo. Yajavaponaponaeyaexanatsinua Espiritu Santo ayaicuenia. ³⁵ Dioso bitso asiva pexēnato. Tocopata daxitacuene pevetsinexa, pitorobinexanua. ³⁶ Pajivi najamatabēcopata Dioso pexēnatojavabelia, xainaena matacabi apo pevereverecaejava. Pajivi apo najamatabēcopatsi Dioso pexēnatojavabelia, matacabi apo pevereverecaejava apo xinae tsane. Bajarapajivi Dioso naneconitsiaexanaenatsi daxita matacabijavabelianexa, jai Juan pijajivijavabelia.

4

Pacuenia Jesús barēcuaicuajai Samaria nacuapijiva yabara pelivaisi

¹ Fariseovi jumetane jivi pejumatsijava: “Jesús baja pijajivi ayaibitsaētoخانeto xainaponapona. Bautisabaponanua jivi ayaibitsaēto Juan matatoxenetsia,” pejaijava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapētane fariseovi pevēnēlivaisitaejavatsi pacuenia jivi baracuacuajaitsi, nexata naviata Judea nacuaverena. Pona Galilea nacuayabelia.

⁴ Nexata Galilea nacuayabelia peponaenē, Jesús, pijajivi yajava, patanajetaruca Samaria nacujajava. Tsipaji bajaraxuayo namuto najetaruca. ⁵ Nexata Jesús ecojopa Samaria nacuata pecaetomarata, Sicarvēnē tomarata. Sicar tomaravecua imoxoyo boca pairayo Jacobpijinē bajayata rajuta pexēnato Josépijinē. ⁶ Bajarapairayota eca meramēthē, pamēthē Jacobpijinē bajayata cueyeta. Jesús sicuerana peponaejava namuto. Nexata Jesús ecojopa meramēthē muxuneneta. Matonejeepatota Jesús ecojopa. ⁷⁻⁸ Jesús caenē eca meramēthējavata.

Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapaméthêta. Nexata Jesús jumaitsi Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaitsi:

—¿Detsa xuajitsia mera nevajêtame niapaenexa? Xamê judíonëmê. Xanê saicaya Samaria nacuapijivanê, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaitsi Jesúsjavabelia tsipaji judíovibeje Samaria nacuapijivibeje naitajitsibiaya nanaêcotabiaba.

¹⁰ Nexata Jesús jumaitsi Samaria nacuapijivajavabelia:

—Pajamatabêcuene Dioso jitsipa pecarajutsinexa, apo yapêtaemê. Xanê ata mera tacavajêtsinê apo nejamatabêcueneyapêtaemê. Itsa nejamatabêcueneyapêtaejitsipame, nexata xanêjavaberena copiaya mera nevajêtsipame tacarajutsinexa. Nexata carajutsipatsi piaitavamera, jivi pejamatabêcueneasaëyaexanaemera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaitsi Jesúsjavabelia:

—Xamê apo caponaemê nijavaxiyo mera nepuatsinexa. Meramêthê raja tajêreca bitso. ¿Detsa jota pitsipame nexata piaitavamera tanerajutsinexamê? ¹² Vajasalinainêmi Jacobpijinê ayaijamatabêcuenenêmi. Bajayata nacatocopata mapameramêthêje. Bajaraponêmi, pexi ata, pijadajubi ata, mera apa mapamêthêtaje. ¿Xamê tsaja nexata Jacobpijinêmi matatoxenetsia bitso ayaijamatabêcuenenêmi? jai Samaria nacuapijiva Jesúsjavabelia.

¹³ Jesús nexata jumaitsi:

—Jivi apaeyabiabi ata mapamêthêpijimeraje, itsiata mera pejitsipaejava apo tovereverecabiabitsi. ¹⁴ Pajivi apaena xanê tarajutsimera, bajarapajivi xainaena matababi apo pevereverecaejava. Nexata pacuenia meramêthê eca daxitamatacabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaitsi Jesúsjavabelia:

—Bajarapamera nerajure icatsia mera tanamatavenonaponaejaniva. Nexata baja mera apo puanabiabinê tsane mapamêthêaberenaje, jai Samaria nacuapijiva.

¹⁶ Jesús nexata jumaitsi Samaria nacuapijivajavabelia:

—Amona junaremelia. Yajavarenamê tsane, jai Jesús.

¹⁷ Nexata Samaria nacuapijiva jumaitsi:

—Apo xainaenê raja tamona, jai.

Nexata Jesús jumaitsi:

—“Apo xainaenê raja tamona,” itsa jamê, apo najumetsênêtsimê cajena. ¹⁸ Xainame picani amonajivi cinco ponêbeje. Ponê aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús pejumaitsijava, nexata Samaria nacuapijiva jumaitsi Jesúsjavabelia:

—¿Xamê tsabaja Diosojumepaebinêmi profetanêmi?

²⁰ Patajasalinaivimi baja cajena navajêcabiaba Diosojavabelia mapatsutojumataliaje. Itsiata baitsi jane pajudíovimê pajumaitsimê tsabiabi: “Jivi itsa navajêca Diosojavabelia, benavajêcabiaba Jerusalén

tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejejavamë mapatsutojavabeliaje, paponaejejavamë Jerusalén tomarabelia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovinë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënënë. ²³ Ajena mapamatacabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonae xaniavaetsia vajëtsiana daxita pejamatabëëthëtojavavetsina. Pepo pexaniajajamatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. ²⁴ Dioso cajena apo vajataenë. Pamonaе vajëta Diosojavabelia, xaniavaetsia pexaniajajamatabëcueneta bevajëta, pepo pejamatabëëthëtojavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

²⁶ Jesús nexata jumaitsi Samaria nacuapijivajavabelia:

—Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuaijaitsanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaicuaijamë?” apo jai itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

²⁹ —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

³⁰ Nexata bajarapamonae pijatomaravelia ponalia. Taethopalia Jesús. ³¹ Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

³² Nexata Jesús jumaitsi pijajivijavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonae, nayanijoba.

—¿Itsanë tsamëra tsipaji vajacovëta Jesús pexaejava tocapatatsi penabaninexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacuneneveretsinexa xua nitoroba. Bajara jane xua betaxaejava taniji. ³⁵ Paxamë pajumaitsimë tsabiabi peubijava yabara: “Saica raja abaxë cuatro pajuametoheje peubijava penaveretsinexa,” pajamë

tsabiabi. Itsiata xanë pacatsipaebianatsi jivi yabara. Pataema mapamonaenajetarubenaje. Pacuenia baja peubijava navereta penotsinexatsi, bajara itsi mapamonaenje. Mapamonaenje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, maticabi apo pevereverecejava jivi pexainaenexa, bajarapajivi sivajamatabëcuenebarëya tsane ayaibitsaëto itsa jumecovënëtsianatsi. Itsamonae baja picani namataxainaeaya tsipaeba bajarapamonaenjavelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonaenata itsa vënëlvaisitaena pejumecovënëtsijava tajumelivaisi, bajarapamonaenata sivajamatabëcuenebarëya tsane. ³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonaenata copiaya Dioso pejumelivaisi tsijamatabëubatsi, ayaibitsaëto bajarapamonaenajamatabëcuene copaba baja Dioso javavelia panetsipaebixae talivaisi, jai Jesús pijajivijavelia.

³⁹ Samaria nacuapijiva, pova Jesús barëcuaicuajai mera mëthëjavata, pijatomarapivijavelia tsipaeba ayaibitsaëto xaneto javavelia Jesús yabara. Nexata Samaria nacuata pejinavanapaevi, Sicar tomarapivivi, ayaibitsaëto xaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapivijavelia: “Daxita pacuene exanajë, Jesús netsipaeba,” pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonaenata Jesús asivatsi penaponaponaenexa bajarapamonaenjavelia. Nexata Jesús bajarapamonaenjavelia naponapona anijamatacabibeje. ⁴¹ Itsa bajarapamonaenata pijacuata jumetane Jesús petsipaebilivaisi, nexata icatsia ayaibitsaëto xaneto jumecovënëta Cristocuene. ⁴² Nexata bajarapamonaenata jumaitsi penavajunupaebivajavelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vanacatsipaebilivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacuapijivije picanepapejavanexa, pibisiacuene pexanaeconimivecua, jai bajarapamonaenata penavajunupaebivajavelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuayavelia. ⁴⁴ Jesús jumai tsabiabi pijajivijavelia:

—Pajivi Dioso jumepaebabiaba, bajarapajivi apo yayiyataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuayavelia, bajarapanacuapijivi xaniavaetsia copiapitatsi. Tsipaji baja cajena bajarapamonaenata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonaenata cujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonē, ayaijimatábēcuenenē. Bajaraponē pexēnatonēyo toavitane tsanucaetsi Capernaum tomaratalia. ⁴⁷ Nexata gobierno pijajivitonē vēnēlivisitanetsi Jesús Judea nacujavaverena pepatsijava, Galilea nacuyaberena. Nexata bajaraponē lia Jesúsjavabelia. Pinijicuenia junata pijaboyabelia pebarēponaenexa Jesús petojamatejemayaexanaenexatsi pexēnatonēyo. Tsi-paji baja gobierno pijajivitonē pexēnatonēyo totēpaejitsiatsi. ⁴⁸ Nexata Jesús jumaiti bajaraponējavabelia:

—Paxamē cajena apo panejumecovēnētšimē. Matapania itsa pataneme ayai cuene Dioso pesaēta taexanaejava, jivi apo pexanaecapanepaejava, panejumecovēnētšianame, jai Jesús.

⁴⁹ Nexata gobierno pijajivitonē jumaiti:

—Jesús, naxanitsiayo tapēta ponare taxēnatonēyo abaxē petēpaevajēnaeya, jai.

⁵⁰ Jesús nexata jumaiti bajaraponējavabelia:

—Naviaremelia nexēnatonēyojavabelia. Nexēnatonēyo rabaja icatsia catojamatejema, jai Jesús.

Bajaraponē jumecovēnēta pacuenia Jesús jumaiti. Nexata baja lia pijaboyabelia. ⁵¹ Itsa bajaraponē patanajetarucalia, nexata pijajivi mataenenarenatsi. Nexata pijajivi jumaiti:

—Nexēnatonēyo rabaja icatsia jamatejema tsecae, jaiti.

⁵² Nexata bajaraponē yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponē.

Nexata pijajivi jumaiti:

—Canivi, matonejeepatota, vecuaajibitsi baja peromaebijavatsi, jai pijajivi.

⁵³ Nexata bajaraponē jamatabējumaiti:

—Bajarapaepatota canivi Jesús nejumaiti: “Nexēnatonēyo rabaja icatsia catojamatejema,” nejai, jamatabējai.

Bajaraxuata bajaraponē, pijamonae yajava, jumecovēnēta Jesús Cristonēcuene.

⁵⁴ Jesús penaviatsicujinae Judea nacujavaverena, Galilea nacujavaberena, cotocaevi bajarapapinijicuenē Dioso pesaēta exana Galilea nacuata.

5

Pacuenia Betzatavēnē pucayojavata Jesús jamatejemayaexana petabusipacuenabinētsi yabara pelivaisi

¹ Judíovi fiesta exana Jerusalén tomarata. Nexata Jesús nalia.

² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevēnē Betzata. Bajarapapucayo matatoyorotsia cinco pabobērētobeje eca.

³ Bajarapabobērētōnējavata piavitanevi ayai bitsaēto xaneto bobena. Itsamonae bitso pitaxutotsēcēnaevi. Itsamonae pejayujayunaevi. Itsamonae peperabēcuenabivitsi. Daxita bajarapamonae evetanubena pucayo pemenenacujirubijava.

⁴ Athēbēvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca,

bajarapajivi pavitanecuene capunatsi, vecuaajibiaexanabiabatsi.
⁵ Bajarajota naboca treinta y ocho pavaibeje piavitanetsanucaenë,
 petabusipacuenabinëtsi. ⁶ Itsa Jesús taeyabuata bajaraponë, nexata
 yapëtaeyabuata bajayajebi piavitanenëcuene. Nexata Jesús jumaitsi
 bajaraponëjavabelia:

—¿Jitsipame tsaja nejamatejemajava? jai Jesús.

⁷ Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca
 itsa mene nacujiruba. Ajena narunabiabijitsianëreca, bajarapaepatota
 itsajivi netsurunabiabareca copiaya, jai piavitanetsanucaenë.

⁸ Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitanet-
 sanucaenëmi. Pita baja pijapanayo. Ponaexanepana baja. Bajara-
 pacuenia petabusipacuenabinëtsi Jesús jamatejemayaexana judíovi pe-
 nacueraevetsimatacabita. ¹⁰ Nexata judíovi jamatabëcuenenavëxaniabiaya
 jumaitsi petabusipacuenabinëmitsijavabelia:

—Ajena raja vajanacueraevetsimatacabi. Nexata apo xanepanae
 necaponaponaenexa nijapanayo, jai judíovi, tsipaji bajarapamonae apo
 jitsipae itsajivi ata pexanaenexa itsacuenëjavayo ata penacueraevetsi-
 matacabita.

¹¹ Nexata petabusipacuenëbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire.
 Ponare baja,” nejai, jai petabusipacuenabinëmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai?
 jai.

¹³ Itsiata baitsi jane bajaraponë apo vënëyapëtae pavënënë jamateje-
 mayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto
 bajarajota jinavanapa. Jesús baja cajena pepuaponae itsajavabelia,
 yanijobatsi. ¹⁴ Bajaraxuacujinae icatsia Jesús caxitajarabaxuaba baja-
 raponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa
 exaname pibisiacuene. Icatsia raja itsa exaname, bitsomë tsipae, jai
 Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Ja-
 matabëbeyaxuabatsinua. Tsipaji jamatejemayaexana piavitanëvi judíovi
 penacueraevetsimatacabita. ¹⁷ Nexata Jesús jumaitsi judíovijavabelia:

—Taxa Dioso raja piavitanëvi jamatejemayaexanabiaba daxitamata-
 cabi. Bajaraxuata xanë ata piavitanëvi jamatejemayaexanajë daxita-
 matacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi
 bitso. Bajarapamonae jamatabëbeyaxuabatsi. Tsipaji Jesús jamateje-
 mayaexana piavitanëvi judíovi penacueraevetsimatacabita. Orijibia
 Jesús jumaitsi: “Taxa raja Dioso,” jai. Bajarapacuenia Jesús pejumait-
 sixae, nexata judíovi bitso jamatabëbeyaxuabatsi.

*Pacuenia Dioso pexënato jamatabëcuenecaëjëpatsi daxitacuene
 pexanaenexa yabara pelivaisi*

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë ãxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa niasiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaxanaponaena bajarapacuenie matatoxenetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaename. ²¹ Taxa petëpaevimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo peverevereaejava. Nexata bajarapajivi apo naneconitsiaexanaenë tsane pibisiacuene pexanaeneconi yabara. Bajarapajivi tēpae ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonae apo xinae matacabi apo peverevereaejava, pijamatacabi baja tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena matacabi apo peverevereaejava. ²⁶ Taxa raja caëjëpatsi jivijavabelia perajutsinexa matacabi apo peverevereaejava. Nexata xanë ata taxa necaëjëpaeyaexana jivi tarajutsinexa matacabi apo peverevereaejava. ²⁷ Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapijinënë. ²⁸ Pëtsa pajamatabëcuenenabenajacame patacatsipaebilivaisi yabara. Itsamatacabi nejumetaena daxita petëpaevimi ata tatsipaebilivaisi. ²⁹ Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo peverevereaejava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabijavabelianexa, jai Jesús judíovijavabelia.

Pacuenia Jesús jivi tsitanajamatabëcueneitajëta pecaëjëpaenëcuenetsi dactacuene pexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexainaevi naneconitsiaya jinavanapaeyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtota caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë,

“Xanë rabaja ayaijamatabëcuenenënë,” itsa janë tsipae, itsiata itsamonae saya nejumeebijitsipa. ³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniaajiamatabëcueneta. ³³ Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniaajilivaisi, tsipaeba paneitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcueneitayota. Caepatoyo picani pasivajamatabëcuenebarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniaajilivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacuene Dioso athëbëvetsica pitorobinëtsitsicaje.” tanesivajamatabëjainexa. ³⁷ Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënu. ³⁸ Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. ³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana matacabi apo peverevere-caejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. ⁴⁰ Paxamë itsiata apo panejumecovënëtsimë panexainaenexa matacabi apo peverevere-caejava, jai Jesús judíovijavabelia.

⁴¹ Icatsia Jesús jumaitsi judíovijavabelia:

—Apo exanaenë ayaicueene taexanaejava saya jivi tanesivajamatabëjumaitsinexa: “Jesús raja ayaijamatabëcuenenë,” tanesivajamatabëjainexa. ⁴² Pacajamatabëcueneyapëtanetsi. Yapëtaniji cajena apo panejitsipaejava Dioso. ⁴³ Xanë athëbëvetsica patsicajë mapanacuayabetsicaje taxa Dioso taneitorobixaeitsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinexa, nexata pajumecovënëtsianame. ⁴⁴ Paxamë pajitsipame mapanacuata ëjivi papecasivabarëyanexa, papecayaiyataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacajëpae panejumecovënëtsinexa Dioso pejumelivaisi. ⁴⁵ “Mara ponëje nacaneconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabëjumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata nacacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata

bajarapalivaisi pacaneconitsiana Diosojavabelia. ⁴⁶ Itsa pepacuene pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. ⁴⁷ Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

6

Pacuenia Jesús pexaejava rajuta cinco mil ponëbeje yabara pelivaisi (Mt 14.13-21; Mr 6.30-44; Lc 9.10-17)

¹⁻⁴ Bitso baja imoxoyo pevajënae pejonenexa judíovi pijafieta, pas-cuavënëfieta. Bajarapamatacabi Jesús pona Galilea pucaxaneto it-sapanabelia. Bajarapapuca itsavënë Tiberiaspuca. Nexata jivi ayaibit-saëtoxaneto Jesús pënaponatsi. Tsipaji Dioso pesaëta Jesús ayaicuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumataatsia. ⁵ Itsa Jesús tane jivibitsaëtoxaneto pecujibijavatsirena, Jesús jumaitsi Felipe-javabelia:

—¿Detsa belia comuatsianatsi pexaejava pexaenexa mapabit-saëtoxanetoje? jai Jesús.

⁶ Bajarapacuenia Jesús jumaitsi tsipaji jamatabëyapëtane pacuenia Felipe jumecanaviatsijitsiatsi. Jesús baja cajena picani yapëtane pacuenia pexaejava mitsaexanaejitsia bajarapajivibitsaëtoxaneto. ⁷ Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo ya-caëjëpaetsi tsipae pexaenexa daxita mapajivibitsaëtoxanetoje, jai Felipe.

⁸ Itsanë Jesús pijajivitonë Andrés, Simón Pedro pejuyapijinë, jumaitsi Jesúsjavabelia:

⁹ —Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo caëjëpae tsipae cajena vajara-jutsinexa mapajivibitsaëtoxanetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajara-pajivibitsaëtoxaneto bejamatabëcuene cinco mil meta ponëbeje. ¹¹ Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaejivibitsaëtoxanetojavabelia. Bajara icat-sia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penae-jivibitsaëtoxanetojavabelia. Daxita bajarapamonae xaniavaetsia nabane. ¹² Itsa baja bajarapamonae penia, Jesús jumaitsi pijajivijavabelia:

—Pacaetuaare baja peyajuvënënacopabenaejavanë penaxu-abenaeyaniva, jai Jesús pijajivijavabelia.

¹³ Nexata Jesús pijajivi caetuata peyajuvënënacopabenaejavanë. Vënëba doce xuabeje bemapirecuenia pexanaejavanë. Cinco papanbëmibeje picani cebadavënëbenota pexanaepanbëanë. ¹⁴ Nexata bajarapajivibit-saëtoxaneto itsa tane Jesús ayaicuene Dioso pesaëta pexanaejava, naju-maitsi Jesús yabara:

—Diosojamepaebinë profeta, ponë vaxaitsi copiaevetavanapatsi pepatsijavanexatsica, bajara jane maponëje. ¹⁵ Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi
(Mt 14.22-27; Mr 6.45-52)

¹⁶ Itsa baja meravi, Jesús pijajivi puca itapayabereca pona. ¹⁷ Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸ Jesús baja pijajivi pepuaponaerata, taxuxuaba jovibo pebubujajava. Nexata malataca bitso ayai. ¹⁹ Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaelia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi. ²⁰ Nexata Jesús jumaitsi pijajivijavabelia:

—¡Xanë raja najetarucajë! ¡Pëtsa panecujunavame! jai Jesús pijajivijavabelia.

²¹ Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²² Pamonaerata Jesús pexaejava rajuta, abaxë nacopabalia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatanuca majotaje, najai bajarapamonae.

²³ Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayaibitsaëtoxaneto, bajarajota vecuaimoxoyo yaëba. ²⁴ Nexata pamonaerata Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomara-belia pona pepëjaitatsinexatsi Jesús.

Pacuenia Jesús bepitaevapan yabara pelivaisi

²⁵ Jesús pepëjaitatsivitsi itsa pata Capernaum tomarabelia, caxitajarbatsi Jesús. Nexata bajarapamonae jumaitsi Jesúsjavabelia:

—Jesús, ¿detsa pacujinaerata patame baja maberenaerata? jai.

²⁶ Jesús nexata jumaitsi bajarapamonaejavabelia:

—Xaniajanë pacuenia pacatsipaebijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitatsimë panajumecovënëtsinexamë Cristocuenenë, Dioso taneitorobinëtsica.

Patae atamë ayaicuene Dioso pesaëta taexanaejava, apo panejumecovënëtsimë. ²⁷ Pëtsa pacajamatabëcueneena ëpevereverecejava yabara. Pacuenia panexaejava baverevereca, bajarapitsijava. Biji rajane pacajamatabëcueneena apo pevereverecejava yabara. Nexata xanë, Daxitajivi Pematapijinënë, pacarajutsianatsi matababi apo pevereverecejava. Taxa Dioso baja cajena nitoroba patacarajutsinexa matababi apo pevereverecejava, jai Jesús bajarapamonaejavabelia.

²⁸ Nexata bajarapamonae jumaitsi Jesúsjavabelia:

—¿Detsa nexata xua bepaexanjë Dioso pejitsipaecuene? jai bajarapamonae.

²⁹ Nexata Jesús jumaitsi bajarapamonaejavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

³⁰ Nexata icatsia bajarapamonae jumaitsi Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacajumecovënëtsinexa Dioso pecaitorobicuenetsica?

³¹ Vajasalinaivimi pina bajayata baxaevanapa manávënëjava petusato nacuata pacuenia baja Dioso pejumelivaisibaxutota jumaitsi. Dioso baja cajena pejumelivaisibaxutota jumaitsi mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³² Jesús nexata bajarapamonaejavabelia jumaitsi:

—Xaniajanë pacuenia pacatsipaebijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamë ata Dioso pacarajutsiana athëbëpijijan, pepacuene pexaniajaipan. ³³ Ponë athëbëvetsica pepatsinë, Dioso rabaja pijapan. Bjaraponë mapanacuapijivijavabeliaje rajutsiana matababi apo pevereverecejava, nayabarajai Jesús pijacuata bajarapamonaejavabelia.

³⁴ Nexata bajarapamonae jumaitsi:

—Jesús, bajarapapan panerajutaponaname daxitamatababi canacujitsia, jai.

³⁵ Nexata Jesús jumaitsi bajarapamonaejavabelia:

—Papan jivi rajutsianatsi matababi apo pevereverecejava, xanë rabaja bajarapapannë. Pajivi xanëjavaberena pata, apo piyani cajena tsane pejamatabëëthëtota. Pajivi nesivanajamatabëcopata xanëjavaberena, apo jitsipae tsane icatsia mera. ³⁶ Paxamë apo panejumecovënëtsimë, patae atamë Dioso pesaëta pinijicuene taexanaejava. ³⁷ Daxita pamona taxat anerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. ³⁸ Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinetsica. ³⁹ Mara pacuene taxa Dioso jitsipatoexanaenexaje. Apo jitsipae cajena tatoxabijava caejivi atanerajutsiviyajuvënëvi. Pamatababi icatsia patsianicajë, daxita bajarapamonae toasaëyaexanaenajë icatsia petëpaejavamivecua. ⁴⁰ Mara pacuene taxa Dioso jitsipaje. Daxita pamonaetanetaevi Dioso pexënatonë, nexata itsa nesivanajamatabëcopata, bajarapamonae xainaena matababi apo pevereverecejava. Bajarapamonae icatsia

asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

⁴¹ “Xanë rabaja athëbëvetsica tapatsipan,” penayabarajaijava Jesús jivijavabelia, judíovi baracuaicuaijaiti pepënëvelia. ⁴² Nexata judíovi najumaitsi:

—Mara ponë Jesús, Josépijinë pexënatoje. Vaxaitsi baja cajena yapëtanetsi paxapijinë, pena ata. Nexata bajaraponë acuenebi pejumait-sijava: “Athëbëvetsica tapatsinë,” pejaijava, najai judíovi Jesús yabara.

⁴³ Nexata Jesús jumaitsi bajarapamonaejavabelia:

—Jamatabëcuenenavëxaniabiaya pëtsa panebaracuaicuaijamë tapënëverena. ⁴⁴ Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatacabi icatsia patsianicajë. ⁴⁵ Bajayata Diosojumepaebivimi peyaquinaelivaisi jumaitsi mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

⁴⁶ Icatsia Jesús jumaitsi judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tspajivi bajaravetsica tapatsinë. ⁴⁷ Xaniajanë pacuenia pacatsipaebijitsiatsi. Pajivi nesivanajamatabëcopatsiana, xainaena matacabi apo peverevereaejava. ⁴⁸ Xanë rabaja pitavapannënë. Nexata jivi rajutsianajë matacabi apo peverevereaejava. ⁴⁹ Bajayata panijasalinavivimi xaevanapa picani manávënëjéva petusato nacuata. Itsiata baitsi jane bajarapamona bajayajebi bajaraxua xaevanapae ata, tēpa itsiata. ⁵⁰ Xanë raja pacanavajunupaebatsi athëbëvetsica tapatsinë. Pajivi nesivanajamatabëcuenecopatsiana, pepacuene apo tēpae tsane. ⁵¹ Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasi-vatëpaejava pijaneconi yabara, jamatabëcueneaitava tsaponaponae tsane daxitamatacabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaxena matacabi apo peverevereaejava, nayabarajai Jesús judíovijavabelia.

⁵² Nexata judíovi najumeanaenota ëpamonae bajarapacuenia Jesús pejumait-sijava yabara. Najumaitsi bajarapamona:

—¿Detsa pacuenia maPONë nacanavirajutsipa vajavixaenexaje? Acuenebi raja vajanacavirajutsijava vajavixaenexa, najai judíovi.

⁵³ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Daxitajivi Pe-matapijinënë. Itsa paxamë apo panevixaemë tsane, apo panejanaapaemënuu tsane, nexata matacabi apo peverevereaejava, apo paxainaemë tsane. ⁵⁴ Pajivi nevixaena, nejanaapaenanua, xainaena matacabi peverevereaejava. Pamatacabi icatsia patsianicajë, bajarapajivi icatsia asaëyaexanaenajë petëpaejavamivecua. ⁵⁵ Tavito rabaja cajena pepo pexaniajaijava jivi pexaenexa. Tajana rabaja pijinia pepo pexaniajaijava jivi piapaenexa. ⁵⁶ Pajivi nevixaena, nejanaapaenanua, bajarapajivi yajavaponaponanajë. Bajarapajivi ata pijinia neyajavaponaponanua. ⁵⁷ Taxa, ponë nitorobica, bajaraponë daxitamatacabijavabelianexa piasaëtsaponaponanënë. Bajaraponë pejamatabëcueneta xanë

ata daxitamatacabijavabelianexa asaënē tsaponaponae. Nexata pajivi nevixaena, bajarapajivi pijinia tajamatabēcueneta asaē tsaponaponae tsane daxitamatacabijavabelianexa. ⁵⁸ Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinavimi xaevanapa. Bajarapapanmi bajayajebi xaevanapae ata, bajarapamonaemi itsiata tēpa baja cajena. Biji rajane pajivi xanē nevixaena, ponaponaena daxitamatacabijavabelianexa, jai Jesús judíovijavabelia.

⁵⁹ Bajarapacuenia Jesús jumaitsi judíovijavabelia livaisi petsipaebijavata Capernaum tomarata, judíovi penacaetuatabibota.

Matacabi apo pevereverecejava yabara pelivaisi

⁶⁰ Ayaibitsaëto, pamonaē Jesús pepëta najinavanapa, itsa jumetane Jesús petsipaebilivaisi, apo jumexaniatae. Najumaitsi ëpamonaē:

—Penajumetsënëtsilivaisi saya nacatsipaeba. ¿Jipatsa jumecovënëtsiana? Ajibi cajena, najai ëpamonaē.

⁶¹ Nexata Jesús jamatabēcueneyapëtane pacuenia pepënëvelia baracuaicuajiaitsi. Nexata Jesús yanijoba pepënaponaevitsijavabelia. Jumaitsi:

—¿Apo bepexaniajailivaisi tsaja pajumetaneme patacatsipaebilivaisi?

⁶² Xanē Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëabetsia taponaponaenacuamijavabetsia?

⁶³ Espíritu Santo baja cajena pejamatabēcueneta jivi xaina matacabi apo pevereverecejava. Ejëvi raja pejamatabēcueneta apo caējëpaetsi pexainaenexa matacabi apo pevereverecejava. Patacatsipaebilivaisi baja cajena papecatsijamatabëjonenexa picani, panexainaenexa matacabi apo pevereverecejava. ⁶⁴ Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabēcueneyapëtane pamonaē apo jumecovënëtsijitsiatsi. Jamatabēcueneyapëtanenua tajëvelia ponë canajetsijitsiatsi pijavajabitsaë pecobeyabelia. ⁶⁵ Nexata Jesús icatsia jumaitsi pepënaponaevitsijavabelia:

—Bajaraxuata cajena pacajumaitsitsi: “Itsajivi ata raja apo caējëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caējëpaeyaexanaenatsi, nesivanajamatabëcopatsiana,” pacajiaitsi, jai Jesús pepënaponaevitsijavabelia.

⁶⁶ Bajara nexata jota ayaibitsaëto Jesús pepënaponaevitsi vepënaviabatsi baja. Nexata bajarapamonaē pematatsënëa baja apo pënaponaetsi Jesús.

⁶⁷ Nexata Jesús yanijoba doce ponëbeje pijajivijavabelia. Jumaitsi:

—¿Paxamë ata tsabaja pajamatabënaviabame? jai Jesús.

⁶⁸ Nexata Simón Pedro jumaitsi Jesúsjavabelia:

—Tajatuxanenë, itsa panaviabajë, ¿jipatsa nexata papënaponaejitsipajë xamëvecua? Xamë rabaja caenëmë panetsipaebame matacabi apo pevereverecejava pataxainaenexa. ⁶⁹ Paxanë rabaja pacajumecovënëtatsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponaenë daxitamatacabijavabelianexa pexënatomë, jai Simón Pedro Jesúsjavabelia.

⁷⁰ Jesús nexata jumaitsi pijajivijavabelia:

—Xanë rabaja pacaitapetatsi doce paponëmëbeje. Itsiata baitsi jane paxamëyajuvënënë, itsanë, dovathi pijajivitonë tsaponaponaē, jai Jesús.

⁷¹ Bajarapacuenia Jesús itsa jumaitsi, Judas Iscariote, Simón pexēnato, yabara jumaitsi. Judas Jesús canajetsijitsiatsi pijavajabitsaē pecobeyabelia. Judas rabaja picani Jesús pijajivitonē, doce ponēbejeyajuvēnēnē.

7

Pacuenia Jesús pejuyapijivi apo jumecovēnētsitsi yabara pelivaisi

¹ Jesús ponapona Galilea nacuajava. Apo jitsipae peponapona-
java Judea nacuajava. Tsipaji bajarajota judíovi jamatabēbeyaxuabatsi.

² Imoxoyo baja pevājēnae pejonenexa fiesta, pafiestamatacabi judíovi bobērētonē exanabiaba. Nexata judíovi bajarapabobērētonēta jinavana-
pabiaba bajarapafiestamatacabi. ³ Nexata Jesús pejuyapijivi junatatsi
penaponaenexa bajarapafiestajavabelia. Jesús pejuyapijivi jumaitsi:

—Pētsa nacopatame majotaje. Judea nacuajavabelia liamēre. Bajara-
jotalia pijinia Dioso pesaēta pinijicuene nexanaponaejava nijajivi tsi-
taexanaename. ⁴ Pajivi pexanaejava yabara jitsipa pevēnēlivaisitaenexatsi
daxitanacuapijivi, bajarapajivi pexanaejava muetsia apo exanae. Nex-
ata pepacuene Dioso pesaēta pinijicuene itsa exanaponaename, nex-
ata icatsia pinijicuene tsitaexanaename fiestajavata daxitanacuapijivi
pitabarata. Nexata daxitajivi cayapētaena, jaitsi Jesús pejuyapijivi.

⁵ Jesús pejuyapijivi ata apo jamatabējumecovēnētsi Cristocuene. Ba-
jaraxuata bajarapacuenia pejuyapijivi ata jumaitsi. ⁶ Nexata Jesús
jumaitsi pejuyapijivijavabelia:

—Abaxē raja tajamatacabi apo netocopiapatsi tanaitajētsinexa
daxitajivijavabelia. Itsiata paxamē apo paitsimē. Paepatota ja-
matabēpaponame, pacatoxanepana paneponaenexa. ⁷ Mapanacuapijivi
cajena acuenebi paxamē papecaitojajava. Itsiata baitsi jane xanē
nitoya. Tsipaji itavetaponajē pibisiacuene pexanavanapaejava.
⁸ Paxamē baja paponare fiestajavabelia. Xanē ra abaxē apo ponaenē.
Tsipaji abaxē apo netocopiapatsi paepatota ponaejitsianē, jai Jesús
pejuyapijivijavabelia.

⁹ Bajarapacuenia Jesús pejumaitsicujinae, abaxē Jesús nacopatanuca
Galilea nacuata pecotocaevinexa.

Pacuenia Jesús napona fiestajavabelia yabara pelivaisi

¹⁰ Jesús pejuyapijivi fiestajavabelia pepuaponae, Jesús ata cotocaevi
napona fiestajavabelia. Jesús nexata jivibitsaēto tuatuaĵeta apo naponae
muetsia pepatsinexa. ¹¹ Jesús picani jaitatsi judíovi pevetsivi fiestajava.
Najumaitsi judíovi pevetsivi:

—¿Detsa xania jota ponapona bajaraponē? najai judíovi pevetsivi Jesús
yabara.

¹² Ayaibitsaēto jivi vēpaxapaxajaiya baracuaicuajitsi Jesús. Itsamonae
jumaitsi Jesús yabara:

—Pexaniajamatabēcuenenē raja, jai itsamonae.

Itsamonae pijinia jumaitsi:

—Apo pexaniajamatabēcuenenē raja Jesús. Peyamaxēitojorobinē ra
saya jivi, jai Jesús yabara.

¹³ Itsajivi ata apo cuaicuajai ayaijumeta Jesús yabara. Tsipaji jumeju-
nava judíovi pevetsivi pejumetaeyanivatsi.

¹⁴ Itsa baja fiesta epatua tsaponae pevereverecaenexa, nexata Jesús
joneya temploboyalia. Taxuxuaba jane baja livaisi petsipaebijava.

¹⁵ Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenae judíovi pevetsivi Jesús yabara.

¹⁶ Jesús nexata jumaitsi judíovijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë.

¹⁷ Pajivi jamatabëexana Dioso pejitsipaecuenia, bajarapajivi yapëtaena pepacuenne Dioso pejumelivaisi tatsipaebijava. Nexata yapëtaenanua tajamatabëcuenepijilivaisi itsa tsipaebajë. ¹⁸ Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tsipaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹ Jesús icatsia jumaitsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyaniwa, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

²⁰ Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabëcabeyaxuabi, jai judíovi.

²¹ Jesús nexata jumaitsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacueraevetsimatacabita. Nexata itsa pataneme bajarapacuenne, daxita paxamë pajamatabëcuenenabenajacame penacueraevetsimatacabita taexanaexae bajarapacuenne. ²² Paxamë ata penacueraevetsimatacabita ata panacuenebabiabame. Tsipaji penacuetonëyo paperabëcautabiabame penacueraevetsimatacabita ata ocho pamatacabibeje itsa xaina penaexanaecujinae. Baitsi paboupipebabëcautabiabame, Moiséspijinë baja cajena papecaitorobicuene. (Itsiata Moiséspijinë apo taxuxuabi bajarapacuenne. Bajaraponëmi cajena pevajënaeya ata, panijasalinaivimi taxuxuaba bajarapacuenne.) ²³ Bajarapacuenia penacuetonëyo paperabëcautabiabame penacueraevetsimatacabita ata, panejumecovënëtsinexa Moiséspijinë pitorobicuenia. ¿Detsa nexata xuajitsia xanë panebaraanaepaname penacueraevetsimatacabita pebi tajamatejemayaexanaejava yabara? ²⁴ Xaniavaetsia abaxë payapëtaenejevamë itsajivi pibisiacuene pexanaejava, pëtsa abaxë pananeconitsiaexaname. Matapania xaniavaetsia payapëtaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapevi najumaitsi Jesús yabara:

—¿Matsa ponë apo jaitarutsitsi pebeyaxuabinexatsije? ²⁶ ¡Pataema! Bajaraponë cuaicuaijai tsanucacae daxitajivi pitabarata. Itsiata itsajivi

ata apo jumeitavetsi. Vajanacaevetsivi ata meta jumecovënëta bajaraponë pepacue Dioso athëbëvetsica pitorobijavatsitsica jivi pecapanepaenexa. Bajaraxuata bajarapamonae apo jumeitavetsi. ²⁷ Vaxaitsi cajena yapëtanetsi itsaverena pata maponëje. Nexata acuenebi pijacuata: “Cristonë raja,” pejaijava. Tsipaji Cristo yabara tajëvelia jumaitsi mapacueniaje: “Itsajivi ata apo yapëtae tsane itsaverena patsijitsia Cristo,” jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamonae pebaracuaicuajijavatsi. Nexata Jesús ayaijumeta jumaitsi bajarapamonaejavabelia:

—Xanë yabara pajumaisimë: “Yapëtanetsi bajaraponë. Yapëtanetsinua itsaverena pata bajaraponë,” pajamë. Itsiata baitsi jane apo patsinë tajamatabëcueneta. Biji rajane taneitorobinëtsica ponapona athëbëtatsia. Paxamë cajena apo payapëtaemë bajaraponë. ²⁹ Xanë yapëtaniji bajaraponë. Tsipaji athëbëvetsica tapatsinë. Bajaraponë baja cajena nitorobica mapanacuayabetsicaje, jai Jesús bajarapamonaejavabelia.

³⁰ Nexata picani Jesús bajarapamonae jamatabëvaetabatsi penaneconitsiaexanaenexatsi. Itsiata abaxë itsajivi ata apo vaetabitsi. Tsipaji abaxë Jesús apo tocopiapatsitsi pijamatacabi pevaetabinexatsi. ³¹ Itsiata baitsi jane bajarapamonaejajuvënëvi ayaibitsaëto jumecovënëta Cristocuene. Nexata bajarapamonae najumaitsi:

—Itsa pina Cristo patsianica, Dioso pesaëta pinijicuene pexanaejava exanaena. Bajara maponë pepacue Dioso, ponë Dioso athëbëvetsica itorobijitsiatsica jivi pecapanepaenexa. Tsipaji nacatsijëta pesaë. Pinijicuene pexanaejava exana Dioso pesaëta. Tsipaji cajena itsanë ata mapanacuata apo caëjëpaetsi bajarapitsipinijicuene pexanaenexa, najai bajarapamonae Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaisijava: “Pepacue rabaja maponë Cristoje,” pejaijava Jesús yabara. Nexata fariseovibeje judíovi penamatacaitorobivibeje najamatabëcuenejëpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxë Jesús apo vaetabitsi. ³³ Jesús nexata templobota jumaitsi judíovijavabelia:

—Abaxë raja bajayayo itsiata pacayajavaponaponaenatsi. Bajaraxuacujinae jane baja naviatsianiajë taneitorobinëtsicajavabetsia. ³⁴ Paxamë picani panejaitsianame. Itsiata apo panecaxitajarabimë tsane. Tsipaji apo pacacajëpae tsane paneponaenexa itsabetsia ponaejitsianë, jai Jesús judíovijavabelia.

³⁵ Nexata judíovi nayanijoba ëpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranëjavabelia, itsabelia judíovi jinavanapa. Griegovi raeta livaisi tsipaebijitsia Jesús. ³⁶ Jesús nacajumaitsi: “Paxamë picani panejaitsianame. Itsiata apo panecaxitajarabimë tsane. Tsipaji apo pacacajëpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitsi? najai judíovi.

Apo pevereverecaemera yabara pelivaisi

³⁷ Pafiestamatacabi judíovi bobērētonē exanabiaba, pecopiarucaemat-acabi, jivi bitso najamatabēcuenereviabiaya bajinavanapa. Nexata bajarapamatacabi jivi ayaibitsaēto pitabarata Jesús nonotabapuna. Ayai-jumeta Jesús jumai tsanucae:

—Pajivi mera jitsipa, xanējavaberena ponae piapaenexa. ³⁸ Dioso pejumelivaisibaxutota jumaitsi mapacueniaje: “Pajivi nesivanajamatabēcuenecopatsiana, bajarapajivi pejamatabēēthētota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabēcueneyavenonabiabiana itsamonae ata tanesivanajamatabēcuene copatsinexa, bajarapamonae ata pexainaenexa matacabi apo pevereverecaejava,” jai Jesús judíovijavabelia.

³⁹ “Pajivi nesivanajamatabēcuenecopatsiana, bajarapajivi pejamatabēēthētota xainaena daxitamatacabi pepitsaparucaemera,” itsa jai Jesús, jumaitsi Espíritu Santo yabara. Baitsi pajivi jumecovēnēta Jesús petsipaebilivaisi, tsijamatabēcaenatsi Espíritu Santo. Itsiata baitsi jane abaxē Espíritu Santo apo patsitsica. Tsipaji abaxē Jesús apo ponae athēbēabetsia.

Pacuenia daxitajivi Jesús yabara apo najamatabēcuenejēpae yabara pelivaisi

⁴⁰ “Pajivi nesivanajamatabēcopatsiana, bajarapajivi pejamatabēēthētota xainaena daxitamatacabi pepitsaparucaemera,” pejaijava Jesús, jivi itsa jumetane, itsamonae jumaitsi:

—Xaniajai rabaja. Maponē Diosojumepaebinē profetanēje, ponē copiae-vevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaitsi:

—Jume raja. Bajara maponē Cristoje, ponē Dioso athēbēvetsica itorobi-jitsitsica jivi pecapanepaenexa, jai itsamonae.

Itsiata itsamonae jumaitsi:

—¡Apo Cristo raja! Tsipaji Cristo Galilea nacuaverena apo patsi tsipae. ⁴² Dioso baja cajena pejumelivaisibaxutota jumaitsi pacuenia Davidpijinē pemomoxiyajuvēnēnē naexanaejitsia Cristo. Bajaraponē peneta naexanaena Belén tomarata, patomarata Davidpijinē bajayata ponapona, jai bajarapamonae.

⁴³ Bajarapacuenia nexata jivi ayaibitsaēto apo najamatabēcuenejēpae Jesús yabara. ⁴⁴ Itsamonae picani Jesús jamatabēvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovēnētsi Cristonēcuene yabara pelivaisi

⁴⁵ Papolícíavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemērena bajaraponē? jai fariseovibeje judíovi penamatacaitorobivibeje.

⁴⁶ Nexata policíavi jumaitsi:

—Bajaraponē Dioso pitorobicueniatsi, xaniavaetsia jivi livaisi tsi-paeba, itsajivi ata apo pepaebicuenia. Bajaraxuata apo pavaetabinē patacaponaenexarena, jai policíavi.

⁴⁷ Nexata fariseovi jumaitsi:

—¿Paxamë ata tsabaja pacayamaxëitojoroba bajaraponë? ⁴⁸ Caenë ata vajanacaevetsiviyajuvënënë, fariseoviyajuvënënë ata, apo jume-covënëtsi baja cajena bajaraponë Cristonëcuene. ⁴⁹ Pamonaë jume-covënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënënë. Nicodemo nexata jumaitsi pevëna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaitsi Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaitsi. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

Petiriva pibisiacuene pexanaeva pamona pepëya yabara pelivaisi

⁵³ Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

8

¹ Jesús pona Olivovënë tsutojavabelia. ² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia. ³ Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseovi yajava, jumaitsi Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. ⁵ Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaitsi bajarapacuenia Jesús saya pejamatabëcuenejëtsinexatsi. Nexata Dioso Moiséspijinëta penajumecopatsilivaisivecua, saicayacuenia, Jesús itsa jumecanaviata, bajarapamonae neconitsijitsiatsi picani. Itsiata Jesús jamatabëcuenyapëtane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. ⁷ Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponë paxamëyajuvënënë pibisiacuene apo pexanaenë, bajaraponë copiata iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquinea icatsia. ⁹ Nexata bajarapamonae ita jumetane bajarapacuenia Jesús pejumaitsijava, bajarapamonae najamatabënapita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copiaya perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopateca petiriva yajava. Bajarapova abaxë nuca bajarajota. ¹⁰ Nexata Jesús ita nonotapuna, caeva taenuta. Nexata Jesús jumaitsi petirivajavabelia:

—¿Detsa belia pona pamonaе caneconita picani? ¿Itsanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaitsi:

—Jume raja. Caenë ata apo nebixanae ibotota, jai bajarapova.

Nexata Jesús jumaitsi:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailivaisita pejamatabëcueneitayotsinë yabara pelivaisi

¹² Jesús icatsia templobota jumaitsi jivijavabelia:

—Xanë raja pexaniajailivaisita daxitanacuapijivi jamatabëcueneitayotsianajë. Pajivi nepënaponaena, bajarapajivi jamatabëcueneitayotsianajë. Nexata xainaena matababi apo peverevereaejava. Bajarapajivi itsamatabijavabelia ata apo ajamatabëcueneitaquiri tsane, jai Jesús jivijavabelia.

¹³ Nexata fariseovi jumaitsi Jesúsjavabelia:

—Xamë saya nijacuata najamatabëcuenelivaisipaebame. Nexata apo payapëtaenë nexaniajaicuene. Bajaraxuata apo pacajumecovënëtsitsi, jai fariseovi.

¹⁴ Jesús nexata jumaitsi fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajë. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajë. Itsabelia ata ponaejitsianë, apo payapëtaemë. ¹⁵ Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacuene paneconivajëto xaina. Xanë abaxë apo naneconitsiaexanaenë itsajivi ata. ¹⁶ Itsiata itsamatababi, ita naneconitsiaexanaenajë Diosojavabelia pijaneconi pexainaevi, naneconitsiaexanaenajë paneconivajëtota xaina. Tsipaji caenënë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanaematcabi. ¹⁷ Dioso Moiséspijinëta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejëpaeya paebabeje, bajarapalivaisi bepajumecovënëtame,” jai. ¹⁸ Xanë baja cajena najamatabëcuenelivaisipaebajë. Taxa ata, ponë nitorobica, neva-junupaeba. Nexata baja panijanënëbeje najumejëpaeya pacatsipaebatsibeje xanë talivaisi, jai Jesús fariseovijavabelia.

¹⁹ Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabelia.

²⁰ Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejubabiabicajonianë bobena, bajarajota Jesús livaisi tsipaebanuca. Itsiata abaxë itsajivi ata Jesús apo vaetabitsi penaneconitsiaexanaenexatsi. Tshipaji abaxë pijamatacabi apo tocopia-patsitsi pevaetabinexatsi.

Pacuenia Jesús tajëvelia jumaitsi: “Paxamë apo pacacajëpae tsane paneponaenexa itsabelia ponaejitsianë,” jai yabara pelivaisi

²¹ Jesús icatsia templobota tajëvelia jumaitsi fariseovijavabelia:

—Xanë pacavecuaponaenatsi. Nexata paxamë panejaittsianame. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacajëpae tsane paneponaenexa itsabelia ponaejitsianë, jai Jesús fariseovijavabelia.

²² Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacajëpae tsane paxamë paneponaenexa itsabelia ponaejitsianë,” nacajai, najai judíovi.

²³ Nexata Jesús jumaitsi judíovijavabelia:

—Paxamë baja cajena mapanacuapijivimeje. Xanë saicaya athëbëvetsica tapatsinë. Paxamë mapanacuata panejinavanapaevijje. Xanë raja maapo panacuapijinëneje. ²⁴ Bajaraxuata pacajumaitsi: “Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itsa apo panejumecovënëtsimë patacavecuajibiaexanaejavanexa pibisiacuene paneexanaeneconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

—¿Detsa xamë ponëmë? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. ²⁶ Paxamë bitso pibisiacuene paexanabiabame. Nexata ayailivaisi xainajë it-samonaejavabelia patacavajunupaebineja pibisiacuene paneexanaejava. Nexata pibisiacuene paneexanaeneconi yabara, necajëpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara. ²⁸ Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinënë, paneyotarutsiaexanaename cruzajavabelia patanebeyaxuabiaexanaenexamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. ²⁹ Taxa,

ponë nitorobica, neyjavaponapona baja cajena. Tajaepato apo neponaponaeyaexanae. Tsipaji exanabiabajë pacuene yabara taxa nesivajamatabëcuenebarëyajitsia, jai Jesús bajarapamonaejavabelia.

³⁰ Itsa Jesús jumaitsi bajarapacuenia, ayaibitsaëtoxaneto judíovi jume-covënëtsi Cristonëcuene: “Xaniajai cajena. Maponëje Dioso itorobi-catsi,” jamatabëjai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudíovi jume-covënëta Cristonëcuene, bajarapajudíovijavabelia Jesús jumaitsi:

—Itsa paxamë tsiteca pajume-covënëtavapananame patacatsipaebili-vaisi, nexata baja pepacuene patajajivimë tsane. ³² Nexata palivaisi pacatsipaebatsi, payapëtaename baja pexaniajailivaisicuene. Nexata baja ita payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudíovijavabelia.

³³ Nexata pajudíovi apo jume-covënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemomoxinë. Paxanë daju-bicuenia apo panecanajetsi itsanëjavabelia amoneya patatonacuenebabibinexa. “Pacopabianame baja itsanë papecaitorobicuenia panetoexanabiabijavami,” ita panejamë, ¿detsa pítsilivaisi yabara panejumaitsimë? jai Jesúsjavabelia pajudíovi apo jume-covënëtsi Cristonëcuene.

³⁴ Jesús nexata jumaitsi bajarapajudíovijavabelia:

—Xaniajanë pacuenia pacatsipaebijitsiatsi. Daxita pamonae pibisiacuene pexanaevi, jamatabëcueneitorobabiabatsi dovathi pejamatabëcueneta. ³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënato tsaponapona. ³⁶ Nexata pijinia xanë, Dioso pexënatonë, ita copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatacabijavabelianexa. Nexata baja dovathi apo pacaitorobabiabi tsane matavëjëa pibisiacuene paneexanaenexa. ³⁷ Yapëtaniji cajena Abrahampijinë papemomoxicuenemë. Itsiata baitsi jane jamatabëpanebeyaxuabame. Tsipaji apo panejume-covënëtsimë patacatsipaebilivaisi. ³⁸ Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

³⁹ Nexata judíovi jumaitsi:

—Pataxajivi baja cajena pexaniajatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi. ⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene! ⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpjinë. Pataxa rabaja Dioso, jai bajarapamona.

⁴² Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya pane-taejitsipame. Tsipaji Diosojavavetsica tapatsinë. Majotaje ponaponajë. Xanë raja saya tjamatabëcueneta apo patsinëtsica. Dioso raja nitorobica. ⁴³ ¿Detsa xuajitsia paxamë apo panejumeyapëtaemë patacatsipae-bilivaisi? Apo pajitsipaemë patanenamuxunaevetsinexamë bajarapalivaisi. ⁴⁴ Paxamë rabaja cajena paneaxa dovathi. Papijajivimë. Pejitsipaecuenia jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. ⁴⁵ Xanë baja cajena pexaniajailivaisi pacatsipaebatsi. Itsiata apo panejumecovënëtsimë. ⁴⁶ ¿Jipatsa paxamëyajuvënënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë? ⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaitsi Jesúsjavabelia:

—Paxanë itsa pacajumaitsi: “Xamë raja Samaria nacuapijinëmë, dovathi neyjavaponaponaenë,” itsa pacajaitsi, paxaniajanë cajena, jai judíovi Jesúsjavabelia.

⁴⁹ Jesús nexata jumaitsi judíovijavabelia:

—Xanë cajena dovathi apo yjavaponaponaenë. Xanë taxa Dioso yaiyataeya ponaponajë. Itsiata paxamë apo paneyaiyataemë. ⁵⁰ Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonae apo neyayatae. ⁵¹ Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matababi apo pevereverecejava, jai Jesús judíovijavabelia.

⁵² Nexata judíovi jumaitsi:

—Aeconoxae pepacuene dovathi pecayjavaponaponaejava, payapëtaniji. Tsipaji Abrahampijinëmi tēpa. Daxita Diosojumepaebivimi profetavi ata, tēpa. Itsiata xamë jumaitsimë tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. ⁵³ Vamopijinëmi Abrahampijinë, ayaijamatabëcuenenëmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinëmi matatoxenetsia beayaijamatabëcuenenëmë nataneme? ¿Detsa beponëmë nataneme? jai judíovi.

⁵⁴ Jesús nexata jumaitsi judíovijavabelia:

—Itsa xanë tajacuata najumaitsinë tsipae: “Xanë bitso ayaijamatabëcuenenënë,” itsa janë tsipae, nexata ajumematamobinë tsipae. Itsiata baitsi jane taxa Dioso, ponë yabara paxamë ata: “PatajaDioso raja,” pajamë, bajaraponë neyaiyatane. ⁵⁵ Itsiata paxamë apo payapëtaemë bajaraponë. Xanë cajena yapëtaniji. Nexata xanë Dioso yapëtae atanë, itsa yavajunuaxainaejitsipajë, “Apo yapëtaenë cajena bajaraponë,” itsa janë tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuene Dioso yapëtaniji. Jume-covënëtajënuu pacuenia Dioso nitorobabiaba. ⁵⁶ Bajayata Abrahampijinë panijasalinainëmi jamatabëcuenebarëya. Tsipaji tajëvelia yapëtane mapanacuayabetsicaje tapatsijavanexatsica. Nexata Abrahampijinëmi nesivajamatabëcuenebarëya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxë raja xamë apo xainaemë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tēpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajënaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuat-uajëalia. Jesús baja nexata judíovi itsajavabelia vecuapona.

9

Pacuenia Jesús itaxutoxanepanaeyaexana ecënaenë yabara pelivaisi

¹ Jesús najetaruca namutua. Nexata tane penaexanaejavaveliacujinae bitso pitaxutotsëcënaenë. ² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaeje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petaenexatsi Dioso icatsia pitaxutoxanepanaeyaexanaejavatsi. ⁴ Payapëtaneme rabaja mapacueneje. Maticabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanepana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. ⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayojavabelia, Siloëvënë pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsi-jume: “Pitorobinětsitsica,” pejaijume.

Nexata bitso pitaxutotsēcēnaenē lia baja. Naitaxutoquiatojopalia. Naviarena baja pitaxutotxanepanaenē. ⁸ Nexata itsajota ponapona bitso pitaxutotsēcēnaenēmi, imoxoyo penaevi, pamonae ata taeyabiabatsi, daxita bajarapamonae nayanijoba.

—¿Matsa ponē palata amoneya pevajēcabiabecaenēmije? najai bajarapamonae.

⁹ Nexata itsamonae jumaitsi:

—Jājā, bajara covē ponē, jai.

Itsiata itsamonae jumaitsi:

—Apo ponē raja. Bajara saya itsiata beponē, jai.

Nexata pitaxutotsēcēnaenēmi pijacuata jumaitsi:

—Jājā, xanē rabaja, jai bajaraponē.

¹⁰ Nexata bajarapamonae jumaitsi pitaxutotsēcēnaenēmijavabelia:

—¿Detsa nexata pacuenia taneme baja? jai.

¹¹ Nexata pitaxutotsēcēnaenēmi jumaitsi:

—Ponē raja Jesúsvēnēnē, exana tsorobojavayo. Nitaxutoexaba. Nexata nejumaitsi: “Liamēre pecueyetsipucayojavabelia, Siloévēnē pucayojavabelia. Naitaxutoquiaremelia,” nejai Jesús. Nexata baja lianē. Itsa naitaxutoquiatajē bajarapapucayota, taniji baja, jai pitaxutotsēcēnaenēmi.

¹² Nexata bajarapamonae jumaitsi:

—¿Detsa jota bajaraponē ponapona? jai.

Nexata icatsia pitaxutotsēcēnaenēmi jumaitsi:

—Apo yapētaenē itsajota ponapona, jai.

Pacuenia bitso pitaxutotsēcēnaenēmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsēcēnaenēmi pitaxutotxanepanaejava jivi itsa tane, yanijobatsi peyapētaenexa pacuenia itaxutotxanepana. Pamonae yanijobaponatsi, bajarapamonae pitaxutotsēcēnaenēmi caponaliatsi fariseovijavabelia. ¹⁴ Pamatacabi Jesús exana tsorobojavayo pitaxutotxanepanaeayaexanaenexa bitso pitaxutotsēcēnaenēmi, bajarapamatacabi judíovi penacueraevetsimatacabi. ¹⁵ Nexata jane baja fariseovi yanijoba pitaxutotsēcēnaenēmijavabelia.

—¿Detsa pacuenia nexata itaxutotxanepaname? jai fariseovi.

Nexata pitaxutotsēcēnaenēmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajē. Nexata aeconoxae taniji baja, jai pitaxutotsēcēnaenēmi fariseovijavabelia.

¹⁶ Nexata fariseovi najumaitsi:

—Ponē bajarapacuenē exana, Dioso apo pitorobinětsi cajena. Tsipaji apo yayiatae penacueraevetsimatacabi, najai fariseovi.

Itsiata bajarapamonae yajuvēnēvi itsamonae najumaitsi:

—Itsa pibisiacuene pexanaenē tsipae, apo caējēpae tsipaetsi bajarapitsipinijicuene pexanaenexa, najai itsamonae.

Nexata daxita fariseovi apo najamatabēcuenejēpae. ¹⁷ Nexata icatsia fariseovi yanijoba pitaxutotsēcēnaenēmijavabelia.

—¿Detsa jane xamē bejamatabēitsimē ponē caitaxutotxanepanaeayaexana yabara? jai fariseovi.

Nexata pitaxutotsēcēnaenēmi jumaitsi:

—Bajaraponē cajena Diosojumepaebinē profeta, jai.

¹⁸ Judíovi apo jumexaniatae pitaxutotaxanepanaeyaexanaejavatsi yabara. Nexata bajarapamonae junata pitaxutotsēcēnaenēmi paxa, pena yajava. ¹⁹ Judíovi jane baja yanijoba pitaxutotsēcēnaenēmi paxabeje penabejevavelia. Jumaitsi:

—¿Baja tsa maponē panexēnatobeje, ponē penaexanaejavaveliacujinae pitaxutotsēcēnaenēmije? ¿Detsa pacuenia aeconoxae baja tane? jai judíovi.

²⁰ Nexata pitaxutotsēcēnaenēmi paxabeje penabeje jumaitsiabeje:

—Maponēje pataxēnatobeje payapētanjibeje cajena. Payapētanjibejenua penaexanaejavaveliacujinae pitaxutotsēcēnaejava. ²¹ Itsiata baitsi jane aeconoxae apo payapētaenēbeje pacuenia baja itaxutotaxanepana. Apo payapētaenēbejenua ponē itaxutotaxanepanaeyaexanatsi. Bajaraponē taxēnato payanijobare. Penaveretsinē rabaja. Pijacuata pacatsipaebiana, jai pitaxutotsēcēnaenēmi paxabeje penabeje judíovijavelia.

²² Judíovi baja cajena najamatabēcuenejēpa pevājēnaeitavetsinexa penajoneyaniva judíovi penacaetatabiabibojavaberena pajivi jumaitsi: “Jesús rabaja cajena Cristo, ponē Dioso athēbēvetsica itorobijitsiatsica jivi pecapanepaenexa,” pejaijivi. Bajaraxuata pitaxutotsēcēnaenēmi paxabeje penabeje bajarapacuenia jumecanaviatabeje pecujunavixaebeje judíovi. ²³ Bajaraxuata bajarapajivibeje jumaitsiabeje: “Taxēnatojavavelia payanijobare. Penaveretsinē rabaja,” jaiabeje.

²⁴ Nexata judíovi icatsia junata pitaxutotsēcēnaenēmi. Jumaitsi bajaraponējavavelia:

—Panetsipaebare xaniavaetsia Dioso pitabarata. Paxanē baja cajena payapētanjiji bajaraponē pibisiacuene pexanaenēcuene, jai judíovi Jesús yabara.

²⁵ Nexata pitaxutotsēcēnaenēmi jumaitsi:

—Pibisiacuene meta pexanaenē. Xanē apo yapētaenē. Itsiata baitsi jane nitaxutotaxanepanaeyaexana taitaxutotsēcēnaenēmi, jai pitaxutotsēcēnaenēmi.

²⁶ Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

²⁷ Nexata pitaxutotsēcēnaenēmi jumaitsi judíovijavelia:

—Pacatsipaebatsi rabaja picani xaniavaetsia. Itsiata apo panejumecovēnētšimē. ¿Detsa xuajitsia pajitsipame patacatsipaebaponaenexa icatsia? ¿Paxamē ata tsaja pajitsipame panejumecovēnētšinexa bajaraponē papijajivinexamē? jai pitaxutotsēcēnaenēmi judíovijavelia.

²⁸ Nexata judíovi bijatanetsi pitaxutotsēcēnaenēmi. Jumaitsi:

—Xamē raeta baja cajena bajaraponē pijajivitonēmē. Paxanē raja saicaya Moiséspijinē petsipaebilivaisi pajumecovēnētavanapajē.

²⁹ Paxanē baja cajena payapētanjiji pepacuene Dioso pebarēcuaiquaijajavatsi Moiséspijinē. Itsiata baitsi jane ponē cabarēcuaiquaijai, apo payapētaenē itsaverena pata, jai judíovi.

³⁰ Nexata pitaxutotsēcēnaenēmi jumaitsi judíovijavelia:

—¿Detsa xuajitsia nitaxutotaxanepanaeyaexanae ata, apo payapētaemē itsaverena pata bajaraponē? ³¹ Yapētanetsi baja cajena mapacueneje. Diosojavelia vajētsi ata pamona pibisiacuene pexanaevi, Dioso

baja cajena apo namuxunaevetsi. Dioso baja cajena banamuxunaeveta itsa vajētatsi pejitsipaecuenia yaiyataeya petojinavanapaevitsi.³² Caeto ata mapanacuapijivi apo vënēlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsēcēnaenē.³³ Peneta bajaraponē itsa apo patsi tsipae Dioso javavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsēcēnaenēmi judíovijavabelia.

³⁴ Nexata judíovi jumaitsi:

—Xamē cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenē jamatabēpanemuxujibame? jai judíovi pitaxutotsēcēnaenēmijavabelia.

Nexata torotajarabaxuabatsi judíovi penacaetuatabiabibo pevecuapitsapaenexa.

Pacuenia Dioso apo pejumecovēnētsivi jamatabēcueneaitaquiri tsavana-pae yabara pelivaisi

³⁵ Jesús vënēlivaisitane pitaxutoxanepanaeyaexanaenē judíovi petorobajarabijavatsi judíovi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenē, Jesús jumaitsi pitaxutoxanepanaeya exanaenējavabelia:

—¿Najamatabēcopatame tsabaja Dioso pexēnatojavabelia? nayabarajai Jesús.

³⁶ Nexata ponē Jesús itaxutoxanepanaeyaexana, jumaitsi:

—¿Detsa ponē Dioso pexēnato tanajamatabēcopatsinexa bajaraponējavabelia? jai.

³⁷ Jesús nexata pijacuata nayabarajumaitsi:

—Ponē rabaja cabarēcuaiquaijai, Dioso rabaja pexēnato, nayabarajai Jesús.

³⁸ Nexata ponē Jesús itaxutoxanepanaeyaexana, pematabacabēta nuca Jesús pitabarata. Jumaitsi Jesúsjavabelia:

—Tajatuxanenē, casivanajamatabēcopatatsi baja cajena, jai.

³⁹ Nexata Jesús jumaitsi pitaxutoxanepanaeya exanaenējavabelia:

—Xanē patajē mapanacuayabetsicaje jivi penayapētaenexa pijaneconi pexinaejava. Nexata pamonae pexaniajailivaisi tatsipaebijavata najamatabēcueneitayotsianajē pexaniajailivaisita. Pamonae jemajai. Apo yapētae ata pexaniajailivaisi, jamatabējumaitsi: “Vaxaitsi rabaja yapētanetsi pexaniajailivaisi,” jamatabējai, bajarapamonae apo jamatabēcueneitayotsinē tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitsijava. Nexata fariseovi jumaitsi Jesúsjavabelia.

—¿Paxanē ata tsabaja pajamatabēcueneitaquirinē tsavanapae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabēcueneitaquirimē tsavanapae. Tsi-paji jamatabēcuenenavēxaniabiaya pajamatabējumaitsimē tsabiabi: “Vaxaitsi rabaja jumecovēnētatsi Dioso,” pajamatabējamē tsabiabi. Nexata Dioso pejumelivaisi payapētae atamē, itsiata pibisiacuene paexanabiabame. Nexata bitso pananeconitame Dioso javabelia. Paxamē Dioso pejumelivaisi apo paneyapētaexae, itsa pajamatabēcueneitaquirimē tsipae, nexata bitso apo pananeconitsimē tsipae Dioso javabelia, jai Jesús fariseovijavabelia.

10

Oveja pecajoneyabiabiorral yabara pelivaisi

¹ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabiorral ënëabelia saicayanë pejonenexa, apo jone corral baupajava. Junaya saya peyenepanatsia pejonenexalia. Bajaraponë penacobetoxotsinënexa oveja. ² Ponë peneta joneya corral baupayalia, bajaraponë cajena oveja pevetsinë. ³ Nexata corral baupa pevetsinë tobaupatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junatapona pijaoveja caenë canacujitsia pevënëta. ⁴ Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tsi-paji jumeyapëtanetsi pijaoveja. ⁵ Oveja apo pënaponae tsipae saicayanë. Tsi-paji apo jumeyapëtae. Vecuarëcëpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ënëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. ⁸ Itsamonae xanë tavajënaeya penajumetsënëtsilivaisi jivi tsipaebapona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae. ⁹ Xanë rabaja cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinë hapata oveja penacobetoxotsinexa, pebeyaxu-ababiabinexanua. Bajarapacuenia oveja peveretaponaenexa hapata. Bajara pijinia jamatabëcuenetsi pamonaepata penajumetsënëtsilivaisi jivi petsipaebaponaenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa matabi apo pevereverecaejava, bitso jamatabëcuenabarëyaya pejinavanapaenexanua. ¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabianiva tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara. ¹² Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya tovetaponaepaenajitsipa

pematamotsinexatsi. Nexata nevëthë oveja itsa tsimaxënajetarucaejitsipa, bajaraponë xuabatabajiravijitsipa ovejabitsaëtomì. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtomì. ¹³ Oveja pevetsinë najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonaë taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. ¹⁶ Xainajë baja itsabitsaëto tajajivi. Itsiata abaxë bajarapamonae apo yajavajinavanapae mapabitsaëtojavataje. Itsiata itsamatacabi capatsianajë bajarapamonae mapabitsaëtojavaberenaje. Nexata daxita bajarapamonae nejumecovënëtsiana taitorobicuenia. Caebitsaëtoخانeto jane baja tajajivi netonaexanaena. Bajarapamonae xanë caenënë evetsianajë, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. ¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitсийava, judíovi apo najamatabëcuenejëpae. ²⁰ Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

²¹ Itsiata bajarapamonae yajuvënëvi itsamonae najumaitsi:

—Ponë dovathi yajavaponaponatsi, apo caëjëpaetsi tsipae cajena pecuaicuajainexa mapacueniaje. Apo caëjëpaetsinua tsipae pitaxutoxanepanaeyaexanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

Pacuenia Jesús judíovi navecuaitavetatsi yabara pelivaishi

²² Emarapaeta Jerusalén tomarata fiesta exana. Bajarapafiesta exana judíovi penajamatabënapitsinexa bajayata judíovi pijasalinaivi templobo pexanebetsijava. ²³ Nexata pamatacabi fiesta exana, Jesús ponapona bajarapatemplobojavata, Portal de Salomónvënëjavata. ²⁴ Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeyaexanaename patacayapëtaenexa pepacuenie ponëmë? Itsa pepacuenie Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena roviaalia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani roviaalia. Itsiata apo panejume-covënëtsimë. Taxa Dioso pesaëta pinijicuene exanajë. Bajara papini-jicuene exanajë taxa taneitorobicuena. Nexata itsa exanajë bajarapa-pinijicuene, pacatsitaexanatsi picani taxa taneitorobicuene. ²⁶ Itsiata baitsi jane apo panejumecovënëtsimë Cristonëcuenenë. Tsipaji paxamë apo patajajivimë. ²⁷ Tajajivi, pamonaë taniji beovejacuena, bajarapamonaë nejumeyapëtane. Bajarapamonaë pijinia yapëtaniji. Nexata nepënapona. ²⁸ Bajarapamonaë rajutsianajë matacabi apo peverevere-caejava. Bajarapamonaë taxa Diosovecua apo naxuabi tsane. Itsajivi ata apo neyacajërëtsi tsane tajajivi. ²⁹ Taxa baja cajena ayaijamatabëcuenenë daxitajivi matatoxenetsia. Bajaraponë nerajuta bajarapamonaë. Nexata itsajivi ata apo caëjëpaetsi tsane taxa pecobevecua pepitsinexa bajarapamonaë. ³⁰ Taxa, xanë, caenë rabaja panaexanajëbeje, jai Jesús judíovijavabelia.

³¹ Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconaenexatsi ibotonëta. ³² Jesús nexata jumaiti judíovijavabelia:

—Ayaijava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaejitsiamë ibotonëta? jai Jesús judíovijavabelia.

³³ Judíovi nexata jumaiti:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuena, Dioso apo pejitsipaecuena, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

³⁴ Jesús nexata jumaiti judíovijavabelia:

—Dioso pejumaitisjava, Dioso pejumelivaisibaxutota jumaiti macuenaiaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. ³⁵ Nexata Dioso pejumelivaisibaxutota bajarapacuena itsa jumaiti Dioso pejumecovënëtsivi yabara, acuenebi bajarapamonaë yabara vajajumaitsinexa: “Bajarapamonaë apo diosovi,” vajajainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitsimë: “Xamë raja naneconitame Diosojavabelia. Pibisiacuena cuaicuaijamë Dioso apo pejitsipaecuena. Tsipaji jumaitsimë: ‘Xanë raja Dioso pexënatonë,’ jamë,” panejamë. ³⁷ Itsa apo exanaenë tsipae pacuena taxa nitoroba, nexata acuenebi tsipae patanesivanajamatabëcopatsinexamë. ³⁸ Itsiata baitsi jane exanaponajë pacuena taxa nitoroba. Nexata apo panesivanajamatabëcopatsi atamë, itsiata bepajumecovënëtame Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuene Dioso pesaëta taexanaponaejava, nexata payapëtaename taxa Dioso taneyajavaponaponaejava, payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuena Jesús jumaiti ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatalia copiya Juanpijinë jivi bautisababiaba. Bajarajotalia Jesús ponapona. ⁴¹ Jivi ayailbitsaëttoxaneto ponalia petaenexatsi Jesús. Nexata bajarapamonaë jumaiti:

—Juanpijinē Dioso pesaēta pinijicuene apo exanaponae ata, itsiata daxita pacuenia tajēvelia vajunupaeba maponē yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaētoхането jumecovēnēta Jesús Dioso athēbēvetsica pitorobinēcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinē, avitane tsanucae Betania tomarata. Bajarapatomarata ponaponabeje pematapijivabeje, Mariabeje Martabeje. ² Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematadata taxuiquicaenanua. ³ Nexata pamatacabi Lázaro avitane tsanuca, Mariabeje Martabeje tonajumeitorobaliabeje Jesús. Jumaitsibeje:

—Tajatuxanenē, niasivanē raja Lázaro catoavitane, jaibeje.

⁴ Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabēcueneta jivi yapētaena Dioso pinijicuene pexanaenexa pecaējēpaenēcuenetsi. Yapētaenanua xanē ata, Dioso pexēnatonē, pinijicuene taexanaenexa tanecaējēpaenēcuenē, jai Jesús pijajivijavabelia.

⁵ Jesús bitso asivaya taeyabiaba Martabana, Mariabana, Lázarobana.

⁶ Jesús vēnēlivaisitae ata Lázaro bitso piavitanejava, itsiata abaxē apo ponae Betania tomarabelia. Anijamatacabibeje abaxē ponapona Jordánmene itsapanatalia. ⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaitsi:

—Patajatuxanenē, canivita saya judíovi bajarajotalia jamatabēcātsecona picani ibotonēta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tsipaji icotiata napebeta xaniavaetsia.

¹⁰ Itsiata pajivi meravi ponapona, firapecae. Tsipaji meravi apo napebetsi xaniavaetsia. Bajara pijinia xanē ata itsinē. Ponae ata tsanetsi Betania tomarabelia, itsiata apo nitsacueniabi tsane. Tsipaji abaxē tajamatacabi apo netocopiapatsi, jai Jesús pijajivijavabelia petēpaejavanexa yabara.

¹¹ Bajaraxuacujinae Jesús peponaevajēnae jumaitsi pijajivijavabelia:

—Vajayapētaenē rabaja Lázaro majitanuca. Nexata baja ponajē. Itavabijitsianē Lázaro, jai Jesús.

¹² Nexata pijajivi jumaitsi:

—Patajatuxanenē, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapētaenē rabaja Lázaro majitanuca,” itsa jai Jesús, Jesús picani pejumaitsijume, “Lázaro rabaja tēpa,” pejaijume. Itsiata Jesús pijajivi apo jumeyapētaetsi. Bajarapamonae Jesús pijajivi jamatabēcuenenavēxaniabiaya jamatabējumaitsi: “Lázaro meta saya

majitanuca pacuenia majitanucabiaba meravi,” jamatabėjai.
 14 Bjaraxuata nexata Jesús roviaľia jumaitsi pijajivijavabelia:

—Lázaro rabaja tēpa. 15 Paepatota Lázaro tēpa, bajarajotalia apo pon-
 aponaenē. Bjaraxuata barēyanē paxamē yabara. Barēyanē tsipaji
 Lázaro petēpaexae, xaniavaetsia panejumecovēnētsianame. Baja nexata
 ponatsi, jai Jesús pijajivijavabelia.

16 Jesús pijajiviyajuvēnēnē, Tomás, ponē icatsia itsavēnē vēnērubatsi
 Sapalanē. Bjaraponē jumaitsi penajuaponaevijavabelia:

—Naponatsi Jesús pepēta. Ibotonēta itsa tseconatsi, vajayaja-
 vatēpaenexa bajaraponē, jai Tomás.

*Pacuenia Jesús caējēpatsi petēpaevi ata icatsia piasaēyaexanaenexa yabara
 pelivaisi*

17 Pepuaxainae baja cuatro pamatacabibeje Lázaro pipjinē
 pemēthētsicujinaetsi, Jesús matapania patajopa Betania tomarata.
 18 Betaniamara eca imoxoyo Jerusalén tomaravecua. Bejamatabēcuene
 anijakilómetrobeje epatua navecuaecabeje bajarapatomarabeje. 19 Jesús
 pepatsivajēnaeya Betania tomarata, ayaibitsaētōxaneto judíovi pata
 Martabeje Maríabejevaberena Lázaro petēpaexae. Bjarapamonae
 jumaitsi bajarapovabejevavabelia:

—Paxanē itsiata pacayanabatsi. Panajamatabēxainajē paxanē ata pa-
 pecavecuatēpaexaabeje panejuyapijinēbeje, Lázaro, jai bajarapamonae.

20 Itsa Marta vēnēlivaisitane Jesús penajetaruaejava, pitsapa pijabove-
 vua pemataenenaenexa Jesús. María itsiata bota nacopateca. 21 Nexata
 Marta itsa mataenenatsi Jesús, Marta jumaitsi Jesúsjavabelia:

—Tajatuxanenē, itsa majota ponaponaejitsipameje, apo tēpae tsipae
 tajuyapijinē. 22 Itsiata yapētaniji aeconoxae ata Dioso carajutsiana daxita
 pacuene vajētame Diosojavabelia, jai Marta.

23 Nexata Jesús jumaitsi Martajavabelia:

—Nejuyapijinē raja itsiata icatsia asaē tsaponaponae tsane, jai Jesús.

24 Nexata Marta apo jumeyapētae Jesús piasaēyaexanaejavanexa Lázaro.
 Bjaraxuata Marta jumaitsi Jesúsjavabelia mapacueniaje:

—Yapētaniji rabaja pacuenia icatsia Lázaro Dioso asaēyaexanaejitsiatsi
 pamatacabita icatsia asaēyaexanaenatsi daxita petēpaevimi, jai Marta.

25 Nexata Jesús jumaitsi Martajavabelia:

—Xanē rabaja petēpaevi ata icatsia tasaēyaexanaenē, tarajutsinē mata-
 cabi apo pevereverecejava. Pajivi nejumecovēnētsiana Cristonēcuenenē,
 bajarapajivi tēpae ata, itsiata icatsia asaē tsane. 26 Pajivi abaxē pa-
 matacabi asaē tsaponaponae mapanacuataje, itsa nejumecovēnētsiana
 Cristonēcuenenē, bajarapajivi tēpae ata, xainaena matacabi apo pev-
 erevererecejava. ¿Xamē tsabaja bajarapalivaisi jumecovēnētame? jai
 Jesús Martajavabelia.

27 Marta nexata jumaitsi:

—Tajatuxanenē, jumecovēnētajē rabaja. Xamē rabaja cajena
 Cristomē, Dioso pexēnatomē, ponē pacopiaeetavanapajē athēbēvetsica
 pepatsijavanexatsica mapanacuayabetsicaje jivi pecapanepaenexa, jai
 Marta.

Pacuenia Jesús vēnua Lázaro pemēthējavata yabara pelivaisi

²⁸ Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuyapijiva María. Nexata Marta muetsia jumaitsi Maríajavabelia:

—Vajanacacujarubinē rabaja pata. Cajunalia raja bajaraponē, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxē apo patsi Betania tomaraberenena. Ecojopa abaxē itsajotalia Marta mataenenatsi. ³¹ Pajudíovi bajarapovabeje pijabota pata peyanabinexatsibeje Lázaro petēpaexae, bajarapamonae tane María penonotabapunaejava bepíjia pepitsatabijavalia bovecua. Nexata bajarapamonae María pēnaponatsi. Tsipaji bajarapamonae jamatabējumaitsi:

—María raeta pejuyapijinēmi pemēthējavabelia pona pe-matanueyabinexa, jamatabējai:

³² Itsa María palia, itsajotalia Jesús ecojopa, nexata María pematatababēta nucajunua Jesús pitabarata. Jumaitsi:

—Tajatuxanenē, itsa majota ponaponaejitsipameje, apo tēpae tsipae tajuyapijinē Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapatsivi penuejava itsa tane, Jesús nexata bitso najamatabēxainaxuaba.

³⁴ Nexata Jesús jumaitsi bajarapamonaejavabelia:

—¿Detsa jota pamēthētame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamēthētajē Lázaro, jai.

³⁵ Jesús nexata vēnuu Lázaro. ³⁶ Nexata judíovi najumaitsi:

—Pataema Jesús penuejava. Jesús picani bitso asiva petēpaenēmi, najai judíovi.

³⁷ Itsamonae judíovi najumaitsi Jesús yabara:

—Mara ponēje itaxutoxaniavaeta bitso pitaxutotsēcēnaenēmi ataje xaniavaetsia petaenexa. ¿Apo caējēpaetsi tsamēra tsipae Lázaropijinē pejamatejemayaexanaenexa petēpaeyaniva? najai bajarapamonae.

Pacuenia Lázaro petēpaecujinae Jesús icatsia asaēyaexana yabara pelivaisi

³⁸ Jesús bitso sivanajamatabēxaina Lázaropijinē. Nexata Jesús cujilia Lázaropijinē pemēthētsiibovajutsijavabelia. Iboanaxanetota Lázaro yamēthēvēpa acatabuatatsi. ³⁹ Jesús nexata jumaitsi bajarajota penapatsivijavabelia:

—Pavecuatixiremelia mapaibopanaxanetoje, jai Jesús.

Nexata Marta, petēpaenē pematapijiva, jumaitsi:

—Tajatuxanenē, tuxutsaeba raeta baja bitso Lázaro. Tsipaji rabaja petēpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamē Dioso ayaicuene pexanaejava itsa jumecovēnētame Dioso, jai Jesús.

⁴¹ Nexata bajarapamonae Lázaropijinē pemēthēvēpavecua tixilia ibopanaxaneto. Jesús itaboxo naēcotsiaya jumaitsi:

—Taxa, pexaniajamatabēcuene carajutatsi tanejumetaexaemē.

⁴² Yapētāniji cajena tanenamuxunaevetabiabijavamē. Itsiata icatsia cavajētatsi mapamonaeje ayaibitsaētōxaneto pejumecovēnētsinexa taneitorobinēcuenemētsica, jai Jesús Diosojavabelia.

⁴³ Bajarapacuenia Jesús pejumlahtsicujinae, ayaijumeta jumaitsi Lázaro bebuatsiilbovajutsijavabelia:

—¡Lázaro, bajara jane mēthēvecua pitsaparemena! jai Jesús.

⁴⁴ Nexata baja Lázaro petēpaenēmi pitsaparena mēthēvecua. Piapi-asábanata daxitanēreca mataquionaeya pematacacēbicujinaetsireca abaxē, pitsaparena. Pitabaraacatsipapaēbērēpanatsi abaxē tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaē jamatabēvaetabatsi yabara pelivaisi (Mt 26.1-5; Mr 14.1-2; Lc 22.1-2)

⁴⁵ Judíovi, pamonae María yanabatsi, tane Lázaro petēpaenēmi Jesús pi-asaēyaexanaejava. Nexata bajarapamonaeyajuvēnēvi ayaibitsaēto jume-covēnēta Jesús Dioso pexēnatocuene. ⁴⁶ Itsiata itsamonae bajarapamonaejayuvēnēvi pona fariseovijavabelia. Nexata tsipaeba pacuenia Jesús Lázaro petēpaenēmi asaēyaexana. ⁴⁷ Nexata fariseovi, sacerdotevi penamatacaitorobivi yajava, nacaetuata. Nexata bajarapamonaе junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonaе najumaitsi:

—¿Detsa meta vaxaitsi itsanetsi? Bajaraponē Dioso pesaēta pini-jicuene pexanaejava exanapona. ⁴⁸ Itsa vaxaitsi cuenecopatsipatsi bajarapacuenie pexanaponaejava, daxitajivi jumecovēnētaaponaejitsipa bajaraponē. Apo jumecovēnētsi tsipae Romanonacua pevetsivi. Nexata Romanonacua pevetsivi anaepanae jitsipa. Itorobijitsiparena pijajivi, vajabitsaē. Nexata vajabitsaē itsa patsiparena, vajatemplobo nacatoxabijitsipaica. Nacaverebiabijitsipanua, najai bajarapamonaе.

⁴⁹ Bajarapamonaeyajuvēnēnē pevēnē Caifás. Bajarapamatacabi bajaraponē Caifás, sacerdotevi pepo penamatacaitorobinē tsaponaponaе. Nexata Caifás jumaitsi penajuanacaetuatsivijavabelia:

—Paxamē raja apo payapētaemē. ⁵⁰ Nexata Romanonacua pevetsivi vajabitsaē itsa itorobarena, vajanacaverebiabiyani, bepanajamatabēxainame mapacueniaje. Bajaraponē caenē itsa beyaxuabiaexanaenatsi, bajaraponē pejamatabēcueneta daxita judíovitsi vajavajabitsaē apo nacaverebiabi tsane, jai Caifás Jesús yabara.

⁵¹ Itsiata baitsi jane Caifás apo jumaitsi bajarapacuenia pijacuatana penajamatabēxainaecuenia. Biji rajane bajarapamatacabi Caifás daxita sacerdotevi pepo penamatacaitorobinēxae, Dioso bajarapacuenia jumaitsiayaexanatsi. Bajarapacuenia Caifás tajēvelia jumaitsi tsipaji Jesús sivatēpaejitsia daxita judíovi. ⁵² Itsiata Jesús apo sivatēpae tsane ējudíovi. Daxitanacuanējava, pamonaе nacayajataruta Dioso pexi, bajarapamonaе ata pecaetuatsinexa, sivatēpaena Jesús. ⁵³ Bajarapacuenia bajara pamatacabijavaveliacujinae cajena judíovi pevetsivi najamatabēveretapona pacuenia bajarapamonaе Jesús beyaxuabijitsiatsi.

⁵⁴ Bajaraxuata Jesús apo ponabiabi baja itsabelia judíovi nacaetatabiaba. Nexata Judea nacuavecua pitsapa. Jesús baja nexata pona petusatonaacua imoxoyojavabelia, Efraínvēnē tomarajavabelia. Nexata bajarapatonarata Jesús ponapona pijajivi yajava.

⁵⁵ Imoxoyo baja pevajēnae judíovi pijafiesta pejonematacabinexa, pascuavēnēfiesta. Nexata jivi ayaibitsaēto xaneto pona Jerusalén

tomarabelia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamonae naropoba tsiquiritomaraxijavaverena. ⁵⁶ Nexata bajarapamonae jaitarutatsi Jesús. Itsa bajarapamonae nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiesta-javaje? Jume. Apo patsi tsamëra tsane, najai ëpamonae.

⁵⁷ Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapëtane itsajota Jesús ponapona, petsipaebinxexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi

(Mt 26.6-13; Mr 14.3-9)

¹ Pejonenexa baja pascuavënëfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajaratamarata ponapona Lázaro, ponë Jesús asaëyaexana petëpaenëmi.

² Bajarajota Jesús pexaejava toexanatsi caniviyopijijava. Bajarajota Marta pexaejava tsanaponapona. Lázaro nanabaneca pamesata Jesús nabaneca. ³ Nexata María carena epatuabotellabëyota petuxujuviaceitera, nardovënëra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematana taxuiquica. Daxita bo tuatuajë tuxudereecaruta. ⁴ Nexata Jesús pijajiviyajuvënënenë, Judas Iscariote, Simón pexënato, ponë itsamat-

acabi Jesús canajetsijitsiatsi pijavajabitsaë pecobeyabelia, jumaitsi:

⁵ —¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejibivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabëxainaexae bepejibivi. Judas raja penacobetoxotsinë. Jesús bana pijapalatadoro pevetsiaexanaenëxaetsi, Judas nacobetoxotabiaba bajarapapalatayajuvënëjjava. ⁷ Nexata Jesús jumaitsi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëepanaenexa, apo tēpae atanë, tanoperabëxaniavaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa. ⁸ Daxitamatacabi raja bepejibivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponaponaenë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara pelivaisi

⁹ Ayaibitsaëtoxaneto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi

Jesús. Itsiata bajarapamonae apo ponaelia petaenexa ëJesús. Ponalia petaenexanua Lázaro, ponë Jesús asaëyaexana, petëpaenëmi. ¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹ Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaejava petëpaecujinae. Nexata bajarapajudíovi jumecovënëta pona Jesús Dioso pexënatocuene.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Lc 19.28-40)

¹² Jivi ayaibitsaëto xaneto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubenae bajarapamonae Jesús yabara.

¹⁴ Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucaejavanexa Jerusalén tomarata, Dioso pejumelivaisibaxutota tajëvelia jumaitsi mapacueniaje:

¹⁵ PaJerusalén tomarapijivimë, pëtsa pajunavame. Pataename pepo papecaevetsinënexa penajetarucaejava. Pejanaburroyota yapatana-jetarucaena,

jai tajëvelia Dioso pejumelivaisibaxuto Jesús burrojumata pepatanajetarucaejavanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaitsi Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaitsi Jesús yabara.

¹⁷⁻¹⁸ Pamonae tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaejavata petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús. ¹⁹ Nexata fariseovi itsa tane bajarapacueni, najumaitsi:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponaejavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

²⁰ Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi. ²¹ Nexata Grecia nacuapijivi cujibaliatsi

Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaitsi Felipejavabelia:

—Felipe, pajamatabëtaniji raja Jesús, jai.

²² Felipe nexata pona Andrésjavabelia petsipaebinxeta pacuenia Grecia nacuapijivi jumaitsi. Nexata Felipebeje Andrésbeje ponabeje petsipaebinxabeje Jesúsjavabelia. ²³ Nexata Jesús jumaitsi bajara-ponëbejevavelia:

—Xanë, Daxitajivi Pematapijinënë, tajamatacabi baja netocopiapata tanaviatsineta baja athëbëabetsia ayaijamatabëcuenenënë Dioso taneexanaeneta. ²⁴ Xaniajanë pacuenia pacatsipaebijitsiatsi. Trigoxuto ita apo ubitsi irabelia, saya tsitecanuca caexutoyo. Itsiata ita ubatsi, pejuvicujinae xutsabana vajaubixutoyomi penacopatsineta pejanaboto. Nexata ita nacuita bajarapaboto, ayaijava pexu capitsapa. ²⁵ Bajara pijinia itsi jivi ata. Pajivi jamatabëjumaitsi ata tsane petëpaeyaniva: “Xanë nayajivitaeyaponaponaenajë tanebejiobiaexanaeyaniva, tanebeyaxuabiyoniva ata,” jamatabëjai ata tsane, itsiata tēpaena. Nexata Diosovecua naxuabiana. Biji rajane pajivi nesivana-jamatabëcopatsiaya jamatabëjumaitsi tsane: “Jema nebejiobiaexanaena. Jema nebeyaxuabiananua Jesús pijajivitonëxaenë,” jamatabëjai tsane, bajarapajivi xainaena matacabi apo pevereverecaeyava. ²⁶ Pajivi jamatabënetonacueneba, bajarapajivi nepēnaponaena. Nexata pajivi netonacuenebiana, neyjavaponaponaena itsajota ponaponaenajë. Pajivi netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabëcuenabarëyanë,” jai tsane, jai Jesús Felipebeje Andrésbejevavelia.

Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi

²⁷ Jesús bēpēnëa jamatabëjumaitsi:

—Aeconoxae bitso najamatabëxainajë. ¿Detsa meta jumaitsinë tsane taxajavabelia? Jumaitsinë meta tsane: “Taxa, betajibicuenia tanebeyaxuabijavamineta, vecuanecapanepaeneta,” janë meta tsane taxajavabelia. Jume raja. Bajarapacuenia meta apo vajëtsinë tsane. Tsipaji betajibicuenia tanebeyaxuabineta, patajë mapanacuayabetsicaje, jamatabëjai Jesús.

²⁸ Nexata Jesús Diosojavabelia jumaitsi:

—Taxa, pacuenia jitsipame nexanaeneta jivi pecayiyataeneta, exanare, jai Jesús.

Nexata bajarajota Jesús jumetane athëbëvetsica ayaijume. Jumaitsicica mapacueniaje:

—Jivi rabaja cajena neyayiatane. Itsiata matavëjëa neyayiatana, jaitsica.

²⁹ Jivibitsaëto bajarajota penubenaevi jumetane bajarapajume. Nexata bajarapamona jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaicuaijaitsi Jesús, jai.

³⁰ Nexata Jesús jumaitsi bajarapamonaevavelia:

—Xanë raja tajumetaenexa bajarapajume apo jumaitsitsica. Paxamë raja panejumetaenexa jumaitsitsica. ³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabibaba pibisiacuene pexanaenexa. ³² Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajë xanë tane-sivanajamatabëcuene copatsinexa, jai Jesús.

³³ Bajarapacuenia Jesús tajëvelia jumaiti jivijavabelia jivi peyapëtaenexa pacuenia Jesús tēpaejitsia. ³⁴ Nexata bajarapamonae jumaiti Jesúsjavabelia:

—Dioso Moiséspijinëta penajumecopatsilivaisi tajëvelia jumaiti mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinënë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matcabijavabelianexa asaë tsaponaponae tsane? jai bajarapamonae Jesúsjavabelia.

³⁵ Nexata Jesús jumaiti bajarapamonaejavabelia:

—Imoxoyo rabaja pevajënae taponamatacabinexa. Abaxë raja itsiata taponaponamatacabibeje, pacatsipaebianatsi pexaniajailivaisi patacjamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame panejamatabëcueneitaquiriyaniva. Pajivi ajamatabëcueneitaquiri, apo xinae tsane matacabi apo peverevereaejava. ³⁶ Xanë rabaja pexaniajailivaisita pacajamatabëcueneitayotsianatsi. Taponaponamatacabibeje abaxë mapanacuataje, panesivanajamatabëcopatsianame. Bajarapacuenia nexata jamatabëcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

Pacuenia judíovi jamatabëjumaiti Jesús yabara: “Maponëje apo Cristo, ponë copiaevetavanapatsi vajanacacapanepaenexa,” jamatabëjai yabara pelivaisi

³⁷ Jesús ayaicuene pexanaejava Dioso pesaëta judíovi pitabarata exanapona. Judíovi tae ata bajarapacueni, itsiata apo jumecovënëtsi Cristocuene. ³⁸ Nexata judíovi itsa apo jumecovënëtsi Cristocuene, copia-pata jane baja pacuenia bajayata tajëvelia yaquina Diosojumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaiti mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane, tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaiti mapacueniaje:

40 Bajarapamonae Dioso itaxutotsēcēnaeayaexanaena. Ajamatabēcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaēta pexanaejava, itsiata bajarapamonae apo yapētae tsane pajamatabēcuenelivaisi xaina petaejava. Nexata bajarapamonae Diosojavabelia apo najamatabēcuenepēnēyorotsi tsane perujumatabēcuenevenecua. Nexata apo jamatabēcuenexaniavaetsinē tsane, jai bajayata tajēvelia Isaiāspijinē peyaquinaelivaisita judíovi Cristocuene apo pejumecovēnētsijavanexa yabara.

41 Bajarapacuenia Isaiāspijinē yaquina tsipaji bajayata Isaiāspijinē be-majitsinaebota tane Jesús ayaijamatabēcuenē pexainaenēcuene. Bajaraxuata bajayata Isaiāspijinē bajarapacuenia Jesús vajunupaeba baja cajena.

42 Itsiata judíoviyajuvēnēvi ayaibitsaēto jumecovēnēta Cristocuene. Judíovi pevetsivi ata jumecovēnēta Cristocuene. Bajarapamonae judíovi pevetsivixae, apo navajunupaebi pejumecovēnētsijava Cristocuene. Tsipaji cujunava fariseovi. Bajarapamonae bēpēnēa jamatabējumaitsi:

—Apo navajunupaebinē tsane tajumecovēnētsijava Cristocuene tanecapitsapaeyaniva fariseovi judíovi penacaetuatabibovecua, jamatabējai bēpēnēa bajarapamonae.

43 Tsipaji bajarapamonae jitsipa penajuaevetsivi pesivabarēyajavatsi Dioso pesivabarēyajavatsi matatoxenetsia.

Pacuenia jivi naneconitsijitsia Diosojavabelia itsa apo jumecovēnētsi Jesús petsipaebilivaisi yabara pelivaisi

44 Jesús jumaitsi ayaijumeta jivijavabelia:

—Pajivi jumecovēnētsiana Cristocuenenē, bajarapajivi ēxanē yabara apo jumecovēnētsi tsane. Taxa, ponē nitorobica, bajaraponē yabara ata jumecovēnētsiana.

45 Pajivi necueneyapētaena, bajarapajivi taneitorobinētsica ata cueneyapētaena. 46 Xanē rabaja pexaniajailivaisita jamatabēcuenēitayotsianajē mapanacuapijivije. Nexata pajivi jumecovēnētsiana Cristocuenenē, apo ajamatabēcuenēitaquiri tsane. 47 Pajivi jumeyapētae ata tsane tatsipaebilivaisi, itsiata itsa apo jumecovēnētsi tsane bajarapalivaisi, bajarapajivi naneconitsiana Diosojavabelia. Itsiata xanē bajarapajivi apo naneconitsiaexanaenē tsane. Tsipaji xanē apo patsinētsica tananeconitsiaexanaenexa mapanacuapijivije. Biji rajane xanē patsicajē tacapanepaenexa mapanacuapijivije. 48 Pajivi nenayajiviitavetsiana, apo nejumecovēnētsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexinaevi tatsipaebilivaisi apo pejumecovēnētsixae.

49 Tsipaji xanē tajamatabēcueneta apo paebinē bajarapalivaisi. Taxa raja, ponē nitorobica, nitoroba bajarapalivaisi jivi tatsipaebinexa.

50 Yapētaniji baja cajena jivi pexinaejavanexa matacabi apo pevereverecejavejava itsa jumecovēnēta taxa pitorobilivaisi. Nexata bajarapalivaisi itsa tsipaebaponajē jivijavabelia, tsipaebaponajē pacuenia taxa Dioso nitoroba tatsipaebinexa, jai Jesús jivijavabelia.

13

Pacuenia Jesús beveliajamatabēcuenenē nataeya taxuquiatapona pijajivi, caenē canacujitsia, yabara pelivaisi

¹ Caematacabi baja saica pejonenexa pascuavēñefiesta. Jesús nexata yapētane pamatacabita pijavajabitsaē beyaxuabijitsiatsi. Yapētanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabēcuenetajēta piasivacuene.

² Jesús pijajivi barēnabane caniviyopijijava. Nexata Judas Iscariote, Simón pexēnato, dovathi pejamatabēcueneta najamatabēxainaeaexanatsi. Nexata Judas najamatabēxaina Jesús pecanajetsinexa pijavajabitsaē pecobeyabelia. ³ Jesús yapētane paxa Dioso perajutsijavatsi daxitacuene pevetsinexa. Yapētanenua paxa Diosojavavetsica pepatsijava. Icatsia pacuenia ata naviatsijitsia paxa Diosojavabetsia, yapētane. ⁴ Nexata Jesús pijajivi pebarēnabanijavata, Jesús nonotapuna mesajavata. Najumajonota penaxatatsijava. Nexata toalla naepacēta. ⁵ Jesús mera epata penacobequiatsinējavabelia petaxuquiatsinexa pijajivi. Jesús nexata beveliajamatabēcuenenē nataeya taxuquiatapona pijajivi, caenē canacujitsia. Taxuiquicapona icatsia pijatoallata penaepacētsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenē, apo jitsipaeñē tanetaxuquiatsijavamē. Tsipaji ayaijamatabēcuenenēmē, jai Simón Pedro Jesúsjavabelia.

⁷ Jesús nexata jumaitsi:

—Aeconoxae abaxē apo yapētaemē pajamatabēcuenē yabara catax-
uquiatsijitsiatsi. Itsiata baitsi jane bexējavabelia yapētaename, jai Jesús.

⁸ Nexata Pedro jumaitsi:

—Apo catonataxucopatsi tsanetsi tanetaxuquiatsinexamē, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonēmē tsane, jai Jesús Pedrojavabelia.

⁹ Simón Pedro nexata jumaitsi:

—Tajatuxanenē, ētaxu nexata apo netoquiatsimē tsane. Tacobe ata, tamatabocoto ata, netoquiatsianame, jai Pedro.

¹⁰ Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanē. Saya namatavenona ēpetaxuquiatsinexatsi. Tsipaji baja daxitanē axuirajibi. Paxamē rabaja pajamatabēcuenexuirajibimē. Itsiata baitsi jane apo padaxitamē, jai Jesús Pedrojavabelia.

¹¹ “Pajamatabēcuenexuirajibimē. Itsiata baitsi jane apo padaxitamē,” jai Jesús. Tsipaji yapētane tajēvelia ponē canajetsijitsiatsi pijavajabitsaē pecobeyabelia.

¹² Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapētaneme tsabaja paxamē pajamatabēcuenē yabara pacataxuquiatsi? ¹³ “Vajanacacujarubinē,” pajamē tsabiabi itsa panabarēcuaicuaijamē xanē yabara. Itsjavata: “Vajatuxanenē,” pajamē tsabiabi. Paxaniajamē rabaja cajena. Bajara tsipaji taitsinē.

¹⁴ Xanē, patacacujarubinē ata, panijatuxanenē atanēnuā, beveliajamatabēcuenenē nataeya pacataxuquiatsi bepanijajivitonēñecuena. Nexata bajarapacuenia paxamē ata beveliajamatabēcuenēni nataeya panataxuquiatabianame namataenetsia. ¹⁵ Pacatsitaexanatsi bajarapacuenē paxamē ata bajarapacuenia namataenetsia

panenatoexanaenexa. ¹⁶ Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tsipaji itsanë ata apo jamatabëcuenematatoxenetsi pitorobinetsi. ¹⁷ Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya itsa panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënënenë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijitsia. Tsipaji xanë patacaitapetsivi patajajivinexamë, pacajamatabëcuenyapëtanetsi pacanenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana. ¹⁹ Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. ²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyajavacopiapitsiana. Pajivi necopiapitsiana, bajarapajivi neyajavacopiapitsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabitsaë pecobeyabelia yabara pelivaisi

(Mt 26.20-25; Mr 14.17-21; Lc 22.21-23)

²¹ Jesús pejamatabëëthëtota bëpënëa bitso natsinajamatabëxaina. Nexata roviafia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënenë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaitsi. ²³ Jesús pijajiviyajuvënënenë, caenë bitso asivaya tane. Bajaraponëbeje Jesúsbeje namuxunenixaeyecabeje. ²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, ¿jipatsa yabara jumaitsimë? jai bajaraponë Jesúsjavabelia.

²⁶ Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocajabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatojavabelia. ²⁷ Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaē najuaxaeyena bajarapamesata, apo jumeyapētaē xua yabara Jesús jumaitsi Judasjavabelia. ²⁹ Judas tovetabiaba bajarapamonaē pijapaladoro. Bajaraxuata Judas yabara Jesús pijajivi jamatabējumaitsi:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenejavaxi bepejihivi-javabelia, jamatabējai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavana-paenexa yabara pelivaisi

³¹ Pabota Jesús pijajivi barēnacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaitsi pijajivijavabelia:

—Aeconoxae rabaja xanē, Daxitajivi Pematapijinēnē, najamatabēcuenitajētsianajē ayaijamatabēcuenē taxainaejava. Taxa Dioso ata bajarajota yajavajamatabēcuenitajētsianajē ayaijamatabēcuenē pexainaejava. ³² Nexata taxa Dioso juya nejamatabēcuenitajētsiana ayaijamatabēcuenē taxainaejava. Bajarapacuenē baja naxanitsiayo taxa Dioso exanaena. ³³ Bepataximē patacataevi. Bajara maapo pacayajavaponaponaetsi tsane bajayajebije. Paxamē panejaitsoniane. Pacuenia jumaitsinē itsamonae judiōvijavabelia, bajarapacuenia paxamējavabelia ata pacajumaitsijitsiatsi. Apo pacacaējēpae tsane paneponaenexa itsabelia ponaejitsianē. ³⁴ Pacatsipaebijitsiatsi icatsia pejanalivaisi. Paexanavanapaenē name mapacueniaje. Pasivamē tsavanapae tsane itsamonae ata. Pacuenia xanē pacaasivatsi, bajarapacuenia namataenetsia panaasivamē tsavanapae tsane. ³⁵ Namataenetsia itsa panaasivamē tsavanapae tsane, nexata daxitanacuanēpijivi pacayapētaena patajajivicuenemē, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē nayavajunuaxainaenē name tajajivitonēcuenemē,” jai yabara pelivaisi

(Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

—Tajatuxanenē, ¿detsa belia ponaejitsiamē? jai Pedro.

Nexata Jesús jumaitsi Pedrojavabelia:

—Itsa belia ponaejitsianē, aeconoxae apo cacaējēpae tanepēnaponaenexamē. Itsiata baitsi jane itsamatacabi nepēnaponaenē name, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenē, ¿detsa xuajitsia apo necaējēpae aeconoxae tacapēnaponaenexa? Daxita pacuenia nitorobame, catoexanaejitsipatsi. Nebeyaxuabijitsia ata tsipae xamē yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamē tsaja? ¿Nacaevetsipame pecabeyaxuabinexa taneasivaxaemē? Xaniajanē pacuenia catsipaebijitsiatsi. Vacara raja pefiabivajēnaeya, nayavajunuaxainaenē name tajajivitonēcuenemē. “Apo yapētaenē cajena bajaraponē,” jamē tsane xanē yabara acueyabi xubeje, jai Jesús Pedrojavabelia.

14

Pacuenia Jesús benamuto paxa Diosojavabetsia yabara pelivaisi

¹ Jesús jumaitsi pijajivijavabelia:

—Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata.

² Taxajavatatsia pexaniabobitsaëtonë xaina panejinavanapaenexa. Itsa baja apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë.

³ Xanë taponaeujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacacaponaeenexatsia jane baja. Nexata bajarajotatsia pacayajavaecaenatsi, itsajota ecaenajë. ⁴ Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaejsianë, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

—Xanë rabaja benamutonë. Tsipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë. Xanë rabaja xainajë matacabi apo pevereverecea-
java tarajutsinexa pamonae nesivanajamatabëcopata. Itsajivi ata apo patsicapanepae tsane taxajavabetsia xanë itsa apo nejumecovënëtsi.

⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸ Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹ Jesús nexata jumaitsi:

—Felipe, bajayajebi rabaja pacayajavaponaponatsi. ¿Itsiata tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa?

¹⁰ Taxa baja cajena neyjavaponapona. Xanë ata taxa yajavaponapona-jë. ¿Abaxë tsaja apo jumecovënëtsimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaexana. Nexata bajarapalivaisi pacatsipaebatsi.

¹¹ Panejumecovënëre taxa tayjavaponaponaejava. Panejumecovënërenua taxa ata taneyjavaponaponaejava. Patacatsipaebilivaisianë apo panejumecovënëtsi atamë, itsiata ayaicue ne Dioso pesaëta taexanaexae, panejumecovënëre taxa tayjavaponaponaejava.

¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicue ne taexanaejava matatoxenetsia bajarapajivi exanaena. Tsipaji xanë naviatsonianajë taxajavabetsia. ¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenearëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espíritu Santo jivijavabetsica yabara pelivaisi

¹⁵ Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. ¹⁶ Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatacabijavabelianexa. Bajaraponë Espíritu Santo. ¹⁷ Espíritu Santo cajena pepo pexaniajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëecaetsi. Tsipaji bajarapamonae apo nejumecovënëtsi. Nexata apo yapëtae ponë Espíritu Santo. Apo yapëtaenua cajena Espíritu peponaponaejava ata. Itsiata baitsi jane paxamë Espíritu Santo payapëtaneme baja. Tsipaji baja bajaraponë pacayajavaponapona. Espíritu Santo cajena pacatsijamatabëecaena daxitamatacabijavabelianexa. ¹⁸ Ponae atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayajavaponaponaenexa. ¹⁹ Caematacabibejucujinae baja jivi apo netae tsane. Itsiata icatsia paxamë panetaename. Paxamë paxainaename matababi apo peverevereaejava. Tsipaji tatëpaecujinae icatsia asaenë tsaaponapona tsane. ²⁰ Pamatacabi Espíritu Santo patsianica paxamëjavabetsica, bajarapamatacabi payapëtaename taxa tayajavaponaponaevanexa. Payapëtaenamenua pataneyajavajinavanapaejavanexamë. Payapëtaenamenua xanë ata patacayajavaponaponaevanexa. ²¹ Pajivi yapëtane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

²² Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³ Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje. ²⁴ Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵ Icatsia Jesús jumaitsi pijajivijavabelia:

—Abaxë patacayajavaponaponaepato pacatsipaebijitsiatsi mapacueniaje. ²⁶ Taxa tajamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeyaexanaena daxitacuene. Pacanamatabënapitsiaexanaenanua daxita palivaisi pacatsipaebaponatsi, jai Jesús.

²⁷ Icatsia Jesús jumaitsi pijajivijavabelia:

—Pacanapëjibatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. ²⁸ Panejumetaneme

rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajaijava. Itsa bitso panejitsipaejitsipame, nexata pasivajamatabëcuenabarëyamë tsipae taponaejavanexa taxajavabetsia. Tsipaji taxa nevecuaayaijamatabëcuenenë. ²⁹ Bajarapacuenia pacajumaitsitsi taponaevajënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰ Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipae-baponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabonexa. ³¹ Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacaucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipa, panevajënaeyabelia paexanavanapaename. ³ Paxamë rabaja panejumecovënëtame patacatsipaebilivaisi. Bajaraxuata taxa baja pacavecuaxuaba pibisiajamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaisi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yajavaponaponaenajë. Bajarapajivi exanabiabiana bitso Dioso pejitsipacuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaë apo neyjavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamë tsitecaeya panejumecovënëtavanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua

panevajètame. ⁸ Itsa paxamë jivi patsitaexanavanapaename taxa Dioso pejitsipaecuenia, jivi yayataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuenie Jesús pijajivi,” jai tsane. ⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavanapaename pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. ¹² Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. ¹³ Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo caëjëpaetsi bajarapacuenia pexanaejivi matatoxenetsia piasivanexa peyapëtaejivitsi. ¹⁴ Itsa paexanavanapaename patacaitorobicuenia, nexata baja patajamonamë tsane. ¹⁵ Aeconoxae baja cajena saya bepatajajivicueniamë apo pacataetsi. Bepatajamonamë baja bitso pacatanetsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. ¹⁶ Paxamë raja apo panejunatsimë. Biji rajane xanë pacajunatatsi patanepënaponaenexamë. Nexata xanë pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo peverevereceaevanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. ¹⁷ Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapitsianame xanë copiaya taneitoyajava bajarapamonae. ¹⁹ Mapanacuapijivi, pamonae Dioso apo pejumecovënëtsivi, namataenetsia nasiva tsavanapae. Paxamë ata bajarapamonae itsa pajamatabëcuenejëpa vanapaejitsipame, nexata paxamë ata bajarapamonae pacaasiva tsipae. Itsiata baitsi jane xanë baja pacajunatatsi bajarapamonaevecua. Nexata baja paxamë apo pajamatabëcuenejëpaemë bajarapamonae. Bajaraxuata pacaitoya tsane bajarapamonae. ²⁰ Panajamatabënapitabiabianame najumecapanepaeya patacajumaitsijava: “Itsanë ata apo jamatabëcuenematatoxenetsi

pijatuxanenë,” patacajaijava. Nebejiobiaexana itsamonaë. Nexata paxamë ata itsamonaë pacabejiobiaexanaena. Itsamonaë nejumecovënëta tatsipaebilivaisi. Nexata pijinia paxamë ata itsamonaë pacajumecovënëtsiana panetsipaebilivaisi. ²¹ Bajarapacuenia pacaexanaena mapanacuapijivije xanë patajajivixaemë. Tsipaji bajarapamonae apo yapëtae Dioso, ponë nitorobica, jai Jesús tajëvelia pijajivijavabelia.

²² Icatsia Jesús jumaitsi pijajivijavabelia:

—Xanë itsa apo patsinëtsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tsipaji bajarapamonae Dioso apo peyapëtaexae, pibisiacuene exanaejitsipa. Nexata xanë tapatsixaetsica mapanacuayabetsicaje, bajarapamonae yapëtane baja Dioso. Nexata bajarapamonae yapëtae ata Dioso, pibisiacuene pexanaexae, nexata naneconita Diosojavabelia. Nexata acuenebi bajarapamonae pejumaitsijava pibisiacuene pexanaejava yabara: “Apo tayapëtaexae Dioso, pibisiacuene exanajë,” pejajjava. ²³ Nexata pamonaë nitoya, bajarapamonae taxa ata itoya. ²⁴ Bajarapamonaejavata Dioso pesaëta pinijicuene taexanaejava exanabiabajë. Bajaraxua itsajivi ata apo exanaë mapanacuata. Bajarapamonaejavata pinijicuene taexanaejava itsa apo exanaenë tsipae, apo naneconitsi tsipae Diosojavabelia. Tsipaji bajarapamonae apo yapëtae tsipae Dioso. Bajarapamonae tae ata Dioso pesaëta pinijicuene taexanaejava, itsiata apo nejumecovënëtsi. Bajarapamonae nitoya. Taxa ata itoya. Nexata naneconita Diosojavabelia. ²⁵ Bajarapacuenia nitoya tsipaji baja cajena bajayata tajëvelia bajarapamonae taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamonae, ajibi taneyabaraitoyajava ata,” jai tajëvelia Dioso pejumelivaisibaxutota xanë yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajëtsianajë taxajavabelia pitorobinexatsica Espíritu Santo, pexani-ajailivaisi pepaebinënexa. Itsa patsianica Espíritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espíritu Santo xanë nevajunupaebiana xaniavaetsia. ²⁷ Paxamë baja cajena tataxuxuabijavaveliacujinaë jivi livaisi tatsipaebijava, paneyajavajinavanapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

16

¹ Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabiyaniava patanejumecovënëtsilivaisimë. ² Paxamë papecaitojavivi, pacacapit-sapabiabiana judíovi penacaetuatabiabibovecua. Belia jane baja itsamatacabijavabelia pacabeyejebiana. Nexata pamonaë pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejebajë mapamonaeje,” jai tsane. ³ Bajarapamonae xanë apo neyapëtae. Apo yapëtae cajena taxa ata. Bajaraxuata bajarapacuenia pacaexanaena. ⁴ Bajarapacuenia tajëvelia pacatsipaebatsi baja cajena. Nexata jane baja pamatacabi

pacatsipatsiana bajarapacuene, panajamatabēnapitsianame pacuenia baja cajena tajēvelia pacatsipaebatsi, jai Jesús pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxē apo pacatsipaebitsi mapacuene yabaraje. Bajarapacuenia apo pacatsipaebitsi tsipaji abaxē pacayajavaponaponatsi.⁵ Itsiata baitsi jane aeconoxae baja payapētae atamē tanaviatsijavanexa taneitorobinējavabetsia, itsanē ata paxamēyajuvēnēnē apo neyanijobi. “¿Detsa belia ponaejitsiamē?” apo nejai.⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabēxainame.⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuapona tsipaetsi, apo pacatopatsitsica tsipae Espiritu Santo papeayajavaponaponaenexa. Espiritu Santo pacayavenonabiabiana. Pacajamatabēcuene asaēyaexanaenanua. Itsa ponaenajē taxajavabetsia, nexata Espiritu Santo pacatoitorobianicatsi.⁸ Nexata Espiritu Santo patsianica. Nexata Espiritu Santo pejamatabēcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuapona tsipaetsi, apo pa, pamonaē Dioso apo pejumecovēnētsivi, nacueneyapētaena pibisiacuene pexanaejava. Yapētaenanua pacuene xanepana pexanavanapaenexa Dioso pitabarata. Yapētaenanua pacuenia Dioso naneconitsiaexanaejitsiatsi bajarapamonae pibisiacuene pexanaeneconi yabara.⁹ Espiritu Santo pejamatabēcueneta, bajarapamonae nacueneyapētaena pibisiacuene pexanaevicuene. Tsipaji xanē bajarapamonae apo nejumecovēnētsi pibisiacuene pexanaeneconi tavecuajibiaexanaejavanexa.¹⁰ Nexata Espiritu Santo pejamatabēcueneta, bajarapamonae yapētaena pacuene xanepana pexanavanapaenexa Dioso pitabarata. Tsipaji baja xanē naviatsianajē taxajavabetsia. Nexata baja bajarapamonae pematatsēnēa apo netae tsane.¹¹ Bajarapamonae Espiritu Santo pejamatabēcueneta, yapētaena pacuenia Dioso naneconitsiaexanaejitsia daxita pamonaē pibisiacuene pexanaevi dovathi pejamatabēcueneta. Tsipaji Dioso naneconitsiaexanaena dovathi, ponē mapanacuapijivi itorobabiaba pibisiacuene pexanaenexa, jai Jesús pijajivijavabelia.

¹² Icatsia Jesús jumaitsi pijajivijavabelia:

—Ayailivaisi picani abaxē xainajē patacatsipaebinexa. Itsiata baitsi jane abaxē apo pacajamatabēcuenecaējēpae bajarapalivaisi panejumeyapētaenexa.¹³ Matapania pamatacabi patsianica Espiritu Santo, ponē pexaniajailivaisi pepaebinē, bajaraponē pacayapētaeyaexanaena daxita pexaniajailivaisi. Espiritu Santo raja apo pacayapētaeyaexanae tsane saicaya pejamatabēcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapētaeyaexanaena. Nexata tajēvelia Espiritu Santo pacayapētaeyaexanaena pacuene pevajēnaeyabelia copiapataponaejitsia.¹⁴ Espiritu Santo pejamatabēcueneta jivi neyaiyataena. Tsipaji xanē talivaisi, pexaniajailivaisi, Espiritu Santo pacayapētaeyaexanaena.¹⁵ Daxita taxa pexinaejava, xanē ata rabaja tajajava. Bajaraxuata pacajumaitsi: “Xanē talivaisi, pexaniajailivaisi, Espiritu Santo pacayapētaeyaexanaena,” pacajaitsi, jai Jesús pijajivijavabelia.

Pacuenia bepejamatabëcuenejibivimi jamatabëcuenebarëyajitsia yabara pelivaisi

¹⁶ Icatsia Jesús jumaitsi pijajivijavabelia:

—Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia, jai Jesús.

¹⁷ Nexata pijajiviyajuvënëvi nayanijoba ëpamona.

—¿Detsa majumaitsi pajumeje? Jesús nacajumaitsi: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai. ¹⁸ ¿De tsaeta pejumaitsijume: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

¹⁹ Jesús jamatabëcueneyapëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsitsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaitsi. ¿Baja tsa pajume yabara panayanijobame? ²⁰ Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaename. Itsiata baitsi jane pamonaie apo nejumecovënëtsi, barëya tsane tatēpaejava yabara. Itsiata baitsi jane xuacujinae paxamë icatsia bitso panesivajamatabëcuenebarëyamë tsane itsa panetaename icatsia. ²¹ Pamatacabi petiriva vixanotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuenebarëya. ²² Bajara pijinia pacuenia paxamë ata bitso panajamatabëxainaename itsa tēpaenajë. Itsiata icatsia itsa panetaename, bitso panesivajamatabëcuenebarëyamë tsane. Nexata itsajivi ata apo caëjēpaetsi tsane papecavecuajibiaexanaenexa panejamatabëcuenebarëyajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamamatacabi icatsia panetaename, apo paneyanijobimë baja tsane itsacuenejavayo ata. Tsipaji baja Espiritu Santo pacayapëtaeayaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuenebarëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba manacuapijivije pibisiacuene pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebiababatsi, najumematayatsiaya pacatsipaebiababatsi. Itsiata itsamatacabi livaisi apo pacatsipaebi tsanetsi

najumematayatsiaya. Biji rajane pacatsipaebianatsi jumenapebetsiaya taxa pelivaisi. ²⁶ Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. ²⁷ Paxamë paneasivamë. Panejume-covënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. ²⁸ Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsianiajë baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcueneyapëtanetsi daxitacuene neyapëtaenëcuene. Xamë panejamatabëcueneyapëtaneme palivaisi picani jamatabëpacayanijobatsi. Bajaraxuata pacajumecovënëtatsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtamë taxa Dioso athëbëvetsica taneitorobinëcuenetsica? ³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenënë. Itsiata baitsi jane apo caenënë tsane. Tsipaji taxa yajavaponaponajë. ³³ Bajarapacuenë tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuenecopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. ² Xamë rabaja netocopatame daxitajivi taevetsinexa. Nexata necaëjëpa tarajutsinexa matacabi apo peverevereaejava daxita pamonaerajutame. ³ Matacabi apo peverevereaejava pexainaevinexa, cayapëtane baja caenëmë pepo Diosonëcuenemë. Bajarapamonae neyapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa. ⁵ Taxa, pamatacabi abaxë ajibi mapanacuaje,

itsa cayjavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanajuavetaponaponaenexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

—Xamë itapetame itsamonae mapanacuataje tanesivanajamatabëcopatsinexa. Xanë nexata yapëtaeyaexanajë bajarapamonae pacuenia jamatabëcueneitsimë. Bajarapamonae nijajivi nerajutame. Xaniavaetsia cajumecovënëta nijumelivaisi. ⁷ Aeconoxae baja bajarapamonae nijajivi yapëtane xamë nejamatabëcueneta taexanaponaejava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonae. Nexata nejumecovënëta. Nexata yapëtane bajarapamonae pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuenemëtsica, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

—Cavajëtatsi bajarapamonaenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. ¹⁰ Daxita pamonaenae nijajivi, bajarapamonae xanë ata tajajivi. Daxita pamonaenae tajajivi, bajarapamonae xamë ata nijajivi. Daxitajivi neyapëtane ayaijamatabëcuene taxinaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

—Xanë baja apo ponaponaenë tsane mapanacuataje. Tsipaji baja ponaejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecua. Vaxaitsibeje caejamatabëcuene xainatsibeje. Nexata bajarapamonae ata tojitsipajë caejamatabëcuene pexainaenexa. Pacuenia vaxaitsibeje jamatabëcueneitsitsibeje, bajara pejamatabëcueneitsinexa. ¹² Itsa abaxë yajavaponaponajë bajarapamonae mapanacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. ¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpae. ¹⁵ Apo cavajëtsitsi raja nejutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije. ¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaenae penatsatsinexa dovathi pejamatabëcuenevecua. Nexata bajarapamonae exanavanapaena xamë netojitsipacuenia

nijumelivaisi baja petsijamatabëecaexaetsi. ¹⁸ Pacuenia xamë nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje. ¹⁹ Pacuenia xamë netojitsipame, tajajivi yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojitsipame, catoexanavanapaena. Tsipaji baja bajarapamonae yapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëajavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexëajavabelia bajarapamonae nejumecovënëtsiana. ²¹ Nexata cavajëtatsi daxita bajarapamonae penajamatabëcuenejëpaenexa. Xamë neyajavaponaponame. Xanë ata pijinia cayajavaponaponatsi. Bajara pijinia pacuenia tojitsipajë daxita bajarapamonae ata vajanacayajavajinavanapaenexabeje. Tojitsipajë bajarapamonae penajamatabëcuenejëpaenexa. Nexata bajarapamonae najamatabëcuenejëpaeya pejinavanapaejava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. ²² Pacuenia xamë yapëtaeyaexaname tajajivijavabelia xanë bitso ayaijamatabëcuene taxainaejava, bajara pijinia pacuenia xanë ata bajarapamonaejavabelia yapëtaeyaexanajë baja bajarapamonae ata ayaijamatabëcuenevi baja penaexanaejava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. ²³ Tajajivi yajavaponaponajë. Xamë pijinia neyajavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata penajinavanapaenexa itsabelia ponaëjitsianë. Jitsipajë bajarapamonae taneyajavajinavanapaenexa, taneyapëtaenexa bitso ayaijamatabëcuene taxainaejava. Tsipaji nacia nexanaevajënaeya ata, xamë niasivamë. Bajaraxuata ayaijamatabëcuenenënë nexaname. ²⁵ Taxa, itsaneconi ata apo nexainanë. Mapanacuapijivi, pamonae apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtane baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanexa, yapëtaeyaexanaponaenajë. Xanë bajarapamonae yajavaponaponaenajë, jai Jesús paxa Diosojavabelia.

18

Pacuenia Jesús pijavajabitsaë vaetabatsi pebeyaxuabinexatsi jane baja

*yabara pelivaisi**(Mt 26.47-56; Mr 14.43-50; Lc 22.47-53)*

¹ Jesús pevajëtsicujinae paxa Diosojavabelia, pijajivi barëpona Cedrónvënëñajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. ² Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba. ³ Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënuua capona. Beisotabuqueranënuua capona penatsivajënaeitayotsinexa. ⁴ Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabilia. Jumaitsi bajarapamonaejavabelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. ⁶ “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata. ⁷ Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaeje peponaenexa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenia jane baja copiajopa. ¹⁰ Nexata Jesús pijajivitonë, Simón Pedro, namaracëtauponapona espada. Nexata Simón Pedro espada navemara-jonotaxuabina. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco. ¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejiobiaexanaenexa. Bajaraxuata nacaevetsianajë tanebejiobiaexanaenexa, jai Jesús Pedrojavabelia.

Pacuenia Jesús nutatsi sacerdot. Pecujuanenia pamuxuyorotomi, muxuyoropaebiaxuaba sacerdotevi pepo penamataevi pepo penamatacaitorobinë pitabarata yabara pelivaisi

(Mt 26.57-58; Mr 14.53-54; Lc 22.54)

¹² Vajabitsaëvi pijacapitán, pijajivi yajava, judíovi pijapolicíavinua, nacobenavaetabatsi Jesús. Nexata cobecëtatsi. ¹³ Caponatsi baja Anásvënëñë pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinë tsaponapona.

14 Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë ita beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-70; Mr 14.66-68; Lc 22.55-57)

15 Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajiyo pënanajetarucabeje. Ponë Simón Pedro yanatatsi, bajaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. 16 Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuaijai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. 17 Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

18 Bajarapaepatota bitso bajarapameravi cainejeba. Nexata bajarapabota penacuenebivi, policíavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonopanuca.

Pacuenia sacerdotevi pepo penamatacaitorobinë Jesús yanijobatsi yabara pelivaisi

(Mt 26.59-66; Mr 14.55-64; Lc 22.66-71)

19 Anás jane baja sacerdotevi pepo penamatacaitorobinë jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nija-jivi? jai.

20 Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. 21 ¿Detsa xuajitsia nexata neyanijobame? Yanijobare pamonaevajavabelia tsipaebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapëtane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

22 Itsa bajarapacuenia Jesús jumaitsi, nexata bajarajota penucaenë templobopijipolicíanë itabarapacataxuabatsi. Policíanë jumaitsi Jesúsjavabelia:

—Pëtsa bajarapacuenia cuaicuaijamë sacerdotevi pepo penamatacaitorobinëjavabelia, jai.

²³ Jesús nexata jumaitsi policíanëjavabelia:

—Itsa pibisiacuena cuaicuaijanë, netsipaebare papibisiacuene yabara cuaicuaijanë. ¿Detsa xuajitsia saya xaniavaetsia tajumaitsiyava yabara, nebiame? jai Jesús.

²⁴ Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi

(Mt 26.71-75; Mr 14.69-72; Lc 22.58-62)

²⁵ Pedro abaxë nanonopanuca isotojavata. Nexata bajarajota penube-naevi jumaitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

²⁶ Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsiyava, vacara baja fiaba.

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Lc 23.1-5)

²⁸ Itsa baja ajena matababi tsina, Jesús capitsapatsi Caifás pijabove-cua. Nexata Jesús caponaliatsi nacuaevetsinë Pilato pijaboyabelia. Judíovi, pamonaenajetarubena Jesús peneconitsinexatsi, apo najonelia nacuaevetsinë Pilato pijaboyalía. Tsipaji Pilato apo judíonë. Judíovi apo joneyabiabi apo judíonë pijaboyalía. Bajarapamonae itsa jonejitsipa Pilato pijaboyalía, bajarapamonae judíovixae, jamatabëjumai tsipae: “Najamatabëcuenebijianajë Dioso pitabarata apo judíonë pijaboyalía tanajonexae. Nexata tavëna judíovi apo netocopatsi tsane tanaxaenexa pascua fiestamatababi pexaejava,” jamatabëjai tsipae bajarapamonae.

²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenë tsipae, apo pacatocapatsi tsipaetsi maberenaje, jai judíovi.

³¹ Nexata icatsia Pilato jumaitsi:

—Paca ponaremelia caevëalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamë baitsi jane apo panetocopatsimë patabeyaxuabinexa itsanë ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajëvelia pijajivijavabelia navajunupaebapona pebeyaxuabijavanexatsi.

³³ Nexata Pilato icatsia joneya pijaboyalía. Jumaitsi Jesúsjavabelia:

—¿Xamë tsaja judíovi pepo nevetsinë? jai.

³⁴ Jesús nexata jumaitsi Pilatojavabelia:

—¿Xamë tsaja nejamatabëcueneta neyanijobame? Jume. ¿Catsipaeba tsaja itsamonaexanë judíovi pepo taevetsinëcuene? jai Jesús.

³⁵ Pilato nexata jumaitsi:

—Xanë raja apo judíonënë. Bajarapacuenia apo tacasivanajamatabëxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanëjavaberena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanë apo taevetsinëje. Itsa ra peneta mapanacua taevetsinë tsipaeje, nexata paepatota judíovi nevaetaba, daxita tajajivi neyapijivinaamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

³⁷ Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaex jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapëtane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi

(Mt 27.15-31; Mr 15.6-20; Lc 23.13-25)

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinë cajena itsacujiruneconi ata pexanaejava, paneconi yabara bajaraponë naneconitsijitsia. ³⁹ Penaneconitsivi pejebabiabibota naneconitsia peponaponaenë pepitsapaenexa itsa panevajëtame, nexata pascua fiestamatacabi caenë pacatocapitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimë papecaevetsinë? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pëtsa abaxë copatame bajaraponë! ¡Panetocapitsapaename jane Barrabás! jai judíovi.

Bajaraponë Barrabás bitso penacobetoxotsinë. Bajaraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumattitibabenexatsi penaneconitsivi pejumaconitabiabimacata. ² Nexata pejumattitibabecujinaetsi vajabitsaë Jesús becoronacuenia tsmataexanatsi peejuvitoyoroto. Mataxatatsi bajarapaejuvitoyoroto. Bajaraxuacujinae quenetsiataeya benacuaevetsinëcuenia xatatatsi peraënaeyatsautsaucaejava. ³ Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponae Jesúsjavabelia:

—¡Bajaco, judíovi pepo pevetsinë! jai tsabuataponae.

Vajabitsaë pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapëtaenexa. Apo caxitjarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

⁵ Nexata peejuvitoyoroto Jesús namataxatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamë pacaponaremelia. Cruzajavabelia pacobematabiabarut-sianame. Tsipaji raja xanë apo caxitjarabinë itsacujiruneconi ata pexanaejava, jai Pilato.

⁷ Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsije: “Xanë raja Dioso pexënatonë,” jai. Paxanë pajudíovinë patajalivaisita itaveta bajara-pacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

⁸ Pilato itsa jumetane bajarapamonae pejumaitsijava: “Mara ponë Dioso apo pejitsipaecuenia jumaitsije: ‘Xanë raja Dioso pexënatonë,’ jai,” pejaijava Jesús yabara, nexata bitso Pilato junava. ⁹ Nexata icatsia Pilato pijaboyalía barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

¹⁰ Nexata Pilato jumaitsi:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcueneje? Nejamatabëcuenecejëpa raja taitorobinexa tajajivi cruzajavabelia pecacobematabiabarutsinexa. Nejamatabëcajëpanua taitorobinexa pecacopatsinexa ata, jai Pilato.

¹¹ Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanëjavaberenata apo cacajëpae tsipae taneitsacueniabinexamë. Itsi-ata baitsi jane ponë necanajeta xamë necobeyabelia, bitso naneconita Diosojavabelia xamë matatoxenetsia, jai Jesús Pilatojavabelia.

¹² Itsa bajarapacuenia Jesús jumaitsi, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:

—¡Itsamonae raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevetsinëjavabelia jane baja! ¡Nexata maponëbeje nijatuxanenëbeje naitoyabeje tsane! jai judíovi Pilatojavabelia.

¹³ Nexata Pilato ita jumetane bajarapacuenia judíovi pejumatsijava, Pilato eca tribunalvênêjavata, xuata Pilato ecabiaba jivi ita naneconitsiaexanaejitsia, hebreojumeta pevênê Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovêcua. ¹⁴ Pascuavênêfiesta pejonematacabinexa pevajênaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevetsinêje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema têpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinêmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenê raja Romanonacua pevetsinê paxainajê pepo patanevetsinê. Paxanê raja apo paxainaenê itsanê pematatsênêa pepo patanevetsinê, jai sacerdotevi penamatacaitorobivi.

¹⁶ Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponaenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaê ita caponaliatsi, caponaeyaexanatsi cruza, pacruzajavabelia Jesús cobematabiabarutsiijitsiatsi. Caponaliatsi jivimatasipavênê tsutojavabelia. Hebreojumeta bajarapatsuto pevênê Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanêbeje yajavacobematabiabarutatsi. Caenê canacujitsia pijacruzata rubatsi. Itsanê Jesús pecujuanenia ruca. Itsanê Jesús petsavenonemia ruca. ¹⁹ Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumai tsaruce bajarapaitane mapacueniaje: “Mara ponêje Jesús, Nazaret tomarapijinêje, judíovi pepo pevetsinê,” jai tsaruce bajarapaitane. ²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaêtoxfaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetanua, latínjumetanua. ²¹ Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponêje, judíovi pepo pevetsinêje,” pejaiitane. Biji rajane icatsia yaquinarutsiaexanare pejumaitsiitane mapacueniaje: “Mara ponê jumaitsije: ‘Xanê raja judíovi pepo taevetsinê,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanajë, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapiajavareca. Bajaraxua apo xainae pecaucutsiajoronaejava. Pecuejava saya caepanacujinae. ²⁴ Nexata vajabitsaë najumaitsi:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bajarapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaitsi Jesús penaxatatsijava yabara. Dioso baja cajena pejumelivaisibaxutota, tajëvelia jumaitsi Jesús penaxatatsijava yabara mapacueni-aje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapiajavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMaríavënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva.

²⁶ Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaitsi penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

²⁷ Bajaraxuacujinae icatsia Jesús jumaitsi pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

Pacuenia baja Jesús tëpa yabara pelivaisi

(Mt 27.45-56; Mr 15.33-41; Lc 23.44-49)

²⁸ Jesús baja yapëtane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaitsi:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvinora. Nexata vajabitsaënë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsiuiborutatsi Jesús petsutsuninexa. ³⁰ Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tëpanajereca.

Pacuenia Jesús becuereerebota yencacuatatsi yabara pelivaisi

³¹ Pascuavënë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesús bana baja matavëjëa perubenaejava cruzata. Tsipaji

pascuavënë fiestamatacabi itsa junua judíovi penacueraevetsimatacab-inexa, judíovi bitso banajamatabëcueneruviaba daxita penacueraevetsimatacabianë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëepatsicababenexatsi Jesúsbana, cruzata perubenaevi, bepíjia bajarapamonae petëpaenexa. Itsa baja bajarapamonae tēparubena, penotsinexatsitsica cruzavecua pecapon-aenexatsi itsajavabelia. ³² Nexata vajabitsaë itsa ponalia, Jesús peyajava cobematabiabarutsinëtsibeje asaëbeje abaxë tsarucae. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi. ³³ Nexata Jesús vajabitsaë itsa cujibaliatsi, taerutatsi baja Jesús petëpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëviyajuvënënenë becuererebota Jesús yenecacuataatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuenë. Nexata xanë yapëtaníji bajarapacuenë pexaniajaicuenë. Nexata bajarapalivaisi pacatoyaquinatsi panejumecovënëtsinexa paxamë ata. ³⁶ Bajarapacuenia Jesús apo thaëepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsivajënëtsi,” jai baja cajena itsabaxutota Jesús peyenecacuatsijavanexatsi yabara.

Pacuenia Jesús petëpaenë mëthëtsi yabara pelivaisi
(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviya-juvënënenë. Nexata José jumecovënëtaaponapona Jesús Cristocuene. Itsi-ata apo najamatabëcueneitajëtsi pejumecovënëtsijava Jesús Cristocuene. Tsi-paji cujunava penajuaevetsivi judíovi. Nexata baja Jesús itsa tēpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. ³⁹ Nicodemo, ponë meravi pona pebarëcuaiicuaijainexa Jesús, bajaraponë ata judíovi pevetsiviya-juvënënenë. Nexata Nicodemo Joséta nalia. Caponabeje treinta pakilobeje petuxujuvibenonë, pe-matajërëabibenonë petuxujuvijavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothocaecujinae-beje petuxujuvibenonë, pexaniaviria piapiasábanapanata mataquion-aeya daxitanëreca matakacëbabeje. Bajarapacuenia exanabeje tsi-paji judíovi baxaniavaeta petëpaejiviyo pemëthëtsinexa bajarapacuenia. ⁴¹ Itsajota Jesús cruzajavabelia cobematabiabarutatsi, bajarajota imoxo-yo peubinaenë ayaibacaboxaneto eca. Bajarapabacabojavata Jesús petëpaevajënaeya, José cajena exanaeyaexanabuata iboitapajanitovavata pinijiibovaju. José pijamonaejivi itsa totëpatsi, pebuatsinexa bajarapai-bovajulia. José ata itsa tēpa, pebuatsinexatsi bajarapaibovajulia. Nex-ata bajarapaibovajulia abaxë itsajiviyo ata petëpaejiviyo apo buatsitsi. ⁴² Nexata bajarapaibovajulia Josébeje Nicodemobeje Jesús petëpaenë buatabeje. Tsi-paji bajarapaibovaju boca imoxoyo. Judíovi ata baja

penacueraevetsimatacabinexa, bitso baja imoxoyo pejonenexa. Bajaraxuata bajarapaibovajualia Jesús petëpaenë buatatsi.

20

Pacuenia Jesús petëpaecujinae icatsia asaë yabara pelivaisi

(Mt 28.1-10; Mr 16.1-8; Lc 24.1-12)

¹ Judíovi baja penacueraevetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanut-sijavalia ibovajuvëpavecua. ² Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejevavelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. ⁴ Najucujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavabelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajualia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matacëtatsi, apo yajavabocae bajarajota. Saicayajavata xaniavaetsia quionabuata. ⁸ Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanaxa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyabelia.

Pacuenia Jesús petëpaecujinae tsitanaitajëta María Magdala tomarapijivajavabelia yabara pelivaisi

(Mr 16.9-11)

¹¹ María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. ¹² Nexata María taeyelia anijanëbeje ángelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavavereca. Itsanë eca Jesús petaxumijavatsina. ¹³ Nexata ángelnëbeje jumaitsi beje Maríajavabelia:

—¿Detsa xuajitsia nuame? jaibeje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ángelnëbejevavelia.

¹⁴ María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta Jesús penucacaejava bajarajota. Itsiata abaxë María apo yapëtae Jesús cuene. ¹⁵ Nexata Jesús jumaitsi Maríajavabelia:

—¿Detsa xuajitsia nuame? ¿Jipatsa jaitame? jai Jesús.
 María nexata Jesús yabara saya jamatabējumaitsi:
 —Matsamëra ponë mapaunubacabo pevetsinëje, jamatabējai María.
 Bajaraxuata María caranata Jesúsjavabelia jumaitsi mapacueniaje:
 —Xamë itsa jutame Jesús petëpaenë, netsipaebare itsajota buatame.
 Pitsijitsianë tacaponaenexa, jai María.
 16 Jesús nexata junataxuaba María pevënëta.
 —¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsi: “Xamë tanecujarubinëmë,” pejaijume.

17 Jesús nexata icatsia jumaitsi Maríajavabelia:

—Pëtsa nejayaremena. Tsipaji raja abaxë apo ponaenë taxa pecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríajavabelia.

18 Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavabelia yabara pelivaisi

(Mt 28.16-20; Mr 16.14-18; Lc 24.36-49)

19 Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judíovi cjunava. Jesús itsiata joneya. Jemata nuca pijajivi tuatuajëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

20 Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. 21 Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

22 Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa. 23 Nexata itsamonae pibisiacuene pexanaeconi itsa pavecuaajibiaexanaename, nexata baja pibisiacuene pexanaeconimi pepacune vecuaajibitsi tsane. Itsa apo pavecuaajibiaexanaemë tsane itsamonae pibisiacuene pexanaeconi, nexata pibisiacuene pexanaeconi apo vecuaajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

24 Jesús pijajivijavjuvenënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia

tsitanaitajëta. ²⁵ Nexata Tomás itša pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itša pepacuene taenajë cruzajavabelia clavota pecobematabiabarutsivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piäsaëjava petëpæcujinae, jai Tomás Jesús yabara.

²⁶ Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpæcujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpæcujinae. Tshipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamonae apo netae ata, itsiata jumecovënëta icatsia tasaëjava tatëpæcujinae, jai Jesús Tomásjavabelia.

Pajamatabëcuene yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalatotaje. ³¹ Itsiata mapalivaisi pacatoy-aquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itša pajumecovënëtsianame mapalivaisije, paxainaename matababi apo peveverecaëjava Jesús pejamatabëcueneta.

21

Pacuenia Jesús petëpæcujinae icatsia itša asaë, tsitanaitajëta pijajivijavabelia, siete ponëbejevavabelia, yabara pelivaisi

¹ Jesús petëpæcujinae icatsia itša asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itša tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia itsanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata. ³ Nexata Simón Pedro jumaitsi penajuajinavanapaevijavabelia:

—Dujuai raja yamatajucaejiťsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajarapameravi caenë ata dujuainë bajarapamonae apo yamatajutsi. ⁴ Ajena baja matacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesús cuene. ⁵ Nexata Jesús jumaitsi pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Djuuai paneyamatajucaejava, panecujuanenia pamuxunene, pacoparemecca jerayenepanarecca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia coparecca. Bajaraxuacujinae pejutsinexatsina menevecua apo caëjëpaetsi. Tsipaji bitso ayaijava dujuai tojunuatsi. ⁷ Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja majel! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapavecua tajë apo yarubena. Cien metrocuenia saya yarubenalialia. Nexata itsamonae Pedro bana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. ⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumaverecca taeyabuata dujuainë, panbëanë yajava. ¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavetsinexa, jai Jesús pijajivijavabelia.

¹¹ Pedro nexata jeraënëa berunarecca tajetabuaberena peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucucucua. ¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tsipaji baja bajarapamonae yapëthane pijatuxanenë Jesús cuene. ¹³ Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

Pacuenia Jesús petëpaecujinae itsa naitajëta cuaicuajiai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinē xaniavaetsia baeveta pijaoveja, bajara pijinia pacuenia xamē xaniavaetsia netoebetabiabianame tajajivi, pamonae tanepejanajumecovēnētsivi. Bajarapamonae taniji betajaovejaxicuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexēnatomē, ¿xamē tsaja niasivamē? jai.

Pedro nexata icatsia jumaitsi:

—Jājā. Xamē rabaja nejamatabēcueneyapētaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamē netoevetsianame tajajivi, pamonae nesivanajamatabēcopata xanējavaberena. Bajarapamonae taniji betajaovejacuenia, jai Jesús.

¹⁷ Icatsia matavējēa Jesús jumaitsi Pedrojavabelia:

—Simón, Jonás pexēnatomē, ¿xamē tsaja niasivamē? jai icatsia.

Pedro nexata bejamatabējiobireca matavējēa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamē baja cajena yapētaneme daxitacuene. Nexata baja nejamatabēcueneyapētaneme bitso tacaasivajava, jai Pedro.

Jesús nexata tajēvelia jumaitsi Pedrojavabelia:

—Nexata xamē netoevetsianame tajajivi, pamonae taniji betajaovejacuenia. ¹⁸ Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatatabiabame nenaxatatsijava nijacuata. Nexata nejtisipaejavabelia ponabiabame. Itsa pamatacabi perujunēmē tsane, pacuenia bitso perujunēyo banamaxēcaeveta itsajivi pijacamisa pexatatsinexatsi, bajarapacuenia namaxēcaevetsianame itsamonae pecacobecētsinexa pecacaponae nexa itsabelia picani apo jitsipaemē tsane neponaejava, j Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatai Jesús tajēvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajēvelia peyapētaenexa pacuenia beyaxuabijitsiatsi Dioso pejumelivaisi pejumecovēnētsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepēnaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonē, ponē bitso Jesús asiva, penavajunupaebijava yabara pelivaisi

²⁰ Xanē Juannē, Jesús pijajivitonēnē, bitso taneasivanē. Pamatacabi caniviyopijijava panabaniji Jesús pebeyaxuabivajēnaetsi, xanē Jesús pemuxuneneta ecajē. Nexata bajarajota yanijobecajē. “Tajatuxanenē, ¿jipatsa cacanajetsiana nijavajabitsaē pecobeyabelia?” janē Jesúsjavabelia. Nexata Jesús pebeyaxuabicujinaetsi, icatsia itsa asaē, panetsitanaitajēta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanē pecovēvelia cotocaevajē. Nexata Pedro Jesús pecovēya najetaruca. Pedro ita napēnēyorotaba caevēarena, netaetaba bajaraponēbeje pecovēya tanajetarucajava. ²¹ Nexata Pedro ita netane, xanē tatēpaejavanejava yabara, yanijoba Jesúsjavabelia.

—Tajatuxanenë, ¿detsa pacuenia tēpaena maponēje? jai Pedro Jesúsjavabelia.

²² Jesús nexata jumaitsi Pedrojavabelia xanë yabara:

—Itsa xanë tojtsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponaë tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojtsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

²⁴ Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

²⁵ Jesús pinijicuene pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuataje.

Pacuenia exanavanapa Jesús pitorobivi, apóstolevi

Pacuenia Jesús tajëvelia vajunupaeba Espíritu Santo pepatsijavanexat-sica mapanacuayabetsicaje yabara pelivaisi

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiayapijibaxutota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsi-paebaponapona, abaxë itsa ponapona mapanacuataje, bajarapalivaisi ata catoyaquinatsi. ² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiayapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviya-juvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. ³ Bajaraxucujinae Jesús pijavajabitsaë beyaxua-batsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavana-paenema abaxë Espíritu Santo. Bajaraponë yabara taxa Dioso najumecapanepaeya jumaitsi papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanapaenexa. ⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuajaje pecopatsinexa, xamë vecuapitsapaeyaexanaename mapamatacabitaje? ¿Nexata tsaja vajaviriavi judíovi juya evetsiaexanaename vajanacayanacuaevetsinexa? jai Jesús pijajivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëtane pamatacabi bajaraxua copiapatsijitsia. ⁸ Itsiata baitsi jane paxamë ajumejunavijibia papaebianame xanë talivaisi Espiritu Santo itsa pacatsijamatabëpatsianica paxamëjavabetsica. Nexata panelivaisipaebanajetarubenaename Jerusalén tomarajava, Judea nacujava ata, Samaria nacujava ata, tajënacuatubajava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjêa petaejava. ¹⁰ Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje, Jesús pijajivi jemata bajarajota tsitanaitajëtatsi. ¹¹ Nexata ángelnëbeje jumaitsibeje Jesús pijajivijavabelia:

—PaGalilea nacuapijivimë, çdetsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnëbeje Jesús pijajivijavabelia.

Pacuenia Jesús pijajivi natsicueyaitapeta Matíasvënë apóstolenëxa yabara pelivaisi

¹² Jesús baja peponaecujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bajarapatsuto eca caekilómetrocuenia Jerusalén tomaravecua. ¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamona Jesús pijajivi apóstolevi, mapevënëanëje. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexënato. Itsanë Simón. Bajaraponë celotenë. Itsanë pevënë Judas, Santiago pejuyapijinë. ¹⁴⁻¹⁵ Pabota Jesús pijajivi apóstolevi najinavanapa, athëbëyo pexanaeirajavatatsia, nacaetuatabiaba caejavata pevajëtabiabinexa Diosojavabelia. Jesús pena María, Jesús pejuyapijivi ata, itsapetiriavi ata yajava, nacaetuatabiaba pevajëtabiabinexa Diosojavabelia. Bajarapajivibitsaëto ciento veinte pajivibeje. Nexata penacaetuatsijavata bajarapamonae tuatujëta Pedro nonotapuna. Pedro nexata jumaitsi penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajëvelia jumaitsi Dioso pejumelivaisibaxutota. Pacuenia bajayata Davidpijinë Espiritu Santo pejamatabëcueneta tajëvelia vajunupaebiaexanatsi Judaspijinë pexanaejavanexa, copiapata jane baja. Tsipaji Judaspijinë itsa matacapona pamona Jesús vaetabijitsiatsi, Judaspijinë tocopiapatatsi baja pacuenia Davidpijinë tajëvelia jumaitsi. ¹⁷ Judaspijinë picani paxanëyajuvënëni. Jesús picani bajaraponëni itapeta penanacuenëbinexa paxanëta. ¹⁸ Judaspijinë ira comuata pibisiacuenë pexanaematamopalatata. Bajaraponëni pijacuata nabeyaxuaba. Nexata penabeyaxuabicujinae, pematono ira bejopaica. Nexata cototitititicajunua. Daxita pënëni

pitsatajarabarena. ¹⁹ Daxita Jerusalén tomarapijivi vënëlvaisitanetsi daxita xua tocopiapatatsi Judaspijinëmi. Nexata Judaspijinëmi pecomuatsiira, Jerusalén tomarapijivi vënëruba Acéldama. “Acéldama,” itsa jai bajarapamonae pijajumeta, mapajumetaje pejumaitsijume: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaitsi penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuenia jumaitsi mapacueniaje:

Pijabo jivinebo xuabetsiana. Itsajivi ata apo ponaponae tsane bajara-pabota,

jai tajëvelia Salmosvënëbaxutota Judaspijinë apóstolenë penaexanae-javavecua pepitsapaejavanexa yabara.

Itsajavata Salmosvënëbaxutota icatsia tajëvelia jumaitsi Judaspijinë yabara mapacueniaje:

Bajaraponëmi penacuenebijavami, itsanë pitsiana,

jai itsajavata Salmosvënëbaxutota itsanë icatsia apóstolenë penaexanae-javanexa yabara Judaspijinë pepitsapaejamatabëcuene, jai Pedro penacaetuatsivijavabelia.

²¹ Icatsia Pedro jumaitsi:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinxeta. Bajaraxuata bitapetatsi itsanë patanayanabinexa. Paxamë tuatujëta ena patanajuapënajinavanapaevi vajatuxanenë Jesús pamatacabi abaxë ponapona mapanacuataje. ²² Juanpijinë raja bautisaba Jesús. Bajara pamatacabijavaveliacujinae, panajuapënajinavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinxeta, jai Pedro penacaetuatsivijavabelia.

²³ Nexata pamonaenacaetuata, Dioso pejumecovënëtsivi, anijanëbeje itapeta, Pedrohana jane baja Jesús penajuapënajinavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. ²⁴ Bajaraxuacujinae bajarapamonae najumaitsi:

—Vajëtsianatsi Diosojavabelia vajanacayapëtaeayaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenënexa, panetsitajëre.

²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

2

Pacuenia jane baja athëbëvetsica Espíritu Santo patsica Jesús pijajivi petsijamatabëjonexatsi yabara pelivaisi

¹ Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetuata caejavata. ² Nexata bajarapamatacabi athëbëvetsica jemata najumeta bepinijjoviboxaneto. Nexata pabota Pedrohana nacaetuatena, daxitabo najumeteca. ³ Bajarapamonae tane athëbëvetsica perunaejavatsica bepitarunutsicotia. Nexata bajarapamonae caejivi canacujitsia bajarapacotia tsmatanatsanaeyarunaicatsi. ⁴ Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipaebijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebiaexanatsi.

⁵ Bajarapamatacabita Jerusalén tomarata jinavanapa ayaibit-saëtoxaneto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso. ⁶ Nexata bajarapamonae itsa jumetane bepinijjoviboxaneto athëbëvetsica penajumetsijava, nexata pabota Jesús pijajivi nacaetuatena, bajarapabota muxunanacaetuana ayaibitsaëtoxaneto bajarapamonae. Paviriajumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilivaisianë. ⁷ Athëbëvetsica bepinijjoviboxaneto penajumetsijava pemuxunanacaetuanaevi, pinijicuenia najamatabëxainaeaya jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë. ⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaexanaejavaveliacujinae vajanatsipaebijumenëta caëjëpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bajarapamonae apo judíovi ata, Dioso jumecovënëtavanapa pacuenia vaxaitsi judíovitsi jumecovënëtavanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi

canacujitsia bajarapamonae Dioso pinijicuene pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetuanaevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijijoviboxaneto penajumetsijava pemuxunanacaetuanaevijavabelia yabara pelivaisi

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijijumeta jumaitsi athëbëvetsica bepinijijoviboxaneto penajumetsijava pemuxunanacaetuanaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi.

¹⁵ Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamona apo aitajibije. Bajayacunuaepato raja abaxë maje. Bajarapaepatota jivi apo aitajibi tsabiabi. ¹⁶ Mara pamona paxamë panijajumenëta Espíritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Diosojumepaebinëmi vajunupaeba. Bajaraxua yabara Dioso pejumaitsijava Joelpijinë bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënae tsane mapanacua pevereverecaenexaje, itorobianicajë Espíritu Santo daxitanacuapijivi, pamona tajajivi petsijamatabëjonenexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë. ¹⁸ Nexata daxita pamona tanetonacuenebivi, pebijivi, petiriavi ata, bajarapamatacabi Espíritu Santo toitorobianicajë petsijamatabëjonenexatsi. Nexata bajarapamonae paebiana xanë talivaisi. ¹⁹ Tsitajëtsianajë itaboxotatsia pinijicuene taexanaejava. Daxita mapanacujava ata pinijicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. ²⁰ Nexata matocabipijijuumeto aitaquiri tsane. Meravipijijuumeto bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatocabinexatsica pepo petuxanenë. Bajarapamatacabi bajaraponë pinijicuene pexanaejava pecaëjëpaenëcuenetsi, tsitajëtsiana daxitajivijavabelia. ²¹ Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso,

jai bajayata tajëvelia Joelpijinë Diosojumepaebinëmi Dioso pejumetsijava bajaraxua yabara, jai Pedro athëbëvetsica bepinijijoviboxaneto penajumetsijava pemuxunanacaetuanaevijavabelia.

²² Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuene pexanaejava

pecajēpaenēcuenetsi. Bajarapacuenia paxamē baja payapētaneme Jesús Dioso pitorobinēcuenetsi. Xaniavaetsia rabaja payapētaneme paxamējavata Jesús pexanaejava bajarapapinjicuene. ²³ Bajaraponē Jesús paxamē panecobeyabelia canajetatsi. Nexata paxamē pabeyaxuabame. Tsipaji patocopatame piamatabēcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajēvelia najamatabēxaina bajarapacuenia Jesús panebeyaxuabinexa. ²⁴ Itsiata baitsi jane Jesús petēpaecujinae Dioso icatsia asaēyaexanatsi. Dioso capanepatsi petēpaejavavecua. Tsipaji Jesús Dioso pexēnatoxae, acuenebi pematatoxenetsijavatsi petēpaejava. ²⁵ Bajayata Davidpijinē tajēvelia yaquina Dioso pejumelivaisibaxutota Jesús icatsia piasaējavanexa petēpaecujinae. Davidpijinē itsa yaquina Jesús pejumaitsijava Diosojavabelia icatsia piasaējavanexa petēpaecujinae, yaquina mapejumaitsiitaneje:

Yapētāniji Dioso taneyajavaponaponaejava. Tamuxuneneta ponapona, tacujanenia. Bajaraxuata apo junavinē tsane. ²⁶ Bajaraxuata jamatabēcuenebarēyanē tsane. Nexata jivijavabelia tsipaebianajē tajamatabēcuenebarēyajava. Bajaraxuata yapētāniji tatēpaecujinae icatsia tasaējavanexa. ²⁷ Xamē, Diosomē, apo necopatsimē tsane petēpaevi peponaenacuayabelia. Apo necopatsimēnua tsane taparabētsabanaenexa nexēnatonē. ²⁸ Netsitajētame baja cajena taponaenamutonexa taxainaenexa matabaci apo pevereverecaejava. Nejamatabēcuenebarēyaexaname itsa neyajavaponaponame, pejaitane bajayata Davidpijinē yaquina Dioso pejumelivaisibaxutota Jesús pejumaitsijava Diosojavabelia, jai Pedro athēbēvetsica bepiniijjoviboxaneto penajumetsijava pemuxunanacaetuanavevijavabelia.

²⁹ Icatsia Pedro jumaiṣi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainēmi Davidpijinē yabara. Bajayata baja tēpa Davidpijinēmi. Nexata mēthētatsi. Yapētānetsi itsajota mēthētatsi. ³⁰ Davidpijinēmi raja Diosojumepaebinēmi profetanēmi. Davidpijinēmi baja cajena yapētane pacuenia Dioso pexaniajaijumeta najumecapanepaeya jumaiṣi. Davidpijinēmijavabelia Dioso najumecapanepaeya jumaiṣi mapacueniaje: “Pacuenia xamē evetame Israelnacua, bajara icatsia pacuenia bexējavabelia caenē nemoxoyajuvēnēnē evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinēmijavabelia Jesús yabara. ³¹ Davidpijinē baja cajena tajēvelia yapētane Jesús athēbēvetsica Dioso pitorobijavanexatsi jivi pecapanepaenexa. Tajēvelia yapētānenua Jesús petēpaecujinae Dioso icatsia piasaēyaexanaejavanexatsi. Bajaraxuata bajayata Davidpijinē tajēvelia cajena vajunupaeba Jesús petēpaecujinae Dioso icatsia piasaēyaexanaejavanexatsi. Davidpijinēmi peyaquinaebaxutota tajēvelia Jesús yabara jumaiṣi mapacueniaje: “Nexata apo copatsi tsanetsi petēpaevi peponaenacuayabelia. Apo copatsi tsanetsinua peperabētsabanaenexa,” jai baja cajena Davidpijinē peyaquinaebaxutota Jesús yabara. ³² Bajaraxuata Jesús baja icatsia Dioso asaēyaexanatsi petēpaecujinae. Jesús Dioso piasaēyaexanaejavatsi, daxita baja paxanē patāniji. Bajaraxuata pacatsipaebatsi. ³³ Jesús caponatsi athēbēbetsia Dioso pecujanenia peecaenexa. Nexata baja paxa Dioso rajutatsi

Espíritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorobica Espiritu Santo paxanējavabetsica. Nexata xua pinijicue pexanaejava, aeconoxae pataenubename, pajumetanemenua, palivaianē mapamonae panijajumenēta pacatsipaebaje, bajaraxua Espiritu Santo pejamatabēcueneta exana. ³⁴ Itsiata baitsi jane ponē athēbēabetsia Dioso caponatsi, apo Davidpijinē. Davidpijinē bajayata tajēvelia Jesús yabara jumaitsi mapacueniaje:

Dioso jumaitsi tajatuxanenējavabelia: “Evetecare abaxē tacujuanenia.

³⁵ Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia, jai bajayata tajēvelia Davidpijinē Jesús yabara.

³⁶ Bajaraxuata daxita Israel nacuapijivi xaniavaetsia beyapētane Jesús pelivaisi, ponē paxamē pacobematabiabarutame cruzajavabelia. Bajaraponē Jesús, Dioso exanatsi pepo petuxanenē. Bajaraponē Jesús, Cristo cajena, ponē Dioso itorobica vajanacacapanepaenexa, jai Pedro athēbēvetsica bepiniijiviboxaneto penajumetsijava pemuxunanacaetuanāevijavabelia.

³⁷ Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabējiobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicue paexanaenajē patajaneconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamē pibisiacue paneexanaejava pacopabare. Panajamatabēcuenepēnēyorore Diosojavabelia. Nexata pacabautisabiana Jesucristo pejamatabēcueneta papecavecuajibiaexanaenexa daxita pibisiacue paneexanaeneconi. Bajara jane xuacujinae Dioso pacarajutsiana Espiritu Santo papecatsijamatabējonenexa. ³⁹ Dioso raja cajena jitsipa papecarajutsinexa Espiritu Santo. Dioso raja jitsipa panexijavabelia ata perajutsinexa Espiritu Santo. Dioso raja jitsipa itsanacuanēpijivi, tajēnacuanējava pejinavanapaevi ata, perajutsinexa Espiritu Santo. Daxita pamonae Dioso junatsiana pijajivinexa, tsijamatabējonenatsi Espiritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsēnēa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonae Jesús beyaxuaba, pibisiacue pexanaevi, bajarapamonae naxuabiana. Nexata paxamē ata bajarapamonae paneyajavanaxuabiyaniva, pavecuanajamatabēcuenepēnēyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovēnētatsi tres mil pajivimaxēto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia.

⁴² Nexata bajarapamonae jumecovēnēta palivaisi Jesús pijajivi apóstolevi tsipaebapona. Daxita bajarapamonae Jesús pijajivi yajava, apóstolevinua yajava, najamatabēcuenējēpaeya jinavanapa. Daxita nacaetuatabiaba pevājēcabiabinexa Diosojavabelia. Nacaetuatabiabanua caejavata pexaenexa, penajamatabēnapitabiabinexa xua yabara Jesús sivatēpatsi.

Pacuenia jinavanapa pamonaē copiaya Jesús pelivaisi jumecovënëta yabara pelivaisi

⁴³ Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaëta pinijicuene pexanaejava, exanabiaba. ⁴⁴ Daxita pamonaē jumecovënëta Jesús pelivaisi, nacaetuatabiaba najamatabecuenējēpaeya. Bajarapamonaē daxita pexanaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajarapamonaeyajuvënēvi pexanaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona. Nexata bajaraxumatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajarapamonaē caematacabi canacujitsia nacaetuatabiaba templobota. Daxita bajarapamonaē pijabonējava jamatabëcuenēbarëyaya xaeyabiaba pexaejava najamatabëcuenējēpaeya. ⁴⁷ Nexata bajarapamonaē jumai tsabiabi Diosojavabelia: “Diosomë, bitso ayaijamatabëcuenenëmë. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonaē pexaniacuenia yaiyataeyabiabatsi. Nexata itsamonaē ata, caematacabi canacujitsia Jesús pelivaisi jumecovënëtapona pecapanepaenexatsi pibisiacuene pexanaeeneconivecua. Bajarapamonaē najonepona Jesús pelivaisi pejumecovënëtsivijavabelia.

3

Pacuenia apóstolenëbeje Jesús pejamatabëcueneta xanepanaeyaexanabeje apo pecaëjēpaenëtsi peponaponaejava yabara pelivaisi

¹ Judíovi caniviyoepatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. ² Ponë apo pecaëjēpaenëtsi peponaponaejava penaexanaejavabeliacujinae, capatabiabatsi pijamonaē peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonaē. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. ³ Nexata itsa bajaraponë taeyeca Pedrobeje Juanbeje pejonenajetarucavabeje templobojavaberena, vajëqueca palata. ⁴ Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

⁵ Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaraponë.

⁶ Pedro nexata jumaitsi bajaraponëjavabelia:

—Palata raja apo xainaenë. Itsiata baitsi jane xua xainajë, carajutsianatsi. Jesucristo, Nazaret tomarapijinjë, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponë pecujanenia pacobe, Pedro cobevaetabiayotsia. Bajarajota bajaraponë daxitaneniabeje asisaëreca baja. ⁸ Nexata bajaraponë jirevajunua. Petaxuta nuca. Ponapona baja. Nexata bajaraponë templobo ënëbelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetarucaē Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruae Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. ¹⁰ Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatujëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaenëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatujëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najuamaxëvaetabanucatsibeje. Nexata jivi ayaibitsaëto itaxutuaothopatsi. Jamatabëcuenenabenajaca bajarapamonae. ¹² Nexata Pedro itsa tane bajarapamonae pejamatabëcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xuajitsia pajamatabëcuenenabenajacame maponë yabaraje? ¿Detsa xuajitsia bitso panenaëcobamebeje mapacueniaje? Paxanëbeje yabara meta pajamatabëjumaitsimë mapacueniaje: “Maponëbeje xanepanaeyaexanabeje apo pecaëjëpaenëmitsi peponaponaejava. Tsipaji baja caëjëpatsibeje bajarapacuenë pexanaenexabeje. Bajarapacuenë caëjëpatsibeje tsipaji meta Dioso pitabarata aneconijibia ponaponabeje,” pajamatabëjamë meta paxanëbeje yabara. Paxanëbeje raja patajamatabëcuenetabeje apo paexanaenëbeje bajarapacuenë. Jesús raja exana bajarapacuenë. ¹³ Vajasalinaivi baja cajena Abrahampijinë, Isaacpijinë, Jacobpijinë. Bajarapamonae pijaDioso pexë nato Jesús. Nexata Dioso jivi yapëtaeyaexana Jesús bitso ayaijamatabëcuene pexainaenëcuene. Bajaraponë Jesús paxamë parajutame vajanacayanacuaevetsivi pecobeyabelia. Vajanacayanacuaevetsinë Pilato copatsijitsia ata Jesús, itsiata paxamë pajumesaëmë. Apo pajitsipaemë Pilato pecopatsijava Jesús.

¹⁴ Apo pavajëcaemë Pilatojavabelia pecopatsinexatsi Jesús, itsacueneneconiyo apo pexainaenë, pepo pianeconijibinë. Caranata biji pibisiacuene pexanaenë, jivibenë, pecopatsinexatsi, pajumesaëmë. Pavajëcame Pilatojavabelia jivibenë pepitsapaenexa penaneconitsivi pejebabiabibovecua.

¹⁵ Ponë Dioso itorobica vajanacarajutsinexa matababi apo pevereverecaejava, bajaraponë caranata pabeyaxuabame. Itsiata baitsi jane Jesús petëpaecujinae, Dioso icatsia asaëyaexanatsi. Bajarapacuenë patataexae, pacatsipaebatsi.

¹⁶ Bajaraponë Jesús pejamatabëcueneta xanepanaeyaexanatsi baja maponëje, apo pecaëjëpaenëmitsi peponaponaejava. Maponëje najamatabëcuenecopata Jesúsjavabelia. Bajaraxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:

—Tajamonae, yapëtaniji pacuene pacabarëexana itsamonae, papecaevetsivi yajava. Tsipaji apo payapëtaemë xaniavaetsia.

Bajaraxuata pabeyaxuabame Jesús. ¹⁸ Bajayata Diosojumepae-bivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarapacuene Jesús baja tocopiapatatsi itsa pabeyaxuabame. Tsipaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujumatabëcuenemi. Panajamatabëcuenepënëyorore baja Diosojavabelia. Nexata pibisiacuene paneexanaeconimi, Dioso pacavecuajibiaexanaena. Nexata pacajamatabëcuene asaëyaexanaena Dioso. ²⁰ Tsipaji raja icatsia itsamatacabi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatacabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepae-bivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspijinë Jesús yabara jumaitsi mapacueniaje: “Pacuenia nitoroba xanë profetanëxanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. ²³ Tsipaji daxita pamonae apo jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi pape-momoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. ²⁶ Nexata baja copiya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë paeajivimë canacujitsia papecayavenonaenexa panenajamatabëcuene pënëyorotsinexa pibisiacuene paneexanaejavecua, jai Pedro bajarapamonaejavabelia Portal de Salomónvënëjavata.

4

Pacuenia Pedrobeje Juanbeje Jesús pelivaisi tsipaebabeje tomaraevet-sivijavabelia yabara pelivaisi

¹ Pedrobeje Juanbeje abaxë Jesús pelivaisi tsipaebabeje bajarapamonaejavabelia Portal de Salomónvënëjavata. Nexata bajaraberena jemata

patanajetarubena sacerdotevi. Patanajetarubena saduceovinu. Pe-matatsënä patanajetaruca itsanë capitán. Bajaraponë capitán tem-plobopijipolicíavi pevetsinë. ² Daxita bajarapamonae baraanaepanat-sibeje Pedrobeje Juanbeje. Tsipaji Pedrobeje Juanbeje Jesús pelivaisi petsípaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapali-vaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jai-beje tsaponae.

³ Nexata bajarapamonae vaetabatsibeje. Caponaliatsibeje peetsinex-atsibeje penaneconitsivi pejebabiabibota. Meravia pitsijavata jut-sijitsiatsibeje. Tsipaji baja bitso caniviyo. ⁴ Itsiata baitsi jane baja jivibitsaëtoxanetonë capanepaeya jumecovënētatsibeje pevaetabi-vajēnaeyatsibeje. Nexata daxita pamonaе jumecovënēta Jesús pelivaisi, ēpebijivi namataējētatsi cinco mil ponēbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinu. Nacaetuata judíovi pecujarubivinu. Daxita bajarapamonae nacaetuata Jerusalén tomarata. ⁶ Nexata bajarajota napata sacerdotenë Anás. Bajaraponë Anás sacerdotevi pepo penamat-acaitorobinēmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. ⁷ Nexata Pedrobeje Juan-beje nutatsibeje daxita bajarapamonae pitabarata. Nexata bajarapa-monae jumaitsi Pedrobeje Juanbejejavabelia:

—¿Jipatsa pejamatabēcueneta paxanepanaeyaexanamebeje apo pecaējēpaenēmitsi peponaponaejava? jai bajarapamonae Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabēcueneyavenonatsi. Nexata Pedro jumaitsi bajarapamonaejavabelia:

—Paxamē judíovi paneevetsivi, paxamē ata pijinia paancianovimē, paneyanijobamebeje paneyapētaenexa ponē pejamatabēcueneta paxanepanaeyaexanajēbeje apo pecaējēpaenēmitsi peponaponaejava. Paneyanijobamebejenua paneyapētaenexa pacuenia paxanepanaeyaex-anajēbeje bajaraponē. ¹⁰ Nexata pacatsípaebianatsi daxita paxamē paneyapētaenexa daxita Israel nacuapijivi ata peyapētaenexa. Jesús, Nazaret tomarapijinē, ponē paxamē pacobematabiabarutame cruzajavabelia, bajaraponē icatsia Dioso asaëyaexanatsi petēpaecujinae. Bajaraponē Jesús pejamatabēcueneta maponē paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponē Jesús yabara Dioso pejumelivaisibaxutota bajayata tajēvelia jumaitsi comparacióncuenia mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia yaētsiana botabu daxita itsaibo matatoxenetsia, jai tajēvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejume-covënētsijavanexa yabara, jumaitsi. Dioso pitapetsijavatsi Jesús daxitajivi

pecapanepaenexa yabara ata jumaitsi. ¹² Caenë Jesús caējēpatsi vajanacapanepaenexa pibisiacuene vajaexanaeconivecua. Bajaraxuata Dioso itorbica Jesús. Tsipaji baja ajibi pematatsēnēa mapanacuataje itsanē ata pejamatabēcueneta vajanacapanepaenexa Diosojavabelia, jai Pedro bajarapamonaejavabelia.

¹³ Bajarapamonaē yapētane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaējavabelia. Bajarapamonaē yapētanenua bajaraponēbeje bajayajebi apo penacujarubinēbeje peyaquinaejava. Itsiata bitso yapētanebeje pexanialivaisi. Saya bajaraponēbeje penacuenebinēbeje. Nexata judíovi pevetsivi jamatabēcuenenabenajaca. Bajarapamonaē nexata jamatabējumaitsi Pedrobeje Juanbeje yabara:

—Bajaraponēbeje cajena penaponaponaenēbeje Jesússta. Bajaraxuata bitso baja yapētanebeje bajarapalivaisi, jamatabējai.

¹⁴ Bajarapamonaē tane apo pecaējēpaenēmitsi peponaponaejava penanucaejava Pedrobeje Juanbejevata. Nexata bajarapamonaē acuenebi pejumaitsijava: “Jume raja. Jesús raja pejamatabēcueneta apo xanepanaē maponēje,” acuenebi pejaijava. Tsipaji apo pecaējēpaenēmitsi peponaponaejava Jesús pejamatabēcueneta ponapona baja. ¹⁵ Nexata bajarapamonaē Pedrobeje Juanbeje caepatoyo navecuacapitsapatsibeje pecovēta epamonaē penabarēcuaicuajainexa.

¹⁶ Nexata Pedrobeje Juanbeje pecovēta caepatoyo penavecuacapit-sapaejavatatsibeje, bajarapamonaē najumaitsi:

—¿Detsamē raja pacuene exanaenatsi bajaraponēbejevabelia? Daxita Jerusalén tomarapijivi xaniavaetsia yapētane bajaraponēbeje pexanepanaeyaexanaejavabeje apo pecaējēpaenēmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaebeje raja bajaraponēbeje,” vajajaijava. ¹⁷ Piniñcuenia vaxaitsi bajaraponēbeje itavetsianatsi petsipaebiyavabeje matavējēa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonaē Pedrobeje Juanbeje pecovēta caepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevēalia pejonenexaliabeje, junaliatsibeje. Nexata jane baja bajarapamonaē jumaitsi Pedrobeje Juanbejevabelia:

—Pētsa baja icatsia matavējēa jivi patsipaebaponaēbeje Jesús pelivaisi. Pacoparebeje baja jivi panetsipaebaponaējavabeje Jesús pelivaisi, jai bajarapamonaē.

¹⁹ Nexata Pedrobeje Juanbeje jumaitsiabeje bajarapamonaējavabelia:

—Paxamē panijacuata panajamatabēxainare pacuene xanepana pataexanaponaenexabeje Dioso pitabarata. Itsa pacajumecovēñetsipatsibeje paxamē patanitavetsijavamēbeje, nexata apo pajumecovēñetsinēbeje tsipae Dioso patanitorobijavabeje. ²⁰ Acuenebi cajena patacopatsijavabeje jivi patatsipaebaponaējavabeje xua patanijibeje, palivaisi ata pajumetaniñibeje, jaibeje Pedrobeje Juanbeje bajarapamonaējavabelia.

²¹ Icatsia judíovi pevetsivi orijibia itavetatsibeje jivi petsipaebapon-
aeyanivabeje Jesús pelivaisi. Bajaraxuacujinae copatatsibeje baja pe-
ponaenexabeje. Ajibi peyabarananeconitsia exanaejavanexatsibeje.
Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bjarapacuenia daxitajivi pexaniajamatabëcuene rajuta
Diosojavabelia Pedrobeje Juanbeje pexanepanaeyaexanaexabeje apo
pecajëpænenëmitsi peponaponaejava. ²² Ponë xanepanaeyaexanatsi
Dioso pesaëta pinijicuene pexanaejavata, bajaraponë penaexanaecu-
nae xaina baja cuarenta pavaibeje pematatsënëa.

*Pacuenia Dioso pejumecovënëtsivi vajëca Diosojavabelia
pecajëpæyaexanaenexatsi Jesús pelivaisi ajumejunavijibia jivi
pepaebaponaenexa yabara pelivaisi*

²³ Itsa baja Pedrobeje Juanbeje judíovi pevetsivi copatatsibeje
peponaenexabeje, navialiabeje baja itsabelia jinavanapa Dioso
pejumecovënëtsivi. Nexata Pedrobeje Juanbeje Jesús pelivaisi jivi
petsipaebaponaeyanivabeje sacerdotevi penamatacaitorobivi pitavet-
sijavatsibeje, navajunupaebabeje Dioso pejumecovënëtsivijavabelia.
Navajunupaebabejenua judíovi pijaancianovi ata pitavetsijavatsibeje.

²⁴ Nexata Dioso pejumecovënëtsivi itsa jumetane Pedrobeje Juanbeje
penavajunupaebijavabeje, nexata daxita Dioso pejumecovënëtsivi
Pedrobana najamatabëcuenejëpaeya vajëca Diosojavabelia. Daxita
bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita
itaboxopijicuene ata. Nexanaenë ira ata. Nexanaenë daxita irapijicuene
ata. Nexanaenë manuamene ata. Nexanaenë daxita manuamenepi-
jicuene ata. ²⁵ Xamë Diosomë, bajayata Espíritu Santo pejamatabëcueneta
tajëvelia yapëtaeyaexaname patajasalinainëmi Davidpijinë. Nexata nija-
jivitonë Davidpijinë tajëvelia nexënato Jesús yabara jumaitsi mapacueni-
aje:

Itsanacuanëpijivi, pamonae apo judíovi, bitso anaepanabiabiana.

Saya jema najamatabëxainabiabiana pexanaenexa picani xua
apo cajëpætsi pexanaenexa. ²⁶ Pinijinacuanë pevetsivi

nacaetuatsiana. Tomaranë pevetsivi ata nacaetuatsiana.

Bajarapamonae najamatabëxainaena, xamë Diosomë,
nijacuene pecatobijianaenexa. Najamatabëxainaenanua

pebejiobiaexanaenexa Cristo, ponë itorobianimica jivi
pecapanepaenexa,

jai bajayata tajëvelia Davidpijinë Espíritu Santo pejamatabëcueneta, Jesús
pebejiobiaexanaejavanexatsi yabara, jai Pedrobana pevajëcaejavata
Diosojavabelia.

²⁷ Icatsia Pedrobana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaetuatabeje

itsanacuanëpijivi. Barënacaetuatabeje apo judíovi. Barënacaetuatabeje

judíovi ata yajava. Bajarapamonae nacaetuata penajumejaitsinexa

pacuenia beyaxuabijitsiatsi nexënato Jesús, ponë athëbëvetsica

itorobimica. Bajarapacuenia itsa barënacaetuatabeje, copiapata jane

baja xua bajayata tajëvelia Davidpijinë vajunupaeba. ²⁸ Bajarapamonae

nacaetuata pexanaenexatsi daxita pacuenia baja cajena bajayata

nexënato tocopatame pexanaenexatsi. ²⁹ Patajatuxanenë, yapëtaneme

judíovi pevetsivi patanitavetsijava jivi patatsipaebaponaeyaniva nexênato pelivaisi. Paxanê panijajivinê. Nexata panerajutsianame patanecaêjêpaejamatabêcuene ajumejunavijibia jivi patatsipaebaponaenexa nexênato pelivaisi. ³⁰ Itsa patomarata patsipaebianajê nexênato pelivaisi, jamatejemayaexanaename piavitanevi. Piniijucene nexanaejava exanaename jivi peyapêtaenexa bitso ayaijamatabêcuene nexainaenêcuene. Bajarapapiniijucene exanaename nexênato Jesús pejamatabêcueneta, jai Pedro bana pevajêcaejavata Diosojavabelia.

³¹ Itsa baja bajarapamonae vereta pevajêcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabêvênêcatsi. Nexata bajarapamonae Espíritu Santo petsijamatabêvênêcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovênêtsivi, xua xaina, daxita nacobenaxainaeyaeveta yabara pelivaisi

³² Ayaibitsaêtoxaneto Dioso pejumecovênêtsivi najamatabêjêpaeya jivananapa. Bajarapamonae xua xaina, apo najamatabêxainae caejivi pexainaenexa. Nexata daxita bajarapamonae xua xaina, nacobenaxaina daxita. ³³ Nexata apóstolevi asaêya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaêyaexanatsi vajatuxanenê Jesús petêpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovênêtsivi caenê ata apo yajuvênêbejiobi pexainaejava yabara. Tsipaji pamonae bitso xaina iranê, bonê ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonae yajuvênênê it-sanê pevênê José, Chiprevênê tunaetota penaexanaenê. Bajaraponê Levípijinê pemomoxiyajuvênênê. Bajaraponê apóstolevi vênêrubatsi itsavênê, Bernabé. Bajarapavênê hebreojumeta pejumaitsijume: “Jivi pejamatabêcuenebarêyayaexanaenê,” pejaijume. ³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia têpabeje Ananíasbeje pijava Safirabeje, penajumetsênêtsixaebeye apóstolenê Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje yajuvênêcanajetabeje pijaira. ² Nexata Ananíasbeje pijavabeje pijairamatamoyajuvênêpalata muetsia copatabeje. Bajaraxuacujinae Ananías peyajuvênêcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvênêcanajetajê. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovênêtame dovathi pecayamaxêitorobijava nenajumetsênêtsinexa Espíritu Santojavabelia? Xamê

baja rovia nijairamatamopalata yajuvënëcopatame. ⁴ Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitojorobijava najamatabëxainameje? Ëpaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitisijava, Ananías petëpaenë irata jopa. Nexata daxita pamona vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca. ⁶ Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananíaspijinë pijava jonena. Bजारapova abaxë apo yapëtae pamona pevecatëpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bजारapacuenia pacanajetajëbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenëjëpamebeje panenajumetsënëtsinexabeje Espíritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bजारapamonae icatsia xamë ata cacaponaelia pecamëthëtsinexa, jai Pedro.

¹⁰ Nexata bajarajota Pedro pitabarata bajarapova ata icatsia petëpaeava irata jopa. Itsa jonena pevëjëavi penaviabanajetarubenaevi, Ananíaspijinë pemëthëcaevilia, caxitajarababuata petëpanucaeva. Nexata icatsia bajarapamonae capitsapalia bajarapova pemëthëtsinexa pamonami pemëthë muxuneneta. ¹¹ Nexata daxita Dioso pejumecovënëtsivi, itsamonae ata, pamona bajarapajivibeje petëpaejava vënëlivaisitanetsi, bitso junava.

Pacuenia apóstolevi pinijicue ne pexanaejavanë exanapona Dioso pesaëta yabara pelivaisi

¹² Apóstolevi Dioso pesaëta exanapona pinijicue ne pexanaejavanë Jerusalén tomarapijivi pitabarata. Daxita Dioso pejumecovënëtsivi nacaetuatabiaba templobo ënëtuatujëta, Portal de Salomónvënëjavata.

¹³ Itsamonae, pamona Dioso apo pejumecovënëtsivi, junava penanacaetuatsijava bajarapamonaeta. Itsiata daxita Jerusalén tomarapijivi pexaniacuenia yaiyataeyabiaba Dioso pejumecovënëtsivijavabelia.

¹⁴ Pevajënaeyabelia jivibitsaëtoxaneto jumecovënëta pona Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovënëtsivijavabelia. ¹⁵ Apóstolevi Dioso pesaëta pinijicue ne pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecu.

¹⁶ Nexata jivibitsaëtoxanetonë patabiaba

Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapevi. Nexata Pedro daxita bajarapamonae jamatejemayaexanabiaba.

Pacuenia apóstolevi taicatsi penaneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinē yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsipaji cuencaēbatsi. ¹⁸ Bajaraxuata taicatsi apóstolevi. Jebatsi penaneconitsivi pejebabiabibota. ¹⁹ Itsiata baitsi jane bajarapameravi Dioso pijaángel apóstolevi tobaupanatsi penaneconitsivi pejebabiabibo baupanē. Nexata ángel apóstolevi matabapitsapaliatsi. Angel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayjavaponaponaejava, jai ángel apóstolevijavabelia.

²¹ Apóstolevi itsa jumetane bajarapacuenia ángel pejumaitsijava, nexata ajena matababi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaje, jai.

²² Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, navi-abarena cobesa petsipaebinxexa penacaetuatsivijavabelia. ²³ Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenaevi baupanē. Itsiata baitsi jane itsa pabaupatajē, caenē ata apo ecae bajarapabo ēnētuatuajēalia, jai policíavi.

²⁴ Nexata templobopijipolicíavi pijacapitán, sacerdotevi penamatacaitorobivina, itsa jumetane bajarapacuenia policíavi pejumaitsijava, bajarapamonae jamatabējumaitsi:

—¿Detsamēra nexata itsi apóstolevi? jamatabējai bajarapamonae.

²⁵ Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapamonaejavabelia:

—¡Panejumetaema! Pamonae pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponē.

²⁶ Nexata templobopijipolicíavi pijacapitán barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonēta, jamatabējai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinu pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

²⁸ —Paxanē baja cajena pacajumaitsitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovēnētšimē? Pataema jane pacuenia Jerusalén tomarata yacājēpaponā panetsipaebilivaisi. Paxamē jamatabēpaneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinē bajarapacuenia pejumaitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovēnētšinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovēnētšitsi. ³⁰ Paxamē Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaēyaexanatsi petēpaecujinae. ³¹ Nexata Dioso jumaitsi Jesúsjavabelia: “Ecare tacujanenia. Xamē rabaja ayajamatabēcuenenēmē. Jivi nevetsinē tsane. Necapanepaenēnua tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabēcuenē pēnēyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabēcueneta daxitajivi aneconijibia petaenexa. ³² Nexata bajarapacuenē yabara jivijavabelia itsa patsipaebaponajē, Espiritu Santo paneyajava tsabiabi. Dioso cajena rajutapona Espiritu Santo pamonaē jumecovēnēta Dioso, jai Pedro, itsaapóstolevi yajava, daxita bajarapamonaejavabelia.

³³ Nexata daxita bajarapamonaē itsa jumetane bajarapacuenia Pedrohana pejumaitsijava, nexata bitso anaepana. Jamatabēbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonaeyajuvēnēnē judíovi pecujarubinē, Gamalielvēnēnē, nonotapuna daxita penajuavi pitabarata. Bajaraponē fariseonē, Dioso Moiséspijinēta pena-jumecopatsilivaisi pecujarubinē. Daxitajivi peyaiyataenētšitsi. Nexata Gamaliel itoroba apóstolevi caepatoyo pepitsapaenexalia. ³⁵ Nexata apóstolevi caepatoyo pepitsapaejavatalia, pecovēta, Gamaliel jumaitsi penajuavijavabelia:

—Tajamonae judíovi, panajamatabēxainare xaniavaetsia. Pētsa paexaname pacuenia panajamatabēxainame mapamonaejavabeliaje. ³⁶ Panajamatabēnapire pacuenia Teudasvēnēnēmi bajayata exanatsi. Bajaraponēmi picani nacua pevetsinēnexa, ayajamatabēcuenenē bitso jamatabēnaexana. Nexata picani pijajivinexa pēnajinavanapatsi cuatrocientos ponēbeje. Itsiata Teudaspijinēmi beyaxuabatsi. Bajaraponēmi pepēnajinavanapaevitsi, pamonaē pijajivinexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabi gobierno pejamatabēcueneta daxitajivi namataējētšitsi, Judasvēnēnēmi, Galilea nacuapijinēmi, bajarapacuenia pijinia jivi ayaiBITSaētoxaneto pēnajinavanapatsi. Bajaraponēmi ata beyaxuabatsi. Nexata daxita pepēnajinavanapaevitsi

nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaeye apóstolevi yabara pacatsipaebijitsiatsi. Pëtsa paitsacueniabame bajarapamona. Itsa bajarapamona saya mapanacuapijivi pejamatabëcueneta tsipaebavanapaje, bepíjia peneta bajarapamona petsipaebilivaisi vereverecaena. ³⁹ Itsa jume, Dioso pejamatabëcueneta bajarapamona bajarapalivaisi jivi itsa tsipaebavanapa, nexata acuenebi tsipae paxamë bajarapacuenene pan-evereverecaeyaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamona jumecovënëtatsi Gamaliel. Apóstolevi icatsia caevëlia pejonenexalia junaliatsi. Bajaraxuacujinae apóstolevi, caenë canacujitsia, ayaicuenia jumatitibabeponatsi penaneconitsivi pejumaconitabiabimacata. Itavetatsi icatsia matavëjêa jivi petsipae-biyaniva Jesús pelivaisi. Bajaraxuacujinae copabatsi jane baja pepon-aenexa. ⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobi-aexanaponaenexatsi Jesús pijajivixae. ⁴² Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipae-bapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

6

Pacuenia itapetatsi siete ponëbeje diaconovinexa yabara pelivaisi

¹ Jesús pelivaisi pejumecovënëtaponaeivi, pevajënaeyabelia ayailbitsaëtoxanetonë tsaponae. Bajarapamatacabi Jesús pelivaisi jumecovënëtapona griegovi, judíovi ata. Nexata pamonajivi pevecuatëpaevanëtsi, pamona bitso bejiobi, bajarapamonaejavabelia apóstolevi rajutabiaba penamatavenonaejavanë. Nexata Jesús pelivaisi penajuajumecovënëtsivi, pamona griegovi, jumaiti judíovijavabelia:

—Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panijavirivijavabelia rajutabiaba, bajaraxuavajëtonë patajavirivijavabelia apo rajutabiabi, jai griegovi judíovijavabelia.

² Doce ponëbeje, apóstolevi, najamatabëcuenejëpa pacuenia exanaejitsia judíovibeje griegovibeje penacobecaëbabiabixae. Nexata apóstolevi junata penacaetuatsinexa daxita pamona Jesús pelivaisi pejumecovënëtsivi. Nexata baja itsa nacaetuata daxita bajarapamona, apóstolevi jumaiti bajarapamonaejavabelia:

—Tajamona, paxanë itsa patsicobetsanabiabijitsipajë pexaejava bitso penamatavenonaevijavabelia, nexata apo panecuenecaëjëpabiabi tsipae jivi patatsipaebinexa Dioso pitorobilivaisi. ³ Nexata paitapetsianame siete ponëbeje, paxamëyajuvënëvi. Paitapetsianame papebijivi caejamatabëcuene pexainaeivi, bitso petsijamatabëvënëcaevitsi Espiritu Santo, bitso peyapëtaeyaexanaevitsi Espiritu Santo pejamatabëcuene. Bajarapamona paitorobianame bepejiobivijavabelia patsicobetsanabiabinexa penamatavenonaecuenene. ⁴ Nexata paxanë saicaya patsitecavanapaenajë patavajëcabiabijava Diosojavabelia. Patsipaebabiabianajënuua Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

⁵ Nexata daxita pamonae nacaetuata, itsa jumetane bajarapacuenia apóstolevi pejumlahitsijava, tsitaxanepanatsi. Nexata bajarapamonae itapeta mapamatabêxêyoje. Itapeta Estebanvênênê, ponê bitso Dioso pejumecovênêtsinê, Espíritu Santo petsijamatabêvênêcaenêtsi. Itapeta Felipevênênê. Itapeta Prócorovênênê. Itapeta Nicanorvênênê. Itapeta Timónvênênê. Itapeta Parmenasvênênê. Itapeta Nicolásvênênê. Nicolás itsanacuapijinê, Antioquía tomarapijinê. Bajaraponê apo judíonê. Itsiata judíovicuenia Dioso najumecovênêtaponapona. ⁶ Daxita bajarapamatabêxêyo pitapetsicujinaetsi, nubatsi apóstolevi pitabarata. Nexata pamonae itapetatsi, caenê canacujitsia pematabocotojumavereca apóstolevi nacobebuatanubena Diosojavabelia petovajêtsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaêtoxaneto tsaponae Jesús pelivaisi pejumecovênêtsivi. Sacerdotevi ata ayaibitsaêto jumecovênêtapona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaêta pinijicuene pexanaejava, exanabiaba. Daxitajivi pitabarata Dioso pesaêta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabiabota. Bajarapabo pevênê Esclavos Libértados. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandria tomaraverena pepatsivi. Itsamonae Cilicia nacuaverena pepatsivi. Itsamonae Asiavênê nacuaverena pepatsivi. Bajarapamonaeyajunênêvi Esteban anaeya jumenotatsi. ¹⁰ Nexata bajarapamonaeyajuvênêvi Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicapanepeatsi juya. ¹¹ Nexata pamonae Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonae matamotatsi penajumetsênêtsinexa Esteban yabara, najumetsênêtsia jane baja jumaiti jivijavabelia:

—Pajumetaniji pibisiacuenia Esteban pebaracuaicuajaitsabiabijava Moiséspijinê. Pajumetanijinua pibisiacuenia pebaracuaicuajaitsabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumlahitsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban kujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamonae jane baja matamota najumetsênêtsia yane peneconitsinexatsi Esteban. Nexata bajarapamonae itsa pata, jumaiti Esteban yabara:

—Mara ponêje Esteban apo cueranae Dioso apo pejisipaecuenia pebaracuaicuajaitsabiabijava templo. Apo cueranaenua Dioso Moiséspijinêta penajumecopatsilivaisi ata pebaracuaicuajaitsabiabijava. ¹⁴ Pajumetaniji maponêje pejumlahitsijava: “Jesús, Nazaret tomariapijinê, xuabianica mapatemploboje. Dioso Moiséspijinêta penajumeco-

patsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonaе matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonaе Esteban pitabaranaëcobarëcëpaejavatatsi, betsita ángelnëitabara tsarucae Esteban.

7

Pacuenia Esteban jumecanaviata sacerdotevi pepo penamatacaitorobinë yabara pelivaisi

¹ Sacerdotevi pepo penamatacaitorobinë jumaitsi Estebanjavabelia:

—¿Xaniajai tsabaja? ¿Jumaitsimë tsabiabi pacuenia mapamonae caneconitsiajumaitsije? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaitsi mapacueniaje:

—Tajamonae, patanevetsivimë, panenamuxunaevere. VajaDioso bitso ayaijamatábëcuenenë. Tsitanaitajëta baja cajena bajayata vajasalinainë Abrahampijjinëjavabelia. VajaDioso tsitanaitajëta Abrahampijjinëjavabelia abaxë Abrahampijjinë itsa ponapona Mesopotamia nacuata. Bajarapanacuata Abrahampijjinë ponapona pevarapaevajënaeya Harán nacuayabelia. ³ Dioso jumaitsi Abrahampijjinëjavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijjinëjavabelia. ⁴ Bajaraxuata Abrahampijjinë Caldea nacuajavaverena pona. Nexata pata Harán nacuayaberena. Bajarapanacuata Abrahampijjinë itsa ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaeucujinaetsi, Dioso icatsia Abrahampijjinë varapaeyaexanatsi mapairajavaberena, itsajota vaxaitsi aeconoxae jinavanapatsi. ⁵ Itsiata Abrahampijjinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaitsi Abrahampijjinëjavabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijjinë pexi itsa apo xinae, bajarapacuenia Dioso najumecapanepaeya jumaitsi Abrahampijjinëjavabelia. ⁶ Icatsia Dioso tajëvelia jumaitsi Abrahampijjinëjavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenibiaexanabianatsi. Cuatrocientos pavaiheje nemomoxi bepejiobicuenia jinavanapaena bajarapanacuatalia. ⁷ Xanë nexata naneconitsiaexanaenajë panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberena patsiana. Nexata mapanacuataje xanëjavaberena najamatabëcuenecopatsiaya navajëcabiabiana,” jai baja cajena tajëvelia Dioso Abrahampijjinëjavabelia. ⁸ Nexata Abrahampijjinë Dioso itorobatsi peperabëcaucataponaenexa daxita papebinacuetoxi naexana Abrahampijjinë pijabota, baitsi

peboupiperabēcaucutaponaenexa. Bajarapacuenia Abrahampijinē pexanaenexa Dioso itorobatsi Abrahampijinē penajamatabēnapitabiabinexa Dioso peyavenonaeyapaebijavatsi. Nexata Abrahampijinē pijava vecuanaenexatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijinē boupiperabēcaucuta pexēnatonēyo pacuenia Dioso itorobatsi. Bajaraxuacujinae icatsia juya Isaacpijinē pexēnato xaina. Isaacpijinē pexēnato pevēnē Jacob. Bajara icatsia pacuenia Isaacpijinē ata boupiperabēcaucuta pexēnatonēyo. Bajaraxuacujinae icatsia Jacobpijinē pexi xaina doce ponēbeje. Bajara icatsia pacuenia Jacobpijinē ata boupiperabēcaucuba pexi. Bajarapadoce ponēbejejavaverena penaexanaponaevi doce pabitsaētobeje naexana, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹ Icatsia Esteban jumaitsi bajarapamonaejavabelia:

—Nexata Jacobpijinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapijinē Josépijinē. Nexata Josépijinē cuencaēbatsi pematapijivi. Bajaraxuata Josépijinē pecaponaenexatsi Egipto nacuyabelia, canajetaxuabatsi pematapijivi. Itsiata Josépijinē Dioso yajavaponaponatsi. ¹⁰ Nexata Josépijinē bepejibiaexanaejavaminexatsi Egipto nacuata, vecuapanepaponapona. Dioso daxitacuene Josépijinē Egipto nacuata yapētaeyaexanaponatsi. Bajaraxuata Egiptonacua pevetsinēmi, Josépijinē pexaniajamatabēcuenia tanetsi. Nexata Egiptonacua pevetsinēmi tocopatatsi Josépijinē pecobenaevetsinexa Egiptonacua. Egiptonacua pevetsinēmi pijabo ata petoevetsinexa, Josépijinē tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava. ¹² Itsiata Egipto nacuata janibovajēnaeya, Josépijinē pecomuaquejebijava ayaijava xaniavaetejeba trigoxu. Nexata Jacobpijinē vēnētane Egipto nacuata pexaejava pexainaejava trigoxu. Nexata Jacobpijinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinē pexi, pamonaejane baja vajasalinaivi. Itsiata Jacobpijinē pexi pejuyapijinējavata comuacae ata, apo yapētae pejuyapijinēcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinē jumaitsi pematapijivijavabelia: “Xanē raja Joséné panejuyapijinēnē,” jai Josépijinē. Bajaraxuata nexata Egipto nacuaevetsinēmi yapētane bajarapamonaej Josépijinē pijamonaecuene. ¹⁴⁻¹⁵ Nexata Josépijinē tonajumexuaba paxa Jacobpijinē penavarapaenexa Egipto nacuyabelia. Nexata Jacobpijinē daxita pexi, pemomoxi yajava, varapa Egipto nacuyabelia. Nexata Jacobpijinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpijinē tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexējavabelia vajasalinaivimi jane baja petēpaevimi pesijebinexatsi

ibovajuta, Siquem tomarata, sicaponatsi Siquem tomarabelia. Bajara-paibovajuta cajena jivi petēpaevi, jebabiaba. Abrahampijinē abaxē itša asaē vajasalinaivimi pevajēnaeya, comuata bajarapaibovaju. Hamorpi-jinē pexita comuata bajarapaibovaju, jai Esteban sacerdotevi penamat-acaitorobivijavabelia, judíovi pijaancianovijavabelia ata, judíovi pecu-jarubivijavabelia ata.

¹⁷ Icatsia Esteban jumaitsi bajarapamonaejavabelia:

—Nexata baja itša panepaona bejamatabēcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayaibitsaētoxaneto tsaponae Egipto nacuata. Nexata jane baja pijinia imoxoyo pevajēnae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinējavabelia, baitsi jane baja Dioso pejamatabēcueneta vajasalinaivimi pejutsinexatsi Egipto nacuverena pejinavanapaenexa Canaán nacuata. ¹⁸ Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē apo yapētae Josépjinē Egiptonacua pevetsinēmicuene. Tsipaji baja bajayata, bajaraponē pevajēnaeya, tēpa baja Josépjinē. ¹⁹ Nexata Egiptonacua pejanaevetsinē, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejiobiaexanabiabatsinua. Vajasalinaivi pexi pebinēyo itša tonaexanatsi, nacuaevetsinē pejamatabēcueneta penetsiaexanabiabatsi bajarapacuenia petēpaenexa pebinacuetoxi. ²⁰ Bajarapamatacabi naexana Moiséspjinē. Moiséspjinē bitso pexanianacuetonēyo. Dioso barēya tanetsi. Nexata Moiséspjinē penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspjinē paxabeje penabeje xuabatsi baja. Nexata nacuaevetsinē pexēnatoyo Moiséspjinē pitatsi nacoxiyabijitsiatsi. Nexata nacuaevetsinē pexēnatoyo Moiséspjinē vitsatatsi pexēnatonēyocuenia. ²² Nexata Moiséspjinē cujarubatsi daxitacuene, xua Egipto nacuapijivi yapētane. Nexata Moiséspjinē bitso yapētane livaisi petsipaebinexa jivijavabelia. Pexanaejava ata pecobeta bitso yapētane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itša baja Moiséspjinē cuarenta pavaibeje xaina penaexanaecujinae, sivanajamatabēxaina petaenexa pijamonae itsajota jinavanapa. ²⁴ Nexata baja Moiséspjinē pona petaenexa pijamonae. Nexata baja Moiséspjinē itša ponapona panacuata pijamonae jinavanapa, Moiséspjinē pitabēta Egipto nacuapijinē tobejiobiaexanatsi pijamonaenē. Nexata Moiséspjinē bajarajota pijamonaenē yamatamobeyaxuaba Egipto nacuapijinē. ²⁵ Moiséspjinē nexata jamatabējumaitsi: “Daxita tajamonae, Israelpijinē pemomoxi, nesivajamatabējumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabējai tsane,” jamatabējai picani Moiséspjinē. Itsiata baitsi jane Moiséspjinē pijamonae bajarapacuenia apo sivajamatabējumaitsi. ²⁶ Moiséspjinē pebeyaxuabicujinae Egipto nacuapijinē, icatsia meravia pitsijavata, Moiséspjinē caxitajaraba anijanēbeje penabejavatabeje. Bajaraponēbeje Moiséspjinē ēpjamonaenēbeje, Israelpijinē pemomobeje. Nexata

Moisésþijinjē xaniavaetsia itaveta penabeyanivabeje matavējēa. Jumaitsi: “¡Panabejitsipamebeje! Panapijamonaenēmēbeje raja. ¿Detsa xuajitsia panabiamebeje?” jai Moisésþijinjē. ²⁷ Nexata ponē matapita penabejavabeje, torotajarabatsi Moisésþijinjē. Bajaraponē jumaitsi Moisésþijinjējavabelia: “¿Jipatsa catocopata patanevetsinēnexamē? ¿Jipatsa catocopata, pibisiacuene ita paexanajē, pataneconitsiaexanabiabinexamēnua? ²⁸ ¿Nebeyaxuabijitsiamē tsaja icatsia xanē ata pacuenia canivi beyaxuabame Egipto nacuapijinjē?” jaitsi Moisésþijinjē pijamonaenē. ²⁹ Nexata Moisésþijinjē ita jumetane bajarapacuenia pejumaitsijavatsi pijamonaenē, nexata Moisésþijinjē najetabajirava Madián nacuayabelia. Bajarapanacuatalia ponapona. Nexata bajarapanacuatalia Moisésþijinjē nacojioaba. Xaina anijanēbeje pexēnatobeje, jai Esteban sacerdotevi penamatacaitorobivijavabelia, judíoovi pijaancianovijavabelia ata, judíoovi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje ita panepa Moisésþijinjē peponaponaecujinae Madián nacuata, Dioso tsitanaitajētatsi beāngelnēcuenia. Bajarapacuenia tsitanaitajētatsi petusato nacuata, Sinaivēnētsuto canacujitsita. Tsiquirinaemēyo petajueyecacotia tuatajēta, tsitanaitajētsitsi Dioso Moisésþijinjē. Itsiata tsiquirinaemēyo apo veriajavatsi. ³¹ Moisésþijinjē ita tane, jamatabēcuenenabenajaca. Nexata kujitabalia xaniavaetsia imoxoyo petaenexa tsiquirinaemēyo petajueyecacotia. Nexata bajarapacotiajavaverena Dioso jumaitsi Moisésþijinjējavabelia: ³² “Xanē raja nijasalinaivimi pijaDiosonē. Abrahampijinjē, Isaacþijinjē ata, Jacobþijinjē ata, pijaDiosonē,” jai Dioso. Nexata bajarajota Moisésþijinjē neconecojai pecajunavi. Apo naēcotsilia baja icatsia matavējēa. ³³ Nexata icatsia bajarapacotiajavaverena Dioso jumaitsi Moisésþijinjējavabelia: “Nataxujonore nijazapato. Tsipaji raja taitabarata nucame. ³⁴ Taniji rabaja tajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsinueyabiabijava. Nexata runaicajē bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moisésþijinjējavabelia tsiquirinaemēyo petajueyecacotiajavaverena, jai Esteban sacerdotevi penamatacaitorobivijavabelia, judíoovi pijaancianovijavabelia ata, judíoovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moisésþijinjē Dioso itorobatsi peponaenexa Egipto nacuayabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moisésþijinjē peponaevajēnaeya Egipto nacuayabelia, pamatacabi abaxē Moisésþijinjē ponapona panacuata vajasalinaivimi jinavanapa, bajarapamatacabi vajasalinaivimi Moisésþijinjē navecuaitavetatsi. Vajasalinaivimi jumaitsi Moisésþijinjējavabelia: “¿Jipatsa catocopata patanevetsinēnexamē? ¿Jipatsa catocopata, pibisiacuene ita paexanajē, pataneconitsiaexanabiabinexamēnua?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moisésþijinjē peponaenexa vajasalinaivimijavabelia. ³⁶ Moisésþijinjē nexata pona Egipto nacuayabelia. Nexata Egipto nacuata Moisésþijinjē Dioso pesaēta pinijicuene pexanaejava, exanapona.

Bajaraxuacujinae Moiséspijinē Egipto nacuverena vajasalinaivimi jane baja matacanajetaruca. Nexata Moiséspijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bajaraxuacujinae cuarenta pavaibeje ita jinavanapa petusato nacuata, itsajavanē icatsia Dioso pesaēta pinijicuene pexanaejavanē, Moiséspijinē exanapona.³⁷ Bajarapamatacabi cajena Moiséspijinē jumaitsi vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipaebinēnexa profetanēnexanē, bajarapacuenia Dioso pacatoitorobianica itsanē profetanē Diosojumelivaisi papecatsipaebinēnexa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moiséspijinē bajayata tajēvelia vajasalinaivimijavabelia Jesús yabara.³⁸ Moiséspijinē barēnacaetuata vajasalinaivimi petusato nacuata, Sinaivēnē tsutomuxuneneta. Nexata Sinaivēnē tsutojumabetsia caenē Moiséspijinē junaya. Nexata Sinaivēnē tsutojumatatsia Moiséspijinē ángeljavabelia tocaicuajai vajasalinaivimi. Nexata Moiséspijinēta Dioso penajumecopatsilivaisi jivi pejumecovēnētsinexa, Sinaivēnē tsutojumatatsia tonajumecopatatsi. Bajarapalivaisi Dioso najumecopata Moiséspijinēta vaxaitsi ata bajarapalivaisi vajaxainaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:

—Vajasalinaivimi apo jamatabējumecovēnētsi Moiséspijinē. Apo jitsipae cajena matavējēa penamatacaitorobinēnexatsi. Vajasalinaivimi picani najamatabēxaina epatua Moiséspijinē pepepēnaviabinexatsi Egipto nacuyabelia.⁴⁰ Moiséspijinē bajayajebi ponaponaya Sinaivēnē tsutojumatatsia. Nexata Moiséspijinē pecovēta vajasalinaivimi jumaitsi Aarónpijinējavabelia: “Exanare díosovi vajanacamatacaponaenexa. Apo yapētaetsi rabaja pacuenia exanatsi Moisés vajanacamatacaponaenē Egipto nacuverena,” jai.⁴¹ Nexata vajasalinaivimi becerro jumapecataeya exana oronē. Nexata bajarapajumapenējavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabēcuenebarēyaya fiesta exana pecobeta pexanaexae oronē. Tsipaji bajarapajumapenē vajasalinaivimi bepíadisonē tane.⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabēcuenecopatsiaya penavajēcabiabinexa itaboxopijitulupujavabelia. Diosojumepaebinē profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinē papemomoximē, pamatacabi abaxē pajinavanapame cuarenta pavaibeje petusato nacuatalia, pabeyabiabi atamē baca, oveja yajava, bajarapavi xanē apo panerajutabiabimē ofrendacuenia.⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadisonē panetaenē Molocvēnēdisonē pijabonexa. Pacajinavanapamenua tuluputo, jumapecataeya panenatoexanaetuluputo, Renfánvēnētuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinavanapame

najamatabëcuenecopatsiaya bajarapadiosovijavabelia
 panenavajëcabiabinexa. Bajaraxuata panijanacuavecua
 pacacaponaeayaexanaenatsi Babilonianacua pënëyabelia
 pairajavabelia,

jai Dioso pejumaitsijava mapacueniaje profetanë peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia:

—Bajayata vajasalinaivimi itsa jinavanapa petusato nacuata, cajinavanapa Dioso pijacarpoboxaneto, bajarapabota Diosojavabelia pevajëtabiabinexa. Nexata Dioso Moiséspijinëta penajumecopatsilivaisi, Dioso peyaquinaeibopanayobeje, vajasalinaivimi xaniavaetabuatabiaba bajarapacarpabo ënëtuatuajëta. Copiaya Moiséspijinë jumapecataeya Dioso tsitajëtatsi pacuenia bajarapacarpabo exanetsijitsia. Nexata juya Moiséspijinë itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajëtatsi Moiséspijinë. ⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaenexa. Nexata vajasalinaivimi itsabelia varapa, caponabiaba bajarapacarpabo. Moiséspijinë baja itsa tëpa, Josuépijinë juya maticapona vajasalinaivimi. Josuépijinë nexata pamatacabi vajasalinaivimi maticanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaë exana mapanacuataje pejinavanapaevimijavabelia. Nexata vajasalinaivimi mapairaje yacajërëta. Pamatacabi Josuépijinë vajasalinaivimi maticanajetaruca mapanacuayaberenaje, Dioso rëcëpecaeyaexanatsi mapanacuapijivimije Josuébana pevajënaetarena. Nexata bexëjavaberena ata, pamatacabi Davidpijinë mapanacua evetaje, vajasalinaivimi abaxë cajinavanapa bajarapacarpabo. ⁴⁶ Nexata Dioso pexaniajamatabëcuenia tanetsi Davidpijinë, mapanacuaje pevetsinëmi. Nexata picani Davidpijinë bitso jitsipa Dioso pijabonexa templobo pexanaeyaexanaenexa. Baitsi paDioso bajayata Jacobpijinë jumecovënëta, Davidpijinë jane baja pamopijinëmi. ⁴⁷ Itsiata baitsi jane Davidpijinë Dioso apo tocopatsitsi templobo pexanaeyaexanaenexa. Davidpijinë pexënato, Salomónpijinë, Dioso pijabonexa templobo exanaeyaexana, Davidpijinë baja pepuatëpae. ⁴⁸ Pepo Dioso athëbëtatsia peecaenë, bajaraponë apo ponaponae bota, jivi pexanaebota. Diosojumepaebinë profetanë bajayata jumaitsi mapacueniaje Dioso pejumaitsijava:

⁴⁹ Athëbëtatsia daxitacue ne taevetsinë. Mapanacuajava ata taevetsinë. ¿Detsa nexata xuajitsia bo panetoexanetsipame? Apo namatavenonaenë cajena bo tanacueraevetsinexa. ⁵⁰ Xanë daxitacue ne taexanaenë,

jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabëcuenetajavi. Paneamatabocotajavinua. Apo pajumecovënëtsimë Dioso pejumelivaisi. Apo pacopatsimë Espíritu Santo papecatsijamatabëjonexa. Pacuenia panijasalinaivimi bajayata itsi,

bajara saya icatsia paxamë paitsimë. ⁵² Diosojumepaebivi profetavi tajëvelia vajunupaebaona Cristo, pepo planeconijibinë pepatsi-javanexatsica. Nexata panijasalinaivimi daxita bajarapaprotetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamë pijavajabitsaë pecobeyabelia pacanajetaxuabame. Bajarapacuenia Cristo pabeyaxuabame. ⁵³ Angelevi pacarajutsi ata Dioso Moiséspijinëta penajumecopatsilivaisi jivi pejumecovënëtsinexa, itsiata paxamë apo pajumecovënëtsimë bajarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. ⁵⁵ Itsiata Esteban bitso jamatabëcuenevënëca Espiritu Santo. Esteban athëbëa benaëcotsia. Nexata tane Dioso pijapenivenivenaecotia. Taenutsianua Jesús penucaejava paxa Dioso pemuxuneneta, pecujanenia. ⁵⁶ Nexata Esteban jumaitsi daxita bajarapamonaejavabelia:

—iPanataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita caecuenia cujibarenatsi Esteban pevaetabinexatsi. ⁵⁸ Bajarapamonae Esteban caponaliatsi tomarapënëyabelia. Nexata tomarapënëtalia Esteban tseconatsi ibotonëta. Nexata daxita pamonaë jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënënë evetsiaexanatsi. ⁵⁹ Petseconanubenaëjavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tēpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsi-aexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinë baja itsa beyaxuabatsi, Saulo tsitaxanepanatsi. Nexata pebijivi, pamonaë Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaëjava Jesús pelivaisi pejumecovënëtsivi Jerusalén tomarata.

Saulo jane baja jaitaruta Jesús pelivaisi pejumecovënëtsivi Jerusalén tomarata. Caoe canacujitsia jonepona. Nexata taicapona pebejivi, petiriavi ata, pamonaē Jesús pelivaisi pejumecovënëtsivi. Penaneconit-sivi pejebabiabiboyabelia Saulo cajonepona bajarapamonae. Nexata ayaibitsaëtoxaneto Jesús pelivaisi pejumecovënëtsivi, Jerusalén tomara-pijivi, rēcēpeca itsatomaranējavabelia. Itsamonae rēcēpeca Samaria nacuyabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënëtsivi, tsipaebapona Samaria nacujava yabara pelivaisi

⁴Pamonaē Jesús pelivaisi pejumecovënëtsivi, rēcēpeca Jerusalén tomar-avecua. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. ⁵Pamonaē rēcēpeca yajuvënënë, pevënë Felipe. Bajaraponē lia Samaria nacuada pecae-tomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponē Dioso itorobica jivi pecapanepaenexa, jai tsaponae Felipe Samaria nacuada pecaetomarapijivijavabelia.

⁶Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetuatabiaba. Daxita bajarapamonae xaniavaetsia namuxunaevetabiaba Felipe ita tsipaebabiaba Jesús pelivaisi. Bajarapamonae tane Felipe Dioso pesaëta pinijicue pexanaejavanē. ⁷Pamonaē dovathi peyajavajinavanapaevi, Felipe vecuacapitsapabiaba. Dovathi pinijijumeta aējai tsabiabi ita vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamonaē ata petabusipacuenabivitsi, pejayujayunaevi ata, jamatejemaexanapona Felipe. ⁸Bajaraxuata daxita bajarapatomarapijivi jamatabēcuenenabarēya.

⁹Bajarapatomarata Simónvënënë ponapona. Bajaraponē jivi pejorobabiabinē. Bajayajebi daxita Samaria nacupijivi yamaxëitojorobaponapona. Simón jumai tsabiabi bajarapatomarapijivijavabelia:

—Xanē bitso jivi taxaniavaetsinē, jai tsabiabi.

¹⁰Daxitajivi, petuxanevi ata, Simón pejumaitsijava namuxunaevetabiabatsi. Bajarapamonae nexata Simón yabara jumai tsabiabi:

—Maponēje Simón pinijicue pexanaejava caējēpatsi. Dioso raeta yavenonatsi, jai tsabiabi bajarapamonae Simón yabara.

¹¹Bajarapacuenia Samaria nacupijivi xaniavaetsia jumecovënëtabiaba tsipaji Simón pejorobicueneta bajayajebi jivi yamaxëitojorobabiaba. ¹²Nexata Felipe Samaria nacupijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacupijivi jumecovënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

¹³Nexata jane baja Simón jivi pejorobabiabinē ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta naponapona Simón. Nexata Simón jamatabēcuenenabenajacabiaba ita taeyabiaba Dioso pesaëta Felipe pinijicue pexanaponaejavanē.

¹⁴Nexata apóstolevi Jerusalén tomarata pejinavanapaevi, vënëlivaisitane Samaria nacupijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënëbejeyavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaraponëbeje patabeje Samaria nacuayabelia, tovajëtabeje Diosojavabelia Espíritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. ¹⁶ Bajarapacuenia tovajëtabeje tsipaji abaxë Samaria nacuapijivi Espíritu Santo apo tsijamatabëpatsitsica. Abaxë saya bautisabatsi bajarapamonae Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsmatanacobebeuatabeje Samaria nacuapijivi. Nexata jane baja Samaria nacuapijivi Espíritu Santo tsijamatabëpatsicatsi.

¹⁸ Nexata Simón itsa tane Samaria nacuapijivi Espíritu Santo pet-simatarunaejavatsitsica apóstolenëbeje Samaria nacuapijivi tsmatanacobebeuatsiaya petovajëtsijavatabeje Diosojavabelia, nexata Simón palata tsipaeba apóstolenëbejevavelia. ¹⁹ Simón jumaitsi:

—Panerajurebeje mapacaëjëpaejamatabëcueneje. Pajivi tsmatanacobebeuatajë tatovajëtsijavata Diosojavabelia, bajarapajivi petsimatarunaenexatsitsica Espíritu Santo, jai Simón apóstolenëbejevavelia.

²⁰ Nexata Pedro jumaitsi Simónjavavelia:

—Xamë cajena Dioso caxuabiana infiernojavavelia. Nexata vereverecaename nijapalata yajava. Tsipaji najamatabëxainame necomuatsinexa ëpalata Dioso amoneya jivi perajutsijavatsica. ²¹ Tsipaji pepacuene apo najamatabëcueneocopatsimë xaniavaetsia Diosojavavelia. Nexata Dioso patajumecovënëtsivita, apo nanacuenebimë tsane. ²² Copare baja papibisiacuene najamatabëxainame. Najamatabëcuenepeñëyorore Diosojavavelia. Vajëre Diosojavavelia pecavecuajibiaexanaenexa papibisiacuene najamatabëxainame. ²³ Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcueneçënënaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajërebeje Diosojavavelia tanevecuajibiaexanaenexa paneconi xainajë Dioso tanexuabiyaniava infiernojavavelia pacuenia panejumaitsimëbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinë yabara pelivaisi

²⁶ Dioso pijaängel jumaitsi Felipejavavelia:

—Nonotapunare. Maxuayolia roviafia liamëreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jaiängel Felipejavavelia.

Bajarapanamuto petusato nacujava rucalia pepatsinexa Gaza tomarabelia. ²⁷ Nexata Felipe xaniavaeta pijajavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitaraba Etiopía nacuapijinë. Bajaraponë palata pevetsinë. Etiopíanacua pevetsiva pijapalata tovetabiaba. Bajaraponë, Etiopía nacuapijinë, Jerusalén tomarajavavelia pona najamatabëcueneocopatsiaya

pevajëtsinexa Diosojavabelia templobota. ²⁸ Nexata baja Etiopía nacuapijinë Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavënë moyota, yanajetaruca. Nexata lebanajetaruca Diosojumelivaisipaebinë profeta Isaiáspijinë bajayata peyaquinaebaxuto. ²⁹ Nexata Espíritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunia nucaponaename, jai Espíritu Santo.

³⁰ Felipe nexata cujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë pelebenajetarucaejava profeta Isaiáspijinë peyaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënë moyo ënëabetsia Felipe penajunaenexatsia penamuxuneniaecaenexabeje.

³² Profeta Isaiáspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi. ³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitsi tsane: “Mara pamonaeye bajaraponëmi pemomoxije,” apo jai tsane. Tsipaji beyaxuabianatsi,

jai tajëvelia mapacueniaje Isaiáspijinë peyaquinaebaxutota Jesús yabara, palivaisi Etiopía nacuapijinë lebanajetaruca.

³⁴ Nexata Etiopía nacuapijinë jumaitsi Felipejavabelia:

—Pexaniacuene netoexanare. Netsipaebare ponë yabara yaquina profeta Isaiáspijinë mapacueniaje. ¿Baja tsa ponë pijacuata nayabarajumaitsi? Itsa jume, ¿itsanë yabara tsaja jumaitsi? jai Etiopía nacuapijinë Felipejavabelia.

³⁵ Nexata palivaisi Etiopía nacuapijinë lebanajetaruca, bajarapalivaisi Jesús yabara pejumaitsijava copiaya Felipe yapëtaeayaexana. Bajaraxuacujinae icatsia tsipaeba pexanialivaisi, Jesús pelivaisi.

³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

³⁷ Nexata Felipe jumaitsi:

—Itsa jumecovënëtame xaniavaetsia daxita nejamatavëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexë nato, jai Etiopía nacuapijinë Felipejavabelia.

³⁸ Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinë. ³⁹ Nexata penonotajunaecuajinaetsinabeje, Espíritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espíritu Santo. Bjaraxuacujinae Etiopía nacuapijinë apo taetsi baja Felipe matavëjëa. Itsiata Etiopía nacuapijinë pona baja barëyaya pijanacuayabelia. ⁴⁰ Felipe Espíritu Santo caliatasi Azoto tomarabelia. Felipe nexata daxita tomaranëjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovënëta Jesús yabara pelivaisi

(Hch 22.6-16; 26.12-18)

¹ Saulo cajena Jerusalén tomarata apo copatsi petaicaponaejava daxita pamonaes Jesús pelivaisi jumecovënëta pebeyejebiaexanaenexa. Bjaraxuata Saulo pona daxita sacerdotevi pepo penamatacaitorobinëjavabelia. ² Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judíovi penacaetuatabiabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaenexa Damasco tomarabelia. ³ Bjaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica. ⁴ Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamë nijacuata najamatabëcuenebijianaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bjarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunaviacanubena. Nexata moyava nubena. Tsipaji jumetane pajume athëbëvetsica jumaitsi Saulojavabelia. Bjarapajume jumetae ata, itsiata bajarapamonae apo tae jivitonë. ⁸ Nexata Saulo, irata pebocaenëmi, nonotapuna.

Naëcobaruta picani. Itsiata apo naëcotsixanepanae. Tsipaji itaxutomer-avibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca. ¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsimatanacobe- buatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías ita jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanaponapona. Vënëlivaisitaniji bajaraponë pebejiobiaexanaponaajava Jerusalén tomarata daxita pecajumecovënëtsivi. ¹⁴ Maberena ataje icatsia itorobatsi sacerdotevi penamatacaitorobinë petotaicaenexa daxita pamona pecajumecovënëtsivi jinavanapa mapatomarataje, jai Ananías Jesúsjavabelia.

¹⁵ Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinexa itsanacuanëpijivijavabelia, tanelivaisipaebinexanua bajarapanacuanë pevetsivijavabelia ata, tanelivaisipaebinexanua Israel nacuapijivijavabelia. ¹⁶ Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

¹⁷ Bajaraxuacujinae Ananías jane baja lia. Joneya pabota Saulo ponapona. Ananías nexata nacobebeuata Saulo pematabocotojumavereca. Ananías jumaitsi Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucajavata, bajaraponë nitoroba. Bajaraponë nitoroba tacatsimatanacobebeuatsinexa pecavecuaajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobebeuatsinexa pecatsijamatabëvënëcaenexa Espiritu Santo, jai Ananías Saulojavabelia.

¹⁸ Bajarapacuenia Ananías pejumaitsijavata Saulojavabelia, Saulo veitaxutoothopatsi xua itaxutocaranatatsi, bedujauitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. ¹⁹ Bajaraxuacujinae pexaejava baja xane. Nexata baja icatsia Saulo aperabësaëreca. Saulo nexata Damasco tomarata caematacabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënato cuene, bepijiayo Saulo taxuxuaba jivi petsipaebijava Jesús pelivaisi judíovi penacaetutabiabibonëjava. Saulo jivi ita tsipaeba pona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

²¹ Nexata daxita pamona jumetane Saulo petsipaebilivaisi, jamatabëcuenenabenajaca. Najumaitsi bajarapamona Saulo yabara:

—Mara ponëje bejiobiaexanapona Jerusalén tomaratalia daxita pamona jumecovënëta Jesús pelivaisi. Icatsia picani pata mapatomaraberenaje petaicaenexa daxita pamona jumecovënëta Jesús pelivaisi. Nexata ita taica, pecaponaenexa picani Jerusalén tomarabelia, sacerdotevi penamatacaitorobivijavabelia, najai bajarapamona Saulo yabara.

²² Itsiata Saulo ajumejunavijibia bitso asaëyata tsipaeba pona Jesús pelivaisi. Nexata Saulo xaniavaetsia jivi yapëtae yaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaeba pona ejava, bexëjavabelia judíovi sivanajamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënae vetabiabatsi pebeyaxuabinexatsi picani. Pabaupaxaneto javalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënae vetabiabatsi pebeyaxuabinexatsi picani. Itsiata Saulo nayalivaisi-ajumetane judíovi pebeyaxuabiapaebijavatsi. Bajaraxuata Saulo bajarapabaupaxaneto javalia apo pitsapaelia. ²⁵ Damascotomara matatoyorotsia yacaranata piaitayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinae javaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponae vitsi, ita baja meravi, Saulo ecaeyaexanatsi bemapirecuenia pexanae javaxanetoënëta. Nexata Damasco tomara matatoyorotsia peyacaranatsi ibopanaxaneto yenepanata athëbëyo perucaeventanavo jotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyanivatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo ita patajopa Jerusalén tomarata, Saulo picani jitsipa penaponapona ejava Jesús pelivaisi pejumecovënëtsivijavata. Itsiata daxita bajarapamona Saulo cujunavatsi. Tsipaji apo jumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuai cuaijatsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaeba pona Damasco tomarata Jesús pelivaisi, Bernabé tsipaeba apóstolevijavabelia. ²⁸ Nexata baja Saulo ponapona

Jerusalén tomarata. Naponapona apóstolevijavata. ²⁹ Saulo tsipaebapona ajumejunavijibia Jesús pelivaisi. Saulo barëcuaiquaijai tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënaxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejibiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espíritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayabitsaëtoxaneto jumecovënëtaponapa Jesús pelivaisi.

Pacuenia Jesucristo pejamatabëcueneta Pedro jamatejemayaexana Eneasvënënyabara pelivaisi

³² Pedro najetaruca daxitatomaranëjava pesivaxainanexa Dioso pejumecovënëtsivi. Nexata najetaruca Lida tomarajava ata pesivaxainanexa Lida tomarata pejinavanapaevi, Dioso pejumecovënëtsivi. ³³ Nexata Pedro Lida tomarata taeyabuata Eneasvënënyë. Bajaraponë ocho pavaipeje xaina camata peboacaecujinae. Tsipaji tabusipacuenabatsi. ³⁴ Pedro nexata jumaitsi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxita Lida tomara-pijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujumatabëcuene pecatsitecaejavami, copaba baja. Najamatabëcuenecopaba baja Jesucristojavabelia.

Pacuenia Pedro Dorcasvënëva petëpaecujinae icatsia asaëyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita maticabi canacujitsia pexaniacuene toexanabiaba itsamonaejavabelia. Bepejibivijavabelia rajutabiaba penamatavenonaejavaxi bajarapacuenia peyavenonaenexa. ³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas tëpa Jope tomarata. Peperabëquiatsicujinaetsi petëpaeva buatatsi anijairabeje pexainaebo ënëtuatuajëta. Athëbëyo pairatsia, bajarapaënëtuatuajëtsia buatatsi. ³⁸ Jopetomara eca imoxoyo Lida tomaravecua. Dioso pejumecovënëtsivi vënëlvivisitantsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

³⁹ Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecuatëpaevanëtsi, Dorcaspijiva pevënuvitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcaspijiva pejoroceajavanë, penaxatabijavanë, penajumaacabipananë ata, xuanë Dorcaspijiva rajuta bajarapamonaejavabelia pamatacabi abaxë asaë tsaponaponae. ⁴⁰ Nexata paënëtuatuajëta petëpaeva boca, bajarapaënëtuatuajëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namat-acota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaejavabelia petëpaevami icatsia piasaëjava. ⁴² Nexata Dioso pesaëta bajarapapinjicue Pedro pexanaejava, daxita Jope tomarapijivi yapëtane. Nexata jivibitsaëtoxaneto jumecovënëta Jesús Dioso pexënatocuene. ⁴³ Nexata Pedro bajayajebi ponapona Jope tomarata. Simón bacabocotonë peyacueyacuecaeyaexanaenë, pijabota Pedro naponapona.

10

Pacuenia Pedro barëcuaicuaijai Corneliovënënë yabara pelivaisi

¹ Cesarea tomarata ponapona Corneliovënënë. Apo judíonë. Bajaronë Italia nacuaverena pepatsivi vajabitsaëvi pijacapitán. ² Cornelio pijabopijivi barëjumecovënëta ponapona Dioso. Dioso bitso yayiataeya Cornelio ponapona. Cornelio palata ayaijava rajutabiaba judíovijavabelia peyavenonaenexa judíovi bepejiobivi. Cornelio vajëtabiaba Diosojavabelia. ³ Itsamatacabi caniviyoepatota, bejamatabëcuene a las tres, Cornelio bemajitsinaebota tane Dioso pijaángel pejonejavarena pijaboyarena. Nexata junataxuabatsi.

—¡Cornelio! jaitsi.

⁴ Cornelio nexata naëcota ángeljavabelia. Bitso cujunava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabibijava Diosojavabelia, nerajutabiabijava ata penamatavenonaecuene bepejiobivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

⁷ Bajarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanëbeje pijabota

petonacuenebaponaponaenëtsibeje. Pematatsënëa junata caenë vajabitsaenë. Bajaraponë vajabitsaenë Dioso peyaiyataenë. Bajaraponë Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivaponaenexa. Nexata baja bajarapamonae naropoba.

⁹ Meravia pitsijavata, matonejeepatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajêpaebo. Pedro junaya bajarapabojumatatsia pevajëtsinexa Diosojavabelia. ¹⁰ Pedro bitso piajani. Jamatabënabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athëbëvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Bajarapacuenia yamaëya copatsica. ¹² Bajarapapanaxaneto tuatuajëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. ¹³ Nexata Pedro jumetane athëbëvetsica pejumaitisijava: “Pedro, nonotapunare. Beyaxuare daxita mapamonaeje nexaenexa,” pejajijava athëbëvetsica, Pedro jumetane.

¹⁴ Nexata Pedro jumaitsi:

—Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tspijaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëabetsia baja icatsia yapëcaevaya. ¹⁷ Pedro nexata najamatabëxainaea jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacaeyaexanaenë, pijabo. ¹⁸ Nexata bajarapamonae pepatarëcëpaecujinae, baupa pënëvelia ayajumeta yanijoba. Jumaitsi:

—¿Baja tsa mapabota Simón naponaponaje, ponë vënërubatsi itsavënë, Pedro? jai bajarapamonae.

¹⁹ Pedro abaxë bojumatatsia athëbëyo najamatabëxainecaya bemajitsinaebota petaejava yabara. Nexata Espíritu Santo jumaitsi Pedrojavabelia:

—Taema. Acueyabi ponëbeje casivaparena. ²⁰ Nexata nonotapunare. Runaremeça baja nenaponaenexa bajarapamonae pepëta. Jamatejema saya ajamatabëcuene covëbia naponae name. Tspijaji raja xanë itorobarenajë bajarapamonae, jai Espiritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponë pajaitame, xanë rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaëvi raja pijacapítan Cornelio pejamatabëcuene panajetarubenajë. Bajaraponë pexaniajamatabëcuenenë. Dioso bitso pejumecovënëtsinë. Nexata bajaraponë Diosojavabelia vajëcabiaba. Daxita judíovi yayiatanetsi. Nexata judíovi jumai tsabiabi bajaraponë yabara: “Pexaniajamatabëcuenenë raja Cornelio,” jai tsabiabi. Dioso raja pijáangel itorobatsi Cornelio pecajunatsinexa. Bajaraxuata paxanë pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamë bajaraponëjavabelia, jai Cornelio pijajivi Pedrojavabelia.

²³ Nexata Pedro copiapita boyaberena pejonenexa bajarapamonae. Bajarapamonae abaxë namajita bajarapabota. Bajayacunua jane baja Pedro napona bajarapamonae pepëta. Pedro pëyanatatsi itsamonae Jope tomarapijivi, Dioso pejumecovënëtsivi. Itsiata abaxë bajarapamatacabi apo patsilia. Epatua abaxë majitaothopa.

²⁴ Nexata meravia pitsijavata Pedrobana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamonae bitso Cornelio peyapëtaevitsi. Pedro jane baja barëvajënaeevetanucatsi. ²⁵ Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabëta nucajunua Pedro pitabarata. Tspijaji bitso yayiyataeya copiapitsijitsia picani. ²⁶ Nexata Pedro apo jitsipae bajarapacuenia bitso yayiyataeya pecopiapitsijavatsi. Nexata Pedro maxëvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tspijaji saya pacuenia xamë jamatabëcueneitsimë, bajara saya xanë ata jamatabëcueneitsinë, jai Pedro.

²⁷ Nexata Pedro Cornelio barëcuaicuaijai tsanucaponae panabojavarena. Pedro itsa najoneya Cornelio pijaboyalia, tane jivibitsaëtoxaneto Cornelio pijabota penacaetuatsivi. ²⁸ Nexata Pedro jumaitsi Cornelio pijabota penacaetuatsivijavabelia:

—Paxamë baja cajena xaniavaetsia payapëtaneme mapacueneye. Paxanë pajudíovinë patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajë apo judíovi. Apo panetocopatsinua patajonenexa apo judíovi pijaboyalia. Itsiata baitsi jane aeconoxaeta baja Dioso nitaveta tacopatsinexa baja bajarapajamatabëcuene. Nexata Dioso netocopata tayajavaponaponaenexa apo judíovi ata. Netocopatanua tanajonenexa apo judíovi ata pijaboyalia. ²⁹ Bajaraxuata itsa nejunata taponae naxa maberena, narenanë bepíjia ajamatabëcuene covëbia. Nexata jamatabëyapëtaniji xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, caniviyoepatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacueene tataecujinae. Angel penaxatatsijava nivenivena. ³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëtane baja nerajutabiabijava bepejiobivijavabelia penamatavenon-aecuene. ³² Nexata nijajivi itorobare Jope tomarajavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepijiayo casivaponaeyaexanatsi. Xamë baja nexata pexaniajamatabëcuenia netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabelia.

Pacuenia Pedro livaisi tsipaeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxitaviriavitsi. ³⁵ Caenacuapijivi canacujitsia, pamonaë Dioso yaiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonaë Dioso jitsipa. ³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeneconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. ³⁷ Payapëtaneme rabaja mapacueneje. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. ³⁸ Payapëtaneme rabaja mapacueneje. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús cajëpatsi daxitacuene pexanaenexa. Nexata Jesús jamatejemayaexanapona daxita pamonaë dovathi pejamatabëcueneta avitane. Bajarapacuenia Jesús exanapona tsipaji Dioso yajavaponaponatsi. ³⁹ Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemëthëtsicujinaetsi, acueyabi matacabita, Dioso icatsia asaëyaexanatsi. Dioso Jesús cajëpaeyaexanatsi patanetsitanaitajëtabinexa paxanëjavaberena. ⁴¹ Itsiata Jesús apo tsitanaitajëtsi daxitajivijavabelia. Èpaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë. Bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë nabane. Panebarëmatavëjëaapanua. ⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexainaevi. Itsamatacabi Jesús naneconitsiaexanaena

piasaëvi, petëpaevimi ata. ⁴³ Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevecuaajibiaexanaejavanexa pibisiacue ne pexanae neconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espiritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanucaejavata Corneliobanajavabelia, Espiritu Santo tsijamatabëjunuatsi daxita pamona e jumetaeyena Pedro petsipaebilivaisi. ⁴⁵ Nexata judíovi Dioso pejumecovënëtsivi, Pedro peyajavapatsivi, ita tane bajarapacue ne, jamatabëcuenenabenajacanubena. Jamatabëcuenenabenajaca tsipaji apo judíovi ata Espiritu Santo tsijamatabëjunuatsi. ⁴⁶ Nexata Pedro peyajavapatsivi yapëtane Espiritu Santo petsijamatabëjonejavatsi Corneliobana. Tsipaji Corneliobana cuaicuaijai itsaviriajumenëta, apo penatsipaebijumenëmi. Corneliobana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espiritu Santo, bajara pijinia pacuenia mapamona e ataje Dioso rajutatsi Espiritu Santo. Bajaraxuata itsajivi ata acuenebi pejumait sijava bajarapamona e yabara: “Pëtsa mapamona e je pabautisabame merata,” pejaijava, jai Pedro.

⁴⁸ Nexata Jesucristo pevënëta Pedro bautisaba Corneliobana. Pedro pebautisabicujina e Corneliobana, asivatsi abaxë Pedro penaponaponae nexa bajarajota caematacabi beje.

11

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

¹ Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamona e jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi. ² Nexata pamatacabi Pedro pata Jerusalén tomarata, judíovi, pamona e jumecovënëta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajarapacue ne yabara. Pedro jumaitsi judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuecaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniji athëbëvetsica perunaejavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Ita naitaxutobabatsia naëcotajë xaniavaetsia tataenexa xua yajavanajetaruca bajarapapanaxaneto tuatua jëta, nexata taniji cuatro pataxutabeje pejinavanapaevi. Taniji unupijivinua,

pianaepanaevi. Taniji pecotobëxëta pejinavanapaevinua. Taniji pepunaevinua. ⁷ Nexata jumetaniji athëbëvetsica tanejumaitsijava: “Pedro, nonotapunare. Beyaxuare daxita mapamonaeje nexaenexa,” nejai. ⁸ Nexata jumaitsinë: “Jume raja. Caeto ata raja xanë apo xanë bajarapavirianëxi tanejamatabëcuenebijiánaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumaitsi: “Pavirianëxi caitorobatsi nexaenexa, xaema. Pëtsa jumaitsimë: ‘Apo xanë raja bajarapavirianëxi tanejamatabëcuenebijiánaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacuenia athëbëvetsica napëna nejumaitsi. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. ¹¹ Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. ¹² Nexata Espiritu Santo nitoroba bajarapamonae pepëta ajamatabëcuene covëbia tanaponaenexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalía. ¹³ Nexata Cornelio panetsipaeba pijabota petsitanaitajëtsijavatsi ángel. Angel pina jumaitsi Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë itsa patsiarena, catsipaebiana pacuenia exanaejitsiamë Dioso pecavecuajibiaexanaenexa daxita pibisiacuene nexanaeconimi, daxita nijabopijivi yajava,” jai pina ángel Corneliojavabelia. ¹⁵ Nexata jane baja itsa taxuxuabajë livaisi tatsipaebijava Corneliobanajavabelia, Espiritu Santo tsijamatabëpatsicatsi Corneliobana. Pacuenia vaxaitsi copiaya nacatsijamatabëpatsica Espiritu Santo, bajara pijinia pacuenia bajarapamonae ata tsijamatabëpatsicatsi Espiritu Santo. ¹⁶ Nexata najamatabënapitajë Jesús patanejumaitsijava mapacueniaje: “Juanpijinë raja jivi bautisabanajetaruca émerata. Itsiata baitsi jane caematacabibecujinae paxamë Dioso pacatsijamatabëjoneyaexanaena Espiritu Santo,” patanejaijava Jesús, najamatabënapitajë. ¹⁷ Xaniajai baja cajena. Dioso rajutapona Espiritu Santo apo judíovi ata pacuenia vaxaitsi nacarajuta Espiritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espiritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

—Xaniajai rabaja. Dioso bajarapacuenia exana apo judíovi ata matacabi apo peverevereaejava pexainaenexa, itsa copaba pibisiacuene pexanabiabijava penajamatabëcuene pënëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pejumecovënëtavanapaevi Jerusalén tomarata rëcëpeca daxitanacuanëjava.

Bajarapacuenia rēcēpeca tsipaji bitso bejiobiaexanaponatsi. Jesús pelivaisi pejumecovēnētsixae, itoyatsi. Itsamonae tajēbelia rēcēpeca Fenicia tomarabelia. Itsamonae rēcēpeca Chipre tunaetota peecaetomarabelia. Itsamonae rēcēpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranējava ėjudíovijavabelia. Itsaviriavijavabelia apo tsipaebapona. ²⁰ Itsamonae Jesús pelivaisi pejumecovēnētsivi, Chipre tunaetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. ²¹ Pamonae apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaibitsaētoخانeto jumecovēnēta Jesús pelivaisi. Najamatabēcuenepēñeyorota Diosojavabelia pibisiacuenepexanabiabijavavecu.

²² Jerusalén tomarata pejinavanapaevi, Jesús pelivaisi pejumecovēnētsivi, vēñēlivaisitane apo judíovi ata Antioquía tomarapijivi Jesús pelivaisi pejumecovēnētsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovēnētsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaevatsi. Nexata Bernabé sivajamatabēcuenepēñeyorota apo judíovi ata. Nexata Bernabé muxujioaba apo judíovi ata daxita bajarapamonae pejamatabēēthētovetsina ajamatabēcuenesaēya peyjavajinavanapaenexa Dioso. ²⁴ Bernabé bitso pexaniajamatabēcuenenē. Jamatabēcuenepēñeyorota Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovēnētsinē Bernabé. Bajaraxuata nexata jivibitsaētoخانeto jumecovēnēta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitajaraba Saulo, barērena Saulo Antioquía tomaraberena. ²⁶ Nexata Antioquía tomarata caevai naponaponabeje Dioso pejumecovēnētsivijavata. Jivi ayaibitsaētoخانeto livaisi tsipaebabiababeje. Antioquía tomarata daxita pamonae Jesús pelivaisi jumecovēnētavanapa, bajarapamonae pijatomarapijivi pepo copiaya jane baja vēñērubatsi Cristianovi.

²⁷ Pamatacabi abaxē Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. ²⁸ Bajarapaprofetavijavajuvēñēñē pevēñē Agabo. Nexata Agabo nonotapuna Dioso pejumecovēnētsivi penacatuatsijavata. Nexata Agabo tajēvelia vajunupaeba ayaijaniboxaneto pecopiapatsijavanexa tajēvelia Espíritu Santo peyapētaeyaexanaexaetsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanējava, jai tajēvelia Agabo.

Bajarapajaniboxaneto bexēa copiapata Agabo pejumaitsicuenia pamatacabi nacuaevevtsinē Claudio evetaponapona Romanonacua. ²⁹ Bajaraxuata cajena janibovajēnaeya, Antioquía tomarapijivi daxita Dioso pejumecovēnētsivi najamatabēcuenepēñeyorota peyavenonaenexa Judea nacuapijivi Dioso pejumecovēnētsivi. Nexata Antioquía tomarapijivi, caenē canacujitsia, najamatabēcuenepēñeyorota Judea nacuapijivijavabelia perajutsinexa palata pacuenia cuenepēñeyorota. ³⁰ Nexata baja Antioquía tomarapijivi ita tocaetuatsivereta, bajarapamonae itorobatsibeje

Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

12

Pacuenia Pedro etatsi penaneconitsivi pejebabiabibota yabara pelivaisi

¹ Nacuaeveltsinë Herodes bejiobiaexanapona Jesús pelivaisi pejumecovënëtsivi. ² Herodes pijajivi itoroba espadata pebeyaxu-abinexatsi Santiago, Juan pematapijinëmi. ³ Herodes itsa tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaevetabiabatsi. Itsabitsaëto itsa pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatuajëta Pedro majitanuca anijanëbeje vajabitsaënëbeje, pevetsinëtsibeje, petuatuajëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabaupaevetatsi. ⁷ Jemata Dioso pijaángel naitajëta Pedrojavata. Nexata penaneconitsivi pejebabiabibo ënëtuatuajëta naitayota. Pedro pemajitanucaenë ángel yenejayatabatsi Pedro penaëcotsinexa. Ángel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecëtsicadenamaëtotsibeje vecobejoparecatsi baja.

⁸ Nexata icatsia ángel jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ángel.

Pedro nexata xaniavaetsia naepacatarërëtaxuaba pijacorrea. Nataxux-atataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabiabiava. Nepënaponare, jai ángel Pedrojavabelia.

⁹ Pedro nexata napona ángel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuenë ángel pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ënëtuatuajëtareca peyabaupaevetecaevajabitsaënëtsi. Icatsia xenetabeje pecotocaevi

ënētuatuajētatsina peyabaupaevetecaevajabitsaënētsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaupaxaneto. Nexata bajarapabaupaxaneto tonabaupatsibeje pijacuata. Pitsatabaliabeje jane baja callejavabelia. Nexata callejavareca penajetarucaejavatabeje, ángel jemata ajibi tsojopae. ¹¹ Pedro jane baja xaniavaetsia najamatabëcueneyapëtane. Nexata Pedro jamatabëjumaitsi:

—Baja rajane matapania aeconoxae xaniavaetsia najamatabëcueneyapëtaniji. Dioso tsaena itorobica pijaánel tanecapanepaenexa Herodes pecobevecua. Nexata baja judíovi apo netae tsané Herodes pijajivi tanebeyaxuabijava, jamatabëjai Pedro.

¹² Pedro najamatabëxaina pacuenia exanaejitsia. Nexata lia María pijaboyabelia. Bjarapova María, Juan pena, ponë vënërubatsi itsavënë, Marcos. María pijabota ayaibitsaëttoxaneto Dioso pejumecovënētsivi nacaetuata Diosojavabelia petovajëcaenexatsi Pedro. ¹³ María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. ¹⁴ Nexata Rode itsa jumeyapëtane Pedrocuene, nexata abaxë apo tobaupatsi. Rode cujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nualia baupa pënëverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nualia baupa pënëverena, jai Rode.

Bjarapamonae nexata jumaitsi:

—Apo Pedro raeta. Pevetsiáneltsi raeta, jai bajarapamonae.

¹⁶ Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bjarapamonae itsa tanetsi Pedro, bajarapamonae jamatabëcuenenajunaviaca. ¹⁷ Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënētsivijavabelia, jai Pedro.

Bjaraxuacujinae Pedro pitsapalia. Itsajavabelia icatsia pona.

¹⁸ Itsa baja matababi tsina, vajabitsaëvi, pamonaie Pedro evetabibatsi pananeconitsivi pejebabiabibota, bitso jamatabëcuenebëjai. Tsipaji bajarapamonae apo yapëtae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonaie Pedro evetabibatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyebinexatsi Pedro bajarapamonae pevecuapanepaexae. Nexata baja beyejebatsi. Bjaraxuacujinae nacuaevevtsinë Herodes

Judea nacuavecua pona. Pona Cesarea tomarabelia peponaponaenexa Cesarea tomarata.

Pacuenia tēpa nacuaevevtsinē Herodes yabara pelivaisi

²⁰ Nacuaevevtsinē Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomara-pijivijavabelia ata. Nexata Herodes pebaraanaepanaexae, bajara patomarabejijivijavabelia copatsiaexana pexaejava petocaponabiabijava bajara patomarabejijivijavabelia. Nexata bajarapatomarabejijivi sivanajamatabēcueneyanaba xaniavaetsia pebarēcuaicuaijainexa nacuaevevtsinē Herodesjavabelia. Tsi-paji bajarapatomarabejijivi jitsipa icatsia pexaejava petocapatabiabinex-atsi pijatomarabejijavaberena Herodes pevetsinacuajavaverena. Nacuaevevtsinē Herodes pijabo petoevtsinētsi pevēnē Blasto. Nexata Tiro tomarapijivibeje Sidón tomarapijivibeje copiaya cuai-cuaijai Blastojavabelia Blasto pexaniajamatabēcuene petoxainaenexa petocuaicuaijainexa Herodesjavabelia. Nexata Blasto jejai. Tocuaicuai-jai Herodesjavabelia Herodes icatsia pebarajamatabēxanepanaenexa bajara patomarabejijivijavabelia. ²¹ Nexata Herodes tocaējēta pamatacabi patsijitsia bajarapatomarabejijivi Herodes pijaboyabelia. Nexata pamatacabi Herodes tocaējēta bajarapamonae pepatsinexa, Herodes naitabētsia naxatata nacuaevevtsinē penaxatatsicuenia. Nexata jane baja bajarapatomarabejijivi pata pebarēcuaicuaijainexa Herodes. Nexata daxita bajarapamonae pitabarata nacuaevevtsinē peecaejavata, Herodes eca. Nexata Herodes xaniavaetsia barēcuaicuaijai bajara patomarabejijivijavabelia. ²² Nexata bajarapatomarabejijivi Herodes yabara pinijijumeta yamaxēitojorobiaya jumai tsaponae pebarajamatabēxanepanaenexatsi:

—¡Maponēje nacabarēcuaicuaijaije, apo jivitonē! ¡Diosonē tsaena! jai tsaponae bajarapatomarabejijivi Herodes yabara.

²³ Bajarapacuenia pejumaitisijava bajarapatomarabejijivi Herodes apo pejumeitavetsixae, Dioso pijaángel naneconitsiaexanatsi Herodes. Avitaniyaexanatsi. Herodes nexata oro ēnēverenetsi. Herodes nexata oro pēnēverenijavatsi yatēpa.

²⁴ Nexata Dioso pejumecovēnētsivi, daxitanacuanējava tsipaebapona Dioso pitorobilivaisi. Nexata Dioso pitorobilivaisi pejumecovēnētsivi ayaibitsaētoxfaneto tsaponae.

²⁵ Itsa baja Bernabébeje Saulobeje palata petocaponaevijavabelia li-vaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barēliabeje Juan, ponē vēnērubatsi itsavēnē, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanējava yabara pelivaisi

¹ Antioquía tomarata Dioso pejumecovēnētsivijavata, jinavanapa ma-pamatabēxēyoje. Itsanē Bernabé. Itsanē Simón, ponē vēnērubatsi itsavēnē, Negro. Itsanē Lucio. Bajaraponē Cirene tomarapijinē. Itsanē Saulo. Itsanē Manaén. Bajarapamonae cajena profetavi, Dioso pejumecovēnētsivijavabelia livaisi petsipaebabiabivinua. Herodes Galileanacua pevetsinē. Herodesbeje Manaénbeje penajuavitsabinēbeje.

² Itsamatacabi daxita bajarapaprotetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenebînexabeje, jai Espiritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsi-matanacobeuatatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjava yabara pelivaisi

⁴ Bernabébeje Saulobeje Espiritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetovabelia. ⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabiabinonëjava. Juan napona Bernabébeje Saulobeje pepëta peyavenonabiabinexa. ⁶ Nexata bajarapamonae Chipre tunaetoxaneto matatuverlia. Nexata pata Pafos tomarata. Bajarapatomarata bajarapamonae caxitajaraba judíonë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi. ⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tspaji Sergio Paulo bitso jamatabëjumetane Dioso pitorobilivaisi. ⁸ Itsiata baitsi jane Barjesús, jivi pejorobinë, ponë vënërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi. ⁹ Nexata Saulo, ponë vënërubatsi itsavënë, Pablo, tsijamatabëvënëcatsi Espiritu Santo. Nexata Pablo naëcota asaëyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamë jivi neyamaxëitojorobinë, pibisiacuene nexanaenë, dovathi pijajivitonëmë, pexaniajamatabëcuene pexanaejava nitoyanë! Apo jamatabëcopatsimë nenajumetsënëtsijava pejumecovënëtsiyaniva pamonae picani jamatabëjumecovënëta Dioso pijapexaniajailivaisi.

¹¹ Dioso raja aeconoxae cananeconitsiaexanaena. Nexata apo natsivajënaetaemë tsane. Matapania anijajuametonë panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsanë pecobe-vaetabinexatsi pecomacaponanexatsi pijaboyabelia. ¹² Sergio Paulo itsa tane bajarapacuenë, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata peecaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuayabelia. Nexata Panfilia nacuatatalia pata Perge tomarata. Juan baja Perge tomarata itsajamatabêcuene najamatabêxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacaetuatabiabibota. Bajarajota naecabeje. ¹⁵ Nexata daxita bajarpabota pejonevi, namuxunaeveta Dioso Moiséspijinêta penajumecopat-silivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacaetuatabiabibo pevetsivi, pijajivitonê itoroba. Nexata bajaraponê jumaitsi Pablobeje Bernabébejejavabelia:

—Tajabananêbeje, itsa payapêtanemebeje itsalivaisiyo panetsipaebinxabeje, aeconoxae patsipaebianamebeje jivi piajamatabêcuenesaênexa Diosojavabelia, jai bajaraponê Pablobeje Bernabébejejavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamê ata apo pajudíovimê, Dioso panejitsipaevi, abaxê panenamuxunaevere pacuenia jumaitsinêjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabêcueneta vajasalinaivimi pexi ayaibitsaêtoxaneto xainapona. Nexata vajasalinaivimi ayaibitsaêtoxaneto tsaponae pamatacabi jinavanapa Egipto nacuata. Nexata Dioso pesaêta vajasalinaivimi matacaponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvênê nacuata pejinavanapaevimi. Nexata baja Dioso vajasalinaivimi totsatsi bajarapanacuanêjava juya pejinavanapaeenexa. ²⁰ Bajaraxuacujinae Dioso itoroba vajasalinaiviyajuvênênêvi juezmonae penaexanaponaenexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinê evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijinê pecotocaevijueznê. ²¹ Nexata vajasalinaivimi jumaitsi profeta Samuelpijinêjavabelia: “Pajitsipajê nitorobijava vajayajuvênênê penaexanaenexa vajanacayanacuaevevsinênexa,” jai. Nexata profeta Samuelpijinê Dioso pejamatabêcueneta itoroba Saúlpjinê vajasalinaivimi cuarenta pavaibeje peyanacuaevetaponaponaenexatsi. Bajaraponêmi Saúlpjinê, Cispjinê pexênato, vajasalinainêmi Benjamínpijinê pemomoxiyajunênênê. ²² Bajaraxuacujinae Saúlpjinê Dioso copatsiaexanatsi pecopatsinexa baja vajasalinaivimi peyanacuaevevsijavatsi. Nexata juya Dioso itoroba Davidpijinê vajasalinaivimi peyanacuaevevsinexatsi. Dioso jumaitsi Davidpijinê

yabara mapacueniaje: “Isaí pexênato, David, jamatabêcuenepêtaniji. Bajarapitsinë jitsipajê. Bajaraponê David daxita pacuenia jitsipajê, netoexanaena,” jai Dioso Davidpijinê yabara. ²³ Davidpijinê raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajêvelia najumecapanepaeya jumaiti vajasalinaivimijavabelia. ²⁴ Jesús petax-uxuabivajênaeya jivi livaisi petsipaebaponaejala, copiaya Juanpijinê jivibautisabinêmi tsipaebanajetaruca daxita Israel nacuapijivijava. Jumai tsanajetaruca Juanpijinê: “Pacopabare baja daxita pibisiacuen paneexanabiabijava. Panajamatabêcuenepênêyore Diosojavabelia. Bajaraxuacujinae pacabautisabianatsi,” jai tsanajetaruca Juanpijinê. ²⁵ Juanpijinê abaxê itsa apo beyaxuabitsi, jumai tsaponae jivijavabelia: “Ponê pacopiaevetavanapame, xanê raja apo bajaraponênê. Xanêcujinae rajane bajaraponê najetarucaena. Xanê raja saya beveliajamatabêcuenenênê bajaraponêvecua. Nexata bajaraponê beprijavitonênêcuenia ata tataxujonotsinexa pijazapato, vecuaauranê,” jai tsaponae Juanpijinê Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaiti judíovijavabelia judíovi penacaetuatabiabibota: —Tajamonae Abrahampijinê papemomoximê, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. ²⁷ Itsiata Jerusalén tomarapijivi apo yapêtae Jesús pecapanepaejavanexatsi. Jerusaléntomara pevetsivi ata apo yapêtae Jesús pecapanepaejavanexatsi. Bajarapamonae apo jumeyapêtaenua pacuenia jumaiti Jesús yabara bajayata profetavi peyaquinaebaxutota. Penacueraevetsimatacabianê canacujitsia lebiabiabi ata bajarapabaxuto judíovi penacaetuatabiabibota, itsiata bajarapamonae apo jumeyapêtae. Bajarapamonae itsa neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajêvelia vajunupaeba Jesús pexanaejavanexatsi. ²⁸ Judíovi apo caxitarabi ata Jesús itsacueneneconi pexinaejala, itsiata bajarapamonae vajêta nacuaevetsinê Pilatojavabelia Jesús pebeyaxuabinexatsi. ²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajêvelia jumaiti Dioso pejumelivaisibaxutota. Bajaraxuacujinae Jesús petêpaenê pitsicatsi cruzajavavetsica. Bajaraxuacujinae mêtêtatsi. ³⁰ Itsiata baitsi jane Dioso icatsia asaëyaexanatsi Jesús petêpaecujinae. ³¹ Jesús petêpaecujinae Dioso icatsia itsa asaëyaexanatsi, bajayajebi anijatonê tsitanaitajêtabiaba pijajivijavabelia, pamonae yanatatsi pamatacabi Jesús pona Galilea nacujavaverena Jerusalén tomaraberena. Bajarapamonae nexata maparucaje tsipaebapona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaiti bajarapamonaejavabelia judíovi penacaetuatabiabibota:

—Nexata pacatsipaebianatsi pexanalivaisi. Dioso cajena vajasalinaivimijavabelia tajêvelia najumecapanepaeya jumaiti pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajêvelia najumecapanepaeya jumaiti vajasalinaivimijavabelia,

nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaiti Salmosbaxutota. Dioso pejumaitisjiva Jesúsjavabelia, Salmosbaxutota jumaiti mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitisjiva Jesúsjavabelia. ³⁴ Dioso baja asaëyaexanatsi Jesús petëpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenie yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaiti mapacueniaje: “Caexanaenatsi pacuenia baja cajena najumecapanepaeya jumaitsinë Davidpijinëjavabelia,” jai Dioso pejumelivaisibaxutota bajayata Dioso pejumaitisjiva Jesúsjavabelia. ³⁵ Bajaraxua yabara Jesús pejumaitisjiva Diosojavabelia Salmosbaxutota icatsia jumaiti mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota. ³⁶ Davidpijinë abaxë itsa asaë tsaponapona, jumecovënëtsiaponapona pacuenia Dioso itorobatsi. Bajaraxuacujinae Davidpijinë tēpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana baja. ³⁷ Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. ³⁸ Tajamonae, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuaajibiaexana pibisiacuene paneexanaeneconimi. ³⁹ Pajivi Jesús jumecovënëtsiana, bajarapajivi daxita pibisiacuene pexanaeneconi Dioso vecuaajibiaexanaenatsi Jesús pejamatabëcueneta. Pajivi apo jumecovënëtsicapanepe ata Dioso Moiséspijinëta penajumecopatsilivaisi, jamatabëjumaiti: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene taexanaeneconi Dioso nevecuaajibiaexanaena,” jamatabëjai, itsiata bajarapajivi pibisiacuene pexanaeneconi Dioso apo vecuaajibiaexanaetsi tsane. Tsipaji Dioso Moiséspijinëta penajumecopatsilivaisi itsajivi ata apo jumecovënëtsicapanepe. ⁴⁰ Xania baja tsane. Xaniavaetsia pajinavanapaename papecatocopiapatsiyaniva pacuenia Diosojumepaebivi profetavi peyaquinaebaxutota tajëvelia jumaiti. Tsipaji raja profetavi peyaquinaebaxutota, tajëvelia jumaiti mapacueniaje:

⁴¹ Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavanapaep-atota xanë, Diosonë, exanaenajë ayaicuene taexanaejavanë. Nex-ata taexanaejavanë pelivaisi, itsamonae xaniavaetsia pacatsi-paebi ata tsane, itsiata apo pajumecovënëtsimë tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamonaе Dioso apo pejumecovënëtsivi, jai Pablo bajarapamonaejavabelia judíovi penacaetuatabiabibota.

⁴² Pablobeje baja Bernabébeje pitsapaejitsiabeje judíovi penacaetuatabiabibovecua. Nexata bajarajota pamonaе apo judíovi, junatatsibeje icatsia itsamatacabi judíovi penacueraevetsimatacabita petsipaebinexabeje bajarapalivaisi. ⁴³ Penacaetuatsivi baja naviaba judíovi penacaetuatabiabibovecua. Nexata Pablobeje Bernabébeje judíovi penacaetuatabiabibovecua itsa pitsapabeje, jivi ayaibitsaëto

pēnaponatsibeje. Bajarapamonaeyajuvēnēvi itsamonaē judíovi, itsamonaē apo judíovi. Pamonae apo judíovi, bajarapamonaē catsiteca judíovicuēnia Dioso pejumecovēnētsijava. Nexata Pablobeje Bernabébeje muxujobabeje bajarapamonaē pevajēnaeyabelia ajamatabēcuenesaēya pejumecovēnētavanapaenexa Dioso pitaxutotsoniataejavatsi.

44 Bajara jane xuacujinae icatsia judíovi penacueraevetsimatacabita, bajarapatomarapijivi muxunanacaetuatsibeje ayaibitsaētoxonetonē Dioso pitorobilivaisi penamuxunaevetsinexatsibeje. 45 Nexata judíovi itsa tane bajarapajivibitsaētoxonetonē Pablobeje Bernabébeje pemuxunanacaetuatsijavatsibeje, judíovi bitso cuenecaēbatsi. Nexata judíovi jumaitsi jivijavabelia pejumecovēnētsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuēnia baracuaicuajaitsi Pablo. 46 Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsidebe tsaponae mapacuēniaje:

—Copiaya baja picani pacatsipaebatsibeje Dioso pitorobilivaisi paxamē pajudíovimējavabelia. Itsiata apo pajitsipaemē bajarapalivaisi panejumecovēnētsinexa. Tsipaji apo pajitsipaemē panexainaenexa matababi apo peverevereaejava. Paxanēbeje baja nexata pacavecuaponatsibeje patatsipaebinexabeje bajarapalivaisi apo judíovijavabelia. 47 Bajarapacuenia pacavecuaponatsibeje tsipaji baja pepo petuxanenē bajarapacuenia paneitorobabeje. Dioso cajena pejumelivaisibaxutota tajēvelia jumaitsi mapacuēniaje:

Caitorobianatsi nejamatabēcueneitayotsinexa pamonae apo judíovi. Baitsi jane tsipaebanajetarucaename tajumelivaisi daxitanacuānējava, nacuatabujava ata pejinavanapaevi, pecapanepaenexatsi pibisiacuēne pexanaeconivecua, jai Dioso pejumelivaisibaxutota, jai Pablo judíovijavabelia.

48 Apo judíovi itsa jumetane bajarapacuenia Pablo pejumaitsijava, nexata apo judíovi jamatabēcuenebarēya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovēnēta Dioso, pamonae baja cajena tajēvelia Dioso itapeta matababi apo peverevereaejava pexainaenexa. 49 Nexata jane baja daxita bajarapanacuata pejinavanapaevi jumetane Dioso pitorobilivaisi. 50 Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barēcuacuajiai tomaraevetsivijavabelia, petuxanevi pijavajivijavabelia ata. Nexata bajarapamonaē anaepa Pablobeje Bernabébejejavabelia. Nexata baja Pablobeje Bernabébeje capitsapatsibeje bajarapanacuavecua. 51 Nexata Pablobeje Bernabébeje bajarapatomarata nataxuat-sapērēvarēbabeje. Bajarapacuenia nataxuat-sapērēvarēbabeje bajarapatomarapijivi peyapētaenexa penaneconitsijava Diosojavabelia, apo pejumecovēnētsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. 52 Itsiata daxita pamonae Dioso pejumecovēnētsivi, Antioquā tomarata pejinavanapaevi, jamatabēcuenebarēya. Espíritu Santonua jamatabēcuenevēncavanapa. Nexata exanabiaba pacuenia Espíritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacetuatabiabi-bota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëtóxaneto judíovi, apo judíovi ata, jumecovënëta Jesús pelivaisi. ² Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. ³ Bajarapacuenene peyapëtaexaebeje, Pablobeje Bernabébeje bajayajebi ponaponabeje bajarajota. Tsipaebabiabeje ajumejunavijibia Jesús pelivaisi. Tsipaji yapëtanebeje Dioso peyavavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniataejavatsi bajarapamonae. Nexata daxita bajarapamonae yapëtane Jesús pelivaisi pexaniajailivaisicuene. Tsipaji bajaraponëbeje ayaicuene pexanaejava Dioso pesaëta exanaponabeje. ⁴ Itsiata bajarapatomarapijivi apo najamatabëcuenejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. ⁵ Nexata judíovi, apo judíovinuua, tomara pevetsivinuua, jamatabëbijatanetsibeje Pablobeje Bernabébeje. Jamatabëtseconatsibejenua ibotonëta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Listra tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. ⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Listra tomarata yabara pelivaisi

⁸ Listra tomarata naeca petaxucuenabinëtsi. Penaexanaejavaveliacujinae apo ponaponae caeto ata. ⁹ Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcueneyapëtane petaxucuenabinëtsi pejamatabëjumaitsijava: “Dioso pepacuenene cajëpatsi tanetaxuanepanaeyaexanaenexa,” pejamatabëjaijava. ¹⁰ Nexata Pablo pinijijumeta jumaiti petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. ¹¹ Jivibitsaëtóxanetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae pijajumeta, Licaoniajumeta, pinijijumeta jumaiti mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi. Nexata Bernabé tanetsi beZeusvënëdiosonë. Pablo pijinia tanetsi beHermesvënëdiosonë. Tsipaji Pablo penamatacanajetarucaenë. Nexata jivi barëcuaicuaijai tsabiabi. ¹³ Zeusvënëdiosonë pijatemplobo eca Listratomara jumaverena, Listra tomarabelia pejonebaupa imoxoyovecua. Nexata sacerdotenë, Zeusvënëdiosonë pijatemplobota penacuenebabinëtsi, capata torobitsaëto Listra tomarabelia pejonebaupajavaberena. Bajarapatorobitsaëto matabocoitabëtsiaya tsmataruba pematono. Nexata sacerdotenë, Listra tomarapijivi yajava, tobejitsiatsibeje picani

bajarapatorobitsaëto Pablobeje Bernabébeje ofrendacuena bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonébeje tanetsibeje. ¹⁴ Nexata Bernabébeje Pablobeje itsa jumetanebeje bajarapacuenie petoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsi-paji Dioso apo pejitsipaeacuena bajarapamonae toexanaejitsiatsibeje. Nexata cujinaejinaliabeje jivibitsaëtoxanetonë penacaetuanaejavabelia. Nexata bajarapajivibitsaëtoxanetonë tuatuajëta nucabeje. Pinijijumeta Pablo jumaitsi:

¹⁵ —¿Detsa xuajitsia bajarapacuenie panetoexanaejitsiamë? Paxanëbeje ata raja saya pajivitonënëbeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinxabeje pexanialivaisi. Panajamatabëcuenepënëyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiavereverecaenë. Dioso raja daxitacuene pexanaenë. Exana mapanacuaje, mapanacuapijicuene yajava. Exana itaboxo ata, itaboxopijicuene yajava. Exana manuamene ata, manuamenepijicuene yajava. ¹⁶ Dioso copata vajavajënaeya daxitanacuapijivi pejinavana-paenexa pijacuata penatojitsipaeacuena. ¹⁷ Nexata Dioso daxitacuene pexanaejava, nacobcovëtaeyaexanabiaba daxitajivijavabelia. Nexata picani bajarapamonae becanaëjëta Dioso peponaponaejava. Tsi-paji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vajaubijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabëcuenebarëyayaexananua, jai Pablo pamonaejavabelia picani torobitsaëto tobejitsiatsibeje.

¹⁸ Bajarapacuenia Pablo jumaitsi ata, itsiata picani bajarapamonae jamatabëtobiatsibeje torobitsaëto petotajuitsinexatsibeje bajarapavi ofrendacuena Pablobeje Bernabébejenexa. Itsiata baja belia copatsiaexanabeje.

¹⁹ Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomarapënëyabelia robobocaliatsi. Tsi-paji baja bepetëpaenë taeyabuatatsi. ²⁰ Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabébeje ponabeje baja Derbe tomarabelia.

²¹ Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxaneto. Bajaraxuacujinae icatsia naviatanajetarucabeje Listra tomarajava, Iconio tomarajava ata, Antioquía tomarajava ata. ²² Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaenexabeje Dioso pejumecovënëtsivi. Muxujiobaponabeje bajarapamonae pevajënaeyabelia ajamatabëcuenesaëya pecatsitecaenexa Dioso

pejumecovënëtsijava. Pablobeje Bernabébeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenëjëtaponaena daxita vajajonevinexa Dioso pijanacuayabetsia, jaibeje tsaponae Dioso pejumecovënëtsivijavabelia.

²³ Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaeuatsivajënaeya apo xaeyabiabibeje pexaejava. Nexata penacaeuatsijavata itsa toitapetabeje, japasa tovajëtabiabeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatoevetsinexa nijajivi, jaibeje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata pecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaebeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tspaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsimatanacobebuatatsibeje Dioso peyavenonaponaeenexatsibeje jivi petsipaebanajetarucajavatabeje Dioso pitorobilivaisi. Pablobeje Bernabébeje Antioquía tomarata patabeje. Tspaji baja toveretabeje daxita pacuenia Dioso itorobatsibeje. ²⁷ Itsa baja Antioquía tomarata patabeje, junatabeje penacaeuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tspaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea

nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacujava, Samaria nacujava ata. Bajaraxuayo Dioso pejumecovënëtsivijavabelia tsipaebaona apo judíovi ata pijaperujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaiti mapacueniaje:

—Dioso pejumecovënëtsivi apo judíovi ata, namatavenona peperabëcaucubinxatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. ⁷ Bajayajebi baja namataenetsia penabarëcuaicuaijajucujinae, nexata Pedro nonotapuna. Jumaiti:

—Tajamonae, payapëtaneme rabaja mapacueneye. Xanë baja cajena bajaya Dioso nitapeta, paxamëyajuvënënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta. ⁸ Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacuenene tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa piyapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacajëpae vajajumecovënëtsinexa. Vajasalinaivimi ata apo cajëpaetsi pejumecovënëtsinexa bajarapalivaisi. ¹¹ Vaxaitsi baja jumecovënëtatsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaëta pinijicuene pexanaejavanë

exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniaveetsia namuxunaevetena. ¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. ¹⁴ Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeneconivecua Jesús pelivaisi itsa jumecovënëta. ¹⁵ Bajarapacuenia apo judíovi ata aneconijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

¹⁶ “Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëtavanapa. Bajara icatsia pacuenia jivi xaniavaetsia tanejumecovënëtavanapaenexa, yavenonaenajë.

¹⁷ Nexata apo judíovi ata, daxita pamonae junatsianajë taja-jivinexa, bajarapamonae ata jitsipaena tanejumecovënëtsinexa,” jai bajayata Dioso mapacueniaje. ¹⁸ Dioso baja cajena tajëvelia yapëtaeyaexana daxita mapacuene yabaraje,

jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹ Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjêa apo judíovi, pamonae baja najamatabëcuenepënyorota Diosojavabelia. ²⁰ Itsiata

baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonae. Itsamonae xaina pecobeta saya jumapecataeya pexanaenëanë bepíjádiosovi petaenexa. Nexata bajaraxuanëjavabelia ofrendacuenia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa,

daxita petiriavi ata peyapëtaenexa. Papebijivi baja nacojioba, pematayajibiyativatsi itsavajavabelia pijavavecua. Papebijivi

pijinia abaxë apo nacojiobi, pematayajibiyativatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibiyativatsi itsanëjavabelia pamonavecua. Papetiriavi

pijinia abaxë apo nacojiobi pematayajibiyativatsi pebijavabelia. Toyaquinaenatsinua bajarapamonae pexaeyaniva cuibocuetsacaeya pebeyaxuabinë pevi, pexaeyaniva peja ata. Bajarapacuenia

toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabëcuenebijianaeyaniva judíovijavabelia. ²¹ Tsipaji

bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuene. Itavetabiabatsi bajarapacuene penacueraevetsimatacabianë canacujitsia penacaetuatabiabilonëjava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovinua, daxita Dioso pejumecovënëtsivinua, najamatabëjêpa penaitapetsinexa bajarapamonaeajuvënëvi pitorobinexa Antioquía tomarabelia Pablobeje

Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaraponëbeje Dioso pejumecovënëtsivi penamatacaitorobivi yajuvënënebeje.²³ Pacuyalatobaxuto bajaraponëbeje tocaponaejitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënajinaliatsi. Vajamonae ancianovi ata pacajamatabënajinalia. Pacajamatabënajinaliatsi daxita apo pajudíovimë, Antioquía tomarata panejinavanapaevi. Paxamë ata Siria nacuata panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi.²⁴ Pavënëlivaisitaniji pacuenia pacajumaiti paxanëyajuvënëvi papecasivaxainaevilia. Bajarapamonae pina nexata pacanajamatabëcuene epatajërërëcaeyaexanapona. Tsipaji pina bajarapamonae pacajumaiti: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamonae pacajumaiti bajarapacuenia, paxanë cajena apo paitorobinë paxamëjavabelia.²⁵ Nexata paxanë patanacaetuatsijavata, panajamatabëcuenejêpajê pataitapetsinexa ponëbeje paitorobijitsianë paxamëjavabelia pecaponaenexabeje patacatoyaquinaelivaisi. Bajaraponëbeje naliabeje Bernabébeje Pablobeje pepëta.²⁶ Vajabananëbeje, Bernabébeje Pablobeje, bitso vaxaitsi asivatsi. Bajaraponëbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, itsiata ajamatabëcuenesaëbeje tsaponapona.²⁷ Nexata bajaraponëbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota.²⁸ Itsa panacaetuatajê Espiritu Santo paneyavenona patayapëtaenexa peyapëxanepanelivaisi patacatoitobinexa panejumecovënëtsinexa. Nexata baja apo panamatavenonaemë panejumecovënëtsinexa piyapëbejelivaisi, palivaisi daxita pajudíovinë pajumecovënëtajê. Pacaitorobatsi palivaisi bitso panamatavenoname panejumecovënëtsinexa.²⁹ Pecobeta saya jumapecataeya pexanaenënejavabelia ofrendacuenia pevi perajutsinexa itsamonae itsa tobia baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecu. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecu. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepëta. Nexata baja naponabeje. Bajarapamonae pata Antioquía tomaravelia. Nexata Antioquía tomarapijivi junata daxita Dioso pejumecovënëtsivi penacaetuatsinexa. Nexata

penacaetuatsijavata rajutabeje bajarapacuyalatobaxuto. ³¹ Antioquía tomarapijivi itsa leba bajarapacuyalatobaxuto, bajarapamonae bitso jamatabëcuenebarëya. ³² Judasbeje Silasbeje Diosojumepaebinëbeje profetanëbeje. Nexata ayailivaisi tsipaebabeje Antioquía tomarapijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjjobabeje penaviatsinexabeje baja pitorobivitsijavabelia. ³⁴ Pepuanapëjjobibeje baja, Silasbeje abaxë itsiata icatsia nacopatabeje bajarajota. ³⁵ Pablobeje Bernabébeje ata abaxë ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquía tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. ³⁸ Itsiata baitsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. ³⁹ Nexata Pablobeje Bernabébeje apo najamatabëcuenejëpabeje Marcos pebarëponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuayabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetarucaejavabeje. ⁴¹ Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Listra tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë. ² Daxita Dioso pejumecovënëtsivi, Listra tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtañona, jai tsabiabi.
 3 Pablo jitsipa Timoteo pebarëponaajava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucæjitsia, judíovi penaperabëcaucubivi jinavanapa. Nexata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucæjitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi. 4 Pablobana tomaranëjava itsa najetarubena, caetomarapijivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. 5 Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayabitsaëto jumecovënëtañona.

Pacuenia Pablo bemajitsinaebota tane Macedonia nacuapijinë yabara pelivaisi

6 Espíritu Santo apo tocopatsitsi Pablobana petsipaebinexa Dioso pitorobilivaisi Asiavënë nacuata. Bajaraxuata Pablobana najetarubena Frigia nacuajava, Galacia nacuajava ata. 7 Pablobana itsa najetarubena Misianacua muxubërëa, jamatabëpata picani Bitinia nacuajava. Itsiata baitsi jane Espíritu Santo apo tocopatsitsi pepatsinexa Bitinia nacuajava. 8 Nexata Misianacua canacujitsialia roviaalia ponalia. Pata Troas tomarabelia. 9 Nexata Troas tomarata meravi Pablo bemajitsinaebota taenuta Macedonia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinë.

10 Pablo bemajitsinaebota petaenutsicujinae Macedonia nacuapijinë, bepijia paxaniavaetajë patajajavaxi patanicabinexalia Macedonia nacuayabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

11 Troas tomarata panaropobajë. Panaponajë barcota. Roviaalia panayanicabaliajë patapatsinexa Samotraciatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis tomarabelia. 12 Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayabitsaëtozaneto Roma tomaraverena pepatsivi. Bajaratamarata panajinavanapajë caematacabimaxëto. 13 Nexata abaxë itsa panajinavanapajë Filipos tomarata, judíovi penacueraevetsimat-acabita papitsapajë tomarapënëyabelia. Paponajë mene itapayavelia

patajaitsinexa itsajota nacaetuatabiaba judíovi pevajëcabiabinexa Dioso javabelia. Nexata mene itapaya itsa pajaitanajetarubenajë, petirivi penacaetuatenavei mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petirivijavabelia. ¹⁴ Bajarapapetiriviyajuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipapaëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamaatabëcueneyavenonatsi. Nexata bajarapova jumecovënëta Pablo petsipaebilivaisi. ¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

¹⁶ Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayajava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova tajëvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabiaba. ¹⁷ Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtsia peccaenë Dioso pijajivi. Pacatsipaebapona papecacapanepaelivaisinexa pibisiacuene paneexanaeconivecua, jai tsanajetarucabiabi petiriva paxanë yabara.

¹⁸ Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënëyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitsijavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia. ²⁰ Jivi penaneconitsiaexanabiabivi, juezmonae, pitabarata nutatsibeje. Pamonae Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonēbeje. Anaepanaeyaexanaponabeje vajatomarapijivi. ²¹ Tsipaebaponabeje vajanacuapijivi pejumecovēnētsinexa palivaisi vaxaitsi Romano nacuapijivitsi apo nacatocopatsi vajajumecovēnētsinexa, jai najumetsēnētsiaya bajarapamonae Pablobeje Silasbeje yabara.

²² Nexata jivi ayaibitsaētoxfaneto baraanaepanatsibeje Pablobeje Silasbeje. Nexata juezmonae itoroba vajabitsaē Pablobeje Silasbeje penaxatatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota. ²³ Ayaicuenia pejumaconibabecujinaetsibeje, juezmonae icatsia itoroba vajabitsaē Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinē Pablobeje Silasbeje xaniavaetsia pevetsinexatsibeje penaneconitsivi pejebabiabibo ēnētuaatujēta. ²⁴ Penaneconitsivi pejebabiabibo pevetsinē juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pēnēyatuucubijavanē, pecopiarucaejavatareca, Pablobeje Silasbeje etatsibeje. Peponaponaeayanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarērētatsibeje cepovēnējavata.

²⁵ Nexata meravituatujēta Pablobeje Silasbeje vajētabeje Diosojavabelia. Diosojumevajianē naxēanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxēanecaejavabeje. ²⁶ Nexata jemata bajarapaepatota ira najēabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanē nabaupana pijacuata. Daxita penaneconitsivi pacadenamaētonēta cobecēbejebatsi, vecobeothopatsi. ²⁷ Penaneconitsivi pejebabiabibo pevetsinē naēcotapuna pemajitecaenēmi. Nexata itsa tane daxita baupanē penabaupanaejava, navemarajonotaxuabina pijaespada penabeyaxuabinexa picani. Tsipaji jamatabējumaitsi:

—Daxita meta baja penaneconitsivi rēcēpeca. Nexata bajarapajamatabēcuenē yabara nenaneconitsiaexanaena tomara pevetsivi, jamatabējai.

²⁸ Nexata bajarajota itacarajeta Pablo pinijijumeta jumai tsaxuabi:

—Pētsa nabeyaxuabame. Daxita raja patananeconitsivi panubenajē, jai Pablo.

²⁹ Nexata penaneconitsivi pejebabiabibo pevetsinē itoroba pijajivitonē petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinē bitso neconecojai pecajunavi. Nexata bajaraponē pematatabacabēta nucajunua Pablobeje Silasbeje pitabarata. ³⁰ Bajaraxuacujinae penaneconitsivi pejebabiabibo pevetsinē barēpitsapaliatsibeje Pablobeje Silasbeje. Penaneconitsivi pejebabiabibo pevetsinē jumaitsi:

—¿Detsa xua exanaenajē tanecapanepaenexa Diosojavabelia? jai Pablobeje Silasbejevavelia.

³¹ Nexata Pablobeje Silasbeje jumaitsibeje:

—Najamatabēcuenecopare pepo petuxanenē Jesucristojavabelia pecacapanepaenexa Diosojavabelia. Xamē nijabota pejinavanapaevi ata

Jesucristojavabelia najamatabëcuenecopatsi pecapanepaenexatsi Diosojavabelia, jaibeje.

³² Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata. ³³ Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquatatsibeje. Nexata bajaraponë, pijabopijivi yajava, bautisababeje Pablobeje Silasbeje.

³⁴ Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenearëya Dioso pejumecovënëtsixae.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa. ³⁶ Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejejavaberenata. Tsipaji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. ³⁹ Nexata juezmonae parena. Jumaitsi Pablobeje Silasbejejavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujiobabeje bajarapamonae piamatabëcuenesaënexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomara-belía. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabiho. ² Nexata Pablo pijacujirucuenia judíovi penacuer-aevetsimatacabianē canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiabi-javabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabiabiho:

—Dioso baja cajena pejumelivaisibaxutota tajēvelia vajunupaebatsi Cristo, ponē baja Dioso itorobica jivi pecapanepaenexa. Tajēvelia baja cajena Dioso pejumelivaisibaxutota Cristo vajunupaebatsi pijavajabit-saē ayaicuenia pebejiobiaexanaejavanexatsi. Vajunupaebatsinua baja cajena Cristo petēpacujinae icatsia piasaējavanexa. Bajaraponē raja Jesús, ponē pelivaisi pacatsipaebatsi. Bajaraponē raja Cristo, ponē Dioso itorobica jivi pecapanepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabiabiho.

⁴ Nexata judíoviyajuvēnēvi jumecovēnēta Pablo petsipaebabiabilivaisi. Ayaibitsaēto griegovi ata, Dioso pejitsipaevi, jumecovēnēta Pablo petsipaebabiabilivaisi. Ayaibitsaēto petiriavi ata, petuxanevi pijavajivi, jumecovēnēta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejejavata. ⁵ Nexata judíovi, pamonaē apo jumecovēnētsi Pablo petsipaebabiabilivaisi, Pablo cuenecaēbatsi. Tsipaji Pablojavabelia jivi ayaibitsaēto jonepona. Nexata bajarapajudíovi junata jivi ayaibitsaēto xaneto pibisiajamatabēcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barēnacaetuata. Nexata daxita bajarapajudíovi, pejunatsivi jane baja yajava, barēnjamatabēcueneyanaba. Nexata itoroba bajarapatomarapijivi pianaepanaenexa Dioso pejumecovēnētsivijavabelia. Pablobeje Silasbeje naponaponabeje Jasónvēnēnē pijabota. Nexata daxita pamonaē anaepana bajarapatomarata, Pablobeje Silasbeje jemata tsimaxēpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixaetsibeje, nexata pamonaē anaepana, vaetabatsi Jasón, itsamonae yajava, pamonaē Dioso pejumecovēnētsivi. Robobocaponaliatsi Jasónbana tomara pevetsivijavabelia. Nexata pamonaē anaepana, tomara pevetsivi pitabarata najumetsēnētsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanējava pejinavanapaevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponē nucaje, tocopata pijabota penaponaponaenexabeje Pablobeje Silasbeje. Daxita pamonaē Jasón mayajavanucaje, Pablobana ata, daxita bajarapamonae, apo jumecovēnētsi cajena Romanonacua pepo pevetsinē pitorobilivaisi. Daxita bajarapamonae jumai tsabiabi: “Romanonacua pepo pevetsinē rabaja apo nacayanacuaevetsi. Itsanē rabaja nacayanacuaeveta. Bajaraponē pevēnē Jesús,” jai tsabiabi daxita bajarapamonae, jai najumetsēnētsiaya tomara pevetsivijavabelia pamonaē anaepana.

⁸ Nexata bajarapacuenia pejumaitsiyava itsa jumetane, daxita tomarapijivi tomara pevetsivinua bitso anaepana. ⁹ Nexata Jasón, Dioso

pejumecovënëtsivi yajava, palata matamotsiaexanatsi tomara pevet-sivijavabelia, Pablobeje Silasbeje pevecuapitsapaenexabeje bajarap-atomara. Tomara pevetsivi jumaitsi:

—Itsa rabaja ponaenabeje bajaraponëbeje mapatomaravecuaje, paca-tocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepíjia itorobatsi Pablobeje Silasbeje pepon-aenexabeje, Berea tomarabelia. Pablobeje Silasbeje pepatsicujinaeli-abeje Berea tomarata najunuabeje judíovi penacaetuatabiabiabojav-abelia. ¹¹ Ajamatabëcuenetaja pajudíovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabëcuenetaja. Bajarapa-judíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabiabota Dioso pitoro-bilivaisi tsipaebabiaba bajarapajudíovijavabelia. Nexata Pablo itsa co-pata petsipaebabiabijava, bajarapajudíovi pijacuata Dioso pejumelivais-ibaxutota xaniavaetsia nacujarubabiaba peyapëtaenexa xaniajai bajara-pacuenia itsa jumaitsi Pablo petsipaebabiabilivaisi. ¹² Berea tomarap-ijivi judíovi ayaibitsaëto jumecovënëta Pablo petsipaebabiabilivaisi. Ayaibitsaëto pijinia griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijava-jivi. ¹³ Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojav-abelia. ¹⁴ Nexata Berea tomarapijivi, pamonaë jumecovënëta Pablo petsipaebabiabilivaisi, bajarapamonae Pablo bepíjia itorobatsi pepon-aenexa manuamene itapata peecaetomarabelia. Silasbeje abaxë Timo-teobeje nacopatabeje Berea tomarata. ¹⁵ Pamonaë Pablo yanataponali-atsi, pënaxuabatsi Atenas tomarabelia. Nexata Atenas tomaraverena ba-jarapamonaeta Pablo tonajumexuaba Silasbeje Timoteobeje. Jumaitsi:

—Itsa cuenecaëjëpaenatsibeje, bepíjia renabeje tsane tanecaxitajara-binexabeje Atenas tomarata, jai Pablo bajarapamonaëjavabelia.

Bajaraxuacujinae pamonaë Pablo pënaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapax-ayojava daxita Atenas tomara tuatujëjava. Nexata Atenas tomarapijivi pematabacabëta nubenabiaba pevajëcabiabinexa bajarapajumapecatae-vijavabelia. Nexata Pablo itsa tane bajarapacuenë, bejamatabëjijobi bitso. ¹⁷ Nexata judíovi penacaetuatabiabiabota Pablo Dioso pitorobili-vaisi yabara barënajumenotabiaba pevëna judíovi. Barënajumenotabiabanua apo judíovi ata, pamonaë Dioso pejitsipaevi. Caematacabi canacujitsia

barēnajumenotabiabanua pamonaē Pablo caxitajarabatsi tomara tuatua-jēta. ¹⁸ Nexata Pablo caxitajaraba pebijivi, epicúreomonaē pecujarubili-vaisi pejumecovēnētavanapaēvi. Caxitajarabanua itsapebijivi, estoicos-monaē pecujarubilivaisi pejumecovēnētavanapaēvi. Bajarapamonaē ata Pablo barēnajumenota. Nexata Pablo pebarēnajumenotsijavata, bajarapa-monaeyajuvēnēvi Pablo yabara muetsia najumaitsi:

—¿Detsa meta pitsilivaisi maponēje namatatsapatsia nacabarēcuaicuajijaje? najai bajarapamonaē Pablo yabara.

Itsamonaē pijinia Pablo yabara najumaitsi:

—Itsanacuapijivi racovē pijadioso vi pelivaisipaēbinē, najai bajarapa-monaē.

Bajarapacuenia najumaitsi tsipaji Pablo tsipaebapona pexaniali-vaisi, Jesús pelivaisi. Tsipaebaponanua petēpaēvimi icatsia itsamat-acabi piasaējavanexa petēpaēcujinaē. ¹⁹ Nexata bajarapamonaē Pablo barēponaliatsi Areópagovēnē tsutojavabelia, patsutojavabelia tomara pevetsivi nacaetuatabiaba penabarēcuaicuajijainexa. Itsa baja palia ba-jarabelia, bajarapamonaē jumaitsi Pablojavabelia:

—Panetsipaebare patayapētaenexa papejanalivaisi tsipaebaponaē. ²⁰ Panetsimuxuaitothia abaxē palivaisi tsipaebaponaē. Nexata pa-jitsipajē patayapētaenexa pajamatabēcuenelivaisi xaina palivaisi tsipaebaponaē, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pa-monaē bajarapatomarata najinavanapa, daxita bajarapamonaē jamatabēcuenenabiabatsi pejanalivaisi pejumetaeyabiabinexa. Jamatabēcuenenabiabatsinua petsipaebabiabinexa itsamonaējavabelia ata.

²² Nexata Pablo nonotapuna bajarapamonaē tuatua-jēta Areópagovēnē tsutojavata. Jumaitsi:

—PaAtenas tomarapijivimē, pacatanetsi rabaja panijadioso vi bitso papecajamatabēcuenenabiabijava. ²³ Tanajetarucabiabijavata panijatamaracallejava, taeyabiabajē itsaxuayo pavajēcabiabame panijadiosovijavabelia. Nexata caxitajarabajē altarvēnējjava, itsajota jivi vajēcabiaba abaxē apo yapētaē ata padiosojavabelia vajēcabiaba. Bajarapaaltarvēnējavata peyaquinarutsiitane jumai tsarucae mapacueniaje: “Padioso abaxē apo yapētaetsi, bajarapadiosojavabelia vajēcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvēnējavata, nexata bajarapaDiosojavabelia paxamē baja najamatabēcuenecopsiaya panavajēcabiabame, abaxē apo payapētaē atamē bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuene yajava. BajarapaDioso pepo pevetsinē jane baja daxita mapanacujaje. Pevetsinē itaboxo ata. BajarapaDioso cajena apo ponaponaē jivi pexanaetemplota.

²⁵ BajarapaDioso apo namatavenonaē jivi peyavenonaenexatsi. Tsipaji apo namatavenonaē itsacuenējavayo ata. Biji rajane bajaraponē nacarajuta caepatoyo vajaasaētsavanapaējumalijonexa. Nacarajutanua daxita xua namatavenonatsi, jai Pablo pepo Dioso, athēbētatsia peccaenē, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenë pebi exana. Bajaraxuacujinae bajarapapebijavaverena naexanapona daxitaviriajumevi pijasali-naivimi. Nexata bajarapapebijavaverena penaexanaponaevi yacaëjêpa pejinavanapaejava daxitanacuanëjava. Nexata Dioso caeviriajumevi canacujitsia tocopatapona pamatacabibeje asaë tsavanapaejitsia. Tocopataponanua panacuanëjava jinavanapaejitsia. ²⁷ Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabëcuenecopatsinexa Diosojavabelia. Dioso cajena tajë apo nacavecuaponapona. ²⁸ Dioso raja pejamatabëcueneta asaë tsavanapaetsi. Bajarapacuenia Dioso pejamatabëcueneta asaë tsavanapaetsi tsipaji baja cajena paxamëyajuvënëvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitssiti mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaevajava. Nexata bajayata jivi pibisiacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucuaeje Dioso itoroba daxitajivi daxitanacuanëjava pejinavanapaevi pibisiacuene pexanabiabijava pecopabinexa baja, penajamatabëcuenepënëyorotsinexa Diosojavabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaëjêtaruta. Pamatacabi Dioso tocaëjêtaruta, itsa copiapatsiana, naneconitsiaexanaena daxitanacuanëpijivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsijava Jesús petëpaecujinae Dioso icatsia piasaëyaexanaevajatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajara-palivaisi, jai itsamonae.

³³ Nexata baja Pablo bajarapamonae vecuapona. ³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonaevajatsi jumecovënëta Pablo petsipaebilivaisi yajuvënëne, pevënë Dionisio. Bajaraponë Dionisio, Areópagovënë tsutojavata penacaetuatabiabiivi pevetsiviyajuvënëne. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitajaraba judíonē, Aquilavēnēnē, Ponto nacuapijinē. Bajaraponē Aquila caematacabibeje abaxē xaina Corinto tomarata pepatsicujinae Italia nacuaverena. Yajavapata pijava Priscilavēnēva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinē, Claudiovēnēnē, capitsapona daxita judíovi pepitsapaenexa Roma tomaravecua. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpabonē Pablo nayavenonaeya jorocabiaba Aquila. Pablo nanacueneba tsipaji Pablo ata yapētane pejorocaejava carpabonē. ⁴ Judíovi penacaetuatabiabiabota, penacueraevetsimatacabianē canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovēnētsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonē. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacuene Cristo, ponē copiaevetavanapatsi pepatsijavatsica vajanacacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaejava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nēnēbabiabajarapamonae peyapētaenexa penaneconitsijava Diosojavabelia. Tsipaji apo jumecovēnētsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamē saya panejamatabēcueneta panaxuabianame Diosovecua. Xanē tajamatabēcueneta apo panaxuabimē tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovēnētsimē. Aeconoxae rabaja copatajē patacatsipaebabiabijava paxamējavabelia bajarapalivaisi. Tavajēnaeyabelia baja ponaenajē tatsipaebaponaenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabiabibovecua pitsapa. Nexata pona Justovēnēnē pijaboyabelia. Nexata Justo pijabota Pablo naponapona. Bajaraponē Justo penavajēcabiabinē Diosojavabelia. Pijabo eca judíovi penacaetuatabiabiabo muxuneneta. ⁸ Nexata Crispovēnēnē, judíovi penacaetuatabiabiabo pevetsinē, daxita pijabopijivi barējumecovēnēta Jesús pelivaisi. Ayaibitsaēto Corinto tomarapijivi, pamonaē jumetane Pablo petsipaebabiabilivaisi, jumecovēnēta. Nexata bajarapamonae nabautisaba. ⁹ Nexata meravī bemajitsinaebota Dioso jumaitsi Pablojavabelia:

—Pētsa junavame. Pētsa copatame netsipaebaponaejava tajumelivaisi. ¹⁰ Xanē raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaēto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tsipaebapona Dioso pitorobilivaisi Corinto tomarapijivijavabelia.

¹² Pamatacabi Galiónvënëñ Acayanacua evetaponapona, judíovi naja-matabëcuenejëpaeya tsimaxënae tuatatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuae vetsinë Galión pitabarata. ¹³ Nexata judíovi jumaiti nacuae vetsinë Galiónjavabelia:

—Mara ponëje jivi livaisi tsipaebaponaje pejumecovënëtsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanë cajena bajarapacuenia apo panetonajumecopatsi Dioso Moiséspijinëta penajumecopatsilivaisi, jai judíovi nacuae vetsinë Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuae vetsinë Galión jumaiti judíovijavabelia:

—Paxamë pajudíovimë, bepayapëtaneme mapacueneje. Itsa maponëje nacobetoxotsipa, jivitonë ata itsa beyaxuabijitsipa, pacajumexanitataejitsipatsi. Nexata naneconitsiaexanae jitsipajë. ¹⁵ Paxamë saya pabarënajumenotame maponëje papecatsipaebapona livaisi yabara. Pabarënajumenotamenua panijasalinaivi pijalivaisi yabara ata. Nexata saya paxamë panijacuata bajaraxua yabara pabarëcuaicua ijamëre pacuenia pajitsipame. Xanë raja apo evetsinë bajarapalivaisi, jai nacuae vetsinë Galión judíovijavabelia.

¹⁶ Nexata baja nacuae vetsinë Galión navecuapitsapaeyaexana judíovi. ¹⁷ Nacuae vetsinë Galión judíovi navecuapitsapaeyaexanae ata, caecuenia abaxë judíovi apo ponae pijabonëjavabelia. Nexata griegovi, bajarajota penubenaevi, nacobenavaetaba judíoviyajuvënëñ, Sóstenesvënëñ. Bajaraponë Sóstenes judíovi penacaetuatabi bibo pevetsinë. Nexata griegovi Sóstenes conibabia nacuae vetsinë Galión pitabarata, ajibi ata peyabaraconibabejava. Nexata nacuae vetsinë Galión tae ata bajarapacuene, apo itavetsi.

Pacuenia Pablo pepatsicujinae Antioquia tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cenrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenibijava pacuenia baja cajena Diosojavabelia Pablo najumecapanepaeya jumaiti. ¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabi bibo yalia. Nexata bajarajota barënalivaisita judíovi. ²⁰ Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai. ²¹ Nexata Pablo itsa napëjioba, bajarapamonaejavabelia jumaiti:

—Naxanetajë tapatsinexa Jerusalén tomarabelia tataenexa pafiesta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquia tomarabelia. ²³ Antioquia tomarata bajayajebi ponapona. Bajaraxuacujinae icatsia naropota. Najetaruca

daxita tomaranëjava. Najetaruca Galacia nacuata penaetomaranëjava, Frigia nacuata penaetomaranëjava ata. Bajarapatomaranëjava pejinavanapevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judionë Apolosvënënë pata Efeso tomarata, Alejandría tomarapijinë. Bajaraponë xaniavaetsia Dioso pitorobilivaisi jivi tsipaebabiaba. Jumeyapëtane bitso pacuenia Dioso pejumelivaisibaxutota jumaitsi. ²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaejava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcuenesaëya xaniavaetsia tsipaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tsipaeba judíovi penacuetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi. ²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapëtaeyaexanapona Jesús pepacuene Dioso athëbëvetsica pitorobijavatsitsica jivi pecapanepaenexa. Nexata baja judíovi moyana. Tsipaji acuenebi judíovi: “Jume raja,” pejaijava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamat-acabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejivibeje Jesús pelivaisi pejumecovënëtsivi. ² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espíritu Santo. Apo pavënëtaenë cajena Espíritu Santo ata, jai bajarapamonae Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamonaee baja copaba pibisiacuene pexanaejava, pamonaee baja najamatabëcuene pënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena pat-siana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. ⁶ Nexata Pablo pevajëtsijavata Diosojavabelia, tsimatanacobeuata bajarapamonae. Nexata bajarapamonae Espiritu Santo tsijamatabëjunuatsi. Nexata bajarapamonae itsa cuaicuajiai, ajumeitothia pecuaicuajiaijava. Tsipaji itsaviriajumenëta, apo penatsipaebijumenëmi, cuaicuajiai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia. ⁷ Daxita meta bajarapamonae bejamatatabëcuene doce ponëbeje.

⁸ Efeso tomarata Pablo acueyabi pajuametobeje ponapona. Nexata Pablo Efeso tomarata, judíovi penacaetuatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barënajumenotabiaba Dioso pijajivi pevetsijavanexa yabara. Bajarapacuenia Pablo barënajumenotabiaba judíovi pejumecovënëtsinexa Dioso pijajivi pevetsijavanexa. ⁹ Itsamonae itsiata amatabocotaja. Apo jitsipae pejumecovënëtsijava bajarapalivaisi. Bajarapamonae daxitajivi pitabarata pibisiacuenia baracuacuajiai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovënëtsixae Jesús pelivaisi. Pablo nexata, Jesús pelivaisi pejumecovënëtsivi yajava, pona Tirannovënënë pijaescuelabojavabelia, bajarapabota penacaetuatabiabinexa. Bajarapabota nexata Pablo caemat-acabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebaponapona anijavai-beje. Nexata daxita Asiavënë nacuapijivi, judíovi, apo judíovi ata, jumetane petuxanenë Jesús pelivaisi. ¹¹ Dioso yavenonatsi Pablo Dioso pesaëta pinijicuene pexanaejavanë pexanaponaenexa. ¹² Nexata pamonaee toavitanetsi, pijamonae Pablo penaxatabijavanë, pijapañueloxi ata, daxita xuaxi Pablo naperabëcayajaba, tocaponabiaba piavitanevi peperabëcayababinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranëjava najetarubena. Bajarapamonae Jesús pelivaisi apo jumecovënëtsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, sieteponëbeje tsavanapae. Bajarapamonae Escevavënënë, sacerdotevi penamatacaitorobinë, ëpexi tsavanapae. Nexata bajarapamonae vënëtane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenë Jesús pevënëta, najai.

Nexata jane baja itsa tane dovathi peyjavaponaponaenë, bajarapamonae jumaitsi:

—Dovathi, pacaitavetatsi, ponë Pablo vajunupaebapona, petuxanenë Jesús pevënëta. Vecuapitsapare baja maponëje, jai Escevavënënë pexi dovathi peyjavaponaponaenëjavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë papamonaemë? jai dovathi.

¹⁶ Nexata bajarajota dovathi peyjavaponaponaenë, tsi-maxëjirevarenatsi bajarapamonae. Pinijsaëta dovathi peyjavaponaponaenë biatsi. Nexata amoneyabatsi. Pinijcuenia tsaquibabiatsi. Vejumatitcatsi penaxatabijavanëmi. Nexata bajaraponë pijabovetua bajarapamonae yarëcëpeca pebejavatsi. Jumasa nexata rëcëpeca. ¹⁷ Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyjavaponaponaenë exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamonae yayiatane Jesús pevënë.

¹⁸ Nexata ayaibitsaëtozaneto Dioso pejumecovënëtsivi, patapona Pablobanajavaberena. Nexata bajarapamonae daxitajivi pitabarata navecuapaebapona pibisiacuene pexanabiabijava. ¹⁹ Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamonae comuaca bajarapabaxutonë, ayaimatamota comuaca. Nexata daxita bajarapamonae bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapapalatanëanë bitso penamatamotsinëanë.

²⁰ Nexata bajarapacuenia Dioso pitorobilivaisi yacaëjëpapona baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacujava, Acaya nacujava ata, petaenajetarucaenexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajë icatsia Roma tomarabelia ata, jai Pablo.

²² Nexata Pablo itoroba Macedonia nacuyabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. ²⁴ Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata

barēpitabiaba bajarapaboximatamo. ²⁵ Nexata Demetrio junata pebarēnacuetsinexa daxita pebarēnacuenebabiavi bajarapaboxi. Junatanua itsamonae ata, pamonaē pijinia jumapecataeya pexanaejavanē nacuenebabiaba. Nexata Demetrio jumaiti bajarapamonaejavabelia:

—Paxamē rabaja payapētaneme mapacuenēje. Jumapecataeya vajaex-anabibijavanē vajacanajetabiabixae, ayaijava palata xainaponatsi. ²⁶ Pataneme rabaja. Pajumetanemenua baja Pablo pejumaitsaponaejava mapacueniaje: “Jivi raja pecobeta jumapecataeya pexanaenēanē, apo diosovi cajena,” pejaitaponaejava. Nexata jivi ayaibitsaētoخانeto mapatomarapijivije jumecovēnētaPona Pablo bajarapacuenia petsipae-baponaejava. Itsiata apo ēmapatomarapijivije. Daxita Asiavēnē nacuapijivi ata jumecovēnētaPona. ²⁷ Bajarapacuenia jivi ayaibitsaēto pejumecovēnētaPonaējava apo nacatoxanepanae. Tsipaji jivi apo naca-comuatsi tsipae Artemisavēnē diosova pijacuene vajanacuenebijava. Pinijjamatabēcuene pexainaediosova Artemisa pijatemplobo ata, apo yayatae tsipae. Baitsi padiosova daxita Asiavēnē nacuapijivi, daxitanacuanēpijivi ata, pematabacabēta tonubenabiaba pevajēcabiabinexa bajarapovajavabelia, verevercaejitsipa. Nexata baja bajarapovajavabelia jivi apo vajēcabiabi tsipae, jai Demetrio templobo jumapecataeya tsiquiriboxi pexanabiavijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijjumeta vavajai tsaponae. Jumaiti:

—¡Pinijjamatabēcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponēbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponēbeje Macedonia nacuapijinēbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomarapijivi nacaetutabiaba. ³⁰ Pablo picani jumaiti Dioso pejumecovēnētsivijavabelia:

—Xanē najonejitsianē mapaboyaliaje taneyanatsinēbeje tayajivicuaicuaijainexa penacaetuatsivijavabelia, jai.

Itsiata Dioso pejumecovēnētsivi apo tocopatsitsi Pablo penajonenexalia. ³¹ Asiavēnē nacuapijivi pevetsivi, Pablo yapētanetsi. Nexata bajarapamonae asaēya Pablo tonajumeitorobarenatsi penajoneyaniva bajarapaboyabelia pebeyaxuabiyantatsi. ³² Efeso tomarapijivi penacaetuatsijavata, nalivaisijēpaeya apo cuaicuaijai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaētoخانeto apo yapētae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapētane palivaisi yabara jivi ayaibitsaēto nacaetuata. Nexata bajarapajudíovi tsipaeba Alejandrovēnēnējavabelia Alejandro peyapētaenexa xua yabara jivi ayaibitsaēto nacaetuata. Tsipaji Alejandro ata judíonē. Nexata Alejandro pevēna judíovi pēnatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pianaepanaeyaniva

daxita judíovijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapètane Alejandro judionècuene, nexata daxita vavajaiya jumai tsaponae anijahorabejecuena mapacueniaje:

—¡Pinijiamatabècuene raja pexainaediosova Artemisa, Efeso nacuapivitsi vajadiosova! jai tsaponae bajarapamona.

³⁵ Bajaraxuacujinae nexata tomara jane baja pevetsinè daxitajivi moyaxana. Nexata jumeitavetsiaya jumaitsi:

—PaEfeso tomarapijivimè, daxitanacuanèpijivi baja cajena yapètane vajanacatocopatsijava vajaevetsinexa mapatomarataje peecaobo, pinijiamatabècuene pexainaediosova Artemisa pijatemplobo. Daxitanacuanèpijivi baja cajena yapètane diosojumapeibotova, Artemisa, athèbèvetsica pejobaejava mapatomarataje. ³⁶ Nexata bajarapadiosojumapeibotova athèbèvetsica pejobaejava yabara, acuenebi itsajivi ata: “Jume,” pejaijava. Nexata pajamatejemamère. Pètsa abaxè itsacuenè paexaname copiaya panajamatabèxainaenejevamè xaniavaetsia. ³⁷ Mapapebibeje paxamè pacapatameje, apo penacobetoxotsinèbeje templobopijijava. Pibisiacuenia apo baracuaicuaijibejenua vajadiosova Artemisa, jai Efeso tomara pevetsinè Efeso tomarata penacaetuatsivijavabelia.

³⁸ Icatsia tomara pevetsinè jumaitsi bajarapamonaevjavabelia:

—Demetriobana itsa jamatabèneconita itsajivi, nexata neconitsi juezmanae pitabarata, jivi peneconitabiabibota. Bajara saya xua juezmanae evetavanapa. ³⁹ Itsa apo paneconitsijitsiamè jivi, saya itsa panacaetuatame itsacuenelivaisiyo yabara, nexata saya roviaia papaebare xaniavaetsia daxitajivi penacaetuatsijavata, pacuenia gobierno nacaitoroba. ⁴⁰ Xaniajanè pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatsije, jai Efeso tomara pevetsinè penacaetuatsivijavabelia.

⁴¹ Itsa baja Efeso tomara pevetsinè najumevereta bajarapacuenia petsipaebijava, itoroba baja daxitajivi penaviabinexa pijabonèjavabelia.

20

Pacuenia Pablo najetaruca Macedonia nacujava, Grecia nacujava ata, yabara pelivaisi

¹ Itsa baja Efeso tomarapijivi jamatabècaeva pianapanaejava, nexata Pablo junata penacaetuatsinexa daxita Dioso pejumecovènètsivi. Nexata Pablo muxujioba Dioso pejumecovènètsivi pevajènaeyabelia pijamatabècuenesaè tsavanapaenexa Dioso pejumecovènètsijava. Pablo nexata pexaniacuenia napèjioba bajarapamona. Bajaraxuacujinae Pablo baja pona Macedonia nacuyabelia. ² Nexata Pablo itsa pata Macedonia nacuyabelia, pexanialivaisi tsipaebanajetaruca Macedonia nacuapijivi Dioso pejumecovènètsivi pevajènaeyabelia pijamatabècuenesaè tsavanapaenexa Dioso pejumecovènètsijava. Bajaraxuacujinae icatsia Pablo pata Grecia nacuyabelia. ³ Nexata Grecia nacuata Pablo ponapona acueyabi pajuametobeje. Bajaraxuacujinae picani Pablo barcota naponaejitsia Siria nacuyabelia. Nexata Pablo nayajumetane Siria nacuata judíovi

pevajēnae vetsijavatsi pebeyaxuabinexatsi. Bjaraxuata Pablo najamatabēxaina icatsia pecovēya penaviatsinexa matatsēnēa Macedonia nacuajava. ⁴ Pamonae Pablo yanatatsi, mapevēnēanēje. Sópater, Berea tomarapijinē. Aristarco beje pijinia Segundobeje, Tesalónica tomarapijinē beje. Gayo pijinia Derbe tomarapijinē. Timoteo pijinia Listra tomarapijinē. Tíquico beje pijinia Trófimobeje, Asiavēnē nacuapijinē beje. Bjarapamonae Pablo yanatatsi. Nexata Pablo ita barēpata Filipos tomarata, xanē Lucasnē, necaxitajaraba. ⁵ Nexata daxita pamonae Pablo yanatatsi, namataxainaeja baja ponalia Troas tomarabelia. Nexata paxanē beje Pablo beje abaxē panacopatajē beje Filipos tomarata, Macedonia nacuata peccaetomarata. Nexata pamonae namataxainaeja baja ponalia, paneevetavanapabeje Troas tomaratalia. ⁶ Nexata paxanē beje Filipos tomarata barcota pananaropotajē beje pepuavereverecae baja pafiestamatacabi judíovi baxane levadurata matajērē abinejeva pexanaepan. Panaponajē beje jane baja Troas tomarabelia. Cinco matacabita panapaliajē beje Troas tomarabelia. Nexata pamonae paneevetavanapabeje Troas tomaratalia, papēcaxinajē beje baja. Nexata abaxē Troas tomarata pajinavanapajē siete pamatacabibeje.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajē daxita Dioso pejumecovēnētsivi yajava, patanajamatabēnapitsinexa xua yabara Cristo sivatēpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bjaraxuata Pablo livaisi tsipaeba meravijebi. ⁸ Panacaetuatajē athēbēabetsia pēnēyatuucubibota. Nexata athēbēyo paira paenayajē, itsajotatsia pitayotsijavanē ayaijava rubena xaniavaetsia pitayotsinexa. ⁹ Nexata pevējēato ventanajavata eca, Euticovēnēnē. Pablo nexata bajayajebi livaisi tsipaeba. Nexata belia pevējēato bitso itamajitsipaneca. Nexata baja majiteca. Pemajitecaenē nexata pevējēato jopareca acueyabi pairabejejavavereca. Nexata pevējēato ita sivarunarecatsi, petēpaenē baja pitatsi. ¹⁰ Nexata Pablo sivarunareca. Pematabacabēta ecaeya isapita petēpaenē. Nexata Pablo jumaitsi Dioso pejumecovēnētsivijavabelia:

—Pētsa panajamatabēxainame. Asaē rabaja icatsia pevējēato, jai Pablo.

Nexata pevējēato icatsia asaē. ¹¹ Nexata Pablo icatsia caevēa junaya. Pejunaecujinaetsia epatsēnēca jane baja pan. Tsicobetsana jane baja daxita Dioso pejumecovēnētsivi pexaenexa. Pexaecujinae abaxē icatsia Pablo bajayajebi cuaicuaijai. Pecuaicuaijainē belia yamatacabibecatsi. Bjaraxuacujinae Pablo jane baja pona Mileto tomarabelia. ¹² Nexata baja pevējēato piasaēnē barēnaviabatsi pijaboyabelia. Barēya bitso bjarapamonae piasaēxae pevējēato petēpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanē Pablo paneitoroba barcota menia namataxainaeja patanaponaenexa Asón tomarabelia. Bjarapacuenia Pablo paneitoroba tsipaji Pablo matatsēnēa najetarucaejitsia pepatsinexa Asón tomarabelia. Nexata Pablo ita pata Asón tomarata, bjarapatomarata patayapitsinexa. ¹⁴ Nexata jane baja Pablo ita pata Asón tomarata, Pablo baja nanonorena barco ēnēaberena. Nexata baja

panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quiotomara canacujitsialia pecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota pecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicujinae, caematacubicujinae, icatsia panapatajë jane baja Mileto tomarabelia. ¹⁶ Pablo rovia jamatabëxeneta Efesotomara, Asiavënë nacuata pecaetomara. Tsipaji apo jamatabëponaponae bajayajehi Asiavënë nacuata. Pablo bepjiia jamatabëpata Jerusalén tomarabelia Pentecostësvënë fiestavajënaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena. ¹⁸ Nexata baja ancianovi itsa parena Pablojavaberena, Pablo jumaitsi bajarapaancianovijavabelia:

—Paxamë baja cajena payapëtaneme mapacueneje. Asiavënë nacuata tapatsimatacabijavaveliacujinae, Dioso pitorobilivaisi tsipaebaponaponajë Asiavënë nacuata. Daxitamatacabi tonacuenebajë Dioso pijacuene. ¹⁹ Dioso pijacuene itsa tonacuenebaponaponajë, apo jamatabëjumaitsinë: “Xanë bitso ayajamatabëcuenenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinënu tsabiabi tsipaji judíovi jamatabënebexuababiaba. ²⁰ Daxita Dioso pitorobilivaisi pacatsipaebabiabatsi papecajamatabëcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. ²¹ Asaëya tsipaebabiabajë judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabëcuenepënyorotsinexa Diosojavabelia. Bajaraxuacujinae jane baja pejumecovënëtsinexa vajatuxanenë Jesucristo pelivaisi. ²² Mara jotacujinaeje ponaenajë Jerusalén tomarabelia Espiritu Santo taneitorobixae bajarabelia taponaeenexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. ²³ Itsiata caejavayo yapëtaniji. Caetomara canacujitsia Dioso pitorobilivaisi tatsipaebanajetarucaejavata Espiritu Santo nejumai tsabiabi: “Caetsiana raja penaneconitsivi pejebabiabibota. Xamë bitso benejiobicuene taename,” nejai tsabiabi Espiritu Santo. ²⁴ Itsiata baitsi jane cajena apo junavinë bajarapacuene yabara. “Belia nebexuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamëjava naponaponajë patacatsipaebinxaxa Dioso pevetsijavanaxa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa. ²⁶ Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo

naxuabi tsane xanë tajamatabëcueneta. ²⁷ Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamona Dioso pejumecovënëtsivi. Espiritu Santo raja pacaitoroba panetoevetsinexa vajatuxanenë Jesús pijajivi, pamona comuata pijanata. ²⁹ Tajëvelia baja cajena yapëtaniji tacovëya penajetarubenaeyanexa saicayacuena Dioso pejumelivaisivecua petsipaebivi. Bajarapamona najetarubenaena jivi Dioso pejumecovënëtsijava pevereverecaeyaexanaenexa. Pacuenia nevëthë pianaepanaevi verene oveja, bajara jamatabëcueneitsane bajarapamona pevereverecaeyaexanaenexa jivi Dioso pejumecovënëtsijavami. ³⁰ Paxamëyajuvënëvi ata saicayacuena Dioso pejumelivaisivecua tsipaebaponaena peyamaxëitojorobinexa Dioso pejumecovënëtsivi. Nexata Dioso pejumecovënëtsivi navecuanatsanaena pepënaponaenexa bajarapamona. ³¹ Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacuneje. Xanë baja cajena acueyabi pavaibeje, caematacabi canacujitsia, meravi yajava, caeto ata apo copatsinë patacamuxujobijava bitso patacaasivaxae. Itsajavata tanuejavata ata pacamuxujobiabatsi, jai Pablo Efeso tomarapijiancianovijavabelia.

³² Icatsia Pablo jumaitsi bajarapamonaeyavabelia:

—Tajamonae, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcueneyavenonaena. Bajarapalivaisi caëjëpatsi papecajamatabëcuene asaëyaexanaenexa Diosojavabelia. Dioso pacacapanepaena pacuenia Dioso capanepaena daxita pamona Dioso aneconijibia tane. ³³ Xanë itsa naponaponajë paxamëjavata, apo najamatabëxainaenë tanaxainaeyabinexa itsanë pijapalata, penaxatabijava ata. ³⁴ Payapëtaneme baja cajena mapacuneje. Tacobeta nacuenebajë tanamatavenonaeyavaxi tacomuataponaenexa, tayjavapononaevi ata tatocomuatsinexa. ³⁵ Pacatsitanacueneitajëtatsi baja cajena pacuenia paxamë ata bepanacuenebame. Bepayavenonamenua itsamonae bitso bepejiobivi. Tsipaji baja cajena vajatuxanenë Jesús jumaitsi mapacueniaje: “Xanepana bitso itsamonaejavabelia vajarajutabiabijava vaxaitsi itsamonae vajanacarajutabiabijava matatoxenetsia. Tsipaji bitso jamatabëcuenebarëyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematabacabëta barënuca pebarënavajëtsinexa Diosojavabelia. ³⁷ Bajaraxuacujinae Pablo baja pona. Nexata ancianovi pënueyabatsi. Nexata Pablo itsa napëjioba ancianovi, yaitaxutonueya vaetabiaya itabaratsutsuneponatsi. ³⁸ Bitso ancianovi najamatabëxaina. Tsipaji Pablo jumaitsi:

—Apo panetaemē rabaja tsane matavējēa, jai.

Bjaraxuacujinae Pablo barcojavabelia peponaejavata, bajarapamonae pēnaxuabaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapējiobiveretajē ancianovi, panarunarecajē baja barco ēnēabereca. Pananicabaliajē roviaia patapatsinexalia Cos tomarabelia. Bjaraxuacujinae, meravia pitsijavata, panapatajē abaxē epatua Rodas tomarata. Bjaraxuacujinae abaxē icatsia panapatajē Pátara tomarabelia. ² Nexata Pátara tomarata icatsia pacaxitajarabajē itsabarco. Bjarapabarco ponaejitsia Fenicia nacuyabelia. Nexata icatsia bajarapabarcota patanaponaenexa, panarunarecajē bajarapamo ēnēabereca. Panaponajē jane baja. ³ Nexata barcota patanajetarubenaiejavata, pataeyetajē patatsavenonenia Chipretunaeto. Paxenetanajetarubenaiejē rovia. Paponajē Siria nacuyabelia. Nexata baja papatajē Siria nacuyabelia Tiro tomarata. Nexata Tiro tomarata juteta barcoēnēta pecaponaejava. ⁴ Nexata Tiro tomarata pacaxitajarabajē Dioso pejumecovēnētsivi. Bjarapamonaejavata pajinavanapajē siete pamatacabibeje. Bjarapamonae tajēvelia Espiritu Santo pejamatabēcueneta yapētaeyaexanatsi Pablo pebejiobiaexanaejavanexatsi Jerusalén tomarata. Nexata bajarapamonae jumaitsi Pablojavabelia:

—Pētsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajē. Nexata Tiro tomarapijivi, daxita Dioso pejumecovēnētsivi, pijavajivi yajava, pexi yajava, patapēta naponalia mene itapayabelia patanepētaenexa pataponaejava. Nexata mene itapatalia, tajetabota, daxita bajarapamonae yajava, panubenaiejē patamatabacabēta patavajētsinexa Diosojavabelia. ⁶ Bjaraxuacujinae panapējiobajē baja daxita Dioso pejumecovēnētsivi. Icatsia baja panarunarecajē barco ēnēaberena. Bjarapamonae baja naviabalia pijabonējavabelia.

⁷ Tiro tomarata patanaropobicujinae, panapatajē Tolemaida tomarabelia. Bjarapatomarata pabajacobajē Dioso pejumecovēnētsivi. Bjarapamonaejavata panajinavanapajē caematacabi. ⁸ Meravia icatsia pitsijavata panaropobajē. Panapatajē icatsia Cesarea tomarabelia. Cesarea tomarata patapatsicujinae, panaponajē Felipe pijaboyabelia. Felipe, Dioso pitorobilivaisi jivi petsipaebinē, siete ponēbeje diáconoviyajuvēnēnē. Bjaraponē pijabota panajinavanapajē. ⁹ Felipe xaina cuatro povabeje pexi. Bjarapapetiriavi abaxē apo nacojiobi. Bjarapamonae tsipaebabiaba jivijavabelia Dioso pitorobilivaisi, palivaisi Espiritu Santo pejamatabēcueneta yapētaeyaexanatsi. ¹⁰ Itsa baja paxainajē anijamatacabanē Felipe pijabota patanapatsicujinae, Judea nacuverena pata Diosojumepaebinē profeta, Agabovēnēnē. ¹¹ Bjaraponē pata paxanējavaberena Felipe pijabota. Nexata Agabo Pablo pijacorreabocoto veepajonotatsi. Bjarapabocotota Agabo nacobecētabeje. Nataxucētabeje yajava. Nexata Agabo jumaitsi:

—Espiritu Santo raja nejumaitsi tajēvelia mapacueniaje: “Jerusalén tomarata pejinavanapaevi, judiovi, mapacuenia cētsianatsi mapacorreabocoto pexainaenēje. Bjaraxuacujinae canajetsianatsi itsanacuapijivi

pecobeyabelia, apo judíovijavabelia,” jai raja tajëvelia Espíritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaeyaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainaeya exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaejava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojtitsipatsi pexanaenexatsi, beexanaenatsi baja, panjanë.

¹⁵ Caematacabibejecujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia. ¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiya Dioso pejumecovënëtsiviyajuvënënë.

Pacuenia Pablo Jerusalén tomarata Santiago barëcuaicuaijai yabara pelivaisi

¹⁷ Itsa papatajë Jerusalén tomarabelia, Dioso pejumecovënëtsivi panecopiapita jamatabëcuenebarëyaya. ¹⁸ Nexata meravia pitsijavata Pablo panebarësivaxaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. ²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacuenie, pexaniajamatabëcuene rajuta Diosojavabelia. Nexata Santiagobana jumaiti Pablojavabelia:

—Patajabanänë, yapëtaneme baja cajena mapacuenieje. Judíovi bitso ayaibitsaëtoxaneto, miles pajivibeje Dioso pejumecovënëtsivi. Yapëtanemenua baja mapacuenieje. Daxita bajarapajudíovi jumecovënëtsi ata Jesús pelivaisi, itsiata abaxë tsiteca jumecovënëtavanapa Dioso Moiséspijinëta penajumecopatsilivaisi. ²¹ Pajudíovi apo jumecovënëtsi Jesús pelivaisi, xamë netsipaebaponaelivaisi cayabaranajumetsënëtabiaba. Nexata bajarapajudíovi najumetsënëtsiaya jumai tsabiabi Jesús pelivaisi pejumecovënëtsijudíovijavabelia: “Itsa raja Pablo livaisi tsipaebapona judíovijava, itsanacuanëjava pejinavanapaevi, Pablo itavetabiaba judíovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

²² Icatsia Santiagobana jumaiti Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovênétsivi, cavênêlivaisitane nepatsijava, nacaetuatsiana penabarêcuaicuajainexa xamê yabara. ²³ Nexata daxitajivi pecayapêtaenexa nejumecovênétsijava Dioso Moiséspijinêta penajumecopatsilivaisi, exanaename pacuenia pacaitorobijitsiatsi. Majotaje cuatro ponêbeje paxanëyajuvênêvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonaeta temploboyabelia. Nexata templobota nanajamatabêcuenexaniavaetsianame nijamatabêcuenesaênexa Diosojavabelia. Pacuenia bajarapamonae najamatabêcuenexaniavaetsijitsia pijamatabêcuenesaênexa Diosojavabelia, bajarapacuenia nanajamatabêcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponêjavabelia notsiana, bajaraxua xamê daxita cobecovêmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judíovi cayapêtaena nejumecovênétsijava Dioso Moiséspijinêta penajumecopatsilivaisi. Nexata daxita judíovi yapêtaena najumetsênétsiaya pecabaracuaicuajai tsabiabijava pajudíovi apo jumecovênétsi Jesús pelivaisi. ²⁵ Pamona apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamona apo judíovi ata, Dioso pejumecovênétsivi, pataitavetsinexa, caelivaisiyobeje patoyaquinajê cuyalatota. Itsa patoyaquinajê, pajumaitsinê mapacueniaje: “Pecobeta saya pexanaenêanêjavabelia pevi perajutsinexa ofrendacuenia itsa tobía baca oveja ata, pêtsa paxaneme bajarapayajuvênêvi. Pêtsa paxaneme peja. Pêtsa paxaneme cuibocuetsacaeya pebeyaxuabinê pevi. Papebijivi baja nacojioba, pêtsa matayajibatsi itsavajavabelia pijavavecua. Papebijivi pijinia abaxê apo nacojiobi, pêtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pêtsa matayajibatsi itsanêjavabelia pamonavecua. Papetiriavi pijinia abaxê apo nacojiobi, pêtsa matayajibatsi pebijavabelia,” pajanê itsa patoyaquinajê apo judíovijavabelia, jai Santiagobana Pabloyavabelia.

Pacuenia Pablo templobota vaetabatsi penaneconitsivi pejebabiabib-ota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponêbeje pepêta pacuenia Santiagobana itorobatsi. Pablo nexata najamatabêcuenexaniavaetapona pijamatabêcuenesaênexa Diosojavabelia cuatro ponêbeje yajava. Bajaraxuacujinae Pablo temploboyalía joneya sacerdotevijavabelia, petsipaebinexa pamatacabi copiarucaeijitsia Pablobana penajamatabêcuene xaniavaetsijava Diosojavabelia. Bajarapamatacabi cuatro ponêbeje Diosojavabelia ofrenda perajutsijavanênexa templobota notsijitsia. Nexata picani daxita bajaraxua Pablo cobecovêmatamotsijitsia bajaraxua pecanajetsivijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponêbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavênê nacuaverena pepatsivi. Nexata bajarapajudíovi itoroba daxita Jerusalén tomarapijivi planaepanaenexa Pabloyavabelia. Nexata Jerusalén tomarapijivi, Asiavênê nacuaverena

pepatsivi yajava, nacobenavaetabatsi Pablo. ²⁸ Nexata bajarapamonae vavajai pinijjumeta. Najumetsënëtsiaya jumaitsi:

—¡Tajamonae judíovi, naxanitsia! ¡Paneyavenonare! Maçonëje daxitanacuanëjava livaisi tsipaebanajetaruca daxitanacuanëpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinëta penajumecopatsilivaisi jivi pejumecovënëtsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barëjoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarëponaponaejava Jerusalén tomarata apo judíonë, Trófimovënënë, Efeso tomarapijinë. Nexata jamatabëcuenenavëxaniabiaya bajarapamonae jamatabëjumaitsi:

—Pablo raeta apo judíonë barëjunua mapatemploboyarenaje, jamatabëjai Trófimo yabara.

Pablo cajena Trófimo apo barëjone temploboyalia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae cujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboënëvecua. Nexata templobobaupaxanetonë bepíjia vecuabau-paxatabatsi. ³¹ Bajarapamonae picani Pablo jamatabëbeyaxuabatsi. Nexata bajarapaepatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. ³² Nexata comandante bepíjia barëlia pijajivi vajabitsaëvi, vajabitsaëvi pijacapitánvi yajava. Cujinaejina jivi penacae-tuatsijavabelia. Nexata judíovi itsa tane comandante vajabitsaëvi pebarëpatsijava, nexata judíovi copaba pebejavatsi Pablo. ³³ Nexata comandante Pablo cujirenatsi. Vaetabiaexanatsi pijajivi. Comandante itoroba pijajivi Pablo pecëtsinexatsi anijacadenamaëtotabeje. Bajaraxuacujinae yanijoba judíovijavabelia.

—¿Detsa maçonëje? ¿Detsa xua exana maçonëje? jai comandante.

³⁴ Nexata bajarapajivi bitsaëtoxanetonëyajuvënëvi comandantejavabelia najuatsipaebanubena pinijjumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaë Pablo pecaponaenexatsi vajabitsaë pijaboyabelia. ³⁵ Pablo capatatsi vajabitsaë pijaboitapata. Vajabitsaë pijabo pepënevëlia xaina beescaleracuenia pexanaejava. Nexata bajarajota Pablo vajabitsaë nacobenayotsiaya cajunayatsi vajabitsaë pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaëtoxanetonë Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaëtoxanetonëjavabelia yabara pelivaisi

³⁷ Itsa baja Pablo vajabitsaëvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamë tsaja natsipaebame griegojume? ³⁸ ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmaxëto apo barënajetabajiravimë petusato nacuyabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinxexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinxexa. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

22

¹ —Tajamona, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³ —Xanë raja judíonënë. Naexanajë Tarso tomarata, Cilicia nacuata peecaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipacuenua tonacuenebianajë,” jamatabëjanë tsabiabi. Bajarapacuenia aconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaitsi:

—Xanë abaxë picani bajayata barajinabiabajë pamonae jumecovënëta pexanialivaisi, Jesucristo pelivaisi. Pamonae jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamona penaneconitsivi pejebabiabibota. Jitsipajë picani pebeyejebinxatsi daxita bajarapamona. ⁵ Sacerdotevi pepo penamatacaitorobinë, daxita judíovitsi vajaancianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaejavabelia vajëtajë tanetsicobeyaquinaenexa cuyalato tatocaponaenexa pamonae judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, tacapatsinexa picani mabereraje Jerusalén tomaraberena penaneconitsiaexanaenexatsi, jai tsanucæ Pablo judíovijavabelia.

*Pacuenia Pablo navajunupaeba pacuenia taxuxuaba Jesús pelivaisi
pejumecovënëtsijava yabara pelivaisi
(Hch 9.1-19; 26.12-18)*

⁶ Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatoyorotsia naitayota athëbëvetsica. ⁷ Nexata bajarajota irataeya bocajunuajë irata. Jumetaenucajë athëbëvetsica tanejumaitsi-
java: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaijava. ⁸ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja tajajivi netobejiobiaexanaponame,” nejai. ⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaicuaijai athëbëvetsica. ¹⁰ Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. ¹¹ Nexata bajarapacotia tataecujinae bitso nitaxutomeraviba. Apo necaëjëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënënë, bitso pejumecovënëtsinë Dioso Moiséspijinëta penajumecopatsilivaisi. Bajara-
ponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. ¹³ Nexata bajaraponë Ananías xanëjavaberena patajopa tanetaenexa. Nexata nejumai tsanucae: “Tajabananë Saulo, icatsia rabaja itaxutoxanepaname,” nejai. Bajarapacuenia tanejumaitsijavata icatsia baja itaxutoxanepanajë. Nexata baja taniji Ananías. ¹⁴ Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanua ne-
taenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi. ¹⁵ Nexata ponaename daxitanacuanëpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxë najamatabëjematsia ponaponame? Nonotapunare. Cabautisabi-
ana. Jesúsjavabelia nenajamatabëcuenecopatsixae, daxita pibisiacuenenexanaeconimi cavecuaajibiaexanaena,” nejai Ananías, jai Pablo judíovijavabelia.

*Pacuenia Pablo itorobatsi Dioso pitorobilivaisi petsipaebaponaenexa
apo judíovijava yabara pelivaisi*

¹⁷ Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. ¹⁸ Nexata Jesús nejumaitsi: “Naxanitsiayo bepijia vecuaponare Jerusaléntomara. Tspajë raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús

bemajitsinaebota. ¹⁹ Nexata xanë jumaitsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaeuatabiabibonëjava tata-icaponaejava daxita pamonaе cajumecovënëta taconibabeyabiabinexa naebota. ²⁰ Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaе Estebanpijinë beyaxuabatsi, penajumajonejebijavanë tovetanucajë,” janë pepo petuxanenë Jesúsjavabelia. ²¹ Nexata pepo petuxanenë nejumaiti: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

Pacuenia Pablo exanatsi vajabitsaë pepo pevetsinë comandante yabara pelivaisi

²² Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae pinijijumeta. Jumai tsaponae:

—¡Maponëje pabeyaxuare! ¡Mara pitsinë apo becopsatsi peponapon-aenexa matavëjëaje! jai tsaponae judíovi Pablo yabara.

²³ Bajarapamonae pinijijumeta vavajai tsaponae. Pijacamisajumavelia penaxatabijavanë, vebabia bitso pianaepanaexae. Atsabenonë cayajabajarabarena Pablojavaberenena pebaraanaepanaexaetsi. ²⁴ Nexata vajabitsaë pepo pevetsinë, comandante, pijajivi itoroba Pablo pecajonenexatsi vajabitsaë pijaboyalía. Comandante itoroba pijajivi Pablo picani pejumatatibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo petsipaebinexa vajabitsaëjavabelia xua yabara judíovi neconitsiaya pinijicuenia vavajai tsaponae Pablo yabara. ²⁵ Nexata jane baja Pablo itsa cëtetatsi vajabitsaë picani pejumatatibabenexatsi, nexata Pablo jumaiti bajarajota penucaenë vajabitsaë pijacapitánjavabelia:

—Xanë raja Romano nacuapijinë. Nexata itsa panejumaconibabejitsipame abaxë copiaya neneconitsinejeva juezmanae pitabarata, nexata panevemaxëneconitsipame. Tsi-paji nijatuxanenë, Romanonacua pepo pevetsinë, pacaitaveta bajarapacuenia paneexanaeyaniva, jai Pablo vajabitsaë pijacapitánjavabelia.

²⁶ Capitán itsa jumetane bajarapacuenia Pablo pejumaitisijava, nexata capitán lia vajabitsaë pepo pevetsinë comandantejavabelia. Capitán jumaiti comandantejavabelia:

—Xania baja tsane pacuene exanaejitsiamë Pablojavabelia. ¡Maponëje Pablo Romano nacuapijinë baja cajena! jai capitán comandantejavabelia.

²⁷ Nexata comandante rena Pablojavaberenena. Jumaiti Pablojavabelia:

—¿Xaniajai tsabaja? ¿Xamë Romano nacuapijinë? jai comandante.

—Jājā, jai Pablo.

²⁸ Nexata comandante jumaiti Pablojavabelia:

—Xanë ata baja maparucaeje Romano nacuapijinë naexanjë. Tsi-paji baja matamatajë ayaimatamota bepepo Romano nacuapijinë tanaexanaenexa, jai comandante.

Bajarapacuenia jumaitsi tsipaji comandante saicayanacuata penaexanaenē.

Pablo nexata jumaitsi comandantejavabelia:

—Xanē apo matamotsinē. Tsipaji baja cajena pepo Romano nacuapijinēnē. Naexanajē cajena Romano nacuata, jai Pablo comandantejavabelia.

²⁹ Nexata picani pavajabitsaē Pablo jumaconibabejitsiatsi, vecuaponatsi baja. Vajabitsaēvi pepo pevetsinē ata, comandante, Pablo cujunavatsi itsa yapētanetsi Pablo Romano nacuapijinēcuene. Cujunavatsi pecētsiaexanaexaetsi cadenamaētonēta.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinēcuene, meravia pitsijavata, vajabitsaē pepo pevetsinē, comandante, jamatabēyapētane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaēto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naēcota daxita penacaetuatsivi. Nexata Pablo jumaitsi bajaramonaejavabelia:

—Tajamonaē, xaniavaetsia cajena ponaponabiabajē naja-matabēcuenebijiianaenejevanē Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinē, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinē.

³ Nexata Pablo jumaitsi Ananíasjavabelia:

—¡Dioso rajane juya pepacuene xamē catsaquibiaxuabiana! Xamē majotaje ecame taneneconitsinexamē. Tsipaji xamē xanē yabara jamatabēcuenenavēxaniabiaya jamatabējumaitsimē: “Maponēje Pablo naneconita Diosojavabelia,” jamatabējamē. Nexata xamē nijacuata naneconitame nijagobiernojavabelia. Tsipaji itorobame mapamonaēje tanetsaquibiaxuabinexa taaneconijibinē, jai Pablo Ananíasjavabelia.

⁴ Bajarajota penubenaevi jumaitsi Pablojavabelia:

—Xamē raja jumeitavetame Dioso pijajivitonē, sacerdotevi pepo penamatacaitorobinē, jai bajarapamonaē Pablojavabelia Ananías yabara.

⁵ Nexata Pablo jumaitsi:

—Tajamonaē, xanē apo yapētaenē Ananías sacerdotevi pepo penamatacaitorobinēcuene. Itsa yapētaejitsipajē, apo jumaitsinē tsipae bajarapacuenia. Tsipaji Dioso pejumelivaisibaxutota jumaitsi mapacueniaje: “Pētsa jumeitavetame pecaevecsinnē,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabēcuenyapētane penacaetuatsivi. Tsipaji penacaetuatsivi caelivaisi apo xainae. Jamatabēcuenyapētaneme

itsamonae pecatsitecaejava saduceovi pecujarubicuene. Jamatabēcueneyapētane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

—Tajamonae, xanē raja fariseonēnē. Fariseovi pecujarubicuene jumecovēnētajē. Taxapijinē baja cajena fariseonē. Tamojivimi ata cajena fariseovi. Majotaje neneconitsijitsia. Tsipaji jivi petēpaecujinae Dioso icatsia piasaēyaexanaejavanexa, jumecovēnētajē, jai Pablo.

⁷ Bajarapamonae itsa jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabēcuenejēpae baja. Nexata anaeya bajarajota navecuanatsana baja. ⁸ Saduceovi jumeaebabiaba fariseovi pejumecovēnētsilivaisi. Nexata saduceovi jumai tsabiabi:

—Jivi petēpaecujinae, acuenebi icatsia Dioso piasaēyaexanaejava. Ajibi raja cajena ángelevi. Ajibi raja cajena petēpaevi ata pejumape, jai tsabiabi saduceovi.

Fariseovi jumecovēnēta jivi petēpaecujinae Dioso icatsia piasaēyaexanaejavanexa. Jumecovēnētanua ángelevi ata pejinavanapaejava. Jumecovēnētanua petēpaevi ata pejumape pejinavanapaejava. ⁹ Apo penajamatabēcuenejēpaexae, daxita bajarapamonae bajarajota pinijijumeta vavajai tsaponae. Nexata pamonae judíovi pecujarubivi, fariseoviyajuvēnēvi, nonobapuna. Anaeya jumaitsi saduceovijavabelia:

—Itsacuenē ata cajena pibisiacuenē apo exanae maponē Pabloje. Xaniajai meta cajena. Petēpaejivi pejumape tsipaebatsi. Itsa jume, ángel meta tsipaebatsi. Paxanē nexata itsacuenē ata apo paexanaenē tsane Pablojavabelia Diosojavabelia patananecotsiyanima, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajabitsaē pepo pevetsinē, comandante, belia jamatabējumaitsi: “Pablo meta baja bajarapamonae beyaxuabianatsi,” jamatabējai. Nexata comandante junata pijajivi peponaenexa. Pablo baja jutatsi bajarapamonaevēcua. Comandante itoroba pijajivi Pablo pecaponaenexatsi vajabitsaē pijaboyabelia.

¹¹ Nexata bajarapameravi Jesús tsitanaitajētatsi Pablo. Jesús nuca Pablo pemuxuneneta. Jumaitsi:

—Ajamatabēcuenesaēmēre nevajēnaeyabelia. Pacuenia tsipaebame xanē talivaisi majotaje Jerusalén tomarata, bajara icatsia pacuenia tsipaebianame xanē talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabēbeyaxuabatsi yabara pelivaisi

¹² Pablo petsitanaitajētsicujinaetsi Jesús, meravia pitsijavata, judíovi nacaetuata. Najamatabēcueneyanaba jane baja picani Pablo pebeyaxuabinexatsi. Nexata picani pebeyaxuabivajēnaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenējavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

¹³ Pamonae picani Pablo jamatabēbeyaxuabatsi, cuarenta ponēbeje pe-matatsēnēa. ¹⁴ Bajaraxuacujinae bajarapamonae pona sacerdotēvi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenā. Nexata pamonae

cuarenta ponëbeje, pamonaē picani Pablo jamatabēbeyaxuabatsi, jumaitsi sacerdotēvi penamatacaitorobivijavabelia, judiōvi pijaancianovijavabelia ata:

—Paxanē rajane baja najumecapanepaeya panajumaitsinē: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanē. ¹⁵Nexata paxamē sacerdotēvi panenamatacaitorobivi, paxamē ata judiōvi papijaancianovimē, panacaetuat-sianame judiōvi pecujarubivi yajava panenabarēcuaicuaijainexa. Nexata daxita paxamē patonajumeitorobianame cuyalatota vajabitsaē pepo pevetsinē, comandantejavabelia. Pavajētsianame comandantejavabelia papecatocarenanexa Pablo. Pajumaitsimē tsane yamaxēitojorobiaya comandantejavabelia: “Pajitsipajē icatsia matavējēa patayanijobijava Pablo, pijaneconi patayapētaenexa xaniavaetsia, paneconi xaina,” pajamē tsane. Nexata paxanē epatotalia pavajēnaeevetsianajē Pablo. Itsa rena, patabeyaxuabinexa patsinejeva maberenaē, jai pamonaē cuarenta ponëbeje, pamonaē picani Pablo jamatabēbeyaxuabatsi.

Nexata sacerdotēvi penamatacaitorobivi, judiōvi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶Itsiata baitsi jane Pablo pematapijiva pexēnato jumetane Pablo pevajēnaeevetsiapaebijavatsi pebeyaxuabinexatsi picani. Nexata bajaraponē pona vajabitsaē pijaboyabelia. Itsa baja bajaraponē joneya vajabitsaē pijaboyalia, bajarapalivaisi tsipaēba Pablojavabelia. ¹⁷Nexata bajaraxuacujinae Pablo junata caenē vajabitsaē pijacapitán. Pablo jumaitsi:

—Barēponare mapapevējēatoje papecanamatacaitorobinē, comandantejavabelia. Itsalivaisiyo xaina petsipaebinexa, jai Pablo.

¹⁸Nexata Pablo piopaxa capitán barēponatsi vajabitsaē pepo pevetsinē, comandantejavabelia. Nexata capitán jumaitsi comandantejavabelia:

—Naneconitsia raja peponaponaenē Pablo nejunata. Nexata nitoroba tabarēponaenexa mapapevējēatoje xamējavaberena. Tsipaji pina catsipaebijitsia itsalivaisiyo, jai capitán comandantejavabelia.

¹⁹Nexata comandante cobepitatsi pevējēato. Barēliatsi pesaicaeyojavabelia. Comandante nexata jumaitsi pevējēatojavabelia:

—¿Detsa pitsilivaisi xainame tanetsipaebinexamē? jai.

²⁰Nexata pevējēato jumaitsi:

—Sacerdotēvi penamatacaitorobivibeje, judiōvi pijaancianovibeje, najamatabēcueneyanaba pecavajētsinexa meravia netocalianexa Pablo bajarapamonaējavabelia. Bajarapamonaē cayamaxēitojorobiaya cajumaitsiapaebi: “Pajitsipajē icatsia matavējēa patayanijobijava Pablo, pijaneconi patayapētaenexa xaniavaetsia, paneconi xaina,” cajaiyapaebi bajarapamonaē. ²¹Itsiata pētsa jumecovēnētame bajarapamonaē. Tsipaji cuarenta ponëbeje pematatsēnēa namatayabiaya epatota Pablo vajēnaeevetsiapaebatsi pebeyaxuabinexatsi. Bajarapamonaē daxita najumecapanepaeya najumaitsi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonaē. Aeconoxae saya bajarapamonaē eveta Pablo necaliajava, jai pevējēato comandantejavabelia.

²²Nexata comandante jumaitsi pevējēatojavabelia:

—Pētsa tsipaebame itsajivi ata tanetsipaebilivaisimē, jai comandante.

Bajaraxuacujinae pevėjėato baja itorobatsi caevėalia.

Pacuenia Pablo itorobatsi nacuaevecsiniė Félixjavabelia yabara pelivaisi
 23 Vajabitsaė pepo pevetsiniė, comandante, junata anijanėbeje, vajabitsaė pijacapitánbeje. Jumaitsi:

—Panaxaniavaetsiaexanarebeje vajabitsaė petaxuta peponaevinexa doscientos ponėmaxėto, setenta pijinia ponėbeje caballojumata peponaevinexa, doscientos pijinia ponėmaxėto becuerereboxanetonė, lan-zavėnėjavanė, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabėcuene a las nuevejava. 24 Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevecsiniė Félixjavabelia, jai comandante capitánbejejavabelia.

25 Bajaraxuacujinae comandante tsicobeyaquina cuyalatobaxuto pitorobinexa nacuaevecsiniė Félixjavabelia. Comandante peyaquinaecuyalatobaxutota jumaitsi mapacueniaje:

26 “Félix, pecayaiyataenė, nacua nevetsiniė. Xanė raja Claudio Lisi-asvėnėnėnė catoyaquinatsi. Cabajacobatsi. 27 Judıovi raja vaetabatsi ponė catoitorobaliatsi, Pablovėnėnė. Beyaxuabijitsiatsi picani. Nexata itsa vėnėlivaisitaniji Pablo Romano nacuapijinėcuene, sivalianė. Taja-jivi vajabitsaė taneyavenonaecueneta yacajėrėtajė judıovi pecobevecua, ajena baja picani beyaxuabijitsiatsi. Nexata caponaeyaexanajė tajajivi vajabitsaė pijaboyabelia. 28 Bajaraxuacujinae sacerdotevi penamatacaitorobivi pitabarata, judıovi pijaancianovi ata pitabarata, judıovi pecujarubivi ata pitabarata, nutsiaexanajė. Bajarapacuenia nutsiaexanajė bajarapamonae pitabarata tayapėtaenexa jane baja picani paneconi yabara Pablo judıovi neconitsijitsiatsi. 29 Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judıovi saya Pablo neconitsijitsiatsi judıovi pijasalinaivi pijacueneyabara. 30 Nexata itsajivi netsipaeba judıovi namutoepatota Pablo pevajėnaeevetsiapaebijavatsi pebeyaxuabinexatsi. Bajaraxuata nexata najamatabėxainajė Pablo tacatoitorobinexa xamėjavabelia. Nexata pajudıovi Pablo neconitsijitsiatsi, itorobajė peneconitsinexatsi xamė nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevecsiniė Félixjavabelia.

31 Nexata vajabitsaė exana baja pacuenia itorobatsi comandante. Bajarapameravi vajabitsaė baja Pablo caponaliatsi Antıpatris tomarabelia.

32 Nexata meravia pitsijavata bajarapavajabitsaėyajuvėnėvi, petaxuta peponaevi, Antıpatris tomarata naviabarena baja pijaboyaberena. Pamonaecaballojumata peponaevi, pevajėnaeyabelia abaxė caponaliatsi Pablo. 33 Caponaliatsi Cesarea tomarabelia. Nexata Cesarea tomaratalia vajabitsaė rajuta petocaponaecuyalatobaxuto nacuaevecsiniė Félixjavabelia. Yajavarajutanua Pablo bajaraponė pecobeyabelia.

34 Nexata nacuaevecsiniė Félix leba baja petocapatsicuyalatobaxutotsi. Bajaraxuacujinae nacuaevecsiniė Félix jumaitsi Pablojavabelia:

—¿Detsa panacuapijinėmė? jai.

Nexata Pablo jumaitsi:

—Xanė raja Cilicia nacuapijinėnė, jai.

Nexata yapėtanetsi Pablo Cilicia nacuapijinėcuene. 35 Nexata icatsia nacuaevecsiniė Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevetsinë Félix.

Bajaraxuacujinae nacuaevetsinë Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinë pexanaeyaexanaebota.

24

Pacuenia Pablo navajunupaeba nacuaevetsinë Félix pitabarata yabara pelivaisi

¹ Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinë, parena Cesarea tomaraberena. Parena judíovi pijaancianovi yajava, Tértulovënëñë yajava. Tértulo abogadonë, jivi peneconitsicuene peyapëtaenë. Bajaraxuata judíovi junata bajaraponë petocuaicuaijainexatsi nacuaevetsinë Félixjavabelia. Nexata judíovi, Tértulo yajava, nubena nacuaevetsinë Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinë Félixjavabelia mapacueniaje:

—Pecayaiyataenë nacua nevetsinë. Xaniavaetsia nevetsixae mapanacuaaje, bajayajebi xaniavaetsia pajinavanapajë. Xamë nejamatabëcueneta daxita mapanacuapijicuene, xua abeje picani, xanebiaexanaponame pevajënaeyabelia. ³ Nexata pabarëyanë patanetoexanaejavamë yabara daxita mapanacuajavaje. Bajaraxuata pexaniajamatabëcuene pacarajutatsi. ⁴ Caepatoyo saya pacajamatabëitonotatsi. Pexaniacuene panetoexanare. Panenamuxunaevere caejumeyobeje. ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pianaepanaenexa judíovi penavecyanatsanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. ⁶ Mara ponëje Dioso pijatemplobo Jerusalén tomaratalia jamatabëbijiana picani. Tsipaji apo judíovi barëjoneya temploboënëalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. ⁷ Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijisaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinë Félixjavabelia.

⁹ Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinë Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarpacuenia exana Pablo, jai judíovi nacuaevetsinëjavabelia.

¹⁰ Nacuaevetsinë Félix nacobeyota juya Pablo pitorobinexatsi Pablo jane baja penavajunupaebinexa nacuaevetsinë Félix pitabarata. Nexata Pablo jumaitsi nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabiabijava. Bajaraxuata barëyanë tacatsipaebinexa

xua exanajë. ¹¹ Nexata taxaniajajumeta catsipaebianatsi. Itsa yanijobijitsipame itsamonaevjavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota. ¹² Bajarapatemplobota judíovi apo netae tabarëcuaicuajijajava itsajivi ata. Apo netaenua judíovi penacaetuatabibonëjajava jivi taitorobijava pianaepanaenexa. Apo netaenua tomananëjajava ata taitorobijava jivi pianaepanaenexa. ¹³ Nexata acuenebi itsajivi ata pejumaitisijava xanë yabara: “Xanë raja pepacuene taniji xua Pablo exana,” pejajava. Tsipaji itsajivi ata apo netae pibisiacuene taexanaejava. ¹⁴ Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneta Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajilivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaponaponajë. Bajayata Diosojumepaebivi profetavi peyaquinaelivaisianë ata jumecovënëtajë. ¹⁵ Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonaë tëpa, pexaniajamatabëcuenevimi, pibisiajamatabëcuenevimi ata, itsamatacabi icatsia Dioso asaëyaexanaena. ¹⁶ Bajaraxuata bitso jitsipajë xaniavaetsia taponaponaejajava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxitajivi ata pitabarata, jai Pablo nacuaevetsinë Félixjavabelia.

¹⁷ Icatsia Pablo jumaitsi nacuaevetsinë Félixjavabelia:

—Caevaimaxëto baja cajena ajibinë tsarucae Jerusalén tomarave-cua Dioso pitorobilivaisi jivi tatsipaebinxaxa daxitanacuanëjajava. Bajaraxuacujinae icatsia naviatajë Jerusalén tomarabelia. Tocapaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. ¹⁸ Itsa baja veretajë templobota tanajamatabëcuenexaniavaetsijajava Diosojavabelia tajamatabëcuenesaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yãijai. Templobopijivi ajumejibia jinavanapa. ¹⁹ Bajara baitsi jane pamonaë judíovi, Asiavënë nacuapijivi, tanetaevi templobota, bepatsirena maberena je taneneconitsinexa jane baja itsa necuene tane pibisiacuene taexanaejajava. ²⁰ Itsa jume, nexata mapamonaëje, nitabarata penubenaevi, vecae taitabëta catsipaebi, itsa netane pibisiacuene taexanaejajava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ²¹ Saya meta caelivaisiyo bajarapamonaë catsipaebiana xanë talivaisi. Tsipaji pamatacabi nucajë judíovi pijaancianovi pitabarata, ayajumeta jumaitsinë: “Mapamatacabitaje neneconitsiana. Tsipaji jivi petëpaecujinae Dioso

icatsia piasaēyaxanaejavanexa, jumecovēnētajē,” janē. Nexata meta bajarapacuenia tajumaitisijava yabara bajarapamonae jamatabēneneconita xamējavabelia, jai Pablo nacuaevetsinē Félixjavabelia.

²² Nacuaevetsinē Félix xaniavaetsia yapētane daxitanacuanējava jivi pejumecovēnētaeponaejava Jesucristo pelivaisi. Nexata nacuaevetsinē Félix pejumetaecujinae Pablo petsipaebilivaisi, nacuaevetsinē Félix naviabiaexana baja pamonae picani Pablo neconitsijitsiatsi. Nexata nacuaevetsinē Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaē pepo pevetsinē, comandante Lisias, yapētaenajē pacuenia exanaejitsianē Pablojavabelia, jai.

²³ Nexata nacuaevetsinē Félix jumaitsi vajabitsaē pijacapitánjavabelia:

—Pablo barēevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacētsinejevamē. Tocopatsianamenua peyapētaevitsi pesivaxainaenexatsi perajutsinexatsinua penamatavenonaejavaxi, jai nacuaevetsinē Félix vajabitsaē pijacapitánjavabelia.

²⁴ Bajaraxuacujinae, caematacabibejecujinae, nacuaevetsinē Félix icatsia pata pijava yajava, Drusilavēnēva. Drusila judíova. Nexata nacuaevetsinē Félix itoroba pijajivitonē petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinē Félixjavabelia. Pablo tsipaeba jivi penajamatabēcuenecopabaponaejava Jesucristojavabelia. ²⁵ Pablo tsipaebanua Dioso pitorobijava jivi pejinavanapaenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevetsinē Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevetsinē Félix jumaitsi Pablojavabelia:

—Pitsapare baja abaxē. Icatsia cajunatsianatsi itsajota cuenesajinajē, jai nacuaevetsinē Félix.

²⁶ Nacuaevetsinē Félix jamatabējumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabējai.

Bajaraxuata Félix anijatonē pijajivi itorobabiaba Pablo petojunatsinexatsi pebarēcuaicuaijainexatsi. ²⁷ Anijavaibeje bajarapacuenia Félix pijajivi itorobabiaba Pablo petojunatabiabinexatsi. Belia baja Félix vecuapitsapa nacua pevetsicuene. Nexata juya itsanē, Porcio Festovēnēnē, tocopatatsi bajarapanacua pevetsinexa. Félix baja pitsapae ata, itsiata Félix pejamatabēcueneta Pablo apo tocopatsitsi pepitsapaenexa penaneconitsijavavecua. Bajarapacuenia Félix exana judíovi pesivajamatabēcueneta barēyanexatsi.

25

Pacuenia Pablo navajunupaeba pejananacuaevetsinē Festo pitabarata yabara pelivaisi

¹ Festo patajopa Cesarea tomarata pexanaenexatsi nacuaevetsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia. ² Nexata Jerusalén tomaratalia sacerdotevi penamatacaitorobivi Pablo

neconitatsi pepëya nacuaevevtsinë Festojavabelia. Neconitatsinua judíovi ata, pamonaē petuxanevi. ³ Bajarapamonaē pinijicuenia vajëta nacuaevevtsinë Festojavabelia petocapatsinexatsirena Pablo Jerusalén tomaraberena. Bajarapacuenia vajëta tsipaji baja cajena bajarapamonaē najamatabëcuenevereta picani Pablo pebeyaxuabiaexanaenexatsi namutoepatota. ⁴ Nexata nacuaevevtsinë Festo jumaitsi bajarapamonaējavabelia:

—Pablo raja naneconitsia ponapona Cesarea tomarata. Xanë raja caematacabibejecujinaē ponaejitsianë Cesarea tomarabelia. ⁵ Pablo pibisiacuene itsa exana, nexata papecanamatacaitorobivi tapëta napon-aena Cesarea tomarabelia peneconitsinexa Pablo, jai nacuaevevtsinë Festo bajarapamonaējavabelia.

⁶ Bajarapacuenia nacuaevevtsinë Festo pejumaitsicujinaē, nacuaevevtsinë Festo abaxë ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinaē pona jane baja Cesarea tomarabelia. Nexata meravia pitsijavata nacuaevevtsinë Festo eca itsajota nacuaevevtsinë ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsënëtsiaya neconitatsi beayaineconi pexainaenëcuenia. Itsiata baitsi jane xua yabara picani Pablo neconitatsi picani, bajarapamonaē apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenë. Nexata xanë judíovi pitorobilivaisijavabelia, templobojavabelia ata, Romanonacua pepo pevetsinëjavabelia ata, apo naneconitsinë, jai Pablo nacuaevevtsinë Festojavabelia.

⁹ Nexata nacuaevevtsinë Festo yanijoba Pablojavabelia judíovi pejamatabëcuenebarëyanexa nacuaevevtsinë Festojavabelia. Nacuaevevtsinë Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevevtsinë Festo Pablojavabelia.

¹⁰ Pablo nexata jumaitsi:

—Nucajë rabaja majotaje xamë nitabarata. Tsipaji nijatuxanenë, Romanonacua pepo pevetsinë, itoroba majotaje peneconitsinexatsi pibisiacuene pexanaevi. Bajaraxuata apo beneitorobimë itsajavabelia taneneconitsinexamë. Itsacuene ata pibisiacuene apo exanaenë judíovijavabelia. Bajarapacuenia xamë xaniavaetsia yapëtaneme baja cajena. ¹¹ Itsa pepacuene naneconitsipajë, nexata itsa nebeyaxuabijitsia tajaneconi yabara, nexata apo najamatabëxainanë tsipae tavecuapanepaenexa tatëpaejava. Itsiata baitsi jane pacuenia mapamonaē neneconitsijumaitsiye, apo xaniajai cajena. Nexata acuenebi itsajivi ata tanecanajetsijava mapamonaē pecobeyabeliaje saya aneconijibia tanebeyaxuabinexa. Nexata jane baja xanë cavajëtatsi taneitorobinexamë nijatuxanenëjavabelia, Romanonacua pepo pevetsinëjavabelia, bajaraponë pitabarata taneneconitsinexa, jai Pablo nacuaevevtsinë Festojavabelia.

¹² Nexata nacuaevetsinē Festo barēcuaicuajjai pijajivi, pejamatabēcueneyavenonaevitsi. Bajaraxuacujinae nacuaevetsinē Festo jumaiṣi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevetsinē Festo Pablojavabelia.

Pacuenia Pablo navajunupaeba nacuaevetsinē Agripajavabelia yabara pelivaiṣi

¹³ Pablo pevajētsicujinae nacuaevetsinē Festojavabelia pitorobinexatsi Romanonacua pepo pevetsinējavabelia, caematacabibejucujinae, nacuaevetsinē Agripa, pijava Berenicevēnēva yajava, parena Cesarea tomaraberena. Parenabeje pebajacobinexabeje nacuaevetsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevetsinē Festo tsipaeba nacuaevetsinē Agripajavabelia Pablo yabara. Nacuaevetsinē Festo jumaiṣi:

—Majotaje xainajē pebi naneconitsia peponaponanē. Félix abaxē mapanacua itsa evetaje, bajaraponē naneconitsiaexanatsi. ¹⁵ Nexata itsa ponajē Jerusalēn tomarabelia, sacerdotēvi penamatacitorobi, judíoivi pijaancianovinua, neconitatsi Pablo xanējavaberena. Bajarapamonae nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaiṣinē bajarapamonaejavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuajjainexa paneconi yabara neconitatsi,” janē bajarapamonaejavabelia, jai nacuaevetsinē Festo nacuaevetsinē Agripajavabelia.

¹⁷ Icatsia nacuaevetsinē Festo jumaiṣi nacuaevetsinē Agripajavabelia:

—Nexata bajarapajudíoivi maberena pepatsicujinaeje, meravia pitsijavata, copiaya joneyajē taecaenexa itsajota ecabiabajē jivi itsa naneconitsiaexanaejitsianē. Nexata itorobajē tajajivi tanetocapatsinexa Pablo xanējavaberena. Tsipaji jamatabējumaiṣinē: “Pablo meta pibisiacuene pexanaexae, neconitatsi,” jamatabējanē. ¹⁸ Itsiata baiṣi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabēxainajē. ¹⁹ Saya judíoivi jumeanaenotatsi Pablo Dioso pejumecovēnētsijava yabara. Jumeanaenotatsinua Pablo petsipaebijava Jesús petēpaejava yabara ata. Jesús yabara Pablo jumaiṣi: “Jesús raja apo tēpae. Petēpaeucujinae baja icatsia Dioso asaēyaexanatsi,” jai Pablo bajarapajudíoivijavabelia. ²⁰ Nexata xaniavaetsia apo yapētaenē pacuenia exanaejitsianē bajarapacuene yabara. Nexata jumaiṣinē Pablojavabelia: “Jitsipame tsaja neponaejava Jerusalēn tomarabelia, bajarajotalia icatsia pecaneconitsinexa pamonae caneonita,” janē picani. ²¹ Itsiata baiṣi jane Pablo nevajēta taitorobinexa picani vajatuxanenēbejejavabelia, Romanonacua pepo pevetsinējavabelia, bajaraponē pitabarata peneconitsinexatsi, pibisiacuene itsa exana Pablo. Itsiata

abaxë xanë mapatomarataje Pablo naneconitsiaya ponaponaeyaex-anajë. Nexata pamatacabi necuenecaëjëpaena, itorobianajë vajatux-anenëbejêjavabelia, jai nacuaevetsinë Festo nacuaevetsinë Agripajavabelia.

²² Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:
—Meravia rabaja jumetaename Pablo penavajunupaebijava, jai nacuaevetsinë Festo.

²³ Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavaliala barëjoneyabeje. Nexata nacuaevetsinë Festo pijajivi itoroba petocaponaenexatsirena Pablo. ²⁴ Nexata nacuaevetsinë Festo jumaitsi nacuaevetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje vajanajua-nacaetuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaë tapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonaë vavajaiya nejumai tsabiabi: “Pajitsipajë Pablo pebexuabinexatsi,” nejai tsabiabi. ²⁵ Itsiata baitsi jane xanë apo yapëtaenë paneconi yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorobijitsianë Romanonacua pepo pevetsinëjavabelia. ²⁶ Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonaë ataje, daxita paxamë paneitabarata Pablo penucaenexa pacatocapatatsi maberenaë. Pacatocapatatsi paneyanijobinexa paneconi yabara naneconita. Nexata meta paneyanijobinexa xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia. ²⁷ Tsipaji acuenebi taitorobijava maponëje Pablo tajatuxanenëjavabelia toyaquinaenejevanë cuyalato xaniavaetsia peyapëtaenexa paneconi yabara judíovi neconitsijitsiatsi, jai nacuaevetsinë Festo nacuaevetsinë Agripajavabelia.

26

Pacuenia Pablo navajunupaeba nacuaevetsinë Agripa pitabarata yabara pelivaisi

¹ Nacuaevetsinë Agripa jumaitsi Pablojavabelia:

—Catocopatatsi rabaja nenavajunupaebinexa paneconi yabara judíovi caneconita, jai nacuaevetsinë Agripa Pablojavabelia.

Nexata Pablo yayiataeya bajacoba nacuaevetsinë Agripa. Nexata Pablo jumaitsi nacuaevetsinë Agripajavabelia mapacueniaëje:

² —Barëyanë. Tspaji ajena pamatacabi netocopatame nitabarata tanavajunupaebinea daxita paneconi yabara judíovi neneconitsijitsia. ³ Aeconoxaeta bitso barëyanë. Tspaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi

⁴ Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamona neyapëtane pacuenia ponaponajë patajanacuata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata. ⁵ Judíoviyajuvënëvi itsamona naexana fariseovi. Nexata bajarapamona Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata itsa yanijobijitsipame, daxita judíovi catsipaebi-jitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene. ⁶ Bajarapamona neneconitsijitsia tspaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tspaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë. ⁷ Daxita raja paxanë, Israelpijinëmi pexi doce ponëmibeje papemomoxinë. Pacopiaevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuenecopatsiaya pavajëtabiabajë Diosojavabelia. Patonacuenebavanapajënu caematacabi canacujitsia, meravijayava. Agripa, nacua nevettsinë, abaxë nenamuxunaevere. Dioso icatsia petëpaevimi piasaëyaexanaejavanexa, copiaevetaponaponajë. Bajaraxuata judíovi neneconitsijitsia. ⁸ Pëtsa pajamatabëjumaitsimë Dioso yabara: “Dioso raja apo caëjëpaetsi petëpaevi icatsia piasaëyaexanaenexa,” pajamatabëjamë pëtsa, jai Pablo bajarapamonaejavabelia.

Pacuenia Pablo navajunupaeba petaicaponaejava Jesús pejumecovënëtsivi pejebinea penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinë Agripajavabelia:

—Xanë abaxë Jesús itsa apo jumecovënëtsinë, jamatabëjumaittsinë tsabiabi: “Xanë bejiobiaexanaenajë daxita pamona jumecovënëta Jesús, Nazaret tomarapijinë, pelivaisi,” jamatabëjanë tsabiabi. ¹⁰ Nexata bajarapacuenia exanajë Jerusalén tomarata. Sacerdotevi penamatacaitorobivi taneitorobixae, ayaibitsaëto Jesús pelivaisi pejumecovënëtsivi jebaponajë penaneconitsivi pejebabiabibota. Itsa bajarapamona naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. ¹¹ Pamona Jesús pelivaisi jumecovënëta, anijatonë jumaconibabeyaexanabiabajë judíovi penacaeuatabiabibonëjava. Bajarapacuenia picani exanaponajë bajarapamona pecopabinexa Jesús pelivaisi pejumecovënëtsijava. Xanë picani cuenitoyanë bajarapamona. Nexata itsanacuajava penaetomaranëjava ata, jaitarutajë Jesús pelivaisi pejumecovënëtsivi

tataicaenexa tajebinexa penaneconitsivi pejebabiabibota, jai Pablo nacuaevevtsinē Agripajavabelia.

Pacuenia icatsia Pablo navajunupaeba pacuenia Jesús pelivaisi jume-covēnēta yabara pelivaisi

(Hch 9.1-19; 22.6-16)

¹² Pablo icatsia jumaitsi nacuaevevtsinē Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovēnētsivi, ponajē picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabēcueneta nitoroba tataicaenexa picani Jesús pelivaisi pejumecovēnētsivi tajebinexa penaneconitsivi pejebabiabibota. ¹³ Agripa, nacua nevetsinē, abaxē nenamuxunaevere. Nexata jane baja ponajē Damasco tomarabelia. Nexata tanajetarucaejavata namutua, taniji matonejeepatota athēbēvetsica pinijicotia tanematatoyorotsianaitayotsijava. Naitayota matabipijiuametocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota. ¹⁴ Nexata daxita paxanē irata pabobenajunuajē. Bajarajota irata jumetaenucajē hebreojumeta athēbēvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamē nijacuata najamatabēcuenebijianaponame.” tanejajjava, jumetaenucajē irata. ¹⁵ Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesúsne. Xanē raja tajajivi netobejiobiaexanaponame. ¹⁶ Nonotabapunare. Catsitanaitajētatsi raja tacaitapetsinexa tajajivitonēnexamē. Xamē nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajētsianatsi hexēa itsamatabijavabelia. ¹⁷ Cacapanepaenatsi raja judíovi pecobevecua pecaitsacueniabiyanima. Caitorobianatsi apo judíovi pijanacuanējavabelia. Apo judíovi ata pecobevecua cacapanepaenatsi pecaitsacueniabiyanima. ¹⁸ Caitorobatsi rabaja netsipaebinexa apo judíovijavabelia pexanialivaisi, xanē talivaisi. Nexata apo judíovi ata najamatabēcuene pēnēyorotsiaexanaename Diosojavabelia. Nexata Dioso pexaniajailivaisita apo judíovi ata jamatabēcueneitayotsianatsi piaitaquirijamatabēcuenevecua, dovathi pejamatabēcuene itorobabiabijavatsivecua. Nexata apo judíovi ata talivaisi jumecovēnētsiana. Nexata bajarapamonae pibisiacuene pexanaeneconimi, Dioso vecuaajibiaexanaenatsi itsa jumecovēnētsiana talivaisi. Nexata apo judíovi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumeconivētsivi Dioso vecuaajibiaexanatsi pibisiacuene pexanaeconimi.” nejai Jesús mapacueniajē athēbēvetsica, jai Pablo nacuaevevtsinē Agripajavabelia.

Pacuenia Pablo navajunupaeba pacuenia jumecovēnēta Jesús pitoro-bicueniatsi yabara pelivaisi

¹⁹ Icatsia Pablo jumaitsi nacuaevevtsinē Agripajavabelia:

—Agripa, nacua nevetsinē, abaxē nenamuxunaevere. Nexata pacuenia Jesús athēbēvetsica nejumaitsi, jumecovēnētajē baja cajena. ²⁰ Copiata Jesús pelivaisi tsipaebaponajē Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajē apo judíovijavabelia ata. Nexata itorobajē daxita bajarapamonae pecopabinexa pibisiacuene

pexanabiabijava penajamatabëcuenepënyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniva. Nexata baja bajarapacuenia ita jinavanapa, daxitajivi yapëtanetsi pepacuene penajamatabëcuenepënyorotsijava Diosojavabelia. ²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxu-abinexa picani. ²² Itsiata baitsi jane neyjavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi ita tsipaebabiabajë, tsipaebabiabajë bepejibivijavabelia, pepo petuxanevijavabelia ata. Nexata daxita bajarapamonae najëpaea tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaiti, tsipaebabiabajë. Bajayata baja cajena profetavimi Cristo yabara jumaiti mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso ita asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso ita asaëyaexanatsi petëpaecujinae, namataxainaeya jane baja asaëyaexanatsi daxita petëpaevivecua. Nexata pamona Dioso pepuajumecovënëtsi tëpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamonae ita jumecovënëta bajarapalivaisi, pecapanepaenexatsi Diosojavabelia, jai Pablo nacuaevetsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai nacuaevetsinë Festo.

²⁵ Pablo nexata jumaiti:

—Festo, pecayiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë, xamë baja cajena jumecovënëtame profetavi bajayata peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevetsinë Agripajavabelia.

²⁸ Nexata nacuaevetsinë Agripa jumaiti Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevetsinë Agripa.

²⁹ Nexata Pablo jumaiti:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa.

Daxita paxamē patanejumetaeayenaevimē, jitsipajē panejume-covēnētsijava Jesús pelivaisi. Pacuenia baja xanē jamatabēcueneitsinē, Jesús pelivaisi tajumecovēnētsinē, bajara paxamē ata panejamatabēcueneitsinexa. Itsiata apo pacatojitsipaetsi papecacēbinexa mapitsicadenamaētonētaje pacuenia xanē necētanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevetsinē Festo nonotapuna. Nacuaevetsinē Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. ³¹ Pepitsapaecujinaelia bajarapamonae najumaitsi:

—Maponēje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

³² Nacuaevetsinē Agripa jumaitsi nacuaevetsinē Festojavabelia:

—Itsa apo cavajētsi tsipae nitorobinexa vajatuxanenēbejējavabelia, Romanonacua pepo pevetsinējavabelia, bajaraponē pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevetsinē Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaevetsinē Festobana najamatabēcuenevereta baja pitorobinexatsi Pablo Italia nacuyabelia, Romanonacua pepo pevetsinējavabelia. Nexata Pablo caponaejitsiatsi vajabitsaē pijacapitán, Juliovenēnē. Itsamonaē naneconitsia pejinavanapaevi, Pablo yajava, caponaejitsiatsi. Ponē Romanonacua pepo pevetsinē, bajaraponē pevēnē Augusto. Nexata Augusto pijajivi vajabitsaē pijacapitánmonaeyajuvēnēnē Julio. ² Xanē Lucasnē, naponajē Pablota. Adramitio tomaraverena pepatsibarco ēnēabereca parunarecajē. Bajarapamo yaētanajetarucaejiatsia manuamene muxubērēa penaetomaranējava, pepatsinexa Asiavēnē nacuyabelia. Payajavaponajēbeje Aristarco, Tesalónica tomarapijinē. Tesalónicatomara eca Macedonia nacuata. ³ Meravia pitsijavata epatua panapatajē Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoēnēvecua, penasivaxainaenexa peyapētaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajē Sidón tomaravecua. Nexata patavajēnaeverena jovibo najetaruca. Nexata Chipretunaeto pacujibaliajē bajarapatunaeto muxubērēa patana-jetarubenaenexa. Nexata Chipretunaeto patatsavenononia paxentanajetarubena-jē. Tshipaji bajarapamuxubērēvelia jovibo beyajetayo. ⁵ Cilicia nacuabeje Panfilia nacuabeje canacujitsialia papaliajē. Nexata payaētajē Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuyabelia. Nexata baja pabarcota pananajetarubena-jē, pavecuanonobajuna-jē. Nexata icatsia capitán Julio panerunaeyaenexa Alejandría tomaraverena pepatsibarco ēnēabelia. ⁷ Anijamatacabianē bajarapabarcota

pananajetarubenajë. Tshipaji beaxayo najetaruca. Pinijicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tshipaji bajarapaitapavelia jovibo beyajetayo. ⁸ Piayapëbejecuenia panajetarubenajë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecuapanepapona baja. Nexata baja bitso panetsiyai menia pataponaeenexa. Tshipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniaje:

—Xanë raja yapëtaniji nacatsiyai baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitsideje barco pexainaenë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaeenexa. Jitsipa picani Cretatunaeto muxubërëa patanajetarubenaenexa, itsa cuencaëjëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tshipaji bajarapatotsotojava apo joneyabiabi jovibo.

Pacuenia pinijijoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa peponaeenexa pevajënaeyabelia. Nexata bajarapapatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caeepatoyocujinae pinijijoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyaponaenexa jovibo. ¹⁶ Paponajë tsiquiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae

copata baja itsabelia jovibo pona, barco pataneyacaponae nexa jovibota.¹⁸ Meravia abaxë pitsijavata tsiteca pinijjovibo piayaijava. Nexata bajarapamona barcoënëta pecaponae javanë, menia yajuvënë penereca barco pefafanaenexa.¹⁹ Bajaraxuacujinae icatsia meravia pitsijavata bajarapamona menia penereca barcoënëta pecanacuenebijavanë.²⁰ Bajayajebi baja cajena apo pataenë matcabipijjuameto, tulupu ata. Tsipaji bajayajebi pinijjovibo, ema yajava, tsitecanuca. Belia pajamatabë jumaitsinë: “Apo yapanepaetsi meta baja tsane,” pajamatabë janë.

²¹ Pamatacabibeje bajarapacuenae pataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamona petuatujëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberena je apo yaponae tsipaetsi Cretatunaetovecua. Apo bejiobitsinua tsipae.²² Itsiata baitsi jane aeconoxae pëtsa panatsinajamatabë xainame. Itsajivi ata raja paxamë yajuvënë jivi itsiata apo tēpae tsane. Ë barco rajane baja naxuabiana.²³ Ajena baja cajena, pameravi, netsitanaitajëta ángel, Dioso pitorobinëtsica. Bajarapa Dioso xanë pijajivitonënë. Bajarapa Dioso tonacuenebaponaponajë.²⁴ Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petēpaeyaniva daxita pamona yajavanajetarucame mapabarco-taje,” nejai ángel.²⁵ Nexata daxita paxamë panajamatabëcuenesaëre panajamatabëcuenebë jaijavavecua. Najamatabë rutajë Dioso javabelia vajanacapanepaenexa Dioso. Yapëtaniji Dioso vajanacapanepaejavanexa pacuenia baja ángel netsipaeba.²⁶ Itsiata baitsi jane cajena jovibo nacayacaponae itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacaponae Adriavënë manuamenejava. Nexata meravi tuatujëta barcota penacuenebivi jamatabë jumaitsi:

—Pitapayabelia covë payapataponajë, jamatabë jai.

²⁸ Nexata bajarapamona pemaëtota caëjëtaponae xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca.²⁹ Nexata barcota penacuenebivi jamatabë jumaitsi:

—Barco meta payanayaëto jopae najë ibotojumata, jamatabë jai.

Nexata bajarapamona barco petabufevetsina, cuatro xuabeje anclavënë javanë, yamaëya copabareca. Nexata anclavënë javanë menebëxë pana irabelia itsa vaetaba, barco perucojopae nexa. Bajarapamona picani bitso jitsipa bepíjia peyamatacabibijavatsi, penatsivajënae taenajetarubenaenexa.³⁰ Nexata bajarapaepatota bajarapamona picani bitso jitsipa epamona penonobajunaenexa barcovecua pepanepaenexa. Nexata bajarapamona penajuaponaevijavabelia yamaxë itojorobiaya jumaitsi:

—Icacia raja pacopabijitsianëreca itsaanclavananë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capitan pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pavajabitsaëmë panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatabibije xaniavaetsia apo pamajitsimë. Panexaejava ata apo paxaemë. ³⁴ Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitsijavata, panbë pita. Panbë yabara Pablo pexaniajatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava. ³⁶ Daxita nexata bajarajota ajatabëcuenesaëreca baja. Nexata bajarapamonae ata xane pexaejava. ³⁷ Doscientos setenta y seis papajivinëbeje daxitata paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matabi tsarucapona, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najatabëxaina peyaëtsinexa barco bajarapatajetabojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanuae. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecua-panepaeyanivatsi pejuejavata. ⁴³ Itsiata vajabitsaë pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonae yapëtane pejuejava, copiaya pejuenexa pitapayabelia copiaya pepatsinexa matatsënëabelia. ⁴⁴ Bajaraxuacujinae pamonae apo yapëtae pejuejava, cotocaevi itoroba tablapanëjumata, barcopanëmijumatana, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetojavata yabara pelivaisi

¹ Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta

vënētunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanuca. Nexata bitso cainejeba. Panejunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenē, bebula, pitsatabijirava isotojavaverena piatajujavavecua. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponē jivibenēje. Bajaraxuata manuamene vecuapanepae ata, icatsia Dioso tocopatatsi jomo pesininxatsi. Nexata jivi pebejamatabēcuene, jomo pesinijavatsi peyatēpaenexa, najai Maltatunaetopijivi Pablo yabara.

⁵ Nexata Pablo nacobenēnēbiaxuaba jomo pejopaenexa isotojavabelia. Pablo itsiata apo itsacuene. ⁶ Nexata daxita Maltatunaetopijivi jamatabējumaitsi Pablo yabara:

—Aeconoxae meta Pablo cobeyajinaena. Itsa jume, irata meta petēpaenē jopaena, jamatabējai.

Nexata bajarapamonae bajayaepato evetanubenaē ata Pablo petaenexatsi jomo pecobesinijavatsi peyaitsacuenejava, itsiata Pablo apo itsacuene. Nexata icatsia bajarapamonae itsacuenia najamatabēxaina Pablo yabara. Nexata najumaitsi bajarapamonae:

—¡Maraeta papebi diosonēje! najai.

⁷ Maltatunaeto pevetsinē pevēnē Publio. Nexata itsajota panubenajē, imoxoyo bobena Publio pijairanē. Nexata bajaraponē panecopiapita pexaniacuenia. Bajaraponē pijabota panajinavanapajē acueyabi pamatacabibeje. ⁸ Publio paxa avitane tsanucaē camata. Romaebanucatsi. Bitso suliabatsi. Nexata Pablo taeyojopalia. Vajēta Diosojavabelia. Bajaraxuacujinae piavitanenē pematabocotojumavereca Pablo nacobebuata. Nexata baja Pablo jamatejemayaexana piavitanenēmi. ⁹ Bajarapacuene Pablo itsa exana, nexata daxita piavitanēvi Maltatunaetopijivi pata Pablojavaverena. Daxita bajarapamonae ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexēajavabelia itsabarcota panaponajē, nexata Maltatunaetopijivi panerajuta daxita patanamatavenonaējavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vënētunaetota panajinavanapajē acueyabi pajuametobeje. Bajaraxuacujinae baja icatsia panaponajē barcota. Bajarapabarcopatavajēnae pata Alejandría tomaraverena. Bajarapamo Maltatunaetototsotota daxita emarapae ruca. Evetaruca emarapaejuame-tonē pepanepaejava. Bajarapabarcoupita rucabeje jivi saya pecobeta jumapecataeya pexanaenēbeje. Cástorbeje Póluxbeje jumapecataeya jivi pecobeta pexanaenēbeje bediosonēbeje petaenexa. ¹² Bajarapabarcota panaponajē. Nexata jane baja panapatajē Italia nacuyabelia. Panapatajē Siracusa tomarata. Siracusa tomarata abaxē panajinavanapajē acueyabi pamatacabibeje. ¹³ Bajaraxuacujinae icatsia panaropobajē. Paponajē manuamene muxubērēa. Nexata icatsia papatajē Regio tomarata. Nexata meravia pitsijavata patacovēverena pexaniajovibo najetaruca. Nexata bajarapajovibo paneyacapona patavajēnaeyabelia. Nexata icatsia anijamatacabibejecujinae papatajē Puteolí tomarata.

¹⁴ Puteoli tomarata pacaxitajarabajë Dioso pejumecovënëtsivi. Bajarapamonae paneasiva caesemana patanajinavanapaenexa bajarapamonaejavata. Bajaraxuacujinae jane baja matatsënëa paponajë Roma tomarabelia. ¹⁵ Roma tomarapijivi, Dioso pejumecovënëtsivi, patavjënælia panevënëlivisitane patanajetarubenaejava. Nexata bajarapamonae panecopiajairena. Nexata penamataxainaebitsaëto panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata. ¹⁶ Nexata jane baja papatajë Roma tomarabelia. Nexata Roma tomarata capitán Julio rajuta baja pamonaenaneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinë pecobeyabelia. Itsiata Pablo tocopatatsi saicayabota peponaponaeenexa. Caenë vajabitsaënë evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacuene apo exanae atanë vajavëna judíovijavabelia, vajasalinaivi pecujarubicuene jumecovënëtsiaponaponae atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuene pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tshipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia. ¹⁹ Itsiata baitsi jane vajavëna judíovi, pamonaenaneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maberena Romanonacua pepo pevetsinë pitabarata taneneconitsinexa pibisiacuene itsa exanajë. Itsiata xanë apo jitsipaenë juya bajarapamonae taneconitsijava tajanacuapijivijavabelia. ²⁰ Bajaraxuata nexata pacajunatatsi patacataenexa patacabarëcuaiquaijainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsipajë patanetsipaebinexamë pacuenia Jesús pelivaisi jumecovënëtime. Daxitanacuanëpijivi baja cajena baracuaicuai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai

tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi caëjêta matacabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëttoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaiti Dioso Moiséspijinêta penajumecopatsilivaisi Jesús yabara. Pablo tsipaebanua pacuenia jumaiti Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. ²⁴ Itsamonae bajarapamonaeayajuvënëvi jumecovënêta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaiti bajarapamonaejavabelia mapacueniaje:

—Bajayata baja cajena profeta Isaíaspijinê Espíritu Santo pejamatabëcueneta tajêvelia yapêtaeyaexanatsi paxamê apo panejumecovënëtsijavanexa Jesús pelivaisi. Nexata profeta Isaíaspijinê Espíritu Santo itorobatsi petsipaebinexa vajasalinaivimijavabelia mapacueniaje:

Paxamê raja picani pajumetaeyabiabianame palivaisi pacatsipaebabiabiana. Itsiata apo pajumeyapêtaemê tsane xua yabara bajarapalivaisi pacatsipaebabiabiana. Paxamê raja picani pataeyabiabianame xua pacatsitaexanabiabiana. Itsiata apo payapêtaemê tsane pajamatabëcuene yabara bajaraxua pacatsitaexanabiabiana,

jai profeta Isaíaspijinê vajasalinaivimijavabelia.

²⁷ Bajarapacuenia jumaiti profeta Isaíaspijinê tsipaji baja cajena Dioso tajêvelia jumaiti paxamê apo panejumecovënëtsijavanexa yabara mapacueniaje:

Bajarapamonae ajamatabëcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapêtaejitsipa pajamatabëcuene yabara tsitaexanatsi xua tane. Jumeyapêtaejitsipana palivaisi tsipaebatsi. Pejamatabëëthêtojavavetsina jumeyapêtaejitsipa. Nexata najamatabëcuenepênëyorotsipa perujumatabëcuenevecua. Nexata xanê jamatabëcuene xanepanaeyaexanaejitsipajê pibisiacuenevecua,

jai baja cajena Dioso bajayata tajêvelia paxamê apo panejumecovënëtsijavanexa yabara, jai Pablo judíovijavabelia Roma tomarata.

²⁸ Pablo icatsia jumaiti judíovijavabelia:

—Pajudíovimê, pajumeyapêtaema mapalivaisije. Ajena baja mapamatcabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuaicuaijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamona sivaxainabiabatsi. ³¹ Pamona Pablo sivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi ita yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi.

³ Bajarapalivaisi vajatuxanenë Jesucristo, Dioso pexënato pelivaisi. Jesucristo ita naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacua pepo pevetsinëmi. ⁴ Vajatuxanenë Jesucristo petëpaecujinae, Espiritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënato cuene. Yapëtanetsinua piasaënëcuene ata. ⁵ Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonae apo judíovijava, apo judíovi ata pejumecovënëtsinexa Dioso. ⁶ Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinexamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenenëbarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajunupaeba xaniavaetsia panejumecovënëtavanapaejava Dioso. ⁹ Xanë daxita tajamatabëcuenesaëta Dioso pijacuene tonacuenebaponaponajë jivi ita tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava ita pacanajamatabënapitabiabatsi tavajëtsijavata Diosojavabelia. ¹⁰ Vajëtabiabajë Diosojavabelia taponenexa paxamëjavabelia. Nexata Dioso ita netocopatsiana taponenexa, ponaenajë paxamëjavabelia. Bajayajebi picani bitso jamatabëponabiabajë patacataenexa. ¹¹ Nexata jitsipajë patacataenexa, patacatsipaebinexanua palivaisi Espiritu Santo neyapëtaeyaexana.

Bajarapacuenia itsa pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. ¹² Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi paneajamatabëcuenesaënexa Diosojavabelia. Paxamë ata juya paneyavenonaename bajarapacuenia.

¹³ Tajamona, pacatojitsipatsi paneyapëtaenexa mapacueneye. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponaeenexa. Jitsipajë patacatsipaebinexa Jesucristo pelivaisi paxamëyajuvënëvi, pamona abaxë apo jumecovënëtsi, pejumecovënëtsinexa Jesucristo. Pamona atajaja jumecovënëta, Jesucristo pajamatabëcuenesaënexa pevajënaeyabelia. Pacuenia apo judíovi atajaja jumecovënëta pona pevajënaeyabelia itsaxuayo tsipaebanajetarucajë, bajara paneitsinexa paxamë ata. ¹⁴ Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyaëtaevijava ata, apo peyapëtaevijava ata. ¹⁵ Bajaraxuata bitso jitsipajë paxamë, Roma tomarata panejinavanapaevi ata, patacatsipaebinexa pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaiyuene pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponajë bajarapalivaisi judíovi. Bajaraxuacujinae icatsia cotocaevi patsipaebaponajë apo judíovi. ¹⁷ Bajarapalivaisi nacayapëtaeyaexana pacuenia Dioso naca-toxana aneconijibia Dioso vajanacataenexa. Aneconijibia baja Dioso nacatane Jesucristojavabelia vajavajënaeyabelia vajanajamatabëcuene copataponaexae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanë pepacuenene Dioso neyavenonaena pacuenia najumecapanepaeya jumaitsi,’ jamatabëjai, bajarapajivi Dioso aneconijibia tanetsi. Bajarapajivi xainaena matakabi pevereverecajava,” jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëtatsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bajarapamona pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. ¹⁹ Bajarapamona xaniavaetsia beyapëtanetane picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaevijavabelia. ²⁰ Jivi apo caëjëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatakabijavabelianexa Dioso bitso piasaëtsaponaponaevijava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaevijavanë mapanacuataje. Nexata bajarapamona acuenebi pejumaitsinexa: “Apo payapëtaenë

cajena pacuenia Dioso jamatabëcueneitsi,” pejoinexa. ²¹ Bajarapamonae yapëtae ata Dioso peponaponaejava, itsiata apo yayatae. Caeto ata cajena Diosojavelia pexaniajamatabëcuene apo rajutsi. “Pexaniacuene rabaja panetoexaname,” apo jai. Biji saya caranata ënatsiquejemajava yabara najamatabëxainabiaba. Nexata pevajënaeyavelia apo peyapëtaexae pexanalivaisi, ajamatabëcueneitaquiri tsaponae. ²² Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baitsi jane cajena apo yapëtae. ²³ Bajarapamonae apo najamatabëcuenecopabi ayaijamatabëcuenenë Diosojavelia, ponë apo petëpaenënexa daxitamatacabijavelianexa. Caranata saya jivi pecobeta jumapecataeya pexanaenëanëjavavelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavavelia. Navajëcabiabanua itsamonae pecobeta pepunaevi jumapecataeya pexanaenëanëjavavelia ata. Navajëcabiabanua itsamonae pecobeta jomo jumapecataeya pexanaenëanëjavavelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavavelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba. ²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënëtsilivaisi, jivi pecobeta jumapecataeya pexanaenëanë pelivaisi. Bajarapamonae apo yayatae pepo Dioso, ponë daxitacuene exana mapanacuataje. Caranata yayataeya navajëcabiaba Dioso pecobecovëjavanejavavelia. Najamatabëcuenecopabanua ëbajaraxuanëjavavelia. Bajarapamonae nexata saya namuxujemata caranata pepo Dioso, ponëjavavelia jivi daxitamatacabijavelianexa jumaitsijitsia: “Diosomë, bitso ayaijamatabëcuenenëmë,” jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsiexanaexae, Dioso ayaiacuenia naneconitsiaexanaponatsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainaenexa ëpibisiacuene pexanaejava. ²⁹ Bajarapamonae exanavanapa bitso daxita pibisiacuene. Ëpibisiacuene yabara najamatabëxainabiaba naperabëquenetsiataenexa. Daxita pibisiacuene sivanajamatabëxainabiabanua. Jamatabëxainayababiabanua itsamonae pecobecovë. Pibisiacuene jamatabëexanabiabanua itsamonaejavavelia. Cuenecaëbabiabanua

itsamonae pexainaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Èpamonae ata bitso naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuaijai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayaijamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuene pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacuenibatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapëtan picani pacuenia Dioso itorobatsi pexanaenexa. Yapëtanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijiabia sivabarëya tsabiabi itsamonae ata pibisiacuene itsa exana.

2

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

¹ Paxamë pajudíovimë, pacatsipaebianatsi mapacueniaje. Pajudíovimë pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tsipaji paxamë ata pibisiacuene paexaname bajarapacuenia itsa pajumaitsimë tsabiabi itsajivi yabara. ² Yapëtanetsi baja cajena mapacuenije. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena. ³ Bajara pijinia pacuenia paxamë ata pibisiacuene paexanabiabi atamë, pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuene paneexanabiabixae, pëtsa pajamatabëjumaitsimë tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabëjamë pëtsa. Tsipaji Dioso naneconitsiaexanaena daxita pibisiacuene pexanaevi. ⁴ Bepacanaëjëtame xaniavaetsia pacuenia Dioso jamatabëcueneitsi. Dioso cajena abaxë bepijia apo naneconitsiaexanae pibisiacuene pexanaevi ata. Dioso raja abaxë jamatabëcuenevetaponapona pibisiacuene pexanaevi ata pevajëtsinexatsi pevecuaajibiaexanaenexa pijaneconi. Paxamë ata Dioso pacatojitsipa panecopabinexa pibisiacuene paneexanabiabijava, panenajamatabëcuene pënëyorotsinexa

Diosojavabelia. Bajaraxuata abaxë Dioso pacaitaxutotsoniatane. ⁵ Itsiata paxamë pajamatabëcuenetajamë bitso. Apo pajamatabëcopatsimë pibisiacuene paneexanaejava. Nexata ayaineconi panatoexanaponame panevajënaeyabelia. Nexata ayaicuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. ⁶ Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponapona itsa abaxë asaë tsaponapona mapanacuataje, bajarapaneconivajëtota Dioso caejivi canacujitsia naneconitsiaexanaponaena. ⁷ Itsamonae jamatabëcueneenabiabatsi ëpexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatatsia. Jitsipabiabanua Dioso pesivajamatabëcuenebarëyanexatsi. Jitsipabiabanua pexainaenexa matacabi apo pevereverecejava. Bajarapamonae Dioso rajutsianatsi matacabi apo pevereverecejava. ⁸ Itsamonae natojitsipa daxitacuene pexinaejava ëbajarapamonae. Apo jumecovënëtsinua pexaniajailivaisi. Saya exanavanapa ëpibisiacuene. Bajarapamonae Dioso anaeya ayaicuenia naneconitsiaexanaenatsi. ⁹ Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yanajamatabëxainaenanua pijaneconi. ¹⁰ Itsiata baitsi jane daxita pamona pexaniacuene pexanaevi, judíovi, apo judíovi ata, Dioso pijapenivenivenaenacuatatsia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcueneexanepanaeya.

¹¹ Dioso itsa naneconitsiaexanaena daxita pijaneconi pexainaevi, najëpaeya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso naneconitsiaexanaponaena caejivi canacujitsia. ¹² Pamona apo judíovi, yapëtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamona judíovi, yapëtae ata pacuenia Dioso Moiséspijinëta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. ¹³ Dioso raja judíovi aneconijibia apo tae saya jema judíovi peyapëtaejava yabara, palivaisi Dioso tonajumecopata Moiséspijinëta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinëta petonajumecopatsilivaisita. ¹⁴ Pamona apo judíovi, apo tsipaebitsi Dioso Moiséspijinëta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinëta penajumecopatsilivaisita. Apo judíovi apo muxujiobi atatsi, yapëtane pejamatabëëthëtota xua pexaniacuene pexanaenexa. Yapëtanenua xua ata pibisiacuene pexanaeyaniva. ¹⁵ Pamona pexaniacuene exanavanapa tsipaebinejevatsi Dioso Moiséspijinëta penajumecopatsilivaisi, bajarapamonae exanavanapa pejamatabëëthëtota peyapëtaecuena, pacuenia itorobatsi Dioso Moiséspijinëta penajumecopatsilivaisita. Daxita apo judíovi yapëtane pejamatabëëthëtota pexaniacuene pexanaenexa. Yapëtanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa

daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenanua papibisiacuene ata muetsia daxitajivi najamatabëxainavanapa yabara. Nexata bajarapamatacabi daxitajivi nayapëtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

Judíovi yabara, Dioso Moiséspijinëta penajumecopatsilivaisi ata, yabara pelivaisi

¹⁷ Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijinëta penajumecopatsilivaisi. Bajaraxuata Dioso nacacapanepaena. Dioso raja ëjudíovitsi vajaDioso,” pajamë tsabiabi. ¹⁸ Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacuene paneitapetsinexa paneexanavanapaenexa. ¹⁹ Pajamatabëjumaitsimënu tsabiabi: “Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetaë ata Dioso pejumelivaisi, abaxë apo pejumeyapëtaevi pexaniajailivaisicuene. Vaxaitsi jamatabëcueneitayotsianatsi pamonaë piagamatabëcueneitaquirivi, Dioso pejumelivaisivecua saya pejinavanapaevi,” pajamatabëjamënu tsabiabi. ²⁰ Pajamatabëjumaitsimënu tsabiabi: “Vaxaitsi cajena nacacaëjëpa vajayapëtaeyaexanaenexa pamonaë abaxë apo yapëtaë pacuenia Dioso jamatabëcueneitsi. Nacacaëjëpanua vajayapëtaeyaexanaenexa pamonaë ata pejanajumecovënëtsivi Dioso. Nacacaëjëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia,” pajamatabëjamë tsabiabi. ²¹ Bajarapacuenia paxamë patsipaebabiabi atamë itsamonaëjavabelia, itsiata paxamë ata apo paexanaemë bajarapacuenia. “jPëtsa panacobetoxotame,” pajamë tsabiabi itsamonaëjavabelia. Itsiata paxamë panacobetoxotabiabame. ²² “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaëjavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: “Jumapecataya pexanaenëanëjavabelia penavajëcaecuene bitso abeje. Itsa pajonejitsipame jumapecataeya pexanaenëanë penubenaebota, pacajamatabëcuene bijianaejitsipa,” pajamë tsabiabi. Itsiata paxamë pajoneyabiabame jumapecataeya pexanaenëanë penubenaebota penamatamotsijavanë, ofrendacuenia pejebijavanë, panenacobetoxotabinexa. ²³ Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanaelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yayyataë Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaeba. Dioso pejumelivaisibaxutota tajëvelia itsa pacavajunupaeba, jumaitsi paxamë yabara mapacueniaj: “Pamonaë apo judíovi, pibisiacuena Dioso baracuaicuaijai tsane judíovi xaniavaetsia apo petsitajinavanapaexae,” jai tajëvelia Dioso

pejumelivaisibaxutota paxamë Dioso apo panejumecovënëtsijavanexa yabara.

²⁵ Paxamë pajudíovimë papebijivimë, pacaperabëcaucuba itsa abaxë patsiquirinacuetoximë. Baitsi pacaboupiperabëcaucuba. Bajarapacuenia pacaperabëcaucuba panenayapëtaenexa Dioso papijajivicuenemë. Bajarapacuenia pacatonamatamota matapania itsa pajumecovënëtavanapame Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. ²⁶ Pamonae apo judíovi ata, apo peperabëcaucubivi atatsi, pejumecovënëtavanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonae ata Dioso pijajivicuenia tanetsi. ²⁷ Pamonae apo judíovi, apo peperabëcaucubivi atatsi, itsiata pejumecovënëtavanapaexae Dioso Moiséspijinëta penajumecopatsilivaisi, bajarapamonae itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtae atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. ²⁹ Pajivi pepacuene Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponapona saya mapanacuapijivi pesivabarëyanexatsi.

3

¹ ¿Detsa xua judíovi xaina Diosojavabelia, pamonae apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? ² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia. ³ Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuenia yabara pajamatabëjumaitsimë mapacueniaje: “Dioso meta itsiata apo exanae tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje: Xamë Diosomë, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapëtaenexa, xamë apo nena-jumetsënëtsinë, jai Dioso pejumelivaisibaxutota.

⁵ Pibisiacuene vaxanaxaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo

pejitsipaeñeucene pibisiacuene pexanaejava. Bajaraxuata pamonaenaneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinē tsipae: “Dioso pibisiacuene exana itsa naneconitsiaexana pijaneconi pexainaevi,” itsa janē tsipae, nexata jamatabēcuenenavēxaniabiaya jumaitsinē tsipae. Tsipaji Dioso itsa apo naneconitsiaexanae tsipae pijaneconi pexainaevi, Dioso apo najamatabēcueneitajētsi tsipae pibisiacuene pexanaejava apo pejitsipaeñeucene. Nexata pacuenia Dioso apo pejumecovēñetsivi banajamatabēxaina, bajarapacuenia najamatabēxainaejitsipajē. ⁶ Tsipaji Dioso saya jema jivi apo penaneconitsiaexanaenē. Itsa saya jema Dioso jivi naneconitsiaexanaejitsipa, apo naneconitsiaexanae tsipae ēpijaneconi pexainaevi. Nexata caejivi canacujitsia pibisiacuene pexanaeneconi yabara, paneconivajēto xainapona, bajarapaneconivajētota Dioso apo naneconitsiaexanapona tsipae.

⁷ Itsamonae meta jamatabēcuenenavēxaniabiaya jumaitsi tsane mapacueniaje: “Daxitajivi pecanaējētsinexa Dioso apo penajumetsēñetsinēucene, vaxaitsi yamaxēitojorobiaya jivi livaisi tsipaebabiabianatsi. Bajarapacuenia yamaxēitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaitsi yamaxēitojorobiaya jivi livaisi vajatsipae-babiabijava pejamatabēcueneta, daxitajivi canaējētsiana Dioso bitso pexaniajainēucene, apo penajumetsēñetsinēucene. Bajaraxuata Dioso apo nacananeconitsiaexanae tsane vajanajumetsēñētabiabijava yabara,” jai meta tsane itsamonae jamatabēcuenenavēxaniabiaya. ⁸ Bajarapacuenia itsa najamatabēxainaena bajarapamonae, nexata meta jamatabēcuenenavēxaniabiaya mataropotsia jumaitsi tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vajaexanabiabijava pejamatabēcueneta, daxitajivi canaējētsiana Dioso pibisiacuene apo pexanaenēucene,” jai meta tsane bajarapamonae jamatabēcuenenavēxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonae najumetsēñetsiaya xanē yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanē yabara. Bajarapacuenia pejumaitsiivi xanē yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ējudíovi saicaya aneconijibia Dioso tane daxita mapacuapijivi vecuaje? Jume raja. Jumaitsinē baja cajena mapacueniaje. Daxitatsi mapacuapijivitsije pibisiacuene ēvajaexanaevi. Judíovi, apo judíovi ata, bajara itsi. ¹⁰ Daxitatsi pibisiacuene vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata. ¹¹ Ajibi peyapētaejivi pacuenia Dioso jamatabēcuenetsi. Ajibi pepacuenie pejamatabēēthētovetsina pejumecovēñetsijivi Dioso. ¹² Daxita Diosovecua naxuabiaya jinavanapa. Daxita ajamatabēcuenebeje. Ajibi pexaniacuene pexanabiabijivi. ¹³ Pacuenia petēpaenē pemēthē tuxutsaeba, bajara itsi bajarapamonae pecuibovojotota pecuaicuaijajava pibisialivaisi. Pijumeta jivi

yamaxëitojorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsënëtsilivaisi. ¹⁴ Pecuibovojotota cuaicuaijai ëpibisialivaisi pianaepanaenexa. ¹⁵ Itsacuene apo exanae atasi, bepijia jitsipa jivi pebeyaxuabinexa. ¹⁶ Itsabelia jinavanapa, bejiobiaexanabiaba itsamonae. ¹⁷ Bajarapamonae apo yapëtae xaniavaetsia peyajavajinavanapaenexa jivi. ¹⁸ Bajarapamonae apo canaëjëtsi pejunavinexa Diosojavabelia, jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapëtanetsi mapacuenieje. Bajayata Dioso pejumelivaisi tonajumecopata ëjudïovi picani pejumecovënëtavanapaenexa. Itsiata judïovi apo jumecovënëtsicapanepae bajarapalivaisi. Bajaraxuata judïoviyajuvënënë, caenë ata, acuenebi pejumaitsinexa: “Xanë cajena apo tonaneconitsinë Dioso,” pejainexa. Daxita mapanacuapijivi, judïovi, apo judïovi ata, beyapëtane penaneconitsijava Diosojavabelia. Tsipaji itsajivi ata apo caëjëpaetsi pejumecovënëtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vajaexanavanapaejava vajasivajamatabëjumaitsinexa mapacueniaje: “Xaniajai rabaja. Xanë ata pibisiacuene taexanaenë,” vajajamatabëjainexa bajarapalivaisi pejamatabëcueneta.

Pacuenia Dioso aneconijibia tane pajivi najamatabëcuenecopata Jesucristojavabelia yabara pelivaisi

²¹ Aeconoxae baja mapamatacabitaje Dioso nacayapëtaeyaexana pacuenia nacatoexana aneconijibia vajanacataenexa. Dioso apo jamatabëjumaitsi: “Pamonae jumecovënëtsicapanepa Moiséspijinëta tanajumecopatsilivaisi, bajara ëpamonae aneconijibia taenajë,” apo jamatabëjai. Pacuenia Dioso capanepaejitsia Dioso pejumecovënëtsivi, bajayata Diosojumepaebivi profetavi tajëvelia yaquina Dioso pejumelivaisibaxutota. ²² Mara pacuenia Dioso jivi aneconijibia taneje. Pajivi jamatabëjumaitsi: “Xaniajai. Jesucristo itsa tëpa cruzata, pibisiacuene taexanaeconi yabara tëpa,” jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamonae jumecovënëta Jesucristo cruzata pesivatëpaejavatsi pijaneconi yabara. Tsipaji Dioso daxitajivi najëpaeyatane. ²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipaecuenia apo toponapnae. Daxitajivi Diosovecua naxuabiaya jinavanapa. ²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamonae jumecovënëta Jesucristo cruzata pesivatëpaejavatsi pijaneconi yabara. Jivi apo namatavenonae pijacuata penaneconimatamotsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuene pexanaeconivecua. ²⁵ Dioso copata Jesucristo petëpaenexa cruzata vajanacaneconimatamotsinexa, pibisiacuene vajaexanaeconimi. Nexata itsa jumecovënëtatsi Jesucristo cruzata vajanacasivatëpaejava, nacavecuaajibiaexana pibisiacuene vajaexanaeconimi. Bajarapacuenia Dioso copata Jesucristo cruzata vajanacasivatëpaenexa mapanacuapijivitsi. Tsipaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacanconimatamota, pibisiacuene vajaexanaeconimi. Pepo

bajayata pejinavanapaevimiyajuvënëvi ata, najamatabëcuenecopaba Diosojavabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsipaji Dioso tajëvelia yapëtane Jesucristo pesivatëpaejavanexa bajarapamonaemi ata pibisiacuene pexanaeneconi yabara. ²⁶ Ajena, mapamatacabitaje, Dioso jivi tsitanajamatabëcueneitajëta jivi pibisiacuene pexanaejava Dioso apo pejitsipaenëcuene. Tsitanajamatabëcueneitajëtanua aneconijibia petaejavanexa pamona jumečovënëta Jesucristo pesivatëpaejavatsi cruzata pijaneconi pevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumečovënëtsixae Jesucristo vajanacasivatëpaejava cruzata vajaneconi yabara. Nexata ayaijamatabëcuenejivitsi vajanacataenexa, acuenebi vajajumaitsinexa itsajivijavabelia: “Xanë taexanaejava pejamatabëcueneta, Dioso aneconijibia netane,” vajainexa acuenebi. ²⁸ Vaxaitsi baja cajena yapëtanetsi mapacueneje. Dioso aneconijibia tane pajivi jumečovënëta Jesucristo pesivatëpaejavatsi cruzata pijaneconi yabara. Bajarapajivi apo jumečovënëtsi ata Dioso Moiséspijinëta penajumecopatsilivaisi, Dioso itsiata aneconijibia tanetsi pejumečovënëtsixae Jesucristo pesivatëpaejavatsi cruzata pijaneconi yabara.

²⁹ Dioso raja ëjudíovi apo pijaDioso. Dioso raja apo judíovi ata pijaDioso. ³⁰ Caenë rabaja Dioso. Pematatsënëa baja itsanë Dioso ajibi. Bajaronë Dioso judíovi aneconijibia tane, pamona jumečovënëta Jesucristo pesivatëpaejavatsi cruzata pijaneconi yabara. Bajara pijinia pacuenia Dioso aneconijibia tane pamona apo judíovi ata. ³¹ Vaxaitsi baja xaniavaetsia Jesucristo jumečovënëtatsi vajanacasivatëpaejava cruzata vajaneconi yabara. Nexata Dioso Moiséspijinëta penajumecopatsilivaisi yabara, apo bejamatabëjumaitssi: “Dioso Moiséspijinëta penajumecopatsilivaisi tajumecovënëtsijavami, copatajë baja. Tsipaji baja jumečovënëtajë Jesucristo tanesivatëpaejava cruzata tajaneconi yabara,” apo bejamatabëjaitsi. Biji rajane Jesucristo vajanacasivatëpaejava cruzata, itsa jumečovënëtatsi, Dioso Moiséspijinëta penajumecopatsilivaisi ata bajarajota yajavajumečovënëtatsi.

4

Pacuenia Abrahampijinë bajayata Dioso aneconijibia tanetsi pejumečovënëtsixae pacuenia Dioso najumecapanepaeya jumaitssi yabara pelivaisi

¹ Pacatsipaebijitsiatsi pajamatabëcuenelivaisi yabara Abrahampijinë Dioso aneconijibia tanetsi. ² Abrahampijinë pijacuata ëpexaniacuene itsa exanabiabijitsipa, nexata jumaitsi tsipae Diosojavabelia: “Ëpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinë Diosojavabelia apo jumaitsi bajarapacuenia. Tsipaji Abrahampijinë ëpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae. ³ Biji rajane Dioso pejumelivaisibaxutota Abrahampijinë yabara jumaitsi mapacueniaje: “Abrahampijinë najamatabëcopatsiaya Diosojavabelia pejamatabëjumaitsabixae: ‘Xaniajai. Pepacuene Dioso netoexanaena pacuenia najumecapanepaeya nejumaitsi,’

pejamatabējaisabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinė yabara. ⁴ Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabėjumaitsi: “Dioso, ponē penaneconitsivi pijaneconivecua ajibiaexanabiaba, bajaraponē pepacuene necapanepaena pacuenia najumecapanepaeya jumaitsi tanecapanepaenexa,” jamatabėjai, bajarapajivi Dioso aneconijibia taenatsi pecapanepaenexatsi pijaneconivecua. ⁶ Pepo bajayata Davidpijinē vajunupaeba pejamatabėcuenebarėyajava pamonae baja Dioso aneconijibia tanetsi. Bajarapacuenia Dioso aneconijibia tanetsi bajarapamonae pejumecovėnėtsixae Dioso najumecapanepaeya pejumaitsicueniatsi. Bajarapamonae Dioso aneconijibia apo taetsi, pijacuata ėpexaniacuene exanabiabi ata. ⁷ Davidpijinē pepo bajayata tajėvelia bajarapamonae yabara jumaitsi mapacueniaje: Jamatabėcuenebarėya baja tsavanapae pamonae picani naneconita Diosojavabelia. Barajamatabėcuenebanepanatsi baja Dioso. Tsipaji baja pibisiacuene pexanaeneconimi, vecuajibiaexanatsi. ⁸ Jamatabėcuenebarėya baja tsaponaponaepajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpijinē bajayata.

⁹ Bajarapacuenia Davidpijinē itsa jumaitsi, pejamatabėcuenebarėyatsavanapaevi baja, ėjudiovi, peperabėcaucubivitsi yabara, apo jumaitsi. Pamonaepo judiovi, apo peperabėcaucubiviatatsi, yabara jumaitsi. Xaniajanē pacuenia pacatsipaebijitsiatsi. Abrahampijinė bajayata Dioso jumecovėnėta najumecapanepaeya pejumaitsicueniatsi. Nexata baja Abrahampijinė Dioso aneconijibia tanetsi pibisiacuene pexanaeneconimivecua. ¹⁰ ĄAbrahampijinė tsajane baja pepuaperabėcaucutsitsi, Dioso aneconijibia tanetsi? Jume raja. Abaxė apo perabėcaucutsinejeva atatsi, aneconijibia tanetsi pejumecovėnėtsixae Dioso najumecapanepaeya pejumaitsicueniatsi. ¹¹ Dioso baja aneconijibia pepuataetsi, Abrahampijinė perabėcaucutatsi. Bajarapacuenia Abrahampijinė perabėcaucutatsi daxisajivi peypėtaenexatsi Dioso aneconijibia petaejavatsi. Bajaraxuata daxisa pamonaepo peperabėcaucubiviatatsi, itsa jamatabėjumaitsi: “Xaniajai. Pepacuene Dioso netoexanaena pacuenia najumecapanepaeya jumaitsi,” itsa jamatabėjai, bajarapamonae Abrahampijinė bepexi Dioso tanetsi, apo peperabėcaucubiviatatsi. Abrahampijinė abaxė apo perabėcaucutatsi atatsi, Dioso pejumecovėnėtsixae, aneconijibia tanetsi. ¹² Xaniajai rabaja. Abrahampijinė bepexi Dioso tanetsi daxisa pamonaepeperabėcaucubivitsi. Bajarapamonae Abrahampijinė bepexi Dioso tanetsi apo ėperabėcaucubijavatsi yabara. Biji rajane Abrahampijinė bepexi Dioso tanetsi tsipaji bajarapamonae ata abaxė apo perabėcaucubiatatsi, jumecovėnėta pacuenia Dioso najumecapanepaeya jumaitsi.

Pacuenia tocopiapatatsi pajivi jumecovėnėta pacuenia Dioso najumecapanepaeya jumaitsi petoexanaenexatsi yabara pelivaisi

¹³ Bajayata Dioso najumecapanepaeya jumaitsi Abrahampijinėjavabelia: “Carajutsianatsi daxisa mapairaje nijairanexa. Nevėnamuto ata, nexi, nemomoxi ata, pijairanexa,” jai Dioso Abrahampijinėjavabelia. Bajarapacuenia Dioso jumaitsi Abrahampijinėjavabelia tsipaji Dioso

aneconijibia tanetsi Abrahampijinē pejumecovēnētsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinē Dioso aneconijibia tanetsi tsipaji jumecovēnēta Dioso Moiséspijinēta penajumecovēnētsilivaisi,” vajajainexa. Tsipaji baja Abrahampijinē pepuatēpae, bexēa Moiséspijinē ponapona.¹⁴ Dioso najumecapanepaeya itsa jumai tsipae perajutsinexa bajarapaira ēpamonae jumecovēnēta Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvēnējivi, apo jumecovēnētsicapanepe Dioso Moiséspijinēta penajumecopatsilivaisi. Bajarapamonae Dioso pejumecovēnētsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi.¹⁵ Tsipaji daxita pamonaē apo jumecovēnētsi pacuenia Dioso itoroba Moiséspijinēta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶ Dioso cajena najumecapanepaeya jumaitsi Abrahampijinējavabelia amoneya perajutsinexa bajarapaira. Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumait-sijavatsi Abrahampijinē pejumecovēnētsixae. Bajarapaira Dioso najumecapanepaeya itsa rajutsiapaeba pamonaē jumecovēnēta Dioso Moiséspijinēta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba pamonaē ata jumecovēnēta pacuenia Dioso najumecapanepaeya jumaitsi, pacuenia bajayata Abrahampijinē jumecovēnēta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovēnētsivi, Dioso nacatane Abrahampijinē bepexitsi.¹⁷ Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitsiyava Abrahampijinējavabelia Dioso pejumelivaisibaxutota tajēvelia jumaitsi mapacueni-aje: “Ayaibitsaētoخانeto jivi bepijasalinainēmē cataeyaexanaenatsi,” jai Dioso pejumelivaisibaxutota tajēvelia Dioso pejumaitsiyava Abrahampijinējavabelia vaxaitsi yabara. Dioso baja cajena icatsia piasaēyaxanaenē petēpaevimi ata. Xua picani abaxē ajibi mapanacuataje, Dioso baja exana pijumeta.

¹⁸ “Abraham raeta baja pexi apo xainae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitsicueniatsi. Evetaponapona jivi ayaibitsaētoخانeto pamo pexanaenexatsi pacuenia Dioso najumecapanepaeya jumaitssitsi.¹⁹ Bajarapamatacabi Abrahampijinē imoxo pexainae cien pavaibeje. Bajaraponē pijava Sara, mavecova. Perujuvayo baja pijinia. Pexi picani pexainaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacueneyapētae ata, itsiata jumecovēnēta Dioso pacuenia najumecapanepaeya jumaitssitsi petoexanaenexatsi.²⁰ Apo jumeaebi pacuenia Dioso najumecapanepaeya jumaitssitsi. Bitso biji pevajēnaeyabelia jamatabēcuenievetaponapona pacuenia Dioso najumecapanepaeya jumaitssitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso

ayaijamatabëcuenenë,” jai tsabiabi. ²¹ Abrahampijinë xaniavaetsia yapëtane Dioso pecaëjëpaenëcuenetsi petoexanaenexatsi daxita pacuenia najumecapanepaeya jumaitsitsi. ²² Abrahampijinë Dioso jumecovënëta petoexanaenexatsi pacuenia najumecapanepaeya jumaitsitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaitsi pacuenia Dioso aneconijibia tanetsi Abrahampijinë pejumecovënëtsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapëtaenexa Abrahampijinë pelivaisi. ²⁴ Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovënëtatsi pacuenia Dioso najumecapanepaeya jumaitsi, aneconijibia Dioso nacatane. Bajaraponë Dioso vajatuxanenë Jesucristo icatsia asaëyaexanatsi petëpaecujinae. ²⁵ Dioso athëbëvetsica itorobica Jesús vajanacasivatëpaenexa mapanacuataje. Nexata Jesús itsa nacasivatëpa, nacanekonimatamota pibisiacuene vajaexanaeneconimi. Bajaraxuacujinae Dioso icatsia asaëyaexanatsi petëpaejavavecua vajanacavecuaajibi-aexanaenexa vajaneconimi. Nexata baja Dioso aneconijibia nacatane Jesús pejamatabëcueneta.

5

Pacuenia jamatabëcuenenarëya pajivi Dioso aneconijibiatanetsi yabara pelivaisi

¹ Dioso aneconijibia nacatane vajajumecovënëtsixae pacuenia Dioso najumecapanepaeya jumaitsi. Nexata sivajamatabëcuenenarëyatsi tsavanapae Dioso. Vajatuxanenë Jesucristo vajanacasivatëpaexae vajaneconi yabara, bajaraponë pejamatabëcueneta nacajamatabëcuenenarëyayaexana. ² Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenenarëyatsi. Tsipaji yapëtanetsi itsamatacabi Dioso vajayajavajinavanapaejavanexa penivenivenaenacuataatsia. ³ Mapanacuapijivi nacabejiobiaexanabiabi ata, itsiata sivajamatabëcuenenarëyatsi tsabiabi. Tsipaji yapëtanetsi vajanacabejiobiaexanabiabicueneta, nacajamatabëcuenesaëyaexanapona Diosojavabelia. Nexata nacajamatabëcuenesaëjëpa vajanajamatabëcuenesaëtsinexa, daxita pibisiacuene nacatocopiapatsi ata. ⁴ Itsa najamatabëcuenesaëtatsi, nacatocopiapatsi ata pibisiacuene, Dioso pijinia nacasivabarëya. Nexata itsa yapëtanetsi Dioso vajanacasivabarëyajava, nexata jamatabëcueneevetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabëcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espíritu Santo vajanacatsijamatabëcaenexa. Nexata Espíritu Santo xaniavaetsia nacayapëtaeyaexana Dioso vajanacaasivajava.

⁶ Vaxaitsi bitso ajamatabëcuenesaëjibitsi pibisiajamatabëcuenevixaetsi. Acuenebi vajacuata vajanacapanepaenexa Diosojavabelia vajaneconi yajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeneconi yabara. ⁷ Mapanacuataje itsajivi itsa jamatabëcueneyavenona itsanë, nexata itsa beyaxuabiapaebatsi pejamatabëcueneyavenonaexae, pecajunavi baja apo jamatabëcueneyavenona

tsipae. Itsajivi meta itsiata jamatabëcuene yavenonaejitsipa, beyaxuabijitsia atatsi. Bajarapacuenia jamatabëcuene yavenonaejitsipa itsa bitso pexania jamatabëcuene nê, ponê javabelia jamatabëcuene yavenonaejitsia. ⁸ Itsiata baitsi jane vaxaitsi Dioso nacayavenona, pibisiacuene vaxaexanaevi ata. Nexata Dioso nacatsitanajamatabëcuene itajêta bitso vajanacaasivajava. Dioso pexênato athêbêvetsica itorobica vajanacasivatêpaenexa mapanacuataje. ⁹ Jesucristo vajanacasivatêpaexae, nexata baja maparucaeje Dioso aneconijibia nacatane. Bajaraxuata yapêtanetsi Jesucristo pejamatabëcueneta Dioso vajanacacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabit-saêvitsi. Nexata pexênato vajanacasivatêpaexae, Dioso baja nacabarajamatabëcuenexanepana. Bajaraxuata maparucaeje yapêtanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsipaji pexênato asaê taponaponae vajanacatocuaicuajainênexa paxajavabelia. ¹¹ Orijibia vaxaitsi bitso sivajamatabëcuene barêyatsi Dioso vajanacaasivajava. Tsipaji vajatuxanenê Jesucristo pejamatabëcueneta Dioso baja nacabarajamatabëcuenexanepana.

Adânpijnê Cristo ata yabara pelivaisi

¹² Copiaya caenê, Adânpijnê, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petêpaejavanexa. Nexata jivi petêpaejava, yacaêjêpa daxitanacuapijivijava. Tsipaji daxitanacuapijivi pibisiacuene exana. ¹³ Dioso Moisés pijinêta penajumecopatsilivaisi ata pevajênaeya, mapanacuapijivi pibisiacuene exanavanapa. Itsiata abaxê apo petonajumecopatsixaetsi Dioso pejumelivaisi, itsajivi ata acuenêbi pejumaitisijavatsi: “Pananeconitame raja Dioso javabelia,” pejaijavatsi pibisiacuene pexanaejava yabara. ¹⁴ Adânpijnê peponaponaejavaveliacujinae, jivi jinavanapa. Bajarapamonaemi jinavanapa Moisés pijinê pevajênaeya. Daxita bajarapamonaemi ata pibisiacuene exana. Nexata têpaponae. Bajarapamonaemi pibisiacuene itsa exana, itsiata Adânpijnê papibisiacuene exana, cuenejêpaeya apo exanae. Cristo, ponê tajêvelia vajunupaebatsi pepatsijavanexatsica, Adânpijnêbeje, apo najamatabëcuenejêpaebeje. Adânpijnê pejamatabëcueneta, daxitajivi pibisiacuene exanavanapa. Nexata daxitajivi naneconita Dioso javabelia. Cristo pijinia pejamatabëcueneta, jivi ayaibitsaêtoxaneto Dioso aneconijibia tanetsi.

¹⁵ Nexata Adânpijnê papibisiacuene exana, apo najêpaebeje papexaniacuene Dioso nacatoexana Jesucristo pejamatabëcueneta. Caenê, Adânpijnê, pibisiacuene pexanaejava pejamatabëcueneta, daxitajivi têpaponae. Biji rajane Dioso vajanacaitaxutotsoniataejava, bitso pexaniacuene. Tsipaji Dioso athêbêvetsica itorobica vajatuxanenê Jesucristo vajanacasivatêpaenexa mapanacuataje, vajanacavecuaajibiaexanaenexa daxita vajaneconimi. Nexata bajarapacuenia caenê, Jesucristo, pexaniacuene exana pecapanepaenexa jivi ayaibitsaêtoxaneto. ¹⁶ Caenê saya picani Adânpijnê. Itsiata pibisiacuene itsa exana, yacaêjêpa daxitajivijava. Nexata daxitajivi pibisiacuene pexanaexae, naneconita Dioso javabelia. Itsiata baitsi jane Jesucristo xaniavaeta daxita xua Adânpijnê pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamonaejumecovênêta Jesucristo pesivatêpaejavatsi pibisiacuene pexanaeneconi

yabara. ¹⁷ Caenë Adánpijinë pibisiacuene pexanaexae, daxitajivi tēpaponā bajarapamonae ata pibisiacuene pexanaexae. Itsiata caenë Jesucristo vajanacasivatēpaexae, maparucaeje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamonaē jumecovēnēta Jesucristo pejamatabēcueneta Dioso aneconijibia petaejavatsi, bajarapamonae ajamatabēcuenesaē tsavanapae tsane Dioso pejumecovēnēsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaē jumecovēnēta Jesucristo pesivatēpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonae Dioso rajutsianatsi matababi apo pevereverecejava. ¹⁹ Caenë, Adánpijinë, copiaya apo jumecovēnētsi Dioso pitorobicueniatsi. Nexata bajaraponē pejamatabēcueneta, jivi ayaibitsaētoxaneto pibisiacuene exana. Nexata icatsia bexēa caenë, Jesucristo, xaniavaetsia jumecovēnēta Dioso pitorobicueniatsi. Nexata Jesucristo pejamatabēcueneta, jivi ayaibitsaētoxaneto Dioso aneconijibia tanetsi.

²⁰ Bajayata Dioso Moiséspijinēta najumecopata jivi pejumecovēnēsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caējēpaetsi penajamatabēcuenesaētsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapētane pibisiacuene pexanaejava. Nexata jivi pevajēnaeyabelia pibisiacuene itsa exana, Dioso pijinia pevajēnaeyabelia bitso itaxutotsoniataeponatsi. ²¹ Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matababi apo pevereverecejava vajatuxanenē Jesucristo vajanacasivatēpaexae.

6

Pacuenia Dioso pejumecovēnēsivi pejanajamatabēcuenē yajavajinavana yabara pelivaisi

¹ Itsajivi meta jamatabēcuenenavēxaniabiaya jamatabējumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajēnaeyabelia pibisiacuene exanavanapaenatsi,” jamatabējai meta tsane jamatabēcuenenavēxaniabiaya. ² Jume raja! Pētsa baja vaxaitsi pibisiacuene exanatsi pematatsēnē. Petēpaenē baja apo najamatabēxainae pibisiacuene pexanaenexa. Bajara pijinia pacuenia vaxaitsi ata bejamatabēcuenēitsitsi pibisiacuene vajaexanaeyaniva. ³ Paxamē bepayaepētaneme pajamatabēcuenē yabara nabautisabatsi. Itsa nabautisabatsi, becaeperabēto nacaexana Jesucristojavabelia. Nexata vaxaitsi bejamatabējumaitsi mapacueniaje: “Jesucristo cruzata itsa tēpa, xanē ata betaneyajavatēpae cruzata,” bejamatabējai. Bajarapajamatabēcuenē yabara nabautisabatsi. ⁴ Itsa Jesucristo bevajanacayajavatēpae, nexata bevajanacayajavamēthētsitsi. Nexata Jesucristo petēpaecujinae, Dioso pesaēta icatsia itsa asaēyaexanatsi, bevajanacayajavaasaēyaexanaetsi

icatsia. Vaxaitsi pejanajamatabëcuene vajayajavajinavanapaenexa, copatatsi baja vajaperujumatabëcuenemi. Bajarapajamatabëcuene yabara nabautisabatsi.

⁵ Becaeperabêto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatêpae. Nexata Jesucristo petêpaecujinae, Dioso icatsia itsa asaëyaexanatsi, bevajanacayajavaasaëyaexanaetsi. ⁶ Jesucristo itsa rutatsi cruzata pebeyaxuabinexatsi, vajaperujumatabëcuenemi yajavarutatsi vajanacavecuajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsênêa baja apo bexanaetsi pibisiacuene. ⁷ Pacuenia baja petêpaenê pibisiacuene apo exanae, bajara pijinia vaxaitsi ata bejamatabëcueneitsitsi pibisiacuene vajaexanaeyaniva. ⁸ Jesucristo cruzata bevajanacayajavatêpaexae, nexata bejamatabêjumaititsitsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabêjaitsi. ⁹ Yapêtanetsi vajatuxanenê Jesucristo Dioso icatsia piasaëyaexanaejavatsi petêpaecujinae. Nexata baja icatsia Cristo pematatsênêa apo tēpae tsane. ¹⁰ Itsa baja Cristo tēpa daxitajivi pibisiacuene pexanaeoneoni yabara, caecuenia copiarutsiaya sivatēpa daxitamatacabijavabelianexa. Nexata baja Cristo icatsia pematatsênêa apo tēpae tsane. Biji rajane Dioso yajava daxitamatacabijavabelianexa asaë tsaponaponae tsane athêbêtatsia, itsajotatsia ajibi petêpaecuene. ¹¹ Nexata paxamê panejamatabêêthêtotâ pajamatabêjumaitsimêre tsavanapae: “Tajaperujumatabëcuenemi baja navecuatêpaeyabajê. Nexata baja pibisiacuene apo exanaenê tsane. Biji rajane asaênê baja tsaponaponae Dioso taneitorobicuenia tatoexanabiabinexa. Tsipaji baja tajatuxanenê Jesucristo neyjavaponapona,” pajamatabêjamêre tsavanapae.

¹² Bajaraxuata pētsa baja panajamatabêxainabiabame pibisiacuene paneexanaenexa panijacuata panenatojitsipaecuenia. ¹³ Pētsa panacopatame daxita xua pibisiacuene paneexanaenexa. Tsipaji paxamê bepanetêpaecujinae, Dioso icatsia bepapecaasaëyaexanaevi. Nexata pajumaitsimêre tsabiabi Diosojavabelia: “Tajatuxanenê, catonucatsi majotaje. Cajamatabëcuenevetaponaponaenatsi daxitamatacabijavabelianexa pacuenia xamê jitsipame tacatoexanabiabinexa,” pajamêre tsabiabi Diosojavabelia. ¹⁴ Nexata pacacajêpaena panenajamatabëcuenesaetsinexa icatsia caevêalia paneexanaeyaniva papibisiacuene panijacuata panatojitsipame. Tsipaji Dioso papecaitaxutotsoniataexae, Dioso pacayavenonabiabiana. Nexata baja apo paexanavana-paemê tsane pacuenia pacaitoroba Dioso Moiséspijinêta penajumecopat-silivaisi.

Pacuenia itsane pajivi nacopata êpibisiacuene pexanaejavabelia yabara pelivaisi

¹⁵ Itsajivi meta jamatabëcuenenavêxaniabiaya jamatabêjumai tsane: “Dioso vajanacaitaxutotsoniataexae, aneonijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinêta penajumecopatsilivaisi. Nexata baja itaxutojema pibisiacuene exanavanapaenatsi,” jamatabêjai meta tsane itsajivi jamatabëcuenenavêxaniabiaya. ¡Jume raja! Pibisiacuene apo bexanavanapaetsi. ¹⁶ Paxamê rabaja xaniavaetsia payapêtaneme

mapacueneje. Itsa panacopatsipame itsanë papijajivinexamë, nexata pacuenia bajaraponë pacaitorobabiaba, pajumecovënëtabijitsipame. Bajara pijinia paitsimë tsipae itsa panacopatsipame pibisiacuene paneexanababinexa. Nexata bajarapapibisiacuene bepapijajivimëcuenia, pacuenia pacajamatabëcueneitorobabiaba, paexanavanapaejitsipame. Nexata bajarapaneconi pejamatabëcueneta papitsipame panetëpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovënëtavapananame Dioso, nexata pacuenia Dioso pacatojitsipa, patoexanavanapaname. ¹⁷ Bajayajebi picani panacopatame pibisiacuene paneexanavanapaenexa. Nexata pibisiacuene bepapijajivimëcuenia, pacuenia pacajamatabecueineitorobabiaba, ëpibisiacuene paexanavanapame. Nexata itsiata maparucaeje daxita panejamatabëcueneta pajumecovënëtavapaname baja papexaniajailivaisi itsamonae pacatsipaeba. Bajaraxuata paxamë yabara Diosojavabelia jumaitsinë tsabiabi: “Xanepana rabaja. Ayaicuenia yavenoname bajarapamonae,” janë tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabëxainame ëpexaniacuene paneexanavanapaenexa. ¹⁹ Peyapëxanepanaecuenia pacatoyaquinatsi mapalivaisije xaniavaetsia panejumeyapëtaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimëcuenia pacuenia pacajamatabëcueneitorobabiaba, ëpibisiacuene picani paexanavanapame panevajënaeyabelia. Itsiata baja aeconoxae panajamatabëcuenerajure Diosojavabelia ëpexaniacuene paneexanavanapaenexa panevajënaeyabelia. Bajarapacuenia Dioso pacatojitsipa paneexanavanapaenexa.

²⁰ Pamatacabi picani abaxë ëpibisiacuene paexanavanapame, Dioso papecatojitsipaecuenia apo paexanavanapaemë. Saya jamatejema pajinavanapame. ²¹ Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramë tsabiabi pibisiacuene paneexanaejava. Pamonae tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²² Paxamë rabaja Dioso pacapanepa pibisiacuene paneexanaeconomiecua. Bajaraxuata Diosojavabelia panajamatabëcuenerajutame baja Dioso papijajivinexamë. Nexata apo panacueratsimë tsane. Dioso papecatojitsipaecuenia pajinavanapaname. Panetëpaeucijinae paxainaename matacabi apo pevereverecejava. ²³ Pamonae pibisiacuene pexanaevi, Dioso rajutsianatsi petëpaejavanexa, Diosovecua penaxuabinexa daxitamatacabijavabelianexa. Pamonae jumecovënëta vajatuxanenë Jesucristo pesivatëpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo pevereverecejava.

7

Pacuenia Dioso pejumecovënëtsivi Dioso Moiséspijinëta penajumecopatsilivaisi apo bejumecovënëtsi pecapanepaenexatsi yabara pelivaisi

¹ Tajamonae, payapëtaneme rabaja Dioso Moisésþijinëta penajumecopatsilivaisi. Nexata baja pijinia payapëtaneme pacuenia jivi bajarapalivaisi bejumecovënëtavanapa itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajara-palivaisi pejumecovënëtavanapaenexa. ² Pova baja pamona pexainaeava, acuenebi pevecuanaviatsinexa pamona, penacojiobinexa icatsia itsanëjavabelia. Tsipaji Dioso Moisésþijinëta penajumecopatsilivaisi itaveta bajarapacue. Itsiata baitsi jane pova baja pamona vecuatëpatsi, nexata matapania tocopatatsi penacojiobinexa icatsia itsanëjavabelia itsa jitsipa penacojiobijava. ³ Pova pamona pexainaeava, itsa nacojiobijitsipa itsanëjavabelia, pamona abaxë itsa asaë tsaponaponae, nexata bajara-pova ayaineconi natsiexanaejitsipa Diosojavabelia. Tsipaji pamonave-cua itsanëjavabelia naperabëquenetsiatae ponaponaejitsipa. Itsiata baitsi jane baja pova baja pamona vecuatëpatsi, Dioso Moisésþijinëta penajumecopatsilivaisi apo itavetsitsi penacojiobijava itsanëjavabelia. Nexata pova baja pamona vecuatëpatsi, nacojiobi ata icatsia itsanëjavabelia, ayaineconi apo natsiexanae tsipae Diosojavabelia.

⁴ Tajamonae, bajara pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, bajara pijinia pacuenia pajumecovënëtabiabame picani Dioso Moisésþijinëta penajumecopatsilivaisi papecaitorobicuenia. Jesucristo bepaneyajavatëpaexae, nexata Dioso Moisésþijinëta penajumecopatsilivaisi bepanevecuatëpae. Nexata baja icatsia apo pajumecovënëtavanapaemë bajarapalivaisi papecaitorobicuenia. Maparucaeje Cristo baja papijajivimë, ponë icatsia Dioso asaëyaexanatsi petëpaecujinae. Cristo icatsia Dioso bepapecaya-javaasaëyaexanae pacuenia Dioso pacatojitsipa paneexanavanapaenexa. ⁵ Pamatacabi abaxë Cristo pelivaisi apo jumecovënëtsitsi, pibisiacuene exanavanapatsi vajacuita vajanatojitsipaecuenia. Nexata bajaramatacabi itsa nacaitaveta Dioso Moisésþijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabijainavanapatsi. ⁶ Itsiata baja maparucaeje palivaisi Dioso Moisésþijinëta najumecopata, bajarapalivaisi vajajumecovënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moisésþijinëta penajumecopatsilivaisi. Jume baja cajena. Espiritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

Dioso Moisésþijinëta penajumecopatsilivaisi, pacuenia ata Pablo pibisiacuene pexanaenexa najamatabëxaina, penavajunupaebijava, yabara pelivaisi

⁷ Itsajivi meta jamatabëcuenenavëxaniabiaya jamatabëjumaitsi tsane: “Dioso Moisésþijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tsipaji Dioso Moisésþijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexainaejava,” jai. Nexata itsa apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava,

itsajivi pexainaejava cobecaëbi atanë. ⁸ Dioso Moisésþijinëta penajumecopatsilivaisi, itsa nitaveta itsamonae pexainaejava tacobecaëbiyaniva, nexata caranata bitso betanitorobi tacobecaëbinexa itsamonae pexainaejava. Pamatacabi abaxë apo yapëtaenë Dioso Moisésþijinëta penajumecopatsilivaisi, apo jitsipaenë picani taexanaenexa bajarapacue. ⁹ Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaexae, Diosovecua naxuabiaya tatëpaejavanexa picani. ¹⁰ Bajarapalivaisi Dioso najumecopata Moisésþijinëta jivi picani jamatabëcuenenarëyaya xaniavaetsia pejinavanapaenexa. Itsiata xanë bajarapalivaisi pejamatabëcueneta apo jamatabëcuenenarëyanë. Tshipaji pibisiacuene taexanaexae, bajarapalivaisi pejamatabëcueneta yapëtaniji Diosovecua tanaxuabijavanexa picani. Nexata bitso najamatabëxainajë. ¹¹ Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecua tanaxuabinexa.

¹² Palivaisi Dioso Moisésþijinëta najumecopata, pexanialivaisi cajena. ¹³ Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tshipaji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaexae xua bajarapalivaisita itaveta, naneconitajë Diosojavabelia. Bajarapalivaisi itsa yapëtaniji, nexata tajamatabëëthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

¹⁴ Palivaisi Dioso Moisésþijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipacuenia exanapononajë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëëthëtota xainajë taneitorobabiabicuenia. ¹⁵ Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipaenë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. ¹⁶ Itsa exanabiabajë papibisiacuene picani apo jitsipaenë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tshipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. ¹⁸ Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecaëjëpabiabi pexaniacuene taexanabiabinexa. ¹⁹ Papexaniacuene jitsipajë

taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. ²⁰ Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tshipaji papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

²¹ Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tshipaji papibisiajamatabëcuene xainajë, abaxë yajavaponaponajë. ²² Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujujamatabëcuene saya bepijajivitonëncuenia toponaponajë.

²⁴ ¡Xanë bitso bejjobinë! Bajarapapibisiajamatabëcuene yabara Dioso picani nenaneconitsiaexanaejitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. ²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tshipaji vajatuxanenë Jesucristo jamatabëcuenecaëjëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

8

Pacuenia Espiritu Santo nacajamatabëcueneyavenona yabara pelivaisi

¹ Pamonaë baja Jesucristo yajavajinavanapa, bajarapamonaë Dioso baja apo naneconitsiaexanaetsi tsane. Bajarapamonaë penatojitsipaecuenia, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi. ² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisiajamatabëcuene picani nenaneconitsiaexanabiaba daxitamatacabijavabelianexa picani tananeconitsiaaponaponaenexa, bajarapajamatabëcuenemi Espiritu Santo baja nevecuaajibiaexana. ³ Vaxaitsi vajacuata apo nacajamatabëcuenecaëjëpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacaëjëpae vajacuata vajanacapanepaenexa Diosojavabelia. Itsiata Dioso caëjëpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjëpa picani pibisiacuene vajaexanaevi. Bajaraponë vaxaitsi pibisiacuene vajaexanaeconi yabara, nacasivatëpa. Nexata baja nacavecuaajibiaexana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuenecaëjëpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaitsi. Nexata nacacaëjëpa

vajaexanaenexa pexaniacuene. Tsipaji apo exanavanapaetsi pacuenia vacuata natojitsipatsi. Biji rajane exanavanapatsi pacuenia Espiritu Santo nacatojitsipa.

⁵ Pamonaе exanavanapa pijacuata penatojitsipaecuena, bajarapamonae jamatabecueneenabiabatsi epibisiacuene pexanaenexa. Pamonaе pijinia exanavanapa Espiritu Santo pejitsipaecuena, bajarapamonae jamatabecueneenabiabatsi Espiritu Santo pejitsipaecuena pexanavanapaenexa. ⁶ Pamonaе saya exanavanapa pijacuata penatojitsipaecuena, bajarapamonae bepejamatabecuene tēpaevi Dioso pitabarata. Nexata Diosovecua naxuabiaya jinavanapa. Pamonaе pijinia exanavanapa Espiritu Santo pejitsipaecuena, bajarapamonae jamatabecuene barēyaya jinavanapa Dioso pitabarata. Bajarapamonae itsamatacabi xainae-nanua matacabi apo peverevere caejava. ⁷ Pamonaе saya exanavanapa pijacuata penatojitsipaecuena, bajarapamonae itoya Dioso. Tsipaji apo exanae pacuenia Dioso penajumecopatsilivaisi itorobatsi. Apo jamatabecuene caējēpaetsi pejumecovēnēt sinexa bajarapalivaisi. ⁸ Pamonaе saya exanavanapa pijacuata penatojitsipaecuena, bajarapamonae apo jamatabecuene caējēpaetsi pexanaenexa Dioso pejitsipaecuena.

⁹ Maparucaeje paxamē apo paexanavanapaemē pacuenia panijacuata panatojitsipame. Espiritu Santo, ponē Cristo itorobica, pepacuene pacatsijamatabēeca. Nexata Espiritu Santo pejitsipaecuena, paexanavanapame. Pajivi Espiritu Santo apo tsijamatabēecaetsi, bajarapajivi Cristo apo pijajivitonē. ¹⁰ Paneperabēto tēpaena pibisiacuene paneexanaejamatabēcuene. Itsiata Cristo papijajivixaemē, nexata pepo panejamatabēcuene athēbētatsia jinavanapaena daxitamatacabijavabelianexa. Tsipaji Dioso aneonijibia pacatane. ¹¹ Dioso asaēyaexanatsi Jesús petēpaecujinae. Nexata paxamē Espiritu Santo itsa pacatsijamatabēeca, pacuenia Jesús Dioso asaēyaexanatsi petēpaecujinae, bajara pijinia pacuenia paxamē ata Dioso pacaasaēyaexanaena panetēpaecujinae. Nexata panetēpaecujinae Dioso pacaperabēasaēyaexanaena Espiritu Santo papecat-sijamatabēecaexae.

¹² Tajamonae, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja vajacuata vajanatojitsipaecuena vajaexanabiabijavami. ¹³ Tsipaji pibisiacuene itsa paexanavanapaejitsipame panijacuata panenatojitsipaecuena, nexata itsa patēpame, Diosovecua panaxuabijitsipame daxitamatacabijavabelianexa. Itsiata baitsi jane Espiritu Santo papecayavenonaejamatabēcueneta itsa pacopatame panijacuata panenatojitsipaecuena pibisiacuene paneexanabiabijavami, nexata itsamatacabi paxainaename matacabi apo peverevere caejava.

¹⁴ Pamonaе exanavanapa Espiritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabējunua Espiritu Santo, Dioso pexitsi nacaexana. Saya beprijavivicueniatsi apo nacaexanae cjunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espiritu Santo pejamatabēcueneta: “¡Axa!” nacajaiyaexana vajavajētsijavata Diosojavabelia. ¹⁶ Vajajamatabēēthētota Dioso pija Espiritu Santo nacayapētaēyaexana Dioso pexicuenetsi. ¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobi-

aexanatsi, bajara pijinia pacuenia vaxaitsi ata itsamonae nacabejiobi-aexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuatatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tsipaji baja yapëtanetsi itsamatacabi bitso vajajamatabëcuenebarëyajavanexa Dioso pijanacuatsia. ¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanae-cuene. Bajarapamona vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajume-covënëtsivi, Dioso baja nacajamatabëcuenexaniavaeta. ²⁰ Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava. ²¹ Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. ²² Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsipaji xaina piavitane cuene, petëpaecuene ata. Nexata abaxë tsitecapona bajarapabejiobicuene mapamatacabijavaberena ataje. ²³ Daxita xua tanetsi mapanacuataje, bajaraëxua bajarapacuenia apo bejiobi piavitane cuene yabara. Vaxaitsi ata cajena bejiobitsi tsavanapae. Espíritu Santo vajanacatsijamatabëecaexae, yapëtanetsi mapacueneje. Dioso pexixaetsi itsamatacabi nacaperabëitothianaena pacuenia Cristo perabëitothianatsi. Nexata bitso jitsipatsi vajajamatabëëthëtovetsina Dioso vajanacaperabëitothianaenexa vajaperabëevereverecaejavavecu. ²⁴ Jumecovënëtsi Jesucristo vajanacasivatëpaejava pibisiacuene vajaxanaeneconi yabara. Nexata yapëtanetsi Dioso vajanacaperabëitothianaejavanexa. Bajarapacuenie nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapaetsi tsipae vajanacarajutsinexa. Tsipaji baja ajibi tsipae vajayabaracopiaevetavanapaejava itsa baja nacarajutsipa. ²⁵ Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajaajamatabëcuenesaëjibixae, Espíritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espíritu Santo bëpënëa bitso nacasivanajamatabëxainaeya nacatovajëtabiaba asaëyata Diosojavabelia. Xua apo vënëjonecapanepaetsi, Espíritu Santo nacatovajëtabiaba. ²⁷ Dioso cajena vajanacajamatabëcueneyapëtaenë pacuenia najamatabëxainatsi. Nexata Dioso yapëtane xua Espíritu Santo nacatovajëtsijitsia. Tsipaji Dioso vajanacatojitsipaecuenia, Espíritu Santo nacatovajëtabiaba

Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixaetsi yabara pelivaisi

²⁸ Yapëtanetsi mapacueneye. Daxita xua apo vajajitsipaecuene, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcueneëjëtsinexa. Nexata bajaraxua itsa nacajamatabëcueneëjëta, apo nacatsitapex-aniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcueneëjëtsijava pejamatabëcueneta vajanacajamatabëcuene asaëyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina. ²⁹ Vajanaexanaevajënaeya ata, Dioso yapëthane pexitsi vajanacaexanaejavanexa. Nexata vajanaexanaevajënaeya ata, Dioso nacasivanajamatabëcuenevereta vajanacaexanaenexa pacuenia pexënato jamatabëcueneitsi. Nexata vajanaexanaevajënaeya ata, Dioso nacasivanajamatabëcuenevereta Dioso pexënato peyuyapijivitsi ayaiBITSaëtotsi vajanacaexanaenexa. ³⁰ Bajarapacuenia vajanaexanaevajënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuajibiaexana pibisiacuene vajaexanaeconimi. Nexata baja aneconijibia Dioso nacatane. Nexata itsamatacabi Dioso yajavajinapanapenatsi Dioso pijapenivenivenaenacuatatsia.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonaenë. Nexata itsajivi ata apo caëjëpaetsi vajanacajamatabëcuene matatoxenetsinexa,” bejaitsi. ³² Dioso baja cajena apo nacavecuasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsi-javanexa daxita vajanamatavenonaecuene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caëjëpaetsi vajanacaneconitsinexa Diosojavabelia pibisiacuene vajaexanaejava yabara. ³⁴ Itsajivi ata cajena apo caëjëpaetsi vajanacaneconitsiaexanaenexa pibisiacuene vajaexanaejava yabara. Tsi-paji baja capanepaeya Jesucristo nacasivatëpa vajanacaneconimata-motsinexa. Nexata Cristo petëpaecujinae Dioso icatsia asaëyaexanatsi. Maparucaje Jesucristo eca athëbëtatsia, Dioso pemuxuneneta, pecujua-nenia. Cristo pijajivitsi Diosojavabelia nacayajivicuaicuajiai. ³⁵ Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecuacopiarucaeyaexanaenexa. Nacabejiob-iaexanae ata tsipae, piayapëbejecuene nacatocopiapatsi ata tsipae, itsi-ata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. ³⁶ Vaxaitsi yabara mapajamatabëcuenelivaisi

jëpaje. Bajayata Dioso pijajivi navajunupaeba Diosojavabelia pacuenia itsamonaë bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaitsi mapacueni-aje:

Xamë Diosomë, panijajivixaeenë, daxitamatacabi itsamonaë jamatabëpanebejejababiaba picani. Pacuenia oveja pebeyaxu-abinexa capona, bajarapacuenia jamatabëpaneexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona.
³⁷ Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene matatoxenetabianatsi. Tsipaji Cristo vajanacaasivanë, nacayavenonabiabiana. ³⁸ Nexata yapëtaniji mapacuenije. Itsacuenjavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajaasaëtsavanapaecuene ata, angelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Playapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. ³⁹ Athëbëabetsia vajaponaëjava ata, ira bëxëpanabereca vajaponaëjava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaëjava, itsacuenjavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

9

Pacuenia Dioso pijajivinexa itapeta judíovi yabara pelivaisi

¹ Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo tajamatabëëthëtota neyapëtaeyaexana. ² Bitso sivanajamatabëxainajë tavëna judíovi, Israel nacupijivi. Belia betaajamatabëtane tasivanajamatabëxainaejava bajarapamonaë. ³ Bajarapamonaë apo pejumecovënëtsixae Cristo, bitso sivanajamatabëxainajë. Bajaraxuata bajarapamonaë yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonaë juya pecapanepaenexatsi, nexata bajarapacuenia exanaëjitsipajë bajarapamonaë Dioso pecapanepaenexatsi,” jamatabëjanë belia tavëna judíovi yabara. ⁴ Bajarapamonaë judíovi, Israelpijinë pemomoxi. Bajarapamonaë pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaëmijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaëmi pejumecovënëtavapnaenexa. Dioso picani itorobanua bajarapamonaëmi pexanaenexa templobo,

bajrapabota pevajęcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenęcaxatsi pibisiacuene pexanaeconomivecua. ⁵ Bajrapamonaemi pijasalinaivimi, pevęcęjonevimi Dioso pejumecovęcęcęsįjava. Cristo itsa naexana mapanacuataje, judięcęcuenia naexana. Cristo nexata pijamonae judięcęvi. Bajraponęcę Cristo, Diosonęcę baja cajena, daxitacuene pevetsinęcę. Nexata bajaraponęcęjavabelia jivi jumai tsabiabi tsane: “Xamęcę Cristomęcę, bitso baja cajena ayaijamatabęcęcuenenęcęcę,” jai tsabiabi tsane daxitamatacabįjavabelianexa. Bajara itsi tsane.

⁶ Itsiata daxita judięcęvi apo jumecovęcęcęsi pacuenia Dioso najumecapanepaeya jumaitsi. Nexata Dioso apo toexanae daxita judięcęvijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabęcęcuenenavęcęxaniabiaya apo bejumaitsitsi mapacueniaje: “Pacuenia Dioso najumecapanepaeya jumaitsi judięcęvijavabelia petoexanaenexa, bajarapacuenia itsiata Dioso apo toexanae daxita judięcęvijavabelia,” apo bejaitis vaxaitsi jamatabęcęcuenenavęcęxaniabiaya Dioso yabara. Bajrapacuenia Dioso yabara vaxaitsi jamatabęcęcuenenavęcęxaniabiaya apo bejumaitsitsi. Tspaji Dioso tajęcęvelia apo itapetsi daxita judięcęvi pijajivinexa. Bajrapaxuata pacuenia Dioso tajęcęvelia najumecapanepaeya jumaitsi, apo toexanae daxita judięcęvijavabelia. ⁷ Tspaji bajayata Abrahampįjinęcę pemomoxi ayaibitsaęcęto xainae ata, daxita itsiata Dioso apo totaetsi Abrahampįjinęcę pepo pemomoxicuenia. Dioso tajęcęvelia jumaitsi Abrahampįjinęcęjavabelia mapacueniaje: “Anįjanęcębeje nexęcęnatobeje xainae atamęcę tsane, taitapetsinęcęxae, caenęcę nexęcęnato, Isaac, pexi catotaenatsi pepo nemomoxicuenia,” jai Dioso. ⁸ Bajrapaxuata yapęcętanetsi mapacuenieje. Pajivi naexanae ata Abrahampįjinęcę pemomoxiyajuvęcęcęjivi, itsiata bajarapajivi Dioso apo taetsi Abrahampįjinęcę pepo pemomojivicuenia. Matapania pajivi jumecovęcęcęta pacuenia Dioso najumecapanepaeya jumaitsi, bajarapajivi jane baja Abrahampįjinęcę pepo pemomojivicuenia tanetsi Dioso. ⁹ Dioso tajęcęvelia najumecapanepaeya jumaitsi Abrahampįjinęcęjavabelia mapacueniaje: “Icatsia caevaicujinae patsianajęcę. Nexata nijava, Sara, xainaena pexęcęnatonacueto,” jai Dioso Abrahampįjinęcęjavabelia Isaacpįjinęcęnaxa yabara.

¹⁰ Nexata jane baja xuacujinae Isaacpįjinęcę naexana. Bajrapaxuacujinae icatsia bexęcę Isaacpįjinęcę baja pepuanacojiobi, Dioso icatsia tajęcęvelia jumaitsi vajasalinainęcę Isaacpįjinęcę pijava Rebecapįjįjavabelia, Rebecapįjįva baja pepuayacotaponaponae sapalanęcębejenexa. ¹¹⁻¹³ Itsa abaxęcę bajaraponęcębeje apo naexanaebeje, pexaniacuene ata abaxęcę itsa apo exanaebeje, pibisiacuene ata abaxęcę itsa apo exanaebeje, bajarapamatacabį Dioso tajęcęvelia jumaitsi Rebecapįjįjavabelia mapacueniaje: “Panacuetonęcęyo copiaya cavecuaexanaena, bajaraponęcęyo jamatabęcęcueevetsiana pejuyapįjinęcę pitorobabiabinexatsi pijajivitonęcęcuenia,” jai Dioso tajęcęvelia Rebecapįjįjavabelia. Bajrapacuenia Dioso pejumaitsįjava Rebecapįjįjavabelia najumejęcępabeje pacuenia jumaitsi Dioso pejumelivaisibaxutota. Rebecapįjįva pexęcęnatobeje yabara Dioso pejumelivaisibaxutota jumaitsi mapacueniaje: “Asivanęcę juyapįjinęcę Jacob, matapįjinęcę Esau matatoxenetsia,” jai Dioso pejumelivaisibaxutota Dioso pejumaitsįjava. Nexata bajaraponęcębeje tocopiapatatsibeje

pacuenia Dioso tajëvelia jumaitsi pacuenia Dioso itapetsijitsiatsi juyapijinë. Baitsi Jacob Dioso pijajivitonënexa itapetatsi matapijinëvecua. Nexata bajarapacuenia yapëtanetsi mapacueneye. Dioso cajena baitapeta pajivi jamatabëitapeta pijajivitonënexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajëvelia itapeta juyapijinë matapijinëvecua penaexanaevajënaeyabeje ata cajena.

¹⁴ Pajivi Dioso jitsipa pitapetsinexa, nexata ita itapeta, bajaraxua yabara vaxaitsi apo bejumaitsitsi mapacueniaje: “Dioso baja pacuenia exana, apo xanepanae,” apo bejaitsi vaxaitsi.

¹⁵ Tsipaji cajena Dioso bajayata jumaitsi Moiséspijinëjavabelia: “Pajivi jamatabëitaxutotsoniataniji, itaxutotsoniataenajë,” jai Dioso.

¹⁶ Nexata pajivi Dioso jamatabëitaxutotsoniatane, itaxutotsoniatane. Nexata itsajivi apo jamatabëjumaitsi ata: “Jitsipajë xanë Dioso taneitaxutotsoniataejava,” apo jamatabëjai ata, itsiata Dioso itaxutotsoniatanetsi.

Bajarapajivi itsacuenejavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi.

¹⁷ Palivaisi bajayata Dioso jumaitsi Egiptonacua pevetsinëjavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanë catocopatatsi nevetsinexa nijaira. Pinijicuene taexanaejava exanaenajë paxamë tuatujëta. Itsiata baitsi jane apo nejumecovënëtsimë tsane.

Nexata daxita nacuapijivi neyapëtaena tasaënëcuene,” jai tsarucae Dioso pejumelivaisibaxutota Egiptonacua pevetsinëjavabelia Dioso pejumaitsijava.

¹⁸ Nexata pajivi Dioso jamatabëitaxutotsoniatane, itaxutotsoniatane. Pajivi pijinia Dioso jamatabëjamatabëcuenetajayaexana pejumecovënëtsiyanivatsi, ajamatabëcuenetajayaexana.

¹⁹ Nexata meta Dioso yabara pajumait-simë tsane: “Bajarapacuenia Dioso jivi ita ajamatabëcuenetajayaexana pejumecovënëtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovënëtsi Dioso piamatabëcuenetajaya exanaexaetsi” pajamë meta tsane Dioso yabara.

²⁰ Tajamonae, pëtsa bajarapacuenia pajumait-simë. Dioso yabara cajena bajarapacuenia apo bepajumait-simë. Tsi-paji Dioso pacaexana. Canalito ita caëjëpaejitsipatsi pecuaicuaijainexa, itsacanalitovecua saicyacuenia faratsi atatsi, pefaratsivatsijavabelia apo jumaitsi tsipae: “¿Detsa xuajitsia itsacanalitovecua saicyacuenia nefaratame?” apo jai tsipae pefaratsivatsijavabelia.

²¹ Tsipaji atsananitota canalito pefaratsiva caëjëpatsi canalito pefaratsinexa pacuenia jamatabëfarata. Nexata caëjëpatsi pefaratsinexa copiaya pexania-canalito bo tuatujëta itabëtsiaya peetsinexa. Bajaraxuacujinae bajara paatsananitoyajuvënëjavata caëjëpatsi pefaratsinexa itsacanalito, beveliacanalito, pecajayababiabinexa saya.

²² Bajara pijinia pacuenia Dioso baja exana jivijavabelia pacuenia tsitanepanatsi. Ayaicuenia Dioso jamatabënaneconitsiaexana daxita pamonaenaneconita bajaraponëjavabelia. Jamatabësitajëtanua pesaë bajarapamonaejavabelia. Itsiata baitsi jane abaxë bajayajebi Dioso najamatabëcuenecataita peverebiabivijavabelianexa.

²³ Biji rajane pamonaen Dioso jamatabëcapanepa, bajarapamonae capanepaena. Bajarapacuenia Dioso jamatabëexana vaxaitsi vajanacaitaxutotsoniataevijavaberena, vajanacaitanajamatabëcuene itajëtsinexa ayajamatabëcuene pexanaejava. Tsipaji baja cajena vjanaexanaevajënaeya ata, Dioso nacaitapeta

vajayajavajinavanapaenexa athëbëtatsia. ²⁴ Vaxaitsi judíoviyajuvënëvitsi. Itsamonae vaxaitsiyajuvënëvi apo judíovi. Itsiata Dioso nacajunata daxitatsi pijajivinxatsi. ²⁵ Dioso pejumelivaisibaxutota, bajayata Oseaspijnë peyaquinaebaxutota, Dioso pejumaitsijava apo judíovi yabara, tajëvelia jumaitsi mapacueniaje:

Pamonae picani apo tajajivi, bajarapamonae yabara jumaitsinë tsane: “Tajajivi raja mapamonaeje,” janë tsane. Bajarapamonae picani apo jitsipaenë. Itsiata bajarapamonae yabara jumaitsinë tsane: “Tajajivi raja mapamonaeje, tasivavi,” janë tsane. ²⁶ Panacuapijivijavabelia picani jumaitsinë tsane: “Paxamë raja apo patajajivimë,” janë tsane picani, itsiata bajarapanacuapijivi bexëa nejumecovënëtsiana. Nexata bajarapanacuapijivi yabara itsamonae jumai tsane: “Mara pamonaeye Dioso piasaëtsaponaponaenë pexije,” jai tsane,

jai Oseaspijnë bajayata peyaquinaebaxutota, pamonae apo judíovi ata, Dioso pijajivi pexanaejavanexatsi yabara.

²⁷ Isaíaspijinë pijinia bajayata tajëvelia judíovi yabara jumaitsi mapacueniaje: “Israelpijnë pemomoxi bitso ayaibitsaëtoخانeto tsane. Pacuenia manuamenepijitajetaboatsapërë itsi, bajara itsane. Itsiata baitsi jane bajarapamonaeyajuvënëvi, caejiviyobeje saya, Dioso capanepaenatsi. ²⁸ Daxita pamonaeye naneconita Diosojavabelia, bajarapamonae naxanitsiayo Dioso naneconitsiaexanaena,” jai Isaíaspijinë peyaquinaebaxutota. ²⁹ Itsabaxutota pijinia Isaíaspijinë peyaquinaebaxutota, icatsia jumaitsi mapacueniaje:

Dioso raja ángelevi ayaibitsaëtoخانeto penamatacaitorobinë. Bajaraponë Dioso itsa apo nacaitaxutotsoniatay tsipae, nexata daxitatsi vaxaitsi, Israelpijnë pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomara-pijivimi, Gomorra tomarapijivimi ata, jai Isaíaspijinë peyaquinaebaxutota.

Pacuenia judíovi apo jumecovënëtsi pexanialivaisi jivi pecapanepaelivaisinexatsi yabara pelivaisi

³⁰ Vaxaitsi yapëtanetsi mapacueeneje. Apo judíovi picani apo jumecovënëtsi ata Dioso aneconijibia petanexatsi, itsiata Dioso aneconijibia tanetsi, pejumecovënëtsixae Jesucristo pesivatëpaejavatsi pibisiacuene pexanaeconi yabara. ³¹ Itsiata baitsi jane judíovi jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caëjëpaetsi pejumecovënëtsicapaneapaenexa bajarapalivaisi. ³² Apo caëjëpaetsi Dioso aneconijibia petanexatsi. Tsipaji judíovi apo jumecovënëtsi Jesucristo pesivatëpaejavatsi pibisiacuene pexanaeconi yabara. Biji rajane jamatabëcuenenavëxaniabiaya jumai tsabiabi. “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijinavanapa, Cristo Dioso athëbëvetsica pitorobijavatsitsica, apo pejumecovënëtsixae. Caranata saya anaepanabiaba bajarapalivaisi yabara. ³³ Dioso tajëvelia Cristo yabara pejumaitsijava, Dioso pejumelivaisibaxutota jumaitsi mapacueniaje:

Puenetanuntsianajë Jerusalén tomarata ponë itorobijitsianë jivi peca-panepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane, jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

10

¹ Tajamonae, jitsipajë bitso tajamatabëëthëtovetsina judíovi Dioso peca-panepaenexatsi. Bajaraxuata tovajëtabiabajë Diosojavabelia. ² Judíovi picani Dioso ayaicuenia bitso jamatabëtonacuenebabiaba Dioso pesivarabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavanapaenexa. Judíovi saya jamatabëcuenenavëxaniababiaba. ³ Bajarapamonae apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi. ⁴ Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bajaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

⁵ Pamonae jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaitsi mapacueniaje: “Pajivi jumecovënëtsicapanepeana daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinë bajayata peyaquinaelivaisita. ⁶ Nexata baja pamonae jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaitsi mapacueniaje: “Pëtsa pajamatabëjumaitsimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. ⁷ Pëtsa pajamatabëjumaitsimëna: ‘¿Jipatsa meta ponaena, itsabereca petëpaevi jinavanapa, piasaëyaexanaenexa petëpaevivecua vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tsipaji baja Cristo athëbëvetsica patsica vajanacativatëpaenexa mapanacuataje. Petëpaecujinae ata baja icatsia Cristo asaë petëpaejavavecua vajanacacapanepaenexa. ⁸ Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaijaijamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. ⁹ Itsamatacabi Diosojavabelia papecacapanepaevi tsane itsa paexanavanapaename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene.

Pajumecovënërenua panejamatabëëthëtojavavetsina Jesús petëpaeucujinae icsatsia Dioso piasaëyaexanaejavatsi. ¹⁰ Tsipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneconijibia tanetsi. Jivi pecuibovojo-tota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

¹¹ Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. ¹² Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonaevajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjava. Nexata baja Dioso pejumelivaisi yacaëjëpa daxitanacuanëjava,

jai Dioso pejumelivaisibaxutota.

¹⁹ Judíovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitsijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae

piciani. Itsiata tajajivi exanaenajë. Nexata bajarapamonae pacuenecaëbiaanaepanename, jai Moiséspijinë bajayata peyaquinaebaxutota Dioso tajëvelia pejumaitsijava judíovijavabelia.

²⁰ Isaíaspijinë ata bajayata ajumejunavijibia jumaitsi Dioso tajëvelia pejumaitsijava. Apo judíovi yabara Dioso pejumaitsijava, Isaíaspijinë jumaitsi mapacueniaje:

“Pamonae piciani apo nejitsipae, apo nejumecovënëtsinua, bajarapamonae itsiata itsamatacabi nejumecovënëtsiana. Nexata baja neyapëtaena. Bajarapamonae apo nevënëlvivaisianijobi ata, namatabëcueneitajëtsianajë bajarapamonaejavabelia,” jai Dioso tajëvelia,

jai bajayata Isaíaspijinë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata. ²¹ Biji rajane judíovi yabara Dioso pejumaitsijava, Isaíaspijinë bajayata jumaitsi mapacueniaje: “Daxitamatacabi junatabiabajë pamonae apo nejumecovënëtsi. Bajarapamonae apo exanae taitorobicuenia,” jai bajayata Isaíaspijinë Dioso pejumaitsijava judíovi yabara. Nexata nayapëtane mapacuenije. Judíovi junatsi atatsi Dioso, itsiata apo jumecovënëtsi Dioso pecapanepaenexatsi.

11

Pacuenia judíovi, Israel nacuapijiviyajuvënëvi, Dioso capanepaejitsiatsi yabara pelivaisi

¹ ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë ata raja judionënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënënë. ² Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapëtaneme rabaja pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje:

³ “Tajatuxanënë, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebexuaba,” jai pina profeta Elíaspijinë Diosojavabelia Israel nacuapijivi yabara. ⁴ Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamonae xaniavaetia nejumecovënëtavanapa. Pematabacabëta apo tonubenae penavajëcaenexa Baalvënënë, jumapecaetaeya pexanaenëtsi, pitabarata,” jai pina Dioso bajayata profeta Elíaspijinëjavabelia.

⁵ Bajara pijinia itsi maparucacae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi epexaniacuene Dioso petoexanavanapaejava yabara, nexata saya bajarapamonae Dioso itapetsipatsi epexaniacuene petoexanavanapaejava yabara. Nexata

bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovënëtsivi. Bajarapamonae apo jumecovënëtsi Dioso pecapanepaejavanexatsi. Itsi-ata baitsi jane bajarapamonaeyajuvënëvi, caejiviyobeje, Dioso itapetatsi pijajivinxexa. Bajarapamonae jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovënëtsi bajarapalivaisi. Tsipaji ajamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebiabiata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. ⁹ Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba, jamatabëcuenenavëxaniabiaya jamatabëjumai tsabiabi: “Dioso cajena nacasivabarëya. Bajaraxuata ayaijava vajaxinaejava xainatsi,” jamatabëjai tsabiabi. Itsiata baitsi jane pebarëyajavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. ¹⁰ Bajarapamonae apo yapëtae pijaneconi peyajavajinavana-paejava daxitamatacabi. Pacuenia bitso piarevejava pecaponaeivi, nabëxëtsutsiaya bacapona, bajara itsi bajarapamonae pejamatabëëthëtota pijaneconi yabara. Bitso yanajamatabëxaina pijaneconi,

jai bajayata Davidpijinë Israel nacuapijivi, Dioso apo pejumecovënëtsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia. ¹² Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuen, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuen caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso

taneitorobicuene. Dioso nitoroba paxamē apo pajudíovimējavabelia patacatsipaebinexa Dioso pejumelivaisi. Nexata jamatabējumaitsinē: “Dioso cajena netocopata ayaijamatabēcuene pexainaelivaisi jivi tatsipaebaponaenexa,” jamatabējanē. ¹⁴ Bajarapacuenia Dioso pejumelivaisi pacatsipaebaponatsi tsipaji jitsipajē tajaviriavi ata, judíovi, Dioso petoexanaenexatsi pacuenia paxamē ata Dioso pacatoexana papecacapanepaenexa. Nexata meta bajarapacuenia judíoviyajuvēnēvi ata jumecovēnētsiana Cristo pelivaisi pecapanepaenexatsi Diosojavabelia. ¹⁵ Judíoviyajuvēnēvi Cristo navecuaitaveta. Nexata juya pamonaē apo judíovi, Dioso barajamatabēcuenexanepanaeyatane. Pamatacabi judíovi jumecovēnētsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetēpaevi Dioso tanetsi apo pejumecovēnētsixae Cristo pelivaisi. Nexata pamatacabi judíovi jumecovēnētsiana Cristo pelivaisi, Dioso taenatsi petēpaecujinae bepiasaēyaexanaevitsi. ¹⁶ Panbē jivi ofrendacuenia itsa rajuta Diosojavabelia, copiaya pexanaepanbē barajuta. Nexata bajarapapanmatabēta cotocaevi pexanaepan ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxērananē ata Dioso pijamaxērananēcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuenia tane.

¹⁷ Dioso tane judíovi, beolivonaemaxērananē. Olivonaenē pexainaenē, pepo olivonaemaxērananē caucuba juya saicayaviria olivonaemaxēranaxi perubinexa bajarapacovēta. Nexata pepo olivonaē enētuaatuaejēpijimerana junua bajarapamaxēranaxi enētuaatuaejējava pejuvarubenaenexa pepo olivonaemaxēranajavaberena. Bajara pijinia pacuenia Dioso pacatoexana paxamē apo pajudíovimē. Judíovi apo pejumecovēnētsixae Cristo pelivaisi, paxamē juya, apo pajudíovimē, Dioso papijajivimē pacaexana. ¹⁸ “Judíovivecua Dioso papijajivinē paneexana. Nexata paayaijamatabēcuenevinē judíovivecua,” pajamē pētsa. Tsipaji payapētaneme mapacuenije. Naejava, petabunepe pejamatabēcueneta, xaniavaetsia apo nuca. Bajara pijinia paxamē ata paitsimē. Apo pacacaējēpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovēnētsi Cristo pelivaisi. Nexata judíovi apo pejumecovēnētsixae, Cristo pelivaisi juya paxamē Dioso pacaitaxutotsoniatane. Nexata pacatocopata Cristo pelivaisi panejumecovēnētsinexa Dioso papecacapanepaenexa panijaneconivecua.

¹⁹ Nexata meta pajumaitsimē: “Pacuenia olivonaenē pexainaenē, olivonaemaxērananē caucuba, bajarapacovēta juya perubinexa itsaviriaolivonaemaxēranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi,” pajamē meta. ²⁰ Pacuenia olivonaenē pexainaenē, pibisiamaxērana caucuta, bajara pijinia itsi Dioso. Dioso navecuatsata judíovi apo pejumecovēnētsixae Cristo pelivaisi. Pacuenia olivonaenē pexainaenē, pecaucutsimaxērana pecovēta juya itsaviriaolivonaemaxērana ruta, bajara pijinia pacuenia paxamē ata judíovi pejamatabēcuenemi, pacapita Dioso papijajivineexamē panejumecovēnētsixae Cristo pelivaisi.

Bjaraxuata pëtsa panataneme paayajamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava. ²¹ Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia itsa apo pajumecovënëtavanapaemë tsipae Cristo pelivaisi. ²² Bjaraxuata pacanaëjère mapacueje. Dioso bitso papecaitaxutotsoniataexae, pacatocopata Cristo pelivaisi panejumecovënëtsinexa. Pacanaëjèrenua mapacueje. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaë apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. ²³ Judíovi Dioso pejumeaebijava itsa copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenë pexainaenë, pecaucutsimaxëranami icatsia caevëarena pecovëta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxërana ruta pepo olivonaemaxëranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudíovi atamë Dioso papijajivinexamë. Paxamë apo pajudíoviriavi atamë, itsiata Dioso pacapita papijajivinexamë. Judíovi biji toyapëxanepanatsi icatsia pepitsinexatsi Dioso pijajivinexa. Tspaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

²⁵ Tajamonae, panejamatabëjumaitsiyaniva mapacueniaje: “Vaxaitsi bitso vajayapëtaevi,” panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja. Nexata bajarapamonae apo jumecovënëtsi Cristo pelivaisi. Nexata ayailbitsaëtoxaneto apo judíovi, itsa jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi. ²⁶ Nexata daxita pamonaë judíovi, itsamat-acabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxitajivi pecapanepaenënexa. Bjaraponë daxita judíovi, pamonaë Israelpijnë pemomoxi, vecuajibiaexanaena pibisiacuene pexanaeconimi. ²⁷ Itsa bajaraponë vecuajibiaexanaena pibisiacuene pexanaeconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonae pijasalinaivimijavabelia,

jai tajëvelia Dioso pejumelivaisibaxutota Dioso pejumaitsijava judíovi pecapanepaejavanexa Cristo pejamatabëcueneta.

²⁸ Judíoviyajuvënëvi Dioso pijavajabitsaë naexana. Tsipaji apo jume-covënëtsi Cristo pelivaisi pecapanepaenexatsi Diosojavabelia. Itsi-ata abaxë tsiteca Dioso asiva judíovi. Tsipaji bajayata copiata Dioso itapeta bajarapamonae pijasalinaivimi pijajivinexa. ²⁹ Xua Dioso rajuta judíovijavabelia, apo vecuacanaviatsi. Pamonaë pijinia Dioso junata pijajivinexa, apo navecuaxuabi tsane. Nexata itsamatacabi bajarapamonae Dioso athëbëtatsia yajavaecaena daxitamatacabijavabelianexa. ³⁰ Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picaní apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. ³¹ Bajara pijinia pacuenia itsane judíovi ata. Maparucaëje abaxë judíovi apo jumecovënëtsi Cristo pelivaisi. Itsiata itsamatacabijavabelia judíovi ata Dioso itaxutotsoniataenatsi pacuenia paxamë ata Dioso pacaitaxutotsoniatane. ³² Dioso tocopata daxitajivi pijacuata penatojitsipaecuenia pexanavanapaenexa Dioso pitorobicueniatsi apo pejumecovënëtsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonae.

³³ ¡Dioso baja cajena pitaxutotsoniataenë daxitajivi pecapanepaenexa! ¡Dioso cajena bitso peyapëtaenë! ¡Daxitalivaisi bitso pejumeyapëtaenënu! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneyapëtaetsi. ³⁴ Dioso pejumelivaisibaxutota jumaitsi mapacueniaje. “Vaxaitsi apo jamatabëcueneyapëtaetsi xua najamatabëxaina Dioso. Apo nacacaëjëpaenua vajamuxujiobinexa ata. ³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. ³⁶ Tsipaji cajena Dioso pijacuata exana daxitacuenë. Evetanea daxitacuenë. Daxitacuenë baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomë, bitso ayaijamatabëcuenenëmë!” bejaitsi tsabiabi daxitamatacabijavabelianexa. Bajara itsi tsane.

12

Pacuenia Dioso pejumecovënëtsinë benajamatabëcuenerajuta Diosojavabelia pijajivitonënexa daxitamatacabijavabelianexa yabara pelivaisi

¹ Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuenë panejitsipaejava Dioso. ² Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuenecopare Diosojavabelia papecarajutsinexa pejanajamatabëcuene. Nexata bajarapacuenia

payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paxanabiabianame, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayajamatabëcuenevimë bitso. Biji rajane pacaevivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcuene copatsixae Diosojavabelia, bajarapacuenia saya baja panataema. ⁴ Jivi itsa naexana, yajavanaexana peperabëto, caeperabëtoreca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. ⁵ Bajara pijinia pacuenia vaxaitsi ata itsitsi, Jesucristojavabelia vajanajamatabëcuene copatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaeabiabatsi xaniavaetsia pacuenia nacajamatabëcuene caëjëpaeyaexana. ⁷ Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaeabiabinexa, xaniavaetsia betsipaeabiaba daxita pejamatabëcuenesaëta. ⁸ Pajivi pijinia Dioso jamatabëcuene caëjëpaeyaexanatsi itsamonae pemuxujiobabiabinexa pejamatabëcuenesaëyaexanaenexa Dioso pejumecovënëtsijava, bajarapajivi bemuxujiobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjjava bepejiobivijavabelia, berajutabiaba itsajamatabëcuene xainaenjeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonae ata bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹ Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. ¹⁰ Pacuenia nacaenapijivi bitso nasiva, bajarapacuenia panaasivamëre tsavanapae Cristo papijajivixaemë. Itsamonae Dioso pejumecovënëtsivi, patojitsipare itsamonae petaenexatsi ayajamatabëcuenevi paxamë matatoxenetsia. Namataenetsia panayaiyataeyabiabare.

¹¹ Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹² Pasivabarëyamëre tsavanapae. Tsipaji rabaja payapëtaneme itsamatacabi panexainaevajanexa matacabi apo peverevere caejava. Itsamonae itsa pacabejiobiaexana Cristo papijajivixaemë, bajayajebi ata,

pëtsa pacopatame. Daxitamatacabi pavajëtabiabare Diosojavabelia pacopatsinejevamë.

¹³ Itsajota Dioso pejumecovënëtsivi namatavenona, payavenonabiabare. Pamonae pacasivaxaina panijaboyaberena, xaniavaetsia pacopiapitabiabare.

¹⁴ Pamonae pibisiacuene pacaexana, patovajëtabiabare Diosojavabelia Dioso peyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

¹⁵ Pamonae barëya petocopiapatsixaetsi pexaniacuene, bajarapamonae paxamë ata pajamatabëcueneyavenonaeya barëyamëre. Pamonae pijinia nua petocopiapatsixaetsi apo pejitsipacuene, bajarapamonae paxamë ata pajamatabëcueneyavenonaeyanuema.

¹⁶ Najamatabëcuenejëpaeya pajinavanapare. Pëtsa panataneme paayajamatabëcuenevimë. Pamonae beveliajamatabëcuenevi ata, xaniavaetsia pataema. Xaniavaetsia payajavajinavanaparenu. “Xanë bitso tayapëtaenë itsamonae matatoxenetsia,” pajamatabëjamë pëtsa.

¹⁷ Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi.

¹⁸ Xua Dioso pacajamatabëcuenecaëjëpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitajivijavabelia itsacuene paexanaenejevamë.

¹⁹ Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaitisijava, Dioso pejumelivaisibaxutota jumaitsi mapacueniaje: “Pamonae pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota.

²⁰ Dioso pejumelivaisibaxutota itsabaxutota pijinia jumaitsi mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivaisibaxutota.

²¹ Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaëjitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuenecaeviaexanaename.

13

¹ Daxita pamonae gobierno pijajivi, papecayanacuaevetsivi, pacuenia bajarapamonae pacaitoroba, xaniavaetsia pajumecovënëtabiabare. Tsipaji bajarapamonae, caenë canacujitsia, Dioso pejamatabëcueneta pacayanacuaeveta. Daxita pamonae nacua pevetsivi, pacaeveta Dioso petocopatsixaetsi.

² Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamonae apo jumecovënëtsi, nexata bajarapamonae Dioso naneconitsiaexanaenatsi.

³ Pamonae pexaniacuene exanavanapa, nacuaevetsivi apo cjunavi. Pamonae pijinia pibisiacuene exanavanapa, nacuaevetsivi cjunava. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecayanacuaevetsivi.

⁴ Bajarapamonae Dioso pejamatabëcueneta nacuenebavanapa.

Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuaevevtsivi bepacujunavame. Tspijaji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamona pibisiacuene pexanaevi. ⁵ Bajaraxuata bejumecovënëtsi pamona vajanacayanacuaevevtsivi. Apo jumecovënëtsi saya vajanacananeconitsiaexanaeyaniva. Jume baja cajena. Biji rajane jumecovënëtsi tspijaji Dioso pijajivixaetsi, vajajamatabëcueneta yapëtanetsi pacuenia bexanavanapatsi. ⁶ Bajaraxuata nacuaevevtsivijavabelia impuestomatamo pamatamotabiabame panematamotsipalatata penaevtsinexa. Nacuaevevtsivi, Dioso pejamatabëcueneta, tocopatatsi nacua pevtsinexa. Nexata nacua ëpevtsicuene nacueneba.

⁷ Pacuenia pacaejivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonae yajuvënëvi itsa caetuata impuestomatamo, xuvajëto pamoneyabame, pamatamotabiabare. Pamona pijinia peyaiyataevtsi, payaiyataeyabiabare. Pamona peyaiyataevtsi, bajarapamonae pexaniacuenia pabaracuaicuajiamëre tsabiabi. ⁸ Pëtsa pamoneyabame itsajivi ata. Biji rajane pacuenia Cristo pacaa siva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapanepa Dioso Moisés pijinëta penajumecopatsilivaisi. ⁹ Dioso Moisés pijinëta penajumecopatsilivaisi, itaveta mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuajiamë itsajivi. Pëtsa cobecaëbame itsajivi pexainaejava,” jai Dioso Moisés pijinëta penajumecopatsilivaisi. Nexata paxamë itsa pajumecovënëtsicapanepaejitsipame daxita mapalivaisije, itsalivaisiyo ata yajava, pajumecovënëtsicapanepaejitsipame mapejumait-silivaisiyoje: “Asivamëre itsajivi ata pacuenia xamë nijacuata nasivamë,” pejailivaisiyo. ¹⁰ Tspijaji pajivi asiva itsajivi ata, pibisiacuene apo exanae bajarapajivijavabelia. Bajaraxuata itsa asivatsi itsamonae ata, nexata jumecovënëtsicapanepatsi daxita pacuenia Dioso nacaitoroba.

¹¹ Bajarapacuenia itsamonae ata biasivatsi. Tspijaji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanacapanepaenënexa, najetarucaena vajanacapanepaenënexa mapanacuvecuaje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica. ¹² Meravi abaxë aitaquiri. Itsa baja icatsia matabijitsia, pitaquirijavami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pijamatabëcuenetaquirijavami. Tspijaji baja imoxoyo pevajënae icatsia Jesucristo pepatsijavanexatsica. Bajaraxuata bexanavanapatsi ëpexaniacuene Dioso pejitsipaecuenia. ¹³ Aeconoxae baja vajavajënaeyabelia, jinavanapaenatsi xaniavaetsia vajayapëtaexae pexaniajailivaisi. Apo ponae tsanetsi piitajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavitota. Apo exanae tsanetsi itsacuenejava ata, xua pibisiacuene. Nabijataeya apo najumeanaentsi tsanetsi.

Itsamonae ata apo cuenecaēbi tsanetsinua. ¹⁴ Biji rajane vajētabiabianatsi vajatuxanenē Jesucristojavabelia vajanacayavenonabiabinexa. Vajatuxanenē Jesucristo nacajamatabēcuenesaēyaexanaena vajatojinavanapaenexa vajanacatojitsipaecuenia. Apo sivanajamatabēxainae tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajuajumecovēnētsivi itsa janitane pexaejava jumapecataeya pexanaenēanējavabelia peyajuvēnērajutsivi, “Pibisiacuene exana mapajivije,” pejaiyaniva, yabara pelivaisi

¹ Pajivi jumecovēnētsi ata Jesucristo pesivatēpaejavatsi pijaneconi yabara, itsiata abaxē itsa apo ajamatabēcuenesaē pejumecovēnētsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatēpaejavatsi pejumecovēnētsicujinae, copata baja pexaeyabiabijavami jumapecataeya pexanaenēanējavabelia perajutsiyajuvēnēvi. Nexata baja cjunava pexaejava, bepibisiacuene pexanaejava petaexae. Pētsa pajumeanaenotame bajarapitsijivijavabelia panexaeyaexanaenexa icatsia bajarapayajuvēnēvi. ² Itsamonae Cristojavabelia penajamatabēcuenecopatsivi, jamatabējumaitsi: “Daxitacuene xanepana vajaxaenexa,” jamatabējai. Itsamonae pijinia abaxē jamatabējumaitsi: “Dioso nacananeconitsiaexanaejitsipa jumapecataeya pexanaenēanējavabelia perajutsiyajuvēnēvi itsa xanetsi,” jamatabējai. Nexata ēpeubijava xane jumapecataeya pexanaenēanējavabelia perajutsiyajuvēnēvi pexaeyaniva. ³ Nexata pajivi xane jumapecataeya pexanaenēanējavabelia perajutsiyajuvēnēvi, pētsa bijiaya tane pajivi apo xae jumapecataeya pexanaenēanējavabelia perajutsiyajuvēnēvi. Pajivi pijinia apo xae jumapecataeya pexanaenēanējavabelia perajutsiyajuvēnēvi, pētsa neconitsiaya jumaitsi jivijavabelia: “Pibisiacuene exana pajivi xane jumapecataeya pexanaenēanējavabelia perajutsiyajuvēnēvi,” jai pētsa. Tsipaji Cristojavabelia penajamatabēcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. ⁴ Dioso apo pacatocopatsi Dioso pijajivitonē neconitsiaya jivijavabelia panejumaitsinexa mapacueniaje: “Xua exana bajaraponē, pibisiacuene. Nexata Dioso naneconitsiaexanaenatsi,” panejainexa. Dioso pijajivitonē xaniavaetsia Dioso itsa tonacueneba, xaniavaetsia apo tonacuenebi atanua, caenē, Dioso, toxanepanatsi, pacuenia jamatabējumaitsi, pejumaitsinexa pijajivitonējavabelia. Dioso cajena caējēpatsi peyavenonaenexa pijajivi pejitsipaecuenia xaniavaetsia petojinavanapaenexatsi pesivabarēyanexa.

⁵ Itsamonae Dioso pejumecovēnētsivi yaiyataeyabiaba matababi. Nexata itsamatabianēvecua caematababi yaiyataeyabiaba. Itsamonae pijinia najēpaeya tane daxitamatabianē. Pamonaē yaiyataeyabiaba caematababi itsamatabianēvecua, bajarapamonae xaniavaetsia beyapētane pajamatabēcuenelivaisi yabara yaiyataeyabiaba caematababi. Pamonaē ata pijinia najēpaeya tane daxitamatabianē, xaniavaetsia beyapētane pajamatabēcuenelivaisi yabara najēpaeya tane daxitamatabianē. ⁶ Pajivi nacueraeveta itsamatababi, bajarapajivi nacuer-

aeveta peyaiyataenexa Dioso. Pajivi pijinia apo nacueraevetsi bajara-pamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëanëjavabelia perajutsiyajuvënëvi, bajarapajivi xane peyaiyataenexa Dioso. Tsipaji jamatabëjumaiti: “Dioso cajena netocopata daxitacuene taxaenexa,” jamatabëjai. Nexata pexaniajamatabëcuene rajutabiaba Diosojavabelia. Pajivi pijinia apo xae jumapecataeya pexanaenëanëjavabelia perajut-siyajuvënëvi, bajarapajivi apo xae peyaiyataenexa Dioso. Tsipaji ja-matabëjumaiti: “Mapavije apo xanë tananeconitsiyanima Diosojav-abelia,” jamatabëjai. Nexata pexaniajamatabëcuene rajutabiaba Dioso-javabelia ëpeubijava pexaeyabiabixae.

⁷ Itsajivi ata vaxaitsiyajuvënëjivi, Dioso pejumecovënëtsijivi, apo pon-aponae ëpijacuata penatojitsipaecuenia pexanaponaponaenexa. Biji ra-jane exanaponapona pacuenia Cristo tojitsipatsi. Petëpaematacabinexa ata yabara, apo jamatabëjumaiti: “Tëpaenajë pamatacabi natojitsipajë tatëpaejava,” apo jamatabëjai. ⁸ Vaxaitsi abaxë vajaasaëtsavanapaepato, tojinavanapatsi pacuenia vajatuxanenë nacatojitsipa. Itsiata baitsi jane itsamatacabi, tëpaenatsi. Tsipaji Dioso nacatojitsipaena vajatëpaenexa. Aeconoxae abaxë vajaasaëtsavanapaevi, vajatuxanenë pijajivitsi tsavana-pae. Vajatëpaecujinae ata tsane, tsiteca vajatuxanenë pijajivitsi tsa-vanapae tsane. ⁹ Cristo baja cajena nacasivatëpa vajatuxanenë va-jaexanaenexa. Nexata icatsia Cristo asaë tsaponapona petëpaecujinae. Bajaraxuata Cristo daxitajivi pijatuxanenë. Piasaëtsavanapaevi, petëpaevi ata, daxita pamonaenajamatabëcuenecopata bajaraponëjavabelia, Cristo cajena pijatuxanenë.

¹⁰ Bajaraxuata nexata jumapecataeya pexanaenëanëjavabelia perajut-siyajuvënëvi paxamë panijabananë pexaejava yabara, baracuaicuai-jaiya apo bepajumaitsimë mapacueniaje: “Maponëje pibisiacuene ex-ana. Nexata Dioso naneconitsiaexanaenatsi,” apo bepajamë. Bijiaya ata apo bepataemë bajaraponë. Tsipaji cajena itsamatacabi daxitatsi vax-aitsi Cristo pitabarata nubenaenatsi, caejjivitsi canacujitsia, vajanava-junupaebaponaenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajëvelia jumaiti ma-pacueniaje:

Dioso tajëvelia jumaiti: “Xanë daxitamatacabijavabelianexa tasaëtsaponaponaenë. Nexata tajumaitisijume xaniajanë. Itsamatacabi daxitajivi taitabarata pematabacabëta netonubenaena taneyaiyataexae. Daxitajivi nevajunupaebiana Diosonëcuenenë,”

jai Dioso pejumelivaisibaxutota mapacueniaje Dioso tajëvelia pejumait-sijava daxitajivi yabara.

¹² Nexata vaxaitsi itsamatacabi, caejjivitsi canacujitsia, navajunupaebaponaenatsi Diosojavabelia daxita pacuenia exanavanapatsi ma-panacuataje.

Pacuenia Pablo itaveta Roma tomarapijivi Dioso penajuajume-covënëtsivi Diosovecua pejopaeyaexanaeyanima petsitaexanaejava pejamatabëcueneta yabara pelivaisi

¹³ Itsamatacabi caejjivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacu-ataje. Bajaraxuata itsanë vajabananë pexanaejava yabara, apo

bebaracuaicuaijaitsi pibisiacuena. Biji rajane bejamatabějumaitsitsi macpacueniaje: “Apo tsitaexanaenē tsane itsacuenejavayo ata, xua yabara itsajivi, Dioso pejumecovēnētšijivi, jamataběcuenebiji anaajtšipatsi,” bejamatabějajitsi. ¹⁴ Najamataběcuene copatajē xaniavaetsia vajatuxanenē Jesucristojavabelia. Nexata yapētaniji Dioso tanetocopatsijava taxaenexa xua picani cjunavajē taxaejava Jesucristojavabelia tanajamataběcuene copatsivajēnaeya. Itsiata meta itsanē Dioso pejumecovēnētšinē bajaraxua itsa xane, jamatabějumaitsi tsipae: “Dioso apo netocopatsi taxaenexa bajaraxua. Itsa xaejitsipajē, naneconitsipajē Dioso javabelia,” jamatabějajitsi tsipae. Nexata apo xae tsipae bajaraxua. ¹⁵ Panijabananē itsa apo pexaenē jumapecataeya pexanaenē anējavabelia perajutsiyajuvēnēvi, pētsa patsitaxaneme. Tsipaji paxamē itsa patsitaxaejitsipame jumapecataeya pexanaenē anējavabelia perajutsiyajuvēnēvi, panijabananē bepacativajamatabējijobi tsipae. Tsipaji panijabananē bepibisiacuene patsitaxanaejitsipame itsa patsitaxaejitsipame jumapecataeya pexanaenē anējavabelia perajutsiyajuvēnēvi. Nexata jumapecataeya pexanaenē anējavabelia perajutsiyajuvēnēvi, panijabananē itsa patsitaxaejitsipame, nexata panijabananē asivaya apo pataemē tsipae. Tsipaji itsa pacajanitaejitsipa panexaejava jumapecataeya pexanaenē anējavabelia perajutsiyajuvēnēvi, nexata bajaraponē ata naxaejitsipa. Nexata Dioso javabelia bepenaneconitsinē nataejitsipa penaxaexae jumapecataeya pexanaenē anējavabelia perajutsiyajuvēnēvi. Panetsitaxaejava pejamataběcueneta Diosovecua panenaxuabiaexanaeyaniva panijabananē, pētsa patsitaxaneme jumapecataeya pexanaenē anējavabelia perajutsiyajuvēnēvi. Tsipaji rabaja vajatuxanenē Cristo sivatēpa bajaraponē ata penaxuabiyana. ¹⁶ Payapētae atamē, xua picani xanepana paneexanaenexa, itsiata panijabananē itsa cjunava bajaraxua pexanaenexa, pētsa patsitaexaneme. Tsipaji panijabananē pacataejitsipa pibisiacuene bepaneexanaevi. ¹⁷ Vaxaitsi baja najamataběcuene copabatsi Cristo javabelia. Nexata jumecovēnētavanapatsi Dioso. Apo nacaitorobi vajanayanijobabiabinexa évajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamataběcuene jēpaeya vajajinavanapaenexa. Nacaitorobanua jamataběcuene barēyaya vajajinavanapaenexa Espiritu Santo vajanacatsijamataběcaexae. ¹⁸ Pajivi Dioso pijacuene tonacuene baponapona, sivajamataběcuene barēyatsi Dioso. Jivi ata xaniavaetsia yaiyataneysi.

¹⁹ Xua Dioso nacayavenona vajajinavanapaenexa najamataběcuene jēpaeya, bajaraxua exanavanapaenatsi. Xua ata nacayavenona namataenetsia vajanajamataběcuene asaēyaexanaenexa Dioso javabelia, bajaraxua ata exanavanapaenatsi. ²⁰ Pētsa patsitaxaneme xua panijabananē tane bepitaevetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinē Dioso javabelia nataejitsipa. Panexaejava pejamataběcueneta, bajarapajivi Diosovecua pajopaeyaexanaejitsipame. Bajaraxuayaniva pētsa patsitaxaneme xua cjunava panijabananē. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananē taejitsipa bepibisiacuene

paneexanaejava itsa paxaejitsipame. ²¹ Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa papamenua piatanera paneaitajibiyaniva. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë jamatabëcuene faefaenaeyaexanaejitsipatsi. ²² Itsa baja xaniavaetsia payapëtaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabëcuene copatsivajënaeya, saya pamoyamë tsane. Tsipaji Dioso yapëtanë pacuenia panajamatabëxainame bajaraxua yabara. ¡Bitso jamatabëcuenebarëya pajivi pexanabiabijava yabara jamatabëjumaitsi: “Dioso pitabarata aneconijibia toponaponajë,” jamatabëjai! ²³ Pajivi pijinia jamatabëjumaitsi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabëcuenebijianaejitsipa. Daxita pijinia xua yabara vaxaitsi jamatabëjumaitsi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaëjëtatsi vajabananë vajajamatabëcuene yavenonaenexa yabara pelivaisi

¹ Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamonaë abaxë jamatabëcuenefaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia. ² Biji rajane caejivitsi canacujitsia becanaëjëtatsi vajabananë vajajamatabëcuene yavenonaenexa. Xua yabara vajabananë ajamatabëcuenesaëjitsia, bajaraxua betoexanavanapatsi vajabananë pejamatabëcuenevitsabinexa Diosojavabelia. ³ Tsipaji Cristo ata, ponë Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanaë pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitsi, Dioso pejumelivaisibaxutota tajëvelia jumaitsi mapacueniaje: “Pacuenia picani jivi xamë pibisiacuena jamatabëcabaracuaicuaajai, xanë nebaracuaicuaajai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitsi. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitsi bajarapalivaisita vajanacacapanepaenexa. ⁵ Itsacuenejavaxi yabara bajayajebi itsa nacamatabëcueneëjëtaponä, nexata Dioso nacajamatabëcuene yavenonapona. Nacajamatabëcueneasaëyaexanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapaenexa Jesucristo papecatotjitsipaecuenia. ⁶ Nexata daxita paxamë najamatabëcuenejëpaeya vajatuxanenë

Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pija-jivinxatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yayataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavana-paenexatsi,” jai tsabiabi tsane. ⁸ Mara pacajumaitsisije. Jesucristo athëbëvetsica patsica mapanacuayabetsicaje peyavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaiti judíovi pijasalinavivajavelia. Nexata bajarapacuenia Dioso pexaniajainëcuene najamatabëcuenëitajëta judíovijavabelia. ⁹ Jesucristo athëbëvetsica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitisijava, Dioso pejumelivaisibaxutota jumaiti mapacueniaje:

Xanë tajamatabëcueneta, daxitanacuanëpijivi: “Diosomë, bitso ayaijamatabëcuenenëmë,” cajai tsabiabi tsane. Catonaxëanabiabiananu vajianë ata,

jai Dioso pejumelivaisibaxutota paxa Diosojavabelia Cristo pejumaitisijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaiti mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava,

jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaiti icatsia mapacueniaje:

Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonaejavabelia pajumaitsimëre: “Caenë Dioso bitso ayaijamatabëcuenenë,” pajamëre, jai Dioso pejumelivaisibaxutota.

¹² Isaíaspijinë pijinia itsabaxutota tajëvelia yaquina Jesucristo pelivaisi. Jumaiti mapacueniajë:

Penacuetonëyo naexanaena. Nexata Isaíaspijinë bepemomonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpijivi. Pamonae apo judíovi, jumecovënëtsiana bajaraponë pesivatëpaejavatsi pecapanepaenexatsi pijaneconivecua, jai tajëvelia Isaíaspijinë peyaquinaebaxutota Jesucristo yabara.

13 Yapëtanetsi Dioso vajanacapanepaejavanexa Jesucristo pejamatabëcueneta. Nexata pacatovajëtatsi Dioso papecajamatabëcuene barëyayaexanaenexa. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacajamatabëcueneyavenonaena tsipaji Dioso pajumecovënëtame. Espiritu Santo ata, ponë pacatsijamatabëeca, pesaëta panevajënaeyabelia pacajamatabëcuene asaëyaexanaponaena Dioso papecacapanepaejavabelianexa.

14 Tajamonae, pacayapëtanetsi paxamë papexaniajamatabëcuenevijavamë. Pacayapëtanetsinua paxamë bitso paneypëtaejava Cristo papecasivatëpaejava pibisiacuene paneexanaeneconi yabara. Pacayapëtanetsinua paneypëtaejava xaniavaetsia namataenetsia panenamuxujobinexa. 15 Tajamonae, palivaisi baja payapëtaneme, bajarapayajuvënëlivaisi panenajamatabënapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. 16 Dioso taneitaxutotsoniataexae, bajarapacuenia nitoroba Jesucristo pijajivitonëxanë Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajë pexanialivaisi, Jesucristo pelivaisi, pecapanepaelivaisinexatsi Diosojavabelia. Espiritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

17 Jesucristo pijajivitonëxaenë, Jesucristo neyavenonabiaba ita tonacuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso. 18 Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi ita jumetane tatsipaebabiabilivaisi, ita tanenua Dioso pesaëta pinijicuene taexanaponaejavanë, bajarapamonae jumecovënëta baja Jesucristo pesivatëpaejavatsi pibisiacuene pexanaeneconi yabara. 19 Vajatuxanenë Dioso pesaëta nejamatabëcuenecaëjëpaeyaexana pinijicuene taexanaenexa. Espiritu Santo ata pesaëta nejamatabëcueneyavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daxitanacuanëjava. Tajënacujavabelia ata, Ilírico nacujavabelia, tsipaebaponajë. 20 Itsa tsipaebaponajë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlivaisitae Cristo. Apo jitsipaenë tatsipaebaponaejava itsaxuayo baja tavajënaeya itsamonae tsipaebapona. 21 Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniaje:

Pamonae abaxë apo vënëlivaisitae, ponë athëbëvetsica Dioso itorobijitsiat-sica jivi pecapanepaenexa, bajarapamonae bajaraponë pelivaisi

tsipaebianatsi. Nexata bajarapamonae jumecovënëtsiana ponë pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba Roma tomarabelia yabara pelivaisi

²² Bajayajebi picani bitso jamatabëpacataeyabiabatsi. Itsiata apo necuenecaëjêpae taponanexa paxamëjavabelia daxitanacuanëjava Dioso pejumelivaisi tatsipaebanajetarucaexae. ²³ Aeconoxae baja veretajë tanacuenebija mapanacuajavaje. Nexata jane baja ponaenajë paxamëjavabelia. Tspaji picani bajayajebi jamatabëpacataeyabiabatsi. ²⁴ Pamatacabi ponaenajë España nacuyabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponanexa jane baja España nacuyabelia. ²⁵ Bajara masaya pamatacabitaje ponaenajë Jerusalén tomarabelia ofrenda tatocaponanexa Dioso pejumecovënëtsivi. ²⁶ Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamona bepejiobivi, Jerusalén tomarata pejinavanapaevi. ²⁷ Macedonia nacuapijivi, Acaya nacuapijivi ata, apo judíovi. Itsiata tsitaxanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tspaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamona apo judíovi ata, yapëtane baja pecapanepaelivaisinexatsi Diosojavabelia. Bajaraxuata pamona apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸ Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuyabelia, copiaya patsianajë paxamëjavata. ²⁹ Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenebarëyanexa.

³⁰ Tajamonae, pajumecovënëtime vajatuxanenë Jesucristo. Paneasivamënua Espíritu Santo pejamatabëcueneta papecajamatabëcueneitorobixae pataniasivanexamë. Bajaraxuata pexaniacuene pacavajëtatsi. Itsa pavajëtame Diosojavabelia, xanë ata asaëyata panetovajëtsianame, pacuenia tajacuata natovajëtabiabajë. ³¹ Panetovajëtsianame Diosojavabelia taneyavenonaenexa taneitsacueniabiyanima Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianë. Pamona apo judíovi pejebipalataxae, belia bajarapaofrenda apo nevecuapitsi tsipae bajarapamonae judíovi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiabatsi Diosojavabelia papecajavaponaponanexa Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara itsi tsane.

16

Pacuenia Pablo jamatabĕnajinalia peyapĕtaevitsi, Roma tomarapijivi, yabara pelivaisi

¹ Payavenonaename vajabanava Febe, pova ponaejitsia paxamĕjavabelia. Bजारapova yavenonabiaba Dioso pejumecovĕnĕtsivi, Cencrea tomarapijivi. ² Pacopiapitsianame xaniavaetsia bajarapova vajatuxanenĕ Jesucristo pejamatabĕcueneta, pacuenia vaxaitsi copiapitabiabatsi Dioso vajanajuajumecovĕnĕtsivi. Xua namatavenona bajarapova, payavenonaename. Tsipaji bajarapova yavenonabiaba ayaiBITSaĕto Dioso pejumecovĕnĕtsivi. Xanĕ ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bजारapajivibeje tayajavanacuenebijivibeje vajatuxanenĕ Jesucristo pijacuenene. ⁴ Bजारapajivibeje toyai atatsibeje petĕpaejavanexabeje picani, necapanepabeje tatĕpaejavaminexavecua. Nexata jumaitsinĕ: “Pexaniacuenene baja cajena bitso panetoexanamebeje,” janĕ bajarapajivibejejavabelia. Itsiata ĕxanĕ bajarapacuenia apo jumaitsinĕ. Daxita pamonaĕ apo judĭovi, Dioso pejumecovĕnĕtsivi, bajarapamonae ata, bajarapacuenia jumaitsitsibeje tanecapanepaexabeje. ⁵ Pamonaĕ Dioso pejumecovĕnĕtsivi, pamonaĕ nacaetuatabiaba Priscabeje Aquilabeje pijabota, bajarapamonae ata nebajacobiana. Nebajacobiananua tasiVANĕ Epeneto. Bजारaponĕ daxita Asiavĕnĕ nacuapijivivecua copiyaya najamatabĕcuenecopata Jesucristojavabelia. ⁶ Nebajacobiananua Maria, pova bitso tonacuenebabiaba Dioso pijacuenene paxamĕ tuat-uajĕta. ⁷ Nebajacobiananua tajanacuapijinĕbeje, Andrĕnicobeje Juniasvĕnĕnĕbeje. Bajayata bajaraponĕbeje panenajuajeba penaneconitsivi pejebabiabibota. Bजारaponĕbeje yayataeya baracuaicuaijatsibeje pevĕna apĕstolevi ata. Xanĕ ata tanajamatabĕcuenecopatsivajĕnaeya, bajaraponĕbeje najamatabĕcuenecopatabeje Cristojavabelia.

⁸ Nebajacobiananua Ampliato. Bitso tasivanĕ. Tsipaji bajaraponĕ ata Cristojavabelia najamatabĕcuenecopata. ⁹ Nebajacobiananua Urbano. Bजारaponĕ ata tonacuenebaponapona vajatuxanenĕ Jesucristo pijacuenene pacuenia vaxaitsi tonacuenebavanapatsi. Nebajacobiananua Estaquis, bitso tasivanĕ. ¹⁰ Nebajacobiananua Apeles, ponĕ picani dovathi pejamatabĕcueneta jamatabĕcuenĕjĕtatsi Cristo pelivaisi pejumecovĕnĕtsijava yabara. Itsiata apo copatsi pejumecovĕnĕtsijava Cristo pelivaisi. Nebajacobiananua Aristĕbulo pijamonae. ¹¹ Nebajacobiananua tajanacuapijinĕ Herodiĕn. Nebajacobiananua Narciso pijamonae, pamonaĕ penajamatabĕcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuenene. Nebajacobiananua vajasivava Pĕrsida, pova bitso tonacuenebabiaba Dioso pijacuenene. ¹³ Nebajacobiananua Rufo, ponĕ bitso xaniavaetsia jumecovĕnĕta vajatuxanenĕ. Bजारaponĕ pena ata nebajacobiana. Bजारapova bepexĕnatonĕ netaeyabiaba. ¹⁴ Nebajacobiananua Asĭncrito, Flegonte ata, Hermas ata, Patrobas ata, Hermes ata, itsamonae ata, pamonaĕ najinavanapa bajarapamonaejavata. ¹⁵ Nebajacobiananua Filĕlogo, Julia ata, Nereo ata, Nereo pejuyapijiva ata, Olimpasa ata, daxita itsamonae ata, Dioso pejumecovĕnĕtsivi, pamonaĕ najinavanapa bajarapamonaejavata.

¹⁶ Paxamē ata Dioso panejumecovēnētsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovēnētsivi majotaje pejinavanapaevi pacabajacobalia.

¹⁷ Tajamonae, pacatsipaebatsi itsalivaisi. Penajumetsēnētsilivaisi petsipaebaponaevi, panayajivitaenename papecayamaxēitojorobianiva. Bajarapamonae namataenetsia pacanajumeanaenotsiaexanaena najamatabēcuenejēpaeya panejinavanapaeyaniva panenave-cuanatsanaenexa. Palivaisi baja paxamē pajumecovēnētame, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. ¹⁸ Bajarapamonae apo jamatabēexanae pacuenia jitsipa vajatuxanenē Jesucristo. Biji rajane saya jamatabēexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabēyamaxēitojoroba pamonae abaxē xaniavaetsia apo jumeyapētae pexaniajailivaisi. ¹⁹ Daxitajivi paxamē pacavēnēlivaisitane xaniavaetsia panejumecovēnētsijava Dioso. Bajaraxuata pacasivabarēyatsi. Pacatojitsipatsi paneyapētaenexa bitso ēpexaniacuene paneexanaenexa. Pētsa panacopatame itsajivi ata papecayamaxēitojorobinexa pibisiacuene paneexanaenexa. ²⁰ Dioso baja cajena vajanacayavenonaenē najamatabēcuenejēpaeya vajajinavanapaenexa, itsajivi ata vajanacayamaxēitojorobianiva penajumetsēnētsilivaisita. Nexata Dioso bepijia pacayavenonaena panejamatabēcueneamoneyabinexa dovathi. Pacatovajētabiabatsi Diosojavabelia vajatuxanenē Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenenēbeje. Pabajacobianamenua pina tajanacuapijivi Lucio, Jasón ata, Sosípater ata.

²² Xanē, Tercionē, mapabaxutotaje Pablo pijume tajumeyaquinapon-aenē. Xanē ata pacajamatabēnainatsi. Tsipaji Jesucristojavabelia vajanajamatabēcuenecopatsivi.

²³ Pabajacobianame pina Gayo. Naponaponajē Gayo pijabota. Gayo tocopatabiaba daxita Dioso pejumecovēnētsivi penacaetuatabiabinexa Gayo pijabota. Pabajacobianamenua pina Erasto, ponē evetabiaba palata, Corinto tomarapijipalata. Pabajacobianamenua pina vajabanenē Cuarto.

²⁴ Pacatovajētabiabatsi Diosojavabelia daxita paxamē vajatuxanenē Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: “Dioso cajena bitso ayai-jamatabēcuenenē,” jaitsi tsabiabi. Dioso, daxitamatacabijavabelianexa peponaponaenē, caējēpatsi papecajamatabēcuene asaēyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Bajarapalivaisi jivi tsipaebapona-jē. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipae-bivi profetavi tajēvelia yapētane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapētaeyaexana. Nexata Dioso pijajivi itorobapona daxitanacuanēpijivijava petsipaebinexa Jesucristo pelivaisi. Bajarapacuenia

Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumaitsitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivjavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivjavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pi-jaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. ² Mapabaxutoje patacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetoinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamonaenavajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. ³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixaemë, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. ⁶ Xua yabara pacatsipaebabiabatsi Cristo papecajamatabëcuene yavenonabiabinexa, baja rajane patacopiapata. Bajarapacuenia papecatocopiapatsixae, nexata baja pajamatabëcuenesaemë tsavanapae panejumecovënëtsijava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacaëjëpaeyaexanabiaba panetoexanavanapaenexa daxita pacuene Dioso patacojitsipa. ⁸ Dioso cajena pacayavenonaponaena paneajamatabëcuenesaënexa Dioso panejumecovënëtsijava daxitamatacabijavabelianexa. Nexata pamatacabijajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. ⁹ Dioso cajena bajarapacuenia patacoexanaena. Tspaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinexamë.

Pacuenia Dioso pejumecovënëtsivi navecuanatsanapona apo penajamatabëcuenejëpaexae yabara pelivaisi

¹⁰ Tajamonae, pacaitorobatsi vajatuxanenë papijajivixaemë, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya pajinavanapare. Najamatabëcuenejëpaeya xaniavaetsia panajamatabëxainare caelivaisi. ¹¹ Mapacuenia patacatoyaquinatsije tspaji Cloévënëva pijajivi netsipaeba. Apo panajamatabëcuenejëpaemë

pina. Daxitatsi baja cajena caenë vajatuxanenë Jesucristo pijajivitsi. Paxamë tuatuajëta pina itsamonae nabijataeya namataenetsia najumeanaenotabiaba. ¹² Itsamonae pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Cristo pijajivitonënë,” jai pina tsabiabi. ¹³ Bajarapacuenia paxamëyajuvënëvi apo bejumaitsi tsabiabi. Tsipaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanapona tsipaji baja cajena Cristo caenë tsaponapona. Apo navitsanae baja cajena. Nexata pamonaeta Cristo pijajivi, caebitsaëto rabaja tsavanapae. Nexata apo benavecuanatsanapona. Nexata itsajivi ata xanë yabara apo bejumaitsi: “Xanë raja saicaya Pablo pijajivitonënë,” apo bejai. Tsipaji xanë itsajivi ata apo sivanabeyaxuabiaexanaenë cruzata. Itsajivi ata baja cajena apo bautisabitsi tavënëta tajajivitonë penaexanaenexa. ¹⁴ Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. ¹⁵ Nexata acuenebi itsajivi ata pejumaitsijava: “Xanë raja nebautisaba Pablo pevënëta. Nexata Pablo pijajivitonënë,” pejaijava. ¹⁶ Jemajanë tsaena. Bautisabajënuua tsaena Estéfanas pijamonae. Pematatsënëa baja apo najamatabënapitsinë pajiviyo bautisabajë. ¹⁷ Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcueneceajëpaeya exanapona, bajarapacuenia pacatsipaebaponatsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamonaeta yapëtane saya maëpanacuapijilivaisije, bajarapacuenia tatsipaebinexa, Cristo apo nitorobi. Nexata itsa tsipaebaponaejitsipajë pacuenia tsipaebabiaba pamonaeta yapëtane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivijavabelia, ajumematamobinë tsipae.

Pacuenia Cristo jivijavabelia tsitajëta Dioso piasaënëcuene, Dioso bitso daxitacuenepayapëtaenëcuene ata, yabara pelivaisi

¹⁸ Itsamonae pijaneconi yajavatëpaena. Bajarapamonae jumetaeta Jesucristo cruzata vajanacasivatëpaejava, bajarapalivaisi apo jume-covënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacacapanepaevinexa, bajarapalivaisi nacayapëtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajëvelia jumaitsi mapacueniaje:

Itsamonae bitso yapëtane mapanacuapijilivaisije. Bajarapamonae peyapëtaelivaisimi, itsamatacabi vecuaajibiaexanaenajë. Pamonaeta bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota daxitajivi jamatabëcueneyapëtaenatsi bajarapamonae saya bevelia peyapëtaevicuene,

jai baja cajena tajëvelia Dioso pejumelivaisibaxutota.

²⁰ Ponë yapëtane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapëtae ata, ajumematamobi cajena. Ponë ata bitso ajumelivaisisaëya cuaicuaijai, bajaraponë ata ajumematamobi cajena. Daxita bajarapit-sivi ajumematamobi, itsa apo natovajëtsi Diosojavabelia peyavenon-aenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicue. Tspaji Dioso apo penajamatabëxainaelivaisi. ²¹ Dioso baja cajena daxitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcueneyapëtaenexatsi pamona bitso yapëtane saya mapanacuapijilivaisije. Biji rajane Dioso jamatabëcapanepa pijaneconivecua pamonae jumecovënëta pexanialivaisi, palivaisi patsipaebaponajë, Jesucristo cruzata vajanacasivatëpaelivaisi. Bajarapalivaisi itsamonae betsitansiquejemalivaisi atatsi, itsiata bajarapalivaisi pejamatabëcueneta capanepaenatsi pamona jumecovënëtaavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi ëpamonae: “Itsa taejitsipatsi Dioso pesaëta pinijicue pexanaejava pamona nacatsipaeba mapalivaisije, nexata matapania jumecovënëtsipatsi bajarapalivaisi pexaniajailivaisicue,” najai tsabiabi judíovi. Griegovi ata itsa patsipaebabiabajë bajarapalivaisi, najumai tsabiabi ëpamonae: “Mapalivaisije itsa jumejëpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumecovënëtsipatsi pexaniajailivaisicue mapalivaisije,” najai tsabiabi griegovi. ²³ Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi. ²⁴ Itsiata pamona Dioso junatatsi pecapanepaenexatsi, judíovi, apo judíovi ata, bajarapamonae jumeyapëtaepona bajarapalivaisi. Nexata bajarapamonae yapëtaepona Dioso piasaënëcuen. Tspaji bajarapamonae Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonae yapëtaepona Dioso bitso daxitacuene peyapëtaenëcuen. Tspaji Dioso tajëvelia najamatabëxaina bajarapamonae pibisiacuene pexanaeconivecua pecapanepaenexa Cristo pejamatabëcueneta. ²⁵ Pacuene Dioso exana jivi pecapanepaenexa pijaneconivecua, bajarapacuen mapanacuapijivije, Dioso apo pejumecovënëtsivi, betsitansiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo caëjëpaetsi bajarapacuenia penajamatabëxainaenexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcuenetajëtta bitso piasaënëcuen daxita mapanacuapijivije matatoxenetsia. Tspaji bajarapaepatota

Dioso pinijicuene exana vajanacapanepaenexa vajaneconivecua. ²⁶ Tajamonae, pacanaëjère mapacueneje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëtoxanetomë beveliajamatabëcuene saya panexinaevi. Bajarapacuenia beveliajamatabëcuene panexinaevi ata, itsiata Dioso pacajunata papijajivinxamë. ²⁷ Pamonaevi bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamonaevi bitso apo peyapëtaevije,” jai tsabiabi. Itsiata Dioso pacaitapeta papijajivinxamë, apo paneyapëtaevi ata. Bajarapacuenia Dioso pacaitapeta, pamonaevi bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinxamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamonaevi bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajarapamonae aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë. ²⁸ Dioso baja cajena pacaitapeta papijajivinxamë, daxitajivi papecaitoxaxae, bijiaya papecanaëcotsivi ata. Bajarapacuenia Dioso pacaitapeta, pamonaevi bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonae Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena piamumematomobijava, pamonaevi ayaijamatabëcuenevi itajara tanetsi mapanacuataje. ²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaisi itsajivijavabelia: “Xanë bitso ayaijamatabëcuene taxainaenë.” apo bejai. ³⁰ Dioso papecaitaxutotsoniataexae, pacaitapeta papijajivinxamë. Nexata Jesucristo payajavajinavanapame. Vaxaitsi Dioso jamatabëcueneypëtanetsi. Tsipaji Jesucristo nacajamatabëcueneypavenona Dioso vajajamatabëcueneypëtaenexa. Jesucristo pejamatabëcueneta Dioso aneconijibia nacetane. Pijajivitsinua Dioso nacaexana. Nacavecuaajibiaexananua pibisiacuene vajaexanaeneconimi. ³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaisi mapacueniaje: “Pëtsa navajunupaebame saya nijacuata nexanaejava yabara jivi pecayaiyataenexa. Biji rajane navajunupaebare Dioso pecayavenonaponaejava. Nexata jivi Dioso yaiyataena,” jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebatsi pacuenia tsipaebabiaba pamonaevi bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa

patacatsipaebilivaisi. ² Itsa ponaponajë paxamëjavata, najamatabëxainajë patacatsipaebinxexa ëjesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinxexa pexaniajailivaisi, Jesucristo pelivaisi, najamatabëcueneyapëtaniji apo tanecaëjëpaejava tajacuata patacatsipaebinxexa. Nexata natsijamatabëcuenebëjanë. Jamatabëcueneneconeconajë Dioso pitabarata bajarapalivaisi patacatsipaebijavanexa yabara. ⁴ Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuaicuaijai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtame. ⁵ Bajarapacuenia pacatsipaebatsi panenajamatabëcuenecopatsinxexa Diosojavabelia, Dioso pesaëta papecayavenonaponanexa. Tsipaji apo pacatojitsipaetsi paneyajavajumecovënëtsinxexa pamonaë mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaþona pejumecovënëtsivitsijavabelia Espiritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtaë mapanacuapijivije. Mapanacuanë pevetsivi ata apo yapëtaë. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacacapanepaenexa vajaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinxexa matacabi apo peverevereaejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtaë bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanënë, Dioso pexënato. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaitsi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonaë Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

¹¹ Vaxaitsi apo nacacaëjëpae vajajamatabëcueneyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata

najamatabëcueneyapëtane. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae. ¹² Tsipaji Dioso apo nacatocopatsi vajacuata vajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëccaenexa. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënëtsivijavabelia, tsipaebaponatsi pacuenia Espiritu Santo nacayapëtaeyaexanapona. Apo tsipaebaponaetsi mapanacuapijicue ne yabaraje, xua vajacuata banajamatabëxainatsi.

¹⁴ Pajivi Dioso apo jumecovënëtsi, bajarapajivi apo jumecovënëtsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitanatsiquejemalivaisitsi. Bजारapajivi apo caëjëpaetsinua pejumeyapëtaenexa palivaisi Espiritu Santo yapëtaeyaexanatsi. Tsipaji Espiritu Santo petsijamatabëenaevitsi, caëjëpatsi pejumeyapëtaenexa palivaisi Espiritu Santo yapëtaeyaexanatsi. ¹⁵ Pajivi tsijamatabëcatsi Espiritu Santo, bajarapajivi pejamatabëcueneta yapëtaeyaexanaponatsi xua Dioso tsitapexaniacuenetsi. Yapëtaeyaexanaponatsinua xua ata Dioso tsitapibisiacuenetsi. Nexata Dioso apo pejumecovënëtsivi apo caëjëpaetsi peneconitsinexatsi bajarapajivi Diosojavabelia. ¹⁶ Dioso pejumelivaisibaxutota bajaraxua yabara jumaisi mapacueniaje: “Itsajivi ata apo yapëtae pacuenia najamatabëxaina pepo petuxanenë Dioso. Nexata itsajivi ata apo caëjëpaetsi pemuxujiobinexa Dioso,” jai Dioso pejumelivaisibaxutota. Nexata pacuenia Cristo jamatabëcuenetsi, bajara vaxaitsi ata jamatabëcuenetsitsi. Nexata itsajivi ata apo caëjëpaetsi vajanacajamatabëcueneyapëtaenexa. Apo caëjëpaetsinua vajanacamuxujiobinexa.

3

Pacuenia Dioso pejumecovënëtsivi najamatabëcueneyapëtae Dioso betonacuenebavanapa yabara pelivaisi

¹ Tajamonae, palivaisi abaxë ayapëbeje jivi pejumeyapëtaenexa, bajarapalivaisi tsipaebabiabajë Espiritu Santo pitorobicueniatsi pejinavanapaevijavabelia. Nexata bajarapamonae nejumeyapëtaeyabiaba. Itsiata baitsi jane paxamë bajayajebi baja Cristo pelivaisi panejumecovënëtsivi ata, piayapëbejelivaisi apo pacatsipaebabiabitsi. Tsipaji apo panejumeyapëtaemë tsipae. Bajaraxuata abaxë pacatsipaebabiabatsi pacuenia tsipaebabiabajë pamonae pejanajumecovënëtsivi Cristo pelivaisi. Tsitecaeya abaxë bepapejevaxijamatabëcuenemë Cristo panejumecovënëtsijava yabara. Tsipaji apo panejumeyapëtaeponaemë panevajënaeyabelia Cristo pelivaisi. ² Penacuetojiviyo abaxë ëmito barajutatsi. Apo rajutsitsi abaxë pexaenexa pevi. Bajara pijinia pacuenia paxamë ata pamatacabi ajena pajumecovënëtame Cristo pelivaisi, pacatsipaebatsi peyapëxanepanaelivaisi panejumeyapëtaenexa. Tsipaji abaxë bajarapamatacabi apo pacacaëjëpae panejumeyapëtaenexa palivaisi abaxë ayapëbeje. Itsiata baitsi jane abaxë aeconoxae ata saya patsitecavanapame. Apo pacacaëjëpae panejumeyapëtaenexa pematatsënëa. Bajaraxuata paxamë abaxë bemito paneapaejivixi Cristo pelivaisi panejumecovënëtsijava yabara. ³ Bजारapacuenia pajamatabëcuenetsimë tsipaji abaxë mapanacuapijivije, Dioso

apo pejumecovënëtsivi, jamatabëcuenejëpaeya pajinavanapame. Paxamë abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. ⁴ Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonaë, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonaë pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

⁵ Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenebajëbeje vajatuxanenë Cristo pacuenia paneitorobabeje. ⁶ Pabixainaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua uba pabita, Dioso pejamatabëcueneta vitsabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. ⁷ Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. ⁸ Pamonaë jivi tsijamatabëuba Dioso pejumelivaisi, pamonaë ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaëvecua. Itsiata Dioso matamotsianatsi caenë canacujitsia saicaya petonacuenebimatamo. ⁹ Paxanë raja Dioso pijacuene panebarënacueneba. Paxamë ra pijinia bepanabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënu, paboxaneto Dioso panebarëexanapona. ¹⁰ Bo pexanaevi, pexaniabo pexanaenexa, itsaxuayo bo ënëtuatujënexa, copiaya feratonë bamatatoyorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatujënexa matatoyorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonaë cotocaevi pacatsipaebavanapa, pacatsipaeba panevajënaeyabelia paneajamatabëcuenesaë tsaponaenexa Cristo pelivaisi panejumecovënëtsijava. Bajarapamonaë boyenepanaxa

ibotonë bepecsanaponaevi bo ënëtuatuajënexa matatoyorotsia tamëthëcaebotoxanetonëjumavereca. Boyenepanexa pecatsanaponaevi baitapetapona ëpexaniaviriajava, paviriajava tsixanepana boyenepanexa. Bajara pijinia itsi pamonaepacaevetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia. ¹¹ Payapëtaneme rabaja mapacueneje. Itsajivi baja capanepaeya boyenepanexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaeya baja pajumecovënëtame Jesucristo papecasivatëpaejava Dioso papecavecuajibiaexanaenexa pibisiacuene paneexanaenecanimi. Nexata baja apo bepajumecovënëtsimë saicayalivaisi. Tspaji baja ajibi pematatsënëa itsalivaisi papecacapanepaelivaisinexa panijaneconivecu. ¹² Pamonaepo exana, maitsije. Itsamonae exana bitso penamatamotsijavanëta. Itsamonae exana bevelia penamatamotsijavanëta. Pamonaepacatsipaebapona pexaniajilivaisi pacuenia Dioso yapëtaeyaexanaponatsi, bajarapamonae bo bepexanaevi bitso penamatamotsijavanëta bajayajebi bo pijamatabësäetsecaenexa. Bajarapamonae bo bepexanaevi oronanitonëta, platananitonëta ata, penamatamotsiibotonëta ata. Pamonaepijinia saya pejamatabëcueneta peyapëtaelivaisi pacatsipaebapona, bajarapamonae bo bepexanaevi bevelia penamatamotsijavanëta, bajayajebi apo pijamatabësäejavanëta. Bajarapamonae bo bepexanaevi saya naejavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaexaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. ¹⁴ Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucae ata, itsiata bo apo tajue tsipae isoto apo petajuejavanëta bo pexanetsixae. Nexata bo penacuenebinë matamotsipatsi. ¹⁵ Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaexaniavaetsia pacatsipaeba, capanepaenatsi Dioso. Matamotsianatsinua Dioso. Tspaji pacuenia Dioso yapëtaeyaexanatsi, pexanialivaisi pacatsipaebapona. Pamonaepijinia apo pacatsipaebi xaniavaetsia, apo matamotsi tsanetsi. Tspaji saya pejamatabëcueneta peyapëtaelivaisi, pacatsipaebapona. Itsiata bajarapamonae ata tsiquirijavayota capanepaenatsi Dioso.

¹⁶ Payapëtaneme rabaja mapacueneje. Paxamë rabaja Dioso bepajijatemplobomë. Tspaji Espiritu Santo pacayajavapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepajijatemplobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: “Xanë cajena daxitajivi matatoxenetsia bitso

tayapëtaenë mapanacuapijilivaisije,” itsa jamatabëjai, nexata bajara-pajivi becopata bajarapajamatabëcuene. Beveliajamatabëcuenejivi saya benatane. Nexata Dioso jamatabëcueneceajëpaeya exanaenatsi peyapëtaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapaejavata itsamonae,” jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaitsi mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainaecuene,” jai Dioso pejumelivaisibaxutota. ²¹ Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayaijamatabëcuenevinënu, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname. ²² Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcuenyavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa. ²³ Pematatsënëa rabaja Dioso pacatocopatanua paxamë Cristo papijajivinexamë. Cristo rabaja pijinia Dioso bepijajivitonë, Dioso pejitsipaecuenia petoexanaexae.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamë saya panetaema Cristo papijajivinëcuenia. Cristo raja panecopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. ³ Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuaicuaijamë tsabiabi ata, itsamonae ata nebaracuaicuaijai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasi-vajamatabëcuenebëjanë patanebaracuaicuaijaittsabiabijava yabara. Apo nacuenecanaëjëtsinënu pacuenia tonacuenebajë vajatuxanenë. Nexata tajamatabëcueneta apo jamatabëjumaitsinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë. ⁴ “Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajibi Dioso taneyabara naneconitsiaexanaejavanexa,” jamatabëjanë ata tsipae, itsiata ajumematamobinë tsipae. Bajaraxuata evetajë vajatuxanenë pijacuata tanejumaitsinexa itsa apo jumecovënëtsinë taneitorobicuenia. ⁵ Bajaraxuata pëtsa pabaracuaicuaijamë itsamonae ata Dioso petonacuenebavanapaevi. Pacopiaevetavanapare

abaxë vajatuxanenë pepatsijavatsica. Bajaraponë itajëtsiana bajarapamonae muetsia pexanaejavanëmi ata. Pacuenia caejivi canacujitsia vajatuxanenë pijajivi bēpēnē najamatabēxaina petonacuenebavanapaejavata, vajatuxanenë itajëtsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barēyataenatsi petonacuenebavanapaejava yabara.

⁶ Tajamonae, bajarapacuenia pacatoyaquinatsi Apolos yabara, xanë ata yabara, patacayapētaeyaxanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabēcuenenēnēbeje patanetaeyanivamē. Bajarapacuenia pacatoyaquinatsi itsamonae ata, pamonae Dioso petonacuenebavanapaevi, najēpaeya paneyaiyataenexa. Pētsa itsamonaevēcua beayaijamatabēcuenenē pataneme caenē ata. Bajara pijinia pacuenia beveliajamatabēcuenenē pētsa pataneme caenē ata. ⁷ Paxamē ata pētsa itsamonaevēcua bepaayaijamatabēcuenemimē panataneme. Itsa panavajunupaebabiabame, apo panavajunupaebabiabimē Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonae ata pata paxamējavata papecatsipaebinexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayaijamatabēcuenemimē pētsa panataneme itsamonaevēcua.

⁸ Paxamē jamatabēcuenenavēxaniabiaya panajamatabēxainame mapacueniaje: “Pacuenia ricovi ayajiva pecobecovē xaina, bajara vaxaitsi itsitsi Dioso pejumelivaisi vajajumecovēnētsijava. Tsipaji ayailivaisi xainatsi. Tsipaji baja itsamonae bitso nacatsipaebabiaba Dioso pejumelivaisi. Nexata baja pematatsēnēa apo namatavenonaetsi itsajivi ata vajanacatsipaebaponaenexa,” pajamatabējamē tsabiabi jamatabēcuenenavēxaniabiaya. Jamatabēcuenenavēxaniabiaya Dioso pijacuene bepeneevetsivi panataneme. Nexata meta paxanē matatoxenetsia bitso bepaayaijamatabēcuenemimē panataneme. Dioso pijacuene itsa paneevetsivi tsipae, nexata pacasivajamatabēcuenēbarēyatsi tsipae. Nexata vajanajuaevevetsivi tsipae Dioso pijacuene. ⁹ Paxanē, paapōstolevinē, Dioso covē panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinexa. Bajarapacuenia Dioso panetocopata bijiaya patanetaenexa angelevi ata, daxitajivi ata. ¹⁰ Paxanē, Cristo xaniavaetsia patajumecovēnētsivi, itsamonae panetane bepatanematajemabivi. Paxamē, Cristo xaniavaetsia apo panejumecovēnētsivi ata, Cristo pijacuene bitso beponeyapētaevi itajara panataneme. Caranata paxanē itsamonae bepataajamatabēcuenesaējibivi panetane. Caranata juya paxamē bepeneajamatabēcuenesaēvi panataneme. Paxanē itsamonae apo paneyaiyatae. Paxamē panayaiyaneme. ¹¹ Cristo pelivaisi jivi itsa patsipaebaponajē mapamatacabijavaberena ataje, bitso baja cajena panabejiobitabiabajē. Patajani tsabiabi. Mera pajitsipabiabajē. Bitso pajumaesebejenē tsabiabi. Jivi panebeyabiaba pecobeta. Apo paxainabiabinē pabota panapatsijitsianē. ¹² Pacueranabiabajē bitso patanacuenebabiabijava patacobeta. Jivi panebijataeyabiaba pibisiacuenia. Itsiata apo pajumeanaecnaviatabiabinē. Biji caranata paxanē bajarapamonae patovajētabiabajē Diosojavabelia Dioso peyavenonaenexatsi. Jivi panebejiobiaexanabiaba. Itsiata

pajamatabëcuenemoyanë tsabiabi. ¹³ Pibisiacuena panebaracuaicuaijai tsabiabi itsamonaejavabelia. Itsiata bajarapamonae pexaniajamatabëcuenia xaniavaetsia pamuxujobiababajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënuua panetaeyabiaba.

¹⁴ Apo pacatoyaquinaetsi raja mapacueniajaje patacaurabinexa. Biji rajane pacatoyaquinatsi saya patacamuxujobiabinexa xaniavaetsia. Pacuenia muxujobiijitsipajë taxi, bajarapacuenia pacamuxujobatsi. ¹⁵ Xanë copiaya pacatsipaebatsi pexanialivaisi, Cristo pelivaisi. Nexata baja panajamatabëcuenecopatame Jesucristojavabelia. Bajaraxuata xanë bepatacavitsatsivixae, panetaneme bepeneaxanë. Paxainae atamë tsi-pae diez mil ponëbeje papecatsipaebivinexa Cristo pelivaisi, itsiata xanë caenënë panetaejitsipame bepeneaxanë. ¹⁶ Bajaraxuata asaëyata pacamuxujobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaraponë bitso tasivanë. Betaxënatocuenia tataenë. Xaniavaetsia pejumecovënëtaponaponaenë Dioso. Bajaraponë Timoteo pacatoitorobatsi baja papecatsipaebinexa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxaenë, tsitaexanabiabajë daxita Dioso pejumecovënëtsijava, itsaxuayo tsipaebaponajë Cristo pelivaisi. ¹⁸ Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. ¹⁹ Itsiata baitsi jane Dioso itsa netocopatsiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamona beayaijamatabëcuenevi natane. Tsi-paji raeta bajarapamonae pepacuene ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. ²⁰ Pamona Dioso pijajivi, bajarapamonae nayapëtane. Tsi-paji peneta Dioso pesaëta ajamatabëcuenesaë tsavanapae. Ëpecuibovojotota apo jumaitsi. Biji rajane bajarapamonae pejamatabëëthëtojavavetsina Dioso jumecovënëta. ²¹ ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

5

Pacuenia Dioso pejumecovënëtsivi tuatuajëta ponapona bitso pibisiacuene pexanaponaponaenë yabara pelivaisi

¹ Paxamë tuatuajëta bitso pibisiacuene pexanaponaponaenë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënëne pita pina pijavanexa paxa pijavami. ² ¡Bajaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenevimë panataneme! ¡Biji rajane bajaraponë pibisiacuene pexanaejava, bitso bepasivanajamatabëxainame! ¡Bepayapijivauramënuua bajaraponë! Bajaraponë pibisiacuene

pexanaponaponaenē, bepanavecuacapsapame. ³ Paxamējavata apo naponaponaenē, itsiata paxamējavata betanaponaponaenē, nataniji. Nexata tajēvelia bitso sivanajamatabēxainabiabajē bajaraponē Dioso penaneconitsiaexanaejavanexatsi yabara pibisiacuene pexanaponaponaexae. ⁴ Paxamē panacaetuare vajatuxanenē Jesucristo papijajivixaemē. Apo pacayajava atatsi tsane, itsiata panenacaetuatsijavata, pacajamatabēnajinaenatsi. Diosojavabelia pacatovajētsianatsinua bajarapaepatota. Vajatuxanenē Jesucristo ata pesaē, pacayajava tsane bajarajota. ⁵ Pibisiacuene pexanaponaponaenē paxamē tuatujēta, panavecuacapsapare baja dovathijavabelia. Nexata daxita pibisiacuene penatojitsipaecuenia pexanaejava yabara, dovathi pebejiohiaexanaenexatsi. Nexata belia icatsia Dioso jumecovēnētiana. Bajarapajamatabēcuene jane baja capanepaenatsi pamatacabi vajatuxanenē Jesús patsianica.

⁶ Papibisiacuene bajaraponē exanaponapona, panaitaxutojematsi atamē, itsiata bepaayaijamatabēcuenevimē panataneme. Abeje raja pibisiacuene pexanaponaponaenē panecuenenaitaxutojematsijava. Payapētaneme rabaja mapacueneye. Pan pexanaematabēnexa, ayaimatabē ata, levadurajava pijinia tsiquirijavayo ata, itsiata pematabērēabijavata, bacaējēpa daxitamatabējava. Nexata levadura, tsiquirijavayo ata, bafufunaeyaexana daxitamatabē. Bajara pijinia itsi tsipae caenē itsa pacuenecopatsipame pibisiacuene pexanaponaponaejava paxamē tuatujēta. Daxitajivi belia pibisiacuene exanaponaejitsipa bajaraponē pejamatabēcueneta. ⁷ Bajaraxuata panavecuacapsapare baja, ponē pibisiacuene exanaponapona paxamē tuatujēta, daxitajivi pejamatabēcuenebijianaeyaniva bajaraponē pejamatabēcueneta. Pacuenia itsi perujupanmatabē, levadurata pematajērēabimatabē, bajara jamatabēcueneitsi bajaraponē, pibisiacuene pexanaponaponaexae. Bajaraxuata bajaraponē panavecuacapsapare baja. Paxamē rabaja Jesucristo pejamatabēcueneta pejanajamatabēcuene paxainame. Nexata pacuenia itsi levadurata apo pematajērēabipanmatabē, bajarapajamatabēcueneitsimē. Tsipaji baja Dioso aneonijibia pacatane. Paxamē baja aneonijibia Dioso pacatane. Tsipaji Cristo pacasivatēpa. Cristo baja cajena beovejayo tanetsi Dioso. Tsipaji nacasivatēpa cruzata pibisiacuene vajaexanaeoneconimi vajanacavecuajibiaexanaenexa. ⁸ Nexata baja aeconoxae pibisiacuene apo beexanavanapaetsi. Jesucristo pijajivixaetsi, itsajamatabēcuene xainaenejevatsi, pexaniajailivaisi jumecovēnētavanapaenatsi. Bajarapacuenia itsa jumecovēnētavanapaenatsi, nexata pacuenia itsi levadurata apo pematajērēabipanmatabē, bajarajamatabēcuene itsanetsi aneonijibia vajajinavanapaexae.

⁹ Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavanapaeyaniva. ¹⁰ Dioso apo pejumecovēnētisivi, itsamonae, pibisiacuene exana pevitota. Itsamonae najamatabēxaina ēpamonaenexa ayajava pexainaecuene pexainaenexa. Itsamonae nacobetoxota. Itsamonae, jumapecataeya pexanaenēanējavabelia, navajēca. Bajarapitsicuene pexanaevi, Dioso apo pejumecovēnētisivi, panavecuatsatsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovēnētisivi, itsa panavecuatsatsipame, nexata pepacuene

mapanacuavecuaje athëbëabetsia ëpaneponaenexa tsipae. Tsipaji daxita mapanacuajavaje bajarapitsicuene pexanaevi yacaëjëpa. ¹¹ Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumeconvënëtajë,” jai ata, itsiata pibisiacuene itsa exana pevitota, ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuenia itsa baracuaicuajai, itsa aitajibi tsabiabinua, itsa nacobetoxotanea, bajarapajivi pëtsa payajavajinavanapame. Pëtsa payajavaxanemenua caejavata, pacajunatsi ata. ¹²⁻¹³ Pamonaë abaxë Dioso apo pejumeconvënëtsivi, bajarapamonae yabara tajumaitsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonae. Itsiata baitsi jane pamonaë Dioso panenajuajumeconvënëtsivi, panenacaetuatabiabibota panenajuajoneyabiabivi, pibisiacuene itsa exana, paxamë bepacueneitavetame. Bajaraxuata nexata panavecuacapisapare baja ponë paxamë tuatuajëta pevitota pibisiacuene exanaponapona.

6

Pacuenia Dioso pejumeconvënëtsivi itavetatsi Dioso penajuajumeconvënëtavapaevi peneconitsiyaniva juezmonaejavabelia yabara pelivaisi

¹ Itsanë paxamëyajuvënëne, Dioso pejumeconvënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmonae Dioso apo pejumeconvënëtsivi. Bajaraxuata Dioso panenajuajumeconvënëtsivi apo bepeneconitsimë juezmonaejavabelia. Biji rajane bepayanijobame Dioso pejumeconvënëtsivijavabelia papecatoxanetsinexa bajarapalivaisi. ² Payapëtaneme rabaja mapacueneje. Pamatacabi Cristo evetsiana mapanacuaje, daxita Dioso vajajumeconvënëtsivi Dioso nacatocopatsiana vajananeconitsiaexanaenexa pamonaë pijaneconi pexainaevi. Daxita mapanacuapijivije, pamonaë Dioso apo pejumeconvënëtsivi, vaxaitsi naneconitsiaexanaenatsi. Nexata aeconoxae ata pacacaëjëpa panelivaisixanetsinexa paneconi exana panetuatuajëta. Tsipaji mapanacuata jivi pevetsijamatabëcuene beveliajamatabëcuene saya. Apo ayapëbeje bitso. ³ Payapëtaneme rabaja mapacueneje. Pamatacabi Cristo patianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxë aeconoxae panejinavanapaeepato mapanacuataje, pacacaëjëpa panelivaisixanetsinexa paneconi exana panetuatuajëta, mapanacuapijilivaisije. ⁴ Itsiata baitsi jane paxamëyajuvënëjivi itsa pacaitsacueniaba mapanacuataje, itsiata panijacuatata apo palivaisixanetabiabimë pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenexatsi. ⁵ Mapacuenia pacajumaitstsije patacaurabinexa. Paxamëyajuvënëjivi itsa pacaitsacueniaba, çajibi tsabaja caenë ata paxamëyajuvënëne pexanialivaisi peyapëtaenë pelivaisixanetsinexa bajarapalivaisi? ⁶ Dioso panejumeconvënëtsivixae, juezmonaejavabelia apo bepeneconitsimë Dioso panenajuajumeconvënëtsivi.

⁷ Bajarapacuenia panacaevënavi amamë paneeconitabiabixae juezmonaejavabelia, daxitajivi pacacueneypëtanë xaniavaetsia apo

panejinavanapaejava Dioso pitabarata. Nexata panacaevenavimē itsa pacaitsacueniaba, itsa pacatonacobetoxotanu, Dioso panejume-covēnētsivixae, xanepanaejitsipa itsa pajamatabēcuenemoyamē tsipae. ⁸Itsiata baitsi jane paxamē Dioso panenajuajumecovēnētsivijavabelia ata, paitsacueniababiabame. Yamaxēitojorobiaya pavecuanacobetoxotabi-abamenua.

⁹⁻¹⁰ Payapētaneme rabaja mapacueneje. Pibisiacuene pexanaevi apo yajavajinavanapaetsi tsane Dioso pijanacuatatsia. Bajaraxuata pētsa paexaname panijacuata panenatojitsipaecuenia. Dioso pijanacuatatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenēanējavabelia penavajēcaevi. Apo yajavajinavanapaetsi tsane pejaitsivi itsava pijavave-cua. Apo yajavajinavanapaetsi tsane pejaitsivi itsanē pamonavecua. Apo yajavajinavanapaetsi tsane penaquenetsiataevi nacaevēnapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ēpamonaenexa pexainaecuene penatojitsipaevi. Apo yajavajinavanapaetsi tsane piaitajibitsabiabivi. Apo yajavajinavanapaetsi tsane itsamonae pibisiacuenia pebaracuaicuajiaivi. Daxita bajarapit-sivi apo yajavajinavanapaetsi tsane Dioso pijanacuatatsia. ¹¹ Bajara picani bajayata paxamēyajuvēnēvi pacuenia exanavanapa. Itsiata baitsi jane aeconoxae baja pibisiacuene paneexanaeconimi, Dioso baja pacavecuaajibiaexana. Pacatsata baja Dioso papijajivinexamē. Dioso baja aneconijibia pacatane vajatuxanenē Jesucristo pejamatabēcueneta. Espiritu Santo ata pesaēta pacayavenona panejumecovēnētsinexa vajatuxanenē papecaitorobicuenia.

Pacuenia Dioso pejumecovēnētsivi xaniavaetsia bejinavanapa Dioso pitabarata yabara pelivaisi

¹² Itsamonae jumaitsi: “Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuene vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabējumaitsitsi mapacueniaje: “Papibisiacuene taexanaenexa tajamatabēcuenē nitorobabiaba, apo exanaenē tsane Cristo pijajivitonēxaenē. Tsipaji itsa exanaejitsipajē bajarapapibisiacuene, nexata tajamatabēcuenē bepijajivitonēnēcuenia jumecovēnētabibijitsipajē,” bejamatabējaitsi pibisiacuene vajaexanaeyaniva. ¹³ “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejaillivaisi, xaniajai baja cajena. Itsiata baitsi jane itsamatacabi Dioso bajarapacuenebeje vereverecaeyaexanaena. Daxita raja vajaperabētuareca pibisiacuene apo vajaexanavanapaenexa. Vajaperabēto raja Dioso nacatocopata vajatuxanenē vajatonacuenebavanapaenexa. Vajatuxanenē rabaja pijinia vajaperabētota vajanacayajavaponaponanexa. ¹⁴ Dioso baja cajena icatsia asaēyaexanatsi vajatuxanenē petēpaecujinae. Bajara pijinia pacuenia vaxaitsi ata itsamatacabi Dioso pesaēta nacaasaēyaexanaena vajatēpaecujinae.

¹⁵ Payapētaneme rabaja mapacueneje. Pacaenēmē canacujitsia, caenē Cristo peperabētōjavabelia becaeperabētō panaexaname papijajivixaemē. Xanē ata rabaja Cristo bepeperabētōyajuvēnēnēnē.

Bajaraxuata pibisiacuene apo bexanaenë tavitota pibisiacuene pexanabiabivajavelia, bajarapova bepeperabëttoyajuvënëjavanë tanaexanaeyaniva. ¹⁶ Payapëtaneme rabaja mapacueneye. Pebi pibisiacuene itsa exana pevitota pibisiacuene pexanabiabivajavelia, bajarapajivibeje becaeperabëto naexanabeje. Dioso pejumelivaisibaxutota jumaitsi penapitsijivibeje yabara mapacueniaje: “Anijajivimibeje becaejivi naexanabeje,” jai. ¹⁷ Nexata pijinia pajivi najamatabëcuenecopata vajatuxanenë Jesucristojavelia, bajarapajivi becaejivi naexana vajatuxanenë Jesucristojavelia.

¹⁸ Pevitota pibisiacuene pexanaeyaexanaejamatabëcuene, pavecuana-jetabajiravabiabare. Itsajava raja pibisiacuene pexanaejava, bitso jivi apo jamatabëcuenebijianaetsi. Pacuenia pevitota pibisiacuene pexanaejava, jamatabëcuenebijianaetsi, apo itsi. Ponë jaita itsava pijavavecu pibisiacuene pexanaenexa pevitota, bitso pibisiacuene exana. Petiriva ata, pova jaita itsanë pamonavecu pibisiacuene pexanaenexa pevitota, bitso pibisiacuene exana. Pajivi bajarapapibisiacuene exana, bitso najamatabëcuenebijiana. ¹⁹ Payapëtaneme rabaja mapacueneye. Paneperabëto baja cajena Espiritu Santo pijabo papecatsijamatabëcaexae. Dioso cajena pacarajuta pijaEspiritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainamë panijacuata panenatojitsipaecuenia paneexanavanapaenexa. ²⁰ Tsipaji Dioso ayaimatamota pacacomuata. Nexata Dioso papijajivixaemë, xaniavaetsia panejamatabëthëtovetsina Dioso jumecovënëtsiaya pajinavanapare. Nexata daxitajivi Dioso yaiyataeponaena paxamë xaniavaetsia itsa patsitajinavanapame.

7

Pemuxujobilivaisi penapitsijivibeje yabara pelivaisi

¹ Xua yabara panetoyaquinaremena pataneyanijobinexamë, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacuene pexanaevi. Bajaraxuayaniva caepebi canacujitsia pijava hexaina. Bajara pijinia itsi petirivi ata. ³ Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. ⁴ Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxainabeje. ⁵ Papatirivimë panenacojiobivi baja, pëtsa panaperabëasivamë paneamonajivivecu. Bajara pijinia pacuenia paxamë ata papebijivimë. Pëtsa panaperabëasivamë panijavajivivecu. Matapania pamatacabimaxëto Diosojavavelia panavajëcaejitsiamëbeje, pacatocopatabeje panenavecuapanerabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavavelia. Pamatacabimaxëto panavajëcaejitsiamëbeje Diosojavavelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavavelia panenavajëcaejivebe, pëtsa baja panavecuapanerabëasivamëbeje. Tsi-paji panevajënaeyabeliabeje itsa panavecuapanerabëasivamëbeje tsaponae

tsipae, nexata dovathi pacajamatabëcuene yamaxëitojorobijitsipabeje. Nexata pibisiacuene paexanaejitsipamebeje, pacuene picani apo bepaexanaemëbeje.

⁶ Itsa pacamuxujjobatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamonaе jitsipa penacojiobijava, nacojiobi. ⁷ Pacuenia xanë imasia ponaponajë, bajarapacuenia picani paxamë ata imasia pejinavanapaejava, pacatojitsipatsi. Itsiata baitsi jane Dioso pacanemë canacujitsia papecayavenonaponaexae, pacacaejëpa baja pacuenia paexanavanapaejitsiamë. Itsamonae paxamëyajuvënëvi itsacuenia Dioso jamatabëcuene caejëpaeyaexanaponatsi Dioso pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabëcuene caejëpaeyaexanaponatsi.

⁸ Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejinavanapaejava pacuenia xanë imasia ponaponajë. ⁹ Itsiata baitsi jane itsa apo caejëpaetsi penajamatabëcuenesaëtsijava, nexata pibisiacuene pevitota pexanaeyaniva, roviaia benacojioba. Bajarapamonae toxanepanatsi roviaia penacojiobijava. Tsipaji itsa apo nacojiobi tsipae, ëpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

¹⁰ Paxamë baja panenacojiobivi mapacuenia pacajumaitstsije. Itsiata xanë apo tajamatabëcuene. Pacuenia vajatuxanenë jumaitsi, pacaitorobatsi. Papetiriavimë, pëtsa pavecuanaviabame paneamonajivi. ¹¹ Pacamuxujjobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo bexuabi pijava.

¹² Paxamë tuatujëta Dioso apo pejumecovënëtavapaevi yabara, jumaitsinë mapacueniaje. Itsiata vajatuxanenë apo pejumaitsjume. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenexa bajaraponëjavabelia, nexata bajaraponë pijava apo benavecuaitavetsi pevecuanaviatsinexatsi. ¹³ Dioso pijinia pejumecovënëtsiva pamona, itsa apo pejumecovënëtsinë Dioso, itsiata bajaraponë itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. ¹⁴ Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitate pamonaе Dioso apo pejumecovënëtsivi, bajarapacuenia coxitaеjitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso. ¹⁵ Itsiata Dioso

pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tsi-paji Dioso nacajunata jamatabëcuenexanepanaeya vajajinavanapaenexa. ¹⁶ Papetiriavimë, paneamonajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane paneamonajivi, paneamonajivi ata meta najamatabëcuenecopatsiana Cristojavabelia. Papebijivimë pijinia, panijavajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane panijavajivi, panijavajivi ata meta najamatabëcuenecopatsiana Cristojavabelia. Bajaraxuata jamatabëcuenexanepanaeya panacajinavanapare. Pëtsa panavecuanaviabame.

¹⁷ Caenë canacujitsia tsiteca bexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë. ¹⁸ Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtaponapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtaponapona. Apo benaperabëcaucutsiaexanae. ¹⁹ Vajanacaperabëcaucutsijava, amatamobi Diosojavabelia. Apo vajanacaperabëcaucutsijava ata, amatamobi Diosojavabelia. Dioso rajane vajanacaitorobicuenia vajajumecovënëtavanapaejava, bajara jane xua, namatamota Diosojavabelia. ²⁰ Caejivi canacujitsia benacuenebaponapona xua nacuenebaponapona Dioso pejunatsivajënaeyatsi. ²¹ Itsamonae baja paxamëyajuvënëvi Jesucristojavabelia penajamatabëcuenecopatsivajënaeya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcuenecopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. ²² Ponë itsamonaejavabelia canajetatsi, nexata amoneya itsa tonacuenebaponapona, bajaraponë bitso pibisiacuene pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabëcuenecopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanaponapona. Bajara pijinia itsi ponë ata apo canajetsitsi itsamonaejavabelia. Itsa najamatabëcuenecopata Cristojavabelia, bajaraponë Cristo pijajivitonë baja naexana. Nexata

bajaraponë ata exanaponapona Dioso pitorobicueniatsi. ²³ Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso pan-jumecovënëtavapaejavavecua. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavanapaenexa papecaitorobicuenia. ²⁴ Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuenia, nexata bajarapacuenia pajinavanapare. Itsamonaejavabelia papecacanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

²⁵ Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneta neyapëtaeyaexana taneitaxutotsoniataexae. Bajaraxuata pacatox-anepana pacuenia pacatsipaebijitsiatsi patanejumecovënëtsinexamë. ²⁶ Dioso vajajumecovënëtavapaevi, nacatsiyayi bitso aeconoxae vajajinavanapaeepato abaxë mapanacuataje. Tsipaji itsamonae vajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. ²⁷ Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. ²⁸ Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiayaixae, pamonae baja nacojioba, bajarapamonae toayapëbeje tsanetsi pevecuapanepaenexa bajarapapiayaicuene. Bajarapacuenia petoayapëbejeyanivatsi, bajarapamonae picani tojitsipajë imasia pejinavanapaenexa.

²⁹ Tajamonae, mara pacuenia jamatabëpacajumaitsitsije. Imoxoyo rabaja pevajënae vajatuxanenë icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. ³⁰ Daxitajivi bejamatabëcueneenatsi ëDioso pijacuene petonacuenebavanapaenexa. Pamonae bitso najamatabëxaina peyajuvënëtpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonae ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonae ata comuaca pexainaejavanexa, asaëyata betonacuenebavanapa vajatuxanenë. Asivaya apo betae xua natocomuaca. ³¹ Pamonae ata, mapanacuata pexainaejava, canacuenebavanapa, bajarapamonae becanacuenebavanapa jamatabëcueneçënënaenejevatsi bajarapajamatabëcuene. Tsipaji mapanacuapijicuene vajataejavami vereverecapona.

³² Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi

ëvajatuxanenë pijacuene. Tsipaji jitsipa pesivajamatabëcuenebarëyanexatsi vajatuxanenë.³³ Itsiata baitsi jane penacojobinë yajavajamatabëcueneenatsi pevetsinexa pijava pesivajamatabëcuenebarëyanexatsi.³⁴ Apo najamatabëcuenejëpaebeje pijinia penacojobivabeje pimasiarucaevabeje. Pova apo nacojobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipanea pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

³⁵ Bajarapacuenia itsa pacajumaitsitsi, apo penacojobivi apo itavetsinë penacojobijava. Patacjamatabëcuene yavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

³⁶ Ponë pexënatoyo xaina, itsa tsitaxanepanatsi pexënatoyo petonacojobinexatsi, nexata betocopata penacojobinexa. Tsipaji baja pnaveretsiva tsaponapona. Bajarapova ata baja itsa jitsipa penacojobinexa, betocopata penacojobinexa. Itsa tocopata pexënatoyo penacojobinexa, apo pibisiacuene.³⁷ Ponë pijinia pexënatoyo itsa apo jitsipae abaxë penacojobinexa, bajaraponë ata itsa najamatabëcuenevereta apo petocopatsinexa pexënatoyo penacojobijava, nexata bajaraponë ata pexaniacuene exana.³⁸ Nexata ponë apo tocopatsi pexënatoyo penacojobinexa, bajaraponë itsanëvecua bitso pexaniacuene exana.

³⁹ Penacojobiva baja acuenebi pevecuanaviatsinexa pamona. Tsipaji pamona piasaëtsaponaponaepato, bajaraponë abaxë tsiteca pijava tsaponapona. Tsipaji bajarapacuenia Dioso najumecopata. Itsiata baitsi jane pamona itsa vecuatëpatsi, bajarapova tocopatatsi icatsia penacojobinexa. Tocopatatsi penacojobinexa ponëjavabelia jamatabënacjobia, itsa bajaraponë ata Dioso pejumecovënëtsinë.⁴⁰ Itsiata bajarapova pamona pevecuatëpaeucujinaetsi, imasia abaxë itsa ponapona, jamatabëcuenebarëya tsaponapona tsane ëDioso pijacuene pejamatabëcueneenaponaponaexaetsi. Nexata baja itsa nacojobiana, bevelia baja jamatabëcuenebarëya tsane. Pacuenia copiaya jamatabëcuenebarëya tsaponapona, apo itsi tsane baja. Bajarapacuenia najamatabëxainajë bajarapacuenia yabara. Bajarapacuenia itsa pacajumaitsitsi, Espiritu Santo neyjavacuaicuaijai.

8

Jumapecataeya pexanaenëanëjavabelia perajutsiviyajuvënëjava yabara pelivaisi

¹ Jumapecataeya pexanaenëanë itsamonae tane bepigidiosovi. Nexata bajarapamonae dajubi beyabiaba perajutsinexa bajarapavi jumapecataeya pexanaenëanëjavabelia. Bajarapaviyajuvënëjava panaxaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacuenia yapëtanetsi. Pavi rajuta jumapecataeya pexanaenëanëjavabelia, bajarapaviyajuvënëjava xae atatsi tsipae, apo nacaitfacueniabi tsipae. Itsiata vajaxaecujinae

bajarapaviyajuvënëjava, itsa jamatabējumaitssitsi: “Xanë bitso yapētaniji pamonaē mapavije atsobabiaba matatoxenetsia,” itsa jamatabējajitsi, abeje rajane bajarapajamatabēcuene. Tspaji beayajamatabēcuenejivitsi nataejitsipatsi bajarapamonaēvecua. Biji rajane xanepana vajajamatabējumaitssinexa mapacueniaje: “Asivaya taniji Dioso patanajuajumecovënetsivi, pamonaē atsobabiaba jumapecataeya pexanaenēanējavabelia perajutsiviyajuvënëjava. Nexata xanë ata apo xanë tsane bajarapaviyajuvënëjava. Nexata xaniavaetsia tsitaponaponaenajē bajarapamonaē taneitaxutua ajamatabēcuenesaenexa Diosojavabelia,” vajajamatabējajjava xanepana. Bajarapacuenia itsa tsitaponaponatsi Dioso pejumecovënetsivi, nexata nacaitaxutuaajamatabēcuenesaē tsaponae Diosojavabelia. ² Pajivi jamatabējumaitssi: “Xanë cajena bitso yapētaniji daxitacuene,” jamatabējai, bajarapajivi pejamatabēcuenenavēxaniabijivi. Abaxē ayaijava tosaicatsi xaniavaetsia peyapētaenexa. ³ Itsiata baitsi jane pajivi Dioso jitsipa, bajarapajivi Dioso ata jamatabēcueneyapētanetsi Dioso pejitsipaejava.

⁴ Nexata jitsipajē patacayapētaeyaexanaenexa itsamonae jumapecataeya pexanaenēanējavabelia perajutsiviyajuvënëjava pexaejava yabara. Vaxaitsi baja cajena yapētanetsi jumapecataeya pexanaenēanē apo pexaniajaicuene. Tspaji saya jivi pecobeta pexanaejavanē. Yapētanetsi baja cajena caenē Dioso peponaponaējava. Pematatsenēa baja cajena itsadioso ajibi. ⁵ Jivi raja apo yapētae. Bajaraxuata saya jamatabēcuenenavēxaniabiaya jumai tsabiabi: “Diosovi raja navitsiajinavanapa athēbētatsia. Jinavanapa mapanacuajava ataje,” jai tsabiabi jivi jamatabēcuenenavēxaniabiaya. ⁶ Itsiata vaxaitsi yapētanetsi caenē vaxa Dioso peponaponaējava. Bajaraponē daxitacuene pexanaenē. Bajaraponēnexa tojinavanapatsi. Caenē rabaja pijinia pepo vajatuxanenē Jesucristo. Bajaraponē pejamatabēcueneta exana daxitacuene. Bajaraponē pejamatabēcuenetanua nacacapanepaena vajaneconivecua.

⁷ Itsiata baitsi jane itsamonae Dioso pejumecovënetsivi ata, abaxē apo yapētae pacuenia picani apo caējēpaetsi jumapecataeya pexanaenēanē pejamatabēcuenebijianaenexatsi. Bajarapamonaē pejevaxijavaveliacujinae jumapecataeya pexanaenēanē taeyabiaba bepi-asaētsavanapaevi. “Papexaejava itsamonae rajutabiaba jumapecataeya pexanaenēanējavabelia, diosovijavabelia rajutabiaba bajaraxua,” sivajamatabējai tsabiabi bajarapamonaē jamatabēcuenenavēxaniabiaya. Bajaraxuata bajarapamonaē aeconoxae Dioso jumecovënetsi ata, itsa xane jumapecataeya pexanaenēanējavabelia perajutsiviyajuvënëjava, bajarapamonaē jamatabēcuenenavēxaniabiaya jamatabējumai tsabiabi: “Pibisiacuene meta exanajē Dioso pitabarata mapavi taxaexaeje,” jamatabējai tsabiabi. Tspaji Dioso jumecovënetsi ata, abaxē apo yapētae pacuenia picani apo caējēpaetsi jumapecataeya pexanaenēanē pejamatabēcuenebijianaenexatsi. ⁸ Yapētanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najēpabeje. Vajaxaejava apo nacavēnananeconitsiaexanae Dioso. ⁹ Paxae atamēnua, apo paxae atamēnua, itsiata picani apo pacaitsacueniabi tspae. Itsiata baitsi jane xania baja tsane. Dioso pananajuajumecovënetsivi asivaya panetaexae, pētsa patsitaexaname

itsacueneyavayo ata, xua bepibisiacuene taejitsipa bajarapamonae. Tshipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovênêtsijavavecua pajopaeyaexanaejitsipame bajarapajivi. Tshipaji abaxê jamatabêcuenefaefaena Dioso pejumecovenêtsijava. ¹⁰ Paxamê pêtsa panabaneme pabojavata jumapecataeya pexanaenêanêjavabelia perajutsiviyajuvênêjava abatabiaba. Paxamê baja payapêtaneme pacuenia apo pacaitsacueniabi picani tsipae, bajarapaviyajuvênêjava paxae atamê. Nexata itsa paxaejitsipame bajarajota, panaxaejavata pacataejitsipa itsanê Dioso pejumecovênêtsinê, ponê abaxê bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponê ata naxaejitsipa. Nexata penaxaexae, bepenaneconitsinê Diosojavabelia nataejitsipa. ¹¹ Paxamê picani bajarapitsinê matatoxenetsia paneyapêtaexae, paxaejitsipame bajarapaviyajuvênêjava. Itsiata nexata bajarapacuenia pajamatabêcuenebijianaejitsipame, ponê Dioso pejumecovênêtsinê ata, abaxê jamatabêcuenefaefaena Dioso pejumecovênêtsijava. Bajaraponênexa ata cajena Cristo sivatêpatsi. ¹² Bajarapacuenia itsa pajamatabêcuenebijianaejitsipame Dioso pejumecovênêtsijivi, nexata pananeconitsipame Cristojavabelia. ¹³ Bajaraxuata xanê itsa yapêtaniji pacuenia itsajivi, Dioso pejumecovênêtsijivi, belia jopaejitsipa Dioso pejumecovênêtsijavavecua xanê tatsitaxaejava pejamatabêcueneta, nexata caeto ata apo tsitaxaenê tsipae bajarapaviyajuvênêjava asivaya tataexae bajarapajivi.

9

Pacuenia apóstolevi tocopatatsi, xua namatavenona, pevajêtsinexa Dioso pejumecovênêtsivijavabelia yabara pelivaisi

¹ Payapêtaneme rabaja mapacueneye. Xanê apo xae atanê jumapecataeya pexanaenêanêjavabelia perajutsiviyajuvênêjava, itsiata Dioso netocopata daxitacuene taexanaenexa Jesucristojavabelia tanajamatabêcuenecopatsixae. Payapêtanemenua vajatuxanenê Jesucristo taneitapetsijava apóstolenêxanê. Taitaxutota baja cajena taniji vajatuxanenê Jesús. Paxamê ata patacatsipaebixae Jesucristo pelivaisi, nexata baja panajamatabêcuenecopatame Jesucristojavabelia. Tshipaji asaëyata tonacuenebaponaponajê vajatuxanenê. ² Itsamonae apo beapóstolenê netae ata, itsiata paxamê apóstolenêcuenenê paneyapêtaneme. Patacatsipaebixae pexanialivaisi, paxamê baja vajatuxanenê pajumecovênêtame. Bajaraxuata picani daxitajivi xaniavaetsia beneyapêtane apóstolenêcuenenê.

³ Itsajota pexanialivaisi jivi tsipaebaponaponajê, Dioso picani netocopata tanerajutsinexa tanamatavenonaejavaxi. Itsamonae paxamêyajuvênêvi nejumeeababiaba livaisi tatsipaebabiabijava mapacueniaje. ⁴ Paapóstolevinê itsa panacuenebajê Dioso pijacuene, panetocopata itsajota pexanialivaisi patsipaebavanapajê patanerajutsinexa pataxaejava, pataapaejava ata. ⁵ Itsa tanacojibinê tsipae, xanê ata pijinia Dioso netocopatsipa tabarêponaenexa tajava, Dioso pejumecovênêtsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenê pejuyapijivi ata, apóstolenê Pedro ata, pijava barêponabiaba. ⁶ Itsamonae

itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamataavenonaejavaxibeje. Tsipaji paxanëbeje Cristo pelivaisi patacatsipaebabiabixaebeje, Dioso picani panetocopatabeje patanerajutsinexamë patanamataavenonaejavaxibeje. ⁷ Payapëtaneme baja cajena mapacueneye. Itsanë itsa tonacueneba pijatuxanenë, barajutatsi pexaejava. Pamonaë ata pijinia vajabitsaë naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonaë pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvënëjava. Pamonaë pijinia itsanë pijaoveja toeveta, itsajivi ata apo janiitavetsitsi pemiyujucaebarëmeneyajuvënëjava piapaeyaniva. Jume cajena. ⁸ “Maraeta pacuenia Pablo nacajumaitsije saya jivi petsitaxanepanaecueniatsi vajaexanavanapaenexa,” pajamatabëjamë pëtsa. Tsipaji rabaja Dioso pejumelivaisibaxutota ata bajarapacuenia jumaitsi. ⁹ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxubinexa, pëtsa pumuxatatame nepumuxatatabi-abijavata. Pëtsa pumuxatatame trigoxu pexaenexa pecatotanabataxubijavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi. ¹⁰ Biji rajane bajarapacuenia Dioso pejumelivaisibaxutota jumaitsi vajanacayapëtaeyaexanaenexa vajamatamotsijavanexa vajanacatonacuenebinë. Ponë canacueneba iracumo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene patatonacuenebivi patanamataavenonaejavaxi, paxamë bepanerajutame Cristo pelivaisi patacatsipaebijamatabëcuene. ¹¹ Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamataavenonaejavaxi, ¿pacatsitaayajjava tsaja tsipae bajarapacueneye? ¹² Paxamë rabaja Dioso pejumelivaisibaxutota papecaitorobicuenia, parajutabiabame itsamonaë penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiyaya patanerajutsinexamë itsamonaevacqua.

Dioso picani panetocopata patanerajutsinexamë patanamataavenonaejavaxi Cristo pelivaisi patacatsipaebaponaejamatabëcuene. Itsiata apo pacavajëtsitsi patanerajutsinexamë. Biji rajane piayapëbejecuenia panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamataavenonaejavaxi. Itsa pacavajëtsipatsi, itsajamatabëcuene meta paxainaejitsipame

paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. ¹³ Payapëtaneme rabaja mapacueneye. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonae penacuenebivi altarvënëjavata, itsajota dajubi tobeyabiaba ofrendacuenia perajutsinexa bajarapavi Diosojavabelia, bajarapamonae ata Dioso tocopatatsi pexaenexa bajarapaviyajuvënëjava. ¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaevi penamatavenonaejavaxi perajutsinexatsi. Pamonae jumecovënëtapona petsipaebilivaisitsi, bajarapamonae juya berajutapona xua namatavenona petsipaebivitsi. ¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacueneyavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamë itsacueneyavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacueneyavayo ata. Bajaraxuata baja cajena apo jitsipaenë patanematamotsijavamë. Itsa panematamotsijitsiamë tsipae, nexata jitsipaejitsipajë tatëpaejava patanematamotsiyanivamë. Tsipaji itsa panematamotsipame, copiarucaejitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ¡Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi! ¹⁷ Dioso nitorobinejeva, saya xanë tajamatabëcueneta jivi itsa tsipaebaponaejitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponaajë vajatuxanenë taneitorobixae. Jumecovënëtaponaponajë pacuenia Dioso nitorobapona. ¹⁸ Bajaraxuata apo nematamotsi ata, tsipaebaponaajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacueneyavayo ata. Jivi itsa tsipaebaponaajë bajarapalivaisi, bitso jamatabëcuenebarëyanë tsaponae. Bajaraxuata apo jitsipaenë tanematamotsijava.

¹⁹ Apo tanecanajetsinë raja dajubinëcuenia itsamonaejavabelia amoneya tatonacuenebinexa. Itsiata baitsi jane daxitajivi beprijavitonënëcuenia ponaponajë. Bajarapacuenia exanaponaponajë itsamonae ayaibitsaëttoxaneto ata tayavenonaenexa, penajamatabëcueneocopatsinexa Cristojavabelia, pecapanepaenexatsi Diosojavabelia. ²⁰ Judíovi jumecovënëtsiajnavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponaenexa pacuenia itoroba Dioso Moiséspijinëta penajumecopatsilivaisi. Tsipaji baja najamatabëcueneocopatajë Cristojavabelia tanevecuajibiaexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi itsa exana, xanë ata

bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë. Nexata judíovi itsa najamatabëcuenecopata Cristojavabelia, pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeya naponaponabiabajë. Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcuenecopata Cristojavabelia, pecapanepaenexatsi Diosojavabelia. Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipacuenua taponaponaenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcuenecopata Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneyavenonaenexa bajarapamonae pevajënaeyabelia piamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaeyajitsianë bajarapamonaejavuvënëvi ayaibit-saëtoxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata tanyajavacapanepaenexatsi Diosojavabelia.

²⁴ Payapëtaneme rabaja mapacuenije. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. ²⁵ Daxita pamonaenayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva piamumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepijia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo pevereverecaejavanexa. ²⁶ Pacuenia pebitsojinaenë asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata.

Apo tonacuenebinē saya jema penaxuabinexa tatonacuenebijava. ²⁷ Bajaraxuata naperabēevetsia naevetaponaponajē pibisiacuene taexanaeyaniva. Bajarapacuentia naperabēevetsia naevetaponaponajē tsipaji jitsipajē vajatuxanenē tanesivajamatabēcuenebarēya tsaponaejava itsamonae itsa tsipaebaponajē pexanialivaisi. Apo jitsipaenē tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajē, Dioso necopatsiaexanaejitsipa tatonacuenebijava.

10

Pemuxujobilivaisi penavajēcaeyaniva jumapecataeya pexanaenēanējavabelia yabara pelivaisi

¹ Tajamonae, pacatojitsipatsi icatsia panenajamatabēnapitsinexa pacuenia bajayatami vajasalinaivimi Moiséspijinē barēpitsaparena Egipto nacuaverena. Moiséspijinē Dioso tsitajētaponatsi itsaxuayo vajasalinaivimi barēnajatarucaejitsia. Vajasalinaivimi pematatsēnēatsia itarērēbo namataxainaeya najetaruca. Nexata bajarapaitarērēbo vajasalinaivimi pēnanajetarubena. Daxitabitsaēto vajasalinaivimi Moiséspijinē barēnicabarena Rojovēnē manuamenemaxērana epatuarena. ² Pacuenia pebi itsa bautisabatsi merata, naexana Dioso pijajivitonē, bajara pijinia pacuenia vajasalinaivimi Moiséspijinē pijajivi naexana itsa pēnaponarena Egipto nacuaverena. Moiséspijinē pijajivi naexana vajasalinaivimi itarērēbo pebēxēpana itsa pēnanajetarubena Moiséspijinē. Rojovēnē manuamenemaxērana epatuarena ata itsa barēnicabarenatsi, Moiséspijinē pijajivi naexana vajasalinaivimi. ³ Daxita vajasalinaivimi caeviriajava pexaejava najuanabanepona itsa najetarubena bajarapatusato nacuayarena. Papexaejava Dioso rajutaponatsi, bajarapamonaemi xaepona. ⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapit-sapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoxaneto. ⁵ Itsiata baitsi jane vajasalinaivimiyajuvēnēvi, caejiviyobeje, saya jumecovēnēta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabēcuenebarēyatsi. Daxita itsamonae apo jumecovēnētsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaējētatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajamatabēēthētovetsina becanaējētatsi pibisiacuene vajaexanaeyaniva. ⁷ Bajaraxuata apo benavajēcaetsi jumapecataeya pexanaenēanējavabelia pacuenia bajayata vajasalinaivimiyajuvēnēvi navajēca jumapecataeya pexanaenēanējavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenēanēnexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabi-aba penabaninexa, piapaenexanua. Bajaraxuacujinae nonobapunabi-aba peyavajibinexa,” jai Dioso pejumelivaisibaxutota vajasalinaivimi yabara. ⁸ Apo hexanaetsinua vajavitota pibisiacuene pacuenia bajayata vajasalinaivimiyajuvēnēvi exana. Bajarapitsivi tēpa caematacabita veintitrés mil pajivibeje. ⁹ Apo bejamatabēcueneējētsinua

vajatuxanenē pacuenia bajayata vajasalinaivimiyajuvēnēvi Dioso jamatabēcueneējēta. Papibisiacuene vajasalinaivimi pejamatabēēthētota natojitsipa pexanaenexa, Dioso jamatabēcueneējētsiaya exanavanapa, peyapētaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiruatsi vereverecapona.¹⁰ Pētsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvēnēvi anaepanabiaba Moiséspijinēbeje Aarónpijinēbejejavabelia. Bajaraxuata Dioso itoroba pi-jaángel peverebiabinexatsi vajasalinaivimiyajuvēnēvimi.

¹¹ Bajarapacuenia exanatsi bajayata vajasalinaivimi. Dioso baja cajena nacayapētaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujiobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua peververeaeitabarayota jinavanapatsi.¹² Itsa pajamatabējumaitsimē: “Xanē cajena ajamatabēcuenesaēnē Dioso tajumecovēnētsijava. Nexata apo exanaenē tsane pibisiacuene pacuenia bajayata tajasalinaivimi exana,” itsa pajamatabējamē, jxania baja tsane! Tshipaji paxamē ata bajarapacuenia pibisiacuene paexanaejitsipame.¹³ Xua baja aeconoxae pataeponame, dovathi pejamatabēcueneta papecajamatabēcueneējētsijava, bajaraxua daxita Dioso pejumecovēnētsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabēcueneējētaponaeenexa paneajamatabēcuenesaējjava matatoxenetsia. Nexata dovathi ita pacajamatabēcueneējēta, itsiata Dioso pacayavenonaponaena paneajamatabēcuenesaē tsaponaeenexa. Nexata papecajamatabēcueneējētsijava, pavecuanepaponaenename pibisiacuene paexanaenejevamē.

¹⁴ Tajamonae bitso patacaasivavi, jumapecataeya pexanaenēanējavabelia itsamonae penavajēcaecuene, nayajivitaeya pajinavanapare.¹⁵ Pacajamatabēcuenecaējēpa baja cajena panejumeyapētaenexa patacatsipaebilivaisi. Nexata panejumecanaējēre patacatsipaebilivaisi paneyapētaenexa ita pexaniajailivaisi.¹⁶ Itsa nacaetuanatsi vajanajamatabēnapitsinexa xua yabara Cristo nacasivatēpa, najuaxanetsi pan. Najumatavējēaapatsinua vajamatavējēaapaera. Nexata pan yabara, vajamatavējēaapaera ata yabara, Diosojavabelia jumaitsitsi: “Pexaniacuene bitso panetoexaname. Panerajutame pan. Panerajutame patamatavējēaapaera ata,” jaitsi. Itsa nacaetuatatsi vajanajamatabēnapitsinexa xua yabara Cristo nacasivatēpa, caebitsaēto naexanatsi Cristo yajava, ponē nacasivatēpa cruzata.¹⁷ Ayaibitsaētoxaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaētotsi Cristo pijajivitsi naexanatsi.

¹⁸ Pacanaējēre pacuenia judíovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonae naxane bajarapavi, caebitsaēto Dioso pijajivi naexana.¹⁹ Mara pajamatabēcuene yabara jumaitsinēje. Jumapecataya pexanaenēanē, itsacuenejavayo ata pexanaenexa, apo caējēpaetsi. Bajara pijinia itsi pavi ata jumapecataeya pexanaenēanējavabelia rajuta. Apo caējēpaetsi

jivi xae ata pejamatabëcuenebijianaenexatsi. Tsipaji jumapecataeya pexanaenëanë, bajarapavi apo itothianae bajarapavivecua. ²⁰Nexata abaxë pamonaë Dioso apo yapëtae, dajubinë itsa tobeyaxuaba ofrendacuenia pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava. ²¹Paxamë baja panenabanivi, paneapaevinua, vajatuxanenë pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënëtsivi dovathi pijacuene exanavanapa. ²²Vaxaitsi Dioso vajajumecovënëtsivi, apo jitsipaetsi vajatuxanenë vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenë nacabaraanaepanaejitsipa. Vaxaitsi cajena apo vecuaasaëtsi vajatuxanenë. Nexata apo vecuapanepaetsi tsipae vajatuxanenë itsa nacananeconitsiaexana.

Pacuenia Dioso pejumecovënëtsivi bejinavanapa itsamonae pejamatabëcuenebijianaeyaniva yabara pelivaisi

²³Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi jane apo nacatoxanepanae daxita bajarapacuene vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabëcueneasaëyaexanae tsipae Dioso vajajumecovënëtsijava. ²⁴Pëtsa pajamatabëjumaitsimë: “¿De tsaeta xua natoexanaenajë, xua ëxanënexa netoxanepanaejitsia?” pajamatabëjamë pëtsa. Biji rajane pajamatabëjumaitsimëre. “¿De tsaeta xua toexanaenajë, xua itsamonaenexa toxanepanaejitsiatsi?” pajamatabëjamëre.

²⁵Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pëtsa payanijobame. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. Itsa payanijobijitsipame bajarapacuenia: “Jājā, bajarapayajuvënëvi,” pacajai tsipae. Nexata paxamë pajamatabëjumaitsimë tsipae bajarapavi yabara: “Mapavije itsa xaejitsipajë, nexata pibisiacuene exanaejitsipajë Dioso pitabarata,” pajamatabëjamë tsipae. Saya pacomuare payanijobinejevamë. ²⁶Dioso baja cajena pacatocopata itaxutojema panexaenexa. Tsipaji mapanacuaje, daxita mapanacuapijicuene ataje, Dioso baja cajena pijajava.

²⁷Dioso apo pejumecovënëtsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamë. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. ²⁸Itsamonae Dioso pejumecovënëtsivi bepibisiacuene pexanaejava taejitsipa itsa xaejitsipa bajarapayajuvënëvi. Nexata panexaevajënaeya, bajarapamonaeajuvënë ita pacajumaitsi: “Mara pavije jumapecataeya pexanaenëanëjavabelia ofrendacuenia peyajuvënërajutsivije,” itsa pacajai, pëtsa patsitaxaneme. Itsa apo patsitaxanemë tsane, nexata apo pajamatabëcuenebijianaemë tsane bajaraponë. ²⁹Itsa patsitaxaejitsipame, bajaraponë ata naxaejitsipa.

Nexata bajaraponë jamatabëjumai tsipae: “Pibisiacuene baja cajena exanajë Dioso pitabarata mapavije tanaxaexae,” jamatabëjai tsipae.

Bajarapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuenenavëxaniabiaya meta jumaitsi tsane mapacueniaje: “Jumapecataeya pexanaenëanëjavabelia perajutsiviyajuvënëjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeyaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami? ³⁰ Taxaevajënae bajarapavi, ‘Xanepana rabaja,’ janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuajai tsipae bepibisiacuene taexanaenë taxaejamatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë. ³¹ Mara pacuenia pacatsipaebatsije panecopatsinexa panexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaename paxamë panetsitaexanaejava yabara jivi papecasivajamatabëjumaitsinexa: “Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” papecasivajamatabëjainexa. ³² Bajaraxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva. ³³ Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

Pacuenia petiriavi namataacatsiaya bejunua Dioso pejumecovënëtsivi penacaetuatabiabiabibota yabara pelivaisi

² Tajamonae, panejamatabënjabinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi. ³ Pacatojitsipatsi paneyapëtaenexa mapacuenije. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. ⁴ Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. ⁵ Petiriva rajane pamona pejumecovënëtabiabivacuene itsamonae peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso

pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae ita mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota ita apo namataacatsi tsipae jivi penacaetuatsibota. ⁶ Petiriva ita apo namataacatsi tsipae papaëbërëpanayota, pacuenia pebi apo namataacatsi, nexata ita bemataxunatsi pacuenia pebi bamataxunatsi, bajarapova namatacaura tsipae. Bjaraxuata petiriva jivi penacaetuatsibota, benamataacata papaëbërëpanayota pamona peyapijiviaurayanivatsi. ⁷ Dioso ita exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia ita ponapona, jivi pecanaëjëtsinexa Dioso bitso ayajiamatabëcuene pexainaenëcuene. Bjaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaëjavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecu beveliajamatabëcuene pexainaevacuene. ⁸ Copiata Dioso pebi ita exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bjarapajamatabëcuene yabara petiriva benamataacata papaëbërëpanayota. Petiriva namataacatsia ita ponapona, ángelevi tanetsi pamona pejumecovënëtabiavacuene. ¹¹ Vaxaitsi Dioso vajajumecovënëtavapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petirivita naexanapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajajamatabëëthëtota yapëtanetsi mapacueneje. Pebi ita amatanapiareca, amataura tsipae. ¹⁵ Vajajamatabëëthëtota yapëtanetsinua mapacueneje. Petiriva pijinia ita amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianexareca. Nexata bepemataacatsitsi pematana. ¹⁶ Itsajivi ita jamatabëpanejumeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bjarapacuenia itsamonaë ata, pamonaë Dioso pejumecovënëtsivi, najamatabëxaina. Tsipaji baja cajena patajacuene,” pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonaë ayajava xaeyabiaba ita nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujiobinexa. Aeonoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevayënaeyabelia Dioso pianepejumecovënëtsijava. Caranata saya penavajënaeyabelia pajamatabëcuenecueranaponame. ¹⁸ Najamatabëxainajë copiaya

patacajumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtoximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. ¹⁹ Baja raeta pacuenia navecuanatsanaeya panavecuaenabiabame. Tsipaji meta pajamatabëjumaitsimë tsabiabi: “Vaxaitsi cajena Dioso pepacue ne jumecovënëtsati. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabiabimë. Nexata Dioso pacatane saya jema bepanenacaetuatsivi. ²¹ Tsipaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaecotocaevi pepatsivi, yavereverecabiaba. Nexata pijani tsabiabi. ²² Ëpanexaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamonaenacaetuatabiaba penavajëcaenexa Diosojavabelia. Paurababiabamenua pamonaebepejiobivi, pexaejava apo penacapatitsivi. Pexaniacuene cajena apo paexanabiabimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejumeto canacujitsia yabara pelivaisi

(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanuca panbë. ²⁴ “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënexa. Mapacueniaje tacovëta paexanabianame patanenajamatabënapitsinexamë,” jai vajatuxanenë Jesús pijajivijavabelia. ²⁵ Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papeccapanepaenexa. Nexata pacuenia Dioso najumecapanepaeya jumaitsi, pacapanepaena tajana pejamatabëcueneta. Tajana raja nevecuarunaena tatëpaejavata papeccacomuatsinexa panijaneconivecua. Mapacaapaejavataje, itsa paeyabiabianame, panenajamatabënapitabiabianame,” jai vajatuxanenë Jesús pijajivijavabelia. ²⁶ Nexata paxamë bajarapacuenia itsa paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatacabitsicajavabelianexa.

Pacuenia Dioso pejumecovënëtsivi benaxaniavaeta, itsa nacaetuata panajamatabënapitsinexa xua yabara Cristo sivatëpatsi, yabara pelivaisi

27 Jivi itsa nacaetuata penajamatabēnapitsinexa xua yabara Cristo sivatēpatsi, becanaējētena. Tspaji canaējētsinejeva itsa naxane pan, itsa apanua vajatuxanenē pecaapaevjavata, bajarapajivi naneconitsipa vajatuxanenējavabelia, vajatuxanenē pevito, pijana ata, apo peyalyataexae. 28 Bajaraxuata caejivi canacujitsia xaniavaetsia benajamatabēcuenejaita pecaxitajarabinexa paneconi xainaponapona Dioso pitabarata. Bajarapacuenia benajamatabēcuenejaita pan penaxaevajēnaeya, pematavējēaapaera ata penaapaevajēnaeya. 29 Itsa naxane pan, itsa naapanua pematavējēaapaera, becanaējēta pajamatabēcuene yabara vajatuxanenē sivatēpatsi cruzata. Pajivi canaējētsinejeva naxane pan, naapanua pematavējēaapaera, bajarapajivi pijacuata naneconitapona Diosojavabelia. 30 Bajaraxuata paxamē ayaibitsaēto payajuvēnēavitane. Nexata itsamonae payajuvēnēcueraname. Itsamonae payajuvēnētēpame baja. 31 Bajaraxuata vaxaitsi vajanaxaevajēnae pan, vajanaapaevajēnae ata pematavējēaapaera, benajamatabēnapitatsi Jesucristo vajanacasivatēpaejava vajaneconi yabara. Benajamatabēcuenejaitatsinua paneconi xainatsi Dioso pitabarata vajanavajunupaebinexa Diosojavabelia. Bajarapacuenia itsa exanaenatsi, vajatuxanenē apo nacananeconitsiaexanae tsane. 32 Itsa naneconitsianatsi, nexata vajatuxanenē nacabejiobiaexanaponaena Dioso apo pejitsipaecuene vajaexanaejava vajacopatsinexa. Bajarapacuenia vajatuxanenē nacaexanaena Dioso apo pejumecovēnētsivi yajava Diosovecua vajanaxuabiyanima.

33 Bajaraxuata itsa panacaetuame panenajamatabēnapitsinexa xua yabara Cristo pacasivatēpa, paevetabiabianame abaxē daxita pepatsijava caecuenia panenajuaxaenexa. 34 Pajivi piajani, bajarapajivi copiaya benabane pijabota pejonevajēnaeya panenacaetuatsibojavaberenana. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabēcuenejavaxi pematatsēnēa, xua yabara paneyanijobame, abaxē apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanatsi pexanaenexa pacuenia Dioso itorobaponatsi yabara pelivaisi

1 Tajamonae, jitsipajē patacatoyaquinaejava paneyapētaenexa mapacueneye. Caejivi canacujitsia Dioso pejumecovēnētsivi Espiritu Santo pejamatabēcueneta jamatabēcuene caējēpaeyaexanaponatsi pexanaenexa pacuenia Dioso itorobaponatsi.

2 Paxamē rabaja payapētaneme mapacueneye. Pamatacabi abaxē Dioso apo pajumecovēnētsimē, dovathi pacayamaxēitorobabiaba. Nexata panevajētsinexa jumapecataeya pexanaenēanējavabelia, panematabacabēta patonubenabiabame. Jumapecataeya raja pexanaenēanē, apo caējēpaetsi itsacuenejavayo ata pexanaenexa. 3 Bajaraxuata pacatoyaquinatsi paneyapētaenexa mapacueneye. Pajivi jumaitsi: “Jesús raja Dioso apo pexēnato,” jai, bajarapajivi Espiritu Santo apo yajavaponaponatsi. Pajivi rajane jumaitsi: “Jesucristo raja pepo petuxanenē,” jai, bajara jane pajivi Espiritu Santo yajavaponaponatsi.

4 Daxita xua Dioso pejumecovênêtsivi Espíritu Santo pejamatabêcueneta jamatabêcuene caējēpaeyaexanaponatsi, apo najēpae. Caenē canacujitsia saicayacuenia jamatabêcuene caējēpaeyaexanaponatsi. Itsiata baitsi jane caenē Espíritu Santo pejamatabêcueneta jamatabêcuene caējēpaeyaexanaponatsi daxita bajarapamonae. 5 Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenē Dioso pijacuene tonacuenebavanapa. 6 Dioso pijacuene petonacuenebivi, apo nacuenejēpae. Itsiata rabaja caenē Dioso daxita yavenonatsi petonacuenebavanapaenexa. 7 Caejivi canacujitsia, Dioso pejumecovênêtsivi, Espíritu Santo pejamatabêcueneta jamatabêcuenecaējēpaeyaexanatsi xua Dioso tonacuenebavanapaejitsia. Nexata bajarapamonae, caejivi canacujitsia, caējēpatsi peyavenonaenexa bajarapajamatabêcueneta daxita Dioso pejumecovênêtsivijavabelia. 8 Itsamonae Dioso pejumecovênêtsivi, Espíritu Santo pejamatabêcueneta jamatabêcuene caējēpaeyaexanaponatsi pemuxujiobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabêcuene caējēpaeyaexanaponatsi jivi xaniavaetsia peyapētaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabêcueneta bajarapacuenia jamatabêcuene caējēpaeyaexanaponatsi bajarapamonae. 9 Itsamonae pijinia jamatabêcuene caējēpaeyaexanaponatsi penajamatabêcuenerutsinexa Diosojavabelia Dioso peyavenonabiabinexatsi daxitacuene yabara. Itsamonae pijinia jamatabêcuene caējēpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabêcueneta bajarapacuenia jamatabêcuene caējēpaeyaexanaponatsi. 10 Itsamonae pijinia jamatabêcuene caējēpaeyaexanaponatsi Dioso pesaēta pinijicue pexanaejavanē pexanaenexa. Itsamonae pijinia jamatabêcuene caējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi. Itsamonae pijinia jamatabêcuene caējēpaeyaexanaponatsi pejumeyapētaenexa itsajivi itsa tsipaebatsi penajumetsênêtsilivaisi dovathi pejamatabêcueneta. Jamatabêcuene caējēpaeyaexanatsinua pejumeyapētaenexa itsajivi itsa tsipaebatsi pexaniajailivaisi Espíritu Santo pejamatabêcueneta. Itsamonae pijinia jamatabêcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabêcuene caējēpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabêcuenelivaisi xainapona caelivaisi canacujitsia, palivaisianē tsipaebapona pamonae cuaicuaijai itsajivi ata mapanacuata apo pejumetaejumeta. 11 Itsiata baitsi jane caeEspíritu Santo pejamatabêcueneta jamatabêcuene caējēpaeyaexanaponatsi daxita bajarapamonae. Pacuenia Espíritu Santo jitsipa pejamatabêcuenecaējēpaeya exanaponaenexa Dioso pejumecovênêtsivijavabelia, bajarapacuenia Espíritu Santo caejivi canacujitsia jamatabêcuene caējēpaeyaexanaponatsi Dioso pejumecovênêtsivi.

Pacuenia daxita Dioso pejumecovênêtsivi caenē Cristo bepeperabêto yabara pelivaisi

12 Pavi xainatsi vajaperabêtota, caevito canacujitsia pevênē xainapona. Vajavi xainatsi navitsiaya. Caevito canacujitsia saicaya

pexanaejavanexa, xainapona. Itsiata baitsi jane caeperabētotsireca. Bajara pijinia itsitsi daxita Dioso vajajumecovēñetsivi. Caejivitsi canacujitsia saicaya vajanacuenebijavanexa, Espiritu Santo pejamatabēcueneta nacajamatabēcuene caējēpaeyaxanaponaē ata, itsiata caenē Cristo bepeperabētotsi. ¹³ Daxitatsi rabaja Dioso vajajumecovēñetsivi, itsa nacabautisaba, caeEspiritu Santo nacatsijamatabēeca caebitsaētonexatsi, caenē Cristo bepeperabētonexatsi. Judíovi atatsi, apo judíovi atatsi, dajubicuenia vajanacacanajetsivi ata itsamonaejavabelia amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspiritu Santo nacatsijamatabēeca.

¹⁴ Pavi jivi peperabētuareca xaina, caevito canacujitsia pevēñe xainapona. Nexata caevēñevito jivi apo xinae peperabētuareca. ¹⁵ Nexata jivi petaxu itsa caējēpaejitsipatsi pecuaicuaijainexa, petaxu meta jumaitsi tsipae: “Apo pecobenē raja. Bajaraxuata maapo paperabētoyajuvēñejavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētoyajuvēñejava tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējēpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonē raja. Bajaraxuata maapo paperabētoyajuvēñejavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētoyajuvēñejava tsipae. Pijumeta saya apo naexanae tsipae saicayajava. ¹⁷ Jivi daxitanē peperabētuareca itsa xinaejitsipa ēpitaxutonē, ¿detsa nexata pacuenia jumetaejitsipa? Acuenebi tsipae. Daxitanē peperabētuareca itsa xinaejitsipa ēpemuxuyorotonē, ¿detsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabētuareca caevēñevito Dioso apo torutsi. Saicaya pevēñe pexainaevitonē, caevito canacujitsia, jivi peperabētuareca Dioso torutapona itsajota jitsipa petorutsinexa. ¹⁹ Itsa meta jivi peperabētuareca xinaejitsipa caevitoreca, aithothia meta tsipae. Nexata apo bejivitonē perabēto tsipae. ²⁰ Itsiata baitsi jane maitsije. Jivi peperabētuareca navitsiaxinae ata saicaya caevito canacujitsia pevēñe pexinaeivi, itsiata rabaja caeperabētoreca.

²¹ Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejjavabelia: “Apo pacanamatavenonaetsibeje cajena,” pejainexabeje. Jivi pematabocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejjavabelia: “Apo pacanamatavenonaetsibeje cajena,” pejainexa. Tsipaji daxita pavi xainatsi vajaperabētota, namatavenonatsi. ²² Bajaraxuata vajaperabētota pavi xainatsi, pavi itajara apo bevajanacatsitanamatavenonae, bajarapavi bitso pepacuenē namatavenonatsi. ²³ Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia. ²⁴ Pavi apo naperabēcauratsi, apo naperabēxatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaevi tanetsi. ²⁵ Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota,

namataenetsia naeveta. ²⁶ Vajaperabētota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabētsianaxatatatsi, nexata daxitaperabētotsireca bayajavabarēyatsi.

²⁷ Daxita rabaja paxamē Dioso papijajivimē. Nexata caenē Cristo beperabēto panaexaname. Pavi Cristo peperabētota xaina, bajara bepajavūvēnēvi Dioso pacatane pacaenēmē canacujitsia. ²⁸ Vajaperabētota pavi xainatsi, caevito canacujitsia saicaya xainapona pexanaponaevjanexa. Bajara pijinia itsi Dioso pejumecovēnētsivi. Caejivi canacujitsia Dioso itapetaponatsi saicaya caejivi canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaevjavabelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaevjavabelia. Xuacujinae icatsia Dioso itapeta Dioso pesaēta pinijicuene pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejibivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijainexa itsajivi ata mapanacuata apo pejumetaejumeta. ²⁹ Nexata daxita apo ēapóstolevi. Nexata pijinia daxita apo ēpetsipaebivinexa itsamonaevjavabelia pacuenia Dioso yapētaeyaexanatsi. Nexata pijinia daxita apo ēpeyapētaeyaexanaponaevinexa itsamonaevjavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaēta pinijicuene pexanaejava, apo ēpexanaponaevinexa. ³⁰ Nexata pijinia daxita apo ēpejamatejemayaexanaevinexa piavitanevi. Nexata pijinia daxita apo ēpecuaicuaijainexa itsajivi ata mapanacuata apo pejumetaejumeta. Nexata pijinia daxita apo ēpejumetaevinexa bajarapajume, juya itsamonaevjavabelia pejumevajunupaebaponaenexa pajamatabēcuenelivaisi xainapona caelivaisi canacujitsia, palivaisianē tsipaebapona pamonaē cuaiicuaijai itsajivi ata mapanacuata apo pejumetaejumeta. ³¹ Bajarapacuenia itsamonaē pejamatabēcuenecaējēpaeya exanaejavatsi matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa, paneyavenonaenexa daxita Dioso pejumecovēnētsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa itsamonaē ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabēcuenecaējēpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaiicuaijanē tsipae. Nexata jivi netaejitsipa ayaijamatabēcuenenēnē. Bajarapacuenia Dioso nejamatabēcuenecaējēpaeyaexanaē ata tsipae, itsiata itsamonaē ata itsa apo asivanē tsipae, nexata saya bajaraxua

netoamatamobi tsipae Dioso pitabarata. Nexata palivaisi ata tsi-paebaponaejitsipajë jivi pejumetaejumeta, apo nejumecovënëtsi tsipae. Nexata pacuenia tambor, itsa jume, plato itsajivi penajumet-siaexanaejava namuxujematatsi, bajarapacuenia nenamuxujematsipa tatsipaebilivaisi. ² Dioso nejamatabëcuenecaëjëpaeya exanaejitsipa xaniavaetsia tayapëtaenexa Dioso pejumelivaisi, asaëyata tatsipaebinxaxa itsamonaejavabelia. Yapëtaejitsipajënuaxa daxita Dioso muetsia penajamatabëxainaelivaisianë ata. Yapëtaejitsipajënuaxa daxita Dioso pijacuene ata. Bajarapacuenia xaniavaetsia yapëtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovënëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecuatixitsiana,” itsa janë tsipae, nexata Dioso nevecuatixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajë bepejiobivijavabelia daxita taxainaejavaximi. Nacaevetsipajënuaxa tanetajuitsinxaxa, tanebeyaxuabinexaxa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

⁴ Majamatabëcueneitsije pajivi asiva itsamonae ata. Bajarapajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenënë bajarapamonae matatoxenetsia,” apo jai itsajivijavabelia. ⁵ Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexaxa bajarapamonaejavabelia. Pajivi asiva itsamonae ata, daxita xua xanepana, ëponënexaxa apo natonajamatabëxainae. Pajivi asiva itsamonae ata, bepijia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabësitecae juya pecueneacanaviatsinxaxa bajarapamonaejavabelia. ⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabëcuenebarëyaxa bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabëcuenebarëyaxa bajarapamonae Dioso pejitsipaecuenia pexanavanapaejava yabara. ⁷ Pajivi asiva itsamonae ata, bajarapajivi piasivaviyajuvenëvi itsacueniabi atatsi, najamatabëcuenesaëta pevajënaeyabelia piasivajava bajarapamonae. Pajivi asiva itsamonae ata, bajarapajivi apo peyapëtaevi ata, sivajamatabëjumaitsi mapacueniaje: “Maraeta pamonaeta pexaniajamatabëcuenevije,” sivajamatabëjai. Pajivi asiva itsamonae ata, bajarapajivi pibisiacuene pexanaevi ata, sivajamatabëjumaitsi mapacueniaje: “Maraeta pamonaeta itsamatacabi pexaniacuene pexanaevi tsaneje,” sivajamatabëjai. Pajivi asiva itsamonae ata, bajarapajivi tsiayapëbeje atatsi daxitacuene yabara, apo copatsi piasivajava itsamonae ata.

⁸ Itsamonae Espíritu Santo pejamatabëcueneta jamatabëcuene caëjëpaeyaexanaponatsi petsipaebinxaxa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caëjëpaeyaexanaponatsi pecuaicuajainexaxa itsajivi ata mapanacuata

apo pejumetaejumeta. Itsamonae pijinia jamatabëcuene caëjêpaeyaexanaponatsi pacuenia Dioso pejumelivaisibaxutota jumaitsi peyapêtaeyaexanaenexa itsamonaejavabelia. Daxita bajarapacueni, xua Dioso Espiritu Santo pejamatabëcueneta Dioso pejumecovênëtsivi jamatabëcuenecaëjêpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucae tsane. ⁹ Dioso nacajamatabëcuene caëjêpaeyaexanae ata vajayapêtaenexa, abaxë tsiquirijavayo yapêtaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espiritu Santo pejamatabëcueneta vajanacajamatabëcuene caëjêpaeyaexanaejamatabëcuenemi, nacatocopiarucaena. Nexata jane baja bajarapamatacabi vajatuxanenë xaniavaetsia nacayapêtaeyaexanaena daxitacuene Dioso pijacuene.

¹¹ Pamatacabi abaxë pejevaxinëyonë, cuaicuaijanë pejevaxinëyonëcuenia. Najamatabëxainajënuu pejevaxinëyonëcuenia. Jumetanijinua abaxë pejevaxinëyonëcuenia. Itsa baja tanaveretsinë, pejevaxijamatabëcuenemi baja copatajê. ¹² Bajara pijinia itsinë Dioso tajamatabëcueneyapêtaejava. Tsiquirijavayo abaxë Dioso jamatabëcueneyapêtaniji. Pacuenia pitatsëcënaetsaxuta itsa naitatanetsi, apo nacatonapebetsi, bajarajamatabëcueneitsinë Dioso tajamatabëcueneyapêtaejava. Abaxë saya tsiquirijavayo Dioso jamatabëcueneyapêtaniji. Itsiata baitsi jane itsamatacabi Dioso xaniavaetsia jamatabëcueneyapêtaenajê. Pacuenia aeconoxae Dioso xaniavaetsia nejamatabëcueneyapêtane, bajara pijinia pacuenia xanë ata itsamatacabi xaniavaetsia Dioso jamatabëcueneyapêtaenajê. ¹³ Apo vereverecae daxitamatacabi vaxaitsi vajanajamatabëcuenecopatsijava Diosojavabelia. Vaxaitsi evetavanapatsinua Dioso vajanacacapanepaenexa. Nexata vajanajamatabëcuenecopatsijava Diosojavabelia, vajaevetavanapaejava ata Dioso vajanacacapanepaenexa, bajaraxuabeje matatoxenetsia bitso xanepana vajasivajava itsamonae ata.

14

Pacuenia Espiritu Santo pejamatabëcueneta itsamonae cuaicuaijaiyaexanatsi itsajivi ata mapanacuata apo pejumetaejumeta yabara pelivaisi

¹ Panajamatabëcueneverere panevajënaeyabelia panecasaëtsavanapaenexa itsamonae ata paneasivajava pacuenia panijacuata panaasivamë. Panatojitsiparenuu xua Dioso pacatojitsipa papecajamatabëcuene caëjêpaeyaexanaenexa Espiritu Santo pejamatabëcueneta. Bitso jane panatojitsipare palivaisi Dioso payapêtaeyaexana panetsipaebinxaxa itsamonaejavabelia. Nexata patsipaebianame palivaisi Dioso pacayapêtaeyaexana. ² Itsamonae Espiritu Santo pejamatabëcueneta jamatabëcuene caëjêpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tsipaji itsajivi ata mapanacuata apo pejumetaejumeta paeba. Bajarapajivi Espiritu Santo pejamatabëcueneta livaisi

paebiaexanatsi. Palivaisi Espíritu Santo bēpēnēa xainaponapona, paebiaexanatsi. ³ Itsamonae pijinia Espíritu Santo pejamatabēcueneta jamatabēcuenecaējēpaeyaexanatsi jivi pejumetaejumeta petsipaebinexa palivaisi Dioso yapētaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajēnaeuabelia sivaajamatabēcuenesaē tsaponae Dioso pejumecovēnētavanapaejava. Bajarapajivi jamatabēcuenebabatanua bitso penajamatabēxainaeivi. ⁴ Pajivi Espíritu Santo pejamatabēcueneta jamatabēcuenecaējēpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata jamatabēcuenevitsabapona Diosojavabelia bajarapalivaisita. Itsiata baitsi jane pajivi jamatabēcuenecaējēpaeyaexanatsi jivi pejumetaejumeta petsipaebinexa palivaisi Dioso yapētaeyaexanatsi, bajarapajivi petsipaebilivaisita Diosojavabelia jamatabēcuenevitsabiaexanapona daxita Dioso pejumecovēnētsivi.

⁵ Pacatojitsipatsi picani daxita paxamē Espíritu Santo pejamatabēcueneta papecajamatabēcuene caējēpaeyaexanaenexa panecuaicuajainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabēcuene caējēpaeyaexanaenexa jivi pejumetaejumeta panetsipaebinexa palivaisi Dioso pacayapētaeyaexana. Pajivi tsipaebapona jivi pejumetaejumeta palivaisi Dioso yapētaeyaexanatsi, bajarapajivi bitso jamatabēcuenevavenona itsamonae Dioso pejumecovēnētsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovēnētsivi apo jamatabēcuenevitsabiaexanae Diosojavabelia. Itsiata bajarapajivi itsa caējēpatsinua jivi pejumetaejumeta penajumevajanupaebinexa pejumetaenexatsi palivaisi tsipaeba, nexata bajarapajivi Dioso pejumecovēnētsivi jamatabēcuenevitsabiaexana Diosojavabelia. ⁶ Bajaraxuata xanē ata pijinia paxamējavata itsa patsipajē livaisi patacatsipaebinexa apo panejumetaejumeta, nexata apo panejumetaemē tsipae palivaisi pacatsipaebijitsipatsi. Nexata apo pacajamatabēcuene vitsabiaexanae tsipaetsi Diosojavabelia. Itsiata baitsi jane itsa patsipajē panejumetaejumeta patacatsipaebinexa pacuenia Dioso bemajitsinaebota netsitajēta, nexata pacajamatabēcuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabēcuene vitsabiaexanaejitsipatsi Diosojavabelia. Palivaisi Dioso neyapētaeyaexana, palivaisi ata Dioso jumaitsi, pexaniajailivaisi, itsa pacatsipaebijitsipatsi, nexata pacajamatabēcuene vitsabiaexanaejitsipatsi Diosojavabelia.

⁷ Pamonaē Espíritu Santo pejamatabēcueneta jamatabēcuenecaējēpaeyaexanatsi pecuaicuajainexa itsajivi ata mapanacuata apo pejumetaejumeta, bajarapamonaē livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxēanaejavanē peracatsivi ata xaniavaetsia itsa apo racatsi tsipae. Flauta piobinē, bijiata itsa obijitsipa, arpa pijinia peracatsinē ata, bijiata itsa racatsipa, nexata itsajivi ata apo vajiyapētaetsibeje tsipae, pavaji picani naxēanaeyaexanabeje. Flauta piobijava, arpa ata peracatsijava, amatamobi tsipae. ⁸ Bajara pijinia itsi tsipae

vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! ¹⁰ Daxitavirijamevi bitso navita mapanacuajavajë. Caevirijamevi canacujitsia yapëtaepona xaniavaetsia pijajume. ¹¹ Itsiata baitsi jane tajanacuapijinë ata itsa nebarëcuaicuaijai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaicuaijanë tsipae, besaicaya nacuapijinënë netaejitsipa. ¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espiritu Santo pejamatabëcueneta jamatabëcuenecaëjëpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajëta Diosojavabelia pejamatabëcuenecaëjëpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba. ¹⁴ Xanë ata apo tajumetaejumeta vajëtsi atanë tajamatabëëthëtojavavetsina, itsiata apo yapëtaenë xua vajëtajë Diosojavabelia. ¹⁵ Mara pacuenia tavajënaeyabelia xanë exanaenajëje. Vajëtsianajë Diosojavabelia anijavirijametabeje. Vajëtsianajë apo tajumetaejumeta. Vajëtsianajënua tajajumeta ata daxitajivi tanejumetaenexa. Tanaxëanaejavata ata pijinia bajarapacuenia exanaenajë. Naxëanaenajë apo tajumetaejumeta. Naxëanaenajënua tajajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. ¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcuenecovëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia. ¹⁸ Dioso baja

cajena xanë nejamatabëcuene caëjêpaeyaexana tacuaicuajainexa itsajivi ata mapanacuata apo pejumetaejumeta. Bajarapacuenia cuaicuajianë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjêpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaetuatsijavata, apo jitsipañë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaname. Pacuenia penaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataename. Tsipaji pejevaxijivixi abaxë bitso apo najamatabëxainae pibisiacuene pexanaenexa. ²¹ Dioso pejumelivaisibaxutota tajëvelia jumaitsi mapacueniaje: “Itsamonae cuaicuajiaiaexanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judíovi Dioso apo pejumecovënëtsijavanexa yabara. ²² Nexata Dioso pejumecovënëtsivi Espíritu Santo pejamatabëcueneta jamatabëcuene caëjêpaeyaexanaponaeatsi pecuaicuajainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenia, canaëjëtsiana Diosojavabelia. Canaëjëtsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caëjêpaeyaexanaenatsi petsipaebinexa itsamonaejavabelia palivaisi Dioso yapëtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjëtsiana pepacuene Dioso pitaxutotsoniataejavatsi pecapanepaenexatsi pijaneconivecua. ²³ Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonaenae penapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaeye saya pematajemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipanua bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcuene yapëtaejitsipa. Nexata nayapëtaejitsipa penaneconitsijava Diosojavabelia. Nexata

pematabacabëta nucaejiitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

Pacuenia Dioso pejumecovënëtsivi muxujiobatsi peyapëtaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinxaxaxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinxaxitajivijavabelia. Itsamonae najamatabëcueneveretsiana livaisi petsipaebinxaxitajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexaxitajivijavabelia, palivaisi tsipaebaxitajivi ata mapanacuata apo pejumetaejumeta pecuaicuajiaivi. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenivitsabaponaenexaxitajivijavabelia. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinxaxitajivibeje, acueyabi pajivibeje ata. Batsi pejumevajunupaebinxaxitajivijavabelia itsajivi ata mapanacuata apo pejumetaejumeta. Itsiata batsi jane caecuenia acueyabi pajivibeje apo benajuatipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinxaxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaebi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëëthëtota becuacuajia tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëëthëtota bevajëtena. ²⁹ Bajara pijinia pacuenia Dioso tocopata itsamonae ata jivijavabelia petsipaebinxaxitajivijavabelia Dioso yapëtaeyaexanatsi. Bajarapamonae ata Dioso tocopata jivijavabelia petsipaebinxaxitajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsipaebatsi bajarapalivaisi. ³⁰ Nexata bajarapamonae livaisi petsipaebaponaejavata, bajarajota penamuxunaevetecaenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsipaebapona, benajumecopata baja. Nexata ponë penamuxunaevetecaejavata, Dioso livaisi yapëtaeyaexanatsi, bajaraponë

juya daxitajivijavabelia betsipaeba palivaisi Dioso yapëtaeyaexanatsi penamuxunaevetecaejavata. ³¹ Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaevivimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaelivaisi, pesivaajamatabëcuenesaë tsaponanexanua Dioso pejumecovënëtsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota najumecopatsijitsia. Tsipaji Espiritu Santo pejamatabëëthëtota itorobatsi paepatota najumecopatsijitsia. Nexata ita najumecopata bajaraponë, juya itsanë petsipaebinexa daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi ita najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata. ³⁴ Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsitsi Dioso pejumecovënëtsivi penacaetuatsijavata pecuaicuajaittsenaenexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi. ³⁵ Petiriva ita jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva ita cuaicuajitai tsecae tsipae.

³⁶ Pëtsa pacopatame Dioso pejumecovënëtsivi penacaetuatsijavata petiriva pecuaicuajititsecaenexa. Tsipaji itsatamaranëjava Dioso pejumecovënëtsivi bajarapacuenia apo exanae. Pëtsa bepaayajamatabëcuenevimë panataneme bajarapacuenia paneexanavanapaenexa. ³⁷ Itsamonae paxamëyajuvënëvi natane bepetsipaebiarutsivinexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae ita xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa. ³⁸ Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi penavajunupaebijava Dioso pejamatabëcuenecaëjëpaeya exanaejavatsi.

³⁹ Bajaraxuata asaëyata panatojitsipare Dioso papecajamatabëcuene caëjëpaeyaexanaenexa panetsipaebinexa daxitajivijavabelia palivaisi Dioso pacayapëtaeyaexana. Itsiata baitsi jane pëtsa pajumeitavetame itsamonae ita cuaicuajitai itsajivi ata mapanacuata apo pejumetaejumetae. ⁴⁰ Nexata panenacaetuatsijavata, ita patsipaebame daxitajivijavabelia palivaisi Dioso pacayapëtaeyaexana, xaniavaetsia pacanenëmë tsaponae patsipaebabianame.

15

Jesucristo petëpaecujinae Dioso icatsia piasaëyaexanaejavatsi yabara pelivaisi

1 Tajamonae, pacatojitsipatsi panenajamatabēnapitsinexa palivaisi baja imata pacatsipaebatsi. Bajarapalivaisi, pexanialivaisi, papecapanepaelivaisinexa panijaneconivecua. Pajumecovēnētame baja bajarapalivaisi. Nexata panevajēnaeyabelia asaēya pajumecovēnētavanapaename bajarapalivaisi. 2 Panevajēnaeyabelia itsa pajumecovēnētavanapaename bajarapalivaisi, nexata pibisiacuene paneexanaeconivecua Dioso pacacapanepaena. Matabi apo peverevereaejava paxainaename. Itsiata baitsi jane copiaya panejamatabēēthētojavavetsina itsa apo pajumecovēnētismē tsane bajarapalivaisi, nexata Dioso apo pacacapanepae tsane.

3 Copiaya baja cajena pacatsipaebatsi palivaisi vajatuxanenē copiaya netsipaeba. Pacatsipaebatsi baja cajena Cristo vajanacasivatēpaejava pibisiacuene vajaexanaeconi yabara. Cristo baja cajena nacasivatēpa pacuenia Dioso pejumelivaisibaxutota tajēvelia jumaiti. 4 Nexata Cristo petēpaenē pemēthēsicujinaetsi, acueyabi matabita, icatsia Dioso asaēyaexanatsi. Bajarapacuenia Cristo Dioso icatsia asaēyaexanatsi pacuenia baja cajena tajēvelia Dioso pejumelivaisibaxutota jumaiti Cristo yabara. 5 Nexata Cristo Dioso piasaēyaexanaecujinaetsi, copiaya Pedrojavabelia tsitanaitajēta. Bajaraxuacujinae Jesús pijajivi, doce ponēbeje apóstolevijavabelia, tsitanaitajēta. 6 Bajaraxuacujinae Jesús pijajivi quīnientos pematatsēnēa pajivibejevavabelia penacaetuatsijavata, tsitanaitajēta. Bajarapamonaeyajuvēnēvimi Jesús petaevitsi itsamonae baja tēpae ata, itsiata ayaibitsaētoxaneto abaxē asaē tsavanapae. 7 Bajaraxuacujinae icatsia Santiagojavabelia Jesús tsitanaitajēta. Bajaraxuacujinae icatsia daxita apóstolevijavabelia Jesús tsitanaitajēta.

8 Xanē daxita apóstolevivecua bexēajavaberena apóstolenē nexana. Nexata pacuenia pexi pexainaejivi cotocaevi pexainaenacueto itsi, bajarapacuenia nataniji bajarapamonaevecua. Itsiata baitsi jane daxita Jesús pijajivijavabelia petsitanaitajētsicujinae, xanējavaberena ata Jesús netsitanaitajēta tataenexa. 9 Daxita apóstolevivecua xanē bevelijamatabēcuenenēnē nataniji. Tsipaji abaxē xanē Jesús itsa apo jumecovēnētšinē, Jesús pijajivi bejiobiaexanabiabajē. Bajaraxuata: “Apóstolenē,” tanejainexa ata, auranē tsabiabi. 10 Itsiata baitsi jane Dioso taneitaxutotsoniataexae, nitapeta baja apóstolenēxanē. Xanējavaberena Dioso taneitaxutotsoniataejava, apo nacueratsi. Biji rajane xanē daxita itsaapóstolevi matatoxenetsia bitso Dioso tonacuenebaponaponajē. Itsiata xanē tajamatabēcuenesaēta apo tonacuenebaponaponae. Dioso raja pesaēta tonacuenebaponaponajē. Nexata Dioso pesaēta nejamatabēcueneyavenonapona asaēya tatonacuenebaponaponae. 11 Xanē meta bitso Dioso tonacuenebaponaponajē itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanē matatoxenetsia. Itsiata baitsi jane bajarapacuenie yabara apo canaējētsinē. Bitso rajane pacatojitsipatsi paneyapētaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovēnētavanapame.

Pacuenia itsamatabi Dioso icatsia asaēyaexanaejitsia petēpaevimi yabara pelivaisi

12 Pacatsipaebatsi baja cajena Cristo petēpaecujinae Dioso icatsia piasaēyaexanaejavatsi. Itsiata baitsi jane itsamonae paxamēyajuvēnēvi jamatabēcuenenavēxaniabiaya jumai tsabiabi: “Jivi rabaja petēpaecujinae

ajibi icatsia piasaëjavanexa,” jai tsabiabi. Nexata bajarapacuenia apo bejumaitsi bajarapamonae. ¹³ Tsipaji peneta itsa pepacuene ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaecujinae. ¹⁴ Itsa baja Cristo petëpaecujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecapanepaenexa panijaneconivecua, amatamobi tsipae. ¹⁵ Pematatsënëa xua Dioso exana patavajunupaebijava, panajumetsënëtsipajë. Tsipaji pajumaitsinë tsabiabi mapacueniaje: “Cristo raja petëpaecujinae Dioso baja icatsia asaëyaexanatsi,” pajanë tsabiabi. Itsa pepacuene ajibi tsipae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsipae. ¹⁶ Itsa peneta pepacuene ajibi tsipae petëpaevi icatsia piasaëjavanexa, nexata Cristo ata petëpaecujinae icatsia Dioso baja apo asaëyaexanaetsi tsipae. ¹⁷ Nexata Cristo petëpaecujinae Dioso baja icatsia itsa apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecapanepaenexa panijaneconivecua, panacueratsipame baja. Tsiteca abaxë panijaneconi paxainaejitsipame. ¹⁸ Bajarapacuenia itsa itsipae, nexata baja pamonaemi tëpa Cristo pepua pejumecovënëtsivi, bajarapamonaeami ata naxuabijitsipa baja. ¹⁹ Vaxaitsi ata pijinia Cristojavabelia vajanajamatabëcuene copatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajätëpaecujinae, Cristo pejamatabëcueneta Dioso itsa apo nacacapanepaejitsia tsipae vajaneconivecua, vajajamatabëcuenenavëxaniabivi baja tsipae. Tsipaji vaxaitsi jamatabëjumaitsi tsabiabi mapacueniaje: “Cristo pejamatabëcueneta Dioso nacacapanepaena,” jamatabëjaitsi tsabiabi. Nexata ayaicuenia Dioso vajatonacuenebabiabijava ata, naceruatsipatsi. Matacabi apo peverevercaejava Dioso vajanacarajutsinexa vajavetavanapaejiva ata, naceruatsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejiobiataenexa.

²⁰ Itsiata baitsi jane mapalivaisije xaniajai cajena. Tsipaji baja Cristo petëpaecujinae, capanepaeya baja icatsia Dioso asaëyaexanatsi. Nexata pacuenia Cristo petëpaecujinae mëthëvecua pitsapa, bajara pijinia pacuenia itsamatacabi mëthëvecua pitsapaena daxita pamonaemi tëpa Dioso pepua pejumecovënëtsivi. Nexata baja Cristo petëpaecujinae, mëthëvecua itsa pitsapa, daxita petëpaevivecua Cristo baja namataxainaeya pitsapa mëthëvecua. ²¹ Caenë Adánpijinë pejamatabëcueneta taxuxuaba jivi petëpaejava mapanacuataje pibisiacuene pexanaexae. Bajara pijinia pacuenia caenë Cristo pejamatabëcueneta vajanacasivatëpaexae cruzata, taxuxuaba petëpaevimi itsamatacabi mëthëvecua pepitsapaejavanexa. ²² Daxitajivi tëpaponna Adánpijinë petaxuxuabicuenia. Bajara pijinia pacuenia daxita pamonae Cristo pijajivi, petëpaecujinae icatsia Dioso asaëyaexanaenatsi pacuenia Cristo Dioso asaëyaexanatsi. ²³ Paepatota Dioso jitsipa petëpaevi piasaëyaexanaenexa, caejivi canacujitsia asaëyaexanaponaena. Cristo baja petëpaecujinae, Dioso itsa asaëyaexanatsi, daxita petëpaevivecua namataxainaeya baja asaëyaexanatsi. Bajaraxuacujinae icatsia pamatacabi Cristo patsianica, daxita pamonae Cristo pijajivi, Dioso icatsia asaëyaexanaenatsi. ²⁴ Bajaraxuacujinae jane baja

daxitacuene pecopiarucaeyaexanaejavanexa, copiapatsiana. Bajarapamatacabi Cristo copiarucaeyaexanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia.²⁵ Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaë, Cristo copatsiana daxitacuene pevetsijava.²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaexanaena jivi petêpaecuenemi.²⁷ Dioso pejumelivaisibaxutota tajêvelia jumaitsi mapacueniaje: “Dioso itsamatacabi pexênato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata baitsi jane Dioso pexênatojavabelia apo jumaitsi: “Xanê ata nitorobianame,” apo jai Dioso. Dioso raja itorobiana pexênato petoevetsinexatsi daxitacueneviria.²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovênêtabiabianatsi. Nexata jane baja bajarapamatacabi Cristo jumecovênêtsiana paxa Dioso pitorobicueniatsi. Bajarapacuenia Cristo paxa Dioso pejumecovênêtsixae tsane, nexata bajarapamatacabi Dioso daxitanacuanêjava daxitacueneviria pitorobinê tsane.

²⁹ Itsamonae pepua penabautisabivi baja, pijamonaemi totêpatsi. Pijamonaemi ata baja pepuanajamatabêcuene copabi Cristojavabelia, totêpatsi. Itsiata baitsi jane bajarapamonaemi têpa nabautisabinejeva. Nexata pajivi pijamonaemi totêpatsi, bajarapajivi penabautisabijivi ata baja, pijamonaevênamoto icatsia nabautisaba. Bajarapacuenia anijatobeje nabautisaba pevecuatêpaejivitsi bepenabautisabijivi petotaenexatsi Dioso. Petêpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaevênamoto icatsia apo nabautisabi tsipae, nabautisabinejeva pevecuatêpaejivitsi bepenabautisabijivi petotaenexatsi Dioso.

³⁰ Petêpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapaenê tsipae, daxitamatacabi panetsiayai tsabiabi ata.³¹ Tajamonae, daxitamatacabi baja cajena netsiayai tsabiabi. Itsamonae picani jamatabênebeyaxuababiaba. Bajaraxua paneyapêtaenexa, pacatsipaebatsi. Tsipaji pacasivajamatabêcuenebarêyatsi vajatuxanenê Jesucristo xaniavaetsia panejumecovênêtavanapaexae.³² Majotaje Efeso tomarapijivi ata jamatabênebeyaxuaba picani. Bajarapamonae benevêthêjamatabêcuenevi. Tsiquirijavayota vecuapanepajê. Jivi petêpaecujinae icatsia Dioso itsa apo asaëyaexanaejitsiatsi tsipae, nexata xanê ata nacueratsipajê. Nacueratsipajê, netsiayai ata, jivi tatsipaebaponaejava Dioso pejumelivaisi. Vajatêpaecujinae icatsia Dioso itsa apo nacaasaëyaexanaejitsia tsipae, nexata xaniavaetsia jumecovênêtsipatsi pamonaevênaxaniabiaya nacatsipaeba mapacuenia pejumaitsilivaisije: “Ayaijavanê vajaxaejava xaeyabianatsi. Aitajibitsinua tsabiabi tsane vajabarêyatsabiabinexa. Tsipaji raja bepajia têpaenatsi,” pejailivaisi vajanacatsipaebivi jumecovênêtsipatsi.

³³ Itsiata baitsi jane pêtta panacopatame papecayamaxêitojorobinexa bajarapacuenia pejumaitsiivi. Tsipaji raja itsamonae bajumaitsi:

“Itsa yajavaponaponaejitsipame pibisiajamatabëcuenevi, cajanatabëcuenebijaenaejitsipa. Nexata pexaniajamatabëcuenenë atamë, bajarapamonae cuenejëpaeya ponaponaejitsipame,” bajai itsamonae.³⁴ Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsitsije paneauranexa.

Pacuenia petëpaevimi Dioso icatsia itsa asaëyaexanatsi, per-abëitothianaejitsiatsi yabara pelivaisi

³⁵ Itsamonae raeta yanijobiana petëpaevimi icatsia Dioso piasaëyaexanaejanexatsi yabara. Jumaiti meta tsane bajarapamonae: “¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonae?” jai meta tsane bajarapamonae. ³⁶ Bajarapacuenia itsa yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto itsa ubatsi, pejuvicujinae bajarapaxutomi batsabana pepitsapaenexa pejananae. ³⁷ Arrozxuto, itsaviriaxutoxi ata, pexu saya ubatsi. Apo mëthëcaetsi pepabotonë. ³⁸ Peubixu, caevirixu canacujitsia, peubicujinae capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. ³⁹ Mapanacuata Dioso copatsi ata daxitacueneviria pejinavanapaenexa, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. ⁴⁰ Bajara pijinia itsi athëbëtatsia pejinavanapaevi ata. Bajarapamonae saicaya itsaviriaperabëto xaina mapanacuapijivivecuaje. Athëbëtatsia pejinavanapaevi nacavecuapexaniaperabëtovi. Mapanacuata pejinavanapaevi ata, itsamonae nacatsitapexaniaperabëtovi picani. Itsiata pijinia saicayacuenia. ⁴¹ Matababipijijuameto itayota. Meravipijijuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetuluputo canacujitsia saicayacuenia navecuaitayotapona. ⁴² Bajara pijinia nacavecuaitane petëpaevimi. Saicayaperabëto nacavecuaxainaena Dioso icatsia itsa asaëyaexanaenatsi. Petëpaejivi irabelia mëthëtatsi. Nexata baja tsabana. Bajaraxuacujinae Dioso icatsia itsa asaëyaexanaenatsi, apo petsabanaeperabëtonexa jane baja xainaena. ⁴³ Petëpaejivi mëthëtatsi vajaataejitsibiperabëto yajava. Bajaraxuacujinae Dioso icatsia itsa asaëyaexanaenatsi, pexaniapenivenivenaeperabëto jane baja xainaena. Petëpaejivi mëthëtatsi pecueranaeperabëtomiyajava. Bajaraxuacujinae Dioso icatsia itsa asaëyaexanaenatsi, daxita matababijavabelianexa jane baja pesaë pexainaeperabëto xainaena. ⁴⁴ Petëpaejivi mëthëtatsi mapanacuapijiperabëto yajava. Bajaraxuacujinae Dioso icatsia itsa asaëyaexanaenatsi, athëbënacuapijiperabëto xainaena. Itsaviriaperabëto abaxë aeconoxae xainatsi mapanacuata vajajinavanapaenexa. Bajara icatsia pacuenia itsamatababi itsaviriaperabëto xainaenatsi athëbënacuataatsia vajajinavanapaenexa.

⁴⁵ Dioso pejumelivaisibaxutota jumaiti mapacueniaje: “Adánpijinë copiaya Dioso exanatsi mapanacuataje. Bajaraponë Dioso exanatsi pecueranaeperabëto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinë

matatoxenetsia Cristo bitso ayaijamatabēcuenenē. Nexata Cristo petēpaecujinae icatsia Dioso itsa asaēyaexanatsi, caējēpatsi vajanacajamatabē cueneasaēyaexanaenexa Diosojavabelia. Caējēpatsinua vajanacarajutsinexa matababi apo pevereverecejaya. ⁴⁶ Pacuenia athēbēnacupijivi perabēitsi, abaxē copiaya apo perabēitsitsi. Biji rajane pacuenia mapanacupijivi perabēitsije, bajaraperabēitsitsi. Itsiata baitsi jane vajatēpaecujinae Dioso icatsia itsa nacaasaēyaexanaena, pacuenia athēbēnacupijivi perabēitsi, bajara vaxaitsi ata perabēitsi tsanetsi. ⁴⁷ Adánpijinē copiaya Dioso exanatsi mapanacuataje. Atsabenota exanatsi. Bajaraxuacujinae bexēajavabelia athēbēvetsica Cristo patsica, ponē vajatuxanenē. Bajaraponē saicaya athēbēvetsica pepatsinē. ⁴⁸ Daxitatsi vaxaitsi, mapanacupijivitsije, perabējēpatsi Adánpijinē, atsabenota pexanaenētsi. Itsiata baitsi jane itsamatababi daxitatsi, Cristo vajajumecovēnētsivi, perabējēpaenatsi Cristo. Nexata pacuenia athēbēnacupijivi perabēitsi, bajaraperabēitsi tsanetsi Cristo vajajumecovēnētsivi. ⁴⁹ Aeconoxae abaxē perabējēpatsi Adánpijinē, ponē atsabenota pexanaenētsi. Bajara icatsia pacuenia itsamatababi Cristo perabējēpaenatsi, ponē athēbēvetsica pepatsinē.

⁵⁰ Tajamonae, jitsipajē patacatsipaebinxexa mapacueneye. Acuenebi caejivi ata mapanacupijivije mapanacupijiperabēto yajava pejonenexa Dioso pijanacuayabetsia. Tsipaji vajaperabēto saya pevereverecejavanexa. Bajaraxuata acuenebi vajayajavajinavana-paenexa bajaraperabēto daxita matababijavabelianexa. ⁵¹ Nexata panamuxunaevere mapalivaisije, Dioso bajayata muetsia pexainabuat-silivaisimi, palivaisi aeconoxae Dioso nacayapētaeyaexanapona. Daxitatsi raja vaxaitsi Cristo icatsia pepatsimatababinexatsica pevājēnaeya, apo tēpaetsi tsane. Itsiata baitsi jane apo tēpae atatsi tsane, pamatababi Cristo patsianica, daxitatsi nacaperabēitothianaena Dioso. ⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajēto banaitatsaquetajarabatsi, bajarapaepatoyovajēto Dioso nacaperabēitothianajonena. ⁵³ Vajaperabēto raja pevereverecejavanexa. Bajaraxuata xanepana vajanacaperabēitothianaenexa, apo pevereverecejaperabēto vajaxainaenexa. ⁵⁴ Nexata paepatota bajarapacuenia nacaperabēitothianajonena, copiajopaena jane baja pacuenia Dioso pejumelivaisibaxutota tajēvelia jumaitsi. Dioso baja cajena pejumelivaisibaxutota tajēvelia jumaitsi mapacueniaje: “Jivi petēpaecuenemi itsamatababi copiarucaena. Pinijicuenia Dioso copiarucaeyaexanaena jivi petēpaecuenemi. ⁵⁵ Jivi petēpaeyaexanaecuenemi ajibi tsane pesaē vajanacaavitaniaexanaeyaniva. Ajibi tsane vajanacatēpaeyaexanaecuenemi,” jai tajēvelia Dioso pejumelivaisibaxutota jivi petēpaeyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacuene vajaexanaeneconi yabara tēpaenatsi. Palivaisi bajayata Dioso Moiséspijinēta najumecopata, bajarapalivaisi pejamatabēcueneta yapētanetsi vajatēpaecujinae Diosovecua picani vajanaxuabijavanexa pibisiacuene itsa exanatsi. ⁵⁷ Itsiata baitsi jane baja vajatēpaecujinae Diosovecua apo naxuabitsi tsane. Tsipaji baja vajatuxanenē Jesucristo nacasivatēpa cruzata vajanacacapanepaenexa vaneconivecua. Bajaraxuata vaxaitsi Diosojavabelia jumaitsitsi tsabiabi mapacueniaje: “Pexaniacuene rabaja panetoexaname,” jaitsi tsabiabi.

⁵⁸Tajamonae, bitso patacaasivavi. Payapëtaneme rabaja mapacueneye. Dioso panetonacuenebijava, apo panacueratsimë tsane. Bajaraxuata panevajënaeyabelia asaëya patonacuenebavanapare Dioso. Pëtsa pacopabame Dioso panejumecovënëtsijava. Panevajënaeyabelia asaëya Dioso patonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavanapaevi petoitorobinexa yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda panetoitorobinexa Jerusalén tomarata Dioso pejumecovënëtavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaenename ofrenda. ² Pacaejivimë canacujitsia, caesemana canacujitsia panenacanabipalatayajuvënëjjava, ofrendanexa saicaya patsataponanename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponanename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane. ³ Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamonaë palata pecaponaevinexa, tsicobeyaquinaenajë cuyalato. Bajarapacuyalato bajarapamonae peyajavacaponanexa, panecaetuatsiofrenda itsa tocaponaena Jerusalén tomarata Dioso pejumecovënëtsivijavabelia. Nexata bajarapapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyajavacaponanexae tsane tatsicobeyaquinaebaxuto. ⁴ Xanë ata itsa jitsipaenajë taponanexa, ponaenajë Jerusalén tomarabelia. Nexata meta bajarapamonae naponanena tapëta.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponanajë Macedonia nacujava. Bajaraxuacujinae jane baja patsianajë paxamëjavabelia, Corinto tomarata. ⁶ Ponaponanajë meta paxamëjavata bajayajebi. Daxita emarapaejebi ata meta naponaponanajë paxamëjavata. Nexata bajaraxuacujinae paneyavenonaenename tajanamutonexa, itsabelia jitsipajë taponanexa icatsia. ⁷ Caepatoyo saya tanaponaponatabinexa paxamëjavata, apo jitsipaenë. Biji rajane jitsipajë bajayajebi taponaponanexa paxamëjavata pacuenia vajatuxanenë netojitsipa. ⁸ Itsiata baitsi jane abaxë aeconoxae ponaponanajë majotaje Efeso tomarata. Pentecostésvënë fiestacujinae meta, matapania vecuaponanajë Efesotomara. ⁹ Majotaje aeconoxae baja bitso xanepana tatsipaebinexa Dioso pejumelivaisi. Tsipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae

ayaibitsaëto apo jitsipae. Nexata tatsipaebilivaisi pejumecovënëtsivi, jamatabëcopabiaexanaponatsi.

¹⁰ Timoteo itsa patsiana paxamëjavabelia, pacopiapitsianame xaniavaetsia jamatabëcuenebarëyaya peponaponaenexa paxamëjavata. Bajarapacuenia xaniavaetsia pacopiapitsianame. Tsipaji pacuenia xanë vajatuxanenë pejamatabëcueneta tonacuenebaponaponajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. ¹¹ Bajaraxuata pëtsa itsajivi ata pacopatame pequenetsiataenexatsi. Biji rajane payavenonaeneme pijanamutonexa jamatabëcuenexanepanaeya pepatsinexa xanëjavaberena. Xanë, itsamonae yajava, vajënaeëvetaponaponajë Timoteo pepatsinexarena xanëjavaberena.

¹² Vajabananë Apolos pelivaisi pacatsipaebijitsiatsi. Bajaraponë picani itorobajë itsamonae Dioso pejumecovënëtsivi pepëta penapon-aenexa paxamëjavabelia papecataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuenecaëjëpatsi.

Pacuenia Pablo jamatabënajina Corinto tomarapijivi yabara pelivaisi

¹³ Dovathi pejamatabëcueneyaniva, jamatabëcueneenaëcotsiaya pajinavanapare. Pajamatabëcuenesaëmëre tsavanapae Jesucristojavabelia panenajamatabëcueneocopatsijava. Pëtsa jamatabëcueneaitejepaebiaya pajinavanapame. Pajamatabëcueneaitatsacamëre tsavanapae pebicuenia. Itsamonae patsitaajamatabëcuenesaëmëre tsavanapae. ¹⁴ Daxita xua paexanavanapame, itsamonae ata asivaya paexanavanapare.

¹⁵ Tajamonae, payapëtaneme rabaja mapacueneye. Estéfanas pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi. ¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame. ¹⁷ Paxamëyajuvënëvi parena xanëjavaberena mapamatabëxëyoje. Estéfanas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaëjitsipame. ¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso nave-cuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papeçayavenonabinexa. ²⁴ Daxita paxamë asivaya pacajamatabënajinatsi caenë Jesucristo pijajivixaetsi.

Mapabaxutoje San Pablo cotocaevi toyaquina Corinto tomarapijivjavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivjavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pi-jaapóstolenëxanë. Nexata Jesucristo nitoroba jivi tatsipaebinxaxexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, pa-Corinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaaenexa.

Pacuenia Pablo navajunupaeba itsamonae pebejiobiaexanaejavatsi yabara pelivaisi

³ “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. ⁴ Pamatacabi panetocopiapatabiaba daxita xua bitso panenajamatabëxainaeya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjêpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeya exanaejitsiatsi. ⁵ Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espíritu Santo panejamatabëcuenebabatabiaba bitso patanajamatabëxainaeyaniva. ⁶ Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjêpaena juya itsamatacabi paxamë patacajamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. ⁷ Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia panejamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

⁸ Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjêpae baja picani patavajënaeyabelia pataponaenexa.

Nexata pajamatabējumaitsinē tsabiabi: “Patēpaenajē meta baja rovia,” pajamatabējanē tsabiabi. ⁹ “Pepacuene raeta baja panebeyejebiana,” pajamatabējanē tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabējumaitsinexa mapacueniaje: “Xanē tajacuata apo necaējēpaē tavecuapanepaenexa mapacueneje. Matapania Dioso neyavenonaena, necaējēpaena tavecuapanepaenexa mapacueneje,” patajamatabējainexa. Dioso caējēpatsi pataneyavenonaenexa. Tspiji baja cajena Dioso pematacotsinē petēpaevi ata. ¹⁰ Dioso baja panecapanepa itsamonae patanebejiobiaexanaejavata patanebeyaxuabiyani. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponējavabelia panajamatabēcuenecopatājē bajarapacuenia pataneyavenonabiabinexa. ¹¹ Paneyavenonaeyavajētaponae name Diosojavabelia bajarapacuenia Dioso pataneyavenonabiabinexa. Paayaibitsaēttoxanetomē itsa panetovajētaponae name Diosojavabelia, nexata Dioso paneyavenonabiabiana. Nexata pijinia jivi ayaibitsaēttoxaneto paxanē yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyejebiyani vatsi,” jai tsabiabi tsane.

Pajamatabēcuenē yabara Pablo apo ponae Corinto tomarabelia yabara pelivaisi

¹² Itsa pajinavanapajē daxitajivijava, paxamējava ata, xaniavaetsia pajinavanapajē Dioso pitabarata. Itsa pajinavanapajē paxamējava, pibisiacuene apo pacasivanajamatabēxainaetsi. Bajaraxuata panasivajamatabēcuenēbarēyanē. Paxanē raja saya mapanacuapijilivaisita apo panejamatabēcueneyavenonae xaniavaetsia patajinavanapaenexa. Dioso raja patanejamatabēcueneyavenonaexae, bajarapacuenia xaniavaetsia pajinavanapajē. ¹³ Palivaisianē baja pacatoyaquinabiabatsi, caelivaisita anijajamatabēcuenelivaisibeje apo xainaponae. Palivaisianē pajumetaneme itsa palebame patacatoyaquinaelivaisianē, bajarapalivaisianē saya caejamatabēcuenelivaisi xainapona. Pematatsēnēa itsajamatabēcuenelivaisi apo xainaponae. Pacatojitsipatsi xaniavaetsia panejumeyapētaenexa palivaisianē pacatoyaquinatsi. ¹⁴ Pacatojitsipatsi xaniavaetsia patanejamatabēcueneyapētaenamē. Tspiji abaxē xaniavaetsia apo panejamatabēcueneyapētaemē pacuenia pajamatabēcuenēitsinē tsavanapae. Nexata pamatacabi vajatuxanenē Jesús icatsia patsianica, paxamē panesivajamatabēcuenēbarēyamē tsane. Bajara pijinia pacuenia paxanē ata pacasivajamatabēcuenēbarēyatsi tsane.

¹⁵ Nexata xanē pacasivajamatabēcuenējumaitsi mapacueniaje: “Corinto tomarapijivi baja cajena xaniavaetsia nejamatabēcueneyapētane. Yapētane pacuenia apo sivanajamatabēxainaenē itsajamatabēcuenē bajarapamonaejavabelia,” pacasivajamatabējaisi. Bajaraxuata picani jamatabēpatājē paxamējavata patanesivajamatabēcuenē barēyanexamē itsa patājē paxamējavata. ¹⁶ Pamatacabi ponajē Macedonia nacuayabelia, talianē picani jamatabēpacataeponatsi bajaraxuayo. Bajaraxuacujinae icatsia tanaviatsinērena jamatabēpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuayabelia taponaenexa,” pacasivajamatabējaisi picani. ¹⁷ Pacuenia najamatabēxainabiabajē taponaenexa itsajavabelia,

ponabiabajë baja cajena. Itsiata aeconoxae bajarapacuenia apo ex-
 anaenë taponae nexa paxamëjavabelia. Mapanacuata itsamonae naja-
 matabëxainae ata itsacueneyavayo pexanaenexa, itsiata apo exanabi-
 abi. Bajarapacuenia itsiata xanë apo jamatabëcuenëitsinë. Paxamë
 baja cajena panecueneyapëtaneme. ¹⁸ Dioso ata panecueneyapëtaneme apo
 patacayamaxëitojorobicuene. Dioso baja cajena pejumelivaisi pacatsi-
 paebabiabatsi. Nexata icatsia xuacujinae bajarapalivaisi itsa pacat-
 sipaebabiabatsi, saicayalivaisicuenia icatsia apo pacatsipaebabiabitsi.
¹⁹ Xanë Pablonë, Silvano, Timoteo, bajarapamatabëxëyo, pacatsipaebabiabatsi
 Jesucristo, Dioso pexënato, pelivaisi. Bajaraponë Jesu-
 cristo caejamatabëcuene xainabiaba. Nexata pacuenia jumaitsi, xan-
 iajai tsabiabi. ²⁰ Jesús pejamatabëcueneta Dioso baja daxita naca-
 toexana pacuenia tajëvelia najumecapanepaeya jumaitsi vajanacatoex-
 anaenexa. Bajaraxuata Diosojavabelia vajavajëtsijavata itsa jumaitsitsi:
 “Diosomë, bitso ayaijamatabëcuenenëmë,” itsa jaiti, nexata Jesucristo
 pejamatabëcueneta jumaitsitsi. ²¹ Dioso pacajamatabëcueneyavenonapona
 panevajënaeyabelia paneajamatabëcuenesaënexa Cristojavabelia paneja-
 matabëcuenecopatsijava. Bajarapacuenia paxanë ata Dioso paneja-
 matabëcueneyavenonapona. Dioso nacaitapeta Jesucristo pijajivinexatsi,
 Dioso pijacuene vajatonacuenebavanapaenexa. ²² Dioso raja Espiritu
 Santo nacatsijamatabëecaeyaexana. Nexata nayapëtanetsi Dioso pexi-
 cuenetsi. Bajaraxuata yapëtanetsi pepacuene xaniajai Dioso vajanacaca-
 panepaejavanexa.

²³ Mapacuenia pacajumaitsitsije Dioso pitabarata. Dioso baja cajena
 nejamatabëcueneyapëtaneme. Pamatacabi picani jamatabëponabiabajë pax-
 amëjavabelia, caecuenia itsa ponaëjitsipajë, nexata pacabijataëjitsipatsi.
 Tshipaji abaxë apo paexanavanapaemë patacaitorobicuenia. Bajarax-
 uata abaxë apo navecuaponaenë paxamëjavabelia, itsa pacabijatanetsi,
 bitso panenajamatabëxainaeayaniva. ²⁴ Nexata apo jitsipaenë icatsia
 patacatsipaebaponaenexa paneyapëtaenexa pacuenia bepaexanavana-
 pame. Tshipaji baja xaniavaetsia Dioso pajumecovënëtavanapame. Ja-
 matabëpacayavenonatsi. Pacuenia baja pajamatabëcuenëbarëyamë tsa-
 vanapae, matatoxenetsia icatsia panejamatabëcuenëbarëyanexa Dioso
 pitabarata.

2

¹ Najamatabëcopatajë baja taponaejava paxamëjavabelia.
 Tshipaji jamatabëjumaitsinë paxamë yabara mapacueniajaje:
 “Apo ponaenë abaxë tsane Corinto tomarapijivijavabelia
 tanajamatabëxainaeayaniva bajarapamonae,” jamatabëjanë.
² Paxamë itsa pajamatabëcuenëbarëyamë, nexata xanë ata
 pacasivajamatabëcuenëbarëyatsi tsabiabi. Itsiata itsa pacanaja-
 matabëxainaeaya exanaëjitsipatsi, nexata apo pajamatabëcuenëbarëyamë
 tsipae. Nexata xanë ata apo pacasivajamatabëcuenëbarëyatsi
 tsipae. Tshipaji ajibi tsipae patacasivajamatabëcuenëbarëyajanexa.
³ Bajaraxuata taponaevajënaeya paxamëjavabelia copiata baja
 cajena pacatoitorobaliatsi itsabaxuto, patacatoyaquinaebaxuto.
 Bajarapacuenia pacatoyaquinatsi tshipaji abaxë apo jamatabëponaenë
 paxamëjavabelia patacasivanajamatabëxainaeayaniva, itsa pacatanetsi
 panejinavanapaejava apo patacaitorobicuenia. Jitsipajë picani

paxamē patacasivajamatabēcuenebarēyanexa. Paxamē yabara jamatabējumaitsinē mapacueniaje: “Corinto tomarapijivi baja cajena nejamatabēcuenyapētane. Bajarapamonae itsa jamatabēcuenebarēya, xanē ata bajarapamonae sivajamatabēcuenebarēyanē tsabiabi,” jamatabējanē. ⁴ Apo jitsipaenē picani patacatoyaquinaenexa bajarapabaxuto. Itsiata itsa pacatoyaquinatsi, nuajē paxamējitsia. Najamatabēxainajē cajena bitso tajamatabēēthētovetsina. Apo pacatoyaquinaetsi raja saya patacanajamatabēxainaeya exanaenexa. Ayaicuenia raja patacaasivajava patanejamatabēcuenyapētaenexamē, pacatoyaquinatsi.

Pacuenia Pablo itoroba Corinto tomarapijivi barajamatabēcuenexanepanaeya baja petaenexa pibisiacuene pexanaponapon-aenēmi yabara pelivaisi

⁵ Ponē pibisiacuene exana, caenēnē xanē apo nenajamatabēxainaeyaexanae. Daxita paxamē ata bajarapacuenia pacanajamatabēxainaeyaexana. ⁶ Ponē yabara itsabaxutota pacatoyaquinatsi, paxamē baja cajena najamatabēcuenejēpaeya panavecuaitavetame bajaraponē, pibisiacuene pexanaenē, penapatsiyaniva panenacaetuatsijavata. Nexata baja bajaraponē belia copata pibisiacuene pexanaejava. Xanepana rabaja. Pētsa baja pematatsēnēa icatsia panavecuaitavetame bajarapacuenia. ⁷ Aeconoxae baja pajamatabēcuenecaevare bajaraponē pibisiacuene pexanaejava. Pabarajamatabēcuenexanepanare baja. Bajaraponē juya pajamatabēcuenyavenonaename piaurayaniva. Bajarapacuenia pajamatabēcuenyavenonaename pejamatabēcuene matatoxenetsiyanivatsi bitso pejamatabēcuenebējaijava pijaneconi yabara. ⁸ Bitso pacatojitsipatsi panetsitanajamatabēcueneitajētsinexa paneasivajava bajaraponē. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabēcuenejētsinexa. Jitsipajē xaniavaetsia tayapētaenexa itsa panejumecovēnētsijitsiamē daxita pacuenia pacaitorobatsi. ¹⁰ Nexata baja aeconoxae itsa pajamatabēcuenecaevame papibisiacuene bajaraponē exana paxamē tuatuajēta, xanē ata baja jamatabēcuenecaevajē bajaraponē pibisiacuene pexanaejava. Xanē baja jamatabēcuenecaevajē paneconi bajaraponē exana xanējavaberena. Jamatabēcuenecaevajē baja bajaraponē pibisiacuene pexanaejava, daxita paxamē aneconijibia jamatabēcuenebarēyaya panejinavanapaenexa Cristo pitabarata. ¹¹ Jamatabēcuenecaevatsi baja papibisiacuene bajaraponē exana vaxaitsijavaberena. Tsipaji vaxaitsi itsa apo jamatabēcueneceavitsi tsipae bajarapapibisiacuene pexanaejava, vaxaitsi ata dovathi nacayamaxēitojorobijitsipa. Vaxaitsi baja dovathi cuenyapētanetsi, xua exanabiaba vajanacacopabiaexanaenexa Dioso pejumelivaisi vajajumecovēnētsijava.

Pacuenia bitso Pablo Tito sivanajamatabēxaina yabara pelivaisi

¹² Patajopajē Troas tomarata tatsipaebinexa Cristo pelivaisi. Troas tomarata tapatsivajēnaeya, taniji Dioso tanetoxanepanaeyaexanaejava tatsipaebinexa pejumelivaisi bajarapatomarata. Nexata Troas tomarata itsa tsipaebabiabajē Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajarajota abaxē

apo jamatabëcuenebarëyanë. Najamatabëxainajë vajabananë Tito yabara. Tsipaji abaxë Tito apo caxitajarabaxuabinë Troas tomarata. Nexata baja napëjibajë Troas tomarapijivi taponænexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataxanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxæ Dioso pejumelivaisi. Pamonae jumecovënëta bajarapalivaisi, tsitapexanialivaisitsi bitso. ¹⁵ Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tsipaji patsipaebabiabajë Cristo pelivaisi daxitajivijavabelia. Itsamonae baja jumecovënëtapona Cristo pelivaisi Dioso pecapanepævinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxæ. ¹⁶ Pamonae Diosovecua naxuabiana apo pejumecovënëtsixæ Cristo pelivaisi, naxuabiana. Pamonae pijinia Dioso capanepænatsi pejumecovënëtsixæ Cristo pelivaisi, capanepænatsi. Paxanë, paapóstolevinë, Dioso paneyavenonabiaba. Nexata panejamatabëcuenecaëjëpa patatsipaebabiabinexa pexanialivaisi, Cristo pelivaisi, jivi pecapanepælivaisinexatsi. ¹⁷ Pacuenia itsamonae tsipaebabiaba Cristo pelivaisi epematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainænë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinxæ.

3

Pacuenia Dioso pejanalivaisi najumecapanepæya jumaitsi jivi pecapanepænexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinxæ, paayajamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinxæ beDioso pejumelivaisicuenia. Bajarapamonae pacatocapata cuyalato itsamonae peticobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepæbivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonae pataneyapëtaenexa xaniavaetsia patanecopiapitsinexa. ² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tsipaji baja jivi yapëtane xaniavaetsia Jesucristo pelivaisi patacatsipaebixæ panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata

jivi bajarapamonae yapētanenua Dioso patanitorobijava. ³ Paxamē xaniavaetsia panejumecovēnētame patacatsipaebilivaisi, Jesucristo pelivaisi. Nexata itsamonae, apo pataneyapētaevi ata, itsa pacavēnēlivaisitane patanejumecovēnētsijavamē, panesivajamatabējumaitsi: “Pablobana Corinto tomarapijivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapētaenexa, itsiata yapētanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabējai. Piasaētsaponaponaenē baja cajena Espiritu Santo pacatsijamatabēeca. Nexata baja pacajamatabēcuenepēnēyorota pejanajamatabēcuenē panexaināenexa. Nexata itsamonae xaniavaetsia itsa patsitajinavanapame, bajarapamonae ata baja pacayapētane Cristo pelivaisi papecatsijamatabēcēcajaya.

⁴ Paxanē payapētāniji Dioso patanitorobijava pepacuenē Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabēcueneta. ⁵ Paxanē patasaēta Dioso patatonacuenēbinexa, apo panejamatabēcuenecaējēpae. Nexata xua Dioso patoexanavanapajē, Dioso baja cajena paneyavenonabiaba. ⁶ Dioso panejamatabēcueneyavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaitisijava jivi pecapanepaenexa. Bajarapamonaejavabelia apo pajumaitsinē tsabiabi: “Pajumecovēnētavanapare Dioso Moiséspijinēta penajumecopatsilivaisi. Itsa apo pajumecovēnētsimē tsane, nexata panaxuabianame,” apo pajanē tsabiabi. Biji rajane jivi patsipaebabiabajē pacuenia Espiritu Santo jamatabēcuenēasaēyaexanaejitsiatsi. Palivaisi bajayata Dioso Moiséspijinēta najumecopata, itoroba pebeyaxuabinoxatsi pajivi apo jumecovēnētsi bajarapalivaisi. Itsiata baitsi jane pajivi jumecovēnēta papejanalivaisi jivi patsipaebabiabajē, Espiritu Santo pesaēta jamatabēcuenēasaēyaxanaponatsi.

⁷ Bajayatami Dioso Moiséspijinēta najumecopata. Bajarapalivaisi Dioso yaquina ibopanabejējumata. Bajarapalivaisita Dioso itoroba pajivi apo jumecovēnētsi bajarapalivaisi pebeyaxuabaponaenexatsi. Bajarapacuenia Dioso Moiséspijinēta itsa najumecopata bajarapalivaisi, Moiséspijinē itabaranivenivena bitso. Nexata Israelpijinē pemomoxi apo itabaranaēcotsicapanepaetsi. Itsiata baitsi jane bajaraxuacujinae itsamatacabianējavabelia, itabaracotiacaevapona baja. ⁸ Palivaisi bajayata Dioso Moiséspijinēta najumecopata, xanepana baja picani caeepatoyonexa saya. Bajarapalivaisimi matatoxenetsia bitso xanepana papejanalivaisi mapamatacabitaje jumecovēnētavanapatsi Dioso vajanacapanepaenexa. Bajarapacuenia Dioso nacapanepaena Espiritu Santo vajanacatsijamatabēcēcaexae daxitamatacabijavabelianexa. ⁹ Bajayata Dioso Moiséspijinēta najumecopata. Nexata bajarapalivaisi xanepana. Tsipaji bajarapalivaisi pejamatabēcueneta, jivi yapētane Dioso penaneconitsiaexanaejavanexatsi pibisiacuenē pexanaeneconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabēcueneta Dioso nacapanepaejitsia. Bajarapapejanalivaisi pejamatabēcueneta, Dioso baja aneconijibia nacatane. ¹⁰ Palivaisi bajayata Dioso Moiséspijinēta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana.

Bajaraxuata palivaisimi copiaya Dioso najumecopata Moiséspijinëta, aeconoxae baja nacatsitaajumematamobi. ¹¹ Palivaisi copiaya Dioso Moiséspijinëta najumecopata, xanepana picani caeepatoyonexa saya. Biji rajane palivaisi cotocaevi Dioso najumecopata, bitso xanepana. Tshipaji daxitamatacabijavabelianexa bajarapalivaisi tsitecaena.

¹² Payapëtaniji papejanalivaisi Dioso cotocaevi najumecopata bitso pexanepanaejava. Tshipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinë bajarapalivaisi patatsipaebinexa jivijavabelia. Palivaisivajëto payapëtaniji, patsipaebabiabajë jivijavabelia. ¹³ Bajayata Moiséspijinë yapëtae ata livaisi. itsiata xaniavaetsia apo tsipaebi pijajivijavabelia. Itsiata paxanë bajarapacuenia apo paitsinë. Bajayata Moiséspijinë itsa itabaranivenivena, naitabaraacata papaëbërëpanata. Bajarapacuenia naitabaraacata pijajivi, Israelpijinë pemomoxi, pitabarataeyanivatsi bajarapacotia pecaevaponaejava. ¹⁴ Itsiata baitsi jane bajarapamonaevavabelia Moiséspijinë tsipaebi ata, apo jumeyapëtaetsi pajamatabëcuenelivaisi yabara tsipaeba. Bitso ajamatabëcuenetaja bajarapamonaemi. Nexata apo jumeyapëtae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxë ajamatabëcuenetaja bajarapamonaemomoxi ata. Bajarapamonaem penacaetuatabiabibota, itsa lebabibaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bajarapamonaem itsa jumecovënëtsipa Cristo pesivatëpaejavatsi, nexata matapania jumeyapëtaejitsipa pajamatabëcuenelivaisi xaina palivaisi bajayata Moiséspijinë tsipaebabiaba. ¹⁵ Ajena mapamatacabijavaberena ataje, judíovi penacaetuatabiabibota itsa lebabibaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bitso ajamatabëcuenetaja bajarapamonaem. ¹⁶ Itsiata baitsi jane pajivi najamatabëcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapëtaem pajamatabëcuenelivaisi xaina palivaisi bajayata Moiséspijinë tsipaebabiaba. ¹⁷ Vajatuxanenë Jesucristobeje, Espíritu Santobeje, najamatabëcuenëjpabeje. Jesucristo pejamatabëcueneta Espíritu Santo ponapona vajajamatabëëthëtota. Nexata Espíritu Santo nacajamatabëcueneyavenonapona pibisiacuene vajaxanaeyaniva. ¹⁸ Nexata Jesucristo pejamatabëcueneta, Espíritu Santo nacayavenona. Nexata pacuenia Moiséspijinë jivi vecuanaitabaracata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapëtaenexa Dioso ayaijamatabëcuene pexainaejava. Espíritu Santo nacajamatabëcueneyavenonapona vajavajënaeyabelia pejanajamatabëcuene vajaxainaponaenexa. Nexata pacuenia Jesucristo jamatabëcueneitsi, bajara vaxaitsi ata vajajamatabëcueneitsinexa.

4

¹ Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tshipaji

baja Dioso panetocopata bajarapacuenia. ² Muetsia apo paexanaenē itsacuenejava ata. Apo paexanaenē daxita xua piauracuene ata. Jivi patayamaxēitorobinexa, itsacuenejava ata apo paexanaenē. Apo patsipaebabiabinēnua saicayalivaisi Dioso pejumelivaisivecua. Dioso baja cajena yapētane jivijavabelia ēpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. ³ Itsa patsipaebabiabajē jivi pecapanepaelivaisinexatsi, jumenapebetsiaya patsipaebabiabajē xaniavaetsia patanejumeyapētaenexa. Nexata patsipaebi atanē, pajivi apo jumecovēnētsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. ⁴ Bajarapacuenia apo jumecovēnētsi tsipaji dovathi pejamatabēcueneta ajamatabēcuenetaquiriayaxanatsi pejumecovēnētsiyaniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabēcuenetayotsinexa itsa jumecovēnēta bajarapalivaisi. Nexata dovathi, mapanacuapijivi pijatuxanenē, apo jitsipae bajarapalivaisi jivi pejumecovēnētsinexa pejamatabēcuenetayotsiyanivatsi. Cristo paxa Dioso jamatabēcuenējēpa. Nexata pacuenia Dioso jamatabēcuenetsi, bajara Cristo ata jamatabēcuenetsi. ⁵ Livaisi itsa pacatsipaebabiabatsi, paxanē apo panalivaisipaebabiabinē pataneyaiyataenexamē. Biji rajane vajatuxanenē Jesucristo pelivaisi pacatsipaebabiabatsi. Paxanē saya panataniji bepanijajivinē. Jesucristo bitso pajitsipajē. Bajaxuata paxamē ata jamatabēpacayavenonatsi. ⁶ Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanē ata patajamatabēcuenetaquirijavami, Jesucristo pelivaisi itsa pajumecovēnētajē, Dioso panejamatabēcuenetayota. Bajarapacuenia itsa panejamatabēcuenetayota, payapētaniiji Dioso bitso ayaijamatabēcuenepexinaejava. Jesucristo itsa itabaranivenivena Dioso pexēnatoxae, paxa Dioso jamatabēcuenetajēta Dioso bitso ayaijamatabēcuenepexinaejava.

Pacuenia Dioso jamatabēcueneyavenona pijajivi, itsa tonacuenebavanapatsi, yabara pelivaisi

⁷ Paxanē Dioso patanejamatabēcuenetayotsivi ata, pataperabēto apo ajamatabēsaē. Pacuenia atsavaxi bajayajebi apo ajamatabēsaē, bajara saya itsi. Pataperabēto apo paperabēsaē atanē, Dioso pataneyavenonaeaxae, pajamatabēcuenesaenē tsavanapae. Nexata bajarapacuenia pataajamatabēcuenesaē tsavanapaejava patanetaevi, jamatabējumai tsane paxanē yabara: “Mapamonaēje ajamatabēcuenesaē tsavanapae Dioso pesaēta,” jamatabējai tsane. ⁸ Nexata panetocopiapatabiabi ata itsacuene patanetoyapēbejecuene, itsiata Dioso paneyavenonabiaba patavecuapanepaenexa bajarapacuene. Apo payapētaeyabiabi atanē pajamatabēcuenepane panetocopiapata patanetoayapēbejecuene, itsiata paxanē apo pacopatsinē Dioso patajumecovēnētsijava. ⁹ Itsamonae panebejiobiaexanabiabi ata Dioso patajumecovēnētsijava yabara, itsiata Dioso apo panecopatsi patajaepato. Itsamonae irata panepenetabiabi ata patanebeyejebinexa picani, itsiata pepacuene apo panebeyaxuababiabi Dioso pataneyavenonabiabixae. ¹⁰ Pacuenia Jesús pijavajabitsaē bajayajebi picani jamatabēbeyaxuababiabatsi, bajarapacuenia paxanē ata Jesús papijajivixanenē, itsamonae jamatabēpanebejebabiaba picani. Itsiata apo panebeyejebicapaneapae.

Bajaraxuata daxita jivi yapētane Jesús pataneyavenonabiabijava. ¹¹ Daxitamatacabi patajinavanapaematacabianē, panetsiyai tsabiabi itsamonae patanebeyejebinxaxa Jesús papijajivixaxenē. Bajarapacuenia panetocopiapatabiaba jivi pataneyapētaenexa Jesús pataneyajavaponaponaejava. ¹² Panetsiyai tsabiabi itsamonae patanebeyejebinxaxa patacatsipaebabiabixaxa papecacapanepaelivaisinxaxa Diosojavabelia. Nexata paxanē patacatsipaebilivaisi panejumecovēnētsixaxa, itsamatacabi athēbētatsia Dioso pacarajutsiana matacabi apo peverevereaejava.

¹³ Dioso pejumelivaisibaxutota jumaitsi mapacueniaje: “Jumecovēnētajē Dioso taneyavenonaejavanexa. Bajaraxuata tsipaebajē jivijavabelia Dioso taneyavenonaejavanexa,” jai. Bajara pijinia pacuenia paxanē ata pajamatabēcueneitsinē. Pajumecovēnētajē Dioso pataneyavenonaejavanexa. Bajaraxuata patsipaebabiabajē jivijavabelia Dioso pataneyavenonaejavanexa. ¹⁴ Vajatuxanenē Jesús petēpaecujinae Dioso icatsia asaēyaexanatsi. Bajaraxuata payapētanjiji baja pexaniajicuene Dioso icatsia paxanē ata pataniasaēyaexanaejavanexa patatēpaecujinae, Dioso patayajavajinavanapaenexa pijanacuataatsia. ¹⁵ Paxanē itsamonae panebejiobiaexanabiabi ata, itsiata apo pacopatsinē patacatsipaebabiabijava pexaniajailivaisi. Nexata panevajēnaeyabelia pajumecovēnētaPONAME patacatsipaebilivaisi. Nexata baja itsa paayaibitsaētōmē tsaponae Dioso panejumecovēnētsivi, paayaibitsaētōmē baja pijinia tsaponae Diosojavabelia panejumait-sivinxaxa: “Xanepana rabaja. Tsipaji bitso pexaniacuene panetoxaname,” panejaivinxaxa Diosojavabelia. Nexata papecajumetaevi ayaibitsaēto yapētaena Dioso bitso ayaijamatabēcuene pexinaejava.

¹⁶ Bajaraxuata itsamonae panebejiobiaexanabiabi ata, itsiata apo pajamatabēcopatsinē jivi patatsipaebabiabijava pexaniajailivaisi. Pataperabēto cueranaponae ata, itsiata patavajēnaeyabelia, caematacabi canacujitsia, pajamatabēcuenesaēnē tsaponae Dioso patajumecovēnētsijava. ¹⁷ Xua nacatocopiapatabiaba itsamonae vajanacabejiobiaexanabiabinexaxa, saya caeepatoyo bajarapacuenia nacabejiobiaexanabiaba mapanacuataje vajajinavanapaepatoyo. Bajaraxuacujinae athēbētatsia xainaenatsi daxitacuenevecua pexaniajava, baitsi matacabi apo peverevereaejava. ¹⁸ Nexata apo vajēnaeevetavanapaetsi vajanacatocopiapatsinexaxa, xua nacacājēpa vajataenexaxa. Biji rajane jamatabēnajinavanapatsi vajanacatocopiapatsinexaxa xua apo nacacājēpae vajataenexaxa. Tsipaji xua nacacājēpa vajataenexaxa, daxita bajaraxua, vereverecaena. Itsiata baitsi jane xua apo nacacājēpae vajataenexaxa, daxitamatacabijavabelianexaxa apo verevereca tsane.

5

¹ Mapanacuata jivi pexanaebobērēto bepijia baabeje. Bajara pijinia itsi vajaperabēto ata. Bepijia vereverecaena. Itsiata baitsi jane yapētanetsi mapacueneje. Vajatēpaecujinae itsamatacabi Dioso athēbētatsia nacarajutsiana apo peverevereaeperabētonexaxa. ² Xaniajai cajena. Itsa abaxē jinavanapatsi mapanacuataje, bitso picani jitsipabiabatsi vajanacaperabēithianaenexaxa athēbēpijiperabētonexaxa. Jitsipabiabatsi picani vajaponaenexaxa athēbēabetsia pejanaperabēto vajayajavajinavanapaenexaxa athēbētatsia. ³ Athēbētatsia raja aperabējibia apo jina-

vanapae tsanetsi. Biji rajane pejanaperabëto yajavajinavanapaenatsi. ⁴ Itsa abaxë jinavanapatsi mapanacuataje, bitso picani jitsipabiabatsi vajanacaperabëitothianaenexa. Apo jitsipaetsi picani vajatëpaejava. Itsi-ata baitsi jane yapëtanetsi mapacueneye. Vajatëpaeujinae itsamatacabi athëbëtatsia yajavajinavanapaenatsi pejanaperabëto, apo peverevere-caeperabëtonexa jane baja. Nexata mapanacuata vajayajavajinavana-paeperabëtomi ajibi baja tsane. Xainaenatsi juya apo peverevere-caeperabëtonexa. ⁵ Bajarapacuenia vajanacaperabëitothianaenexa Dioso nacatoxaina. Nexata Dioso nacatocopata Espíritu Santo vajanacaya-javaponaponaenexa. Nexata Dioso yabara bejamatabëjumaititsi mapacueniaje: “Mapacueniaje Espíritu Santo Dioso pataneyajavaponaponaeyaexanaexae, nexata payapëtaniji xaniajai pepacueneye itsamatacabi Dioso pataneperabëitothianaenexa. Xaniajai baja cajena. Pepacueneye itsamatacabi Dioso paneperabëitothianaenexa pacuenia baja najumecapanepaeya jumaiti,” bejamatabëjaitsi Dioso yabara.

⁶ Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneye. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavanapaejitsiatsi, bajarapanacua abaxë tajë vecuajinavanapatsi. ⁷ Apo taetsi abaxë athëbëtatsia vajatuxanenë vajayajavajinavanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaejavanexa. ⁸ Bajaraxuata jitsipatsi vajatëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenë pijanacuataatsia vajayajavajinavanapaenexa. ⁹ Bajaraxuata mapanacuata vajajinavanapaematacabibeje, asaëyata vajatuxanenë tonacuenebavanapatsi. Tsipaji jitsipatsi vajanacasivajamatabëcuene barëyajava. Vajatëpaeujinae ata, pijanacuataatsia jamatabëtojinavanapatsi pejitsipacuenia. ¹⁰ Vajatuxanenë pejitsipacuenia jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtaeponaenatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamona xaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi

¹¹ Payapëtaniji baja cajena itsamatacabi vajatuxanenë pitabarata cujunaviaya patananubenaenexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtanepacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. ¹² Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcuenecaëjëpaenexa panejumecanaviatsijava pamona pibisiacuenia panebarcuacuajiai. Bajarapamonaenepaneyalivaisiaexanabiaba. Beayajamatabëcuenevi

nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeconi yabara. Apo canaējētsi pexaniajamatabēcuene pexainaenexa. ¹³ Paxanē picani xaniavaetsia Dioso jumecovēnētsiaya jivi patsipaebabiabajē Jesús pelivaisi. Itsiata Dioso apo pejumecovēnētsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamē ata Dioso papecacapanepaenexa. Paxamē apo panetaemē bepatanematajemabivi. ¹⁴ Cristo raja paneasiva tsabiabi. Bajaraxuata patonacuenebavanapajē. Pajamatabējumaitsinē tsabiabi: “Caenē Cristo nacasivatēpa daxitanexatsi. Bajaraxuata Dioso baja nacatane Cristo bevajayajatēpaevi. Nexata baja bevajananeconimatamotsicapanepaevi Dioso nacatane,” pajamatabējanē tsabiabi. ¹⁵ Cristo jivi sivatēpa. Petēpaecujinae Dioso icatsia asaēyaexanatsi. Nexata daxita pamonaē jumecovēnēta Cristo pesivatēpaejavatsi, matacabi apo pevereveceajava xainaena. Nexata bajarapamonae apo hexanavanapae pijacuata penatojitsipaecuenia. Biji rajane hexanavanapa pacuenia Cristo tojitsipatsi pesivajamatabēcuenebarēyanexatsi. ¹⁶ Bajaraxuata ajena mapamatacabijavaveliacujinaeje, patavajēnaeyabelia tsaponae, Dioso pejumecovēnētsivi yabara apo bepanajamatabēxainaenē pibisiacuenia, pacuenia Dioso apo pejumecovēnētsivi banajamatabēxaina. Tsipaji pamonaē Dioso pejumecovēnētsivi pacuenia bēpēnēaverena jamatabēcueneitsi, apo pajamatabēcuenyepētaenē. Xanē ata rabaja picani Jesucristojavabelia tanajamatabēcuene copatsivajēnaeya, Jesucristo yabara najamatabēxainajē pibisiacuenia, pacuenia banajamatabēxaina Dioso apo pejumecovēnētsivi. Bepenajumetsēnētsinē taniji Cristo. Itsiata baitsi jane aeconoxae baja bajarapacuenia apo najamatabēxainaenē Cristo yabara. Tsipaji baja yapētaniji Cristo pexaniajainēcuene. ¹⁷ Pajivi najamatabēcuene copata Jesucristojavabelia, bajarapajivi xaina pejanajamatabēcuene. Pijaperujujamatabēcuenemi baja vecuaajibiaexanatsi. Nexata bajarapajivi daxitacuene sivanajamatabēxaina pexaniajamatabēcueneta.

¹⁸ Daxitatsi Dioso pejanajamatabēcuene nacarajuta. Dioso nacabarajamatabēcuenexanepana Cristo vajanacasivatēpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovēnēta, Dioso pebarajamatabēcuenexanepanaenexatsi. ¹⁹ Nexata Cristo cruzata itsa sivatēpa mapanacuapijivije, Cristo pesivatēpaexaetsi, Dioso barajamatabēcuenexanepanaeya tanetsi daxita pamonaē jumecovēnēta Cristo pesivatēpaejavatsi. Paneconi picani bajarapamonae xaina, Dioso baja vecuaajibiaexanatsi Cristo pesivatēpaejamatabēcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. ²⁰ Nexata paxanē Cristo papijajivinē tsanajetarubenaē. Cristo baja cajena pejamatabēcueneta, papatajē paxamējavata patacatsipaebinexa pexanialivaisi. Pacuenia Dioso itsa patsipa, pacamuxujibijitsipa, bajarapacuenia xanē ata pacamuxujibatsi Cristo papecasivatēpaexae panijaneconi yabara Dioso papecabarajamatabēcuenexanepanaenexa. ²¹ Cristo pibisiacuene apo exanae, tsiquirijavayo ata. Itsiata baitsi jane Cristo Dioso

tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenēcuenia cruzata beyaxuabatsi. Bajarapacuenia Cristo cruzata vajanacasivatēpaexae, nexata Dioso aneonijibia nacatane itsa jumecovēnētatsi Cristo vajanacasivatēpaejava vajaneconi yabara.

6

¹ Dioso pataneyajavanacuenebixae, asaēyata pacamuxujjobatsi. Dioso pinijicuenia papecaitaxutotsoniataejava, pacatsipaebatsi panejumeaebianiva. Itsa pajumeaebijitsipame, nexata Dioso nacueratsipa papecaitaxutotsoniataejava. ² Tsipaji Dioso jivi pitaxutotsoniataejava, tajēvelia Dioso pejumelivaisibaxutota jumaitsi mapacueniaje: Pamatacabi jivi itaxutotsoniataenajē, cajumetaenatsi. Nexata pamatacabi jivi capanepaenajē, xamē ata cayavenonaenatsi, jai tajēvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacacapanepaenexa jane baja.

³ Itsa patonacuenebavanapajē Dioso, pajitsipajē daxitajivi xaniavaetsia patatsitajinavanapaejava, daxitajivi Dioso pejumecovēnētšinexa. Apo paexanaenē pibisiacuene, tsiquirijavayo ata, pataexanaejava yabara jivi patanejumeaebianiva Dioso pejumelivaisi itsa patsipaebajē. ⁴ Biji rajane daxita xua paexanavanapajē, xaniavaetsia patsitaexanavanapajē jivi pataneyapētaenexa Dioso papijajivicuene. Itsamonae panebejiobiaexanabiaba. Itsajavata bitso panamatavenonabiabajē itsacuenejavaxi. Itsajavata bitso panetsiayai tsabiabi itsamonae patanebeyejebinexa. Bajarapacuenia panetsiayai tsabiabi ata, itsiata bajayajebi pajamatabēcuenesaenē tsavanapae Dioso pejumelivaisi jivi patatsipaebavanapaejava. ⁵ Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajē, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajē. Itsajavata meravi ata apo pamajitabinē Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapēbeje tsabiabi ata, itsiata bajayajebi pajamatabēcuenesaenē tsavanapae Dioso pejumelivaisi jivi patatsipaebavanapaejava. Nexata jivi paneyapētane Dioso papijajivicuene. ⁶ Dioso papijajivicuene jivi pataneyapētaenexa, jivi patsitajinavanapajēnua mapacueniaje. Pamatacabibeje pajinavanapajē, pibisiacuene apo paexanavanapaenē. Biji rajane jivi patsitajinavanapajē pexaniajailivaisi patayapētaevicuenia. Bajayajebi itsamonae pibisiacuene paneexanabiabi ata, apo pacuene canaviatabiabinēnua. Pexaniacuene patoexanabiabajēnua itsamonaejavabelia. Patsitajinavanapajēnua pacuenia Espiritu Santo paneyapētae yaexanapona Espiritu Santo patanetsijamatabēecaexae. Patsitanajamatabēcuenē itajētavanapajēnua itsamonae ata pataasivajava patajamatabēēthētojavavetsina. Bajarapacuenia patatsitajinavana-paexae, jivi xaniavaetsia paneyapētane Dioso papijajivicuene. ⁷ Dioso papijajivicuene jivi pataneyapētaenexa, patsitajinavanapajēnua mapacueniaje. Ēpexaniajailivaisi jivi patsipaebabiabajē. Patsitanacuene itajētavanapajēnua daxita xua paexanavanapajē, Dioso

pataneyavenonabiabijava. Dioso baja aneconijibia patanetaexae, Espíritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espíritu Santo patacueneamoneyabinexa dovathi. Bajarapacuenia patatsitajina-vanapaexae, jivi paneyapètane Dioso papijajivicuene. ⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuena panebaracuaicuajai tsabiabi. Itsamonae pijinia pibisiacuena panebaracuaicuajai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsénètsivi. ⁹ Itsamonae pataneyapètaevi ata, itsiata apo bepataneyapètaevi panetaeyabiaba. Itsajavata itsamonae jamatabèpanebejebabiaba picani. Itsiata tsiteca asaëya bajarapalivaisi patsipaebavanapajë. Dioso baja cajena panetocopata itsamonae ayaicuena patanebejiobiaexanabiabinexa, itsiata apo patanebejebixinexa. ¹⁰ Panajamatabèxainabiabi atanë bitso itsamonae pibisiacuene pexanaejava yabara, itsiata bèpèña pepacuene pajamatabècuenebarëyanë tsavanapae daxitamatacabijavabelianexa. Patabejiobivi picani. Itsiata jivi ayaibitsaëttoxanetonë ricovi paexanaponajë Dioso pejumelivaisi patatsipaebijamatabècueneta pejumecovènètsixae. Apo paxainaenë picani mapanacuapijicuene. Itsiata baitsi jane Diosojavabelia daxitacuene paxainajë, apo peverevereaejavanexa jane baja.

¹¹ Tajamonae, paxamë paCorinto tomarapijivimë, pacana-jamatabècuene vajunupaebatsi baja cajena roviaia. Apo pacavecuanajamatabècuene matayatsitsi. ¹² Asivaya pacatae atatsi, paxamë itsiata bajarapacuenia asivaya apo panetaemë. ¹³ Pacuenia pexi pexainaenë asaëya banacoximuxujioba, bajara pijinia pacuenia paxanë ata pacamuxujiobatsi. Paxamë ata panejamatabècuenevetsina asivaya panetaema pacuenia baja paxanë asivaya pacatanetsi.

Pacuenia piasaëtsaponaponaenë Dioso nacatane bepijatemplobotsi tsa-vanapae yabara pelivaisi

¹⁴ Dioso apo pacatojitsipae mapacueneje. Paxamëyajuvënëva, Dioso pejumecovènètsiva, pètsa pitatsi Dioso apo pejumecovènètsinë. Paxamë ata papebijivimë, pètsa papitame Dioso apo pejumecovènètsiva. Bajayajebinxä ata pètme Dioso apo pejumecovènètsivi. Tsipaji apo pacajamatabècuenejèpae tsipae. Dioso pejumecovènètsivi apo jamatabècuenejèpae Dioso apo pejumecovènètsivi. Tsipaji Dioso jivi pejamatabècuene itayotsijamatabècuenetsi, mapanacuata pitaquirijamatabècuenebeje, apo najamatabècuenejèpaebeje. ¹⁵ Cristobeje dovathibeje apo najamatabècuenejèpaebeje. Nexata pijinia pajivi Dioso pejumecovènètsijivi, Dioso apo pejumecovènètsijivibeje, acuenebi bajayajebi penajuanacuenebaponaponaenexabeje. Tsipaji apo najamatabècuenejèpaebeje. ¹⁶ Bajara pijinia navecuaitsibeje Dioso pijatemplobobeje, jumapecataeya pexanaenëanë penubenaetemplobobeje. Apo najamatabècuenejèpaebeje. Vaxaitsi baja cajena piasaëtsaponaponaenë Dioso, nacatane bepijatemplobotsi tsavanapae. Bajarapacuenia nacatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bajarapajamatabècuene yabara bajayata Dioso vaxaitsi yabara tajëvelia jumaitsi mapacueniaje:

Tsijamatabëcaenajë bajarapamonae tayajavaponaponaenexa. Bajaramonae pijaDiosonë tsane. Bajara pijinia pamonaе tajajivi tsane,

jai Dioso bajayata tajëvelia vaxaitsi yabara.

¹⁷ Bajaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitsi mapacueniaje:

Pamonaе tuatuajëta pajinavanapaename, pavecuapitsapaename. Bajarapamonae navecuatsatsia pajinavanapaename. Paxamë pëtsa pibisiacuene panaexanaename bajarapamonaeta papecajamatabëcuene bijianaeyaniva. Nexata xanë pacasivabarëya tsanetsi. ¹⁸ Paneaxanë tsane. Nexata daxita paxamë pataximë tsane,

jai bajayata vajatuxanenë Dioso tajëvelia vaxaitsi yabara, daxitacuene pevetsinë.

7

¹ Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacuene vajaxanabiabijavami, copatsianatsi baja. Vajajamatabëëthëtota pibisiajamatabëcuene vajanajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipaecuenia.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajëre pataniasivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacayajuvënë yamaxëitojorobitsinua bajarapacuenia panijapalata patacavecuapitsinexa. ³ Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabijavabelianexa asivaya pacajamatabënajinabiabatsi. ⁴ Payapëtanijinua caejamatabëcuene panenamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tsipaji bajarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunaviajinavanapabiabajë. ⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. ⁷ Tito pepatsixae paxamëjavaverena, panejamatabëcueneasaëyaexana. Itsiata Tito ëpepatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname.

Bajarapacuenia paneexanaejava, Tito itsa pacavajunupaeba paxanējavaberena, pamuxunajamatabēcuenesaētajē. Bitso pina picani jamatabēpanetaneme. Bajarapalivaisinua Tito panetsipaeba. Panetsipaebanua bitso paneyanajamatabēxainaejava pibisiacuene paneexanaeneconi. Panetsipaebanua bitso patanesivanajamatabēxainaejavamē itsa panevēnēlivaisitaneme bitso patacasivanajamatabēxainaejava. Bajarapacuenia paneexanaejava, Tito itsa pacavajunupaeba paxanējavaberena, bitso pamuxunajamatabēcuenēbarēyanē.

⁸ Pabaxutomi copiaya pacatoyaquinatsi, itsa palebame, bitso pacanajamatabēxainaeyaexana. Itsiata saya caeepatoyonexa. Bajarpacuenia papecanajamatabēxainaeyaexanaexae, bajarapabaxutomi yabara jamatabējumaitsinē mapacueniaje: “Apo betoyaquinaenē picani bajarapabaxutomi,” jamatabējanē. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabēxainaenē. ⁹ Aeconoxae baja sivabarēyanē patacatitorobixae bajarapabaxutomi. Itsiata apo sivabarēyanē xua pacanajamatabēxainaeyaexanatsi panijaneconi yabara. Biji rajane sivabarēyanē tsipaji patacanajamatabēxainaeya exanaejavata bajarapabaxutomita, pacopabame baja pibisiacuene paneexanabiabijava. Panajamatabēcuenepēnēyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabēcueneta, pacajamatabēcueneyavenonatsi. ¹⁰ Nexata pacuenia Dioso pacatojitsipa, bitso payanajamatabēxainame panijaneconi. Nexata baja pacopabame pibisiacuene paneexanaejavami. Panajamatabēcuenepēnēyorotame baja Diosojavabelia. Nexata paxamē Dioso pacacapanepaena. Pamonae Dioso capanepaenatsi, apo jumaitsi tsane: “Apo jitsipaenē picani Dioso tanecapanepaejava,” apo jai tsane. Itsiata baitsi jane pamonae yanajamatabēxainavanapae ata pibisiacuene pexanaeneconi, itsiata itsa apo copabi tsane pibisiacuene pexanabiabijava, itsa apo najamatabēcuenepēnēyorotsi Diosojavabelia, bajarapamonae Diosovecua naxuabiana daxitamatacabijavabelianexa. ¹¹ Panajamatabēcuenecanaējēre mapacuenije. Pacuenia Dioso pacatojitsipa, bitso paxamē payanajamatabēxainame panijaneconi. Nexata baja aeconoxae paneconijibimē Dioso pitabarata. Najamatabēcuenereviabiaya baja pacanaējētame panijaneconi. Pepacuene panavajunupaebamenua Diosojavabelia pacuenia paexanavanapame. Paxamē picani bitso pabaraanaepanabiabame paxamēyajuvēnēnē, ponē pibisiacuene exanaponapona paxamē tuatujēta. Panecujunavabiabamenua picani bajaraponē pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabēcueneveretamenua panenaneconitsiaexanaenexa paxamēyajuvēnēnē, ponē pibisiacuene exanaponapona paxamē tuatujēta. Bajarapacuenia itsa pasivanajamatabēxainame pibisiacuene pexanaponaponaenē, Dioso patsitanajamatabēcuenēitajētame Diosojavabelia apo panenaneconitsijava. ¹² Itsa pacatoyaquinatsi copiaya pabaxutomi, pacatoyaquinatsi padaxitamē patacimumuxujiobinexa. Apo toyaquinaenē caenē paxamēyajuvēnēnē tamuxujiobinexa, ponē pibisiacuene exanaponapona paxamē tuatujēta. Apo toyaquinaenēnua tamuxujiobinexa ēponē ata pibisiacuene

toexanatsi itsanë. Pacatoyaquinatsi bajarapabaxutomi padaxitamë patacamuxujiobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneyapëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenëbarëyanexa.
¹³ Nexata baja panejumecovënëtame. Bajarapacuenia patanejumecovënëtsixaemë, bitso pacasivajamatabëcuenëbarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bajaraxuata pacasivajamatabëcuenëbarëya Tito. Nexata Tito papecasivajamatabëcuenëbarëyajava yabara, paxanë ata bitso pacasivajamatabëcuenëbarëyatsi.
¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebiana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenëbarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenëbarëyatsi.
¹⁵ Tito najamatabënapitabiaba panejumecovënëtabiabijava pacuenia pacaitoroba. Najamatabënapitabiabanua yayiataeya panecopiapitsijava ata. Bajaraxuata Tito bitso pacaitaxanapona pevajënaeyabelia.
¹⁶ Pacasivajamatabëcuenëbarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenërajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneyavenonatsi Dioso pejumecovënëtsivi, Macedonia nacuapijivi.
² Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenëjëtsinexatsi, itsiata jamatabëcuenëbarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba.
³ Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa.
⁴ Bajarapamonae pinijicuenia paneitoroba patatocaponae name pejebiofrenda. Panejumaitsi mapacueniaje: “Pexaniacuene panetoxanaename. Panetocaponae name mapaofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai.
⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae eofrenda apo rajutsi

Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi. ⁶ Paxamë, paCorinto tomarapijivimë, paofrenda paxamë ata pacaetuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. ⁷ Paxamë itsamonaevectu xaniavaetsia Dioso patojinavanapame. Xaniavaetsia panajamatabëcuenecopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamona. Bitso pacajamatabëcueneenabiabanua Dioso pijacuene panetonacuenebavana-paenexa. Bitso paneasivamënu. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

⁸ “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa. Bajarapacuenia paxamë ata itsa paexaname, itsamona patsitanajamatabëcuene itajëtsianame panexanijajacuene Dioso paneasivajava. ⁹ Bajarapacuenia paxamë ata ofrenda parajutsianame. Tsi-paji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabajiobiaexana papecayavenonaenexa. Bajarapacuenia papecasivanabajiobiaexanaexae, nexata paxamë ata itsamatabi paayaijamatabëcuenevimë tsane Dioso pijanacuatatsia.

¹⁰ Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. ¹¹ Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. ¹² Nexata itsa pepacuene parajutsianame pacuenia pacacaëjëpa, Dioso pacasivajamatabëcuenebarëya tsane. Tsi-paji apo pacaitorobi xua apo paxainaemë panerajutsinexa.

¹³ Apo pacaitorobitsi raja mapacueniaje: “Itsamona paneyavenonaenexa, ofrenda itsa paexaname, pabuare daxita panexainae palatayomi,” apo pacajaitsi. Tsi-paji juya paxamë panamatavenonaejitsipame. ¹⁴ Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaëjëpa paneyavenonaenexa bepejiobivi, Jerusalén tomarapijivi. Itsamatabijavabelia, pamatabi paxamë panamatavenonaename, caëjëpaenatsi juya bajarapamonae papecayavenonaenexa. Bajarapacuenia nexata daxita

paxamë panenamataavenonaeyavaxi, apo panamatavenonaemë tsane. ¹⁵ Bajarapajamatabëcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xainae ata, itsiata apo toyajuvënënacopatsitsi. Itsajivi pijinia tsiquirijavayo xainae ata, itsiata apo namataavenonae,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonae-vijavabelia.

Pacuenia Tito, anijanëbeje yajava, pona Corinto tomarabelia yabara pelivaisi

¹⁶ Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexania-jamatabëcuene rajutajë Diosojavabelia. Tsipaji Espiritu Santo pejamatabëcueneta Titobeje panajamatabëcuenejöpajëbeje paxamë yabara. ¹⁷ Nexata Tito itorobajë papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajënaelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaexae peponaejava paxamëjavabelia, ponaena papecayavenonaenexa.

¹⁸ Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyataenëtsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. ¹⁹ Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponaeñajë Jerusalén tomarajavabelia, bajaraponë payajavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënua patajitsipaejava patayavenonaenexa pamona bepejibivi. Nexata bajarapamonae jamatabëjumai tsane: “Matsaena pamona jitsipa peyavenonaenexa bepejibivije,” jamatabëjai tsane.

²⁰ Bajarapacuenia Macedonia nacuapijinë payajavaponaenajë itsajivi ata patanebaracuaicuajaiyaniva bajarapapalataxaneto yabara. “Pabloana raeta bajarapalata yajuvënëcopata,” patanejaiyaniva. ²¹ Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata pataneyapëtaenexa apo patanacobetoxotsivicuene.

²² Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatone pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaeyavanexa Jerusalén tomarapijivi.

²³ Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaponaeyavabeje jivi petaexae, nexata jivi yayiatane Cristo

pelivaisi,” pajamē tsane. ²⁴ Nexata bajaraponēbeje itsa patsianabeje paxamējavata, patsitanajamatabēcuene itajētsianame paneasivajava bajaraponēbeje. Nexata Dioso pejumecovēnētsivi, pamonaē itorobatsibeje bajaraponēbeje, pacavēnēlivaistaena paneasivajava bajaraponēbeje. Nexata asivaya itsa pacopiapitsianame Dioso pejumecovēnētsivi pitorobinētsibeje, nexata Dioso pejumecovēnētsivi jamatabējumai tsane paxamē yabara: “Pacuenia baja Pablobana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabējai tsane.

9

Ofrenda pecaetuatsijava Dioso pejumecovēnētsivijavabelia peyavenon-aenexa yabara pelivaisi

¹ Ofrenda pacaetuataponame paneyavenonaenexa bepejiobivi, Dioso pejumecovēnētsivi, Jerusalén tomarapijivi. Apo jitsipae nē picani icatsia patacatoyaquinaenexa bajaraxua yabara. ² Tsipaji baja yapētāniji pacuenia bitso jamatabēpayavenoname bajarapamonaē. Bajaraxuata pacasivajamatabēcuenebarēyatsi. Nexata paxamē yabara jumaitsinē Macedonia nacuapijivijavabelia: “Acaya nacuapijivi, Corinto tomarata penacaetuatabiabivi, imata baja cajena pavaimi najamatabēcuenevereta perajutsinexa ofrenda Jerusalén tomarapijivijavabelia,” janē paxamē yabara. Nexata Macedonia nacuapijivi itsa pacavēnēlivaistane paneyavenonaējavanexa Jerusalén tomarapijivi, Macedonia nacuapijivi ata ayaibitsaētoخانeto tocaetuatapona ofrenda peyavenon-aenexa Jerusalén tomarapijivi. ³ Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajēnaelia itsa apo paveretsimē tsipae ofrenda panecaetuatsijava, paxamē yabara pexaniacuenia tajumaitsjava, najumecovēauranē tsipae Macedonia nacuapijivijavabelia. ⁴ Tsipaji itsamonae Macedonia nacuapijivi belia naponaejitsipa tapēta paxamējavabelia. Itsa bajarapamonaē taejitsipa bajarapaofrenda apo paneveretsijava, nexata bitso paxamē yabara auranē tsipae. Tsipaji paxamē yabara bajaya baja jumaitsinē: “Corinto tomarapijivi jamatabēvereta pona baja ofrenda pecaetuatsijava,” janē paxamē yabara. Nexata paxamē ata bitso pauramē tsipae. ⁵ Bajaraxuata jamatabējumaitsinē: “Titobana Corinto tomarabelia tavajēnaeyabelia itorobianajē,” jamatabējanē. Nexata Titobana pacajamatabēcuenyavenonaena ofrenda panecaetuatsijava, paneveretsinexa baja pacuenia najumecapanepaeya panetocaējētame. Nexata baja tavajēnaelia bajarapaofrenda itsa paxaniavaetabuatsianame, panajamatabēcueneitajētsianame Jerusalén tomarapijivi paneasivaxae paneyavenonaējava, apo ēpatacaitorobixae.

⁶ Pacanaējēre mapalivaisije. Tsiquirijavayo peubinē, tsiquirijavayo pijinia batopitsapatsi. Ayaijava pijinia peubinē, ayaijava batopitsapatsi. Nexata ayaijava itsa parajutsianame itsamonaējavabelia, Dioso juya pacarajutsiana ayaijava. ⁷ Nexata caejivi canacujitsia berajuta pacuenia najamatabēcuenevereta perajutsinexa. Pētsa pajamatabējumaitsimē: “Apo jamatabērajutsi atanē picani, itsiata taneitorobixae, rajutsianajē,” pajamatabējamē pētsa. Tsipaji pajivi rajuta it-sajivijavabelia jamatabēcuenebarēyaya, Dioso asivatsi. ⁸ Dioso baja ca-

jena caējēpatsi papecarajutaponaenexa pacuenia panamatavenoname matatoxenetsi. Nexata xua panamatavenoname, paxainaponaename. Pacatonacopatsianua panerajutsinexa bepejiobivijavabelia. ⁹ Dioso pejumelivaisibaxutota jumaiti mapacueniaje:

Ponē rajutabiaba bepejiobivi penamatavenonaecuene, bajaraponē pexaniacuene exanabiaba Dioso pitabarata. Nexata bajarapacuenia Dioso apo nacofēnētsi daxitamatacabijavabelianexa, jai Dioso pejumelivaisibaxutota.

¹⁰ Dioso rajuta jivi peubixunexa. Bajaraxuacujinae icatsia Dioso pejamatabēcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexainaejavanexa, panerajutsinexanua bajaraxuayajuvēnējava bepejiobivijavabelia. Pacacaējēpaeyaexanaenanua ēpexaniacuene ayaijava paneexanaenexa. ¹¹ Bajarapacuenia Dioso pacarajutsiana panexainaenexa ayaijava. Nexata pacacaējēpaena bajaraxuayajuvēnējava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovēnētsivi, Jerusalén tomarapijivi, ita parajutsianajē bajarapamonae, pexaniajamatabēcuenia rajutsiana Diosojavabelia bajarapacuenia paneyavenonaexae. ¹² Bajarapacuenia Dioso pejumecovēnētsivi, bepejiobivi, ita parajutame, payavenoname bitso penamatavenonaejavata. Bajarapamonae paneyavenonaejava ita taena, pexaniajamatabēcuenia Diosojavabelia perajutabiabijava pematatsēnēa bitso pexaniajamatabēcuenia rajutsiana Diosojavabelia. ¹³ Bajarapacuenia Jerusalén tomarapijivi ofrenda ita parajutsianame paneyavenonaenexa, bajarapamonae patsitanajamatabēcuenia itajētsianame pepacuene xaniajai panejumecovēnētsijava pexanialivaisi, Cristo pelivaisi. Nexata bajarapamonae pexaniajamatabēcuenia rajutsiana Diosojavabelia Cristo pelivaisi panejumecovēnētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcuenia rajutsiana Diosojavabelia. ¹⁴ Nexata bajarapamonae bitso asivaya pacajamatabēnajinaeya patovajētabiabiana Diosojavabelia. Tsipaji paxamē bajarapamonae payavenoname Dioso pejamatabēcueneta papecaitorobixae. ¹⁵ Vaxaitsi pexaniajamatabēcuenia rajutabiabatsi Diosojavabelia. Tsipaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuene bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanējava jivi petsipaebanajetarucaenexa yabara pelivaisi

¹ Pacuenia Cristo pexaniacuenia pacaitorobijitsipa, bajarapacuenia xanē ata pexaniacuenia ajumesaēya pacaitorobatsi. Itsiata baitsi jane itsamonae paxamēyajuvēnēvi xanē yabara jamatabēcuenenavēxaniabiaya jumai tsabiabi: “Itsa abaxē Pablo tajē nacavecuaponapona, ajumelivaisisaēya nacatoyaquinabiabarena. Itsiata baitsi jane majotaje, vaxaitsijavata, ita patajopaena, piaitejepaebinēcuenia patajopaena. Ajumejibia ponaponaena piamumeuraxae,” jai tsabiabi paxamēyajuvēnēvi xanē yabara jamatabēcuenenavēxaniabiaya. Itsiata bajarapacuenia apo itsinē tsane. ² Nexata pexaniacuene pacavajētatsi. Pētsa

itsajamatabëcuene panetoexaname, itsa patsialiajë paxamëjavabelia, ayaijumeta pacabijataeya patacamuxujiobiyaniva. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua: “Pablo apo ponaponae Dioso pejumecovënëtsinëcuenia. Saya ponapona Dioso apo pejumecovënëtsinëcuenia. Yajavapona pija perujamatabëcuene,” jai tsabiabi paxamëyajuvënëvi xanë yabara. Bajarapacuenia xanë yabara pecuaicuaijaittsabiabivijavabelia ayaijumeta bijataeya cuai cuaijanë tsane. ³⁻⁴Mapanacuapijivi, Dioso apo pejumecovënëtsivi, saicayacuenia nayajiviyapëtane pijavajabitsaëvecua penaevetsinexa pitsacueniabiyativatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. ⁵Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaejavabelia. Nexata pamonaë Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabëcuenesaëta. Itsamonae pijinia dovathi pejamatabëcueneta beayaijamatabëcuenevi natane. Pamonaë bajarapacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamonaë ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso pejamatabëcuenesaëta. ⁶Bajarapacuenia paxamëjava ata paexanaponaenajë. Paxanë panajamatabëcueneveretajë pataxanaenexa mapacueniaje. Paxamë baja xaniavaetsia Dioso itsa pajumecovënëta vanapaename, paxanë pacavecuacapsitapaenatsi pamonaë apo jitsipae patanejumecovënëtsinexa Cristo pelivaisi.

⁷Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuenenë. ⁸Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenënexa,” pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. ⁹“Pablo saya nacajamatabëcuenenabenajacaeya exanabiaba vajanacatoyaquinaelivaisianëta,” panejajava xanë yabara apo jitsipaenë. Tspaji bajaraxua yabara apo pacatoyaquinaetsi. ¹⁰Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. ¹¹Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaëjavabelia exanaejitsianë itsa papatsialiajë paxamëjavabelia. Pacuenia baja pacatoyaquinaiatsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaëjëtsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabëcuenevi. Nexata pamonae apo bajarapamonae yajuvënëvi, bepibisijamatabëcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapëtae. Paxanë raja bajarapacuenia apo pajamatabëcueneitsinë. ¹³ Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomara-pijivimëjavabelia ata pataponaenexa patacatsipaebinexa pejumelivaisi. Nexata itsa panavajunupaebabiabajë Dioso patanitorobijava, xuaovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsamonae pataneyaiyataenexa patanavajunupaebijava yabara. ¹⁴ Bajaraxuata itsa papatajë paxamëjavata, pacatsipaebatsi pexanialivaisi, Cristo pelivaisi. Tsipaji bajarapanacuanëjava Dioso paneitoroba pejumelivaisi patacatsipaebinexa. Bajarapalivaisi copiaya baja paxanë pacatsipaebatsi. ¹⁵ Itsamonae baja Cristo pelivaisi jumecovënëta itsamonae petsipaebixaetsi. Nexata Cristo pelivaisi pejumecovënëtsivi yabara najumetsënëtsiaya apo pajumaitsinë tsipae mapacueniaje: “Paxanë raja patatsipaebixae, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtavanapaenexa Dioso. Nexata pajitsipajë orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapaenexa pejumelivaisi, bajaraëpanacuanëjava patsipaebavanapaenajë. ¹⁶ Nexata paxamë majotaje patacatsipaebicujinae, panepënëyabelia penaetomaranëjava ata jamatabëpatsipaebajë pexanialivaisi, Cristo pelivaisi. Apo pajitsipaenë patatsipaebinexa bajarapalivaisi itsaxuayo baja patavajënaeya itsamonae tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apo benavajunupaebi pijacuata pexanaejava jivi saya peyaiyataenexatsi. ¹⁸ Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumenamatamotatsi.

11

Pablo pelivaisi, penajumetsënëtsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuaijainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacuata pacanavajunupaebijitsiatsi. Bajarapacuenia

tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë.² Bajarapacuenia pacanavajunupaebijitsipatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare.³ Bajayata Évapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecaya-maxëitojorobiyanima. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara.⁴ Pacacacujunavatsi penajumetsënëtsilivaisi petsipaebaponaevi papecatsipaebiyanima. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espíritu Santo, ponë pacatsijamatabëca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecacapanepaelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia.⁵ Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë.⁶ Jivijavabelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa, pacatsitanajamatabëcuene itajëtabiabatsi paxamëjavata itsa pacatsipaebavanapatsi Jesús pelivaisi.

⁷ Paxamëjavata itsa pacatsipaebaponaaponatsi pexanialivaisi papecacapanepaelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia betajobicuenia nacuenebabiabajë tanaevetsinexa pamatacabi pacatsipaebaponaaponatsi Jesús pelivaisi. Nexata baja pajumecovënëtamë Jesús pelivaisi itsamatacabi panexainaenexa matacabi apo peverevereaejava.⁸ Itsamonae Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaaponanexa bajarapapalatata. Nexata pacayavenonaponaaponatsi. Bajarapacuenia paxamëjavata naevetaponaaponajë. Paxamë apo panerajutsimë palata.⁹ Nexata pamatacabi paxamëjavata ponaponajë, namatavenonae atanë, apo pacavajëtsitsi panexainaeyajuvënëjava patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacajamatabëitonotsiyanima. Apo najamatabëxainaenë bexëjavabelia ata patacavajëtsinexa.¹⁰ Yapëtaniji Cristo pelivaisi pepacuenie pexania-jailivaisicuene. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenebarëyanë.

11 Itsamonaē xanē yabara jamatabēcuenenavēxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonaē. Dioso raja yapētane bitso patacaasivajava.

12 Itsiata tavajānaeyabelia Dioso pejumelivaisi pacatsipaebaponaenatsi pacavajētsinejevatsi itsacuenējavayo ata. Pamonaē penajumetsēnētsilivaisi pacatsipaebabiaba, bajarapamonaē pacamatamoyanijobabiaba papecatsipaebimatamo. Bajarapacuenia papeccamatamoyanijobabiabixae, nexata toacuenebitsi pevajānaeyabelia papeccajumaitsaponaenaxa: “Paxanē ata patonacuenebavanapajē Dioso pacuenia Pablo tonacuenebapona Dioso,” papeccajainexa. 13 Bajarapamonaē apo pepo apóstolevi. “Paxanē raja paapóstolevinē,” itsa pacajai, saya raja pacayamaxēitojoroba. Paxanē Cristo papijajivinē, paapóstolevinē, bajarapamonaē saya panecueneccataeya apóstolevi naexana. 14 Paxamē apo bepasivajamatabēcuenenabenajacaemē bajarapamonaē. Bajarapacuenia saya bajarapamonaē exanavanapa papeccayamaxēitojorobinexa. Dovathi raja caējēpatsi Dioso bepijaāngelnē penaexanaenexa, bepexaniajailivaisi itajara petsipaebinē jivi petaenexatsi. 15 Nexata dovathi pijajivi ata pexaniacuene itajara exanavanapae ata, itsiata apo besivajamatabēcuenenabenajacaetsi. Paneconivajēto bajarapamonaē xaina, bajarapaneconivajētota itsamatacabi Dioso naneconitsiaexanaena bajarapamonaē.

Pacuenia Pablo apóstolenēxae nabebiobitsiaponapona yabara pelivaisi

16 Icatsia pacajumaitsi. Xua aeconoxae pacajumai tsanetsi, bajaraxua yabara pētsa panetaneme betanematajemabinē. Bajarapacuenia panetae atamē, itsiata panenamuxunaevere palivaisi pacatsipaebijitsiatsi. Pacuenia peyamaxēitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanē ata ajumeurajibia pacanavajunupaebijitsiatsi pataneyaiyataenexamē. 17 Vajatuxanenē picani apo nitorobi patacanavajunupaebinexa. Itsiata pacuenia pematajemabinētsi ajumeurajibia banavajunupaeba xua exana, bajarapacuenia xanē ata aeconoxae ajumeurajibia pacanavajunupaebijitsiatsi pataneyaiyataenexamē. 18 Pamonaē peyamaxēitojorobiapóstolevi, ayajamatabēcuenevi nataeyabiaba. Nexata ajumeurajibia pacanajamatabēcuene vajunupaebabiaba bajarapamonaē. Nexata xanē ata bajarapacuenia ajumeurajibia pacanajamatabēcuene vajunupaebijitsiatsi. 19 Paxamē bitso ayailivaisi bepaneyapētaevi panataneme. Itsiata apo payapētaemē. Tsipaji saya jamatabēcuenebarēyaya panamuxunaevetabiabame palivaisi pacatsipaebabiaba peyamaxēitojorobiapóstolevi. Pacuenia pematajemabinētsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxēitojorobiapóstolevi. 20 Bajarapamonaē bepapijajivitonēmēcuenia pacaitorobabiabi ata, itsiata xaniavaetsia panamuxunaevetabiabame. Panexinaejavaxi pacavecuaveretaponaē ata, itsiata xaniavaetsia panamuxunaevetabiabame. Bijiyaya pacanaēcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. 21 Paxanē bajarapacuenia apo pacaexanaetsi pamatacabi pajinavanapajē paxamējavata.

Xua yabara bajarapamonae ajumeurajibia pacanavajunupaebabiaba, xanë ata necaëjêpa bajarapitsicuene yabara ajumeurajibia patacanavajunupaebinexa pataneyaiyataenexamë. ²² Bajarapamonae ayaijamatabêcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. ²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. ²⁴ Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecóna. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava. ²⁷ Itsajavata bitso nacuenebabiabajë. Cueranabiabajënuua. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. ²⁹ Pajivi jamatabêcuenequerana Dioso pejumecovënëtsijava, xanë ata sivajamatabêcuenequeranabiabajë.

Pajivi itsajivi pejamatabëcueneta pibisiacuene exanaeyaxanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabjënua pajivi pejamatabëcueneta jopaeayaexanatsi. ³⁰ Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcueneitajëtsinexa tajamatabëcuenefaefaenaejava. ³¹ Vajatuxanenë Jesucristo paxa Diosojavabelia pexaniajamatabëcuene berajutabiabatsi daxitamatacabijavabelianexa. Dioso baja cajena yapëtane jivi tatsipaebilivaisi pexaniajaicuene. ³² Imata ponaponajë Damasco tomarata. Nexata pepo iraevetsinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piaitayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. ³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojutualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsitanaitajëtabijavatsi yabara pelivaisi

¹ Apo netsitaxanepanae picani ajumeurajibia patacanavajunupaebinexa. Itsiata baitsi jane pamonaë peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabijava. Neyapëtaeyaexananua pajamatabëcuenelivaisi xaina xuanë ata netsitajëtabiaba. ²⁻³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia. ⁴ Itsiata necapona paraísojavabetsia. Bajara-jotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. ⁵ Bajarapacuenia athëbëabetsia tanecaponaejava tanavajunupaebinexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. ⁶ Ayailivaisi picani xainajë ajumeurajibia tanavajunupaebaponaenexa pacuenia taniji athëbëatsia. Ajumeurajibia itsa navajunupaebaponaëjitsipajë, apo navajunupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaëjitsipajë. Itsiata baitsi jane apo navajunupaebaponaenë tsane daxita xua yapëtaniji. Tsipaji apo jitsipañë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

7 Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabējumaitsiyaniya mapacueniaje: “Xanē baja cajena pinijicuene Dioso netsitajētabiaba xua itsajivi ata apo tae. Bajaraxuata bitso xanē ayajamatabēcuenenēnē daxitajivi matatoxenetsia,” tanabarajamatabējaiyaniva, Dioso netocopata tanavixaetaeyabiabinexa. Dioso netocopata dovathi pejamatabēcueneta tanevixaeitonotabiabinexa daxitamatacabi. ⁸ Diosojavabelia picani vajētajē acueyabi xuabeje tanevecuaajibiaexanaenexa bajarapavixae. ⁹ Itsiata baitsi jane vajatuxanenē nejumlahitsi mapacueniaje: “Jume. Apo cavecuaajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabēcuenecaējēpae atatsi pesaēta tanetonacuenebinexa tajacuene, itsiata baja itsa caējēpatsi tane-tonacuenebinexa, nayapētane tayavenonaecuene,” nejai vajatuxanenē. Bajaraxuata vajatuxanenē pijacuene tatonacuenebinexa, xanē tasaēta apo tanejamatabēcuenecaējēpaejava, nasivajamatabēcuenearēyanē. Tshipaji Cristo pesaēta neyavenonabiaba daxitacuene yabara. ¹⁰ Apo tanejamatabēcuenecaējēpaexae tasaēta tatonacuenebinexa vajatuxanenē pijacuene, nasivajamatabēcuenearēyanē tsabiabi. Itsamonae pibisiacuenia itsa nebijataeyabiaba Cristo pijajivitonēxaenē, nasivajamatabēcuenearēyanē tsabiabi. Itsacuenejavaxi itsa namatavenonabiabajē, itsiata nasivajamatabēcuenearēyanē tsabiabi. Itsamonae itsa nebejibiaexanabiaba Cristo pijajivitonēxaenē, itsiata nasivajamatabēcuenearēyanē tsabiabi. Itsa netsiayapēbeje tsabiabi tatonacuenebinexa Cristo pijacuene, itsiata nasivajamatabēcuenearēyanē tsabiabi. Tshipaji paepatota apo nejamatabēcuenecaējēpae, bajarapaepatota vajatuxanenē bitso nejamatabēcueneyavenonabiaba.

Pacuenia bitso Pablo sivanajamatabēxaina Dioso pejumecovēnētsivi, Corinto tomarapijivi, yabara pelivaisi

¹¹ Pamonaē peyamaxēitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinētsi banavajunupaeba ajumeurajibia. Bajarapacuenia xanē ata navajunupaebajē. Apo jitsipae nē picani tanavajunupaebinexa. Paxamē xaniavaetsia itsa panevajunupaebijitsipame pacuenia exanaponaponajē paxamējavata, nexata xanē tajacuata apo navajunupaebiniē tsipae. Beveliajamatabēcuenenē atānē, itsiata pamonaē peyamaxēitojorobiapóstolevivecua, xanē apo beveliajamatabēcuenenēnē. ¹² Paxamējavata itsa ponaponajē, netsiayapēbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaēta. Nexata paneyapētaneme Dioso tanevavenonabiabijava. ¹³ Pacuenia taniji daxita Dioso pejumecovēnētsivi, bajarapacuenia paxamē ata pacatanetsi. Nexata itsamonae Dioso pejumecovēnētsivivecua bepaveliajamatabēcuenevimē, apo pacataetsi. Itsamonae Dioso pejumecovēnētsivi, neyavenonabiaba itsajota namatavenonajē. Itsiata bajarapacuenia paxamē ata pataneyavenonaenexamē, apo pacavajētsitsi. Pamatacabi ponaponajē paxamējavata, apo pacavajētsitsi itsacuenejavayo ata. Pētsa itsiata bajaraxua pasivanajamatabēxainame.

Biji rajane pasivajamatabëcuenebarëyamëre itsacuenejavayo ata apo patacavajëtsijava.

¹⁴ Mabaja panamutotaje, acueyabi namuto taponaenexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipaenë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajëje. Daxita taxainajavami, veretsipajë jamatabëcuenebarëyaya. Tasaëtsaponaponaepatojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacavamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëyavuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara. ¹⁷ Itsanë ata cajena, paxamëjavabelia xanë taitorobiviyavuvënëni, yamaxëitojorobiaya palata apo pacavecuapitsi. ¹⁸ Itorobajë baja Tito peponaenexa paxamëjavabelia papecataenexa. Itorobajënuva itsanë Dioso pejumecovënëtsinë Tito peyavavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenejëpajëbeje.

¹⁹ Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacavamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixamë. ²⁰ Pamatacabi ponaenajë paxamëjavabelia, bitso meta najamatabëxainaeya patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitajarabi tsanetsi pexaniacuenia panejinavapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsënëtsia panebaracuaicuaijaisabiabijava ata. Pacataenatsi meta itsamonaeve-cua paayajamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejina-

vanapaejava ata. ²¹ Paxamējavata icatsia itsa patsianajē, Dioso meta pitabarata pacayapijiviaura tsanetsi pibisiacuene paneexanavanapaejava yabara. Bajaraxuata bitso pacasivanajamatabēxainatsi icatsia patacataenexalia. Tsipaji itsa apo pajinavanapaemē tsane pacuenia pacaitorobatsi, patacasivajamatabēcuenenarēyajavami, nevecuaajibi meta tsane. Paxamējajuvēnēvi bajayatajavaverenacujinae pibisiacuene pexanavanapaexae, sivajamatabēnuenajē. Bajarapamonae pibisiacuene pexanavanapaejava pevitota, apo sivajamatabēcuenebējai. Apo jamatabēcopatsinua pibisiacuene pexanavanapaejava pevitota.

13

Pacuenia icatsia Pablo itaveta Corinto tomarapijivi Diosojavabelia penaneconitsiyaniva yabara pelivaisi

¹ Aeconoxae baja icatsia ponaejitsianē paxamējavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevajunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamējavabelia itsa patsianajē, bajarapacuenia xanē pacananeconitsiaexanaenatsi. ² Imata panamutomi pacaitavetatsi daxita paxamē pibisiacuene paneexanavanapaejava panecopatsinexa, Diosojavabelia panenaneconitsiyaniva. Bajarapacuenia itavetajē itsamonae ata pibisiacuene pexanavanapaeyaniva. Aeconoxae tajē pacavecuaponaponae atatsi, pacatoyaquinatsi icatsia patacaitavetsinexa pibisiacuene paneexanaeyaniva. Icatsia paxamējavabelia itsa patsianajē, pacananeconitsiaexanaenatsi padaxitamē. Caejivi ata apo bejiobiataenē tsane pibisiacuene pexanaeneconi yabara. ³ Itsa pacananeconitsiaexanaenatsi, ajumesaēnē tsane patacananeconitsiaexanaenexa. Nexata bajarajota xaniavaetsia paneyapētaename tayajavacuauicuaijitsabiabijava Cristo. Cristo baja cajena piamatabēcuenesaējjava, pacatsitanajamatabēcueneitajēta itsa pacayavenonaponapona paxamējavata. ⁴ Xaniajai rabaja. Pacuenia vaxaitsi mapanacuapijivitsi ajamatabēcuenesaējibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaēta icatsia asaēyaexanatsi petēpaecujinae. Paxanē pajamatabēcuenesaējibi atanē, itsiata aeconoxae Dioso pesaēta Cristo payajavajinavanapajē patacajamatabēcueneyavenonaenexa.

⁵ Jica jane. Panajamatabēcuenelivaisiējēre itsa xaniajai pepacuenē Cristo papijajivimē. Itsa pepacuenē Cristo papijajivimē, nexata payapētaename Cristo papepayjavaponaponaejava. Itsa Cristo apo papijajivimē, nexata Cristo apo pacayjavaponaponae. ⁶ Paxanē pajamatabējumaitsinē paxamē yabara mapacueniaje: “Corinto tomarapijivi vaxaitsi itsa nacacuenecanaējētsiana, xaniavaetsia yapētaena pepacuenē Cristo pijajivicuēnetsi,” pajamatabējanē. ⁷ PacatovajētaPONATSi Diosojavabelia pibisiacuene paneexanaponaeayaniva. Bajarapacuenia itsa pacatovajētaPONATSi Diosojavabelia, itsajamatabēcuenē apo pacasivanajamatabēxainaetsi. Nexata apo pajamatabējumaitsinē paxamē yabara: “Ita bajarapamonae xaniavaetsia jinavanapaena, nexata pijinia daxitajivi nacayapētaena

pepacuene apóstolevicuenetsi,” apo pajamatabējanē paxamē yabara. Bajarapacuenia Diosojavabelia pacatovajētatsi tsipaji pacatojitsipatsi ēpexaniacuene paneexanapanapaejava. Xaniavaetsia itsa pajinavanapaename, nexata itsa papatsianajē paxamējavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸ Tsipaji acuenebi patananeconitsiaexanaejava pajivi baja jumecovēnēta pexaniajailivaisi, Jesucristo pelivaisi. Pananeconitsiaexanaenajē ēpijaneconi pexainaevi. ⁹ Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabēcuenebarēyatsi. Tsipaji apo paxainaemē paneconi yabara pacananeconitsiaexanaejitsiatsi. Pacatovajētaponatsinua Diosojavabelia panevajēnaeyabelia panejamatabēcuenevitsabaponaenexa Dioso panejumecovēnētsijava. ¹⁰ Pacatoyaquinaliatsi mapabaxutoje taponaevajēnaeya paxamējavabelia tavajēnaelia panenajamatabēcuenexanebinexa pibisiacuene paneexanaejavavecua. Nexata itsa patajopaelijā paxamējavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinēnexa. Nexata itsa patsialiajē paxamējavabelia, apo jitsipañē tsane patacananeconitsiaexanaenexa. Biji rajane jitsipajē patacajamatabēcuene saēyaexanaejava panevajēnaeyabelia panejamatabēcuenesaēnexa Dioso panejumecovēnētsijava.

¹¹ Tajamonaē, pajamatabēcuenebarēyamēre tsavanapae. Panevajēnaeyabelia panajamatabēcuene vitsabiaexanaponare Dioso panejumecovēnētsijava. Panamuxunaevere palivaisi pacatoyaquinaliatsi. Najamatabēcuenejēpaeya pajinavanapare jamatabēcuenexanepanaeya. Dioso vajanacaasivanē. Bajaraponē jamatabēcuenexanepanaeya nacajinavanapaeyaexana. Nexata Diosojavabelia pacatovajētabiabatsi Dioso papecayajavaponaponaeenexa. ¹² Paxamē ata Dioso panejumecovēnētsixae, xaniavaetsia nasivaya namataenetsia panabajacobabiabare. ¹³ Daxita pamonaē Dioso pejumecovēnētsivi, majota pejinavanapaevije, pacabajacobalia.

¹⁴ Pacatovajētabiabatsi Diosojavabelia vajatuxanenē Jesucristo papecayavenonabiabinexa. Pacatovajētabiabatsinua itsamonae ata asivaya panetaenexa pacuenia paxamē ata Dioso pacaasiva. Pacatovajētabiabatsinua Espiritu Santo ata papecayajavaponaponaeenexa.

Mapabaxutoje San Pablo toyaquina Galacia nacuapijivijavabelia

Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

¹ Xanë Pablonë, apóstolenënë. Jivi pejamatabëcueneta apo nitorobi tatsipaebaponaenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. ² Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. ³ Pacatovajëtabiabtasi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. ⁴ Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxuabinexatsi pibisiacuene vajaexanaeneconi yabara. Nexata Jesucristo pejamatabëcueneta vaxa Dioso aneconijibia nacatane. ⁵ Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmè!” jaitsi tsabiabi daxitamatacabijavabelianexa. Bajara itsi tsane.

Pacuenia baja Jesús pelivaisivecua pematatsënëa ajibi itsalivaisi jivi pecapanepaelivaisinexatsi yabara pelivaisi

⁶ Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabenajacatsi. Jesucristo picani pejamatabëcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëyorotame saicayalivaisijavabelia, bepapecacapanepaelivaisinexa itajara panejumetaexae. ⁷ Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajarapamonae pata papecajamatabëcuene naepatajërëcaeyaexanaenexa. Bajarapamonae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. ⁸ Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataitothianaenexa bajarapalivaisi. Athëbëvetsica pepatsinë ata tsipae, ángelnë, acuenebi paitothianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso pananeconitsiaexanaejitsipa daxitamatacabijavabelianexa. ⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

¹⁰ Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tane-sivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tane-sivajamatabëcuenebarëyanexa. Saya jema jivi livaisi itsa tsipaebijitsipajë saya tane-sivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

Pacuenia Pablo Dioso junatatsi apóstolenënexa yabara pelivaisi

¹¹ Tajamonae, jitsipajë patacatsipaebinexa mapalivaisije. Palivaisi tsipaebaponajë jivi pecapanepelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi. ¹² Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevënëlivaisitaneme rabaja pacuenia exanaponaponajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudíovinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyabiabinë cajena tsiquirijavayo ata. Jamatabëverebiaxuababiabajë Jesucristo pijajivi. ¹⁴ Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonae pevëjëavi judíovi, Israel nacuapijivi, matatoxenetsia xanë bitso casaenë tajumecovënëtsijava bajarapalivaisi. ¹⁵ Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenënexanë. ¹⁶ Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judíovijava. Nexata Dioso tane-yapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita. ¹⁷⁻¹⁸ Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaejavabelia xanëvecua copiaya exanatsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenënë ponajë Arabia nacuayabelia, petusato nacuayabelia. Nexata petusato nacuata Dioso xaniavaetsia neyapëtaeyaexanapona pexënato pelivaisi. Bajaraxuacujinae icatsia bexëa Arabia nacuaverena naviarenejë Damasco tomaraberena. Bajaraxuacujinae tapuaxainae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje. ¹⁹ Itsiata Jerusalén tomarata pematatsënëa itsaapóstolenë apo taenë. Ësantiago saya, vajatuxanenë pejuyapijinë, taniji. ²⁰ Xaniavaetsia pacajumaitsitsi Dioso pitabarata. Palivaisi pacatoyaquinatsi, pexaniajailivaisi cajena.

21 Jerusalén tomarata taponaponaecujinae, ponajë icatsia Siria nacuayabelia Jesucristo pelivaisi jivi tatsipaebaponaenexa. Ponajë Cilicia nacuayabelia ata. 22 Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neyapëtae. Tsipaji abaxë Judea nacuata apo tsipaebaponaenë Jesucristo pelivaisi. 23 Bajarapamonae saya nevënëlivaisitane itsamonae xanë yabara pejumaitisijava: “Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona. Bajarapalivaisi yabara bajaraponë jamatabënacaverebiaxuaba picani,” pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi. 24 Bajaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: “Diosomë, bitso ayaijamatabëcuenenëmë. Tsipaji Pablo ata najamatabëcuenecopatsiaexaname nexënato Jesucristojavabelia,” jai tsabiabi xanë yabara.

2

Pacuenia Pablo pevëna apóstolevi Jerusalén tomarata xaniavaetsia copi-pitatsi yabara pelivaisi

1 Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacuajava, Cilicia nacuajava ata. Nexata Jesucristo pelivaisi jivi tatsipaebanajetarucaecujinae bajarapanacuabejajava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë. 2 Patajë Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaeuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pecapanepelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitsinë: “Maraeta pamonaе apo pejitsipaecuenia, tsipaebaponajë apo judíovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitaxanepanatsi pacuenia tsipaebaponajë apo judíovijava. 3 Bajarapacuenia tanavajunupaebixae, taneyanabinë Tito, apo judíonë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi. 4 Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaе panenaitaxutocaeveta,

jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. ⁵ Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënuua Dioso Moiséspijinëta penajumecopatsilivaisi. Nexata Dioso pepacuenecapanepaena,” pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonae yabara itsamonae jamatabëjumai tsabiabi: “Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainenë bajarapamonae ayaijamatabëcuenevi tataenexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane. ⁷ Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuene. Nexata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënëtsivi penamatacaitorobivi xanë yabara. ⁸ Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

⁹ Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuene tatsipaebaponaenexa Jesucristo pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsipaji paneyapëtanebeje patatonajuanacuenebivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponajëbeje apo judíovijava. Santiagobana pijinia, Pedrobana, Juanbana, tsipaebapona judíovijava. ¹⁰ Bajarapamonae caelivaisiyo panejumaitsiabeje Jerusalén tomarata. Paneitorobabeje patayavenonaenexabeje Dioso pejumecovënëtsivi,

bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenebarëyaya bajarapamonaenexa ofrenda toexanaeyaexanaponajë itsaxuayo tatsipaebilivaisi, Jesucristo pelivaisi, jumecovënëtapona.

Pacuenia Pablo muxujioba Pedro Antioquia tomarata yabara pelivaisi

¹¹ Perujulivaisimi, judíovi pijalivaisi, itavetatsi judíovi caejavata peyavanabaniyaniva apo judíovi. Pedro itsa ponapona Antioquia tomarata, muxujiobajë daxitajivi pitabarata. Tsipaji Pedro apo pexanepanaecueene exana. Pedro apo judíovijavata itsa naponapona, jemata apo judíovi vecuanasaicayaba. ¹² Pedro, judíonë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquia tomarata, Pedro baja vecuanasaicayaba apo judíovi. Tsipaji Pedro cjunava Santiago pijajivi peteayanivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtavapona. Nexata Santiago pijajivi jumai tsabiabi: “Pamonae ata judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cjunava bajarapamona. Nexata Pedro jamatabëjumaitsi: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebi-jataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. ¹³ Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonaenajamatabëcuenecopaba Jesucristojavabelia, itsa tane Pedro pevecuanasaicayabijava apo judíovi, bajarapamonaenata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. ¹⁴ Nexata pacuenia jumaitsi pexanialivaisi jivi pecapanepaelivaisinexatsi Diosojavabelia, bajarapamonaenata exana. Nexata saya bajarapamonaenata vecuanasaicayaba apo judíovi. Bajaraxuata itsa taniji bajarapamonaenata pevecuanasaicayabijava apo judíovi, nexata muxujiobajë. Daxita Dioso pejumecovënëtsivi pitabarata, jumaitsinë Pedrojavabelia: “Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuenia. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuenia, ¿detsa nexata xuajitsia caranata apo judíovi aeconoxae jamatabëjinavanapaeyaexaname judíovicuenia?” janë Pedrojavabelia pevecuanasaicayabixae apo judíovi.

Pacuenia judíovi ata xanepana penajamatabëcuenecopatsinexa Cristojavabelia pecapanepaenexatsi Diosojavabelia yabara pelivaisi

¹⁵ Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. ¹⁶ Pexaniajailivaisi patajumecovënëtsinexa,

patajamonae baja cajena paneyajavavitsata. Nexata payapétaniji mapacuneje. Itsajivi jumecovénetsi ata tsipae Dioso Moiséspijinêta penajumecopatsilivaisi, itsiata Dioso aneconijibia apo taetsi tsipae. Bajarapacune paxanê pajudíovinê payapétaniji. Bajaraxuata paxanê pajudíovi atanê, panajamatabëcuenecopatajê Jesucristojavabelia. Nexata Dioso aneconijibia panetane patanajamatabëcuenecopatsixae Jesucristojavabelia. Dioso aneconijibia apo panetae patajumecovénetsixae Dioso Moiséspijinêta penajumecopatsilivaisi. Tsipaji itsajivi ata apo jumecovénetsicapaneapae bajarapalivaisi. Nexata itsamonae jumecovénetsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabëcuenenavêxaniabiaya nejumaitsi tsipae: “Xamê jumaitsimê tsabiabi: ‘Dioso aneconijibia netane tajumecovénetsixae Cristo tanesivatêpaejava tajaneconi yabara. Nexata baja apo jumecovénetsinê Dioso Moiséspijinêta penajumecopatsilivaisi,’ jamê tsabiabi. Dioso Moiséspijinêta penajumecopatsilivaisi apo nejumecovénetsixae, nexata Dioso catane pibisiacune nexanaenê,” nejai tsipae itsajivi jamatabëcuenenavêxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacune taexanaenê. ¹⁸ Diosojavabelia rajane naneconitsipajê mapacuenia itsa exanaejitsipajê. Dioso Moiséspijinêta penajumecopatsilivaisi, tajumecovénetsijavami tacopatsicujinae, icatsia caevêalia itsa jumecovénetsipajê, nexata Diosojavabelia naneconitsipajê. ¹⁹ Pamatacabi abaxê ajamatabëcuenesaenê tsabiabi tajumecovénetsijava Dioso Moiséspijinêta penajumecopatsilivaisi, naneconitajê picani Diosojavabelia. Tsipaji ajamatabëcuenesaenê tsabiabi ata tajumecovénetsijava bajarapalivaisi, itsiata apo necaējēpae tajumecovénetsicapaneapenexa daxita pacuenia jumaitsi bajarapalivaisi. Itsa meta abaxê tsiteca bajarapalivaisi jumecovénêtaaponaponaejitsipajê, yajavatêpaejitsipajê meta tajaneconi. Bajaraxuata aeconoxae baja icatsia bajarapalivaisi tajumecovénetsinexa, apo sivanajamatabëxainaenê. Pacuenia baja petêpaejivi itsacunejavayo apo sivanajamatabëxainae, bajara itsinê taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaponaenexa pacuene Dioso jitsipa. ²⁰ Cristo cruzajavabelia itsa cobematabiabarutatsi, xanê ata tajaneconi yabara nesivatêpa. Nexata xanê ata Cristo betaneyajavatêpae. Bajaraxuata perujujamatabëcuenemi, pibisiacune taexanaenexa taneitorobabiabijamatabëcuenemi, nevecuatêpa baja cruzata. Nexata baja piasaêjamatabëcuene, pejanajamatabëcuene, xainajê. Cristo baja neyajavaponapona. Pajamatabëcuene yaasaenê tsaponapona, Dioso pexênatojavabelia najamatabëcuenecopatsiaya ponaponajê. Dioso pexênato nejitsipa. Nesivatêpanua baja cajena. ²¹ Apo namuxujematsinê Dioso vajanacaitaxutotsoniataejava. Dioso Moiséspijinêta penajumecopatsilivaisi, jivi pejumecovénetsixae, Dioso aneconijibia jivi itsa taejitsipa, nexata Cristo jivi apo sivatêpae tsipae pijaneconi yabara. Nexata Cristo saya jema tēpaejitsipa.

3

Pacuenia Cristo pejumecovénetsivi, Dioso aneconijibia tanetsi pecapanepaenexatsi pijaneconivecua, itsa jumecovénêta pacuenia Abrahampiji

jíně jumecovēnēta, yabara pelivaisi

¹ ¡Paxamē paGalacianacuapijivimē, bitso cajena paneajamatabēcuenetajavi! Itsamonae raeta saicayalivaisi yamaxēitojorobiaya pacatsipaeba, pexaniajailivaisi, palivaisi baja picani pajumecovēnētame, panecopabinexa. Xanē Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetae Jesucristo papecasivatēpaejava cruzata. ² Caejumeyo pacayanijobatsi. ¿Detsa xua yabara pacatsijamatabējunua Espiritu Santo? Apo pacatsijamatabējone raja panejumecovēnētsixae Dioso Moiséspijinēta penajumecopatsilivaisi. Espiritu Santo raja pacatsijamatabējunua panejumecovēnētsixae Jesucristo papecacapanepaejavanexa panijaneconivecua. ³ Paxamē bitso pajamatabēcuenetajamē. Pamatacabi pataxuxuabame panejumecovēnētsijava Jesucristo papecacapanepaejavanexa panijaneconivecua, panajamatabēxainabiabame Espiritu Santo papecayavenonabiabinexa. Aeconoxae baja icatsia caevēalia panajamatabēxainame panejumecovēnētsinexa Dioso Moiséspijinēta penajumecopatsilivaisi. Itsiata apo caējēpaetsi bajarapalivaisi papecacapanepaenexa. ⁴ Itsamonae bitso pacabejiobiaexanabiaba pexanialivaisi, Jesucristo pelivaisi, panejumecovēnētsixae. Bajaraxuata apo bepacopatsimē panejumecovēnētsijava Jesucristo pelivaisi, palivaisi yabara itsamonae pacabejiobiaexanabiaba. Tspiji itsa pacopabijitsipame panejumecovēnētsijava Jesucristo pelivaisi, saya panacueratsipame. ⁵ Payapētaneme rabaja Dioso papecarajutsijava Espiritu Santo. Pinijicuene pexanaejavanē ata Dioso pacatsitaexana paxamē tuatujēta. Baitsi piavitanevi jamatejemaya exanapona. Petēpaevimi ata asaēyaexanapona. ¿Detsa xua yabara bajarapacuene Dioso pacatsitaexana? Dioso raja apo pacatsitaexanae bajarapacuene panejumecovēnētsixae Dioso Moiséspijinēta penajumecopatsilivaisi. Dioso raja pacatsitaexana bajarapacuene panejumecovēnētsixae patacatsipaebilivaisi, Jesucristo pelivaisi.

⁶ Bajayata Abrahampijinē Diosojavabelia najamatabēcuenecopatsiaya jamatabējumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabējai. Bajaraxuata Dioso Abrahampijinē aneconijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamē bepapapētaneme mapacueneje. Pamonaē jumecovēnēta pacuenia Dioso najumecapanepaeya jumaitsi, bajarapamonae Abrahampijinē apo pemomoxi ata, itsiata Dioso tanetsi Abrahampijinē bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajēvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovēnētsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajēvelia Abrahampijinējavabelia Dioso jumaitsi mapacueniaje: “Tacatsipaebilivaisi tanejumecovēnētsixaemē, daxitanacuapijivi ata aneconijibia tae-najē, bajarapamonae ata itsa nejumecovēnētsiana pacuenia xamē nejumecovēnētame,” jai Dioso Abrahampijinējavabelia. Bajarapacuenia Dioso pejumelivaisibaxutota tajēvelia jumaitsi. ⁹ Nexata baja vaxaitsi xaniavaetsia yapētanetsi mapacueneje. Pamonaē jumecovēnēta Jesucristo pelivaisi, bajarapamonae Dioso aneconijibia tanetsi pecapanepaenex-

atsi pijaneconivecua. Tsipaji bajarapamonae ata jumecovênêta pacuenia bajayata Abrahampijinê jumecovênêta pacuenia Dioso najumecapanepaeya jumaitsi.

¹⁰ Pajivi Dioso Moiséspijinêta penajumecopatsilivaisi apo jumecovênêtsicapanepae ata, jamatabêjumaitsi: “Bajayata Dioso Moiséspijinêta najumecopata jivi pejumecovênêtsinexa. Nexata baja xanê bajarapalivaisi jumecovênêtaponaponajê Dioso tanecapanepaenexa,” jamatabêjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaitsi mapacueniaje: “Pamonae apo jumecovênêtsicapanepae tsane daxita pacuenia itorobatsi Dioso Moiséspijinêta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota.
¹¹ Nexata baja vaxaitsi xaniavaetsia yapêtanetsi bajarapacuenene. Dioso Moiséspijinêta penajumecopatsilivaisi, jivi jumecovênêtsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovênêtsicapanepae daxita pacuenia itorobatsi Dioso Moiséspijinêta penajumecopatsilivaisi. Bajarapacuenene vaxaitsi yapêtanetsi. Tsipaji Dioso pejumelivaisibaxutota icatsia jumaitsi mapacueniaje: “Pajivi pepacuenene Dioso pejumecovênêtsixae, jamatabêjumaitsi: ‘Xanê pepacuenene Dioso neyavenonaena pacuenia najumecapanepaeya jumaitsi,’ jamatabêjai, Dioso aneconijibia tanetsi. Bajarapajivi xainaena matababi apo pevereverecejava,” jai Dioso pejumelivaisibaxutota.
¹² Dioso Moiséspijinêta penajumecopatsilivaisi jivi jumecovênêtsi ata, itsiata apo jumecovênêtsicapanepae daxita pacuenia itorobatsi bajarapalivaisita. Bajaraxuata Dioso Moiséspijinêta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovênêtsicapanepae ata Dioso Moiséspijinêta penajumecopatsilivaisi, itsiata itsa jamatabêjumaitsi tsane: ‘Xanê pepacuenene Dioso neyavenonaena pacuenia najumecapanepaeya jumaitsi,’ itsa jamatabêjai tsane, apo jumecovênêtsicapanepae ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinêta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovênêtsicapanepaena daxita pacuenia itorobatsi Dioso Moiséspijinêta penajumecopatsilivaisi, bajarapajivi capanepaenatsi Diosojavabelia. Itsa apo jumecovênêtsicapanepae tsane daxita pacuenia itorobatsi Dioso Moiséspijinêta penajumecopatsilivaisi, nexata têpaena. Naxuabiana Diosovecua,” jai Dioso pejumelivaisibaxutota Dioso Moiséspijinêta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tsipaji apo jumecovênêtsicapanepaetsi Dioso Moiséspijinêta penajumecopatsilivaisi. Itsiata baitsi jane Cristo itsa têpa cruzata, nacaneconimatamota pijanata. Dioso Moiséspijinêta penajumecopatsilivaisi apo vajajumecovênêtsicapanepaexae, naneconitatsi picani Diosojavabelia. Itsiata Cristo cruzata itsa têpa, nacavecuajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinë vajaneconi pejamatabêcueneta. Nexata vajaneconi yabara Cristo nacopata pebeyaxubinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi

bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo itsa nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaitsi Abrahampijinējavabelia. Nexata apo judíovi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacapanepaenexa Diosojavabelia, nexata pacuenia Dioso tajēvelia najumecapanepaeya jumaitsi, bajarapacuenia Dioso nacatsijamatabēecaeyaexana Espiritu Santo.

Pacuenia Abrahampijinējavabelia Dioso najumecapanepaeya jumaitsi, pacuenia ata icatsia cotocaevi Moiséspijinējavabelia najumecapanepaeya jumaitsi, yabara pelivaisi

¹⁵ Tajamonae, livaisi pacatsipaebijitsiatsi paneyapētaenexa mapacueneje. Pepacuene raja Dioso exanaena pacuenia bajayata tajēvelia Abrahampijinējavabelia Dioso najumecapanepaeya jumaitsi. Mapanacuapijinē ata, pecobecovē pexainaenē, petēpaevajēnae bayaquina pecobecovē yabara. Nexata pecobecovē pexainaenē itsa tēpa, pevēnamuto pexi penatsicobetsanaenexa. Nexata jumenamatamota pecobecovē pexainaenē peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pejainexa. Mataropotsia ata itsanē peyaquinaponaenexa, acuenebi. Tsipaji pecobecovē pexainaenē peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajēvelia Dioso najumecapanepaeya pejumaitsijava Abrahampijinējavabelia. Baitsi Abrahampijinē pemomo pejamatabēcueneta, jivi ayaibitsaēto Dioso aneconihibia petaejavanexa, Dioso jumenamatamota. Bajayata tajēvelia Dioso najumecapanepaeya jumaitsi Abrahampijinējavabelia ayaibitsaēto mapanacuapijivi Abrahampijinē pemomo pejamatabēcueneta Dioso aneconihibia petaenexa. Ayaibitsaēto Abrahampijinē pemomoxi pejamatabēcueneta Dioso jivi aneconihibia petaenexa, bajarapacuenia tajēvelia Dioso najumecapanepaeya apo jumaitsi. Biji rajane caenē, Jesús, pejamatabēcueneta Dioso jivi aneconihibia petaenexa, tajēvelia najumecapanepaeya jumaitsi. “Abrahampijinē pemomo,” itsa jai, tajēvelia jumaitsi Cristo yabara. ¹⁷ Palivaisi pacatsipaebatsi, maitsije. Bajayatami copiaya Dioso tajēvelia najumecapanepaeya jumaitsi Abrahampijinējavabelia pacuenia Dioso toexanaejitsia Abrahampijinējavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinēta najumecopata jivi pejumecovēnētsinexa. Itsiata palivaisi copiaya Dioso tajēvelia najumecapanepaeya jumaitsi Abrahampijinējavabelia, bajarapalivaisi acuenebi Dioso penajumeamatamobiaexanaenexa. ¹⁸ Nexata palivaisi cotocaevi Dioso Moiséspijinēta najumecopata, bajarapalivaisi jivi pejumecovēnētsixae, Dioso aneconihibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajēvelia najumecapanepaeya jumaitsi Abrahampijinējavabelia, ajumematamobi tsipae. Itsiata baitsi jane palivaisi cotocaevi Dioso Moiséspijinēta najumecopata, jivi jumecovēnētsi ata tsipae, itsiata Dioso apo capanepae tsipaetsi.

Nexata yapëtanetsi pejumenamatamotsijava palivaisi copiaya Dioso tajëvelia najumecapanepaeya jumaitsi Abrahampijinëjavabelia. Tsipaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaitsi Abrahampijinëjavabelia, bajarapajivi Dioso aneconijibia tanetsi.

¹⁹ Itsa baja jumenamatamota palivaisi copiaya Dioso tajëvelia najumecapanepaeya jumaitsi Abrahampijinëjavabelia, ¿detsa nexata xuajitsia icatsia Dioso Moiséspijinëta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapëtaenexa pibisiacuene vajaexanavanapaejava Dioso pitabarata. Bajrapalivaisi Dioso nacatonajumecopata vajajumecovënëtanapaenexa matapania Abrahampijinë pemomo, Cristo, pepatsimatacabitsicajavabelianexa. Tajëvelia Dioso najumecapanepaeya jumaitsi Cristo pejamatabëcueneta ayaibitsaëttoxaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaitsi Moiséspijinëjavabelia. Dioso saya itoroba ángelevi Moiséspijinë petsipaebinxatsi. Nexata juya Moiséspijinë tsipaeba jivijavabelia. Moiséspijinë jivi petocuaicuaijainë Diosojavabelia. Dioso juya Moiséspijinë itorobatsi petocuaicuaijainexa jivijavaberena.

²⁰ Pamatacabi Dioso najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaitsi Abrahampijinëjavabelia. Dioso apo itorobi ángelevi petotsipaebinxatsi Abrahampijinëjavabelia. Dioso pijacuata najumecapanepaeya jumaitsi Abrahampijinëjavabelia pacuenia pepacuene toexanaejitsia.

Pajamatabëcuenelivaisi yabara bajayata Dioso Moiséspijinëta najumecopata yabara pelivaisi

²¹ Dioso icatsia cotocaevi Moiséspijinëta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinëjavabelia, itsiata apo ajumematamobiaexanae. Tsipaji Dioso Moiséspijinëta penajumecopatsilivaisi pejamatabëcueneta, jivi Dioso apo capanepaejitsiatsi. Jivi itsa caëjëpaejitsipatsi pejumecovënëtsicapenepaenexa daxita palivaisi Dioso Moiséspijinëta najumecopata, nexata Dioso jivi capanepaejitsipa pijaneconivecua Dioso Moiséspijinëta penajumecopatsilivaisi pejumecovënëtsicapenepaexae.

²² Itsiata baitsi jane itsajivi ata apo caëjëpaetsi pejumecovënëtsicapenepaenexa Dioso Moiséspijinëta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacuene pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitsi vajayapëtaenexa. Nexata yapëtanetsi vajanajamatabëcuenecopatsinexa Jesucristojavabelia, vajanacapanepaenexa pacuenia Dioso copiaya tajëvelia najumecapanepaeya jumaitsi Abrahampijinëjavabelia.

²³ Cristo abaxë athëbëvetsica pepatsivajënaeyatsica, Dioso Moiséspijinëta penajumecopatsilivaisi nacayapëtaeyaexana pamatacabi Cristo patsica vajanajamatabëcuenecopatsinexa Cristojavabelia. Nacayapëtaeyaexananua pacuenia vajacuata vajaexanaejava pejamatabëcueneta, acuenebi Dioso vajanacapanepaenexa. Nexata Dioso Moiséspijinëta penajumecopatsilivaisi, nacajamatabëcueneevetapona matapania Cristo athëbëvetsica pepatsimatacabitsicajavabelianexa. Nexata

bjarapalivaisi vajanacajamatabëcueneevetsijavata, Cristo baja nacacaxitajaraba. ²⁴ Pacuenia pejevaxi pevetsijivi, pejevaxi baeveta, bjarapacuenia Dioso Moiséspijinëta penajumecopatsilivaisi, nacajamatabëcueneeveta daxita vajajumecovënëtsivi bjarapalivaisi. Bjarapacuenia nacajamatabëcueneeveta matapania Cristo athëbëvetsica pepatsimatacabitsicajavabelianexa. Nexata jane baja athëbëvetsica Cristo pepatsicujinaetsica, vajanajamatabëcuenecopatsixae bjaraponëjavabelia, Dioso aneonijibia nacatane. ²⁵ Aeconoxae baja najamatabëcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bjarapacuenia baja Dioso Moiséspijinëta penajumecopatsilivaisi, apo nacajamatabëcueneevetsi.

²⁶ Paxamë rabaja Dioso papeximë panenajamatabëcuenecopatsixae Jesucristojavabelia. ²⁷ Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. ²⁸ Daxitatsi vaxaitsi vajanajamatabëcuenecopatsivi Jesucristojavabelia, pajudíovinë, apo pajudíovi atamë, aeconoxae baja Dioso najëpaeya nacatane. Paxamë ata pijinia dajubienia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najëpaeya nacatane. Paxanë papebijivinë, paxamë pijinia papetiriavi atamë, bjarapacuenia daxitatsi Dioso najëpaeya nacatane. ²⁹ Cristo pijajivixaetsi, nexata Abrahampijinë bepepo pemomoxitsi Dioso nacatane. Nexata pacuenia Dioso bajayata tajëvelia najumecapanepaeya jumaitsi Abrahampijinëjavabelia, bjarapacuenia Dioso nacacapanepaena.

4

¹ Mara pacuenia jitsipajë patacajumaitsinexaje. Pejevaxinëyo paxa itsa vecuatëpatsi, paxami riconë ata, abaxë apo rajutsitsi paxami pecobecovë pepitsinexa pijajavanexa. Tsipaji abaxë pejevaxinëyo. Pacuenia itorobabiabatsi pevetsijivitsi, bjarapacuenia exanabiaba. Daxitacuene pexainanënexa ata, bjaraponëyo jumecovënëtabiaba pevetsijivitsi pitorobicueniatsi. ² Itsa abaxë pejevaxinëyo, pevetsijivitsi evetatsi. Xua ata pijajavanexa, toevetatsi. Matapania baja itsa tocopiapatatsi paxapijinë petocaëjëtsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. ³ Bajara pijinia paitsinë pajudíovinë Jesucristo abaxë athëbëvetsica pepatsivajënaeyatsica. Itsa abaxë apo payapëtaenë pexaniajailivaisi, Jesucristo pelivaisi, pajumecovënëtabiabajë pacuenia paneitoroba Dioso Moiséspijinëta penajumecopatsilivaisi. Nexata pacuenia pejevaxinëyo jumecovënëtabiaba pevetsijivitsi pitorobicueniatsi, bjarapacuenia pajumecovënëtabiabajë Dioso Moiséspijinëta penajumecopatsilivaisi. Jamatabëcuenenavëxaniabiaya pajamatabëjumaitsinë tsabiabi: “Pacuenia Dioso Moiséspijinëta najumecopata vajaexanaexae, nacacapanepaena Dioso,” pajamatabëjanë tsabiabi. ⁴ Itsiata Dioso pecaëjëtsimatacabi itsa copiapata, Dioso pexënato itorobica judíovata penaexanaenexa mapanacuataje. Nexata Dioso pexënato mapanacuataje judionëcuenia ponapona. Nexata pacuenia

itoroba Dioso Moisésþijinëta penajumecopatsilivaisi, bajarapacuenia Dioso pexënato exanaponapona. ⁵ Bajarapacuenia Dioso pexënato naexana mapanacuataje vajanacavecuajibiaexanaenexa pibisiacuen vajanecomimi. Nexata baja nacacopatsiaexana vajaanabiabijavami pacuenia nacaitoroba Dioso Moisésþijinëta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamë Dioso papexicuenemë panenayapëtaenexa, Dioso pacatoitorobica Espíritu Santo papecatsijamatabëjonenexa. Nexata Espíritu Santo pejamatabëcueneta: “¡Taxa!” pacajaiyaexana Dioso javabelia. ⁷ Nexata Dioso papexixaemë, aeconoxae baja apo pajumecovënëtsimë pacuenia pacaitoroba Dioso Moisésþijinëta penajumecopatsilivaisi. Dioso papexixaemë, itsamatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabëxaina Galacia nacuapijivi, Dioso pajumecovënëtavapaevi, yabara pelivaisi

⁸ Pamatacabi abaxë Dioso apo payapëtaemë, panematabacabëta panubenabiabame panevajëcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. ⁹ Itsiata baitsi jane aeconoxae baja payapëtaneme pepo Dioso. Bajaraponë jane xaniavaetsia pacayapëtane. ¿Detsa xuajitsia nexata pajitsipame panejumecovënëtsinexa Dioso Moisésþijinëta penajumecopatsilivaisi? Pamatacabi abaxë apo payapëtaemë pepo Dioso, panematabacabëta pavajëcabiabame bediosovi panetaevijavabelia. Itsiata baitsi jane bajarapamonae apo caëjëpaetsi papecacapanepaenexa. Bajara pijinia itsi Dioso Moisésþijinëta penajumecopatsilivaisi. Pajumecovënëtsi atamë tsipae Dioso Moisésþijinëta penajumecopatsilivaisi, itsiata Dioso aneonijibia apo pacatae tsipae papecacapanepaenexa. ¹⁰ Judíovi nacueraevetabiaba penacueraevetsimatacabita. Exanabiabanua fiesta Dioso Moisésþijinëta penajumecopatsilivaisi pitorobicueniatsi. Bajara pijinia pacuenia paxamë ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamë ata paexanabiabame. Jamatabëcuenenavëxaniabiaya pajamatabëjumaitsimë tsabiabi: “Bajarapacuenia vaxaitsi ata itsa exanaenatsi, Dioso aneonijibia nacataena,” pajamatabëjamë tsabiabi. ¹¹ Bajarapacuenia paneexanabiabixae, bitso pacasivanajamatabëxainatsi. Tspaji paxamë yabara jamatabëjumaitsinë mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajë,” jamatabëjanë paxamë yabara.

¹² Tajamonae, pacaitorobatsi paxamë ata panenajamatabëcuenecopatsinexa Jesucristojavabelia pacuenia xanë najamatabëcuenecopatajë. Tanajamatabëcuenecopatsixae baja Jesucristojavabelia, judionë atanë, copatajë baja tajumecovënëtsijavami Dioso Moisésþijinëta penajumecopatsilivaisi. Nexata pacuenia paxamë, apo pajudíovimë, apo pajumecovënëtsimë picani Dioso Moisésþijinëta penajumecopatsilivaisi, bajarapacuenia xanë ata baja apo jumecovënëtsinë Dioso Moisésþijinëta penajumecopatsilivaisi. Nexata pëtsa baja pajumecovënëtime Dioso Moisésþijinëta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamë apo paneitsacueniabimë. ¹³ Paxamë baja cajena payapëtaneme

mapacueneje. Tavitanexae, copiaya patajopajë paxamëjavata. Nexata bajarapacuenia paxamëjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxë apo payapëtaemë. ¹⁴ Dioso baja cajena netocopata tanevaetabinexa bajarapavitane pataneyaaitajitsibinexamë picani. Itsiata baitsi jane bajarapavitane yabara bijiata apo panetaemë. Apo panenavecuaitorobimë patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. ¹⁵ Bajarapamatacabi bitso pajamatabëcuenebarëyamë patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimë panejamatabëcuenebarëyajavami? Bajarapamatacabi meta itsa pacavajëtsipatsi, paneitaxuto ata panerajutsipame tanaitaxutorutsinexa. ¹⁶ Aeconoxae meta bepanijavajabitsaënënë panetaejitsipame patacatsipaebixae pexaniajailivaisi, Jesucristo pelivaisi.

¹⁷ Pamonaë saicayalivaisi Jesucristo pelivaisivecua petsipae-baponaevi, pata paxamëjavata bajarapalivaisi papecatsipaebinexa. Bajarapamonaë najamatabëxainabiaba pexanaenexa xua yabara pasivabarëyamëjitsia bajarapamonaë. Itsiata baitsi jane bajarapamonaë apo najamatabëxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonaë jitsipa paxanë patanevecuanasaicayabinexamë. Jitsipa panejamatabëcuenejëpaenexa bajarapamonaë. ¹⁸ Xanepana picani itsamonae ata panesivabarëyanexa itsa pacayavenona, itsa baitsi jane pepacuene xaniavaetsia pacasivanajamatabëxaina papecayavenonaenexa. Bepacayavenona bajarapamonaë daxitamatacabijavabelianexa. Nexata paxanë étapatsimatacabi paxamëjavata, apo bepacayavenonaë. ¹⁹ Paxamë bepataximë pacatanetsi. Petiriva itsa vixaenotatsi penacueto pevecuanaexanaenexatsi, bitso banajamatabëxaina ëpexanaëjavabelianexa. Bajara pijinia pacuenia xanë ata bitso pacasivanajamatabëxainatsi. Tsipaji bitso patojitsipatsi, pacuenia Cristo jamatabëcueneitsi, bajara paxamë ata panejamatabëcueneitsinexa. ²⁰ Bitso picani jitsipajë aeconoxae taponaponaëjava paxamëjavata bitso patacasivanajamatabëxainaexae. Nexata itsa ponaponaëjitsipajë paxamëjavata, apo patacatoyaquinaë tsipaetsi. Pacabarëcuaijaijitsi tsipae pexaniacuena. Apo patacataexae, nexata abaxë xaniavaetsia apo yapëtaenë pacuenia exanaëjitsianë paxamëjavabelia.

Agarpijivabeje Sarapijivabeje yabara pelivaisi

²¹ Paxamë pajumaitsimë tsabiabi: “Jumecovënëtsianatsi Dioso Moiséspijinëta penajumecopatsilivaisi Diosojavabelia vajanacapanepaenexa,” pajamë tsabiabi. ¡Nexata panamuxunaevere xaniavaetsia paneyapëtaenexa pacuenia Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijinë xaina pexënatobeje. Abrahampijinë pexënato itsanë xaina Agarpijivata. Agarpijiva, Abrahampijinë bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovënëtabiaba pijatuxanejivibeje pitorobicueniatsi. Bajaraxuacujinaë icatsia Abrahampijinë itsanë xaina

Sarapijivata, pepo pijavata jane baja. Bajarapova apo pecomuatsiva.²³ Panacuetonëyo Abrahampijinë xaina Agarpijivata, pecomuatsivata jane baja, xaina pacuenia baxaina pexi pexainaevi. Panacuetonëyo pijinia xaina Sarapijivata, pepo pijavata jane baja, mavecova ata bitso pepua perujuvata, xaina. Bajarapanacuetonëyo xaina petocopiapatsixaetsi pacuenia Dioso tajëvelia najumecapanepaeya jumaitsi Abrahampijinë pexënato pexainaenexa.²⁴ Bajarapovabeje pelivaisita Dioso nacayapëtaeyaexana pacuenia Dioso jivi tane anijacueniabeje. Dioso Moiséspijinëta najumecopata Moiséspijinë pijajivi pebarëjumecovënëtsinexa bajarapalivaisi. Bajarapalivaisi Dioso najumecopata Moiséspijinëta Sinaivënë tsutojumata, Arabia nacuata.²⁵ Itsamonae abaxë mapamatacabi ataje tsiteca jumecovënëtavanapa Dioso Moiséspijinëta penajumecopatsilivaisi. Bajarapamonae abaxë tsiteca pejumecovënëtavanapaexae Dioso Moiséspijinëta penajumecopatsilivaisi, Abrahampijinë pecomuatsivami, Agarpijivami, cuenejëpavanapa. Tsipaji pacuenia Agarpijiva daxitamatacabi jumecovënëtabiaba pijatuxaneva pitorobabiabicueniatsi, bajara pijinia pacuenia bajarapamonae jumecovënëtabiaba Dioso Moiséspijinëta penajumecopatsilivaisi pitorobicueniatsi.²⁶ Vaxaitsi pijinia Jesucristojavabelia vajanajamatabëcuene copatsivi, Abrahampijinë pepo pijavami, Sarapijivami, cuenejëpavanapatsi. Nexata itsamatacabi Dioso pijatamarata, pejanaJerusalén tomarata, jinavanapaenatsi. Tsipaji pacuenia Abrahampijinë pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinëta penajumecopatsilivaisi pitorobicuenia apo jumecovënëtavanapaetsi.²⁷ Nexata ayaibitsaëtotsi tsaponae Jesucristojavabelia vajanajamatabëcuene copatsivi. Abrahampijinë pepo pijavami, Sarapijivami, yabara, Dioso pejumelivaisibaxutota tajëvelia jumaitsi mapacueniaje:

Mavecovamë, nexi apo nexainaeva. Jamatabëcuenebarëyamë tsane.

Caeto ata apo nenavixaetaeva ata, itsiata jamatabëcuenebarëyaya vavajamë tsaxuamë tsane, navixaetae atamë. Tsipaji nemomoxi ayaibitsaëto xainaename. Xainaename ayaibitsaëto nemomoxi, nijajivitova pemomoxi matatoxenetsia,

jai tajëvelia Dioso pejumelivaisibaxutota ayaibitsaëtotsi Jesucristojavabelia vajanajamatabëcuene copatsijavanexa yabara.

²⁸ Tajamonae, pacuenia Abrahampijinë pepo pijavata, Sarapijivata, naexana Isaacpijinë pacuenia Dioso tajëvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabëcuene copatsixae, Dioso nacatane Sarapijiva bepepo pemomoxitsi. Nexata pacuenia Dioso tajëvelia najumecapanepaeya jumaitsi vajanacapanepaenexa, bajarapacuenia Dioso nacacapanepaena.²⁹ Bajayata Abrahampijinë pexënato, matapijinë, ponë naexana Agarpijivata, bajaraponë jamatabëitonotabiaba pejuyapijinë, ponë naexana Sarapijivata Dioso pejamatabëcueneta Espiritu Santo peyavenonaexaetsi. Bajara pijinia pacuenia aeconoxae ata, pamonae casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espiritu Santo vajanacatsijamatabëceaevi.³⁰ Pijuyapijinë, pejamatabëitonotabiabinë yabara, Dioso pejumaitsijava

Abrahampijinējavabelia Dioso pejumelivaisibaxutota jumaitsi mapacueniaje: “Ponē nexēnato xainame necomuatsivata, apo rajutsimē tsane nexainaeyajuvēnējava nevēnamuto pepitsinexa. Daxita rajatsianame ponē xainame pepo nijavata. Bajaraxuata nijabovecua pitsapaeyaexanaename necomuatsiva, nexēnato yajava,” jai Dioso pejumelivaisibaxutota Abrahampijinējavabelia Dioso pejumaitisijava.³¹ Tajamonae, Dioso apo nacatae Abrahampijinē pecomuatsiva bepemomoxitsi. Biji rajane Dioso nacatane Abrahampijinē pepo pijava bepemomoxitsi. Bajaraxuata vaxaitsi baja apo jumecovēnētsitsi Dioso Moiséspijinēta penajumecopatsilivaisi.

5

Pacuenia icatsia apo bejumecovēnētsi Dioso Moiséspijinēta penajumecopatsilivaisi, pamonaē baja najamatabēcuenecopaba Cristojavabelia, yabara pelivaisi

¹ Cristo pejamatabēcueneta nacacopatsiaexana Dioso Moiséspijinēta penajumecopatsilivaisi vajajumecovēnētsijavami. Nexata Dioso Moiséspijinēta penajumecopatsilivaisi panejumecovēnētsijavami panecopatsijava, tsiteca baja pacopatavanapare. Pētsa icatsia caevēalia pajumecovēnētame Dioso Moiséspijinēta penajumecopatsilivaisi, bajarapalivaisi bepapijajivimē papecaitorobabiabicuenia paneexanavanapayaniva.

² Xanē Pablonē, panenamuxunaevere palivaisi pacatsipaebijitsiatsi. Jamatabēcuenenavēxaniabiaya pētsa pajamatabējumaitsimē: “Xanē rabaja taneperabēcaucutsinē. Bajaraxuata tajaneconivecua Dioso necapanepaena,” pajamatabējamē pētsa. Bajarapacuenia itsa panajamatabēxainaejitsipame, nexata Cristo papecasivatēpaejava papecacapanepaenexa panijaneconivecua, saya pacasivanacueratsipa. Nexata pajumecovēnēre Cristo papecasivatēpaejava papecacapanepaenexa panijaneconivecua.³ Icatsia pacamuxujibatsi asaēyata. Pajivi jamatabēcuenenavēxaniabiaya jamatabējumaitsi:

“Xanē naperabēcaucutsiaexanaenajē tajaneconivecua Dioso tanecapanepaenexa,” jamatabējai, bajarapajivi bejumecovēnētsicapanepa daxita pacuenia Dioso Moiséspijinēta penajumecopatsilivaisi itorobatsi.

⁴ Jamatabēcuenenavēxaniabiaya itsa pajamatabējumaitsimē tsipae: “Xanē jumecovēnētsianajē Dioso Moiséspijinēta penajumecopatsilivaisi. Nexata Dioso aneonijibia netaena tanecapanepaenexa,” itsa pajamatabējamē tsipae, nexata pacopabijitsipame panejumecovēnētsijavami Cristo papecasivatēpaejava panijaneconi yabara. Dioso papecaitaxutotsoniataexae aneonijibia papecataejavami ata, pacopabijitsipame.⁵ Vaxaitsi baja cajena yapētanetsi Dioso vajanacapanepaejavanexa. Tsipaji jumecovēnētatsi Jesucristo vajanacasivatēpaejava vajaneconi yabara. Bajaraxuata Espiritu Santo pejamatabēcueneta vajanacayavenonaexae, evetavanapatsi Dioso vajanacajumaitsinexa: “Paxamē rabaja paneconijibimē,” vajanacajainexa, pamatacabi Dioso pitabarata nubenaenatsi.⁶ Vaxaitsi baja Jesucristo pijajivitsi. Nexata nacaperabēcaucutsi ata, apo nacaperabēcaucutsi ata, itsiata bajarapacuenē amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabēcuenecopatsixae Jesucristojavabelia.

7 Pajumecovënétavanapame baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovënétsijavami? 8 Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. 9 Pëtsa panacofënétame mapalivaisije. Pan pexanaematabënexa ayaimatabë ata, levdurajava pijinia tsiquirijavayo ata, itsiata pematajërëabijavata, bacajëpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënétsilivaisi jivi petsipaebaponaevi. Penajumetsënétsilivaisi jivi petsipaebaponaevi, caenëbeje ata, itsiata ayaiBITSaëto Jesucristojavabelia penajamatabëcuenecopatsivi, jamatabëcuenebijiiana. 10 Yapëtaniji baja cajena mapacueneye. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënétavanapaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiiana penajumetsënétsilivaisita.

11 Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuenecopatsivi, bepanaperabëcaucubiaexaname Diosojavabelia papecacapanepaenexa,” itsa janë tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajë peperabëcaucubinexatsi, nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae. 12 Pamonaе pacajamatabëitonotabiaba panenaperabëcaucutsiaexanaenexa, bajarapamonae tojitsipajë mapacueniaje. Tojitsipajë bajarapamonae papecavecuapitsapaenexa, papecacopatsinexa baja papecajamatabëitonotabiabijava.

13 Tajamonae, Dioso pacajunata panecopabinexa Dioso Moiséspijinëta penajumecopatsilivaisi panejumecovënétsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënétsijavami, tacopatsixae baja, nexata exanaenajë daxita pibisiacue pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panejumecovënétsijavami, panecopabixae baja, Jesucristojavabelia penajamatabëcuenecopatsivi bepapijajivimë panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae. 14 “Asivamëre itsamonae ata pacuenia nijacuata nasivamë,” pejaillivaisi itsa pajumecovënétsianame, nexata daxita palivaisi Dioso Moiséspijinëta najumecopata, pajumecovënétsicapanepaename. 15 Itsa panaitoyamë, itsa panabaracuaicuaijamënuua pibisiacuenia, nexata xaniavaetsia panaitavere. Tsipaji itsa panaitoyamë tsipae, itsa panabaracuaicuaijamënuua tsipae pibisiacuenia, nexata Jesucristojavabelia panenajamatabëcuenecopatsijava, namataenetsia panajamatabëcuene faefaenaeyaexanaejitsipame. Pacopatsipamenuua baja Dioso pejumelivaisi yabara panenacaetuatabiabijava ata.

Pacuenia Espiritu Santo nacajamatabëcueneyavenona yabara pelivaisi

16 Mapacuenia pacajumaitstsije. Pacuenia Espiritu Santo pacaitorobiaba, paexanabiabare daxitamatacabi canacujitsia. Pëtsa pibisiacue

paexanabiabame panijacuata panenajamatabëxainaejava. ¹⁷ Xua vajacuata vajajamatabëëthëtota najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobabiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espíritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene. ¹⁸ Itsa baja paexanavanapaename pacuenia Espíritu Santo pacaitorobabiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tsipaji baja pacuenia Espíritu Santo pacaitoroba, paexanavanapaename.

¹⁹ Xua jivi pijacuata najamatabëxaina, itsa exana, yapëxanepana vajapëtaenexa. Tsipaji xua jivi pijacuata najamatabëxaina itsa exana, pebi itsava jaita pijavavecua. Petiriva pijinia jaita itsanë pamonavecua. Pamona pevitota pibisiacuene exana pacuenia pijacuata najamatabëxaina, bajarapamona jitsipana daxita xua pibisiacuene pexanaenexa. ²⁰ Pamona pibisiacuene exana pacuenia pijacuata najamatabëxaina, pematabacabëta nubenabiaba pevajëtabiabinexa jumapecataeya pexanaenëanëjavabelia. Junatabiabanua penajorobivi. Bajarapamonaeyajuvënevï naexanana penajorobivi. Itoyana tsabiabi itsamona. Jumeanaenotabiabanua itsamona. Cuenecaëbabiabanua itsamona. Anaepanabiabanua apo vajayabaraanaepanaejavayo ata. Natoexanabiabanua daxitacuene ëpamonaenexa. Vecuanasaicayababiabanua itsamona Dioso pejumecovënëtsivi. Caebitsaëto caejavata apo najuanacaetuanabiabi. ²¹ Pamona pibisiacuene exana pacuenia pijacuata najamatabëxaina, jamatabëyacajëretabiabanua itsamona pexainaejava. Jamatabëbeyaxuababiabanua jivi. Aitajibinua tsabiabi pijabonëjava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujiobatsi, bajara icatsia pacuenia pacamuxujiobatsi. Pamona bajarapacuenia pibisiacuene exana, bajarapamona apo jinavanapae tsane Dioso pijanacuatatsia.

²² Pacuenia peubinae, pexaniana, pexaniacuai capitsapa, bajara pijinia pacuenia Espíritu Santo vajajamatabëëthëtovetsina capitsapa mapacueneje. Capitsapa itsamona ata vajaasivajamatabëcuene. Capitsapa vajabarëyajamatabëcuene. Capitsapa Diosojavabelia, itsamonaejavabelia ata, barajamatabëcuenexanepanaeya vajataenexa. Capitsapa, itsamona nacaitsacueniabi ata, vajavajënaeyabelia vajaajamatabësaëjamatabëcuene. Capitsapa itsamona vajaitaxutotsoniatae jamatabëcuene. Capitsapa itsamona pexaniacuene vajatoexanaejamatabëcuene. Capitsapa Dioso vajajumecovënëtsijava vajaajamatabësaëjamatabëcuene. ²³ Espíritu Santo vajajamatabëëthëtovetsina capitsapa vajaitejepaebijamatabëcuene. Capitsapa vajanajamatabëcataitsi jamatabëcuene pibisiacuene vajaexanaeyaniva. Daxita bajarapajamatabëcuene, Espíritu Santo vajajamatabëëthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacuene. ²⁴ Pamona Jesucristo pijajivi, bajarapamona jamatabëjumaitsi: “Jesucristo cruzajavabelia itsa cobematabiabarutatsi, tajaperujumatabëcuenemi yajavatëpa,” jamatabëjai. Nexata vecuaajibiaexanatsi pajamatabëcuene

itorobabiabatsi pibisiacuene pexanaenexa. ²⁵ Vaxaitsi Espiritu Santo nacayajavaponapona. Nexata betonacopatabiabatsi vajanacaitorobinexa pacuenia Espiritu Santo nacatojitsipa vajaexanabiabinexa.

²⁶ Ayaijamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaëbivaniva ata.

6

Pacuenia Dioso pejumecovënëtsivi itorobatsi namataenetsia penajamatabëcuenejavavenonaenexa yabara pelivaisi

¹ Tajamonae, itsa pacaxitajarabame Dioso pejumecovënëtsijavavecua pejopaejivi, paxamë pacuenia Espiritu Santo pacaitoroba panejinavanapaevi, payavenonare bajarapajivi. Payavenonare bajarapajivi piamatabëcuenesaënexa icatsia Dioso pejumecovënëtsijava. Itsiata baitsi jane pexaniajamatatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopaejitsipame dovathi itsa pacajamatabëcuenejêta pibisiacuene paneexanaenexa.

² Namataenetsia panayavenonabiabare dovathi itsa pacajamatabëcuenejêta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

³ Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanë cajena ayaijamatabëcuenenënë bajarapajivi matatoxenetsia. Nexata Dioso tajumecovënëtsijavavecua apo jopaenë tsane,” jai, bajarapajivi najamatabëcuenecapaeba. Tsipaji bajarapajivi ata dovathi itsa jamatabëcuenejêtatsi pibisiacuene pexanaenexa, apo ajamatabëcuenesaë tsipae Dioso pejumecovënëtsijava.

⁴ Caejivi canacujitsia benacuenecanajêta peyapëtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabëcuenebarëya Dioso pitabarata. Itsiata baitsi jane bajarapajivi pexaniacuene exanaponaponae ata, apo bejamatabëjumaitsi mapacueniaje: “Xanë itsamonaevécua pexaniacuene Dioso toexanaponaponajë,” apo bejamatabëjai. ⁵ Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

⁶ Pamona tsipaebatsi Dioso pejumelivaisi, bajarapamonae pexainaeyajuvënëjava juya berajuta Dioso pejumelivaisi petsipaëbinëtsijavabelia.

⁷ Pëtsa pajamatabëcuenenavëxaniabame saicayacuenia paneexanaeyaniva Dioso papecaitorobicuenevecua. Tsipaji itsajivi ata apo cajëpaetsi peyamaxëitojorobinexa Dioso. Xua jivi bauba pabita, pamatacabí baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi.

⁸ Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espiritu Santo pesivabarëyanexatsi, nexata bajarapajivi

tēpae ata, xainaena matababi apo peverevereaejava. ⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaējētsimatacabita nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. ¹⁰ Nexata itsajota nacacuenecaējēpa, pexaniacuene betoexanabiabatsi itsamonaejavabelia. Pamonae Jesucristo vajanajuajumecovēnētsivi, bajarapamonae bitsoyo beyavenonaponatsi.

Pacuenia Pablo pemuxujobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonēje. Xanē raja Pablonē tajacuata paca-toyaquinatsi mapalivaisije. ¹² Itsamonaē judíovi ajumesaēya pacajumai tsabiabi: “Paxamē apo pajudíovi atamē, Jesucristo pelivaisi itsa pajumecovēnētame, bepanaperabēcaucubiaexaname papecacapanepaenexa Diosojavabelia,” pacajai tsabiabi. Pajudíovi bajarapacuenia pacajumai tsabiabi, jamatabēcuenenavēxaniabiaya jamatabējumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabēcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabēcuenebarēya tsane. Nexata vajamonae judíovi apo nacaitsacueniabi tsane, apo judíovi tsipaebi atatsi Cristo vajanacasivatēpaejava cruzata,” jamatabējai tsabiabi bajarapajudíovi jamatabēcuenenavēxaniabiaya. ¹³ Pajudíovi bajarapacuenia pacajumai tsabiabi, pijacuata naperabēcaucubiaexanae ata, itsiata apo exanavanapae daxita pacuenia itorobatsi Dioso Moiséspijinēta penajumecopatsilivaisi. Bajarapamonae jitsipa panenaperabēcaucubiaexanaenexa, saya papecavajunupaebinxaxa pevēna judíovijavabelia: “Paxanē patajamatabēcueneta Galacia nacuapijivi naperabēcaucubiaexana,” pejainexa paxamē yabara. Tsipaji bajarapajudíovi jitsipa pesivajamatabēcuenebarēyajavatsi pevēna judíovi. ¹⁴ Xanē cajena bajarapacuenia apo exanaenē. Apo najamatabēxainaenē, xua exanajē, tanavajunupaebinxaxa jivi saya tanesivabarēyanexa. Itsiata jitsipajē caelivaisiyo jamatabēcuenebarēyaya jivi tatsipaebinxaxa. Jitsipajē jivi tatsipaebinxaxa Jesucristo vajanacasivatēpaejava cruzata. Jesucristo cruzata tanesivatēpaexae, nevejamatabēcaeva baja tajitsipaejavami mapanacuapijicueenje. Mapanacuapijivi pijinia tanejitsipaejamatabēcuenemi ata ajibi baja. ¹⁵ Espíritu Santo vajanacaitorobicuenia itsa exanavanapatsi, nacaperabēcaucutsi ata, apo nacaperabēcaucutsi ata, najēpabeje. Tsipaji cajena amatamobi bajarapacuenē Dioso pitabarata. Vajana-jamatabēcuene pēnēyorotsijava rajane pejanajamatabēcuenejavabelia, namatamota vajanacacapanepaenexa Diosojavabelia. ¹⁶ Nexata pamonaē exanavanapa pacuenia pejanajamatabēcuene itorobatsi, bajarapamonae jamatabēcuenexanepanaeya jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

¹⁷ Tavajēnaeyabelia baja apo jitsipaenē tanejamatabēitonotaponaeenexa pamonaē nejumeaeba Jesucristo taneitorobinēcuene. Jesucristo pelivaisi yabara tanejumaconibabeyabiabijavata, nejumatitibabeyabiaba. Bajarapavajēnēcovēnē tanetsijumarubenaexae, daxitajivi neyapētane Jesucristo pijajivitonēcuenenē.

¹⁸ Tajamonaē, pacatovajētabiabatsi Diosojavabelia vajatuxanenē Jesu-
cristo papecayavenonabiabinexa. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pi-jaapöstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinxatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinxatsi vajajinavanapaenexa aneconijibia Dioso pitabarata. ⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasi- vatëpa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuena vajanacaitaxutotsoni- ataexae, daxitamatacabi canacujitsia Diosojavabelia jumaitsitsi tsabi- abi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotso- niataexae, nexata pexënato itorobica mapanacuayabetsicaje vajanacasi- vatëpaenexa. Bajarapacuenia Dioso nacavecuaajibiaexana pibisiacuene vajaexanaeconimi. ⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacatoxanepana Dioso pejitsipaecuenia vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja ae- conoxae Dioso nacayapëtaeyaexana. Bajaraxua picanı abaxë itsajivi ata apo yapëtae. Xua Dioso tajëvelia najamatabëcuenevereta pex- anaenexa, maitsije. Dioso itorobijitsiatsica pexënato mapanacuayabet- sicaje petoexanaeveretsinexatsi daxita pacuenia itoroba. ¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pi- jajivitsi nacacaetuatsiana Dioso pecaëjëtšimatacabi itsa copiapatsiana. Dioso pecaëjëtšimatacabi itsa copiapatsiana daxitacuene mapanacuapi- jicueenje, athëbëpijicueene ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bajarapacuenia Dioso tajëvelia nacaitapeta vajanajamatabëcuene copatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia. ¹³ Pexaniajailivaisi papecacapanepaelivaisinexa, paxamë ata itsa pajumetaneme, nexata baja panajamatabëcuene copatame Jesucristojavabelia papijajivexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuene më. ¹⁴ Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa matababi apo peverevere caejava. Yapëtanetsinua Dioso vajanacacapanepaejavanexa pexënato vajanacasivatëpaexae. Bajaraxuata vaxaitsi bejumaitsi Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuene copatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonaë Dioso pejumecovënëtsivi. ¹⁶ Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta. ¹⁸ Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matababi apo peverevere caejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matababi apo peverevere caejava. ¹⁹⁻²⁰ Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuene copatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinaë. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. ²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatababitaje. Pejanamatabijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonaë najamatabëcuene copata

bajaraponëjavabelia. ²³ Daxita baja pamonaë najamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonaë. Nexata Cristo bajarapamonaë yajavaponapona daxita mapanacuajavaje.

2

Pacuenia Dioso pijajivi, piasivaxae, capanepaejitsia yabara pelivaisi

¹ Dioso baja cajena pacajamatabëcueneaitavayaexana Jesucristo pejamatabëcueneta. Paxamë abaxë bajayata Dioso itsa apo pajumecovënëtsimë, naxuabiaya picani Dioso vecua pajinavanapame pibisiacuene paneexanavanapaneconi yabara. Nexata pacuenia itsi petëpaevi, bajara picani pajamatabëcueneitsimë Dioso javabelia itsa abaxë Dioso apo pajumecovënëtsimë. ² Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëtavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatabëcueneasaëyaexanapona pamonaë Dioso apo pejumecovënëtsivi pibisiacuene pexanaenexa. ³ Daxita picani bajayata vaxaitsi pibisiacuene exanavanapatsi. Pacuenia vajajamatabëëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonaë naneconita Dioso javabelia, bajara picani pacuenia vaxaitsi ata naneconitatsi Dioso javabelia vajanacananeconitsiaexanaenexa. ⁴ Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa. ⁵ Dioso vecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpaeucujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua. ⁶ Jesucristo petëpaeucujinae, Dioso icatsia asaëyaexanatsi petëpaejavavecua. Nexata vaxaitsi Jesucristojavabelia vajanajamatabëcuenecopatsixae, Dioso nacatane bevajanacayajavaasaëyaexanaevi. Dioso nacatanenua Jesús athëbëtatsia bevajanacayajavaeaevi daxitacuene vajanacabarëevetsinexa. ⁷ Bajarapacuenia Dioso nacatoexana vajanacatsitanajamatabëcuene itajëtsinexa daxitamatacabijavabelianexa vajanacajitsipaecuene. Nacatsitanajamatabëcueneitajëtanua vajanacaitaxutotsoniataecuene Jesucristo vajanacasivatëpaxae. ⁸ Dioso cajena bitso pacajitsipa. Bajaraxuata Jesucristojavabelia itsa panajamatabëcuenecopatame, Dioso pacacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemë. Biji rajane Dioso pejamatabëcueneta pacacapanepaena. ⁹ Itsajivi ata Dioso petonacuenebaponaponaëjamatabëcuene, Dioso apo capanepaetsi tsane. Biji rajane Jesucristojavabelia penajamatabëcuenecopatsixae, Dioso capanepaenatsi. Bajaraxuata itsajivi ata beayaijamatabëcuenejivi apo benatae Dioso pecapanepaejavanexatsi yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai. ¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcuenetsimë tsavanapae itsa abaxë Dioso apo pajumecovënëtsimë. Paxamë apo pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara. ¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacuene naxuabianajë,” pajamatabëjamë tsabiabi. ¹³ Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatēpaexae, aeconoxae baja payajavajinavanapame Dioso. ¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasi-vatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatēpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa tēpa, copiarucaeyaexana palivaisimi bajayata Dioso Moiséspijinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. ¹⁶ Jesucristo cruzata vajanacasivatēpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo baja caebitsaëtotsi nacaexana pijajivinexatsi. Nexata baja Dioso jamatabëcuenexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. ¹⁸ Nexata Jesucristo daxitatsi vajanacasivatēpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajanonexa Dioso pijatomarabetsia. Bajarapacuenia vaxa Dioso nacatocopata vajajonexa pijatomarabetsia Espiritu Santo vajanacayavenonaeaxae. ¹⁹ Bajaraxuata apo pajudíovi atamë, aeconoxae baja Dioso pane-

jumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavanapaenexa. ²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecacapanepaenexa. Bajaraxuata Dioso baja papeximë pacaexana. ²¹ Nexata baja itsamonae ata ayaibitsaëttoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espiritu Santo papecatsijamatabëecaexae.

3

Pacuenia Pablo itorobatsi pexanialivaisi, Jesucristo pelivaisi, petsipae-baponaenexa apo judíovijava yabara pelivaisi

¹ Paxamë apo pajudíovi atamë, Dioso papijajivixae, pacatovajëtabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonaes apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaneme xanë Dioso taneitorobicuene patcatsipaebinxae apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecacapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinarutetatsi caelivaisiyobeje saya. ⁴ Itsa palebianame, payapëtaename pacuenia Dioso neyapëtaeyaexana ëpajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenie Dioso paneyapëtaeyaexana Espiritu Santo pejamatabëcueneta. ⁶ Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena

Dioso. Bajara pijinia pacuenia paxamë ata, apo pajudíovi atamë, itsa pajumecovënëtamë pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaënë Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaëjëpaeyaexananua xaniavaetsia jivi tatsipaebaponaenexa bajarapalivaisi. ⁸ Xanë itsiata beveliajamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjjava patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa. ⁹ Dioso nitoroba patacatsipaebaponaenexa, apo pajudíovi atamë, Dioso papecacapanepaejavanexa. Dioso daxitacuene pexanaenë mapanacuataje. Dioso cajena tajëvelia najamatabëxaina paxamë ata, apo pajudíovi atamë, papecacapanepaenexa. Itsiata itsajivijavabelia ata Dioso apo yapëtaeyaexanae, apo pajudíovi atamë, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamë, petsitanajamatabëcuene itajëtsinexa athëbëtatsia pevetsivijavabelia. Nexata athëbëtatsia pevetsivi itsa nacataena daxitatsi Dioso vajajumecovënëtsivi, pajudíovinë, apo pajudíovi atamë, benacaemonaetsi vajanajuajinavanapaejava, athëbëtatsia pevetsivi yapëtaena bitso Dioso peyapëtaenëcuene daxitacuene pexanaenexa. ¹¹ Pacuenia Dioso tajëvelia copiaya najamatabëxaina, mapanacua pexanaevajënaeya ataje, bajarapacuenia baja Dioso exanaevereta. Tsipaji baja Dioso itorobica vajatuxanënë Jesucristo vajanacasivatëpaenexa cruzata. ¹² Vaxaitsi baja najamatabëcuenecopatatsi Jesucristojavabelia vajanacacapanepaenexa. Bajaraxuata Diosojavabelia vajëtabiabatsi ajumejunavijibia. ¹³ Bajaraxuata Diosojavabelia asaëyata pacatovajëtabiabatsi patanesivajamatabëcuene cueranaeyanivamë abaxë naneconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinë tsabiabi: “Pamonae apo judíovi ata itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi nenaneconitsiaexaneta. Bajaraxuata panesivajamatabëcuenebarëyamëre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajëta Dioso pejumecovënëtsivi yabara pelivaisi

¹⁴ Itsa najamatabënapitabiabajë, apo pajudíovi atamë, Dioso papecacapanepaejavanexa, nexata tamatabacabëta nucabiabajë asaëyata patacatovajëtsinexa vajatuxanënë Jesucristo paxa Diosojavabelia. ¹⁵ Daxita Dioso pijajivi, pamonae athëbëtatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenë paxa exana Dioso. ¹⁶ Dioso baja cajena bitso piasaënë. Ayaijamatabëcuene pexainaenë. Bajaraxuata pacatovajëtabiabatsi Diosojavabelia Dioso

pesaëta papecajamatabëcuene asaëyaexanaenexa Espíritu Santo pejamatabëcueneta. ¹⁷ Pacatovajëtabiatsinua Jesucristo papecatsi-jamatabëcaenexa panesivanajamatabëcopatsixae bajaraponëjavabelia. Pacatovajëtabiatsinua bitso paneasivanexa itsamonae ata, pamonae Dioso pejumecovënëtsivi. ¹⁸ Pacatovajëtabiatsinua daxita Dioso panejumecovënëtsivi panejamatabëcueneyapëtaenexa Jesucristo bitso papecaasivajava. ¹⁹ Pacatovajëtabiatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

²⁰ “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecaëjëpaenëtsi vajanacayavenonaenexa. Dioso caëjëpatsi vajanacatoexanaenexa vavajëtsicuenia. Vajanajamatabëxainaejava ata matatoxenetsia, Dioso caëjëpatsi vajanacatoexanaenexa. Dioso pesaëta nacayavenonabiaba. ²¹ Dioso pejumecovënëtsivi Dioso peyavenonaponaexaetsi, itsamonaëjavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmë!” bejai tsabiabi Diosojavabelia daxitamatacabijavabelianexa. Bajara itsi tsane.

4

Pacuenia Espíritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

¹ Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujiobatsi panejinavanapaenexa pacuenia Dioso pacatojitsipa Dioso papecajunatsivi papijajivinexamë. ² Itsamonaevécua beveliajamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmërenua tsavanapae bajayajebi, itsamonae pacaitsacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabëcuenesaëmëre tsavanapae najamatabëcuenejëpaeya panejinavanapaenexa. Bajaraxua yabara Diosojavabelia panatovajëtabiabare papecayavenonaenexa Espíritu Santo. Nexata nabarajamatabëcuenexanepanaeya pajinavanapaename. ⁴ Jesucristojavabelia vajanajamatabëcuenecopatsixae, vaxaitsi baja nexata caenë Jesucristo pijajivitsi. Xainatsi baja caeEspíritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacacapanepaenexa. ⁵ Caenë rabaja vajatuxanenë Jesucristo. Daxitatsi najamatabëcuenecopatatsi caenëjavabelia. Nacabautisabanua caenë Jesucristo pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatacaitorobinë. Dioso pijajivitsi, daxitatsi, nacayavenona. Nacayajavaponapanua.

⁷ Caejivitsi canacujitsia, Cristo pejitsipaecuena nacajamatabëcuene caëjëpaeyaexanapona pecovëta vajatonacuenebavanapaenexa vajanacaitorobicuena. ⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëtoxaneto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuenecaëjëpaeyaexanae pecaëjëpaejamatabëcueneetsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bjaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavecua. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bjaraxuacujinae icatsia bajaraponë naviatsia baja tajënacuyabetsia. Bjaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espiritu Santo jamatabëcuene caëjëpaeyaexanapontsi saicayacuena. Itsamonae Espiritu Santo jamatabëcuenecaëjëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espiritu Santo jamatabëcuenecaëjëpaeyaexanatsi peyapëtaenexa pajamatabëcuenevivaisi xaina Dioso pejumelivaisi. Nexata tsipaeba itsamonaejavabelia. Itsamonae pijinia Espiritu Santo jamatabëcuenecaëjëpaeyaexanatsi petsipaebaponaenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espiritu Santo jamatabëcuenecaëjëpaeyaexanatsi pevetsinexa Dioso pejumecovënëtsivi. Jamatabëcuene caëjëpaeyaexanatsinua xaniavaetsia peyapëtaeyaexanaenexa Dioso pijacuene. ¹² Bjarapacuenia Espiritu Santo, daxita Dioso pejumecovënëtsivi, jamatabëcuenecaëjëpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuenesaë tsaponae pevajënaeyabelia. ¹³ Nexata belia daxitatsi bajarapacuenia najamatabëcuenejëpaeya jumecovënëtsianatsi Dioso. Jamatabëcuenejapëtaenatsinua xaniavaetsia vajatuxanenë Jesucristo, Dioso pexënat. Nexata daxitatsi Espiritu Santo nacajamatabëcuene caëjëpaeyaexanaena Dioso vajajumecovënëtsinexa. Nacajamatabëcuene caëjëpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcueneitsi, bajara vaxaitsi ata jamatabëcueneitsitsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcueneitsitsi tsane. Itsajamatabëcuene apo vecuanajamatabëxainatsi tsane, palivaisi baja jumecovënëtavanapatsi. Nexata itsamonae penajumetsënëtsilivaisi bepexaniajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane. ¹⁵ Nexata itsamonaejavabelia itsa tsipaebapontsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcueneitsi, bajara vaxaitsi ata vajajamatabëcueneitsinexa, benatojitsipatsi Cristo vajajamatabëcuenejëpaenexa. ¹⁶ Daxitatsi

Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuenevitsabaponaenatsi Dioso vajajumecovënëtsijava.

Pacuenia Cristo pijajivi pejanajamatabëcuene xaina yabara pelivaisi

¹⁷ Jesucristo taneitorobixae, mapacuenia pacajumaitijsiatsisje. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovënëtsivi ajamatabëcueneitaquiri tsavanapae. Tsipaji apo yapëtae Dioso. Bitso saya ajamatabëcuenetaja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. ¹⁹ Nexata apo yapëtae piauracuene. Casaë bitso pexanaenexa daxita xua pibisiacuene. ²⁰ Itsiata baitsi jane paxamë itsa pajumecovënëtame Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata pacopabare panijaperujumatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujumatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuenepëñëyorore. Papejanajamatabëcuenevimë panaexanare. ²⁴ Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaename pacuenia Dioso pacatojitsipa.

²⁵ Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tsipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panabaraanaepanaejavata. Pëtsa panasivajamatabëcuenetsitecame it-samatacabijavabelia ata. ²⁷ Tsipaji itsa panasivajamatabëcuene tsite-caejitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuaijamë pibisialivaisi. Biji rajane pacuaicuaijamëre pexanialivaisi. Pexanialivaisi itsa pacuaicuaijamë tsane, nexata papecajumetaevi pajamatabëcuene yavenonaename. Tsipaji paepatota jamatabëcuenefaefaena, itsa pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espiritu Santo papecatojitsipaecuevecua panejamatabëcuenebejiobitsiyanima Espiritu Santo. Dioso pijaEspiritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata

Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisiamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuenebejajava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuaicuaijaisabiabijava ata. ³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuenepaneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. ² Pacuenia bitso Cristo nacaasiva, bajara pijinia pacuenia paxamë ata bitso pasivamëre tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuenia ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vajaneconi vajanacavecuaajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

³ Paxamë rabaja Dioso papijajivimë. Bajaraxuata pëtsa baja paexaname daxita xua pibisiacueni. Pëtsa panajamatabëxainamenua pibisiacueni paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicuenije. ⁴ Pëtsa panabarëcuaicuaijamënua piauracuene yabara ata. Pëtsa panabarëcuaicuaijamënua saya jema natsiquejemalivaisixi ata. Tsipaji apo pexanepanaecueni. Biji rajane Diosojavabelia pexaniajamatabëcuene parajutabiabianame. ⁵ Payapëtaneme rabaja pexaniajacueni mapalivaisije. Pajivi daxita pibisiacueni exana, apo jone tsane Dioso pijanacuayabetsia. Ponë jaita itsava pijavavecuja, pova pijinia jaita itsanë pamonavecuja, apo jone tsane Dioso pijanacuayabetsia. Pamonae ata bitso jitsipa pexainaenexa daxitacuene mapanacuapijicuenije, apo jone tsane Dioso pijanacuayabetsia. Pamonae bitso jitsipa pexainaenexa daxitacuene mapanacuapijicuenije, jamatabëcuenejëpa pamonae vajëcabiaba jumapecataeya pexanaenëanëjavabelia. Bajarapamonae jamatabëcuenejëpa tsipaji bitso jitsipa saicayacuene Diosovecuja. ⁶ Pëtsa pacayamaxëitojoroba itsajivi ata paxamë ata paneexanaenexa bajarapitsipibisiacueni. Tsipaji Dioso ayaicuenia naneconitsiaexanaena pamonae Dioso apo pejumecovënëtsivi, bajarapitsipibisiacueni pexanaevi. ⁷ Bajaraxuata pëtsa payajavajinavanapame pibisiacueni pexanaevi.

⁸ Paxamë picani bajayata pajamatabëcueneaitaquirimë tsavanapae ita abaxë apo payapëtaemë pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabëcopatsixae, Dioso baja pacajamatabëcueneitayota. Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa. ⁹ Dioso baja papecajamatabëcueneitayotsixae pexanialivaisita, paexanavanapare ëpexaniacuene. Pacanaëjëtaponarenuia ëpexaniajaicuene paneyapëtaenexa, xaniavaetsia panejinavanapaenexa Dioso pejitsipaecuenia. ¹⁰ Panevajënaeyabelia pacanaëjëtaponare paneyapëtaenexa xua yabara Dioso pacasivajamatabëcuene barëyajitsia. Nexata ita payapëtaename xua yabara Dioso pacasivajamatabëcuene barëyajitsia, bajaraxua tsiteca asaëyata panevajënaeyabelia paexanavanapaename. ¹¹ Dioso apo pejumecovënëtsivi pibisiacuene ita exanavanapa, pëtsa panaexaname bajarapapibisiacuene. Biji rajane paitavetsianame bajarapamonae pibisiacuene pexanaeyaniva Dioso pitabarata. ¹² Xua bajarapamonae exana muetsia, bajaraxua bitso pibisiacuene. Nexata itsajivi ita cuenetaejitsipatsi bajaraxua pexanaejava, bajarapajivi bitso ajumeura tsipae juya petsipaebinexa itsamonaejavabelia. Tsipaji bitso pibisiacuene xua muetsia exana bajarapamonae. ¹³ Itsiata baitsi jane bajarapamonae ita paitavetsianame Dioso pejumelivaisita, nacueneyapëtaena bajarapamonae bitso pibisiacuene pexanaejava. ¹⁴ Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamë. Bajaraxuata Diosovecua naxuabiaya pajinavanapame. Pacopabare baja pitaquirijamatabëcuene. Nexata Cristo pejamatabëcueneta panijaneconivecua Dioso pacacapanepaena. Pacajamatabëcueneitayotsiana, jai pina itsamonae Dioso pijajivi.

¹⁵ Nexata baja xania tsane. Panayajivitaema pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. ¹⁶ Dioso papecaitorobicuenia xaniavaetsia patojinavanapare daxitamatacabijavabelianexa. Pamuxujobabiabare itsamonae ata Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, ëpibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa. ¹⁸ Pëtsa paitajibimë tsabiabi. Tsipaji bajarapacuenie Diosovecua pacanaxuabiaexanaejitsipa infernojavabelia. Biji rajane panacopatabiabare Espiritu Santo papecatsijamatabëvënëcaenexa, Espiritu Santo papecaitorobicuenia paneexanabiabinexa. ¹⁹ Namataenetsia panatsipaebabiabare vajatuxanenë ayaijamatabëcuene pexainaecuene. Bajarapacuenia namataenetsia ita panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espiritu Santo jemata pacanaxëanaeyaexanaena. ²⁰ Pajumaitsimë tsabiabi

tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamē tsabiabi tsane daxitacuene yabara vaxa Diosojavabelia vajatuxanenē Jesucristo pevēnēta. Bajarapacuenia Diosojavabelia pajumaitsimē tsabiabi tsane pexanepanaecuene yabara, apo pexanepanaecuene ata yabara.

Pacuenia muxujiobatsi penapitsijivibeje yabara pelivaisi

²¹ Padaxitamē namataenetsia panajamatabēcueneevere, xua jamatabēpanaitorobame, namataenetsia panenaitorobabiabinexa Cristo panejumecovēnētsivixae.

²² Paxamē papetiriavimē, pacuenia yayataeya pajumecovēnētabiabame vajatuxanenē Jesucristo papecaitorobicuenia, bajara pijinia pacuenia yayataeya pajumecovēnētabiabare paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovēnētsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinoxatsi vajanacacapanepaenexa daxita vaxaitsi vajanajamatabēcuenecopatsivi Cristojavabelia. Daxitatsi caenē Cristo pijajivitsi. ²⁴ Nexata bejumecovēnētavanapatsi pacuenia nacaitorobapona Cristo. Bajara pijinia pacuenia paxamē ata, papetiriavimē, bejumecovēnētavanapame daxita pacuenia pacaitoroba paneamonajivi.

²⁵ Paxamē pijinia papebijivimē, pasivamēre panijavajivi. Bepaasivamē panivajivi pacuenia daxitatsi Cristo nacaasiva daxita Dioso vajajumecovēnētsivi. Vajanacaasivaxae, Cristo nacopata pebeyaxuabinoxatsi vajanacacapanepaenexa vajaneconivecua.

²⁶ Bajarapacuenia Cristo exana caenē Cristo pijajivitsi vajanacaexanaenexa. Nexata baja Cristo vajanacaajamatabēcuene xuirajibiaexanaejava, najamatabēcueneitajētatsi vajanacabautisabijavata. Vajajumecovēnētavanapaexae Dioso pejumelivaisi, nacaajamatabēcuene xuirajibiaexanapona. ²⁷ Bajarapacuenia Cristo exana daxita Dioso vajajumecovēnētsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaaneconijibivi, Dioso vajanacajamatabēcuenexaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabēasiva, bajarapacuenia biasiva pijavajivi. Nexata ponē asiva pijava, bajaraponē asiva pijava pacuenia pijacuata naperabēasiva. ²⁹ Itsajivi ata apo naperabēitoya. Biji rajane xaniavaetsia naperabēeveta. Bajara pijinia pacuenia Cristo ata nacaeveta daxita Dioso vajajumecovēnētsivi. ³⁰ Tsipaji vaxaitsi Cristo pijajivitsi, ayaibitsaēto atatsi, becaejivitsi Dioso nacatane. ³¹ Nexata nayapētane pexaniajaicuene mapacuenije. Pebi petiriva itsa pita pijavanexa, naexanabeje becaejivi peperabētocuenia. Tsipaji Dioso pejumelivaisibaxutota jumaitsi mapacueniaje:

“Pebi itsa nacojioba, paxavecua, pena atavecua, havecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. ³² Mapalivaisije bitso ayapēbeje vajajumeyapētaenexa. Itsiata baitsi jane comparacióncuenia nacayapētaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenē Cristo peperabētotsi. ³³ Bajarapalivaisi comparacióncuenia pacayapētaeyaexana nexata paxamē, pacanenēmē canacujitsia, paneasivanexa panijavajivi. Nexata panijavajivi

pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6

¹ Paxamë papeximë, Dioso panejumecovënëtsivixae, pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tshipaji bajarapacuenia Dioso pacatocopata panejumecovënëtabiabinexa panijamonae. ²⁻³ Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

⁴ Paxamë panexi panexainaevi, anaeyacuenia pëtsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovënëtabiabinexa paneitorobijava. Pacujarubarenua Dioso pejumelivaisi pejumecovënëtsinexa.

⁵ Paxamë pijinia itsamonae papijajivimë, dajubicuenia papeca-canajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaëyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovetsina.

⁷ Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara.

⁸ Payapëtaneme rabaja mapacueje. Pajivi pexaniacuene toexana itsamonae ata, bajarapajivi matamotsianatsi Dioso. Pamonaë ata dajubicuenia canajetatsi itsamonae amoneya petonacuenebabiabinexa, bajarapamonae ata Dioso matamotsianatsi pexaniacuene itsa toexana itsamonae ata. Pamonaë ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

⁹ Paxamë pijinia papijatuxanevimë, pacamuxujiobatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabiabinexa.

Pacanaējēre pacuenia paxamē ata panijatuxanenē Dioso eca athēbētata. Pamonae ata apo pecanaia. Bajaraponējavabelia pananeconitsipame. Bajaraponē panijajivi ata pijatuxanenē baja cajena. Bajaraponē saya najēpaeya nacatane daxitatsi. Nexata paneconivajēto xainatsi caejivitsi canacujitsia, bajarapaneconivajētota nacananeconitsiaexanaponaena. Bajaraxuata panijajivi ata itorobajē xaniavaetsia papecatonacuenebabiabinexa.

Pacuenia Dioso pejumecovēnētsivi itorobatsi penayajivitaenexa dovathi yabara pelivaisi

¹⁰ Tajamonaē, icatsia cotocaevi patacatoyaquinaelivaisita, pacajumaitsitsi mapacueniaje. Pajamatabēcuenesaēmēre tsavanapae vajatuxanenē pesaē paneyajavajinavanapaexae. ¹¹ Vajabitsaēnē banayajivinaxatata piatajajava pijavajabitsaēnē pejorojoronaeyanivatsi. Bajara pijinia pacuenia paxamē ata panayajivinajamatabēcuenexatare Dioso pejumelivaisita. Nexata bajarapacuenia pajamatabēcuenesaēmē tsane dovathi papecajamatabēcuenē yamaxēitojorobianiva.

¹² Tsipaji Dioso vajanacatojitsipaecuenia itsa exanavanapatsi, nexata dovathi jamatabēnacaitsacueniaba. Nexata bēpēnēa vajamatabēcuenesaēta asaēyata vajabitsaē bexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaētoxaneto. Dovathi pijajivi xaina penamatacaitorobivitsi, bitso piagamatabēcuenesaēvi. Nexata dovathi pijajivi jinavanapa athēbētatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bēpēnēa vajamatabēcuenesaēta, asaēyata vajabitsaē bexanatsi dovathi pijajivijavabelia. ¹³ Nexata paxamē dovathi papecajamatabēcuenē yamaxēitojorobianiva, panayajivinajamatabēcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabēcueneta papecajamatabēcuenējētsinexa, itsiata pajamatabēcuenesaēmē tsane bajarapalivaisita. Nexata pibisiacuene apo paexanaemē tsane.

¹⁴ Vajabitsaēnē itsa nayajivinaxatata piatajajava, caecovēta banuca. Nexata pijavajabitsaē apo tixitsitsi pecovēvecua. Bajara pijinia pacuenia paxamē ata pajamatabēcuenesaēmēre Dioso pejumelivaisita dovathi papecajopaeyaexanaeyaniva Dioso pejumelivaisi panejumecovēnētsijavavecua. Vajabitsaēnē piatajajava itsa nayajivinaxatata, bayanaepacēta penaepacētsijavata pesarabianivatsi penayajivinaxatatsijava. Bajara pijinia pacuenia paxamē ata Dioso pejumelivaisita, pexaniajailivaisita, panayajivinajamatabēcuenexatare. Vajabitsaēnē piatajajava banamēpabēxatata pijavajabitsaēnē pejorojoronaeyanivatsi. Bajara pijinia pacuenia paxamē ata Dioso pejumelivaisita panayajivinajamatabēcuenexatare. Pajamatabēnajanavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabēcuenē yamaxēitojorobianiva. ¹⁵ Vajabitsaēnē najamatabēcueneveretsiaya pexaniazapato banataxuxatata pijavajabitsaējavabelia jamatejema peponaenexa. Bajara pijinia pacuenia paxamē ata panajamatabēcueneverere, jamatejema pexanialivaisi jivi panetsipaebavanapaenexa. Daxita baja pamonae jumecovēnēta bajarapalivaisi, Dioso baja barajamatabēcuenexanepanaeya tanetsi.

¹⁶ Panajamatabēcuenecopare Diosojavabelia papecayavenonabiabinexa.

Vajabitsaënë banayajivicaona escudovënëjava, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. ¹⁷ Vajabitsaënë banamataxatata piatajajava, cascovënëjava, pematathinaxuabiyanivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicaona espada. Bajara pijinia pacuenia paxamë ata panayajivicaonare Dioso pejumelivaisi, palivaisi baja pacayapëtaeyaexana Espiritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espiritu Santo pacaitoroba, daxitamatacabì canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobiyaniava. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenua daxita Dioso pejumecovënëtsivi. ¹⁹ Xanë ata panetovajëtabiabarenua Dioso taneyapëtaeyaexanaenexa paepatota bajarapalivaisi tsipaebajë itsamonaëjavabelia. Panetovajëtabiabarenua ajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaëjavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoy-aquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinxaxa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane. ²³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejnavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. ²⁴ Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablonë, Timoteobeje, Jesucristo papijajivitonënëbeje. Pacatoy-aquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtabiabatsi jamatabëcuenebarëyaya. ⁵ Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Pat-sipaebabiabamenua Jesucristo pelivaisi itsamonaejavabelia. ⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatocabitsicajavabelianexa. ⁷ Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaevetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepelivaisinexatsi Diosojavabelia,” janë nacuaevetsivijavabelia. ⁸ Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacasivanexa. ⁹ Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. ¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia paca-caëjëpaena xaniavaetsia panejinavanapaenexa aneconijibia. Matapania Jesucristo icatsia pepatsimatocabitsicajavabelianexa, bajarapacuenia panaevetavanapaename. ¹¹ Nexata ëpexaniajamatabëcuene paxainae-name panejamatabëëthëtojavavetsina Jesucristo papijajivixaemë. Nexata

itsamonaē paxamē yabara jamatabējumaitsi tsane Diosojavabelia: “Diosomē, ayaijamatabēcuenenēmē bitso. Pexaniacue ne bitso toexaname Filipos tomarapijivi ēpexaniajamatabēcue ne pexainaenexa pejamatabēēthētota,” jamatabējai tsane itsamonaē Diosojavabelia paxamē xaniavaetsia panetsitajinavanapaexae.

Pacuenia Pablo jumecovēnētaponapona Cristo yabara pelivaisi

¹² Tajamonaē, payapētaneme rabaja pajamatabēcue ne yabara naneconitsia ponaponajē penaneconitsivi pejebabiabibota. Jitsipajē paneyapētaenexa mapacueneje. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanē neetsi ata penaneconitsivi pejebabiabibota, itsiata apo yacaranatsicapanepe pexanialivaisi, Jesucristo pelivaisi, peyacaējēpaponaenexa daxitanacuanējava. Nexata baja aeconoxae bajarapalivaisi pevajēnaeyabelia yacaējēpapona daxitanacuanējava daxitajivi Diosojavabelia pecapanepaenexatsi. ¹³ Nacuaevetsinē pijabopijivi, vajabitsaē, daxita itsamonaē ata, neyapētane majota naneconitsia taponaponaejava Jesucristo pijajivitonēxaenē. ¹⁴ Mapatomarataje ayaibitsaēttoxaneto Dioso pejumecovēnētsivi, itsa nevēnētane tananeconitsiaponaponaejava, najamatabēcuenesaētavanapa. Diosojavabelia asaēyata najamatabēcuenecopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

¹⁵ Pamonaē ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvēnēvi, panecuenecaēba. Nexata itsamonaejavabelia asaēya tsipaebapona Cristo pelivaisi. Bajarapamonaē xanē yabara jamatabējumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponē tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa,” jamatabējai bajarapamonaē. Itsiata itsamonaē, bajarapamonaeyajuvēnēvi, taneyavenonaenexa, itsamonaejavabelia tsipaebapona Cristo pelivaisi bajarapamonaē ata xaniavaetsia pejumecovēnētsinexa. ¹⁶⁻¹⁷ Itsamonaē tsipaebapona Cristo pelivaisi pejumetaevitsi saya peyayataenexatsi, pepēnaponaenexatsinua. Bajarapamonaē pejamatabēēthētovetsina apo jumecovēnētsi ata Cristo, saya jema Cristo pelivaisi tsipaebapona. Jamatabējumaitsi: “Vecae Pablo naneconitsiaponaponaē penaneconitsivi pejebabiabibota, pecovēta itsajamatabēcue ne xainaeyaexanaenatsi Cristo pelivaisi pejumecovēnētsivi. Bajarapacuenia Pablo jamatabēcuenebējaiyaexanaenatsi,” jamatabējai bajarapamonaē xanē yabara. Itsiata itsamonaē xaniavaetsia tsipaebapona Cristo pelivaisi pejumecovēnētsixae Cristo. Bajarapamonaē yapētane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitsi javanexa nacuaevetsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajai javanexa nacuaevetsivijavabelia, bajarapamonaē yapētane. ¹⁸ Majotaje nenaneconitsiaexanaē ata, apo natsinajamatabēxainaenē. Itsamonaē pejamatabēēthētovetsina Cristo pelivaisi pejumecovēnētsixae, tsipaebapona jivi pejumecovēnētsinexa bajarapalivaisi. Itsamonaē pijinia pejamatabēēthētovetsina apo jumecovēnētsi ata, itsiata Cristo pelivaisi tsipaebapona jivi pejumecovēnētsinexa bajarapalivaisi.

Bjaraxuata bjarapamonae ata jivi petsipaebaponaejava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponae tsane.

¹⁹ Tsipaji yapëtaniji pacuenia panetovajëtaponame Diosojavabelia. Espiritu Santo, ponë Jesucristo itorobica, bjaraponë neyavenonapona.

Bjaraxuata yapëtaniji daxita pacuenia netoxanepanaejitsia.

Nexata baja pitsapaenajë tananeconitsia ponaponaejavavecu. ²⁰ Bitso jitsipajë ëpexaniacuene taexanaenexa. Apo jitsipaenë taexanaenexa itsacuenejavayo ata, xua yabara auranë tsipae.

Cristo tajumecovënëtsijavaveliacujinae, aeconoxae ata, ajunavijibia jitsipajë taexanaenexa Cristo pejitsipaecuenia daxitamatacabijavabelianexa. Bjarapacuenia jitsipajë taexanaponaeenexa ëbjaraponënexa. Bjaraponë tanetojitsipaecuenia abaxë taasaëtsaponaponaeepato mapanacuataje, tatëpaeepatotanexa ata, jitsipajë taexanaenexa xua pejamatabëcueneta daxitajivi yayataejitsia Cristo.

²¹ Tasaëtsaponaponaeepato abaxë mapanacuataje, Cristo pejitsipaecuenia toexanaponaponajë. Itsa pamatacabi tēpaenajë, netoxanepanaejitsia mapanacuata tasaëtsaponaponaejava matatoxenetsia. Tsipaji Cristo yajavaponaponaenajë athëbëtsia.

²² Tasaëtsaponaponaeepato abaxë mapanacuataje, necaëjēpa tatoexanaponaponaenexa Cristo tanetojitsipaecuenia. Itsiata apo yapëtaenë xua pepacuenie jitsipajë.

²³ Itsajavata bitso jitsipabiabajë tatëpaejava taponaponaenexa Cristo pijanacuayabetsia. Bjaraxua bitso netoxanepanaejitsipa.

²⁴ Itsiata paxamë panenamatavenoname abaxë taponaponaenexa mapanacuata, patacayavenonaponaponaenexa.

²⁵ Yapëtaniji baja cajena abaxë taponaponaejava paxamënexa. Ponaponaenajë abaxë patacayavenonaenexa, paneajamatabëcuenesaënexa panevajënaeyabelia, panejamatabëcuenebarëyanexanua panejumecovënëtsixae Cristo pelivaisi papecacapanepaenexa panijaneconivecu.

²⁶ Nexata pamatacabi Jesucristo neyavenonaena penaneconitsivi pejebabiabibovecu tapitsapaenexa, ponaponaenajë icatsia paxamëjavata. Nexata jamatabëcuenebarëyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecu.

²⁷ Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavënëlivaisitaeponaejava najamatabëcuenejēpaeya panecasaëtsavanapaejava Cristo pelivaisi panejumecovënëtavanapaejava. Jitsipajë patacavënëlivaisitaejava asaëyata najamatabëjēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi.

²⁸ Pëtsa pacujunavame pamonae pacaitoya. Dioso papecayavenonaexae, itsa apo pacujunavimë tsane itsamonae pacabejiobiaexanae ata, nexata bjarapamonae jamatabëjumaitsi tsane:

“Pexaniajailivaisi cajena bjarapamonae tsipaebapona. Tsipaji Dioso yavenonatsi. Nexata vaxaitsi bjarapamonae vajabejiobiaexanaexae, Dioso nacaverebiabiana,” jamatabëjai tsane. Yapëtaenanua paxamë papecacapanepaejavanexa Dioso.

²⁹ Cristo pejamatabëcueneta pacatocopata bjaraponë panejumecovënëtsinexa. Itsiata baitsi jane apo pacatocopatsi ëbjaraponë panejumecovënëtsinexa. Pacatoyajavacopatanaa baja cajena itsamonae

papocabejiobiaexanaenexa bajaraponë papijajivixaemë. ³⁰ Pacuenia Cristo pijajivitonëxaenë itsamonae nebejiobiaexanapona, bajara pijinia pacuenia paxamë ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxë tsiteca nebejiobiaexanapona pacuenia baja panevënëlivaisitaneme.

2

Pacuenia Dioso pejumecovënëtsivi itavetatsi beayaijamatabëcuenevi penataeyaniva yabara pelivaisi

¹ Payapëtaneme rabaja mapacuenije. Jesucristo paneyajavajinavanapaexae, panajamatabëcuenesaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcuenebabata. Payapëtaneme rabaja Espíritu Santo papecat-sijamatabëcaejava papecajavaponaponaenexa. Payapëtaneme rabaja Jesucristo papecaitaxutotsonia taeyabiabijava. ² Bajaraxuata nexata pacaitorobatsi mapacuenia panejinavanapaxenaxaje patacasivabarëyanexa. Najamatabëcuenejëpaeya pajinavanapare. Najamatabëcuenejëpaeya namataenetsia panaasivamëre tsavanapae. Xua paexanaejitsiamë Dioso pejamatabëcueneta, najamatabëcuenejëpaeya paexanavanapare. ³ Pëtsa panatoexaname itsacuenejavayo ata, xua ëpaxamënexa pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacuenejavayo ata saya bepaayaijamatabëcuenevimë papecataenexa itsamonae. Biji rajane beveliajamatabëcuenevi panataeyabiabianame. Itsamonae paxamëvecua ayaijamatabëcuenevi pataeyabiabianame. ⁴ Pëtsa panajamatabëxainabiabame ëpaxamë panenatojitsipaecuene. Biji rajane payajavanajamatabëxainabiabianame itsamonae ata penatojitsipaecuene.

⁵ Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. ⁶ Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yaiyatanetsi,” apo jamatabëjai. ⁷ Bajaraponë picani ayaijamatabëcuenenë. Paxa Dioso yajavaponapona athëbëtatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso beprijajivitonë naexana, pacuenia Dioso itorobatsi pexanaenexa. ⁸ Bejivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinoxatsi, bajara pijinia pacuenia Jesucristo ata nacopata cruzajavabelia pecobematabiabarutsinexatsi. ⁹ Bajaraxuata Dioso mëthëvetsina matacotatsi. Caponatsi athëbëabetsia peecaenexa paxa Diosojavatatsia, pebarëevetsinexatsi daxitacuene. ¹⁰ Nexata bajaraponë itsa vënëlivaisitaenatsi, pematatabacabëta yayiyataeya tonubenaenatsi daxitajivi. Athëbëtatsia pejinavanapae, mapanacuapijivi ata, petëpaevimi ata, pematatabacabëta yayiyataeya tonubenaenatsi. ¹¹ Nexata daxitajivi

jumai tsane Jesucristo yabara: “Jesucristo rabaja cajena pepo petuxanenē,” jai tsane. Nexata daxitajivi yapētaena pacuenia paxa Dioso bitso ayaijamatabēcuenenē.

Pacuenia Dioso pejumecovēnētsivi pexaniajailivaisi pejumecovēnētavanapaexae, bepecotia mapanacuataje yabara pelivaisi

¹² Tajamonae bitso patacaasivavi, pacuenia panejumecovēnētame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovēnētavanapare, aeconoxae xanē tajē pacavecuaponaponae atatsi. Pacaejivimē canacujitsia cjunaviaya Dioso pajumecovēnēre. Nexata ēpexaniacuene paexanavanapaename. Tsipaji Dioso papecacapanepaevinexa. ¹³ Dioso rabaja pacajamatabēcuenyavenona panejamatabēēthētovetsina jitsipaeya paneexanaenexa, pacuenia Dioso pacatojitsipa. Dioso pacajamatabēcuene caējēpaeyaexanua paneexanaenexa bajarapacuenie.

¹⁴ Daxitacuene paexanavanapare pajamatabēcuenenatsipaebinejevamē. Pētsa anaeya namataenetsia najumenotsia panabijatanemenua. ¹⁵ Bajarapacuenia itsa pajinavanapaename, nexata daxita paxamē aneconijibia jivi patsitajinavanapaename Dioso papexixaemē. Nexata mapanacuapijivi pibisiacuene pexanaevi tuatujēta pajinavanapae atamē tsane, itsajivi ata acuenebi tsane pibisiacuenia papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamē ata paitsimē tsane. Bepapecotiamē tsane pexaniajailivaisi panejumecovēnētavanapaexae bajarapamonaejavata. ¹⁶ Bepapecotiamē tsane xaniavaetsia itsa patsitajumecovēnētavanapaename bajarapacuenia itsa patsitajumecovēnētavanapaename, pacasivabarēyatsi tsane pamatacabi icatsia Cristo patsianica. Bajarapacuenia pacasivabarēyatsi tsane tsipaji baja yapētaenajē apo tanacueratsijava asaēya tanacuenebijava paxamējavata. ¹⁷ Dioso pacasivabarēya panenajamatabēcuenerajutsixae Diosojavabelia panetojinavanapaenexa bajaraponē papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanē itsiata nasivajamatabēcuenebarēyanē tsipae. Tsipaji Cristo pelivaisi bajarapacuenia patacatsipaebinxae, Dioso netocopata. Nexata daxita paxamē pacayajavajamatabēcuenebarēyatsi tsane. ¹⁸ Bajarapacuenia paxamē ata pajamatabēcuenebarēyamēre tsavanapae. Paneyajavabarēyamērenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenē Jesús jitsipa, naxanitsiayo jamatabēitorobajē Timoteo papecataenexalia. Pepatsicujinaerena, itsa pacavēnēlivaitsaenatsi pacuenia pajinavanapame, nejamatabēcuenebarēyaya exanaejitsia. ²⁰ Bajaraponē caenē nejamatabēcuenejēpa. Bajaraponē bitso pacasivanajamatabēxaina xaniavaetsia panejinavanapaenexa. ²¹ Daxita itsamonae bitso najamatabēxaina ēpenatojitsipaecuenia pexanaenexa. Apo sivanajamatabēxainae Jesucristo petonacuenebinxae. ²² Paxamē baja payapētaneme pacuenia Timoteo pacatsitaponapona pexaniajamatabēcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabēitorobajē

Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaejava yabara, nexata bajaraxuacujinae pacatoitorobialiaitsi Timoteo papecataenexalia. ²⁴ Xanë jamatabëjumaitsinë paxamë yabara: “Itsa Dioso netojitsipaena xanë ata taponae nexa bajarabelia, nexata neyavenonaena bepijia taponae nexa tataenexalia Filipos tomarapijivi,” jamatabëjanë paxamë yabara.

²⁵ Panetoitorobaremena rabaja vajabananë Epafrodito pataneyavenonaenamë bajarapacuenia tanamatavenonaeepeatota. Nexata Jesucristo patonajuanacuenebajëbeje. Asaëyata panajuanacueneXanë jamatabëjumaitsinë paxamë yabara: “Itsa Diosoebajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoorobinexalia. ²⁶ Majotaje Epafrodito piavitaneucujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlivaisitaejava pebitsojava piavitaneucujinae. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. ²⁸ Bajaraxuata bitso jitsipajë bajaraponë patacatoorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaejanë. ²⁹ Pacopiapitsianame bajaraponë bitso jamatabëcuenebarëyaya Dioso pejamatabëcueneta vajabananëxae. Pamonaë jamatabëcueneitsi pacuenia bajaraponë jamatabëcueneitsi, payaiyataeneme. ³⁰ Paxamë apo papatsi atamërena maberena je pataneyavenonaenamë, itsiata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

3

Pacuenia jivi Dioso pejitsipaecuenia betojinavanapa yabara pelivaisi

¹ Tajamonaë, palivaisi capanepaëya pacatoyaquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueranaetsi patacatoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. ² Panayajivitaema piagamatabëcuenebejevi, pamonaë beaviri pianaejanaevi. Tsipaji raja bajarapamonaë apo aura pexanaejava yabara. Bajarapamonaë jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judiovicuenia Dioso pepacuene papecapanepaenexa panijaneconivecua,” jai tsabiabi. ³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsipaji vajamatabëëthëtojavavetsina najamatabëcuenecopatatsi Diosojavabelia vajanacapanepaenexa. Jamatabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vaxaxanaejava pejamatabëcueneta.

4 Itsajivi itsa caējēpaejitsipatsi pijacuata penacapanepaenexa Diosojavabelia judiōnēxae, Dioso petonacuenebijava yabara ata, nexata xanē ata necaējēpaejitsipa tajacuata tanacapanepaenexa. 5 Xanē picani mataitsinēje. Itsa baja xainajē ocho pamatacabibeje tanaexanaecujinae, tajasalinaivicuenia neperabēcaucuta. Baitsi neboupiperabēcaucuta. Xanē raja tajasalinainēmi Israelpijinē. Benjamínpijinē pemomoxiyajuvēnēnē. Taxa judiōnē. Taena ata judiōva. Xanē picani fariseonēnē. Pacuenia fariseovi bitso jumecovēnēta Dioso Moiséspijinēta penajumecopatsilivaisi, bajara pijinia pacuenia xanē ata itsinē. 6 Daxita tajamatabēcuenesaēta caasaēnē tajumecovēnētsijava Dioso Moiséspijinēta penajumecopatsilivaisi. Jamatabēcuenenavēxaniabajē tsaena bitso. Jesús pelivaisi pejumecovēnētsivi yabara, jumaitsinē tsabiabi: “Dioso Moiséspijinēta penajumecopatsilivaisivecua saicayalivaisi jumecovēnēta. Nexata bajarapamonae bebyejebatsi,” janē tsabiabi. Nexata Jesús pijajivi bejiobiaexanabajē. Dioso Moiséspijinēta penajumecopatsilivaisi, bitso xaniavaetsia jumecovēnētaapononajē. Nexata itsajivi ata acuenebi pejumaitisijava xanē yabara: “Pablo xaniavaetsia apo jumecovēnētsi Dioso Moiséspijinēta penajumecopatsilivaisi,” pejaijava. 7 Daxita bajarapalivaisi yabara xanē picani sivabarēyanē. “Itsa jumecovēnētsianajē bitso, netonamatamotsiana Diosojavabelia,” jamatabējanē picani. Itsiata aeconoxae yapētaniji daxita bajarapalivaisi piamatamobilivaisicuene. Tsipaji baja najamatabēcuenecopatajē Cristojavabelia tanevecuaajibiaexanaenexa tajaneconi. 8 Aeconoxae baja yapētaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapētaenexa xaniavaetsia tajatuxanē Jesucristo. Jesucristo taneyajavaponaponaexae, nexata piamatamobilivaisi tajumecovēnētsijavami, copatajē baja. 9 Dioso aneonijibia apo netae tajumecovēnētsixae Dioso Moiséspijinēta penajumecopatsilivaisi. Aeconoxae baja Dioso aneonijibia netane tsipaji najamatabēcuenecopatajē Jesucristojavabelia tanevecuaajibiaexanaenexa tajaneconi. 10 Tavajēnaeyabelia bitso jitsipajē dexitacuenevecua tayapētaenexa pacuenia Cristo jamatabēcueneitsi. Pasaēta Dioso matacotatsi Cristo petēpaejavavecua, bajarapaasaē jitsipajē tayajavaponaponaenexa. Cristo pijajivitonēxaenē, jitsipajē xanē ata tanebejiobiaexanaenexa, tatēpaenexa ata. 11 Tsipaji xanē ata copiaevetapononajē Dioso tanematacotsinexa tatēpaejavavecua.

Pacuenia Pablo najamatabēcuenesaēta xaniavaetsia Cristo peyajavaponaponaenexa, pepatsinexa Dioso pijanacuayabetsia, yabara pelivaisi

12 Xanē apo jamatabējumaitsinē: “Daxita baja Dioso pejitsipaecuenia toexanajē. Nejamatabēcuenecaējēpa baja tajumecovēnētsinexa pacuenia Dioso netojitsipa taexanaenexa,” apo jamatabējanē. Itsiata tavajēnaeyabelia tanejamatabēcuenē caējēpaponaponaenexa, caasaēnē tsaponaponaē taexanaejava pacuenia Dioso netojitsipa. Jitsipajē bitso tajamatabēcuenexanepanaejava tavajēnaeyabelia pacuenia Dioso netojitsipa. Tsipaji bajarapacuenē yabara Jesucristo nesivatēpa. 13 Tajamonae, apo jamatabējumaitsinē: “Xanē rabaja nejamatabēcuenecaējēpa Dioso tajumecovēnētsinexa pacuenia Dioso netojitsipa taexanaenexa,” apo jamatabējanē. Jume baja cajena.

Mapacuenia najamatabëxainajëje. “Daxita xua exanajë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoaponaponaenexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijavabeliatsi, bajara pijinia pacuenia xanë ata najamatabëcuenesaëtajë xaniavaetsia tatoaponaponaenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaponajë. ¹⁴ Pacuenia pecujinaejinaenë nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoaponaponaenexa Dioso tanerajutsinexa athëbëtatsia taxainaejavanexa tayajavaponaponaexae Jesucristo.

¹⁵ Daxita pamonaë xaniavaetsia jumecovënëtavanapa Dioso, bajaramonaë ata benajamatabëcuenesaëtanapa xaniavaetsia petojinavana-paenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeayaexanaena saicaya abaxë itsajamatabëcuene panexainaejava. ¹⁶ Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Becaasaë tsavanapaetsinua vajavajënaeyabelia orijibia vajajumeyapëtaeponaenexa.

¹⁷ Tajamonae, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonae ata panaitaxutocaevetsianame paxamë ata xaniavaetsia panejinavanapaenexa pacuenia bajarapamonae jinavanapa.

¹⁸ Ayaibitsaëtoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonae yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebianatsi. ¹⁹ Mapanacuajë pecopiarucae-matacabita, bajarapamonae Dioso verebiabianatsi. Tsipaji bitso jitsipa pijacuata penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumaitsi tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonae. Ëmapanacuapijicuene saya sivanajamatabëxainabiaba. ²⁰ Vaxaitsi baja cajena jinavanapaenatsi Dioso pijanacuatatsia. Bajaraxuata copiaevetavanapatsi vajatuxanenë Jesucristo pepatsijavatsica vajanacapanepaenexa Dioso pijanacuayabetsia. ²¹ Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëitothianaena.

4

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

¹ Tajamonae bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia pajumecovënëtavanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejavamë panejumecovënëtsijava Jesús pelivaisi.

² Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia

pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaabeje.

³ Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa

bजारपपेतirivabeje, penabarajamatabëcuenexanepanaenexabeje namataenetsia icatsia penajumeanaenotsiyanivabeje. Bजारपovabeje

bitso neyavenonabeje tatsipaebijava itsamonaejavabelia pexania-jailivaisi pecapanepaelivaisinexatsi Diosojavabelia. Bजारपacuenia

Clemente ata neyavenona. Itsamonae ata patanajuanacuenebivi, bजारपacuenia neyavenona. Daxita baja bजारपamonae vënërubena

Dioso pijabaxutota, itsa pabaxutota vënëyaquinarubatsi pamonae pexainaevinexa matababi apo pevereverecejava.

⁴ Jesús pelivaisi panejumecovënëtsivixae, pajamatabëcuenebarëyamëre daxitamatabacijavabelianexa. Icatsia pematatsënëa pacajumaitsitsi.

¡Pajamatabëcuenebarëyamëre tsavanapae! ⁵ Jamatabëcuenexanepanaeya xaniavaetsia pajinavanapaename daxitajivi papecaja-

matabëcueneypëtaenexa. Tsipaji rabaja vajatuxanenë imoxoyo pevajënae pepatsinexatsica.

⁶ Pëtsa pajamatabëcuenebëjamë itsacuenejavayo ata yabara. Biji rajane pavajëre Diosojavabelia daxitacuenejavanë yabara. Pexania-

ajamatabëcuenenua parajutabiabare Dioso papecayavenonaejavanë yabara. ⁷ Nexata Dioso pacajamatabëjemayaexanaena paneja-

matabëcuenebëjaiyaniva. Pexaniacuene bitso bजारपajamatabëcuene. Dioso itsa nacajamatejemayaexana vajajamatabëcuenebëjaiyaniva,

itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena

panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëttavanapame, daxitacuene yabara

panenajamatabëxainaejava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panaja-

matabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanapaenexa. Panaja-

matabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijajitsia

pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsitapon-aponatsinua, bजारपacuenia paexanavanapare. Nexata Dioso,

ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

Pacuenia Filipos tomarapijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi

apo panetoitorobi atamē ofrenda, itsiata paxamē yabara apo jamatabējumaitsinē: “Apo jitsipae raeta icatsia taneyavenonaenexa bajarapamonaē,” apo jamatabējanē. Jume cajena. Yapētaniji pacuenia picani jamatabēpanetoitorobi atamē ofrenda pataneyavenonaenexamē, itsiata apo pacacuenecaējēpae patanetoitorobinexamē.¹¹ Apo pacatoyaquinaetsi mapacueniaje ofrenda patanetoitorobivajēnaeyamē bitso tanamatavenonaexae itsacueneyavayo. Dioso tanejamatejemayaexanaexae tajamatabēcuenebējaiyaniva daxitacuene yabara, siva-jamatabēcuenebarēyanē saya xuayovajēto xainajē.¹² Yapētaniji pacuenia ponaponajē, pamatacabi tsiquirijavayo xinae atanē. Yapētanijinua pacuenia ponaponajē pamatacabi ayaijava xainajē. Yapētanijinua pacuenia jamatabēcuenebarēyanējitsia daxitamatacabijavabelianexa. Nexata itsa xainajē daxita tanamatavenonaejavaxi, barēyanē. Apo xinae atanē itsacueneyavayo ata, itsiata barēyanē tsabiabi.¹³ Nejamatabēcuenecaējēpa tanajamatabēcuenesaētsinexa daxitacuene yabara. Tsipaji Cristo pesaēta nejamatabēcuenecaējēpaeyaexana.¹⁴ Itsiata baitsi jane paxamē pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵ Payapētaneme rabaja mapacuenije. Pamatacabi copiaya tsipae-banajetarucajē jivi pecapanepaelivaisinexatsi Macedonia nacujava, paxamē paFilipos tomarapijivimē panijanacuavecua itsa ponajē, paxamē panerajutame ofrenda pataneyavenonaenexamē. Itsatomarapijivi, Dioso pejumecovēnētsivi ata, apo nerajutsi ofrenda bajarapacuenia taneyavenonaenexa. Epaxamē itsiata paneyavenoname.¹⁶ Nexata bajaraxuacujinae, itsa abaxē ponaponajē Tesalónica tomarata, panetoitorobabiabame icatsia ofrenda anijatonē tanamatavenonabiabijavata.¹⁷ Sivabarēyanē tsabiabi itsa panetoitorobabiabame bajarapacuenia. Itsiata apo sivabarēyanē tsabiabi tanetoxanepanaexae bajarapacuenia pataneyavenonaejavamē. Jume baja cajena. Biji rajane sivabarēyanē tsabiabi bajarapacuenia pataneyavenonaejavamē. Tsipaji juya paxainaejitsiamē Diosojavabelia papecarajutsijavanexa athēbētatsia.¹⁸ Nexata pitajē daxita patanetoitorobijavamē Epafroditota. Xainajē baja nexata bitso ayaijava, tanamatavenonaejava mata-toxenetsia. Xua panetoitorobame ofrendacuenia, tsitapexaniacuenetsi Dioso. Bajaraxua Dioso sivajamatabēcuenebarēya.¹⁹ TajaDioso bitso pexainaenē. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabēcuenecopatsixae.²⁰ ¡Vaxa Dioso ayaijamatabēcuenenē daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovēnētsivi pebajacobinexatsi yabara pelivaisi

²¹ Nebajacobiana paxamējavata daxita Jesús pelivaisi pejumecovēnētsivi, pamonaē Dioso pijajivi. Dioso pijajivi, pamonaē xanējavata jinavanapa, pacabajacobalia.²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinē pijabota penacuenebivi ata bitso pacabajacobalia.

²³ Pacatovajētabiabatsi Diosojavabelia, vajatuxanenē Jesucristo papacayavenonabiabinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Colosas tomarapijivijavabelia, yabara pelivaisi

¹⁻² Xanë Pablonë, Dioso tanetojitsipaexae, nitapeta Jesucristo pi-jaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavana-paevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi

³ Paxanëbeje Timoteobeje pacatovajëtabiabatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutatsibeje. Tsipaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. ⁴ Bajarapacuenia pajumaitsinëbeje tsabiabi tsipaji pacavënëlivaisitanetsibeje xaniavaetsia panejumecovënëtavanapaejava Jesús pelivaisi. Pacavënëlivaisitanetsibejenua paneasivatsavanapaejava daxita Jesús pelivaisi pejumecovënëtsivi. ⁵ Bajara pajamatabëcueneitsimë tsipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacaëjëpaponä. Nexata daxitanacuanëjava, pamonaë jumecovënëtaþona bajarapalivaisi, copataþona baja perujamatabëcuenemi. Nexata baja pejanajamatabëcuene xainapona. Bajarapamonae pejanajamatabëcuene xainapona, pacuenia paxamë ata pejanajamatabëcuene paxainame pamatacabi ajena pajumecovënëtamë bajarapalivaisi. Bajara pamatacabijavaverenacujinae paxamë baja payapëtaeponame pepacuene Dioso papecaitaxutotsoniataejava. ⁷ Dioso papecaitaxutotsoniataejava, copiaya baja cajena vajaasivanë Epafra pacatsipaeba. Bajaraponë Jesucristo xaniavaetsia petonacuenëbinë. Nexata bajaraponë panetoitorobaremëna pataneyavenonaenexabeje Dioso patatonajuanacuenëbinexa majotaje. ⁸ Nexata pamatacabi Epafra pata paxanëbejevaberena, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonae ata.

⁹ Nexata patacavënëlivaisitaecujinaeþeje, pacatovajëtabiabatsi Diosojavabelia. Pacatovajëtabiabatsi xua Dioso pacatojitsipa

papecayapëtaeyaexanaenexa. Nexata Dioso itsa pacayapëtaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabatsi daxitacuene, Dioso pijacuene ata, Dioso papecayapëtaeyaexanaenexa. ¹⁰ Pacatovajëtabiabatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuene paneexanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneyapëtaeponaenexa. ¹¹ Pacatovajëtabiabatsinua Dioso papecajamatabëcuene asaëyaexanaenexa pesaëta. Nexata bajayajebi itsamonae pacaitsacueniababiabi ata, pacajamatabëcuenecaëjëpaena panejamatabëcuenesaë tsavanapaejava. ¹² Pacatovajëtabiabatsinua paxamë panejumaitsabiabinexa Diosojavabelia: “Xanepana rabaja. Tspiji bitso pexaniacuene panetoexaname,” panejaitsiabiabinexa Diosojavabelia. Bajarapacuenia pajumaitsimë tsabiabi tsane tspiji bajaraponë pacavecuaajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenaenacuatatsia. ¹³ Vaxaitsi bajayata apo yapëtaetsi pexaniajailivaisi. Nexata picani bepitaquirinacuata vajajinavanapaevi. Tspiji picani dovathi pijajivitsi tsavanapae. Pibisiacuene exanabiabatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexënato, piasivanë, pijajivitsi nacaexana. ¹⁴ Nacasivatëpa Cristo. Nexata baja Cristo pejamatabëcueneta Dioso nacavecuaajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuaajibiaexana pibisiacuene vajaexanaeconimi Cristo vajanacasivatëpaexae yabara pelivaisi

¹⁵ Dioso cajena caeto ata apo vajataenë. Itsiata Dioso pexënato, Cristo, naexana mapanacuataje. Cristo paxa jëpa. Dioso daxitacuene mapanacuata pexanaevajënaeya ata, Cristo baja cajena ponapona athëbëtatsia. ¹⁶ Cristo baja cajena exana daxitacuene Dioso pejamatabëcueneta. Athëbëtatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaxatsi. ¹⁷ Daxitacuene Cristo pexanaevajënaeya ata, Cristo baja cajena athëbëtatsia ponapona. Daxitacuene xua Cristo exana, bajaraxua pexanaecujinae abaxë Cristo pesaëta mapamat-acabita ataje tsitecanajetaruca. ¹⁸ Cristo baja cajena pevetsinë daxita Dioso pejumecovënëtsivi. Nexata daxita Dioso pejumecovënëtsivi Cristo penamatacaitorobinë. Cristo pejamatabëcueneta daxita Dioso pejumecovënëtsivi Dioso pijajivi exanatsi. Cristo taxuxuaba jivi petëpaecujinae icatsia jivi piasaëjavanexa. Bajaraxuata itsamonae ata icatsia asaë tsane petëpaecujinae. Nexata Cristo daxitajivi matatoxenetsia bitso ayaijamatabëcuenenë. ¹⁹ Bajarapacuenia Cristo bitso ayaijamatabëcuenenë tspiji Dioso pexënato tojitsipa pejamatabëcuenejëpaenexatsi. ²⁰ Daxitajivi, pamonaë jinavanapa mapanacuataje, naneconita Diosojavabelia. Pamonaë ata jinavanapa athëbëtatsia, naneconita Diosojavabelia. Nexata Dioso jitsipa daxita bajarapamonae pebarajamatabëcuenexanepanaenexa. Nexata Dioso itorobica Cristo mapanacuayabetsicaje cruzata pesivatëpaenexa daxita bajarapamonae. Nexata daxita bajarapamonae

Dioso aneconijibia tane Cristo pesivatēpaejamatabēcueneta. Bajaraxuata Dioso baja barajamatabēcuenexanepana bajarapamonae.

²¹ Paxamē picani abaxē bajayata Diosovecua naxuabiaya pajinavanapame. Dioso bepapijavajabitsaēmē tsavanapae pibisiacue neeexanavanapaexae. Itsiata baitsi jane aeconoxae baja Dioso pacabarajamatabēcuenexanepana. ²² Dioso baja aeconoxae pacabarajamatabēcuenexanepana. Tsipaji Jesucristo bepejiobicuena cruzata pacasivatēpa. Nexata baja Dioso pacavecuaajibiaexana pibisiacue paneexanaeneconimi. Bajaraxuata aeconoxae baja Dioso papijajivimē. Dioso baja pitabarata aneconijibia pajinavanapame. ²³ Nexata panevajēnaeyabelia aneconijibia Dioso pitabarata panejinavanapaenexa, asaēyata pajumecovēnētavanapare Cristo papecasivatēpaejava panijaneconi yabara. Palivaisi baja pajumecovēnētame papecacapanepaelivaisinexa, pētsa pacopatame panejumecovēnētsijava. Bajarapalivaisi baja yacaējēpa daxitanacuanējjava petsipaebaponaejava. Xanē ata, Pablonē, tsipaebaponajē bajarapalivaisi.

Pacuenia Pablo itorobatsi peyavenonaenexa Dioso pejumecovēnētsivi yabara pelivaisi

²⁴ Xanē Pablonē, majotaje penaneconitsivi pejebabiabibota, naneconitsiaponaponajē paxamē apo pajudíovimējjava Cristo pelivaisi patacatsipaebaponaexae. Itsiata jamatabēcuenebarēyanē tsaponaponae, nebejiobiaexanabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanē ata itsamonae nebejiobiaexanabiaba. Bajarapacuenia Dioso netocopata tanebejiobiaexanabiabinexa tavajēnaeyabelia tajamatabēcuenesaētsaponaenexa Dioso tajumecovēnētsijava. Nexata tanesivaajamatabēcuenesaēnexa daxita pamonaē jumecovēnēta Cristo pelivaisi. ²⁵ Dioso netocopata tayavenonaenexa Dioso pijajivi, pamonaē Cristo pelivaisi jumecovēnēta. Bajaraxuata paxamē ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. ²⁶ Dioso nitoroba jivi tatsipaebaponaenexa pacuenia Dioso tajēvelia najamatabēxaina pijajivi pecapanepaenexa. Dioso baja cajena nacua pexanaevajēnaeya ata, najamatabēxaina pacuenia exanaejitsia pijajivi pecapanepaenexa. Abaxē picani itsajivi ata Dioso apo yapētaeyaexanae bajarapacuenē. Itsiata baitsi jane aeconoxae baja Dioso tocopata daxita Dioso pejumecovēnētsivi peyapētaenexa pacuenia Dioso exana pijajivi pecapanepaenexa. ²⁷ Dioso tojitsipa apo judíovi ata peyapētaenexa pexanialivaisi, palivaisi picani itsajivijavabelia ata Dioso apo yapētaeyaexanae. Bajarapalivaisi mapacuenia itsije. Cristo cajena pacatsijamatabēeca papecayajavaponaponaenexa. Bajaraxuata nexata payapētaneme itsamatacabi Cristo paneyajavajinavanapaejavanexa Dioso pijapenivenivenaenacuatatsia.

²⁸ Paxanē patanecaējēpacuenia, daxitajivi xaniavaetsia patsipae-baponajē Cristo pelivaisi. Pamuxujiobaponajēnua xaniavaetsia daxita bajarapamonae pejumecovēnētsinexa Cristo pelivaisi. Bajarapacuenia pamuxujiobaponajē pevajēnaeyabelia piamatabēcuenesaētsaponaenexa Cristo pelivaisi pejumecovēnētsijava. ²⁹ Bajaraxuata asaēyata Dioso tonacuenebaponajē daxita pasaēta Cristo nerajutapona.

2

¹ Jitsipajë paneyapëtaenexa pacuena bitso pacasivanajamatabëxainatsi. Nexata asaëyata Diosojavabelia pacatovajëtabiabatsi. Laodicea tomarapijivi ata tovajëtabiabajë. Itsamonae ata, pamonaë abaxë apo netae, bajarapamonae ata tovajëtabiabajë. ² Asaëyata Diosojavabelia pacatovajëtabiabatsi papecajamatabëcuene asaëyaexanaenexa Cristo pelivaisi panejumecovënëtsijava. Pacatovajëtabiabatsinua najamatabëcuenejëpaeya panejinavanapaenexa namataenetsia panenasivaxae. Pacatovajëtabiabatsinua panejamatabëëthëtota ayailivaisi paneyapëtaeponaenexa xaniavaetsia itsa payapëtaneme Cristo. Bajarapacuenia pacatovajëtabiabatsi xaniavaetsia paneyapëtaenexa pexaniajailivaisi, palivaisi picani Dioso apo yapëtaeyaexanae itsajivijavabelia ata, baitsi jane baja Cristo pelivaisi. ³ Cristo pelivaisi xaniavaetsia itsa yapëtanetsi, nexata yapëtanetsi pacuena Cristo nacatojitsipa vajatonacuenebavanapaenexa. ⁴ Bajarapacuenia pacatsipaebatsi itsajivi ata papecayamaxëitorobianiva, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniva. ⁵ Apo pacayajavaponaponae atatsi, itsiata pacajamatabënajinabiabatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavanapaejava. Jamatabëcuenebarëyanënuu itsa pacavënëlivaisitanetsi panevajënaeyabelia panejamatabëcuenesaë tsavanapaejava panejumecovënëtsijava Cristo pelivaisi.

⁶ Bajaraxuata pacuena baja copiaya panajamatabëcueneocopatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcueneocopatavanapare. Panajamatabëcueneocoparenuu panevajënaeyabelia Cristo papecayavenonaponaenexa daxitacuene yabara. Nexata pajinavanapaname Cristo papecatojitsipacuena. ⁷ Paxamë xaniavaetsia panajamatabëcueneocopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtanapaname. Pajumaitsimënuu tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecayamaxëitorobinexa pamonaë tsipaebavanapa saicayalivaisi Dioso pejumelivaisivecua. Bajarapamonae apo tsipaebaponae Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayaijamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. ¹¹ Itsa panajamatabëcueneocopatame Cristojavabelia, nexata baja Dioso pacavecuajjibiaexana pibisiacuene paneexanaeconimi papecacapanepaenexa. Pibisiajamatabëcuene

ata baja pacavecuaajibiaexana. Nexata pacuenia judíovi pijacuenia perabêcaucubatsi, bajarapacuenia paxamê apo pacaperabêcaucubi pibisiacuene paneexanaeneconimi Dioso papecavecuaajibiaexanaenaena. Jume baja cajena. Biji rajane Cristo papecasivatêpaejava panejumecovênêtsixae, Dioso pacavecuaajibiaexana pibisiacuene paneexanaeneconimi. ¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamêthêtsivi itsa mêthêtsi petêpaeucujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaêvi petêpaeucujinae icatsia itsa asaê. Bajarapacuenia Dioso pacatane tsipaji Cristo yabara pajamatabêjumaitsimê mapacueniaje: “Xaniajai rabaja. Dioso pesaêta Cristo asaêyaexanatsi petêpaeucujinae,” pajamatabêjamê. ¹³ Paxamê picani abaxê bajayata bepanetêpaevi. Diosovecua naxuabiaya pajinavanapame pibisiacuene paneexanaenecononi yabara. Bajarapacuenia picani Diosovecua naxuabiaya pajinavanapame apo pajudíovixae. Itsiata baitsi jane aeconoxae baja Cristo payajavajinavanapame papecacapanepaenexa. Tsipaji baja Cristo pejamatabêcueneta Dioso pacavecuaajibiaexana pibisiacuene paneexanaeneconimi. ¹⁴ Bitso picani pibisiacuene exanavanapatsi. Tsipaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuaajibiaexana daxita bajarapaneconimi Cristo cruzata vajanacasivatêpaexae. ¹⁵ Bajarapacuenia Cristo cruzata vajanacasivatêpaexae, Cristo baja cueneamoneyaba dovathi. Tsipaji bajarapacuenia Cristo itsa nacasivatêpa cruzata, asaêjibiaexana dovathi, pijajivi yajava. Pacuene dovathi pijajivi barêevetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajêta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovênêtsivi pejamatabênjinavanapaenexa Cristo peecaejava athêbêtsia yabara pelivaisi

¹⁶ Cristo baja pecueneamoneyabixae dovathi, pêtasa panacopatame itsajivi ata papecajariitavetsinexa panexaejava, panematavêjêaapaejava ata. Itsamonae abaxê tsiteca jumecovênêtavanapa perujulivaisi, Dioso Moiséspijinêta penajumecopatsilivaisi. Nexata pacuenia itorobatsi bajarapalivaisita, fiestanê exanabiaba caevai canacujitsia. Itsafiestanê exanabiaba caejuameto canacujitsia, pejanajuameto itsa ecaica. Itsafiestanê exanabiaba penacueraevetsimatacabianê canacujitsia. Pêtasa pajumecovênêtame, itsajivi pacajunatsi ata panenaponaenexa bajarapafiestanêjavabelia. ¹⁷ Bajayata picani jivi ponabiaba bajarapafiestanêjavabelia. Tsipaji palivaisi bajayata Dioso Moiséspijinêta najumecopata, itorobatsi penaponabiabinexa bajarapafiestanêjavabelia. Itsiata baja Cristo itsa patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapaenatsi. ¹⁸ Pêtasa pajumecovênêtame itsamonae pacajumaitsi ata mapacueniaje: “Beveliajamatabêcuenevi panataema. Pavajêtabiabarena ángelevijavabelia Diosovecua panenaxuabiyaniva. Bemajitsinaebota baja cajena pataniji bajarapacuenia va-jaexanabiabinexa,” pacajai ata, pêtasa pajumecovênêtame. Bajarapamonae beayaijamatabêcuenevi nataeyabiaba pejamatabêcuenevijilivaisi

saya petsipaebaponaejava yabara. ¹⁹ Bajarapamonae Cristo apo pe-jumecovënëtsivi. Daxita voxaiti Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropotsiarubenaponareca. Bajara pijinia pacuenia voxaiti ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcueneyavenonapona. Nacajamatabëcuene vitsabiaexanapona pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Vajanacacapanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënëtavanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baiti jane paxamë baja payapëtaneme bajarapalivaisi apo pexaniajailivaisicuene. Cristo itsa tēpa, paxamë ata, Cristo bepapecayajavatēpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xuajitsia itsiata pajumecovënëtavanapame mapanacuapijivi jamatabëcuenenavëxaniabiaya papecatsipaebilivaisije? ²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniva, pētsa pajayatame maxuaje. Pētsa paxaneme maxuaje. Pētsa papitame panecobeta maxuaje,” jai tsabiabi bajarapamonae. ²² Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuene daxita vereverecaena. Bajarapacuenia pitavetsicuene saya jivi pejamatabëcuenepijilivaisita itaveta. ²³ Pamonaе bajarapacuenia pacaitavetapona, bepacatsita peyapëtaevi itajara. Tsipaji bajarapamonae jamatabëpacaitoroba panevajëtabiabinxaxa ángelevjavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtaponae atamë tsipae, itsiata apo pacajamatabëcueneyavenonae tsipae papecavecuajibiaexanaenexa papibisiajamatabëcuene paxainame panejamatabëthëtota.

3

¹ Cristo petëpaeujinae Dioso icatsia itsa asaëyaexanatsi, paxamë ata Cristo bepapecayajavaasaëyaexanaevi, Dioso pacatane. Bajaraxuata athëbëpijicuene pajamatabënajinavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevetsinexabeje daxitacuene. ² Pasivanajamatabëxainabiabare èathëbëpijicuene. Pētsa pasivanajamatabëxainabiabame mapanacuapijicueneje. ³ Cristo itsa tēpa, paxamë ata Cristo bepaneyajavatēpaevi, Dioso pacatane. Aeconoxae baja paxamë Cristo papecayajavaponaponaejava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame. ⁴ Cristo baja cajena nacayajavaponapona. Voxaiti ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaename penivenivenaecotia Cristo papijajivixaemë.

Pacuenia Dioso pejumecovënëtsivi perujumatabëcuenemi baja copata pejanajamatabëcuene pexainaenexa yabara pelivaisi

⁵ Mapacuenia pajamatabëjumaitsimëre tsavanapaeje: “Tajaperujumatabëcuenemi baja copatajë. Nexata baja apo jitsipaenë icatsia taxainaejava perujumatabëcuene, mapanacuapijijamatabëcueneje. Apo jitsipaenë baja itsapetiriva tajaitsijava tajavavecua. Apo jitsipaenë baja piauracuene ata taexanaponaejava. Apo jitsipaenë baja pibisiacuene ata tanajamatabëxainaejava. Apo jitsipaenë baja pibisijamatabëcuene ata tajitsipaejava. Apo jitsipaenë baja ayaijava taxainaejava tanaxainaeyabinexa. Daxita baja bajarapajamatabëcuenemi copatajë. Nexata baja matavëjëa apo jitsipaenë bajarapajamatabëcuene taxainaejava,” pajamatabëjamëre tsavanapae. Tsipaji itsa pajitsipaejitsipame ayaijava panexainaejava panenaxainaeyabinexa, nexata pacopabijitsipame Dioso panejitsipaejavami. Tsipaji Diosovecua bitso pajitsipaejitsipame mapanacuapijicueneje. Nexata pajamatabëcuenejëpaejitsipame pamonaë vajëcabiaba jumapecataeya pexanaenëanëjavabelia. Tsipaji bajarapamonaë Diosovecua jitsipa jumapecataeya pexanaenëanë. ⁶ Daxita pamonaë Dioso apo pejumecovënëtsivi, bajarapitsipibisiacuene pexanavanapaevi, Dioso ayaicuenia naneconitsiaexanaenatsi. ⁷ Paxamë ata picani daxita bajarapitsicuene paexanavanapame Dioso panejumecovënëtsivajënaeya. ⁸ Nexata baja aeconoxae pacopabare daxita mapajamatabëcueneje. Paneanaepanabiabijava itsamonaëjavabelia, pacopabare. Pibisiacuene paneexanaenexa panenajamatabëxainabiabijava ata, pacopabare. Pibisiacuenia itsamonaë panebaracuaicuaijitsabiabijava ata, pacopabare. Itsa pacuaicuaijamë, pëtsa pacuaicuaijamë pibisialivaisi. ⁹ Pëtsa namataenetsia panatsipae-bame penajumetsënëtsilivaisi. Perujumatabëcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujumatabëcuenemi. ¹⁰ Nexata baja pejanajamatabëcuene paxainavanapame. Panevajënaeyabelia payapëtaeponame paneexanavanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatabëcueneitsimëre tsavanapae. ¹¹ Daxita pamonaë Dioso pejumecovënëtsivi, pejanajamatabëcuene xaina. Nexata daxita Dioso pejumecovënëtsivi Dioso najëpaeya tane. Judíovi, apo judíovi ata, daxita bajarapamonaë Dioso najëpaeya tane. Pamonaë peperabëcaucubivitsi, pamonaë ata apo peperabëcaucubivitsi, daxita bajarapamonaë Dioso najëpaeya tane. Saicayanacuapijivi ata, pamonaë ata dajubicuenia canajetatsi itsamonaëjavabelia amoneya petonacuenebavanapaenexa, pamonaë ata apo canajetsitsi itsamonaëjavabelia amoneya petonacuenebavanapaenexa, daxita bajarapamonaë Dioso najëpaeya tane. Tsipaji bajarapamonaë Cristo tsijamatabëcatsi peyajavajinavanapaenexa caejivi canacujitsia. Nexata bajarapamonaë xaina baja pajamatabëcuene Dioso tane bitso penamatamotsicuene mapanacuataje.

¹² Dioso bitso pacaasiva. Pacaitapetanea papijajivinexamë. Bajaraxuata paitaxutotsoniataeyabiabianame itsamonaë ata. Nexata ëpexaniajamatabëcueneta pajinavanapaenename. Beveliajamatabëcuenevi nataeya pajinavanapaenename. Pajamatabëcuenesaëmë tsavanapae tsane

itsamonaē, bajayajebi pacaitsacueniababiabi ata. ¹³ Namataenetsia panajamatabēcueneyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabēcuenexanepanare. Pacuenia paxamē ata Cristo pacabarajamatabēcuenexanepana pibisiacuene paneexanaevi ata, bajara pijinia pacuenia paxamē ata pabarajamatabēcuenexanepanare itsamonaējavabelia. ¹⁴ Matavējēa mapacuenia paexanavanapareje. Namataenetsia bitso panaasivamēre tsavanapae. Bजारapacuenia nexata najamatabēcuenējēpaeya pajinavanapaename. ¹⁵ Pavajētabiabare Diosojavabelia papecayavenonaenexa jamatabēcuenexanepanaeya panejinavanapaenexa. Bजारapacuenia panejinavanapaenexa, Dioso pacajunata caebitsaēto papecaexanaenexa Cristo yajava. Nexata Dioso itsa pacayavenona jamatabēcuenexanepanaeya panejinavanapaenexa, pajumaitsimē tsabiabi tsane Diosojavabelia. “Xanepana rabaja. Tsipaji bitso pexaniacuene panetoexaname,” pajamē tsabiabi tsane Diosojavabelia.

¹⁶ Pavajētabiabare Diosojavabelia Cristo pelivaisi itsamonaē papecat-sipaebijava papecajamatabēcuenenabiabinexa. Pavajētabiabarenya Diosojavabelia xaniavaetsia Dioso panejamatabēcueneyapētaenexa. Namataenetsia panatsipaebabiabare Cristo pelivaisi. Namataenetsia panajamatabēcuenē yavenonabiabarenya paneajamatabēcuenesaēnexa Cristo pelivaisi panejumecovēnētsijava. Daxita panejamatabēcuenēvetsina pexaniajamatabēcuenē rajutsiaya Diosojavabelia panaxēanabiabare vaji. Palivaisianē ata rubena Salmosbaxutota, panaxēanabiabare. Pavajianē ata rubena vajibaxutonēta, panaxēanabiabare. Pavajianē ata Espiritu Santo pejamatabēcueneta pacanaxēanaeyaexana, panaxēanabiabare. ¹⁷ Daxita xua paexanavanapame, paexanavanapare vajatuxanenē Jesucristo pejitsipaecuenia. Palivaisianē ata pacuaicuaijamē tsabiabi, pacuaicuaijamē tsane vajatuxanenē Jesucristo pejitsipaecuenia. Pexaniajamatabēcuenē itsa parajutabiabianame vajatuxanenē Jesucristo paxa Diosojavabelia, Dioso papecayavenonabiabixae, Jesucristo pevēnēta pexaniajamatabēcuenē parajutabiabianame.

Pacuenia Pablo Dioso pejumecovēnētsivi muxujioba yabara pelivaisi

¹⁸ Paxamē papetiriavimē, pajumecovēnētabiabare pacuenia pacaitoroba paneamonajivi. Tsipaji bajarapacuenia vajatuxanenē pacatojitsipa paneexanavanapaenexa. ¹⁹ Paxamē pijinia papebijivimē, pasivamēre panijavajivi. Pētsa anaeyacuenia paitorobabiabame panijavajivi. ²⁰ Paxamē pijinia papeximē, daxita xua paneaxajivi, paneenajivi ata, pacaitoroba paneexanaenexa, pajumecovēnētabiabare. Tsipaji bajarapacuenē vajatuxanenē sivabarēya. ²¹ Paxamē pijinia panexi panexinaevi, pētsa panexi anaeya paitorobabiabame papeca-jumecovēnētabiabinexa xua paitorobame. Tsipaji saya belia panexi jamatabēcuenēfaenaējitsipa Dioso pejumecovēnētsijava. ²² Paxamē pijinia itsamonaē papijajivimē, dajubicuenia papeccanajetsivi itsamonaē amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panijatuxanevi panetonacuenebijava yabara. Biji rajane daxitamatacabi asaēyata xaniavaetsia patonacuenebabiabare.

Panejamatabëcuenevetsina cuenejitsipaeya panijatuxanevi patonacuenebabiabare papecasivabarëyanexa vajatuxanenë. ²³ Daxita xua panijatuxanevi patonacuenebabiabame, jamatabëcuenebarëyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: “Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenënexa,” pajamatabëjamëre tsabiabi. ²⁴ Payapëtaneme rabaja mapacuenije. Vajatuxanenë pacarajutsiana pacuene pijajivi toxaina perajutsinexa, baitsi matabi apo pevereverecejava. Patonacuenebavanapame baja cajena Cristonexa. Bajara jane ponë pepacuene panijatuxanenë. ²⁵ Panejumecovënëre pacuenia pacaitorobatsi. Tsipaji pajivi pibisiacuene exana, bajarapajivi itsamatabi Dioso naneconitsiaexanaenatsi pibisiacuene pexanaeconi yabara. Pamatabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëto Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaeacue.

4

¹ Paxamë papetuxanevimë, xaniavaetsia paevere panijajivi, papecatonacuenebabiabivi. Panajamatabënapitabiabare paxamë ata panijatuxanenë athëbëtsia pececejava.

² Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuenemajitsinejavamë. Itsa pavajëtabiabianame Diosojavabelia, Dioso papecayavenonabibijava yabara, pajumaitsimë tsabiabi tsane mapacueniaje: “Xanepana rabaja. Tsipaji bitso pexaniacuene panetoxaname,” pajamë tsabiabi tsane Diosojavabelia. ³ Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevetsivi patanitavetsiyaniva jivi patatsipaebaponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vajaexanaeconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. ⁴ Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabiabianamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa itsamonaejavabelia, patsipaebabiabare. Xaniavaetsianua patsitajinavanapare pamona Dioso apo pejumecovënëtsivi. Tsipaji rabaja imoxoyo pevajënae Cristo icatsia pepatsijavanexatsica. ⁶ Daxita palivaisianë pacuaicuanetsipaebilivaisi. Panajamatabëcuenevererenua xaniavaetsia panejumecanaviatsinexa caejivi canacujitsia bajarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabananë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë. ⁸ Bajaraxuata bajaraponë pacatoitorobaliatsi papecatsipaebinxä pacuenia pajinavanapajë. Bajaraponë nexata itsa pacatsipaebiana, nexata panesivaajamatabëcuenesaëmë tsane. ⁹ Bajaraponë paxamëjavabelia yajavaponaejitsia vajabananë Onésimo. Bajaraponë Onésimo panijatomarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

¹⁰ Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia. ¹¹ Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamonaë bitso neyavenona. ¹² Epafraas ata, Cristo pijajivitonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëttavanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. ¹³ Pacatsipaebatsi baja cajena pacuenia Epafraas pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. ¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënëne ata pacabajacobalia.

¹⁵ Nebajacobi vajamonae, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamonae ata nacaetuatabiaba bajaraponë pijabota, nebajacobi. ¹⁶ Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamonae ata. Bajarapamonae ata tatoyaquinaebaxuto juya pacatoitorobiana panenalebinexa paxamë ata. ¹⁷ Arquipojavabelia pajumaitsimë tsane mapacueniaje: “Dioso pecatocopatsijava netonacuenebinxä, verere xaniavaetsia,” pajamë tsane.

¹⁸ Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënajinavanapare penaneconitsivi pejebabiabibota taponaponaëjava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

Mapabaxutoje San Pablo copiaya toyaquina Tesalónica tomarapijivijavabelia

Pacuenia Pablobana, Silvanobana, Timoteobana toyaquina mapabaxutoje Dioso pejumecovënëtsivijavabelia yabara pelivaisi

¹ Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi

² Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa.

³ Itsa pacatovajëtabiabatsi vaxa Diosojavabelia, panajamatabënapitabiabajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënapitabiabajëna bitso pinijicuenia panejitsipaejava Dioso. Paxamë rabaja pajamatabëcuenesaëmë tsavanapae panecopiaevetavanapaejava vajatuxanenë Jesucristo icatsia pepatsijavanexatsica.

⁴ Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. ⁵ Bajayata itsa pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espíritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuenesaënexamë.

⁶ Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumecovënëtavanapame patacatsipaebilivaisi Espíritu Santo papecatsijamatabëecaexae. Bajarapacuenia barëyaya pajumecovënëtavanapame patacatsipaebilivaisi, itsamonae bitso pacabejiobiaexanabiabi ata.

⁷ Bajarapacuenia panejinavanapaejava daxita Dioso pejumecovënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame.

⁸ Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitae. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuene. Bajaraxuata paxanë apo pacavajunupaebitsi daxita bajarapamonaejavabelia.

Tsipaji baja yapētane. ⁹ Biji rajane bajarapamonae pijacuata panetsipaeba paxamē xaniavaetsia patanecopiatsijavamē pamatacabi pacanasivaxainatsi. Paxamē picani jumapecataeya pexanaenēanējavabelia panavajēcabiabame. Itsiata baja aeconoxae pacopatame jumapecataeya pexanaenēanējavabelia panenavajēcabiabijavami. Nexata baja pepo Diosojavabelia panajamatabēcuenecopatame. Patonacuenebavanapame pepo Dioso, ponē piasaētsaponaponaenē daxitamatacabijavabelianexa. Bajarapacuenia paxamē yabara panetsipaeba baja cajena daxita bajarapamonae. ¹⁰ Bajarapamonae panetsipaebanua panecopiaevetavanapaejava Jesús, Dioso pexēnato, athēbēvetsica icatsia pepatsijavanexatsica. Bajaraponē, Jesús, Dioso baja cajena asaēyaexanatsi petēpaecujinae. Jesús nacacapanepaena pibisiacuene vajaexanaeneconi yabara Dioso vajanacananeconitsia exanaejavaminexavecua.

2

Pacuenia Pablo nacueneba Tesalónica tomarata yabara pelivaisi

¹ Tajamonae, apo panacueratsinē itsa pacasivaxainatsi. Bajara-pacuene paxamē panijacuata payapētaneme. ² Paxamē baja cajena payapētaneme mapacueneje. Paxanēbeje Silasbeje patapatsivajēnaejeje paxamējavabelia, Filipos tomarata panenaneconitsiaexanabeje itsaneconi apo paxainaē atanēbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaēbeje, ajumeurajibia pacatsipaebatsi pexanialivaisi Diosojavabelia papeca-capanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa. ³ Palivaisi pacatsipaebatsi, pexaniajailivaisi cajena. Apo penajumetsēnētasilivaisi. Apo pacatsipaebitsi bajarapalivaisita patacayamaxēitojorobinexa. ⁴ Biji ra Dioso paneitoroba. Panetocopatana jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajē, apo patsipaebaponaenē saya jivi patanebarēyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajē Dioso patanebarēyataenexa. Tsipaji Dioso vajanacajamatabēcueneyapētaenē. ⁵ Paxamē baja cajena payapētaneme mapacueneje. Caeto ata paxanē itsalivaisi apo pacabarēcuaicuaijaitsi saya jema bajarapalivaisi yabara patanebarēyataenexamē. Yamaxēitojorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuene panejamatabēcueneyapētane. ⁶ Cristo patanitorobixae, panejamatabēcuenecaējēpa picani patacaitorobinexa pataneyaiyataenexamē. Itsiata baitsi jane caeto ata apo pacaitorobitsi pataneyaiyataenexamē. Apo paitorobinē itsamonae ata pataneyaiyataenexa. ⁷ Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanē ata asivaya xaniavaetsia pacaevetavanapatsi. ⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabēpanebejejababiabi ata, itsiata apo pacopatsinē patacayavenonaponaējava. ⁹ Tajamonae, panacuenecanaējēre mapacueneje. Pamatacabi paxamējavata pajinavanapajē, pinijicuenia panacuenebabiabajē. Pinijicuenia

panacuenebabiabajë patajucuata patanaevetsinexa. Pacatsipae-baponatsinua pexanialivaisi, palivaisi Dioso nacayapëtaeyaexana. Paepatota pacuenesajinajë, panatonacuenebabiabajë matacabita, meravi ata. Bajarapacuenia panatonacuenebabiabajë itsanë ata paxamëyajuvënënenë petoayapëbejeyanivatsi patanevetaponaejava.

¹⁰ Paxamë baja cajena paneyapëtaneme pacuenia pajinavanapajë. Dioso ata paneyapëtaneme. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainaenë, paneconi yabara pananeconitsijitsianë paxamëjavata itsa pacatsipaeavanapatsi Dioso pejumelivaisi. ¹¹ Paxamë baja cajena paneyapëtaneme paxamë pacaenëmë canacujitsia patacamuxujobaponaejava paneajamatabëcuenesaënexa Diosojavabelia. Pacuenia pexi pexainaenë nacoximuxujioba, bajara pijinia pacuenia paxanë ata pacamuxujibatsi. ¹² Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacuene papecabarëevetsinexa pijapenivenivenaenacuatatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtame patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënëtame. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipae-baponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcuene parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumecovënëtsivi bejiobi-aexanatsi pijanacuapijivi, judíovi, bajara pijinia pacuenia pacabejiobi-aexana panijanacuapijivi. ¹⁵ Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixanë, paxanë ata bajarapamonaepanecapitsapa judíovi penacaetuatabiabibovecua. Dioso apo pejitsipae-cuene bajarapajudíovi exanapona. Bajarapajudíovi daxitajivi bitso itoya. ¹⁶ Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabi-abixae, pibisiacuene pexanaeneconi pematatsënëa ayaineconi natsixaina Diosojavabelia. Nexata baja aeconoxae bajarapamonaetocopiapatatsi ayaiacuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata pacajamatabënjinavanapatsi. Bitso picani icatsia jamatabëpaponajë paxamëjavabelia patacataenexa. ¹⁸ Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. ¹⁹ Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya

tsanetsi. ²⁰ Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3

¹ Bajayajebi baja cajena apo pacataetsi. Nexata baja belia apo panajamatabëcuene saëtaponaejitsipaenë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. ² Nexata baja pacatoitorobatsibeje vajabanenë Timoteo. Timoteobeje baja cajena Dioso patatonajuanaacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcuene asaëyaexanaenexa Dioso panejumecovënëtsijava yabara. ³ Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënë Dioso pejumelivaisi pejumecovënëtsijava pecopabiyani, itsamonae itsa bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaenexa. ⁴ Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejiobiaexanaponaevanexa Dioso papijajivixamë. Nexata jane baja bajarapacune aeconoxae pacatocopiapata. ⁵ Bajaraxuata baja apo najamatabëcuene saëtaponaejitsipaenë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: “Dovathi meta bajarapamonae jamatabëcuenejëtatsi. Othopaica meta baja. Nacueratajë meta baja bajarapamonaejavata pexanialivaisi tatsipaebabiabijava,” jamatabëjanë picani paxamë yabara.

⁶ Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabënanajinavanapame pina pexaniajamatabëcuenia. Bitso pina jamatabëpanetaneme picani pacuenia paxanë ata jamatabëpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajë paxamë yabara. Panajamatabëcuenesaëtajë itsa pacavënëlivaisitanetsi asaëya Dioso panejumecovënëtsijava. ⁸ Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëtatsi. ⁹ Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. ¹⁰ Matacabita, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa icatsia pataponaeenexa paxamëjavabelia patacataenexa. Pacatovajëtabiatsinua Dioso papecayapëtaeyaexanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

¹¹ Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia.

12 Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Dioso javabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. 13 Pacatovajëtatsi Dioso papecajamatabëcuene asaëyaexanaenexa, jamatabëcuenexanepanaeya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaejavata, pamatacabi vajatuxanenë Jesús, daxita pijajivi yajava, patsianica.

4

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

¹ Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bजारapacuenia panevajënaeyabelia xaniavaetsia pajinavanapare daxitamatacabijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. ³ Dioso raja jitsipa xaniavaetsia panetoinavanapaenexa ëponënexa. Dioso raja pacatojitsipa panecopabinexa pibisiacuene panevitota paneexanaejava. ⁴ Dioso raja pacatojitsipa pacanenëmë canacujitsia paneyapëtaenexa mapacueneye. Petiriva itsa papitame panijavanexa, xaniavaetsia paevere. Payaiyataemanua. ⁵ Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevitota pibisiacuene pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaexana bajarapacuenie. Bजारapacuenie yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. ⁸ Itsamonae apo panejumecovënëtsi patatsipaebilivaisi. Bजारapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espiritu Santo.

⁹ Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bजारaxuata apo namatavenonaenë baja patacatoyaquinaenexa patacayapëtaeyaexanaenexa bajarapacuenie. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vajamonae, Macedonia nacujava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Epanijacuene saya paexanare panejamatabëitonotsianiva itsamonaejavabelia. Panijacuata panatonacuenebare bajarapacuenia panenaevetavanapaenexa. ¹² Bजारapacuenia nexata Dioso apo pejumecovënëtsivi pacayaiyataena. Nexata apo pacatosai cae tsane itsacuenejavayo ata panenamatavenonaejava.

Pacuenia pepo petuxanenē Jesús icatsia patsijitsiatsicayabara pelivaisi

¹³ Tajamonae, pacatojitsipatsi xaniavaetsia paneyapētaenexa pacuenia itsamatacabi itsijitsia Dioso pepua pejumecovēnētsivi petēpaevi. Pacatsipaebatsi baja cajena bitso panenajamatabēxainaeyaniva itsa pacavecuatēpa itsajiviyo. Pacatsipaebatsi baja cajena bitso panenajamatabēxainaeyaniva, pacuenia bitso banajamatabēxaina Dioso apo pejumecovēnētsivi itsa vecuatēpatsi itsajiviyo. Bajarapamonae jamatabēcuenenavēxaniabiaya bajumaitsi: “Petēpaevi rabaja peponaxuabi,” bajai Dioso apo pejumecovēnētsivi. ¹⁴ Vaxaitsi baja cajena jumecovēnētatsi Jesús vajanacasivatēpaejava. Jesús vajanacasivatēpaecujinae, Dioso icatsia asaēyaexanatsi petēpaejavavecua. Dioso icatsia itsamatacabi asaēyaexanaena daxita pamonae Dioso pepua pejumecovēnētsivi petēpaevimi. Bajarapalivaisi vaxaitsi baja jumecovēnētatsi.

¹⁵ Palivaisi pepo petuxanenē Jesús netsipaeba, bajarapalivaisi pacatsipaebijitsiatsi. Vaxaitsi abaxē mapanacuata vajaasaētsavanapaevi pamatacabi pepo petuxanenē Jesús icatsia patsianica. Vaxaitsi athēbēabetsia apo namataxainaetsitsia tsane. Petēpaevimi rajane copiaya namataxainaena. ¹⁶ Angelevi penamatacatorobinē vavajai tsaxuabi tsane. Dioso pijatrompeta najumetsiana. Pepo petuxanenē jane baja pijacuata patsianica athēbēvetsica. Nexata pamonae Cristo pepua pejumecovēnētsivi tēpa, bajarapamonae asaēyaexanaenatsi petēpaejavamivecua. ¹⁷ Bajaraxuacujinae vaxaitsi, abaxē mapanacuata vajaasaētsavanapaevi bajarapamatacabita, itarērēbotatsia nacacaetuatsiania petēpaevimi yajava. Caxitajarabianatsi jane baja athēbētatsia pepo petuxanenē Jesús. Nexata jane baja daxitamatacabijavabelianexa yajavajinavanapaenatsi bajaraponē. ¹⁸ Bajaraxuata panajamatabēcuenesaētavanapare mapalivaisitaje.

5

¹ Tajamonae, itsiata apo panamatavenonaenē patacatoyaquinaenexa patacayapētaeyaexanaenexa pamatacabita, paepatota ata, copiapatsijitsia daxita bajarapacuenē. ² Payapētaneme baja cajena pepo petuxanenē Jesús icatsia pepatsijavanexatsica. Paepatota apo vajēnaeevetsitsi, jemata patsianica. Pacuenia penacobetoxotsinēnexa meravi bapata itsajota apo jamatabēnajinaetsi, bajarapacuenia jemata patsianica pepo petuxanenē Jesús. ³ Pamatacabita jivi jumai tsaponae tsane: “Daxitanacuanējava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovēnētsivi peverebiabinexatsi. Nexata acuenēbi tsane Dioso apo pejumecovēnētsivi pevecuarēcēpecaenexa bajarapacuenē. Pacuenia petiriva, penacoxitsiva, itsa vixanotatsi penacueto pevecuanaexanaenexatsi, acuenēbi pevecuanajetabajiravijava bajarapavixae, bajara pijinia itsane pamonae Dioso apo pejumecovēnētsivi. ⁴ Tajamonae, paxamē baja apo pajamatabēcuenēaitaquirimē. Pacuenia Dioso apo pejumecovēnētsivi ajamatabēcuenēaitaquiri, bajarapacuenia apo pajamatabēcuenēaitaquirimē. Pepo petuxanenē Jesús pepatsimatacabinexatsica pacopiaevetavanapame. Nexata pamatacabi pepo petuxanenē patsianica, apo pajamatabēcuenenabenajacaemē tsane. Pacuenia penacobetoxotsinē itsa pata, basivajamatabēcuenenabenajacatsi, apo paitsimē tsane. ⁵ Tsipaji

baja daxita paxamē pexanialivaisita pacajamatabēcueneitayota. Nexata baja daxita vaxaitsi pitaquirijamatabēcuene apo xainaetsi. ⁶ Bajaraxuata nexata vaxaitsi apo bejamatabēcuenemajitsitsi. Pacuenia Dioso apo pejumecovēnētsivi jamatabēcueneitsi, bajara apo bejamatabēcueneitsitsi. Biji rajane jamatabēcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamonae jamatabēcueneaitaquiri, jamatabēcuenemajitabiaba. Aitajibi tsabiabinua meravi. ⁸ Itsiata baitsi jane vaxaitsi baja pexanialivaisita nacajamatabēcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabēcuenecopatatsi baja ēDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabēcuenevecua nayajivinajamatabēcuenexatatsi Dioso pejumelivaisita. Nexata pacuenia vajabitsaēnē nayajivinoxatata piatajajava, namataxatatanua piatajajava pejorojoronaeyanivatsi pijavajabitsaēnē, bajara vaxaitsi ata itsitsi dovathi vajanacayamaxēitojorobiyaniva. ⁹ Dioso apo nacaitapetsi vajanacananeconitsiaexanaenexa pibisiacuene vajaexanaeneconi yabara. Biji rajane Dioso nacaitapeta vajanacacapanepaenexa pibisiacuene vajaexanaeneconivecua pepo petuxanenē Jesucristo pejamatabēcueneta. ¹⁰ Jesucristo baja cajena nacasivatēpa vajanacayajavaponaponaenexa vajaasaētsavanapaevi mapanacuataje. Vajatēpaecujinae ata, Dioso pijanacuataisia Cristo nacayajavaponaponaena. ¹¹ Bajaraxuata pacuenia baja namataenetsia panajamatabēcueneasaēya exanaponame, bajarapacuenia panevajēnaeyabelia tsiteca paexanavanapare.

Pacuenia Pablo Dioso pejumecovēnētsivi muxujioba yabara pelivaisi

¹² Tajamonae, pinijicuenia pacamuxujiobatsi paneyaiyataenexa pamonae paxamē tuatuajēta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua. ¹³ Payaiyataema bajarapamonae. Asivaya pataema. Tsipaji bajarapamonae xaniavaetsia Dioso tonacuenebavanapa. Jamatabēcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonae pifaetabivi. Pamonae pijinia jamatabēcuenecuerana itsamonae bepejiobiaexanaponaexaetsi Dioso pejumecovēnētsijava yabara, pajamatabēcueneasaēyaexanare. Payavenonare pamonae jamatabēcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabēcueneasaēya pamuxujiobianame bajayajebi pacopatsinejevamē.

¹⁵ Pētsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabēnjinavanapare pexaniacuene namataenetsia panenatoexanaponaenexa. Pajamatabēnjinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabēcuenebarēyamēre tsavanapae.

¹⁷ Daxitamatacabi Diosojavabelia pavajētabiabarē pacopatsinejevamē.

¹⁸ Daxita pacuene apo panejitsipaecuene ata, Dioso itsa pacatocopata

papecatocopiapatsinexa, nexata itsa pacatocopiapata bajarapacuene, itsiata pexaniajamatabëcuene parajutabianame Diosojavabelia bajarapacuene yabara. Bajarapacuenia paneexanavanapaenexa, Dioso pacatojitsipa Jesucristo papijajivixaemë.

¹⁹ Espíritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. ²⁰ Pëtsa panamuxujematame Espíritu Santo peyajavacuaicuaiaivi, Dioso pejumelivaisianë pepeabivi. ²¹ Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneypëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare.

²² Daxita xua pibisiacuene, panayajivitaema.

²³ Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeconimi pacavecuajibiaexanaena. Dioso evetsiana panejamatabëcuene, paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa.

²⁴ Bajarapacuenia Dioso pacaevetsiana, ponë pacajunata papexinexamë. Dioso cajena pacatoexanaena daxita pacuenia najumecapanepaeya pacajumaitsi.

Pacuenia Pablo jamatabënjajina Tesalónica tomarapijivi, pacuenia atavajëta Dioso peyavenonaenexatsi, yabara pelivaisi

²⁵ Tajamonae, Diosojavabelia panetovajëtabiabare.

²⁶ Asivaya nebajacobiana daxita bajarajotalia Dioso pejumecovënëtsivi.

²⁷ Pacaitorobatsi Dioso pejamatabëcueneta. Patsimuxulebianame mapabaxutoje daxita Dioso pejumecovënëtsivi pejumetaenexa.

²⁸ Pacatovajëtabiabatsi Diosojavabelia vajatuxanenë Jesucristo papceyavenonabiabinexa.

Mapabaxutoje San Pablo cotocaevi toyaquina Tesalónica tomarapijivjabavelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavavelia yabara pelivaisi

¹ Xanë Pablonë, Silvano, Timoteo, mapamatabëxëyoje pacatoy-aquinatsi mapabaxutoje. Pacatoyaqinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavavelia, vajatuxanenë Jesucristojavavelia ata. ² Pacatovajëtatsi vaxa Diosojavavelia, vajatuxanenë Jesucristojavavelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso naneconitsiaexanaena pibisiacuene pexanaevi pamatacabi Cristo icatsia patsianica yabara pelivaisi

³ Tajamonae, panevajënaeyavelia bitso orijibia panajamatabëcuenecopataponame Diosojavavelia. Pacaenëmë canacujitsia namataenetsia panaasivamënua tsavanapae. Bajaraxuata daxitamatacabi paxamë yabara pajumaitsinë tsane Diosojavavelia: “Xanepana rabaja. Pexaniacuena yavenonaponame Tesalónica tomarapijivi,” pajanë tsane. ⁴ Diosojavavelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatomanëjava, Dioso pejumecovënëtsivijava. ⁵ Bajarapacuenia pacabejiobiaexanabiabi ata, Diosojavavelia paneajamatabëcuenesaë tsaponaexae, nayapëtane Dioso papecajamatabëcueneyavenonaejavanexa pamatacabi naneconitsiaexanaena pijaneconi pexainaevi. Bajarapamatacabi Dioso papecasivajamatabëcuenebarëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparucaje. ⁷ Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenivecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëängelevi yajava, pitarunutsicotia ata yajava. ⁸ Jesús jane baja patsianica penaneconitsiaexanaenexa pamonaë apo yapëtae Dioso. Pamonaë ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. ⁹ Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaravecua tajë xuabianatsi. Bajarapamonae Dioso pijapenivenivenaecotia apo tae tsane caeto ata. ¹⁰ Pamatacabi vajatuxanenë icatsia patsianica, pinijicuenia pijajivi yayataenatsi. Pinijicuenia sivajamatabëcuene nabenajacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaëmë patacatsipaebilivaisi.

11 Bajaraxuata pacatovajëtabiatsi Diosojavabelia. Pacatovajëtabiatsi vajaDiosojavabelia papecajamatabëcuene xaniavaetsinexa. Pacuena bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiatsinua Diosojavabelia pecajëpaejamatabëcueneitsinexa, paneexanaenexa daxita pacuena pajamatabëexanaponame. Pacatovajëtabiatsinua Diosojavabelia papecajavenonaponame daxita pacuene paexaname Jesucristo papijajivixamë. ¹² Nexata paxamë xaniavaetsia panejinavanapaejamatabëcueneta, vajatuxanenë Jesucristo daxitajivi yayataenatsi. Paxamë ata juya Dioso pacayaiy-ataeyaexanaena daxitajivi. Bajarapacuenia pacayaiy-ataeyaexanaena papecaitaxutotsoniataexae vajaDioso, vajatuxanenë Jesucristo ata.

2

Pibisiacuene bitso pexanabiabinë yabara pelivaisi

¹ Tajamonae, pacatsipaebatsi baja cajena paneyapëtaenexa pacuena vajatuxanenë Jesucristo patsijitsiatsica. Pacatsipaebatsinua baja cajena pacuena ata nacacaetuatsijitsia bajaraponëjavabelia pamatacabi patsianica. ² Nexata pajivi najumetsënëtsiaya pacajumai tsane: “Espiritu Santo raja neyapëtaeyaexana. Jesucristo rabaja patsica,” pacajai tsane, pëtsa pajumecovënëtime. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtime. Pajivi pijinia najumetsënëtsiaya pacajumai tsane: “Pabloana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtime. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërëcame panejumecovënëtime. Pëtsa pajamatabëcuenenabenajacamenua. ³ Pëtsa pajumecovënëtime pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponaeenexa daxitamatacabijavabelianexa. ⁴ Bajaraponë cuenitoya tsane Dioso pijacuene. Pamonaeta vajëcabiaba bedioso petaevijavabelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtime tsabaja bajarapalivaisi? ⁶ Payapëtaneme baja cajena pacuena abaxë Dioso yacaranata pibisiacuene bitso pexanabiabinënexa pepatsiyaniva. Dioso petocajëtsimatacabita bajaraponë patsiana. ⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinënexa. ⁸ Bajarapamatacabi bajaraponë patsiana bitso pibisiacuene

peξανabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaxanaena pijapenivenivenaecotiata. ⁹ Bajaraponë patsiana dovathi pejamatabëcueneta pibisiacuene bitso peξανabiabinexa. Nexata bajaraponë dovathi pesaëta pinijicuene pexanaejava exanaponaena jivi peyamaxëitojorobinexa, beayaijamatabëcuenenë petaenexatsi. ¹⁰ Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. ¹¹ Bajaraxuata Dioso tocopatsiana bajaraponë penajumetsënëtsilivaisi petsipaebinxatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. ¹² Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papeccapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴ Dioso paneitoroba patacatsipaebinxexa pexanialivaisi papeccapanepaelivaisinexa Diosojavabelia. Nexata baja pajumecovënëtame bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papeccayajavaponaponaenexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtame. ¹⁶ Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papeccajamatabëcuene asaëyaexanaenexa. Pacatovajëtatsinua jivi panetsipaebinxexa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi

¹ Tajamonae, pecopiarucaelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë

pajumecovënètame bajarapalivaisi. Patovajërenua daxitajivi peyaiy-
ataenexa Dioso pejumelivaisi. ² Panetovajërenua Dioso patanevetsinexa
pibisiamatabëcuenevivecua. Bajarapacuenia panetovajëre tsipaji raja
daxitajivi Dioso apo jumecovënëtsi. ³ Itsiata baitsi jane vajatuxanenë
nacayavenonabiaba. Bajaraponë pacajamatabëcueneasaëyaexanaena.
Pacaevetsiananua dovathivecua. ⁴ Paxamë yabara baja cajena
pajamatabëjumaitsinë: “Bajarapamonae vajatuxanenë yavenonaenatsi.
Nexata xaniavaetsia exanavanapaena daxita pacuenia itorobatsi.
Pevajënaeyabelia xaniavaetsia exanavanapaena pacuenia itorobatsi,”
pajamatabëjanë baja cajena paxamë yabara. ⁵ Diosojavabelia
pacatovajëtatsi xaniavaetsia paneyapëtaenexa Dioso papecaasivajava.
Pacatovajëtatsinua panevajënaeyabelia paneajamatabëcuenesaë
tsavanapaenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenë Jesucristo pejamatabëcueneta pacaitoro-
batsi. Dioso pejumecovënëtsivi ata itsa piafaetabivi, bajarapamonae
panavecuatsare. Bajarapamonae apo nacuenebabiabi penaevetsinexa
pacuenia picani paitorobajë. ⁷ Payapëtaneme rabaja pacuenia paxanë
paexanavanapajë pamatacabi panajinavanapajë paxamëjavata. Nexata
pacuenia pacatsitajinavanapatsi, bajarapacuenia bepajinavanapame.
Pamatacabi abaxë panajinavanapajë paxamëjavata, apo pafaetabinë
tsavanapae. ⁸ Amoneya baja cajena itsajivi ata apo pavecuaxaenë
itsacuenejavayo ata. Biji rajane panatonacuenebabiabajë pinijicuenia.
Matacabita, meravi ata, panatonacuenebabiabajë patanaevetsinexa.
Bajarapacuenia panatonacuenebabiabajë itsajivi ata paxamëyajuvënëvi
petoyapëbejeyanivatsi patanevetsijava patanajinavanapaejavata.
⁹ Paxamëjavata pexanialivaisi patacatsipaebavanapaexae, vajatuxanenë
picani panetocopata patacavajëtsinexa xua panamatavenonajë
patanerajutsinexamë. Itsiata baitsi jane apo pacavajëtsitsi.
Pacatsitanacuenebabiabatsi baja cajena. Bajarapacuenia paxamë ata
panatonacuenebabiabare panenaevetsinexa. ¹⁰ Pamatacabi abaxë
panajinavanapajë paxamëjavata, pacajumätsitsi baja cajena: “Pajivi
afaetabi, pëtsa naxane,” pacajaitsi baja cajena. ¹¹ Pavënëlivaisitaniji
pacuenia itsamonae paxamëyajuvënëvi saya jinavanapa nacuenebine-
jeva. Bajarapamonae pina bitso jamatabëitonotabiaba itsamonae.
¹² Bajarapamonaejavabelia pajumätsimë tsane: “Pablo raja vajatuxa-
nenë Jesucristo pejamatabëcueneta jumätsi: ‘Panacuenebinaame pina
panenaevetsinexa,’ jai raja Pablo,” pajamë tsane.

¹³ Tajamonae, pëtsa pajamatabëcuenequeraname pexaniacuene pane-
exanavanapaejava. ¹⁴ Pajivi apo nacuenebi tsane penaevetsinexa,
apo jumecovënëtsinua tsane palivaisi pacatoyaquinatsi mapabaxutotaje,
bajarapajivi panavecuatsare. Pëtsa payajavajinavanapame. Nexata
aura tsane apo penacuenebijava yabara. ¹⁵ Itsiata baitsi jane baja-
rajivi bepanijavajabitsaëjivi pëtsa pataneme. Dioso panenajuajume-
covënëtsivixae, pexaniajamatabëcuenia pamuxujibianame.

*Pacuenia Pablo toyaquina peveretsinexa baja petoyaquinaelivaisi ma-
pabaxutotaje yabara pelivaisi*

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamaatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecajajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. ¹⁸ Pacatovajëtabiabatsi Diosojavabelia daxita paxamë vajatuxanenë Jesucristo papecajavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. ² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebeje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

³ Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjëa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjëa baja petsipaebaponaeyaniva bajarapalivaisi. ⁴ Itavetsianamenua bajarapamonae penajamatabëxainabiabianiva saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabianiva. Bajarapitsilivaisixi ajumematamobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonae tsipae pacuenia Dioso nacaitoroba jumecovënëtsiaya vajatoexanaenexa.

⁵ Bajarapacuenia caitorobatsi nejumeitavetsinexa bajarapamonae pecopatsinexa bajarapalivaisi pecuaicuaijaitisabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtavanapaenexa Dioso pejumelivaisi. ⁶ Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijaitisabiabinexa. ⁷ Bajarapamonae picani jamatabënaexana jivi livaisi petsipaebabiabivinexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapētanetsi pexanepanaecuene palivaisi Dioso Moiséspijinēta najumecopata. Bajarapalivaisi Dioso nacatocopata vajatsipaebinexa jivijavabelia, jivi peyapētaenexa penaneconitsicuene Diosojavabelia. ⁹ Pamonaē pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonaē pibisiacuene exanavanapa, toyaquinabiabatsi pitavetsilivaisinexatsi. Pamonaē ata apo yaiyataē itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonaē ata najamatabēcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonaē ata jivibevi, paxa ata, pena ata, pebeyaxuabivi, toyaquinabiabatsi pitavetsilivaisinexatsi. ¹⁰ Pamonaē ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaē ata pevēna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara pijinia pacuenia petiriavi ata. Pamonaē pamonajivi vecuanamatayajita itsanējavabelia, toyaquinabiabatsi pitavetsilivaisinexatsi. Pamonaē ata pevēna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonaē ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaē ata najumetsēnēta, toyaquinabiabatsi pitavetsilivaisinexatsi. Pamonaē ata itsamonae yabara najumetsēnētsiaya baracuaicuajai tsabiabi, toyaquinabiabatsi pitavetsilivaisinexatsi. Pamonaē ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi. ¹¹ Bajarapalivaisicuenia xanē ata itavetaponajē itsa tsipaebaponajē palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajē, tsipaebaponajē daxitajivi peyapētaenexa pacuenia Dioso itaxutotsoniatanetsi pecapanepaenexatsi.

Pacuenia Pablo pexaniajamatabēcuene rajuta Jesucristojavabelia yabara pelivaisi

¹² Pexaniajamatabēcuene rajutajē vajatuxanenē Jesucristojavabelia tanerajutsixae pesaē tatonacuenebinexa. Jesucristo nesivanajamatabēxaina xaniavaetsia tatonacuenebinexa. Bajaraxuata pexaniajamatabēcuene rajutajē. ¹³ Copiata abaxē itsa apo jumecovēnētsinē Jesucristo, pibisiacuenia picani baracuaicuajianē tsabiabi Jesucristo. Pijajivi ata tobarajinabiabajē tabejiobiaexanaenexa. Pibisiacuenia bijataeyabiabajē Jesucristo pijajivi. Bajarapacuenia taexanabiabinē ata, Dioso itsiata nebejiobiatane. Tsipaji jamatabēcuenenavēxaniabiaya bajarapacuenē exanabiabajē. Apo yapētaenē picani xua exanaponajē Jesucristojavabelia. Tsipaji abaxē apo jumecovēnētsinē Jesucristo Dioso pexēnatocuene. ¹⁴ Nexata baja itsiata belia vajatuxanenē Jesucristo pinijicuenia neyavenona tanajamatabēcuene copatsinexa bajaraponējavabelia. Bajaraxuacujinaē pijajivitonēxaenē, neyavenona tasivanexa itsamonae ata.

¹⁵ Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovēnēta mapalivaisije. Jesucristo baja cajena patsica mapanacuyabetsicaje pibisiacuene pexanaevimi pecapanepaenexa Diosojavabelia. Xanē ata picani bitso pibisiacuene taexanaenēmi daxitajivi matatoxenetsia. ¹⁶ Xanē

itsiata bajara taitsinēmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapētaenexa Jesucristo bajaya-jebi tanesivaajamatabēcuenesaējava tajumecovēnētsinexa, pibisiacuene taexanaenēmi ata. Nexata pamonaē bexēajavabelia ata Jesucristo-javabelia najamatabēcuenecopataponaena, xainaena matacabi apo peveverecaējava. Bajarapamonae nesivaajamatabēcuenesaē tsane itsa nevēnēlivaisitaena Jesús taneitapetsijava pijajivitonēnexanē, pibisiacuene bitso taexanabiabinēmi ata. ¹⁷ Bajaraxuata vaxaitsi pepo Dioso, daxitacuene peyapētaenējavabelia, jumaitsitsi tsabiabi: “Xamē Diosomē bitso ayaijamatabēcuenenēmē. Bitso ayaicuene nexanaenē,” jaitsi tsabiabi. Bajaraponē Dioso daxitacuene peyapētaenē. Pepo pevetsinēnua daxitacuene. Apo petēpaenēnexanua daxitamatacabijavabelianexa. Apo petaenētsinua itsajivi ata.

¹⁸ Timoteo, betaxēnatomē tacataenē. Pacuenia caitorobatsi, exanaename. Bajayata baja cajena itsamonae Dioso pejumecovēnētsivi Dioso pejamatabēcueneta tajēvelia cavajunupaeba pacuenia exanaejitsiamē. Bajarapacuenia Dioso asaējyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapētaena. Catoayapēbeje ata dovathi pecajamatabēcueneējētsixae, ajamatabēcuenesaēmēre Diosojavabelia nenajamatabēcuenecopatsijava. Exanabiabare xua yapētaneme pexaniaicuene nenajamatabēcuenebijianaeyaniva Diosovecua. ¹⁹ Itsamonae baja yapētae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovēnētsijavami. ²⁰ Bajarapamonaeyajuvēnēnēbeje Himeneobeje Alejandrobeje. Pibisiacuena Dioso baracuaicuajaiabeje tsabiabi. Nexata pecopatsinexabeje Dioso pebaracuaicuajaijavabeje, bajaraponēbeje copatajē dovathijavabelia. Nexata bexēa itsa najamatabēxainabeje pexanialivaisi, xaniavaetsia jane baja Dioso pejumecovēnētsinexabeje.

2

Pacuenia Dioso pejumecovēnētsivi daxitajivi betovajēta Diosojavabelia yabara pelivaisi

¹ Timoteo, copiaya caitorobatsi mapacueniaje. Caitorobatsi panetovajētabiabinexa daxitajivi Diosojavabelia. Daxitajivi Diosojavabelia patovajētabiabianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabēcuene parajutsianame Diosojavabelia bajarapamonae yabara. ² Patovajētsianamenua Diosojavabelia presidentevi ata. Patovajētsianamenua daxita gobierno pijalivaisi pevetsivi ata. Bajarapacuenia patovajētsianame bajarapamonae Dioso peyavenon-aenexatsi. Nexata xaniavaetsia jinavanapaenatsi avajabitsaējibia. Nexata xaniavaetsia Dioso jumecovēnētavanapaenatsi. Nexata exanavanapaenatsi ēpexaniacuene. ³ Bajarapacuenia Diosojavabelia daxita bajarapamonae vajatovajētsijava, xanepana Dioso, ponē nacacapanepaejitsia, vajanacasivabarēyanexa. ⁴ Bajarapacuenia daxitajivi vajatovajētsijava Dioso jitsipa. Tsipaji Dioso jitsipa daxitajivi pecapanepaenexa bajaraponējavabelia. Dioso tojitsipanua daxitajivi peyapētaenexa pexaniaajailivaisi, Jesucristo pelivaisi. ⁵ Nexata daxitajivi

itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuajainënexa Diosojavabelia. ⁶ Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacueno daxitajivi peyapëtaenexa, Dioso pecaëjëtsimatacabita pijajivi itoroba daxitanacuanëjava pexaniajailivaisi jivi petsipaebinexa. Tsipaji baja cajena Dioso jitsipa daxitajivi pecapanepaenexa. ⁷ Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsipaebinexa pamonaë apo judiövi ata penajamatabëcueneocopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanë cajena. Cristo tajumecovënëtsinëxax, pexaniajailivaisi jivi tsipaebaponajë. Apo najumetsënëtsinë cajena.

⁸ Bajaraxuata daxitanacuanëjava pebijivi, pamonaë baja Dioso pitabarata aneconijibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonaë bevajëta Diosojavabelia anaepanaenejeva itsajiviyojavabelia, jumeanaenotsinejevanua itsajiviyojavabelia. ⁹ Jitsipajë pijinia petiriavi penaxatabinexa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexaniacuena. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata. ¹⁰ Petiriavi, pamonaë baja xaniavaetsia najamatabëcueneocopata Diosojavabelia, pëtsa naitabëta bitso. Bajarapamonaë Dioso pitabarata pexaniacuene betoexanabiaba itsamonaëjavabelia penajamatabëcueneitabëtsinexa bëpënëjavaverena. ¹¹ Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi. ¹² Petiriavi apo tocopatsinë pemuxujiobinexa pebijivi. Apo tocopatsinënuu petiriavi beayaijamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena. ¹³ Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. ¹⁴ Adán cajena picani dovathi apo yamaxëitojorobatsi. Biji rajane copiaya petiriva dovathi yamaxëitojorobatsi. Nexata petiriva copiaya pibisiacuene exana. ¹⁵ Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonaë capanepaenatsi Diosojavabelia itsa casaë tsane penajamatabëcueneocopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamatabëcueneitsi yabara pelivaisi

¹ Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevëtsinënexa, bajaraponë pexaniacuene, Dioso pijacuene, jamatabëtonacueneba.

² Ancianonēnexa, xanepana ponē apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinē. Penajamatabēcuenereviabinē. Xaniavaetsia penajamatabēxainae. Peyaiyataenētsi. Xaniavaetsia pecopiapitabiabinē pijaboyaberena pesivaxainaevitsi. Pecaējēpaenētsi xaniavaetsia jivi Dioso pejumelivaisi petsipaebinexa. ³ Ancianonēnexa, xanepana ponē apo piapaenē piatajibinexa. Pevēna pebi apo pebenē. Apo pejitsipaenē itsajivi ata yamaxēitojorobiaya palata pevecuanacobetoxotsinexa. Biji rajane ancianonēnexa xanepana ponē pexaniajamatabēcuenenē. Anaeya itsajivi ata apo pejumepitsinē pebarēnajumeanaenotsinexa. Bitso pexainaenexa ata pexinaejava, apo penajamatabēxainae. ⁴ Ancianonēnexa, xanepana ponē xaniavaetsia eveta pexi, pijava yajava. Pexi pejumecovēnētsinētsi. Pejumeyaiyataenētsinua. ⁵ Ponē apo caējēpaetsi xaniavaetsia pexi pevetsinexa, pijava yajava, nexata bajaraponē apo caējēpae tsipaetsi pevetsinexa Dioso pejumecovēnētsivi. ⁶ Apo xanepanae tsipae ancianonēnexa ponē abaxē ajena jumecovēnēta Dioso. Beayajamatabēcuenenē itajara nataejitsipa bajaraponē. Nexata epatua Diosovecua jopaejitsipa. Bajarapacuenia bajayata dovathi penajamatabēxainae, Dioso vecuajopaica. Nexata dovathi daxitamatacabijavabelianexa naneconita Diosojavabelia. ⁷ Ancianonēnexa, xanepana ponē peyaiyataenētsi pamonae Dioso apo pejumecovēnētsivi ata. Bajarapitsinē xanepana ancianonēnexa ancianonē pexanaecujinaetsi jivi pequenetsiataeyanivatsi, dovathi ata peyamaxēitojorobianivatsi.

Pacuenia diáconovinexa bejamatabēcuenētsi yabara pelivaisi

⁸ Diáconovinexa pijinia, xanepana pamonae penajamatabēcuenereviabivi. Itaxutojema apo pecuaicuajiaivi. Apo piapaevi piatajibinexa. Apo pejitsipaevi itsajivi ata yamaxēitojorobiaya palata pevecuanacobetoxotsinexa. ⁹ Diáconovinexa, xanepana pamonae xaniavaetsia najamatabēcuenecopata Cristojavabelia. Pejamatabēēthētota peyapētaevi pexaniajaicuene palivaisi jumecovēnēta. ¹⁰ Pamonae diáconovinexa, copiaya bitorobatsi itsacunejavayo pevetsinexa bajarapacuenia pejamatabēcuenējētsinexatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinexa xua diáconovi banacueneba. ¹¹ Diáconovi pijinia pijavajivi xanepana penajamatabēcuenereviabinexa, apo bebaracuaicuajiai itsamonae. Xaniavaetsia benajamatabēxaina. Nexata xaniavaetsia bexanabiaba pacuenia itorobatsi. ¹² Diácononēnexa, xanepana ponē caeva pepitsinē. Pecaējēpaenētsinua xaniavaetsia pevetsinexa pexi, pijava yajava. ¹³ Diáconovi xaniavaetsia itsa eveta penacuenebijava, nexata diáconovi xaniavaetsia yaiyataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabēcuenecopatsijava.

Pacuenia Timoteo toyaquinatsi peyapētaenexa pacuenia exanapon-aponaejitsia Dioso pejumecovēnētsivi tuatuajēta yabara pelivaisi

¹⁴ Timoteo, bepijia picani jamatabēponajē xamējavabelia tacataenexa. Itsiata tavajēnaeyabelia catoyaquinatsi mapacuene yabaraje. ¹⁵ Nexata abaxē itsa cuenenajematsianajē tapatsijava xamējavabelia, neyapētaenexa pacuenia exanaponaponaejitsiamē Dioso

pejumecovënëtsivi tuatuajëta. Pamonaē baja Dioso pejumecovënëtsivi, Dioso rabaja piasaēnē pijajivi. Bajarapamonaē Dioso pejumelivaisi, pexaniajailivaisi, xaniavaetsia baja jumecovënētavanapa. Daxita nacuanēpijivi ata pejumecovënëtsinexa bajarapalivaisi. Bajarapamonaē pexaniajailivaisi itsamonaējavabelia tsipaebapona. Bajarapamonaē apo tocopatsinua itsajivi ata pexaniajailivaisivecua saicayalivaisi pejumecovënëtsiyaniva. ¹⁶ Pepo pexaniajailivaisi cajena Cristo pelivaisi. Bajaraponē baja vaxaitsi jumecovënētavanapatsi. Itsiata baitsi jane itsamonaē apo jamatabēcueneyapētae bajaraponē. Bajaraponē Cristo ayaijamatabēcuenenē bitso:

Bajaraponē Cristo mapanacuata naexana bevaxaitsi jivitonēcuenia. Espiritu Santo pejamatabēcueneta daxitajivi yapētaeyaexanatsi Cristo pianeconijibinēcuenē. Angelevi ata Cristo tanetsi. Cristo pijajivi vënēlvaisipaebaponatsi daxitanacuanēpijivijava. Nexata daxitanacuanēpijivi najamatabēcuenecopabapona Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovënëtsijava pecopabivi yabara pelivaisi

¹ Espiritu Santo baja cajena tajēvelia nacayapētaeyaexana pacuenia hexējavabelia itsamonaē copabijitsia Dioso pejumelivaisi pejumecovënëtsijavami. Bajarapamonaē nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonaē asaēya jumecovënētaponae na itsamonaē dovathi pejamatabēcueneta petsipaebilivaisitsi. ² Bajarapamonaē namuxunaevetsiana penajumetsënëtsilivaisi petsipaebaponaevitsi, betsitapexaniajamatabēcuenēvitsi itajara tsane, pibisiajamatabēcuenēvi ata. Bajarapamonaē tsipaebaponaena penajumetsënëtsilivaisi. Apo acueneura cajena tsane. ³ Bajarapamonaē itavetsiana penacasabicuene. Bajarapamonaē itavetsianua itsacuenējavanē jivi pexaeyaniva. Dioso cajena daxitacuenē pexaejava exanaē ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapētaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajēnae. ⁴ Daxitacuenē, xua Dioso exana vajaxaejavanexa, pexaniacuene bitso. Nexata apo biatsobitsi itsacuenējavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuenē vajaxaenexa. Pexaniajamatabēcuenē rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponaponaenexa, xaniavaetsia petsipaebinexanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinē tsane. Nijamatabēcuenesaēnēna nevajēnaeyabelia, asaēya jumecovënētaponaponare palivaisi baja jumecovënētavanapatsi. Pexaniajailivaisi, Dioso pejumelivaisi, palivaisi itsamonaē

catsipaeba, tsiteca asaëya jumecovënëtaaponaponare. ⁷ Itsiata baitsi jane pëtsa jumecovënëtae mapanacuapijilivaisianëje, saya natsiquejemalivaisianë. Daxita nesaëta nacujaubare xaniavaetsia neponaponaenexa Dioso pejitsipacuenia. ⁸ Vajajumalixanepanaenexa, xanepana picani vajaperabësaëta vajacujinaejinaejava. Itsiata baitsi jane daxitacuenenevecua xanepana bitso vajajinavanapaenexa pacuenia Dioso nacatojitsipa. Bajarapacuenene nacatoxanepana tsipaji vajatëpaecujinae ata Dioso nacajamatabëcueneyavenonaena xaniavaetsia vajajinavanapaenexa. ⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. ¹⁰ Bajaraxuata Dioso tonacuenebaponaponatsibeje. Casaëtsibeje tsaponaponae Dioso vajatonacuenebaponaponaejavabeje, itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaenajamatabëcuenecopata bajaraponëjavabelia.

¹¹ Bajarapalivaisi tsipaebaponare. Itorobaponarenuajajarapacuenia pexanaenexa. ¹² Pëtsa nacopatame pevëjëatoxaemë itsajivi atapecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopare xaniavaetsia Diosojavabelia pecayavenonaenexa daxitacuenene yabara. Èpexaniacuenene yabara najamatabëxainare. Bajarapacuenia itsa tsitaexanaponaponaename, nexata Dioso pejumecovënëtsivi cacuenjëpaeyajinavanapaena. ¹³ Tavajënaelia bajarapacuenia exanaponaponare. Jivi penacae-tuatsijavata, Dioso pejumelivaisibaxuto tsimumxulebabiabare. Tsipaebaponarenuajajarapacuenia jumaitsi Dioso pejumelivaisibaxutota bajarapamonae pijamatabëcuenesaënexa Diosojavabelia. ¹⁴ Dioso baja cajena carajuta pecacajëpaejamatabëcuenene xaniavaetsia jivi livaisi netsipaebinexa, pecacajëpaejanexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcuenenevetaponaponare. Pamatacabi ancianovi nacaetuata, catsimatanacobeuatsiaya catovajëta Diosojavabelia. Nexata bajarajota Dioso carajuta pecacajëpaejamatabëcuenene.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejume-covënëtaaponaponaejavamë pacuenia caitorobatsi. ¹⁶ Pibisiacuenene nayajiv-itaeya ponaponare. Palivaisi ata tsipaebaponare, xaniavaetsia tsipaebaponare. Saicayacuenia pëtsa bajarapalivaisivecua tsipaebaponare. Bajarapacuenia nexanaejava casaëmëre tsaponaponae. Nexata Dioso cacapanepaena. Pamonaenata cajumecovënëta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponaenexa Dioso pejumecovënëtsivijavayabara pelivaisi

¹ Pētsa asaēya muxujiobame pamonaē nevajēnaeyapijivi. Biji xaniavaetsia yayataeya beaxacuenia muxujiobare. Necovēpijivi pijinia benejuyapijivicuenia muxujiobare. ² Petiriavi ata nevajēnaeyapijivi beenacuenia muxujiobare. Necovēpijivaxi pijinia benejuyapijivacuenia muxujiobare. Ēpexaniajamatabēcuenia taema bajarapovaxi itsaxamatabēcuenē bēpēnēa nejamatabēēthētota sivanajamatabēxainaenejevamē.

³ Pamona pevecuatēpaevatsi, Dioso pejumecovēnētsiva, yayataeya yavenonare itsa bitso bejiobi. ⁴ Itsiata baitsi jane pamona pevecuatēpaevatsi, itsa xaina pexi, pemomoxi ata, bajarapamonaē xanepana pevetsinexatsi. Bajarapamonaē xanepana peyavenonaenexa pijamonaē. Bajarapamonaē juya beveta paxa, pena ata, pamo ata, pacue ata, pamonaē vitsatatsi. Bajarapacuenia itsa exana, exana pexaniacuenē. Nexata Dioso barēyataenatsi. ⁵ Pamona pevecuatēpaevatsi, Dioso pejumecovēnētsiva, itsa apo xainae itsajivi ata pevetsinexatsi, bajarapova najamatabēcuenecopataponaponaē Diosojavabelia peyavenonaenexatsi. Navajētabiabi Diosojavabelia matababita, meravi ata. ⁶ Itsiata baitsi jane pamona pevecuatēpaevatsi pejitsipacuenia pibisiacuenē itsa exanaponapona, Dioso tanetsi bepetēpaeva, abaxē asaē taponaponaē ata. ⁷ Bajarapacuenia itorobare Dioso pejumecovēnētsivi pijamonaē peyavenonaenexa itsa bitso bejiobi. Nexata pamonaē Dioso apo pejumecovēnētsivi, toacuenēbi tsanetsi pebaracuaicuaijavatsi bajaraxua yabara. ⁸ Dioso pejumecovēnētsivi, pijamonaē beveta. Pajivi apo itaxutotsoniatāē pevetsinexa pepo pijamonaē ata, bajarapajivi apo exanaē pacuenia Dioso itorobatsi. Nexata pijamonaē itsa apo evetsi, bajarapajivi bitso pibisiacuenē exana Dioso apo pejumecovēnētsijivi matatoxenetsia.

⁹ Petiriva sesenta pavaibeje pexainaeva, caeto penacojiobicujinaē pamona pevecuatēpaevatsi, xanepana pevēnēyaquinarutsinexatsi pamona pevecuatēpaevatsi pevēnēyaquinarubibaxutota. Nexata daxita Dioso pejumecovēnētsivi peyavenonabiabinexatsi. ¹⁰ Pova pamona pevecuatēpaevatsi itsa cueneyapētānatsi pexaniacuenē pexanaejava, bajarapova xanepana pevēnēyaquinarutsinexatsi pamona pevecuatēpaevatsi pevēnēyaquinarubibaxutota. Mabaitsi pacuenē pexanaeva xanepana pevēnēyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabēcuenecovēbia Dioso pejumecovēnētsivi peyavenonaeva. Peyavenonaevanua itsamonae itsa bejiobiaexanatsi Dioso pejumecovēnētsijava yabara. Daxita xua pexaniacuenē, pexanaeva, xanepana pevēnēyaquinarutsinexatsi pamona pevecuatēpaevatsi pevēnēyaquinarubibaxutota.

¹¹ Itsiata baitsi jane pova abaxē sesenta pavaibeje apo pexainaeva, pētsa vēnēyaquinarutame nevēnēyaquinarubibaxutota peyavenonaenexatsi daxita Dioso pejumecovēnētsivi. Tsipaji bajarapova itsa jitsipa pexanaenexa pacuenia natojitsipa, copatsipa Cristo pejumecovēnētsijavami. Nexata icatsia nacojiobijitsipa. ¹² Nexata pijaneconi xainaejitsipa Diosojavabelia. Tsipaji copatsipa Cristojavabelia penajamatabēcuenecopatsijavami: “Capanepaeya baja jumecovēnētājē Cristo,” jai ata. ¹³ Pematatsēnēa bajarapova sivaxainarutsipa itsa bonējāva. Afaetabinua tsipae. Pematatsēnēa baracuaicuaijai tsabiabi tsipae itsamonae. Jamatabēitonotabiabijitsipa

itsamonae. Xuaxi yabara ata apo becuaiuaijaiti, cuaiuaijai tsabiabi tsipae. ¹⁴ Bajaraxuata pamona pevecuatēpaevatsi, pova abaxē bitso apo perujuva, jitsipajē icatsia penacojobijava pexi pexainenexa, pijabo ata xaniavaetsia pevetsinexa. Nexata bajarapacuenia vajanacacuenitoyavi ata toacuenebi tsanetsi pebaracuaiuaijajavatsi bajarapitsiva. ¹⁵ Bajarapacuenia jumaitsinē tsipaji baja itsamonae pamonajivi pevecuatēpaevatsi copaba baja Cristo pejumecovēnētsijavami. Nexata pacuenia dovathi itorobatsi, exanavanapa.

¹⁶ Dioso pejumecovēnētsivi, pebijivi, petiriavi ata, itsa pijamonaeya-juvēnēva pamona vecuatēpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonaenexatsi daxita Dioso pejumecovēnētsivi. Tsipaji baja pijamonaevetatsi. Nexata Dioso pejumecovēnētsivi caējēpaejitsiatsi peyavenonaenexa pamonaevetatsi, pamona pevecuatēpaevatsi pijamonaevetatsi.

¹⁷ Ancianovi, pamonaevetatsi, bajarapamonae xaniavaetsia evetabiaba Dioso pejumecovēnētsivi, bajarapamonae xaniavaetsia bematamotatsi. Beyaiyatanetsinua. Ancianovi, pamonaevetatsi Dioso pitorobilivaisi bitso tsipaeba, bitso cujarubana, bajarapamonae xaniavaetsia bematamotatsi. ¹⁸ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxubina, pētsa pumuxatatame nepumuxatatabijavata. Pētsa pumuxatatame trigoxu pexaenexa pecatotanabataxubijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinē bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabēcueneta bitso penacuenebivi.

¹⁹ Pētsa jumexaniantaneme caejivi pepaebijava ancianonē pibisiacuene pexanaejava yabara. Matapania anijavibeje, acueyabi pajivibeje ata, petaevatsi catsipaebiana, jumecovēnētsianame. ²⁰ Nexata xaniajai ancianovi pibisiacuene itsa exanapona, itavere daxita Dioso pejumecovēnētsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cjunaviana pibisiacuene pexanaejava. ²¹ Dioso pitabarata, vajatuxanenē Jesucristo ata pitabarata, Dioso pijaángelevi ata pitabarata, xanē jamatabēcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najēpaeya itavetsianame. Ponē ancianonē, bitso pecayapētaenē, pibisiacuene itsa exana, pētsa sivaajumeuramē nitavetsinexa pibisiacuene pexanaejava. ²² Pētsa itsanē ata bepíjia exaname ancianonēnexa. Tsipaji ponē bepíjia ancianonēnexa exanaejitsipame, bepíjia pibisiacuene itsa exana, nexata itsamonae cataejitsipa pibisiacuene pexanaevi benejamatabēcueneyavenonaenē. Daxita pibisiacuenevecua, xaniavaetsia naevetsiaya ponaponare.

²³ Xamē raja ajamatabēepatanemē tsabiabi. Nexata pētsa apaeyabi-abame ēpitaranae. Tsiquirijavayo vinorayo, pitaranae yajava, apaeyabi-abianame.

²⁴ Itsamonae pibisiacuene itsa exana, bananeconitsiaexanatsi daxitajivi pepuacueneypētaetsi. Itsamonae pijinia pibisiacuene exanae

ata, bepíjia apo cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava. ²⁵ Bajara pijinia itsi itsamona pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

6

¹ Pamona dajubicuenia canajetatsi itsamonaejavabelia amoneya petonacuenebabiabinexa, bajarapamona Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuenia apo baracuaicuajai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuajai tsane. ² Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaiti pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënë. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamona saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje. ⁴ Cueneyapëtanetsi pamona penajumetsënëtsilivaisi tsipaebapona. Bajarapamona beayajamatabëcuenevi itajara natane. Itsiata bajarapamona pexaniajailivaisi apo yapëtae. Bitso bepematajemavitsi jinavanapa. Nexata bajarapamona jitsipabiaba itsamonaejavabelia pejumenaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonaeyajuvënëvi itsa xaina itsacueneyavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamona covë nitsacueniabijitsia,” jamatabëjai tsabiabi, itsamona apo itsacueniabijitsia atatsi. ⁵ Bajarapamonae anaeya namataenetsia najumenotabiaba. Tsipaji piamatabëcuenebejevi. Bajarapamona pexaniajailivaisi, Cristo pelivaisi, apo yapëtae xaniavaetsia jivi petsipaebinxaxa. Saya bajarapamona jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. ⁶ Vaxaitsi Dioso vajajumecovënëtsivi, bitso cajena vajaxainaevi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxainaxaxa mapanacuataje. ⁷ Pamatacabi vaxaitsi naexanatsi mapanacuataje, itsacueneyavayo ata apo capatsitsi. Pamatacabi pijinia tēpaenatsi, apo capona tsanetsi itsacueneyavayo ata mapanacuapijicueneje. ⁸ Bajaraxuata nexata itsa xainatsi vajaxaejava,

vajanaxatabijava ata, besivajamatabëcuenebarëyatsi. ⁹ Itsiata baitsi jane pamonaе najamatabëxaina ëpexainaejavanexa, bajarapamonaе dovathi jamatabëcueneçëtatsi. Nexata pibisiacuene exana palata pepitsinexa. Jamatabëcuenebïjianatsi. Nexata bajarapamonaе Diosovecua naxuabiaya jinavanapa. ¹⁰ Pamonaе bitso palata jitsipa, daxita xua pibisiacuene exana palata pepitsinexa. Itsamonaе bitso najamatabëxaina ëpexinaeacuene pexainaenexa. Nexata baja copaba Dioso pejumecovënëtsijavami. Nexata bajarapajamatabëcuene bëpënëa bitso yajamatabëcuenebëjai.

Pacuenia Timoteo muxujiobatsi pijajamatabëcuenesaënexa Diosojavabelia penajamatabëcueneçopatsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuenesaëmëre Dioso nejumecovënëtaaponaponaеjava. Dioso asivamëre. Diosojavabelia najamatabëcueneçopatsiaya ponaponare. Itsamonaе ata asivamëre tsaponaponaе. Itsamonaе caitsacueniababiabi ata, bajayajebi casaëmëre tsaponaponaе Dioso nejumecovënëtaaponaponaеjava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare. ¹² Catoayapëbeje ata Diosojavabelia nenajamatabëcueneçopatsijava, ajamatabëcuenesaëmëre nepitsinexa xua Dioso carajutsijitsia, matababi apo peverevereçaejava. Pamatacabi navajunupaebame nejumecovënëtsijava Jesús Dioso pexënatocuene, Dioso çajunata peçarajutsinexa matababi apo peverevereçaejava. Ayaibitsaëtöxaneto Dioso pejumecovënëtsivi pitabarata, Dioso çajunata peçarajutsinexa matababi apo peverevereçaejava. ¹³ Dioso baja çajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuupaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovënëtaaponaponaenexa daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata peçaitavetsinexa. Bajarapacuenia vajënaeçvetaponaponare vajatuxanenë Jesucristo matapania pepatsimatacabitsicajavabelianexa. ¹⁵ Pamatacabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenë daxitanacuanë pevetsivivecua. ¹⁶ Caenë Dioso apo tëpae tsane daxita matababijavabelianexa. Dioso peyacotiayaponaponaenë. Bajaraxuata itsajivi ata acuenebi pimoxoyotsijava Dioso. Itsajivi ata çajena caeto ata apo tae Dioso. Tsipaji apo caëjëpaetsi petaejava. ¡Daxitamatacabi Dioso pijajivi yaiyatanetsi! ¡Dioso çajena ayaijamatabëcuenenë daxitamatacabijavabelianexa!

¹⁷ Pamonaе bitso pexainaevi mapanacuapijicuneje, bajaramonaе muxujiobare beayaijamatabëcuenevi penataeyaniva. Muxujiobarena pejamatabëjumaitsiyaniva: “Palata baja taxainaexae, apo namatavenonaenë itsacuenejava ata,” pejamatabëjaiyaniva. Tsipaji saya palata peverevereçaejava. Biji rajane itorobare bitso pexainaevi penajamatabëcueneçopatsinexa piasaëtsaponaponaenë Diosojavabelia. Dioso nacarajuta daxita vajaxainaejava barëyaya vajacajinavanapaenexa. ¹⁸ Itorobarena bajarapamonaе pijapalata peçanacuenbinexa, itsamonaеjavabelia pexaniacuene petoexanabi-abinexa bajarapapalatata. Itorobarena penajamatabëcueneveretsinexa

palata perajutsinexa bepejiobivijavabelia, bajarapacuenia peyavenonaenexa. Itorobarena petsicobetsanaponaenexa pexinaejava bepejiobivijavabelia. ¹⁹ Bajarapacuenia itsa exanaena, nexata athébētatsia Dioso tobuataponaenatsi pepacuene penamatamotsijava pexinaenexa daxitamatacabijavabelianexa. Xainaenanua matabi apo peverevereaejava.

Pacuenia Pablo Timoteo pemuxujiobilivaisi toyaquina, pecopatsivajēnae petoyaquinaelivaisi mapabaxutotaje, yabara pelivaisi

²⁰ Timoteo, exanapononare daxita xua Dioso catocopata nexanaenexa. Pētsa namuxunaevetame pamona bitso pecuaicuaijaivi saya mapanacuapijicuene yabaraje. Pētsa namuxunaevetame pecuaicuaijaivi natsiquejemalivaisixi. Pētsa namuxunaevetame pamona jivi tsipaebapona penajumetsēnētsilivaisi. Bajarapamona tsipaebapona itajara pepacuene bepexaniajailivaisi. Itsiata cajena apo pexaniajailivaisi. ²¹ Itsamonae bajarapalivaisi jumecovēnēta. Nexata baja copaba Dioso pejumecovēnētsijavami.

Catovajētatsi Dioso peyavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaitsi vajanacarajutsinexa matababi apo peverevereaejava. Dioso nacarajutsiana matababi apo peverevereaejava, Jesucristo vajajumecovënëtsivi. ² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebeje. Catovajëtatsi pecaitaxutotsoniataenexabeje, pecajamatabëcuene xanepanaeyaexanaenexanua bajaraponëbejejavabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara. ⁴ Najamatabënapitabiabajë tanepënuayabaxuabijavamë pamatababi navecuanatsatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaevianiva Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatababi catsimatanacobeuatatsi tacatovajëtsijavata Diosojavabelia. ⁷ Dioso cajena nacarajuta Espíritu Santo. Espíritu Santo nexata vajanacayajavaponaponaexae, apo cjunavitsi itsacuenejava ata. Espíritu Santo pesaëta nacacajëpaeyaexana pacuenia Dioso nacatojitsipa vajaexanabibinexa. Nacayavenonanua vajaasivanexa itsamonae ata. Nacanajamatabëcuene cataitsiaexananua pibisiacuene ata vajaexanaeyaniva. ⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxaenë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana. ⁹ Dioso cajena nacacapanepaena pibisiacuene vajaexanaeconimivecua. Nacajunata vajatojinavanapaenexa xaniavaetsia. Itsacuenejavayo pexaniacuene

apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamatacabi abaxë Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabëcuenecopatatsi Jesucristojavabelia, nacacapanepaena Diosojavabelia. Nexata xainaenatsi matacabi apo pevereverecaejava.

¹¹ Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenëxanë tatsipaebaponaenexa bajarapalivaisi apo judíovijavabelia. ¹² Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo auranë tanebejiobiaexanaejava yabara. Tsipaji ponëjavabelia najamatabëcuenecopatajë, jamatabëcueneyapëtaniji. Jamatabëcueneyapëtaniji pacuenia bajaraponë jamatabëcuenecaëjëpatsi taneyavenonaexa. Nexata bajaraponë neyavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

¹³ Timoteo, casaëmëre tsaponaponae nejumecovënëtsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabënaponaponare. Xaniavaetsia jumecovënëtsia ponaponare. Asivaya taeyabiabare itsamonae ata Jesucristo pijajivitonëxaemë. ¹⁴ Espíritu Santo cajena nacayajavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso caitoroba, exanabiabare. Saicayalivaisicuenia pëtsa tsipaebaponame. Espíritu Santo cayavenon-aena.

¹⁵ Xamë baja cajena yapëtaneme pacuenia Asíavënë nacuapijivi, daxita Dioso pejumecovënëtsivi, nexuabarëcëpeca. Tanexuabarëcëpecaevi yajuvënënebeje Figelobeje Hermógenesbeje. ¹⁶ Onesíforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesíforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesíforo cajena apo neyabaraaura, penaneconitsivi pejebabiabibota ecae atanë. ¹⁷ Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitarsijava. ¹⁸ Diosojavabelia Onesíforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesíforo nacayavenonabeje pamatacabi ponaponatsibeje Efeso tomarata.

2

Pacuenia Jesucristo pijajivitonë jamatabëcueneitsi, ponë xaniavaetsia jumecovënëta, yabara pelivaisi

¹ Timoteo, xamë betaxënatomëcuenia tacataenë. Catovajëtatsi Diosojavabelia pecajamatabëcuene asaëyaexanaenexa. Nacayavenonaena Jesucristo pijajivixaetsi. ² Xamë rabaja cajena nejumetaeyabiabame palivaisi tsipaebabiabajë jivi ayaibitsaëttoxanetonëjavabelia. Bajarapalivaisi

juya tsipaebare itsamonaejavabelia. Pamonaē apo piacuenējitsibivi pexanaenexa pacuenia itorobatsi, pecaējēpaevitsinua xaniavaetsia jivi livaisi petsipaebinexa, bajarapamonaē itorobare juya mataropotsia bajarapalivaisi petsipaebinexa itsamonaejavabelia.

³ Dioso pejumelivaisi jivi netsipaebaponaējavata, itsa catoayapēbeje, itsamonae itsa cabejiobiaexanaējitsianua, pētsa najetabajiravame. Jesucristo pijajivitonēxaemē, jamatabēcueneevetaponaponare pacuenia caitoroba nexanaenexa. Pacuenia pexaniavajabitsaēnē itsi, bajaraitsimēre. ⁴ Vajabitsaēnē pitorobabiabinētsi jamatabēcueneevetaponapona pacuenia itorobatsi pexanaenexa. Nexata apo vecuanajamatabēcueneepatajērētsi saicayacuene pevetaponaenexa. ⁵ Bajara pijinia pacuenia pebitsojinaēvi pecujinaejinaejava, penayacobijavata, kujinaejina pacuenia itorobatsi pijatuxanevi. Penacanabinē jamatejema perajutsinexatsi itsacuenejavayo. Pajivi xaniavaetsia apo kujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. ⁶ Ponē pijinia pabi nacueneba peubinexa peubijava, bajaraponē copiaya nacueneba asaēyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamē ata asaēya tonacuenebare vajatuxanenē. Nexata vajatuxanenē carajutsiana netonacuenebimatamo. ⁷ Najamatabēxainare tacatsipaebilivaisi. Nexata vajatuxanenē cayapētaeyaexanaena bajarapalivaisi.

⁸ Canaējēre Jesucristo. Bajaraponē cajena Dioso asaēyaexanatsi petēpaecujinae. Bajaraponē cajena Davidpijinē pemomoxiyajuvēnēnē. Bajaraponē pelivaisi jivi tsipaebabiabajē. Itsa jumecovēnēta bajarapalivaisi, pecapanepaelivaisinexatsi Diosojavabelia. ⁹ Bajarapalivaisi tatsipaebaponaexae, penaneconitsivi pejebabiabibota neeta tavajēnaeyabelia daxitanacuanējava tatsipaebaponaeyaniva. Cadenamaētonēta xanē necēta, pacuenia bitso pibisiacuene pexanaenē bacētatsi. Itsiata Jesucristo pelivaisi apo cētsicapanepe. Nexata xanē majotaje naneconitsia ponaponaē atanē, aeconoxae baja Jesucristo pelivaisi yacaējēpapona daxitanacuanējava. ¹⁰ Bajaraxua tayapētaexae, tonacaevetajē itsamonae ayaicuenia tanebejiobiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovēnētsixae. Nexata bajarapamonaē ata Dioso capanepaenatsi pexainaenexa matababi apo pevereverecejava daxita matabacijavabelianexa. Nexata bajarapamonaē Jesucristo yajavajinavanapaena pinijicotia yajava. ¹¹ Palivaisi aeconoxae jumaitsinējitsia, pexaniajailivaisi cajena:

Itsa xaniajai Cristo yajavatēpatsibeje, nexata icatsia Cristo yajavaasaētsibeje tsaponaponaē tsane. ¹² Itsa casaē tsaponaponaētsibeje tsane Cristo pelivaisi vajajumecovēnētsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatababi daxitacuene evetsiana pijanacuatatsia. Itsa vaxaitsibeje bajaraponē pelivaisi vajajumecovēnētsijavabeje nayavajunuaxainaenatsibeje jivijavabelia, nexata juya bajaraponē pijajivitonēcueneatsibeje nacayavajunuaxainaenabeje paxa Diosojavabelia. ¹³ Vaxaitsi itsajamatabēcuene Dioso vecuanajamatabēxinae atatsi, itsiata

Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

¹⁴ Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamonae. Pëtsa bajarapamonae anaeya jumenota saya itsamonae pecuaicuajijava. Pejumeanaenotsijava itsamonae, apo jamatabëcueneayavenonae tsipaetsi itsajivi ata. Saya jamatabëcuenebijinaejitsipatsi daxita pejumetaevitsi. ¹⁵ Pacuenia cacaëjêpa, Dioso pecaitorobicuenia exanapononare. Nexata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebaponaponame Dioso pejumelivaisi, pepo pexaniajailivaisi. ¹⁶ Pëtsa namuxunaevetame pamona tsipaebapona natsiquejemalivaisi, mapanacuapijilivaisi. Tsipaji raja bajarapamonae petsipaebaponaelivaisita, jivi Dioso pejumecovënëtsijavami copabiaexanapona pevajënaeyabelia. ¹⁷ Bitso cajena abebe bajarapalivaisi. Pacuenia ayaivajënë banaexanapona pevajënëtsabanajetarucaejava, bajara pijinia jamatabëcueneitsi bajarapamonae petsipaebaponaelivaisi. Tsipaji pevajënaeyabelia jivi ayaibitsaëto jamatabëcuenebijianaponatsi bajarapalivaisi petsipaebaponaexaetsi. Bajarapalivaisi petsipaebaponaevi yajuvënënenëbeje Himeneobeje Filetobeje. ¹⁸ Bajaraponëbeje copatabeje baja pexaniajailivaisi pejumecovënëtsijavamibeje. Jamatabëcuenenavëxaniababeje saya. Tsipaji jumaitsi beje tsabiabi: “Panepa rabaja jivi petëpaecujinae icatsia Dioso piasaëyaexanaponaevaminexa,” jai beje tsabiabi. Nexata bajarapacuenia Dioso pejumelivaisivecua najamatabëcuene epatajërërcaponabeje. Nexata bajaraponëbeje itsamonae ata Dioso pejumecovënëtsijavamivecua najamatabëcueneepatajërërcaya exanaponabeje. ¹⁹ Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenë cajena yapëtane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanë raja Cristo pijajivitonënë,’ jai, bajarapajivi becopata pibisiacue pexanaejava,” pejailivaisiyo ruca.

²⁰ Riconë pijaboxanetota jivi pecanabaninëanënexa, xaina daxitacuenevirianëanë. Itsanëanë penioponaeplataninitota pexanaenëanë. Itsanëanë oronanitota pexanaenëanë. Pamatacabi riconë topatatsi petuxanevi, ayajamatabëcuenevi, pexaejava abatabiaba bajaraponëanëta. Itsanëanë bevelianëanë, naejavanëanë. Itsanëanë atsananinëanë. Bajaraponëanë xaina daxitamatacabi jivi pecanabaninexa. ²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcueneevetaponapona pibisiacue pexanaeyaniva, bajarapajivi jamatabëcueneitsi pacuenia oronanitota pexanaenëanë itsi. Baitsi baja ajamatabëcuenexuirajibi. Nexata pijatuxanenë tsitaxanepana pitorobinexatsi xua pexaniacue

pijatuxanenë petonacuenebinexa. Timoteo, bajaraxuata xaniavaetsia benaevetaponaponame pibisiacuene nexanaeyaniva.

²² Pacuene pevëjëavi najamatabëxaina pibisiacuene pexanaenexa, bajarapacuene vecuanajetabajiravaponare. Casaëmëre tsaponaponae ëpexaniacuene nexanaponaponaejava. Diosojavabelia najamatabëcuene copatsiyaponaponare. Asivamëre tsaponaponae itsamonae ata. Jamatabëcuenexanepanaeya ponaponare Dioso pitabarata. Bajarapacuenia barëajamatabëcuenesaëmëre tsaponaponae, pamonae xaniavaetsia penaevetavanapaevi pibisiacuene pexanaeyaniva, penavajëcabiabivinu Diosojavabelia peyavenonaenexatsi. ²³ Namuxujemare natsiquejemalivaisixi pecuaicuaijavi. Yapëtaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. ²⁴ Jesús cajena pijajivitonë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaebe xaniavaetsia. Bajayajebi ata apo becopatsi livaisi petsipaebeponaejava. ²⁵ Xaniavaetsia muxujiobiaya livaisi betsipaebeponapona pamonae Dioso apo pejitsipaevi ata. Nexata beevetaponapona bajarapamonae ata pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata bajarapamonae ata Dioso yapëtaeyaxanaenatsi Jesús pelivaisi pexaniajailivaisicuene. ²⁶ Nexata icatsia najamatabëxainaena xaniavaetsia Dioso pejumecovënëtsinexa. ²⁵ Xaniavaetsia muxujiobiaya livaisi betsipaebeponapona pamonae Dioso apo pejitsipaevi ata. Nexata beevetaponapona bajarapamonae ata Nexata dovathi pejamatabëcuene itorobabiabijavatsivecua najamatabëcuene pënëyorotsiana Diosojavabelia.

3

Pacuenia jivi itsane itsa baja imoxoyo pevajënae nacua pevereverecaenexa yabara pelivaisi

¹ Timoteo, xaniavaetsia beyapëtaneme mapacueneje. Itsa baja imoxoyo pevajënae tsane nacua pevereverecaenexa, bajarapamatacabi bitso ayapëbeje tsane daxitacuenejavabelia. ² Bajarapamatacabi cajena caejivi canacujitsia pexinaejava, natoasiva tsane ëbajarapamonae ayaijava pexinaenexa. Navajunupaebiana saya peyaiyataenexatsi pejumetaevitsi. Beayaijamatabëcuenevi nataena. Navajunupaebiana pexanaejava yabara peyaiyataenexatsi. Bajarapamonae pibisiacuenia baracuaicuaijai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamonae apo yayatae tsane itsamonae Diosojavabelia pevajëcabiabijava. ³ Bajarapamatacabita bajarapamonae apo asiva tsane pijamonae ata. Apo itaxutotsoniatae tsane itsamonaejavabelia ata. Najumetsënëtsiaya baracuaicuaijai tsabiabi tsane itsamonae. Apo caëjëpaetsi tsane penajamatabëcuene cataitsinexa pibisiacuene pexanaejava. Anaepanabiabiana bitso pebejiobiaexanaenexa itsamonae. Itoya tsane daxita pexaniacuene pexanaevi. ⁴ Bajarapamonae canajetsiana penajuajinavanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijiaya naëcotsiana itsamonae. Dioso apo jamatabënajinae tsane. Jaitsiana biji pebarëyajamatabëcuene saya pebarëyanexa. ⁵ Bajarapamonae itajara

najonena Dioso pejumecovënëtsivijavabelia. Itsiata baitsi jane apo jume-covënëtsi tsane Dioso pejumelivaisi, jumetae ata.

Bajarapamonae navecuatsatsianame. ⁶ Bajarapamonae navecuatsatsianame tsipaji bajarapamonae yajuvënëvi itsamonae pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitojorobabiabiana. Bajarapapetiriavi jamatabëcuenefaefaenaena. Daxitacuene pibisiacuene jamatabëexanabiabiana. Nexata pamatacabi bajarapapetiriavi pibisiacuene jamatabëexana, patabiabiabiana penajumetsënëtsilivaisi petsipaebinxatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana. ⁷ Bajarapapetiriavi picani jitsipaena petsipaebabiabinxatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinxatsi Diosojavabelia. ⁸ Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebiyantsibeje. Bajara pijinia pacuenia pamona petiriavijavabelia penajumetsënëtsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyantivatsi. Bajara papebijivi apo cajëpaetsi tsane penajamatabëxainaeenexa xaniavaetsia. Bajarapamonae saya yamaxëitojorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. ⁹ Itsiata bajarapamonae ayalbitsaëto jivi apo pënaponaetsi tsane. Daxitajivi cueneyapëtaenatsi bajarapamonae saya jema livaisi petsipaebaponaejava. Nexata pacuenia bajayata Janespijinëmibeje Jambrespijinëmibeje daxitajivi cueneyapëtanetsibeje pibisiacuene pexanaponaejavabeje, bajara pijinia pacuenia bajarapamonae ata daxitajivi cueneyapëtaenatsi penajumetsënëtsilivaisi petsipaebaponaejava.

Pacuenia baja Pablo copatsijitsia Timoteo pemuxujibijava yabara pelivaisi

¹⁰ Timoteo, xamë baja cajena yapëtaneme palivaisi tsipaebabiabajë jivibitsaëto xanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaponaponajë. Yapëtanemenua pacuenia itsamonaejavabelia livaisi tsipaebaponajë bajayajebi copatsinejevanë. Yapëtanemenua pacuenia itsamonae ata asivanë. Yapëtanemenua pacuenia casaënë tsaponapona jivi livaisi tatsipaebaponaejava netoayapëbeje ata. ¹¹ Yapëtanemenua pacuenia itsamonae pibisiacuena nebaracuacuajai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquia tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. ¹² Xaniajai cajena. Daxita pamona najamatabëcuene copata xaniavaetsia petojinavanapaenexa Jesucristo, bajarapamonae bejiobiaexanaponaenatsi. ¹³ Nexata pibisijamatabëcuenevi, pamona dovathi pejamatabëcueneta jivi yamaxëitojorobapona, orijibia bitso pevajënaeyabelia pibisiacuene exanaponaena. Bajarapamonae dovathi pejamatabëcueneta jivi yamaxëitojorobaponaena. Nexata pijinia bajarapamonae ata bitsoyo dovathi yamaxëitojorobaponaenatsi.

14 Timoteo, itsiata baitsi jane xamë casaëmëre tsaponaponae palivaisi baja capanepaeya jumecovënètame. Tsipaji baja cajena xamë jamatabëcueneyapëtaneme pacuenia jamatabëcuenetsi pamonae catsipaeba bajarapalivaisi. 15 Tsiquirinëyomëjavaveliacujinae baja cajena yapëtaneme Dioso pejumelivaisi. Bajarapalivaisi cayapëtaeyaexana pecacapanepaejavanexa Diosojavabelia nenajamatabëcuenecopatsixae Jesucristojavabelia. 16 Dioso pijajivi Espiritu Santo itorobatsi peyaquinaenexa Dioso pejumelivaisi. Nexata pacuenia Espiritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonënexa. Nexata nacatoxanepana Dioso pejumelivaisi itsamonae vajanacatsipaebinexa vajayapëtaenexa pexaniajailivaisicuene. Nacatoxanepananua Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepananua Dioso pejumelivaisi vajanacajamatabëcuenitorobinexa ëDioso pejitsipacuene vajatoexanabiabinexa. Nacatoxanepananua Dioso pejumelivaisi vajanacayapëtaeyaexanaenexa xaniavaetsia vajatojinavanapaenexa Dioso. 17 Nexata Dioso pejumecovënëtsinë itsa yapëtaneme Dioso pejumelivaisi, jamatabëcuenecaëjëpaenatsi daxita xua pexaniacuene pexanaenexa.

4

1 Pepo petuxanenë Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaëtsavanapaevi, petëpaevi ata. Bajaraponë itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanë jamatabëcuenereviaya caitorobatsi mapacueniaje. 2 Daxitamatacabi jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovënëtsiaexanare. Itavere pibisiacuene pexanaejava. Muxujiobare piagamatabëcuenesaënexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabëcuenecueranaenejevamë. 3 Bajarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojaitsiana saicayalivaisi Dioso pejumelivaisivecua ayaibitsaëto petsipaebinexatsi. Bajarapamonae pijacuata junatsiana petsipaebinexatsi palivaisi muxujitsipa. 4 Nexata pexaniajailivaisi petsipaebiyativatsi, navecuaitavetsiana. Jumecovënëtsiana saya ënatsiquejermalivaisixi. 5 Itsiata baitsi jane xamë saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapëbeje ata, itsamonae cabejibiaexanae ata, casaëmëre tsaponaponae nevajënaeyabelia. Casaëmëre tsaponaponae jivi netsipaebijava pexanialivaisi pecapanepaelivaisinexatsi Diosojavabelia.

6 Xanë baja netoimoxoyo tsaponae tatonacaevetsinexa tanebeyaxuabinexa. 7 Pacuenia pebitsojinaenë pecujinaejinaejava daxitasaëta cujinaejinaeya pata, bajarapacuenia xanë ata xaniavaetsia daxita tasaëta tonacuenebajë tajatuxanenë. Toveretaponajë baja tatonacuenebija taneitorobicuenia. Apo copatsinë cajena tanajamatabëcuenecopatsijava

Diosojavabelia. ⁸ Pacuenia penayacobijavata, pebitsojinaenē pecujinaejinaejava, barajutatsi corona pecujinaejinaematamo, bajara pijinia pacuenia xanē ata vajatuxanenē athēbētatsia nerajutsiana pexaniacuene taneitorobicuenia tatoponaponaexae. Bajarapacuenē nerajutsiana pamatacabi vajatuxanenē patsianica. Itsiata baitsi jane ēxanē apo nerajutsi tsane bajarapacuenē. Daxita pamonaē ata ajamatabēcuenesaēya vajēnaeēvetavanapa pepatsijavatsica Jesucristo, bajarapamonaē ata rajutsianatsi bajarapacuenē. Vajatuxanenē itsa patsianica, naneconitsiaexanaena daxita pamonaē naneconita bajaraponējavabelia. Vajatuxanenē itsa naneconitsiaexanaena daxita pamonaē naneconita bajaraponējavabelia, itaxutojema apo naneconitsiaexanaē tsane. Paneconivajēto caejivi canacujitsia xainapona, bajarapaneconivajētota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaējēpa neponaejava, bepijiayo netaeyojopaeremena. ¹⁰ Demasvēnēnē rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicueneje. Pona baja nexata Tesalónica tomarabelia. Crescentevēnēnē baja itorobajē Galacia nacuyabelia. Tito pijinia itorobajē Dalmacia nacuyabelia. ¹¹ Caenē Lucas xanējavata ponapona. Jaire Marcos. Bajaraponē caējēpatsi taneyavenonaenexa Dioso tatonacuenebijava. Nexata barērenamē tsane. ¹² Tíquico baja itorobajē Efeso tomarabelia. ¹³ Itsa renamē tsane xanējavaberena, Troas tomarata tajacamisajumavelia tanaxatatsijava netopitaponaeremena. Carpovēnēnē raja pijabota puenetarutajē. Tajalibronēnua, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajē.

¹⁴ Alejandro, cobrenanita daxitacuene pexanaenē, bitso baja cajena pibisiacuene nexana. Itsiata baitsi jane Dioso neyamatomotsiana tanebejiobiaexanaematamo. ¹⁵ Nayajivitaema bajaraponē. Tsipaji raja bitso itoya patatsipaebaponaelivaisi.

¹⁶ Pamatacabi nayajivicuaicuaijanē majotaje Roma tomarata, nacua pevetsivi pitabarata, itsajivi ata apo neyavenonaeyacuacuaijai. Daxita nexuabanuta. Nexata bajarapamonaē tovajētajē Diosojavabelia penaneconitsiaexanaeyanivatsi tanexuabanutsijamatabēcuenē. ¹⁷ Itsiata baitsi jane bajarapaepatota vajatuxanenē neyavenona. Vajatuxanenē pesaē nerajuta daxitalivaisi tatsipaebinexa. Apo judíovi ata pejumecovēnētsinexa, bajarapalivaisi tsipaebaponajē Diosojavabelia pecapanepaelivaisinexatsi. Tanexuabanutsijavata picani netsiayi tanebeyaxuabinexa. Itsiata vajatuxanenē necapanepa tanebeyaxuabijavaminexavecua. ¹⁸ Vajatuxanenē cajena necapanepaponaena daxita pibisiacuene taneexanaeyaniva. Necaponaena athēbēabetsia bajaraponē pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomē, pinijicuene baja cajena nexanaenē,” jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapētaevitsi yabara pelivaisi

¹⁹ Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonaē ata. ²⁰ Erasto nacopatajopa Corinto tomaratalia. Tróximo pijinia puenetajē Mileto tomaratalia. Tsipaji

avitane. ²¹ Itsa cacuenecaējēpa, naxanitsiayo renamē tsane emarapae pecopiajopaevajēnaeya. Cajamatabēnajina pina Eubulo, Pudente ata, Lino ata, Claudia ata, daxita itsamonae Dioso pejumecovēnētsivi yajava.

²² Catovajētatsi vajatuxanenē Jesucristo pecayajavaponaponanexa. Daxita paxamē pacatovajētatsi Dioso papecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexinaenexa matababi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matababi apo peverevereaejava. Dioso baja cajena apo penajumetsënëtsinë. ³ Nexata baja Dioso pecaëjëtsimatababita, bajarapalivaisi nacayapëtaeyaexana. Nexata Dioso, vajanacacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. ⁴ Tspaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuenexanepanaeyaexanaenexanua.

Pacuenia Pablo Tito puenetanuta Cretatunaeto nacuada petonacuenebinexa Dioso pijacuene yabara pelivaisi

⁵ Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcuenesaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶ Nejumenamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tspaji ponë itapetsianame ancianonënexa, Dioso pijacuene tonacuenebiana. Bajaraxuata ancianonënexa, itapetsianame ponë xaniavaetsia peponaponaenë, planeconijibinë. Beayaijamatabëcuenenë apo penataenë. Bepijia apo pianaepanaenë. Apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonënexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiaya penajamatabëxainanë pacuene exanaejitsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecataitsinexa pibisiacuene pexanaeyaniva. ⁹ Ancianonënexa, xanepana ponë

casaë tsaponaponae pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonaë ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonaë jamatabëcuenenavëxaniabiaya pibisiacuenia baracuaicuaijai Dioso pejumelivaisi. Nexata ancianonë xaniavaetsia itsa jumecanaviatsiana pamonaë pibisiacuenia baracuaicuaijai Dioso pejumelivaisi, bajarapamonaë ata jumecovënëtsiana Dioso.

¹⁰ Bajarapitsijamatabëcuenevi itapetaponaename ancianovinexa. Tsi-paji raja Cretatunaeto nacuata, Dioso pejumecovënëtsivi tuatuajëta, ayailbitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaëyajuvenëvi ayailbitsaëto judíovi. Bajarapajudíovi jumai tsabiabi: “Pamonaë apo judíovi ata Jesús pelivaisi itsa jumecovënëta, bajarapamonaë ata benaperabëcaucubiaexana,” jai tsabiabi. Bajarapajudíovi natsiquejemalivaisi saya cuaicuaijai tsabiabi. Nexata yamaxëitojorobapona Dioso pejumecovënëtsivi. ¹¹ Bajarapajudíovi bejumeitavetame. Tsi-paji saya penajumetsënëtsilivaisi jivi tsipaebapona Dioso apo pejitsipacuenia. Bajarapajudíovi, caëbopijivi canacujitsia, Dioso pejumecovënëtsivi, najamatabëcuene epatajërërëcaeyaexanapona Dioso pejumecovënëtsijavavecu. Bajarapajudíovi penajumetsënëtsilivaisi jivi tsipaebapona saya pematamotsinexatsi palata.

¹² Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsënëtsivi. Bitso piacujirubejevi. Ayaijavanua jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijinëmi. ¹³ Xaniajai baja cajena pacuenia jumaitsi bajaraponëmi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonaë xaniavaetsia penajamatabëcuene copatsinexa Dioso javabelia. ¹⁴ Itavere bajarapamonaë penamuxunaevetsiyaniva judíovi pijasalinaivimi pijalivaisixi. Itaverenua bajarapamonaë pejumecovënëtsiyaniva pacuenia itorobaponatsi pamonaë copaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcuenexuirajibi. Bajarapajivi daxita xua tane, ëpexaniacuenia sivanajamatabëxaina. Nexata itsacueniejavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuenexuira. Nexata bajarapajivi daxita xua tane, pibisiacuenia sivanajamatabëxaina. Nexata daxitacuene jamatabëcuenebijianatsi. Pibisiacuenia exanabiabi ata, jamatejema saya ponapona. ¹⁶ “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonaë pibisiacuenia exanavanapa. Nexata nayapëtane Dioso apo peyapëtaejava. Bajarapamonaë itoya Dioso. Bajarapamonaë apo jumecovënëtsi pacuenia Dioso itorobatsi. Nexata apo caëjëpaetsi itsacueniejavayo ata pexaniacuenia pexanaenexa.

2

Pacuenia Pablo Tito itoroba pexanialivaisi jivi petsipaebaponaenexa yabara pelivaisi

¹ Tito, xamë jivi livaisi itsa tsipaebabiabianame, tsipaebabiabianame ëpexaniajailivaisi. ² Perujupebijivi muxujiobabiabianame penajamatabëcueneriviabinexa. Muxujiobabiabianame xaniavaetsia pejinavanapaenexa jivi peyaiyataenexatsi. Muxujiobabiabianame penajamatabëcueneriviatitsinexa pibisiacuene pexanaeyaniva. Muxujiobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. ³ Bajara pijinia pacuenia muxujiobabiabianame perujupetiriavi ata jamatabëcueneriviaya pejinavanapaenexa Dioso pitabarata. Bajarapamonae pibisiacuenia itsamonae apo bebaracuaicuajiai. Apo biaitajibi tsabiabinua. Bajarapapetiriavi itsamonae pexaniacuene betsitaexanavanapa. ⁴ Nexata perujupetiriavi itsamonae pexaniacuene itsa tsitaexanavanapa, jamatabëcuenerivarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua. ⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcueneriviabinexa, pexaniajamatabëcuene ata penajamatabëxainanexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuene ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuenia Dioso pejumelivaisi apo baracuaicuajiai tsane.

⁶ Bajara pijinia pacuenia muxujiobabiabianame pevëjëavi penajamatabëcueneriviatitsinexa pibisiacuene pexanaeyaniva. ⁷ Xamë xaniavaetsia bajarapamonae ëpexaniacuene tsitaexanaponaponanename. Nexata bajarapacuenia daxitajivi cacunetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajijumeta jamatabëcueneriviaya. ⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoiyavi ata aura tsane. Tsipaji ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabelia: "Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje," jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuenie xaniavaetsia petonacuenebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacapanepaenënexa pejumelivaisi pexaniajailivaisicuene.

¹¹ Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi.

12 Dioso vajanacayapëtaeyaexanaexae vajanacaitaxutotsoniataejava vajanacapanepaenexa, nexata becopatatsi pibisiacuene vajaxanaejavami. Bitso vajajitsipaejava ata mapanacuapijicuene vajaxainaenexa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuene vajaexanaeyaniva. Nexata Dioso pejitsipaecuenia betoexanavanapatsi. Dioso cujunaviaya xaniavaetsia bejinavanapatsi. ¹³ Bajarapacuenia Dioso cujunaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacapanepaenexa. Bajaraponë penivenivenaecotia yajavapatsianica. ¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo ita beyaxuabatsi, pijanata nacacomuata pibisiacuene vajaxanaeconivecua. Nacavecuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuene Jesucristo vajatoexanaenexa.

¹⁵ Daxita bajarapacuenia muxujiobaponaename. Jamatabëcuenebabataponaename asaëya bajarapamonae. Asaëya muxujiobabiabianame pibisiacuene ita exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata hijiaya pecataenexa.

3

Pacuenia Dioso pejumecovënëtsivi pexaniacuene bexanavanapa yabara pelivaisi

¹ Dioso pejumecovënëtsivi, Cretatunaeto nacuapijivi, namatabënapitsiaexanaename yaiyataeya pejumecovënëtsinexa gobierno pitorobilivaisi, pejumecovënëtsinexanua gobierno pijajivi ata. Itorobianamenua bajarapamonae pexanaenexa daxitaxua pexaniacuene. ² Muxujiobabiabianame bajarapamonae itsajivi ata pibisiacuena pebaracuaicuaijayaniva. Muxujiobabiabianame bajarapamonae, itsamonae itsacueniabi atatsi, pecuene/naviatsiyaniva. Muxujiobabiabianame bajarapamonae pexaniajamatabëcuena pebarëcuaicuaijainexa daxitajivijavabelia. Itorobianamenua daxitajivivecua beveliajamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaevevtsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi. ⁴ Bajara vajajitsivimi ata, itsiata Dioso, vajanacapanepaenëxexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije. ⁵ Dioso nacacapanepaena vajanecconivecua.

Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniataane. Nexata nacajamatabëcuenequiata. Dioso vajanacaitaxutotsoniaetaexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana. ⁶ Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta. ⁷ Bajaraxuata Dioso vaxaitsi yabara jumaiti: “Bajarapamonae baja aneconijibia taniiji,” jai Dioso. Tsipaji nacaitaxutotsoniataane. Nexata vaxaitsi xainaenatsi matababi apo peverevereaejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipaebaponaenexa bajarapalivaisi. Nexata Dioso pejumecovënëtsivi ëpexaniacuene pexanaenexa pejamatabëcueneenaenexatsi. Bajarapalivaisi bitso xanepana daxitajivi pejumecovënëtsinexa. ⁹ Nexata navecuaitavetsianame saya jema natsiquejemalivaisixi itsamonae pecabarëcuaiacuajaiyaniva. Navecuaitavetsianamenua judíovi pijasalinaivimi pevënëxi yabara pecabarëcuaiacuajaiyaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsiyaniva. Bajarapacuenia pecabarëcuaiacuajaijava apo xanepanae tsipae itsacuenejavayonexa ata.

¹⁰ Itsamonae penajumetsënëtsilivaisi jivi tsipaebapona. Nexata bajarapamonae penajumetsënëtsilivaisita Dioso pejumecovënëtsivi navecuansanaeyaexanapona. Bajarapamonae jumeitavetsianame. Anijato-beje ata jumeitavetsianame. Nexata bajarapamonae copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. ¹¹ Yapëtaneme rabaja mapacueneje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajaraponë naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi

¹² Catoitorobialiatzi Artemas. Itsa jume, catoitorobialiatzi Tíquico. Bajaraponë itsa patsialia xamëjavabelia, nexata xamë bepijia renamë tsane xanëjavaberena. Nacaxitajarabianatsibeje Nicápolis tomarata. Daxita emarapae raja ponaponaenajë Nicápolis tomarata. ¹³ Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaiujainë. Rajutsianame pacuenia namatavenonaebeje, itsacuenejavayo ata petosajinaeyanivatsibeje itsa najetarucabeje namuto. ¹⁴ Pamona vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamona bitso bepejiobivi. Pëtsa saya bajarapamonae jinavanapa nacuenebinejeva.

Pacuenia Pablo itsamonae jamatabënajina yabara pelivaisi

15 Daxita pamonaē yajavaponaponajē, cajamatabēnajinalia. Pajamatabēnajinaliajē daxita pamonaē pataniasivavi, Dioso pejumecovēnētsivi. Pacatovajētatsi Diosojavabelia daxita paxamē Dioso papecayavenonaenexa.

Mapabaxutoje San Pablo toyaquina Filemónjavabelia

Pacuenia Pablo mapabaxutoje toyaquina Filemónjavabelia yabara pelivaisi

¹ Xanë Pablonë, Jesucristo pijajivitonëxaenë, Jesucristo pelivaisi jivi tsipaebabiabajë. Bajaraxuata nenaneconitsiaexana. Nexata penaneconitsivi pejebabiabibota naneconitsiaaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, pacatoyaquinatsibeje mapabaxutoje. ² Patoyaquinajëbejenua mapabaxutoje pamonaë Dioso pejumecovënëtsivi, nijabota penacaetuatabiabivi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënëne ata. Pacuenia xanë Dioso pijacuene tonacuenebabiabajë, bajarapacuenia Arquipo ata Dioso pijacuene tonacuenebabiaba. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo tovajëta Filemón Diosojavabelia yabara pelivaisi

⁴⁻⁵ Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënajinatsi, catovajëtabiabatsi Diosojavabelia. Nexata pexaniajamatabëcuene rajutabiabajë Diosojavabelia xamë yabara. ⁶ Pamonaë ata Diosojavabelia najamatabëcuenecopaba xamë pexanialivaisi netsipae-bixae, bajarapamonaë ata tovajëtabiabajë Diosojavabelia. Tovajëtabiabajë bajarapamonaë xaniavaetsia peyapëtaenexa Dioso vajanacayavenonabiabijava Jesucristo pijajivixaetsi. ⁷ Itsamonae ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsipaji daxita Dioso pejumecovënëtsivi jamatabëcuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanë Cristo taneitorobinëxae, nejamatabëcuenecaëjëpa picani tacaitorobinexa xua bexaname Dioso pecasivabarëyanexa. Itsiata baitsi jane apo caitorobi tsanetsi. ⁹ Tacaasivaxae, saya pexaniacuenia cavajëtatsi pexaniacuene tanetoexanaenexamë. Xanë Pablonë, perujunënë baja. Maparucæje naneconitsiaaponaponajë penaneconitsivi pejebabiabibota Jesucristo pijajivitonëxaenë. ¹⁰ Majotaje, xanëjavata, nijajivitonë Onésimo patajopa, pecavecuanajetabajiravinë. Nexata cavajëtatsi pexaniacuene tanetoexanaenexamë Onésimojavabelia. Onésimo raja betaxënatocuenia tataenë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejebabiabibota.

11 Onésimo baja cajena bajayata bedajubinēcuenia comuatame amoneya nijabota pecatonacuenebabiabinexa. Nexata bajarapamat-acabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucaje Jesucristo baja pelivaisi Onésimo pejumecovēnētsixae, xanēnexa xaniavaetsia netonacuenebaponapona. Nexata baja aeconoxae itsa naviatsipa xamējavabelia, xamēnexa ata xaniavaetsia catonacuenebijitsipa. 12 Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tshipaji Onésimo bitso tasivanē. Itsa baja ponaponaena xamējavatalia, jamatabēnainabiabianajē bitso. 13 Naneconitsiaya ponaponajē penaneconitsivi pejebabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanē xanējavata peponaponaenexa. Nexata Onésimo itsa ponaponaejitsipa xanējavata, neyavenonaponaponaejitsipa xaniavaetsia. Taneyavenonaenexa, betanetoitorobinēmēcuenia neyavenonabiabijitsipa. 14 Itsiata baitsi jane apo jitsipaenē Onésimo taneyavenonaponaponaenexa copiaya cavajētsinejevatsi. Apo jitsipaenēnua tacavajētsinexa tanetocopatsinexamē bajaraponē taneyavenonabiabinexa. Biji rajane picani jitsipajē cavajētsinejevatsi nijacuate tanetocopatsinexamē bajaraponē. 15 Onésimo picani itsa cavecuanajetabajirava, cavecuanatsata caematacabibeje. Itsiata baja icatsia aeconoxae xamējavabelia naviatsijitsialia. Nexata jane baja daxitamatacabijavabelianexa nijajivitonē tsaponaponaen tsane. 16 Pētsa baja taneme saya nijajivitonēcuenia. Biji rajane nijajivitonē ata, Dioso pejamatabēcueneta asivaya taename benejuyapijinēcuenia. Xanē picani bitso asivanē Onésimo. Itsiata xanē bajaraponē tasivajava matatoxenetsia, xamē bitso asivamē tsane. Tshipaji xamē bajaraponē nijajivitonē. Nejuyapijinēnua baja Dioso pejamatabēcueneta.

17 “Pablobeje rabaja patanajuaponaponaenēbeje,” itsa nesivajamatabējamē tsane, nexata Onésimo xaniavaetsia copiapitsianame, pacuenia xanē necopiapitabiabame. 18 Onésimo itsa catonaneconita, itsa camoneyabanua, nexata xanē bajaraxuamatamo neyanijobianame. 19 Peneta raja paitanebērētotoy jumaitsi: “Xanē Pablonē. Camatamot-sianatsi cajena,” jai, xanē tajacuata tacobeta yaquinajē. Itsiata pijinia pacuenia niamoneyabame, apo catoitajētsitsi. Tshipaji itsa catoitajētsipatsi pacuenia niamoneyabame, nexata jitsipaejitsipame daxitanēmē, nejamatabēcuene yajava, tanerajutsinexamē. 20 Tajabananē, pacuenia cavajētatsi, xaniavaetsia copiapitsianame Onésimo Jesucristo pijajivitonēxaemē. Xaniavaetsia Onésimo itsa copiapitsianame, bitso nejamatabēcuenebarēyaya exanaename.

21 Catoyaquinatsi mapabaxutoje tshipaji yapētaniji tanejume-covēnētsijavanexa tacaitorobicuenia. Casivajamatabējumaitsitsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabējajitsi. 22 Caecuenia tavajēnaeyabelia cavajētatsi tavajēnaelia nijabota tanetoxaniavaetsinexamē, itsajota patsijitsianē itsa ponajē paxamējavabelia. Tshipaji bajayajebi panetovajēcabiabame Diosojavabelia tapatsinexa paxamējavabelia. Nexata jamatabējumaitsinē: “Pacuenia bajarapamonae netovajēcabiaba Diosojavabelia, bajarapacuenia Dioso netocopatsiana,” jamatabējanē taponaponaenexa paxamējavabelia.

Pacuenia itsamonae jamatabēnājinatsi Filemón yabara pelivaisi

²³ Epafras, ponēbeje panajuaponaponajēbeje penaneconitsivi pejebabiabibota Jesucristo pijinia pijajivitonēxae, bajaraponē cajamatabēnājinalia. ²⁴ Cajamatabēnājinalia Marcos ata, Aristarco ata, Demas ata, Lucas ata. Cajamatabēnājinalia daxita bajarapamonae patanajuanacuenebivi Dioso pijacuene. ²⁵ Pacatovajētabiabatsi Diosojavabelia vajatuxanenē Jesucristo papecayavenonabiabinexa.

Mapabaxutoje Dioso pijajivitonë toyaquina judíovijavabelia

Pacuenia Dioso pexënato itoroba jivijavabelia petocuaicuaijainexatsi yabara pelivaisi

¹ Bajayatami Dioso anijatonë najamatabëcueneitajëtabiaba Dioso-jumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatatabëcueneitajëtabiaba profetavijavabelia matabacabita bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuenia Dioso roviaia barëcuaicuaijai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. ² Nexata jane baja aeconoxae, mapamatabacabitaje, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaje, daxitacuene yajava. Nexata daxitacuene mapanacuateje Dioso pexënato tocopata pevetsinexa. ³ Nexata pacuenia Dioso bitso ayaijamatabëcuenenë, pexaniajamatabëcuenenëna, bajara pijinia Dioso pexënato ata jamatabëcueneitsi. Dioso pexënato cajëjepsati daxitacuene pexanaenexa pijumesaëta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponë pexanaecujinae mapanacuaje, bajaraponë pejamatabëcueneta abaxë tsiteca xanepana mapamatabacabijavaberena ataje. Bajaraponë nacasivatëpa cruzata vajanacavecuaxuabinexa pibisiacuene vajaexanaeneconimi. Bajaraxuacujinae pona jane baja athëbëabetsia peecaenexa paxa Dioso pemuxuneneta, pecujuanenia, penajuaevetsinexabeje daxitacuene.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi matatoxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuene pevetsinexa. Dioso saya ángelevi tocopata beveliajamatabëcuenejava pevetsinexa. ⁵ Dioso baja cajena jumaitsi pexënatojavabelia mapacueniaje: Xamë raja taxënatomë. Xanë raja axanë, jai Dioso.

Dioso icatsia jumaitsi pexënato yabara mapacueniaje: Xanë raja bajaraponë paxanë. Xanë raja bajaraponë taxënatomë, jai Dioso pexënato yabara.

Bajarapacuenia Dioso apo jumaitsi ángelevi yabara. Biji rajane Dioso pexënato yabara jumaitsi. Bajaraxuata nayapëthane Dioso pexënato bitso ayaijamatabëcuenenëcuene ángelevi matatoxenetsia. ⁶ Pacujinae Dioso itorobijitsiatsica pepo caenë pexënato mapanacuata penaexanaenexa, Dioso jumaitsi pexënato yabara mapacueniaje:

Daxita tajajivi, ángelevi, pematabacabëta tonubenaena ayaijamatabëcuene perajutsinexa bajaraponëjavabelia,

jai Dioso pexênato yabara.

⁷ Dioso icatsia jumaitsi ángelevi yabara mapacueniaje:

Tajajivi, ángelevi, tanelivaisipaebinexa, bepíjia pona pacuenia jovibo. Bajarapamonae beisotocotiata verebiabiana daxita pamonaē naneconita xanējavaberena,

jai Dioso ángelevi yabara.

⁸ Itsiata baitsi jane icatsia Dioso pexênatojavabelia jumaitsi mapacueniaje:

Diosomē, daxita xua evetame, daxitamatacabijavabelianexa evetsianame. Xua xamē evetame, xaniavaetsia evetabiabianame.

⁹ Xamē jitsipame jivi pexaniacuene pexanaejava. Apo jitsipaemē pibisiacuene pexanaejava. Bajaraxuata xanē, nijaDiosonē, cajamatabēcuenenarēyayaexanatsi. Cajamatabēcuenenarēyayaexanatsi daxita itsamonae matatoxenetsia, jai Dioso pexênatojavabelia.

¹⁰ Icatsia Dioso pexênatojavabelia jumaitsi mapacueniaje:

Xamē petuxanenēmē. Itsa abaxē daxitacuene ajibi, xamē exaname mapanacuaje. Nesaēta exaname daxita itaboxopijicuene yajava. Xua jivi apo tae, bajaraxua ata exaname. ¹¹ Daxita bajaraxua, nexanaejava, vereverecaena. Itsiata baitsi jane xamē apo vereverecaemē tsane daxitamatacabijavabelianexa. Daxita xamē nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava.

¹² Pacuenia jivi baquiona penaxatatsijava, bajarapacuenia itsamatacabi xamē quionaenename itaboxo, ira yajava, pejananacua icatsia nexanaenexa. Itsiata baitsi jane xamē tsitecaenename. Apo vereverecaemē tsane,

jai Dioso pexênatojavabelia.

¹³ Dioso baja cajena caeto ata ángeleviyajuvēnēnējavabelia apo jumaitsi mapacueniaje:

Ecare abaxē tacujuanenia daxitacuene vajanajuaevetsinexabeje. Nijavajabitsaē abaxē copiaya vecatsivajēnae jumecovēnētsiaexanaenatsi nitorobicuenianexa,

apo jai Dioso ángeleviyajuvēnēnējavabelia.

Biji rajane Dioso pexênatojavabelia bajarapacuenia jumaitsi. ¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaē jumecovēnēta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi

¹ Dioso pexênato bitso ayaijamatábēcuenenē ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajēnaeyabelia asaēyata bejumecovēnētatsi bajarapapexaniajailivaisi vajajumecovēnētsijava, itsamatacabijavabelia ata vajacopatsiyaniva.

² Bajayata palivaisi Dioso najumecopata Moiséspijinēta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinējavabelia. Xaniajai baja cajena bajarapalivaisi. Pamonaē apo jumecovēnētsi bajarapalivaisi, paneconivajēto

xaina, bajarapaneconivajētota Dioso naneconitsiaexanatsi. ³ Itsa namuxujematatsi papinijicueneta Dioso nacacapanepaejitsia, ¿detsa pacuenia nacacaejēpaejitsipa vajacuata vajanacapanepaenexa? Ajibi. Vajatuxanenē Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapētane bajarapalivaisi pexaniajailivaisicuenē. Nexata juya bajarapamonae vaxaitsijavaberena nacatsipaeba bajarapalivaisi. ⁴ Nexata nayapētane bajarapamonae vajanacatsipaebilivaisi pexaniajailivaisicuenē. Tsipaji Jesucristo petsipaebilivaisitsi, jivi itsa tsipaebavanapa, Dioso pesaēta pinijicuenē pexanaejavanē tsitaexanapona. Bajarapamonae piavitanevi ata jamatejemayaexanapona. Petēpaevi ata icatsia asaēyaexanapona. Espiritu Santo ata jamatabēcuene caējēpaeyaexanaponatsi, caejivi canacujitsia, bajarapamonae pexanaenexa pacuenia Dioso tojitsipatsi.

Pacuenia baja Jesucristo naexana bejivitonēcuenia yabara pelivaisi

⁵ Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. ⁶ Tsipaji Dioso pejumelivaisibaxutota, tajēvelia jumaitsi pacuenia jivi ayaijamatabēcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomē, jivi matatoxenetsia bitso ayaijamatabēcuenenē atamē, ¿detsa xuajitsia itsiata jivi sivanajamatabēxainame nevetsinexa? ⁷ Jivi itsa exaname, ángelevivecua jivi beveliajamatabēcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovēnētsixae, ayaijamatabēcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava,

jai Dioso pejumelivaisibaxutota Dioso pejumecovēnētsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxē apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonēcuenia naexana mapanacuataje, bajaraponē ata ángelevivecua beveliajamatabēcuenenē picani naexana. Dioso pitaxutotsoniaetaexae daxita mapanacuapijivije, Dioso pexēnato itorobica penaexanaenexa mapanacuata, pesivatēpaenexa daxitajivi pijaneconi yabara. Jesús baja daxitajivi pesivatēpaexae, aeconoxae baja Dioso tocopatatsi Jesús athēbētatsia peecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponēnexa. Dioso daxitacuene pexanaecujinae, Dioso abaxē pejamatabēcueneta daxitacuene tsiteca xanepana mapamatacabijavaberena ataje. Daxita pamonaē jumecovēnētatsi, pexicuenia petaevi, Dioso jitsipa pebarēevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaē najamatabēcuenecopata Jesucristojavabelia, peyajavaponaponaenexa Dioso pijapenivenivenaenacuataatsia. ¹¹ Jesucristo baja cajena jivi tsata Dioso pijajivinexa. Nexata pamonaē Jesucristo tsata Dioso pijajivinexa, bajarapamonae, Jesús yajava, benacaeaxapijivi baja tanetsi Dioso. Bajaraxuata

Jesús, Dioso pexênato, pijajivi yabara itsa cuaicuaijai, apo ajumeura: “Tajuyapijivi,” pejaijava. ¹² Jesús pijajivi yabara pejumaitsijavanexa, Dioso pejumelivaisibaxutota tajêvelia jumaitsi mapacueniaje:

Taxa Diosomê, tajuyapijivijavabelia cavajunupaebianatsi. Nexata daxita bajarapamonae tabarênacaetuatsijavata, xamênexa caton-axêanaenatsi, tanaxêanaejavata ayaijamatabêcuene tacarajutsinexa, jai Dioso pejumelivaisibaxutota Jesús paxa Diosojavabelia pejumaitsijavanexa.

¹³ Jesús icatsia pijajivi yabara pejumaitsijavanexa, Dioso pejumelivaisibaxutota tajêvelia jumaitsi mapacueniaje:

Xanê ata najamatabêcuenecopatsianajê taxa Diosojavabelia taneyavenon-aenexa pacuenia najamatabêcuenecopaba tajuyapijivi,

jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pejumelivaisibaxutota tajêvelia jumaitsi mapacueniaje:

Yajavapononajê baja mapamonaaje, Dioso pexi tanetocopatsivi tato-evetsinexa,

jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponaenexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caêjêpatsi pebeyaxuabinexatsi vajanacasivatêpaenexa. Jesús baja itsa nacasivatêpa, jamatabêcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi têpae ata tsane, itsiata icatsia asaê tsane petêpaecujinae. ¹⁵ Bajarapacuenia Jesús vajanacasivatêpaexae, nacavecuajaibiaexana baja vajacujunavabiabijavami, vajatêpaejava. Vajatêpaejava picani cujunavabiabatsi daxita vajajinavanapaematacabianê.

¹⁶ Jesús baja cajena patsica mapanacuayabet-sicaje, jivi peyavenonaenexa, pamonaê Abrahampijinê pepo pemo-moxi, baitsi Dioso pejumecovênêtsivi. Jesús apo patsi peyavenon-aenexa ángelevi. ¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuaijainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponê pejamatabêcueneta Dioso vajanacavecuajaibiaexanaenexa pibisiacuene vajaexanaecon-imi. ¹⁸ Nexata Jesús jamatabêcuenecaêjêpatsi peyavenonaenexa pijajivi, dovathi pejamatabêcuenejêtsivitsi. Tsipaji baja copiaya Jesús ata jamatabêcuenejêtatsi dovathi. Bejioibiaexanatsinua.

3

Pacuenia bitso Jesús ayaijamatabêcuenenê Moiséspjinê matatoxenetsia yabara pelivaisi

¹ Tajamonae, Dioso papijajivimê, Dioso pacajunata papijajivinexamê. Nexata xaniavaetsia pacanaêjêre Jesucristo yabara. Bajaraponê Dioso nacatoitorobica vajanacatsipaebinxeta Dioso pejumelivaisi, vajanacatocuaicuaijainexanua vajatuxananê Diosojavabelia.

² Bajayatami Moiséspjinê daxita Dioso pijajivi tovetabiaba Dioso pitorobiceniatsi. Bajara pijinia pacuenia Jesús ata mapanacuataje

jumecovënëta Dioso pitorobicueniatsi. ³ Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainaenë, ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë Moiséspijinë matatoxenetsia. ⁴ Caebo canacujitsia tanetsi jivi pexanajebixae bajarapabonë. Itsiata baitsi jane mapanacuata Dioso pexanaejavanëta, jivi exanejeba bonë. ⁵ Bajayata Moiséspijinë Dioso itorobatsi daxita Dioso pijajivi petoevetsinexa xaniavaetia. Nexata Moiséspijinë Dioso pijajivi itsa tovetaponapona, tajëvelia itorobatsi petsipaebinexa jivijavabelia pacuenia itsamatacabijavabelia Dioso jumaitsijitsia pijajivijavabelia. ⁶ Cristo Dioso pexënatoxae, xaniavaetsia toeveta paxa Dioso pijajivi. Vaxaitsi baja Dioso vajajumecovënëtsivi, Dioso nacatane pijajivitsi. Tsipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena xaniavaetsia Jesucristo itsa jumecovënëtavapanenatsi vajatëpaejavelianexa. Jamatabëcuenebarëyaya jinavanapatsi. Tsipaji yapëtanetsi Dioso pexaniajaicuene vajanacapanepaenexa.

Pacuenia Dioso pejumecovënëtsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia ayaijamatabëcuenenë. Bajaraxuata Espíritu Santo Dioso pejumelivaisibaxutota jumaitsi mapacueniaje: Ajena, mapamatacabitaje, itsa pajumetaneme pacuenia Dioso jumaitsi, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi. ⁹ Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaibeje Dioso ayaiacuene pexanaejavanë, tsi-taexanapona bajarapamonae peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. ¹⁰ Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitsi: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. ¹¹ Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitsi: “Bajarapamonae apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espíritu Santo panijasalinaivimi yabara Dioso pejumelivaisibaxutota.

¹² Tajamonae, dovathivecua panajamatabëcuenevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. ¹³ Nexata namataenetsia

panajamatabëcueneyavenonare daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitojorobiyanimatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabiyanima Dioso pejumecovënëtsijava. ¹⁴ Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujiobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë,

jai Dioso pejumelivaisibaxutota.

¹⁶ ¿Detsa pamonaë bajayata bajarapacuenia jumetae ata Dioso pejumaitsijavatsi, itsiata apo jumecovënëtsi? Baitsi pamonaemi bajayata Moiséspijinë matacapona Egipto nacuaverena. ¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata. ¹⁸ ¿Detsa jane pamonaemijavabelia Dioso najumecapanepaeya jumaitsi: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaitsi apo pejumecovënëtsivitsijavabelia. ¹⁹ Nexata yapëtanetsi panijasalinaivimi apo pejonejava Diosojavabelia. Tsipaji apo jumecovënëtsi Dioso pitorobicueniatsi.

4

¹ Dioso baja cajena najumecapanepaeya jumaitsi vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tsipaji itsamonae paxamëyajuvënëvi apo jonecapanepae tsipae Dioso pijanacuayabetsia itsa apo jumecovënëtsi Dioso. ² Vaxaitsi ata rabaja jumetanetsi pexanialivaisi vajanacacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovënëtsi. ³ Nexata vaxaitsi Dioso vajajumecovënëtsivi, nacacajëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tsipaji bajarapitsivi yabara Dioso bajayata jumaitsi mapacueniaje:

Anaepanaenajë apo tanejumecovënëtsivijavabelia. Nexata najumecapanepaeya jumaitsinë baja: “Bajarapamonae apo jone tsane xanëjavaberena,” janë,

jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo

jone. ⁴ Yapëtanetsi pacuenia Dioso petoxaniavaetsicujinaetsi, copiaeve-tatsi picani panijasalinaivimi pejonenexa pejinavanapaenexa bajara-ponëjavatatsia. Tsipaji Dioso pejumelivaisibaxutota jumaitsi mapacueni-aje:

Dioso baja daxita mapanacuae, daxitacuene yajava, itsa vereta pex-anaejava, vemaxënacueraeveta siete matakabita,
jai Dioso pejumelivaisibaxutota.

⁵ Icatsia Dioso pejumelivaisibaxutota jumaitsi Dioso apo pejume-covënëtsivi yabara mapacueniaje:

Bajarapamona apo jone tsane xanëjavaberena, pejinavanapaenexa xanëjavata,”

jai Dioso pejumelivaisibaxutota.

⁶ Pamona baja picani copiaya jumetane pexanialivaisi pecapanepae-livaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamona tajajivi, jonena xanëjavaberena,” jai. Nexata pamona jumecovënëtapona Dioso, jonena Dioso pijanacuaya-betsia.

⁷ Bajarapacuenia bajayata itsamona Dioso apo pejume-covënëtsixae, nexata icatsia Dioso caëjëta itsamatacabi itsamona pe-jonenexa. Bajarapacuenia Dioso itsa caëjëta itsamona pejonenexa, ma-pamatacabitaje cajena caëjëta itsamona pejonenexa. Bajayata David-pijinë Dioso itorobatsi tajëvelia pevajunupaebinexa itsamona mapamatacabitaje pejoneponaejavanexa Diosojavabelia. Nexata bajayata Davidpijinë tajëvelia itsa vajunupaeba itsamona mapamatacabije pe-jonejavanexa Diosojavabelia, jumaitsi mapacueniaje:

Mapamatacabitaje itsa pajumetaneme Dioso papecajumaitsijava, pëtsa pajamatabëcuenetajamë panejumecovënëtsinexa Dioso,

jai Davidpijinë tajëvelia.

⁸ Bajayata Josuépijinë vajasalinaivimi petusato nacujavaverena matakapona Israel nacujavaberena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijav-abelianexa. Bajarapanacua cajena xaina Dioso pijanacuatsia. Nexata panacua yabara jumaitsi: “Dioso pijajivi pejinavanapaenacuanexa, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamona pejonenexa Diosojavabelia. Tsipaji baja vajasalinaivimi bajayata baja pata Israel nacua. ⁹ Bajaraxuata yapëtanetsi pacuenia abaxë Dioso tocopata mapamatacabitaje itsamona ata Dioso pejumecovënëtsinexa pejonenexa Dioso pijanacuayabetsia.

¹⁰ Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana.

¹¹ Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajinavanapaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenejëpaetsi.

¹² Dioso cajena pejumelivaisi bitso asaë. Nexata Dioso pejumelivaisi caëjëpatsi ayai cuene pexanaenexa pijumesaëta. Dioso pejumelivaisi

bitso pexiuujailivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeyaexana pacuenia pepacuene jamatabëcueneitsitsi. ¹³ Vaxaitsi Dioso vajanacaexanaevi, apo naca-caëjëpae Dioso vajavecuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayaijamatabëcuenenë, jivi petocuaicuaijainë Diosojavabelia, yabara pelivaisi

¹⁴ Jesús cajena Dioso pexënato, ayaijamatabëcuenenë. Pepo sacerdotenë vajanacatocuaicuaijainë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaë tsavanapaetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijainë, nacajamatabëcuenyapëtane pacuenia vaxaitsi jamatabëcueneitsitsi. Nexata dovathi itsa nacajamatabëcuenejëta pibisiacuene vajaexanaenexa, Jesús nacajamatabëcuenyapëtane. Bajarapacuenia nacajamatabëcuenyapëtane tsipaji Jesús ata abaxë itsa ponapona mapanacuataje, jamatabëcuenejëtatsi dovathi. Itsiata baitsi jane Jesús caeto ata pibisiacuene apo exanae. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5

¹ Sacerdotevivyajuvënënë, caenë, itapetatsi sacerdotevi penamatacaitorobinënexa, daxitajivi petocuaicuaijaitisabiabinexa Diosojavabelia. Nexata jivi Diosojavabelia ofrendacuena perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeconi Dioso pevecuaajibiaexanaenexatsi. ² Sacerdotenë caëjëpatsi dovathi pejamatabëcuenejëtsinexatsi pibisiacuene pexanaenexa. Tsipaji bajaraponë ata saya jivitonë. Nexata sacerdotenë jamatabëjumaitsi jivi yabara: “Jamatabëcuenyapëtaniji pamonae abaxë apo yapëtae Dioso pejumelivaisi. Nexata pibisiacuene exana. Jamatabëcuenyapëtanijinua pamonae dovathi jamatabëcuenejëtatsi pibisiacuene pexanaenexa,” jamatabëjai sacerdotenë. Bajaraxuata jivi pibisiacuene itsa exana, sacerdotenë itaxutotsoniatane jivi. ³ Sacerdotenë ata apo ajamatabëcuenesaë. Sacerdotenë dajubinë, pijana yajava, Diosojavabelia ofrendacuena rajutabiaba jivi pibisiacuene pexanaeconi Dioso pevecuaajibiaexanaenexatsi. Bajarapacuenia itsa rajutabiaba, bajaraponë ata pibisiacuene pexanaeconi Dioso pevecuaajibiaexanaenexatsi, yajavarajutabiaba.

⁴ Itsanë ata pijacuata pepo sacerdotenë apo naexanae daxitajivi petocuaicuaijainexa Diosojavabelia daxitajivi peyaiyataenexatsi. Biji rajane sacerdoteviyajuvënënë, caenë, Dioso itapetatsi pepo sacerdotevi penamatacaitorobinë pexanaenexatsi, pacuenia bajayata Aarónpijinë ata Dioso itapetatsi pepo sacerdotenë pexanaenexatsi. Nexata bajayata Aarónpijinë ata daxitajivi yayatanetsi. ⁵ Bajara icatsia itsi Cristo ata. Pijacuata apo naexanae pepo sacerdotenë, vajanacatocuaicuaijainexa Diosojavabelia. Biji rajane Dioso itapetatsi Cristo pepo sacerdotenënexa

daxitajivi peyayataenexatsi. Cristojavabelia copiaya Dioso jumaitsi mapacueniaje:

Xamë raja taxënatomë. Xanë raja axanë,
jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexënato pepo sacerdotenënexa. Jumaitsi mapacueniaje: Xamë raja pepo sacerdotenëmë tsane daxitamatacabijavabelianexa. Jivi netocuaicuajainë tsane xanëjavaberena. Pacuenia bajayatami itsi Melquisedec, bajara xamë ata itsimë tsane,
jai Dioso pexënatojavabelia.

⁷ Jesucristo abaxë itsa ponapona mapanacuataje, piniijjumeta yaitaxutonueya vajëta Diosojavabelia. Bajarapacuenia vajëta Diosojavabelia pecapanepaenexatsi petëpaejavavecu. Nexata Jesucristo xaniavaetsia Dioso jumetanetsi. Tsipaji Jesucristo jamatabëjumaitsi Dioso yabara: “Jitsipajë taneexanaenexa pacuenia taxa netojitsipa,” jamatabëjai. ⁸ Jesucristo, Dioso pexënato, ayaijamatabëcuenenë ata, itsiata paxa jumecovënëta. Nexata pijacuata nacopata pebejibioiaexanaenexatsi pacuenia Dioso tojitsipatsi. ⁹ Nexata Jesucristo paxa itsa jumecovënëta, nacopata pebeyaxuabinoxatsi jivi pesivatëpaenexa. Nexata daxita pamonaë jumecovënëtavanapa pacuenia Jesucristo itorobatsi, Dioso rajutsianatsi matababi apo pevereverecejava. ¹⁰ Dioso baja cajena itapetatsi Jesús pepo sacerdotenënexa, jivi petocuaicuajainexa Diosojavabelia, pacuenia bajayata itsi Melquisedecpijinë.

Pacuenia Dioso pejumecovënëtsivi muxujibatsi pecopabiyanima Dioso pejumecovënëtsijava yabara pelivaisi

¹¹ Xainajë picani ayailivaisi patacatsipaebinxaxa paneyapëtaenexa pacuenia Cristo pepo sacerdotenë vajanacatocuaicuajainexa Diosojavabelia. Itsiata baitsi jane ayapëbeje patacajumeyapëtaeyaxanaenexa bajarapalivaisi. Pacuenia pejevaxi beaxayo bayapëtaepona vajacujarubijava, bajara pajamatabëcueneitsimë. ¹² Bajayajebi baja picani Jesucristo pajumecovënëtame. Juya baja picani bepatsipaebaponame itsamonaejavabelia. Itsiata baitsi jane abaxë panamatavenoname icatsia papecatsipaebinxaxa bajarapalivaisi. Palivaisi picani yapëxanepana, Dioso pejumelivaisi, itsiata apo pajumeyapëtaemë. Nexata abaxë panamatavenoname icatsia papecatsipaebinxaxa bajarapalivaisi. Pacuenia pejevaxinacuetoxi ëmitobarëmene apa, apo xae abaxë pexaejava, bajara pajamatabëcueneitsimë. Tsipaji palivaisi ayapëbejevajëto, apo pacacajëpae orijibia panejumeyapëtaenexa. ¹³ Pamonaë abaxë namatavenona petsipaebinxaxatsi peyapëxanepanaelivaisixi, Dioso pejumelivaisi, bajarapamonaë pejamatabëcuene abaxë mito bepiapaenacuetoxi. Bajarapamonaë abaxë apo yapëtae pexanaenexa pacuenia Dioso tojitsipatsi. ¹⁴ Pacuenia penaveretsivi pijacuata xane pexaejava, bajara jamatabëcueneitsi pamonaë pejamatabëcuenevitsabivi Diosojavabelia. Nexata pacuenia Dioso itorobatsi, jumecovënëta. Najamatabëxainabiaba pexanaenexa ëpexaniacuene. Apo jitsipae pibisiacuene pexanaejava.

6

¹ Vaxaitsi Dioso vajajumecovënëtsijavaveliacujinae, vajavajënaeyabelia jumecovënëtaponatsi vajajamatabëcuenevitsabaponaenexa Diosojavabelia,

pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinxista Cristo pelivaisi, pacuenia copiaya nacatsipaeba pamatacabi ajena najamatabëcueneocopatatsi Diosojavabelia. Vaxaitsi baja copabatsi pibisiacuene vajaexanabiabijava. Najamatabëcuenepeñeyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa. ² Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsi-matanacobebeuata ancianovi Dioso pejumecovënëtsivijavabelia. Pacuenia ata icatsia Dioso asaëyaxanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonaenaneconita Diosojavabelia, naneconitsiajinavana-paejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

⁴ Itsamonae baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëcatsi. ⁵ Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. ⁶ Itsiata baitsi jane bajarapamonaenae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepeñeyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonaenae jamatabëcuenejëpa pamonaemi bajayata Jesucristo beyaxuabatsi cruzata. Tsi-paji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejjava, apo xanepanaenae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonaenae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infiernojavabelia.

Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaevanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavaneja. Dioso baja nexata panejumecovënëtsixae, Dioso pacapanepaena. ¹⁰ Dioso epexaniacuene exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponaenae bajarapamonaenae. Bajarapacuenia itsa payavenonaponaenae itsamonae, patsitanacueneitajëtaponame

Cristo bitso panejitsipaejava. ¹¹ Pacatojitsipatsi, pacaiejivimë canacujitsia, itsamonae panetsitanacueneitajëtaponaenexa namataenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Diosojavabetsia. ¹² Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

¹³ Bajayata Dioso pexaniajaijumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuajaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacacuaicuajai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuajaijitsia, ajibi. Tsipaji baja pematatsënëa Dioso matatoxenetsia ayaijamatabëcuenenë ajibi. Bajaraxuata Dioso pexaniajaijumeta navënëcacuaicuajaiya jumaitsi pacuenia toexanaejitsia Abrahampijinëjavabelia. ¹⁴ Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabiabianatsi. Xainaenamenua ayaibitsaëto nemomoxi,” jai Dioso pexaniajaijumeta. ¹⁵ Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsitsi. ¹⁶ Itsamonae Dioso pevënë bacacuaicuajai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumaitsijava bajarapamonaejavabelia: “Apo pacajumexaniataetsi,” pejaijava. Tsipaji Dioso pevënë cacuaicuajai pexaniajaijumeta. ¹⁷ Dioso baja cajena pexaniajaijumeta najumecapanepaeya jumaitsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeebiyanivatsi, “Jemajai raja. Dioso epatua itsajamatabëcuene xainaena,” pejaiyanivatsi. Bajaraxuata nexata Dioso tajëvelia navënëcacuaicuajaiya jumaitsi Abrahampijinëjavabelia mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. ¹⁸ Bajarapacuenia Dioso najumecapanepaeya pejumaitsicujinae, acuenebi epatua itsajamatabëcuene pexinaejava. Tsipaji baja Dioso acuenebi penajumetsënëtsijava. Nexata vaxaitsi Dioso vajanacacapanepaejavanexa vajajumecovënëtsivi, bejamatabëjematsi. Apo bejamatabëcuenebëjaisi. Tsipaji baja yapëtanetsi Dioso pexaniajaijava vajanacacapanepaenexa, pacuenia baja bajayata tajëvelia najumecapanepaeya jumaitsi. ¹⁹ Cristo vajanacasivatëpaenë, athëbëtsia peecaexae Dioso pemuxuneneta, nexata baja yapëtanetsi vajanacacapanepaejavanexa

Diosojavabelia. Nexata ajamatabëcuenesaëtsi tsavanapae Dioso vajajumecovënëtsijava. ²⁰ Jesús athëbëabetsia vajavajënaeyabetsia pona vajanacatoexanarutsinexatsia namuto. Nexata jane baja Jesús athëbëtatsia pepo sacerdotenë Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenë pacuenia bajayatami itsi Melquisedecpijinë.

7

Pacuenia Jesús pepo sacerdotenë pacuenia bajayatami itsi Melquisedecpijinë yabara pelivaisi

¹ Bajayatami Melquisedecpijinë ponapona. Salemtomara pevetsinëmi. Bajaraponëmi sacerdotenë, jivi petocuaicuaijainexa, athëbëtatsia peecaenë, Diosojavabelia. Nexata bajarapamatacabi Abrahampijinë vajabitsaë exana itsanacuanë pevetsivijavabelia. Itsa baja Abrahampijinë verebiaba pijavajabitsaë, naviarena. Nexata penaviatsinërena caxitajarabatsi Melquisedecpijinë. Nexata Melquisedecpijinë jumaitsi Abrahampijinëjavabelia: “Catovajëtsianatsi Diosojavabelia pecayavenonabiabinexa,” jai. ² Abrahampijinë pijavajabitsaë peverebiabivimi pecobecovë penotsijavanë, caponapona. Nexata bajaraxua diez xuabejeyajuvënëjavanë taponae, Abrahampijinë caejavayo ofrendacuenia rajutapona Melquisedecpijinëjavabelia. “Melquisedec,” itsa jai hebreojumeta, mapajumetaje pejumaitsi jume: “Dioso pitabarata aneonijibia xaniavaetsia jivi pevetsinë,” pejajume. “Salemtomara pevetsinë,” itsa jai hebreojumeta, mapajumetaje pejumaitsi jume: “Jamatabëcuenexanepanaeya tomara pevetsinë,” pejajume. Nexata Melquisedecpijinë Salemtomara pevetsinëmi. ³ Melquisedecpijinë paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petëpaejava ata yabara, apo jumaitsi. Nexata pacuenia Dioso pexë nato, Jesucristo, jivi petocuaicuaijainë Diosojavabelia daxitamatacabijavabelianexa, bajara pijinia itsi Melquisedecpijinë. Melquisedecpijinë jivi petocuaicuaijainë Diosojavabelia daxitamatacabijavabelianexa.

⁴ Nexata aeconoxae pacanaëjere mapacueneye. Melquisedecpijinë bitso ayaijamatabëcuenenë vajasalinainëmi Abrahampijinë mata-toxenetsia. Bajaraxuata Abrahampijinë ayaijamatabëcuenenëmi ata, ofrenda rajuta Melquisedecpijinëjavabelia. Pamatacabi Abrahampijinë pijavajabitsaë verebiaba, pecobecovë nota. Nexata Abrahampijinë itsa caxitajaraba Melquisedecpijinë, diez xuabejeyajuvënëjavanë taponae, caejavayo rajutapona Melquisedecpijinëjavabelia. ⁵ Bajayatami Dioso najumecopata Moiséspijinëta. Bajarapalivaisi juya itorobatsi Levípijinëmi pexi, pemomoxi ata, sacerdotevi penaexanaponaevinexa, jivi petocuaicuaijainexa Diosojavabelia. Nexata Levípijinë pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexainaeyajuvënëjava. Baitsi tocopatatsi pematamoyanijobinexa diez xuabejeyajuvënëjavanë taponae, caejavayo pevecuapitaponaenexa. Nacaeviriavi ata, daxita bajarapamonae Abrahampijinë ëpemomoxi ata, itsiata Dioso tocopatatsi nacaeviriavi ata pexainaeyajuvënëjavanë perajutsinexatsi. ⁶ Melquisedecpijinë picani Levípijinë apo pemomo. Itsiata

Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnjavanē tsaponae, caejavayo rajutapona. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai Abrahampijinējavabelia, ponējavabelia Dioso najumecapanepaeya jumaitsi peyavenonaenexa. ⁷Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenejivi Dioso pitabarata pajiviyo tovajētsijitsia matatoxenetsia. Daxita baja cajena yapētanetsi bajarapacuene. ⁸Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēnjavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanē, petēpaevinexa. Tsipaji saya jivi. Itsiata baitsi jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxē mapamatacabita ataje asaē tsaponapona. Nexata tsiteca jivi tocaicuajai tsabiabi Diosojavabelia,” jai. ⁹⁻¹⁰Bajayatami Abrahampijinē ofrenda rajuta Melquisedecpijinējavabelia. Bajarapamatacabi abaxē Levípijinē apo naexanae. Pexi ata abaxē ajibi. Pemomoxi ata abaxē ajibi, pamonaē jane baja mapamatacabitaje sacerdotevi naexana jivi petocuaicuajainexa Diosojavabelia. Itsiata paofrenda Abrahampijinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinē daxitanexa yayyataeya ofrenda rajuta Melquisedecpijinējavabelia.

¹¹Pamatacabi Aarónpijinē, pexi ata, sacerdotevi baja tsavanapae, bajarapamatacabi judíovi pejumecovēnētsinexa Dioso Moiséspijinēta najumecopata. Pamonaē Aarónpijinē pexi, Levípijinē baja cajena pemomoxi. Judíovi itsa jumecovēnētsipa Dioso Moiséspijinēta penajumecopatsilivaisi Dioso aneconijibia petaenexatsi, nexata Dioso apo itorobitsica tsipae Cristo, ponē beMelquisedecjamatabēcuenenē, jivi petocuaicuajainexa Diosojavabelia daxitamatacabijavabelianexa. Dioso Moiséspijinēta penajumecopatsilivaisi pejamatabēcueneta Dioso aneconijibia judíovi itsa taejitsipa, nexata icatsia Dioso saya mataropotsia pepo sacerdotenē exanaponaejitsipa Aarónpijinē pemomoxi. ¹²Nexata Cristo sacerdotenē itsa exanatsi, jivi petocuaicuajainexa Diosojavabelia daxitamatacabijavabelianexa, yajavacopatatsi pijinia itsalivaisi Dioso Moiséspijinēta penajumecopatsilivaisivecua. ¹³Vajatuxanenē, ponē Dioso pejumelivaisibaxutota tajēvelia vajunupaebatsi, bajaraponē Levípijinē apo pemomo. Biji rajane saicayavirianē. Bajaraponē pijaviriavi bajayata caenē ata sacerdotenē apo naexanae. ¹⁴Vajatuxanenē itsa naexana mapanacuataje, daxitajivi baja cajena yapētane penaexanaejava mapanacuataje. Vajatuxanenē naexana Judápijinē pemomoyota. Daxitajivi yapētanenua pacuenia bajayata Moiséspijinē tajēvelia vajunupaeba pamonaē sacerdotevi naexanaponaejitsia. “Judápijinē pemomoxi ata sacerdotevi naexanaena,” apo jai picani.

¹⁵Bajaraxuata vaxaitsi xaniavaetsia jane baja yapētanetsi pepatsijava itsaviriasacerdotenē. Tsipaji Cristo, ponē jane baja pepo sacerdotenē jivi petocuaicuajainexa Diosojavabelia daxitamatacabijavabelianexa, bajaraponē beMelquisedecjamatabēcuenenē. ¹⁶Levípijinē pemomoxi

sacerdotevi exanaponatsi. Tshipaji bajayata Moiséspijinē tocopata bajarapamonaeyajuvēnēvi sacerdotēvi pexanaenexatsi. Itsiata baitsi jane Cristo, pepo sacerdotenē itsa exanatsi jivi petocuaicuaijainexa Diosojavabelia daxitamatacabijavabelianexa, Levipijinē pemomoxae, pepo sacerdotenē apo exanaetsi. Jume baja cajena. Biji rajane Cristo pepo sacerdotenē exanatsi icatsia piasaēxae petēpaecujinae. ¹⁷ Dioso baja cajena tajēvelia pexēnatojavabelia pejumaitsijava, Dioso pejumelivaisibaxutota jumaiti mapacueniaje:

Xamē raja pepo sacerdotenēmē tsane daxitamatacabijavabelianexa. Pacuenia Melquisedec jamatabēcueneitsi, bajarajamatabēcueneitsimē tsane, jai baja cajena tajēvelia Dioso pejumelivaisibaxutota Dioso pejumaitisijava pexēnatojavabelia.

¹⁸⁻¹⁹ Nexata baja palivaisimi copiaya Dioso Moiséspijinēta najumecopata jivi pejumecovēnētsinexa, Dioso baja copiarucaeyaxana. Tshipaji bajarapalivaisimi apo caējēpaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tshipaji baja Cristo vajanacasivatēpaexae, bajaraponē pejamatabēcueneta Dioso baja aneonijibia nacatane. Nexata nacatocopata vajajamatabēcuene saya vajaimoxoyotsinexa Dioso.

²⁰ Dioso baja cajena tajēvelia najumecapanepaeya jumaiti Cristo pepo sacerdotenē pexanaenexatsi, jivi petocuaicuaijainexa Diosojavabelia daxitamatacabijavabelianexa. ²¹ Pamonaemi bajayata copiaya Cristo pevājēnaeya sacerdotēvi exanaponatsi, bajarapamonaemi yabara Dioso bajarapacuenia apo jumaiti. Itsiata baitsi jane tajēvelia Dioso najumecapanepaeya jumaiti Cristo pepo sacerdotenē pexanaenexatsi. Bajaraxuata tajēvelia Dioso pejumelivaisibaxutota jumaiti mapacueniaje:

Dioso baja cajena najumecapanepaeya itsa jumaiti, itsajamatabēcuene icatsia epatua apo xinae. Bajaraxuata tajēvelia Dioso pexēnatojavabelia pejumaitisijava, Dioso pejumelivaisibaxutota jumaiti mapacueniaje: “Xamē baja cajena pepo sacerdotenēmē tsane daxitamatacabijavabelianexa. Pacuenia Melquisedec jamatabēcueneitsi, bajarajamatabēcueneitsimē tsane,”

jai Dioso pejumelivaisibaxutota tajēvelia Dioso pejumaitisijava pexēnatojavabelia.

²² Bajarapacuenia tajēvelia Dioso najumecapanepaeya pejumaitisixae Cristo yabara, nexata yapētanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinēta najumecopata matatoxenetsia. ²³ Copiaya pamonaemi sacerdotēvi exanaponatsi, ayaibitsaēto jonepona sacerdotēvinexa. Tshipaji tēpagona. Nexata apo caējēpaetsi pevetsinexa daxitamatacabijavabelianexa. ²⁴ Itsiata baitsi jane Jesús baja icatsia apo tēpae tsane. Nexata pepo sacerdotenē tsane daxitamatacabijavabelianexa. Nexata baja icatsia itsanē pepo sacerdotenē apo exanaetsi tsane. ²⁵ Nexata pajivi najamatabēcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi.

Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabēcueneta.

Tsipaji Jesús daxitamatacabijavabelianexa asaë tsaponaponae tsane jivi petocuaicuaijainexa Diosojavabelia.

²⁶ Pacuenia baja Jesús pepo sacerdotenë, bajarapitsinë vaxaitsi vajanamatabenonaexae, Jesús baja patsica. Jesús cajena Dioso pejamatabëcuenejëpaenë, planeconijibinë Diosojavabelia. Pibisiacuene pexanaevi ata, apo jamatabëcuenebijianaetsi. Tocopatatsi peccaenexa athëbëtatsia, paxa Dioso pemuxuneneta, penajuaevetsinexabeje daxitacuene. ²⁷ Pacuenia itsamonae pepo sacerdotevi jamatabëcueneitsi, bajara Jesús apo jamatabëcueneitsi. Itsamonae pepo sacerdotevi, daxitamatacabi dajubi beyabiaba ofrendacuena bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeneconi Dioso peve-cuaajibiaexanaenexatsi, itsamonae ata pibisiacuene pexanaeneconi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuena penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeneconimi daxitamatacabijavabelianexa. ²⁸ Bajayata palivaisi Dioso Moiséspijinëta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo cajëpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexënato pepo sacerdotenë penaexanaenexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuaijainë Diosojavabelia yabara pelivaisi

¹ Xua yabara baja pacatsipaebatsi, maitsije. Aeconoxae baja xainatsi Jesús, pepo sacerdotenë vajanacatocuaicuaijainexa Diosojavabelia. Bajaraponë ecaeyaexanatsi athëbëtatsia, Dioso ayaijamatatabëcuenenë pemuxuneneta, pecujuanenia, penajuaevetsinexabeje daxitacuene. ² Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenë penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonae pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuena bajarapavi perajutsinexa Diosojavabelia. Bajaraxuata Jesucristo ata, vajanacatocuaicuaijainë Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebeyaxuabinexatsi ofrendacuena penarajutsinexa Diosojavabelia. ⁴ Itsa abaxë Jesucristo mapamatacabi ata ponaponaejitsipa mapanacuataje, apo sacerdotenë tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuena bajarapavi perajutsinexa Diosojavabelia Moiséspijinë pitorobicueniatsi. ⁵ Xua Jesucristo athëbëtatsia exanaponapona, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi.

Yapëtanetsi baja cajena xua Jesucristo athëbëtatsia exana, bajaraxua mapanacuapijisacerdotevi saya cuenecataeya exanavanapa. Tspiji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moiséspijinë Dioso tsitajëtatsi petsutojumata. ⁶ Itsiata baitsi jane Cristo, ponë pepo sacerdotenë, xua Dioso athëbëtatsia tocopatatsi petonacuenebinexa, bajaraxua bitso ayaijamatabëcuene. Xua bajayata sacerdotevi Dioso tonacuenebavanapa mapanacuataje, beveliajamatabëcuenejava saya. Tspiji Cristo jivi tocuaiicuaijai tsane Diosojavabelia daxitamatacabijavabelianexa. Cristo nacayavenonabiabiana. Pepacuene baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaitsi vajanacarajutsinexa, baitsi matacabi apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. ⁸ Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaitisijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matacabi apo peverevereaejava. Bajarapacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata. ⁹ Bajarapamonae pijasalinaivimi bajayata matacarenanë Egipto nacuaverena. Bajarapamatacabi baja najumecapanepaeya jumaitsinë pacuenia bajarapamonaemi yavenonaejitsianë picani. Itsiata baitsi jane bajarapamonaemi apo nejumecovënëtsi. Bajaraxuata copatajë baja bajarapamonaemi tayavenonaejava, jai Dioso pejumelivaisibaxutota tajëvelia Dioso pejumaitisijava Israelpijinë pemomoxi yabara.

¹⁰ Dioso icatsia tajëvelia pejumaitisijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëëthëtota yapëtaeyaexanaponaenajë pacuenia netojinavanapaejitsia. Nexata bajarapamonae pejamatabëëthëtovavetsina jitsipaena tanejumecovënëtsinexa. Nexata bajarapamonae pijaDiosonënë tsane. Bajarapamonae pijinia tajajivi tsane. ¹¹ Nexata bajarapamatacabi itsajivi ata apo jumai tsane itsanëjavabelia, pijamonaenëjavabelia ata: “Xamë ata beyapëtaneme Dioso,” apo jai tsane. Tspiji baja daxitajivi neyapëtaena. Neyapëtaena beveliajamatabëcuenevi. Neyapëtaena ayaijamatabëcuenevi ata. Daxita bajarapamonae neyapëtaena.

12 Xanë baja daxita tajajivi pibisiacuene pexanaeconimi, vecuaajibiaexanaenajë. Apo najamatabënapitsinë tsane bajarapapibisiacuenemi, jai Dioso pejumelivaisibaxutota bajayata tajëvelia Dioso pejumaitsijava.

13 Bajarapacuenia Dioso itsamatacabijavabelia icatsia najumecapanepaeya pejumaitsijavanexa yabara jumaitsi. Tsipaji baja ajumematamobi palivaisimi copiaya Dioso najumecapanepaeya jumaitsi judíovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

9

Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtsatsia ata peceaabo, yabara pelivaisi

¹ Dioso copiaya najumecopata Moiséspijinëta. Bajarapalivaisita itoroba Israel pemomoxi pexanaenexa Dioso pijacarpaboxaneto, bajarapabota Diosojavabelia penavajëcabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota. ² Itsa baja vereteta carpaboxaneto Diosojavabelia penavajëcabiabibonexa, bajarapabo ënëtuatuajë yatuucutsiaya epatajërëtsiarena rurena ayaipapaëbërëpana. Bajarapaënëyatuucutsijava jumavereca, paënëtuatuajë pevënë Lugar Santo. Bajarajota nuta candelerosvënëjava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia.

³ Bajara papapaëbërëpanacujinaareca, paënëtuatuajë, pevënë pijinia Lugar Santísimo, itsajota baitsi Dioso peponaponaenexa yatuucuta. ⁴ Bajarapaënëyatuucutsijava tuatuajëta, nuca orota pexanaejava, altarvënëjava. Bajara paaltarjumata jeba petuxujuvijavanë, inciensovënëjavanë, petajuitsinexa. Bajarapaënëyatuucutsijava tuatuajëta boca baula, orota pexanaebaula. Bajarapabaula ënëtuatuajëta nuca orota pexanaebotellabë. Bajarapabotellabëta yanuca pexaejava, manávënëjava. Bajarapabaula ënëtuatuajëta bocanua Aarónpijinëmi pijanaeboyo. Bajarapanaeboyo bajayata Aarónpijinë: “Baxujuvare,” itsa jai, baxujuvatababiaba. Bajarapabaula ënëtuatuajëta bocabejenua ibopanabeje. Bajarapaibopanatabeje Dioso jivi pitavetsilivaisi najumeyaquinabuata. ⁵ Bajarapabaula matatsënëta anijanëbeje pecorofeto pexainaenëbeje nucabeje. Bajaraponëbeje beángelnëbeje, jumapecataeya pexanaenëtsibeje. Bajaraponëbeje nutatsibeje Dioso pijapenivenivenaectotia pitajëtsinexabeje. Bajaraponëbeje pecorofetota baula matatsënëcaranatanucabeje. Nexata pepo sacerdotenë caevai canacujitsia bajarapabaula jumatsicababiaba dajubinë pijanata. Pepo sacerdotenë bajarabaula itsa jumatsicababiaba, jamatabëjumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vajaexanaeconimi,” jamatabëjai tsabiabi pepo sacerdotenë dajubinë pijanata baulajuma petsicababiabijavata. Itsiata aeconoxae apo necuenecajëpae patacatoyaquinaponaenexa pajamatabëcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajëcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pënëyatuucutsijava penamataxainaeënëtuatuajëtsatsina, sacerdotevi

jivananabiaba. Sacerdotevi joneyabiaba penacuenebinea Dioso pijacue petonajumecopatsicueniatsi. ⁷ Nexata bajarapabo pēnēyatuucutsijava penamataxainaeēnētuaatujētsina cujinaereca, paēnētuaatujējavabereca, sacerdotevi pepo penamatacaitorobinē caenē joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinē jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacue pexanaeconi Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacue exanae ata, itsiata apo nacueneyapētae, Dioso pevecuaajibiaexanaenexatsi. ⁸ Espiritu Santo pejamatabēcueneta nacayapētaeayaxana mapacueneye. Pamatacabi abaxē Dioso pijacarpaboxaneto piapiapapaēbērēpanaxanetota ēnētuaatujē yatuucutararena, sacerdotevi Dioso pijacue tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonexa Lugar Santísimojavabelia pijacuata pevajētsinexa Diosojavabelia. Bajaraxua vajayapētaenexa Espiritu Santo pejamatabēcueneta nacayapētaeayaxana. ⁹ Bajaraxua bajayata sacerdotevi exana comparacióncuenia ajena mapamatacabijavaberenaje vajanacayapētaeayaxanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapētanetsi mapacueneye. Bajarapacuenia jivi exanae ata, nacueratabiaba. Tsipaji jivi dajubinēvi ofrendacuenia rajutabiabi ata Diosojavabelia, tsiteca pijaperujumatabēcue xainavanapa. ¹⁰ Paperujulivaisimi bajayata Dioso Moiséspijinēta najumecopata, jivi apo itorobitsi penajamatabēcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranaxa ata xaniavaetsia pevetsinexa, xaniavaetsia penaperabēquiatsinexanua. Bajarapacuenia itorobatsi bajarapalivaisimi pejumecovēnētavanapaenexa abaxē Cristo pepatsivajēnaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaexanaenexa pejanalivaisita.

¹¹ Capanepaeya baja pata Cristo, pepo sacerdotenē. Bajaraponē vajanacatocuaicuaijainēnexa Diosojavabelia daxitamatacabijavabelianexa. Aeconoxae baja Cristo pexaniacue nacatoexana. Cristo baja pona athēbēabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo itsa junua bajarapabotatsia, caecueneta junua bajarapaboēnēalia, Lugar Santísimojavabelia, itsajota baitsi Dioso peponaponaenexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacapanepaenexa. ¹³ Xaniajai. Bajayata Israelpijinē pemomoxi itsa naneconita Diosojavabelia, abaxē apo tocopatabiabitsi penajonenexa Diosojavabelia penavajēcabiabibojavabelia. Nexata Israelpijinē pemomoxi copiaya matsicababiabatsi chivojanata, torojanata ata. Becerrami altavēnējavajumata petajuitsiipumana ata tsimataothoothotabiabatsi. Nexata jane baja xuacujinae tocopatabia-

batsi icatsia penajonenexa Diosojavabelia penavajëcabiabibojavabelia. ¹⁴ Bajarapacuenia bajayata Dioso tocopatatsi dajubinë pijana pejamatabëcueneta Israelpijinë pemomoxi pejonenexa Diosojavabelia penavajëcabiabibojavabelia. Dajubinë pijana matatoxenetsia Cristo hitso caëjëpatsi vajanacayavenonaenexa Dioso pexënatoxae. Espíritu Santo, apo pevereverecaenë daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatëpaenexa. Cristo cajena caeto ata pibisiacuene apo exanae. Nexata Cristo pijanata nacavecuaajibiaexana baja pibisiacuene vajaexanaeconimi. Bajarapaneconi yabara picani Diosovecua vajanaxuabiviminexa. Bajarapacuenia Cristo vajanacatoexanaexae, tonacuenebavanapatsi piasaëtsaponaponaeenë Dioso.

¹⁵ Nexata Jesucristo pejamatabëcueneta nacavecuaajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamonae Dioso junatatsi, rajutsianatsi matacabi apo pevereverecejave, pacuenia baja Dioso najumecapanepaeya jumaitsi perajutsinexatsi. Cristo ita nacasivatëpa, nacaneconimatamota baja. Nexata nacavecuaajibiaexana daxita paneconimi xainatsi ita abaxë jume-covënëtavanapatsi copiaya palivaisimi Dioso Moiséspijinëta najumecopata. ¹⁶⁻¹⁷ Itsajivi petëpaevajënae, yaquina pecobecovë yabara. Bajara-pajivi ita tëpa, pijamonae pevënamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxë ita asaë tsaponaponae pecobecovë pexainaejivi, ajumemata-mobi abaxë bajarapalivaisi. Matapania baja ita tëpa pecobecovë pexainaejivi, jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petëpaejivi yaquina petëpaevajënaeya pecobecovë yabara. ¹⁸ Bajara pijinia itsi paperujulivaisimi bajayata Dioso Moiséspijinëta najumecopata Israelpijinë pemomoxi pejumecovënëtsinexa. Jumenamatamotapona Israelpijinë pemomoxi dajubi pebeyabiabixae ofrendacuena bajarapavi perajutsinexa Diosojavabelia. ¹⁹ Bajayata Moiséspijinë copiaya tsipaeba daxitajivijavabelia daxitajivi bajarapalivaisi pejumecovënëtavanapaenexa. Nexata Moiséspijinë pita hisopovënë naeboxi pepacëtetsicunuyo petso-bialanamaëtota. Bajaraxuacujinae bajarapacunuyo Moiséspijinë jabuta merata, becerrojanata, chivojanatanua, peyajavamatajërëabijanarata. Nexata Moiséspijinë tsmatatsicaba pabaxutota itanerubena palivaisi Dioso najumecopata Moiséspijinëta. Bajaraxuacujinae Moiséspijinë daxitajivi tsmatatsicabapona. ²⁰ Nexata Moiséspijinë jumaitsi jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovënëtavanapaename. Nexata pacuenia Dioso najumecapanepaeya pacajumaitsi, pacatocopi-apatsiana,” jai Moiséspijinë jivijavabelia. ²¹⁻²² Bajaraxuacujinae icatsia Moiséspijinë tsicabanajanaejaeba Diosojavabelia penavajëcabiabibo ënëtuatuajë. Xuanë bajarapabo ënëtuatuajëta xaina pecanacuenebinexa Dioso pijacuene, daxita bajaraxuanë yajavatsicabanajanaejaeba. Bajarapacuenia pexanaenexa itoroba baja cajena Dioso Moiséspijinëta penajumecopatsilivaisimita. Itoroba dajubinë pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanë, jivi ata Dioso aneconijibia petaenexa. Tsipaji jivi pibisiacuene pexanaeconeni yabara, acuenebi Dioso aneconijibia petaenexatsi. Mat-

apania dajubinē itsa beyaxuaba, pijanata itsa matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi

²³ Diosojavabelia penavajēcabiabibota, xuabeje xaina pecanacuenebinexa Dioso pijacuene, dajubinē pijanata bajayata Moiséspijinē tsicabanajaenajaeba. Bajarapacuenia Moiséspijinē itsa exana, tajēvelia comparacióncuenia itajētaƀona jivi peyapētaenexa itsamatacabijavabelia Cristo pesivatēpaejavanexa mapanacuapijivi. Cristo dajubinē pijanata apo tsicabanajaenajaebi Diosojavabelia penavajēcabiabibo ēnētuaƀajē. Biji rajane Cristo nacopata pebeyaxuabinexatsi. Nexata Cristo pijana pejamatabēcueneta, mapanacuapijivi pibisiacuene pexanaeneconi, Dioso baja vecuaajibiaexanatsi. Cristo cajena bitso jananamatamota Dioso pitabarata, dajubinē pejana matatoxenetsia. ²⁴ Cristo baja cajena vajanacasivatēpaecujinae, athēbēabetsia pona. Aeconoxae baja Cristo athēbētatsia eca, paxa Dioso pemuxuneneta, vajanacatocuaicuaijaitsecaenexa Diosojavabelia. Nexata Dioso pepo pijabotatsia Cristo nacatocuaicuaijai tsaponae. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajēcabiabibonexa, bajarapabo saya cuenecataeya exana pacuenia athēbētatsia Dioso pepo pijabo itsi. ²⁵ Sacerdotevi pepo penamatacaitorobinē, bajaraponē judionē. Caevai canacujitsia cajoneyabiaba dajubinē pijana Lugar Santísimovēnējavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatēpaenexa, icatsia baja pematatsēnēa apo nacopatsi petēpaenexa. ²⁶ Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatēpaponaeenexa caevai canacujitsia, nexata Cristo bitso anijatonē jivi pijaneconi yabara sivatēpaponaejitsipa. Itsiata baitsi jane Cristo caeto petēpaecujinae, icatsia baja apo tēpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatēpaenexa, pibisiacuene vajaexanaeneconimi vajanacavecuaajibiaexanaenexa. ²⁷ Bajara pijinia pacuenia vaxaitsi ata caeto tēpaponaeenatsi. Bajaraxuacujinae jane baja Dioso naneconitsiaexanaponaena daxita pamonaē pijaneconi pexinaevi. ²⁸ Bajara pijinia pacuenia Cristo caeto nacopata pebeyaxuabinexatsi vajanacasivatēpaenexa, ayaibitsaētoxanetotsi pibisiacuene vajaexanaeneconi vajanacavecuaajibiaexanaenexa. Bajaraxuacujinae Cristo baja athēbēabetsia pona. Icatsia patsianica cotocaevijava. Itsiata baitsi jane baja icatsia apo nacasivatēpae tsane pibisiacuene vajaexanaeneconi yabara. Saya baja nacasivapatsianica vajavajēnaeevetavanapaevi vajanacacaponaenexa athēbēabetsia.

10

¹ Palivaisi bajayata Dioso Moiséspijinēta najumecopata, bajarapalivaisi saya Dioso najumecopata tajēvelia vajayapētaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinēta penajumecopatsilivaisi, sacerdotevi

exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuenia pevi perajutsinexa Diosojavabelia, pibisiacuene pexanaeneconi Dioso pevecuaajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabëcuenexaniavaetsitsi. ² Pacuenia bajayata itorobatsi Dioso Moiséspijinëta penajumecopatsilivaisi, sacerdotevi exanabiaba. Dajubinë beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuaajibiaexanaejitsipatsi pibisiacuene pexanaeneconi, nexata bajarapamonae apo yanajamatabëxainae tsipae pijaneconi. Nexata baja itsa aneconijibi tsipae, pematatsënëa dajubinë apo beyaxuababiabi tsipae ofrendacuenia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. ³ Bajarapacuenia dajubinë caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabëcuenëbarëyaya apo jinavanapae. Biji rajane bajarapacuenia exanabiabi ata, pevajënaeyabelia tsiteca yanajamatabëxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo caëjëpaetsi jivi pijaneconi pepacuene pevecuaajibiaexanaenexatsi.

⁵ Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuenia. Apo jitsipaemënuu dajubinë ata pebeyaxuababiabijava pevi pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatëpaenexa pijaneconi yabara. ⁶ Jivi picinì dajubinë beyaxuababiaba ofrendacuenia pevi pecarajutabiabinexa, altarvënëjavajumata pecatotajuitsinexa. Jamatabëjumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenëbarëyamë bajaraxua yabara. ⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi,

jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenëbarëya jivi dajubinë pebeyaxuababiabijava ofrendacuenia pevi perajutabiabinexa Diosojavabelia. ⁹ Icatsia Cristo jumaitsi paxa Diosojavabelia mapacueniaje: “Bajara jane manucajëje pacuenia jitsipame tacatoexanaenexa,” jai Cristo. Cristo baja mapanacuapijivi pibisiacuene pexanaeneconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaexana. ¹⁰ Pacuenia Dioso tojitsipatsi, Jesucristo nacopata pebeyaxuabinexatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene vajaexanaeneconimi. Caeto baja Jesucristo nacasivatëpa daxita mapanacuapijivitsije.

11 Caematacabi canacujitsia picani sacerdotevi nubenabiaba larvënëjava muxuneneta, dajubinë itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuenie apo vecuaajibiaexanaetsi pibisiacuene pexanaeiconi. 12 Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaeiconimi. Caeto baja Jesucristo tēpa pibisiacuene vajaexanaeiconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuevetsinexabeje daxitacuene. 13 Cristo abaxë aeconoxae athëbëtatsia ecaya. Jamatabëcueneevetecaya abaxë pijavajabitsaë paxa Dioso petojamatabëcueneamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. 14 Caeto baja Cristo nacopata vajanacasivatēpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeiconimi daxitamatacabijavabelianexa. 15 Cristo baja cajena caeto vajanacasivatēpaejavanexa daxitamatacabijavabelianexa, Espiritu Santo tajëvelia nacayapētaeyaexana. Espiritu Santo tajëvelia nacayapētaeyaexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaitsi mapacueniaje:

16 Najumecapanepaeya tajajivi yabara pejanalivaisi itsamatacabi jumaitsinë tsane mapacueniaje: “Caejivi canacujitsia pejamatabëëthëtota yapētaeyaexanaponaponaeñajë pacuenia netojinavanapaejitsia. Nexata bajarapamonae pejamatabëëthëtōjavavetsina jitsipaena tanejumecovënëtsinexa,”
jai Dioso.

17 Bajaraxuacujinae icatsia Dioso jumaitsi mapacueniaje:
Apo najamatabënapitsinë tsane itsamatacabijavabelia ata daxita papibisiacuene bajarapamonae exana,
jai Dioso tajëvelia pija-jivi yabara.

18 Nexata jane baja Cristo nacasivatēpa pibisiacuene vajaexanaeiconimi Cristo pejamatabëcueneta Dioso vajanacavecuajibiaexanaenexa. Nexata baja pematatsënëa dajubinë apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeiconi Dioso vajanacavecuajibiaexanaenexa.

Pacuenia saya vajajamatabëcuene imoxoyotsijitsiatsi Dioso yabara pelivaisi

19 Tajamonae, Jesucristo baja vajanacasivatēpaexae, aeconoxae baja Dioso nacamocopata ajunavijibia vajajonenexa Dioso pijanacuayabetsia. Nacamocopatanua bajarajotatsia vajajonenexa Lugar Santisimovënëjavabelia, itsajota baitsi Dioso ponapona. 20 Jesucristo nacatoexana pejananamuto vajaponaenexa athëbëabetsia, Dioso vajanacarajutsinexa matacabi apo peverevereceajava. Jesucristo baja itsa nacasivatēpa cruzata, nacasivatēpa vajapatsinexa Diosojavabetsia. 21 Bajayata sacerdotevi toevetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetaponapona vaxaitsi vajanacatocuaicuajinexa Diosojavabelia. 22 Bajaraxuata vajajamatabëëthëtōjavavetsina

vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëitojorobiaya apo bejumecovënëtsi. Tsipaji yapëtanetsi Dioso vajanacacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanaeneconimi Dioso nacavecuaajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, nacaperabëquiatanua piaxuirajibimerata. ²³ Vajavajënaeyabelia asaëyata copiaevetavanapaenatsi Dioso vajanacacapanepaejavanexa. Bajarapacuenia asaëyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabianatsi Dioso vajanacacapanepaejavanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena. ²⁴ Nexata vaxaitsi namataenetsia benayavenonatsi vajanajamatabëcueneitajëtsinexa vajanasivacuene. Namataenetsianua pexaniacuene benatoexanabiabatsi. ²⁵ Itsamonae baja vaxaitsiyajuvënëvi copabapona penajoneyabiabijava vajanacaetuatabiabibojavabelia. Vaxaitsi nexata bajarapamonae apo becuenejëpaetsi. Namataenetsia benajamatabëcueneasaëyaexanaponatsi. Aeonoxae baja bitsoyo biamatabëcueneasaëtsi tsavanapae. Tsipaji baja imoxoyo pevajënae vajatuxanenë pepatsinexatsica.

²⁶ Vaxaitsi tsiteca vajavajënaeyabelia pibisiacuene itsa exanaponaejitsipatsi, yapëtae atatsi Cristo vajanacasivatëpaejava, nexata nacatoacuenehi tsipae Dioso vajanacavecuaajibiaexanaenexa pibisiacuene vajaexanaeneconi. ²⁷ Bajarapacuenia vajavajënaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ëvajanacananeconitsia exanaejavanexa. Pamatacabi Dioso pijavajabitsaë naneconitsiaexanaena pinijiisotojavabelia peverebiabinexa, bajarapamatacabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. ²⁸ Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaitsi pibisiacuene pexanaejivi yabara: “Pataniji pepacuene pibisiacuene pexanaejava mapajivije,” itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeneconi yabara. ²⁹ Pacanaëjere mapacueneje. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëjëtsinua Espiritu Santo piasivajavatsi. ³⁰ Yapëtanetsi baja cajena Dioso pejumaitsijava mapacueniaje: “Pamonae pibisiacuene exanapona itsamonaejavabelia, bajarapamonae xanë naneconitsiayaexanaenajë,” pejaijava. Jumaitsinua Dioso mapacueniaje: “Xanë Diosonënë, naneconitsiaexanaenajë tajajivi,” jai. ³¹ Pajivi Dioso apo jumecovënëtsi, nexata Dioso itsa naneconitsiaexanaenatsi, jbitso piayaicuene tayaexanaenatsi piasaëtsaponaponaenë Dioso!

³² Panajamatabënapire pacuenia pajamatabëcueneitsimë tsavanapae

pamatacabi ajena Cristo pajumecovënētame. Bajarapamatacabi pajamatabëcuenesaēmē tsavanapae panejumecovënëtsijava vajatux-anenē pelivaisi, itsamonaē pacabejiobiaexanae ata bajarapalivaisi yabara. ³³ Paxamëyajuvënëvi baja cajena jivi ayaibitsaëto pitabarata itsamonaē capocaponatsi. Ayaicuenia baja cajena bejiobiaexanatsinua bajarapamonaē pitabarata. Nexata pijinia itsamonaē paxamëyajuvënëvi bitso sivanajamatabëxaina bajarapacuenia papecayajuvënëbejiobia exanaexaetsi. ³⁴ Paxamë paitaxutotsoniataneme pamonaē jebatsi penaneconitsivi pejebabiabibota Dioso pejumelivaisi yabara. Paxamë itsamonaē pacavecuanotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajarapacuenia pajamatabëcuenebarëyamë tsipaji baja payapëtaneme xua athëbëtatsia paxainaejitsiamë. Bajaraxua mapanacuapijicuene matatoxenetsia bitso pexaniacuenejava. Tsipaji daxitamatacabijavabelianexa apo peverevereceaevanexa. ³⁵ Bajaraxuata pëtsa pacopabame panesivanajamatabëcuenecopatsijava Diosojavabelia papecayavenona-aenexa. Dioso cajena athëbëtatsia pacarajutsiana ayaicueniejava panenajamatabëcuenecopatsixae bajaraponëjavabelia. ³⁶ Bajayajebi ata panevajënaeyabelia paexanaponare pacuenia Dioso pacatojitsipa. Nexata xua yabara tajëvelia Dioso najumecapanepaeya jumaitsi papecarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaitsi mapacueniaje:

Bepijia patsianica ponë patsijitsiatsica. Apo cuenenajematsi tsane pepatsinexatsica. ³⁸ Nexata pajivi Dioso aneconijibiatanetsi Diosojavabelia penajamatabëcuenecopataponaponaexae, bajarapajivi xainaena matacabi apo peverevereceaevanexa. Itsiata baitsi jane pajivi nevecuanaviata pecovëyabelia, apo sivajamatabëcuenebarëyanë tsane,

jai Dioso pejumelivaisibaxutota.

³⁹ Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyaniva. Biji rajane vaxaitsi najamatabëcuenecopabatsi Diosojavabelia ëvajanacapanepaejavabelianexa.

11

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

¹ Itsa pepacuene vaxaitsi xaniavaetsia najamatabëcuenecopatatsi Diosojavabelia, nexata najamatabëxainatsi mapacueniaje: “Abaxë daxitacuene apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniajaicuene. Pacuenia Dioso najumecapanepaeya jumaitsi, xaniajai baja cajena. Pepacuene Dioso exanaena,” jamatabëjaitsi. ² Bajayata vajasalainavimi jumecovënëta Dioso. Nexata bajarapamonaemi jamatabëjumaitsi tsabiabi: “Pacuenia Dioso najumecapanepaeya jumaitsi, pepacuene neyavenonaena,” jamatabëjai tsabiabi. Bajaraxuata bajarapamonaemi yabara Dioso jumaitsi: “Sivajamatabëcuenebarëyanë,” jai.

³ Vaxaitsi ata jumecovënëtsi Dioso. Nexata yapëtanetsi pexaniajaicuene mapacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita

xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenejavayo ata mapanacuataje, Dioso baja cajena exana daxitacuene,” pejailivaisi yapëtanetsi pexaniajaicuene.

⁴ Bajayatami Abelpijinë najamatabëcueneocopata Diosojavabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxuaba. Nexata ofrendacuenia pevi rajuta Diosojavabelia. Dioso nexata sivajamatabëcuenebarëyatsi. Abelpijinë pijinia pematapijinëmi, Caínpijinë, apo jumecovënëtsi pacuenia Dioso itorobatsi. Saicaya pijinia itsaviriajava ofrendacuenia rajuta Diosojavabelia. Dioso nexata apo sivajamatabëcuenebarëyatsi Caínpijinë. Nexata Abelpijinë bajayatami baja tēpae ata, itsiata mapamatacabijavaberena ataje vënëlvaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso itsa jumecovënëtatsi, Dioso vajanacasivabarëyajavanexa.

⁵ Bajayata Enocpijinë ata najamatabëcueneocopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajarabatsi. Nexata itsamonae jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenebarëyatsi. ⁶ Pajivi apo najamatabëcueneocopatsi Diosojavabelia, bajarapajivi yabara Dioso apo jamatabëcuenebarëya. Pajivi najamatabëcueneocopatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaē asaëyata vajëta Diosojavabelia pibisiacuene pexanaeneconi pevecuaajibiaexanaenexatsi, bajarapamonae pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noépijinëmi ata najamatabëcueneocopata Diosojavabelia. Nexata Noépijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noépijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcoxaneto exana pebarëpanepaenexa pijamonae mapaira pebubutsijavavecuaje. Bajarapacuenia Noépijinëmi pijamonae pebarëjumecovënëtsixae Dioso, nexata Dioso aneconijibia tanetsi. Bajaramatacabi daxita mapanacuapijivimi apo jumecovënëtsi Dioso. Caenë Noépijinë pijamonae barëjumecovënëta Dioso. Nexata daxita pamonaemi apo jumecovënëtsi Dioso, nayapëtane bitso penaneconitsijava Diosojavabelia.

⁸ Bajayata Abrahampijjinëmi ata najamatabëcueneocopata Diosojavabelia. Nexata Dioso itsa itorobatsi Abrahampijjinë pevecuapitsapaenexa pijanacuami, jumecovënëta. Nexata baja Abrahampijjinë pona itsanacuayabelia. Panacua Dioso rajutsiapabatsi, bajarapanacuayabelia pona. Abrahampijjinë abaxë apo natsivajënaeyapëtae ata panacuayabelia patsijitsia, itsiata vecuapitsapa pijanacuami Dioso pitorobixaetsi. ⁹ Panacuata Abrahampijjinë Dioso patsiaexanatsi, bajarapanacuata itsiata Abrahampijjinë pepo pijabo apo exanae. Carpabota saya ponapona. Becaematacabibejenexa saya pepatsinëcuenia carpabota Abrahampijjinë ponapona. Itsiata bajayajebi bajarapanacuata carpabota ponapona. Abrahampijjinë pexë nato ata, Isaacpijinë, bajarapaira Dioso rajutsiapaeabi atatsi, itsiata Isaacpijinë ata carpabota ponapona. Bajara icatsia itsi

Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata Jacobpijinē ata carpabota ponapona. ¹⁰ Bajarapacuenia Abrahampijinē bajayajebi carpabota saya ponapona. Tsiipaji abaxē vajēnaeetapona pona pecaponaenexatsi athēbēabetsia, Dioso pexanaetomarabetsia, apo pevereverecaetomarabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijinē pijava pevēnē Sara. Bajarapovami ata najamatabēcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaitsitsi pexēnato pexainaenexa. Bajaraxuata xaina pexēnatonēyo. ¹² Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsapona. Athēbētatsia, itaboxota, bitso navita tulupu. Mapanacuata pijinia tajetabota bitso navita tajetaboatsapērē. Nexata acuenebi itsajivi ata penamataējētsicapanepaenexa tulupu, tajetaboatsapērē ata. Bajara pijinia itsapona Abrahampijinē pemomoxi. Bitso cajena Abrahampijinē pemomoxi navita.

¹³ Daxita pamonaemi bajayata Dioso jumecovēnēta, tēpa baja. Bajarapamonaemi xua yabara Dioso najumecapanepaeya jumaitsitsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabēcuenēbarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamonae tsitanajamatabēcuenēitajētavanapa. Bajarapamonaemi tsitanajamatabēcuenēitajētavanapa pevetavanapajava athēbēabetsia Dioso pecaponaejavanexatsi, bajarajotatsia jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabēxainavanapa peponaenexa athēbēabetsia. Tsiipaji athēbētatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “TajaDiosomē,” pejaijava Diosojavabelia, Dioso sivabarēyatsi. Vaxaitsi ata baja yapētanetsi bajarapamonaemi Dioso pesivabarēyavatsi. Tsiipaji baja athēbētatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajēvelia najumecapanepaeya jumaitsi Abrahampijinējavabelia. Abrahampijinē pexēnato, Isaac, yabara Dioso jumaitsi mapacueniaje: “Nexēnato Isaac xainaena pexi. Nexata nemomoxi xainaena,” jai Dioso. Bajaraxuacujina icatsia Abrahampijinē Dioso itorobatsi penacoxibeyaxuabinexa picani. Bajarapacuenia Abra-

hampijinė Dioso itorobatsi penacoxibeyaxuabinexa picani saya pejamatabēcuenejētsinexatsi. Abrahampijinė Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinė jejai. Nacoxibeyaxuabijitsia picani.¹⁹ Bajarapacuenia picani Abrahampijinė exanaejitsia Dioso pitorobicueniatsi. Tshipaji Abrahampijinė jamatabējumaitsi: “Dioso baja cajena caejēpatsi piasaēyaexanaenexatsi taxēnato icatsia piasaēnexa,” jamatabējai Abrahampijinė. Ajena baja picani Abrahampijinė nacoxicacuatsijitsia cusiupata penacoxibeyaxuabinexa, nexata Abrahampijinė jamatabējumaitsi: “Taxēnato baja aeconoxae tēpaena,” jamatabējai. Nexata bajarapaepatota Abrahampijinė Dioso itavetatsi penacoxibeyaxuabiyaniva. Nexata baja itsiata Abrahampijinė apo nacoxibeyaxuabi. Nexata itsiata Abrahampijinė bepetēpaenē baja nacoxitane. Nexata bajaraxuacujinae icatsia Dioso bepetoasaēyaexanaenētsi nacoxitane.

²⁰ Bajayata Abrahampijinė pexēnato ata, Isaacpijinē, najamatabēcuenecopata Diosojavabelia. Bajaraxuata Isaacpijinē itsa baja perujunē, pexēnatobejejavabelia tajēvelia najumecapanepaeya jumaiitsi: “Dioso pacayavenonabiabianabeje,” jai Isaacpijinē pexēnatobejejavabelia. Isaacpijinē pexēnatobeje itsanē pevēnē Jacob. Itsanē pevēnē Esaú. Jacobpijinē itsavēnē, Israel.²¹ Nexata Jacobpijinē ata najamatabēcuenecopata Diosojavabelia. Nexata baja pamatacabi Jacobpijinē perujunē, itsa baja nayapētane petēpaejavanexa, bajarapamatacabi Diosojavabelia tovajēta pemomobeje Dioso peyavenonabiabinexatsibeje. Ponēbeje Jacobpijinē pemomobeje tovajēta Diosojavabelia, Josépijinē pexēnatobeje. Bajarapacuenia Jacobpijinē itsa tovajēta Diosojavabelia, pemomobeje, caenē canacujitsia, tovajēta. Pecobenaeboupita saya Jacobpijinē nayaētanaeaya vajētanuca Diosojavabelia.²² Bajayata Josépijinē ata najamatabēcuenecopata Diosojavabelia. Bajarapamatacabi Egipto nacuata Josépijinē daxita pijamonae barēpona, Israelpijinė pemomoxi. Nexata baja Josépijinē itsa nayapētane petēpaejavanexa, tajēvelia vajunupaeba daxita Israelpijinė pemomoxi Dioso pejamatabēcueneta pecapitsapaejavanexatsi Egipto nacuavecu. Josépijinē petēpaevajēnae, najumepuēnetanua pijamonae pesicaponaenexatsi pamatacabi Dioso pejamatabēcueneta daxita Israelpijinė pemomoxi capitsapatsi Egipto nacuavecu.

²³ Bajayata Moiséspijinė paxapijinē, penapijiva ata, tajēvelia yapētanebeje Dioso peyavenonaejavanexatsibeje. Nexata bajaraxuacujinae pexēnatonēyo xainabeje, Moisésnexa jane baja. Nexata matayatsia caponaponabeje acueyabi pajuametobeje. Bajarapacuenia matayatsia caponaponabeje tshipaji bitso tsi-tapexanianēyotsibeje. Egiptonacua pepo pevetsinē itoroba picani daxita Israelpijinė pemomoxi penacoxibeyaxuabaponaenexa itsa tonaexanatsi pebinēyo. Itsiata bajarapajivibeje apo jumecovēnētsibeje penacoxibeyaxuabinexabeje. Tshipaji apo jumecujunavibeje.²⁴ Bajaraxuacujinae Moiséspijinė jane baja vitsatatsi Egiptonacua pepo pevetsinē pexēnatoyo. Moiséspijinė bajarapova vitsatatsi bepexēnatonēyocuenia. Moiséspijinė baja itsa penaveretsinē, yapētane Dioso peyavenonaejavanexatsi. Nexata Moiséspijinė apo jitsipae Egiptonacua pepo pevetsinē bepemocuenia petaenexatsi.²⁵ Nexata Moiséspijinė najamatabēcueneveretsia jamatabējumaitsi: “Tajamonae,

Israelpijinē pemomoxi, Dioso pijajivinexa. Nexata yavenonaenajē tajamonaē. Egipto nacuapijivi nebejiobiaexanae ata tsane, pacuenia tajamonaē bejiobiaexanabiabatsi, itsiata yavenonaenajē,” jamatabējai Moiséspijinē. Nexata baja Moiséspijinē Egiptonacua pevetsinē bepemomocuenia petaejavatsi itsa vecuapitsapa, copata baja pibisiajamatabēcuene, mapanacuapijijamatabēcuene. Tsipaji saya bajarapajamatabēcuene caepatoyonexa jamatabēcuenebarēya.²⁶ Moiséspijinē Dioso jumecovēnēta pacuenia tajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejiobiaexanaenatsi. Bajarapacuenia xanē ata Egipto nacuapijivi nebejiobiaexanaejitsia ata tsane, itsiata Dioso pejetsipaecuenia toexanaenajē. Tsipaji xua Dioso athēbētatsia nerajutsijitsia, bajaraxua bitso pexaniacuene daxita Egipto nacuapijivi pexainaecuenie matatoxenetsia,” jamatabējai Moiséspijinajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejiobiaexanaenatsē.²⁷ Nexata baja Moiséspijinē Egipto nacuavecua pitsapa. Tsipaji najamatabēcuenecopata Diosojavabelia peyavenonaenexatsi. Egiptonacua pepo pevetsinē Moiséspijinē baraanaepanae atatsi, apo cujunavi. Pevajēnaeyabelia ajamatabēcuenesaē tsanajetarucac pacuenia Dioso itorobatsi pexanaenexa. Moiséspijinē baja apo naviatsi pecovēyabelia. Tsipaji abaxē Moiséspijinē apo tae ata Dioso, itsiata yapētane Dioso bitso piasaēnēcuene Egiptonacua pepo pevetsinē matatoxenetsia.

²⁸ Moiséspijinē Dioso peyavenonaenexatsi, tajēvelia najamatabēcuenecopata Diosojavabelia. Bajaraxuata pamatacabi Moiséspijinē pijamonaē barēpitsapa Egipto nacuavecua, ayaiacuenia Dioso yavenonatsi pijamonaē pebarēpanepaenexa. Bajaraxuata Moiséspijinē pacuenia Dioso itorobatsi, juya daxita pijamonaē itoroba. Moiséspijinē pijamonaējavabelia jumaitsi mapacueniaje: “Daxita paxamē, pacaebopijivimē canacujitsia, pabename ovejasi, pejanapebitoxi. Nexata panijabobaupanē, caebaupa canacujitsia, pamuxunenetsicabianame ovejajanata. Nexata ajena, pameravi, ángelnē najetarucac ata tsane peverebiabinexa pebinacuetoxi, matapijinacuetoxi, itsiata apo pacoxitēpaemē tsane,” jai Moiséspijinē pijamonaējavabelia. Nexata Moiséspijinē pijamonaē pijabobaupanē, caebaupa canacujitsia, tsicaba ovejajanata. Nexata ángelnē najetarucac ata peverebiabinexa pebinacuetoxi, matapijinacuetoxi, itsiata Moiséspijinē pijamonaē apo coxitēpae.²⁹ Bajayata pamatacabi Moiséspijinē pijamonaē barēpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinē pijamonaē barēnajamatabēcuenecopata Diosojavabelia peyavenonaenexatsi. Nexata ayaiacuenia Dioso yavenonatsi. Bajarapamonaē Dioso pejamatabēcueneta nicaba Rojovēnē manuamenemaxērana tuatuaējalia. Dioso pejamatabēcueneta benamutocuenia totseviaexanaxualiatatsi. Nexata jane baja Egipto nacuapijivi, pamonaē jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

³⁰ Bajayata Jericó tomarapijivi piatayaëibopanaxaneto exana pijatamara matatoyorotsia penayajivicanaratsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijinë pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinë pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matacabita, caematacabita, matatoyorotsia najetarubena siete xuabeje. Nexata jane baja siete matacabita bajarapayacaranatsijavaxanetomi jopaica. ³¹ Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonaë apo yajavatëpae. Tsipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinë pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

³² Apo necuenecaëjêpae baja pematatsënëa itsamonae pelivaisi patacatoyaquinaenexa patacamuxujobinexa, panenajamatabëcuenecopatsinexa Diosojavabelia papecayavenonaenexa. Apo necuenecaëjêpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftepijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjêpaenua patacatoyaquinaenexa itsamonae, Diosojumepaëbivimi profetavi, pelivaisi. ³³ Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtabuatapona itsanacuanëpijivijavabelia, bajarapanacuanëpijivimi verebabi Dioso peyavenonaëxaetsi. Bajarapamonaë pijanacuanëjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajëvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaëboyabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaëxaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi. ³⁴ Itsamonae pijinia bajarapamonaeyajuvënëvi xuabi atatsi pinijiisotualia, Dioso peyavenonaëxaetsi, itsiata apo tajueti. Itsamonae pijinia jamatabëbeyaxuabi atatsi espadata, vecuapanepa Dioso peyavenonaëxaetsi. Pamonaë pijinia apo aitatsaca picani penavajabitsaëtsinexa, bajarapamonaë ata bitso baja piatatsacavi naexanapona vajabitsaë penaexanabataponaëjavata

Dioso peyavenonaexaetsi. Nexata bajarapamonae pijavajabitsaë cueneamoneyaba. Vecuarëcëpecatsi. ³⁵ Bajayata pijinia petiriavi penajamatabëcuenecopatsixae Diosojavabelia peyavenonaenexatsi, itsa coxitëpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaejavatatsi, itsamonae tēpabiaba. Bajarapacuenia yajuvënëexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëttavanapaajava. Bajarapacuenia apo copabi Dioso pejumecovënëtsijava. Tsipaji bajarapamonae jamatabëjumaitsi tsavanapae: “Mapanacuataje taponaponaejava matatoxenetsia bitso jitsipajë matakabi apo peverevereaejava Dioso tanerajutsinexa,” jamatabëjai tsavanapae bajarapamonae. ³⁶ Itsamonae pijinia Diosojavabelia penajamatabëcuenecopatsixae, itsamonae capocaponabiabatsi. Jumatitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cēbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonëta saya tseconabiabatsi pebeyaxuabinexatsi. Itsamonae pijinia petēpaenexa, epacaucubatsi sierrata. Itsamonae pijinia jamatabëcuenejëtatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovëcua capitsapatsi. Apo pexainaexae penaxatabijava, bajarapamonae naxataba ovejaboco, chivoboco ata. Pexainaajava ata apo xainae. Nexata bitso bejiobi bajarapamonae. Barajinabiabatsi. Bejiobiaexanatsinua. ³⁸ Bajarapamonaemi petusato nacuanëjava jinaruta. Petsutonë nacuanëjava ata, jinaruta. Pitajani-tonëjava perubenaevajuanë jaita meravi pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi. ³⁹ Daxita bajarapamonaemi najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxë bajarapamonaemi itsa asaë tsavanapae, mapanacuataje Dioso abaxë apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi matakabi apo peverevereaejava. ⁴⁰ Dioso abaxë evetavanapaeyaexanatsi xua rajutsijitsiatsi bajarapamonae. Tsipaji Dioso apo najamatabëxainae ëbajarapamonaejavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonae yajava, Dioso jamatabënacarajuta bajarapapexaniacuene, matakabi apo peverevereaejava.

12

Pacuenia vajavajënaeyabelia becaasaë tsavanapaetsi Dioso vajajumecovënëtsijava Jesucristo cruzata vajanacasivatēpaexae yabara pelivaisi

¹ Pamonae yabara pacatoyaquinatsi, bajayata najamatabëcuenecopaba Diosojavabelia peyavenonaenexatsi. Nexata bajarapamonaemi vajavënëlvaisitaexae, bemuxunanajamatabëcuenesaëtatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaajava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocajëta vajanacaitorobinë. Bajara

pijinia pacuenia Dioso pitabarata xaniavaetsia bejnavanapatsi asaëyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisiajamatabëcuene xainatsi. Tshipaji bajarapapibisiajamatabëcuene nacaitorobabiaba pibisiacuene vajaexanaenexa. Bajarapapibisiajamatabëcuene baja becopabatsi vajaexanavanapaenexa xua Dioso nacaitoroba. ² Itsa najamatabëcuenecopatatsi Diosojavabelia vajanacayavenonaponanexa, nexata benajamatabënapitabiabatsi Jesús. Tshipaji Jesús vajanacasi-vatëpaexae, Dioso aneconijibia nacatane. Jesús pejamatabëcueneta Dioso nacayavenonana vajaajamatabëcuenesaë tsavanapaenexa Dioso vajajumecovënëtsijava matapania vajanacacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tshipaji natsivajënaeyapëtane pejamatabëcuenebarëyajavanexa icatsia itsa asaë petëpaecujinae, daxitajivi pijaneconi pematamotsixae. Aeconoxae baja nexata Jesús tronovënëjavata athëbëtatsia eca, Dioso pemuxuneneta, pecujuanenia, penajuaevetsinexabeje daxitacuene.

³ Pacanaëjere Jesús pijamatabëcuenesaë tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuenia pacanaëjëtsianame itsamonae itsa pacabejiobiaexana Jesús panejumecovënëtsijava yabara. Nexata apo pacueranaemë tsane Dioso panetonacuenebijava. Apo pajamatabëcuenefaenaemënua tsane. ⁴ Paxamë panajamatabëcuenesaëtavanapame pibisiacuene paneexanaeyaniva. Bajarapacuenia panajamatabëcuenesaëtavanapae atamë pibisiacuene paneexanaeyaniva, itsiata abaxë pibisiacuene pexanaevi apo pacayajuvënëbeyaxuabi. Bajaraxuata panevajënaeyabelia bepanajamatabëcuenesaëtavanapame pibisiacuene paneexanaeyaniva. ⁵ Pëtsa panacofënëtime Dioso papecamuxujiobiava papecajamatabëcuenesaëya exanaenexa itsa pacamuxujioba bepapeximëcuenia. Tshipaji Dioso pejumelivaisibaxutota paxamë yabara jumaiti mapacueniaje:

Taxi, xanëjavaberena pananeconitsixae, itsa pacananeconitsiaexanaenatsi, pëtsa payaanaepaname. Pëtsa pasivajamatabëcuenefaenamenua itsa pacabijatanetsi xua yabara pananeconitame. ⁶ Pacananeconitsiaexanaenatsi. Tshipaji xanë muxujiobiaya bananeconitsiaexanajë pajivi asivanë, baitsi daxita pamona taxicuenia tataevi,

jai Dioso pejumelivaisibaxutota paxamë yabara.

⁷ Nexata patonacaevere Dioso muxujiobiaya papecananeconitsiaexanaenexa. Tshipaji Dioso papeximëcuenia pacatane. Jivi ata baja cajena pexi muxujiobiaya banacoxivitsata. ⁸ Nexata Dioso muxujiobiaya itsa apo pacaevetsi tsipae, Diosojavabelia pananeconitsi atamë, nexata Dioso papeximëcuenia apo pacatae tsipae. Tshipaji jivi ata, pexi pexainaevi, muxujiobiaya banacoxiconita. ⁹ Vaxaitsi abaxë pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yayiatanetsi. Nexata biji vaxaitsi bitsoyo bejumecovënëtatsi vaxa Dioso, ponë eca athëbëtatsia, vajanacarajutsinexa matakabi apo pevereveceajava. ¹⁰ Itsa abaxë vaxajivi mapanacuata nacavitsata,

muxujiobiaya banacaconita. Tsipaji vaxajivi nacatojitsipa xaniavaetsia vajatojinavanapaenexa. Bjaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vaxaxanaejava. Nexata bajarapacuenia Dioso nacajamatabëcuene yavenona vajaperujamatabëcuene mivecua vajanajamatabëcuene pëneyorotsinexa Dioso javabelia. Nexata pacuenia Dioso jamatabëcuene itsi, bajara vaxaitsi ata vajajamatabëcuene itsinexa. ¹¹ Paepatota vaxa Dioso nacamuxujiobiaya nacananeconitsiaexana, bajarapaepatota abaxë apo sivajamatabëcuene barëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëtane baja xua yabara naneconitsiaexanatsi. Nexata baja copata bajaraxua. Nexata baja jamatabëcuene barëyaya xaniavaetsia ponapona.

Pacuenia tsiyaitsi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabëcuene cueranaejavami. Panevajënaeyabelia panajamatabëcuene saëtaponare. Tsipaji baja panajamatabëcuene copatame Dioso javabelia papecayavenonaenexa. ¹³ Pëtsa pajumecovënë tame itsalivaisi Dioso pejumelivaisivecua. Ëpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamona abaxë apo ajamatabëcuene saë Dioso pejumecovënëtsijava, pacaitaxutua ajamatabëcuene saë tsaponae tsane.

¹⁴ Daxitajivijavabelia pexaniajamatabëcuene patoxainare. Nexata aneconi jibia pajinavanapaname Dioso pitabarata. Pajivi aneconi jibia apo ponaponae tsane Dioso pitabarata, bajarapajivi Dioso apo yajavaponaponae tsane. ¹⁵ Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsianiva papecaitaxutotsoniatæjava panepuajumecovënëtsivi Dioso. Pacuenia piatsaxaënë boto daxitamera bijianaejitsipa, bajara pajamatabëcuene itsimë tsipae caenë ata, paxamëyajuvënënë, pibisiacuene itsa exanaejitsipa. Pacajamatabëcuene bijianaejitsipa padaxitamë. ¹⁶ Panayajivitaemanua itsanë ata, paxamëyajuvënënë, pejaitsianiva itsava pepo pijavavecua. Petiriva ata pejaitsianiva itsanë pepo pamonavecua. Panayajivitaemanua panejumeaebianiva Dioso najumecapanepaeya papecajumaitsijava. Pëtsa Dioso pajumeaebame pacuenia bajayata Esaúpijinë jumeaeba Dioso najumecapanepaeya pejumaitsijavatsi. Esaú picani matapijinë xae, Dioso yavenonabiabijsiatsi. Nexata itsajota Esaú bitso piajani, pejuyapijinë javabelia pexaejava caenabani namitsavajëta. Nexata pejuyapijinë jumaitsi: “Pacuenia nexaejava nevajëtame, carajutsianatsi. Nexata xua Dioso cayavenonabiabiapaeba, bajaraxua juya xanë netocopatsianame,” jaitsi. Nexata Esaú jejai. Pejuyapijinë javabelia baja tocopata xua picani Dioso yavenonabiabijsiatsi. ¹⁷ Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiabiapaebatsi. Esaúpijinë picani paxa itoroba Dioso javabelia petovajëtsinexatsi Dioso peyavenonabiabinexatsi paxa pevënamuto. Itsiata baitsi jane paxa apo jume jejai. Nexata Esaúpijinë bitso nua pejuyapijinë petocopatsixae xua picani Dioso yavenonabiabijsiatsi. Itsiata baja acuenebi pexanaejava. Bjaraxuata paxamë

ata pëtsa pacopabame Dioso panejumecovënëtsijava Dioso najumeca-panepaeya papecajumaitsijava.

¹⁸ Paxamë panejumecovënëtsixae Dioso, pacatocopata roviafia panevajëtsinexa Diosojavabelia. Nexata apo panamatavenonaemë paneponaenexa itsanacuajavabelia panevajëtsinexa Diosojavabelia. Bajayata Israelpijinë pemomoxi pata ibotsutoxanetotabuyaberena. Nexata bajarapatsutotabuta navajëca Diosojavabelia. Nexata bajarapatsutojumatsia Israelpijinë pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava. ¹⁹ Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuajaijavatsica athëbëvetsica bajarapamonaejavabelia. Nexata judíovi pecajunavi bitso, vajëta Diosojavabelia Dioso pecuaicuajaiyaniva pematatsënëa. ²⁰ Bajarapacuenia Israelpijinë pemomoxi vajëta Diosojavabelia tsipaji bitso jumecujunava Dioso pejumaitsijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonëta. Itsa jume, becuererebonëta cacuatsianatsi pebeyaxuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exanaenatsi,” pejajjavatsica Dioso athëbëvetsica, Israelpijinë pemomoxi bitso jumecujunava. ²¹ Nexata Israelpijinë pemomoxi bajarapajume itsa jumetane, pecajunavi, bitso neconecojai. Moisésipijinë ata jumaitsi: “Xanë ata rabaja tacajunavi, bitso neconecojanë,” jai.

²² Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata panepatsinexa Dioso pijatomarabetsia roviafia panevajëtsinexa Diosojavabelia. Bajarapatomaratsia eca Dioso, piasaëtsaponaponanë. Bajarapatomara pevënë Jerusalén. Eca Siónvënë tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona. ²³ Bajarapatomaratsia payajavanacaetuatsianame itsamonae, pamonaë panevajënaeya jumecovënëta Dioso. Bajarapamonae vënëyaquinarubatsi bajarapatomaratsia. Panacaetuatsianame Dioso pitabarata, ponë naneconitsiaexanaena daxita pamonaë naneconita bajaraponëjavabelia. Payajavanacaetuatsianamenua daxita pamonaemi tëpa Dioso pepua pejumecovënëtsivi. ²⁴ Panajamatabëcuenecopatame baja Jesucristojavabelia, ponë pejamatabëcueneta Dioso nacavecuaajibiaexana vajaneconimi. Nexata Dioso aneconijibia nacatane. Bajayata Abelpijinë itsa beyaxuabatsi, ponë beyaxuabatsi, juya picani xanepana peyamatomobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabëxainae Jesús peyamatomobeyaxuabinexatsi. Tsipaji Jesús petëpaejava pejamatabëcueneta, Dioso aneconijibia taejitsia daxita pamonaë jumecovënëta Dioso.

²⁵ Bajaraxuata Dioso pejumelivaisi vajanacatsipaebijava, bejumecovënëtsi. Bajayata pamonaë apo jumecovënëtsi Dioso Moisésipijinëta penajumecopatsilivaisi, naxuaba Diosovecua. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa itsa apo jumecovënëtsi ponë nacajunata athëbëvetsica. ²⁶ Paepatota pina Dioso athëbëvetsica Sinaivënë tsutojumavetsica cuaicuajai, baja pina paepatota ira najëaba.

Nexata icatsia xuacujinae bexëa Dioso tajëvelia najumecapanepaeya jumaitsi mapacueniaje: “Itsamatacabi icatsia ira najëabiaexanaenajë. Nexata jane baja caecuenia ira, itaboxo yajava, najëabiana,” jai Dioso tajëvelia najumecapanepaeya. ²⁷ Xua yabara tajëvelia Dioso najumecapanepaeya jumaitsi, maitsi tsaneje. Mapairaje, itaboxo yajava, ita najëabiana, daxitacuene xua Dioso exana mapanacuatate, vereverecaena. Itsiata Dioso pejumelivaisi, pijatomara ata, apo vereverecae tsane. ²⁸ Xua itsamatacabi Dioso nacatocopatsiana athëbëtatsia vajatoevetsinexa, bajaraxua apo vereverecae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëëthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanacasivajamatabëcuene barëyanexa. ²⁹ VajaDioso jivi penaneconitsiaexanaenë. Pacuenia isoto vayafo ita tajuenajetaruca, verebiaba daxita piabejjava petajuejavata, bajara pijinia pacuenia Dioso verebiabiana pamonaë pibisiacuene pexanaevi.

13

Pacuenia bexanavanapatsi Dioso vajanacasivajamatabëcuene barëyanexa yabara pelivaisi

¹ Pëtsa pacopabame namataenetsia panenasivajava Dioso panecumecovënëtavanapaevi. Panevajënaeyabelia namataenetsia panaasivamëre. ² Pëtsa panacofënëtame xaniavaetsia panecopiapitabiabinexa apo paneyapëtaevi ata ita pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita ángelevi, apo yapëtae ata ángelevicuene.

³ Panajamatabënapitabiabare pamonaë jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonaë yajava, bepandenajuananeconitsivi panataema. Pamonaë ata bejiobiaexanatsi Dioso pejumelivaisi yabara, bajarapamonaë ata pajamatabëcuenyavenonare. Paxamë ata, bajarapamonaë yajava, bepacabejiobiaexanaevi panataema.

⁴ Daxitajivi beyaiyatane penacojobijivi. Pajivibeje baja napitabeje, apo benavecyanamatayajitsibeje. Pebi apo bejaitsi itsava pijavavecua. Petiriva pijinia apo bejaitsi itsanë pamonavecua. Tsipaji Dioso naneconitsiaexanaena bajarapitsipibisiacuene pexanaevi.

⁵ Pëtsa bitso pajitsipame palata. Pasivajamatabëcuenebarëyamëre saya xuayovajëto paxainame. Tsipaji Dioso jumaitsi mapacueniaje: “Apo copatsinë tsane patacayajavaponaponaëjava,” jai Dioso. ⁶ Bajaraxuata ajumejunavijibia namataenetsia najumaitssitsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabënapitabiabare pamonaëmi bajayata pacatsipaeba Dioso pejumelivaisi. Pacanaëjëre pacuenia bajarapamonaëmi Dioso pejumecovënëtsijavaveliacujinae, xaniavaetsia jinavanapa Dioso pitabarata matapania petëpaejavabelianexa. Bajarapacuenia paxamë ata Dioso pitabarata xaniavaetsia pajinavanapare matapania panetëpaejavabelianexa.

⁸ Jesucristo epatua itsajamatabëcuene apo xainae tsane. Pamatacabibeje ponapona, caejamatabëcuene xainaponaena.

Pevajënaeyabelia ata daxitamatacabijavabelianexa, caejamatabëcuene xainaponaponaena. ⁹ Pëtsa pacopabame panejumecovënëtsijava palivaisi baja pajumecovënëtime. Pëtsa pajumecovënëtime itsalivaisi bajarapalivaisivecua. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabëcueneta apo jamatabëcueneasaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacativatëpa. Nexata pamonaе tsiteca ëperujulivaisimi sivajamatabëjumaitsi: “Itsa jumecovënëtaponaponaenajë Dioso Moiséspijinëta penajumecopat-silivaisi, nexata xanë ata Dioso necapanepaena,” sivajamatabëjai, bajarapamonae saya jamatabëcuenenavëxaniaba. Bajarapitsijamatabëcuene penajamatabëxainaeви, apo capanepaetsi tsane Diosojavabetsia. Tsi-paji Jesús pesivatëpaejavatsi, apo jumecovënëtsi. ¹¹ Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajara-padajubinë pevi sacerdotenë itsa tajuita, tomarapënëyabelia tajuitabiaba. ¹² Bajaraxuata Jesús ata Jerusalén tomarapënëyabelia bejiobiaexanatsi. Bajaraxuacujinae beyaxuabatsi. Nexata daxita pamonaе jumecovënëta Jesús pesivatëpaejavatsi, bajarapamonae Jesús pijana pejamatabëcueneta Dioso vecuaajibiaexanatsi pibisiacuene pexanaeconi. ¹³ Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatëpaenexa vaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaeevetavanapatsi athëbëpijtomara, patomarata patsijitsiatsi athëbëtatsia. ¹⁵ Jesucristo vajanacasivatëpaexae, Dioso nacamocopata vajavajëtabiabinexa Diosojavabelia. Nexata itsa vajëtabiabinatsi Diosojavabelia, jumaitstsi tsabiabi tsane: “Diosomë, bitso ayaijamatabëcuenenëmë,” jaitsi tsabiabi tsane Diosojavabelia. Bajarapacuenia vajajumaitsiabibijava Diosojavabelia, Dioso taena ofrendacuenia bevajarajutaponaejava Diosojavabelia. Bajaraxuata itsa vajëtabiabinatsi Diosojavabelia, bajarapacuenia jumai tsabiabi tsane. ¹⁶ Pëtsa panacofënëtime pexaniacuene panetoex-avanapaejava itsamonaejavabelia. Itsajivi penamatavenonaеjava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaеjava, Dioso pacasivajamatabëcuenebarëya tsane.

¹⁷ Pamonaе ancianovi, xua pacaitoroba, pajumecovënëtabiabare. Itsamonae ata, pamonaе pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabare. Bajarapamonae yapëtanenua pacuenia Diosojavabelia naneconitsipa,

xaniavaetsia itsa apo pacaevetsi. Itsa pajumecovënëtabiabianame papecaevetsivi papecaitorobicuenia, nexata papecaevetsivi jamatabëcueneyavenonaeya pajinavanapaename. Nexata pacasivajamatabëcuenebarëya tsane papecaevetavanapaejava yabara. Paxamë itsa apo pajumecovënëtsimë tsipae, nexata papecaevetsivi pacasivajamatabëcuenebëjai tsipae. Nexata papecaevetsivi toacuenebi tsipaetsi papecajamatabëcueneyavenonaenexa Dioso panejumecovënëtsijava yabara.

¹⁸ Panetovajëta ponaename Diosojavabelia. Paxanë pajamatabëjumaitsinë: “Vaxaitsi baja apo naneconitsitsi Diosojavabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavanapaenexa, panetovajëtsianame Diosojavabelia. ¹⁹ Panetovajëta ponaenamenua Diosojavabelia Dioso patanetocopatsinexa pataponaenexa paxamëjavabelia. Tsipaji icatsia pajitsipajë bepijia patapatsinexa paxamëjavabelia.

Pacuenia Pablo Dioso pejumecovënëtsivi tovajëta Diosojavabelia, pacuenia ata jamatabënajina itsamonae Dioso pejumecovënëtsivi, yabara pelivaisi

²⁰⁻²¹ Jesucristo vajanacasivatëpaecujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëabetsia vajanacapanepaejavanexa daxitamatacabijavabelianexa. Dioso yavenona daxitajivi jamatabëcuenexanepanaeya pejinavanapaenexa. Nexata pacatovajëtatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajëtajënuua Diosojavabelia Jesucristo pejamatabëcueneta vajanacajamatabëcuenexanebinexa pacuenia jitsipa. Pacuenia oveja pexainaenë xaniavaetsia evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. ¡Jesucristo bitso ayaijamatabëcuenenë tsaponapona daxitamatacabijavabelianexa! Bajara itsi tsane.

²² Tajamonae, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotaje. Tsiqirilivaisiyo saya pacatoyaquinatsi patacamuxujobinexa panevajënaeyabelia paneajamatabëcuenesaënexa Dioso panejumecovënëtsijava. ²³ Pexanialivaisiyo pacatoyaquinaliatsi patacatsipaebinexa mapacueneye. Vajabananë Timoteo rabaja pitsapa penaneconitsivi pejebabiabibovecua. Itsa patsiarena bepijiayo xanëjavaberena, nexata barëponaenajë paxamëjavabelia.

²⁴ Nebajacobiana daxita Dioso pejumelivaisita papecaevetsivi, daxita vajamonae Dioso pejumecovënëtsivi yajava. Vajamonae ata, Italia nacuapijivi, pacajamatabënajinalia.

²⁵ Daxita paxamë pacatovajëtatsi Diosojavabelia papecayavenonaenexa Dioso. Bajara itsi tsane.

Mapabaxutoje Santiago toyaquina Dioso pejumecovënëtsivijavabelia

Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi

¹ Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudíovimë patacabajacobinexa. Israelpijinëmi pexi doce ponëmibeje papemomoxiyajuvënëvimë. Pepo panijanacuata picani panejinavanapaevimi. Aeconoxae baja pepo pani-anacuamivecua, nacayajatsia pajinavanapame daxita nacuanëjava.

Pacuenia Dioso pejumecovënëtsivi itsa jamatabëyapëtane pacuene xanepana pexanaenexa, bevajëta Diosojavabelia yabara pelivaisi

² Tajamonae, pasivajamatabëcuenebarëyamë tsane daxitacuene, apo panejitsipaecuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcuenejëtsinexa Dioso pejumecovënëtsijava yabara. ³ Bajarapacuenia Dioso panejumecovënëtsivi pacajamatabëcuenejëtaponena panejamatabëcuenesaë tsaponanexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. ⁴ Apo panejitsipaecuene pacatocopiapatsi ata, pajamatabëcuenesaëmë tsavanapae tsane bajayajebi. Nexata pajamatabëcuenevitsabaponaename Diosojavabelia. Nexata apo pacatosai cae tsane itsalivaisi ata panejamatabëëthëtota.

⁵ Paxamë itsa pajamatabëyapëtaneme pacuene xanepana paneexanaenexa, nexata bepavajëtame Diosojavabelia papecajapëtaeyaexanaenexa Dioso. Nexata Dioso pacayapëtaeyaexanaena pacuene xanepana paneexanaenexa. Dioso cajena bayapëtaeyaexana daxita pamonae vajëta bajaraponëjavabelia. Apo jumeitavetsi cajena itsa vajëtatsi. ⁶ Itsa pavajëtame Diosojavabelia, pajamatabëjumaitsimëre: “Dioso cajena nacayapëtaeyaexanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtaeyaexanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtaeyaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtaeyaexanaejitsiatsi. ⁷⁻⁸ Bajarapajivi anijajamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtaeyaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

⁹ Dioso pejumecovënëtsinë apo xainae ata pecobecovëjavayo, jivi apo yayatae atatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsixaetsi Dioso pijajivitonënëxena, apo bejiobi tsane daxitamatacabijavabelianexa. ¹⁰ Dioso pejumecovënëtsinë

itsa bitso pexainaenë pexinaejava, itsamonae itsa yacajërètatsi pexainaecuene, itsiata bejamatabëcuenebarëya Dioso pejumecovënëtsinëxae. Tshipaji pacuenia ponatoxi bepìjia matonoverevereca, bajara pijinia itsi tsane bitso pexinaecuene ata. Bepìjia vereverecaena. ¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepìjia. Bajara pijinia itsi tsane bitso pexinaejava pexinaeivi ata. Yajavavereverecaena pexinaejava pecanajetanucaepatota ata.

Pacuenia Dioso jivi apo jamatabëcueneëjëtsi pibisiacuene pexanaeyaexanaenexa yabara pelivaisi

¹² Pamonaë jamatabëcueneëjëtsi atatsi, najamatabëcueneecataita pibisiacuene pexanaeyaniva, bajarapamonaë jamatabëcuenebarëya. Tshipaji itsa vecuapanepa pejamatabëcueneëjëtsijavatsi, pibisiacuene exanaenejeva, nexata bajarapamonaë Dioso rajutsianatsi pexaniacuenejava. Rajutsianatsi matababi apo pevereverecaejava. Bajarapacuene yabara Dioso najumecapanepaeya jumaitsi perajutsinexatsi pamonaë jitsipa Dioso. ¹³ Itsa pacajamatabëcueneëjëta pibisiacuene paneexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcueneëjëta pibisiacuene taexanaenexa,” pajamë pëtsa. Dioso cajena apo jamatabëcueneëjëtsi itsajivi ata pibisiacuene pexanaeyaexanaenexa. Itsajivi ata pijinia apo caëjëpaetsi pejamatabëcueneëjëtsinexa Diosojavabelia pibisiacuene pexanaenexa Dioso. ¹⁴ Pajivi jamatabëcueneëjëtatsi pibisiacuene pexanaenexa, bajarapajivi copiaya pejamatabëëthëtota jamatabënaponapona papibisiacuene jamatabëexana. Nexata jane baja itsa jamatabëcueneëjëtatsi pibisiacuene pexanaenexa, bajarapapibisiacuene exana. ¹⁵ Pajivi pibisiacuene exana, bajarapajivi exana pacuenia copiaya pejamatabëëthëtota najamatabëxaina. Nexata tsiteca pibisiacuene itsa exanapona, pepacuene Diosovecua naxuabiana bajarapapibisiacuene pexanaponaexae.

¹⁶ Tajamonaë bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcueneëjëta pibisiacuene taexanaenexa,” pajamatabëjamë pëtsa. ¹⁷ Tshipaji daxita pacuene pepo pexaniacuene, Dioso baja cajena vajanacatoitorobicuenetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatabicijavabelianexa caejamatabëcuene penajamatabëxainaenë. Caejamatabëcuene Dioso nacasivanajamatabëxaina vaxaitsijavaberena. ¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtatsi, Dioso pexitsi nacaexana. Pamonaë ata cotocaevi Dioso jumecovënëta, bajarapamonaë ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonaë xaniavaetsia jumecovënëta Dioso yabara pelivaisi

19 Tajamonae bitso patacaasivavi, pacanaëjëtsianame mapalivaisije, palivaisi pacatsipaebijitsiatsi. Daxita paxamë xaniavaetsia bepanamux-unaveetame Dioso pejumelivaisi. Apo bepacuaicuaijamë abaxë copiyaya xaniavaetsia panajamatabëxainaejevamë. Apo bepaanaepanaemënuu bepijia. 20 Tsipaji itsa anaepanatsi, Dioso apo toexanaetsi pexaniacuene, pacuene Dioso jitsipa. 21 Bajaraxuata pacopabare daxita pibisiacuene panenajamatabëxainaejava. Pacopabarenuu daxita pibisiacuene paneexanaejava itsamonaejavabelia. Dioso raja pejumelivaisi pacatsijamatabëuba. Bajaraxuata beveliajamatabëcuenevi nataeya pajumecovënëre Dioso pejumelivaisi. Bajarapalivaisi itsa pajumecovënëtime, nexata pacacapanepaena Diosojavabelia.

22 Pacuenia Dioso pejumelivaisita jumaitsi, jumecovënëtsiaya paexanaponare. Pëtsa pajamatabëjumaitsimë: “Pacuenia Dioso pejumelivaisita jumaitsi, apo exanae atanë, apo itsacuene,” pajamatabëjamë pëtsa. Tsipaji saya pajamatabëcuenenavëxaniabijitsipame. Nexata itsa apo paexanaemë tsipae pacuenia Dioso pejumelivaisita jumaitsi, pananeconitsipame Diosojavabelia. 23 Pajivi jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponë naitabaratanë tsaxuta. 24 Ponë tsaxuta naitabaratanë, penaitabarataecujinae pona baja. Nexata bajaraponë bepijia nacofënëta pacuenia itabarajumapeitsi. 25 Dioso cajena pejumelivaisi bitso xanepana. Caëjëpatsinua vajanacacapanepaenexa bajaraponëjavabelia. Pajivi daxita bajarapalivaisi pitorobicueniatsi exanaponapona copatsinejeva, bajarapajivi bitso Dioso yavenonaenatsi daxitacuenejavabelia.

26 Pajivi jumaitsi ata: “Xanë bitso toexanaponaponajë Dioso pejitsipacuena,” jai ata, itsiata itaxutojema itsa cuaicuaijai tsabiabi, bajarapajivi saya jamatabëcuenenavëxaniaba. Tsipaji Dioso apo pejitsipacuena cuaicuaijai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. 27 Dioso pejumecovënëtsijivi, pajivi Dioso aneonijibiatanetsi, exanaponapona mapacueniaje. Yavenona tsonijivixi. Yavenonana pamonu pevecuatëpaevitsi bitso itsa namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

2

Pacuenia Dioso pejumecovënëtsivi muxujibatsi daxitajivi najëpaeya jamatabëcuenexanepanaeya petaenexa yabara pelivaisi

1 Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. 2 Nexata panenacaetuatsijavata, rionë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejibinë, perujusetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? 3 Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejibinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia itsa paexanaejitsipame, pexaniacuene apo paexanaemë tsipae Dioso pitabarata. 4 Bajarapacuenia

itsa paexanaejitsipame, najëpaeya bajaraponëbeje apo pataemë tsi-pae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuenia panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamonaе apo pexainaеvi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcuenecopatsiana Cristojavabelia, bitso pexainaеvi tsane athëbëtatsia, Dioso pijanacuatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. ⁶ Itsiata baitsi jane bajarapacuenia bepejiovivi yabara pejumaitsijava payapëtae atamë, paxamë bijiaya pataeyabiabame bepejiovivi. Ricovi baja cajena xainapona bitso pexinaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. ⁷ Ricovi cuaicuaijai tsabiabi pibisiacuenia Cristo yabara, ponë vaxaitsi yayiataeya jumecovënëtavapanatsi.

⁸ Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia. ¹⁰ Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi. ¹¹ Dioso jumaitsi: “Pëtsa jaitame itsava nijavavecua,” jai. Petirivinexa pijinia jumaitsi: “Pëtsa jaitame itsanë amonavecua,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecua, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. ¹² Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuaicuaijamë, pacuaicuaijamëre pexanialivaisi. Paexanavanaparena pexaniacuene pacuenia Jesucristo pacaitoroba. ¹³ Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapayabara pelivaisi

¹⁴ Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia

pacuenia Dioso nacaitoroba, bajarapajivi apo jumenamatamotsi Dioso-javabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa. ¹⁷ Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneypëtaetsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. ¹⁹ “Caenë rabaja tsaponaponae Dioso,” pejailivaisi paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava, jumecovënëta: “Caenë rabaja tsaponaponae Dioso,” pejailivaisi. Bajaraxuata dovathi pijajivi barëneconecojai pecajunavi. ²⁰ Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumemata-mobitsi cajena Diosojavabelia. ²¹ Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuenia tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. ²² Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcueneitajëta pepacuene Dioso pejumecovënëtsijava pejamatabëthëtojavavetsina. ²³ Nexata bajarapaja-

matabëcuenelivaisi yabara Dioso pejumelivaisibaxutota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsitsi. Bajaraxuata Dioso aneconi-jibia tanetsi,” jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: “Abraham raja Dioso piasivanëtsi,” jai tsabiabi.

²⁴ Nexata baja paxamë payapëtaneme mapacuenije. Pajivi jumecovënëtsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconi-jibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconi-jibia tanetsi. ²⁵ Bajara pijinia pacuenia bajayata Dioso aneconi-jibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tsipaji copiapita xani-avaetsia Israelpijinë pemomobeje. Bajaraponëbeje jivi peyaenëbinëbeje vajabitsaë pexanaenexa bajara patomarapijivijavabelia. Rahabpijivami yavenonanua bajaraponëbeje peponaenexabeje saicaya namutua pijavajabitsaë pebexuabiyanivatsibeje. Bajarapacuenia Rahabpijivami pexaniacuene pexanaexae Dioso aneconi-jibia tanetsi. ²⁶ Piasaëtsaponaponaevijivi ata itsa baja ajumalijibi, tëpa baja. Apo exanae baja itsacuenëjavayo ata pexaniacuene pevajënaeyabelia. Bajara pijinia vaxaitsi ata jamatabëcuenëtsitsi Jesús pelivaisi vajajumecovënëtsivi. “Xanë jumecovënëtajë Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabëcuenëtëpaeivi Dioso tsitajinavanapatsi.

3

Pacuenia itsi vajeabarëto yabara pelivaisi

¹ Tajamonae, paxamëyajuvenëvi vënëlivaisitaniji pacuenia ayaibitsaëto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaëto apo benaexanae jivi livaisi petsipaebapon-aevinexa. Paxamë rabaja payapëtaneme mapacuenije. Paxanë Jesús pelivaisi jivi patatsipaebaponaevi, paitavetaponajë pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paxanaejitsipajë, Dioso bitso ayaicuenia panenaneconitsiaexanaejitsipa daxitajivi matatoxenetsia. ² Daxitatsi vaxaitsi itsajavata banacajumëjemaba pibisiacuenia vajacuacuajainexa, pacuenia picani apo becuacuajaitsi. Pajivi pibisiacuenia apo cuacuajai, bajarapajivi ajamatabëcuenesaë baja Diosojavabelia. Nexata bajarapajivi caëjëpatsi penajamatabëcuenesaëtsinexa daxita pibisiacuene pexanaeyaniva. ³ Caballo vajavësimuxufetsinexa tsicuiboxatatatsi freno. Nexata freno caballovecua tsiquirijavayo ata, itsiata caëjëpa caballo vajavësimuxufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenë tsiquiritenapayo ata, barcotabufe cajënapona itsabelia jamatabëpona peponaenexa. ⁵ Bajara pijinia itsi tsiquiriisotoyo ata. Itsa tajua, naexana ayaiisoto petajuenexa pinijiunu ata. Bajara pijinia itsi vajeabarëto ata. Tsiquirijavayo picani vajeabarëto. Itsiata caëjëpatsi pecuacuajainexa ayailivaisi. ⁶ Vajeabarëto cajena ayai, pacuenia isoto ayai. Vajeabarëtota

raja pibisiacuene exanatsi daxita vajavi matatoxenetsia. Nexata vajacuaicuajijava nacajamatabëcuenebijiana. Tsiquirijiviyotsijavaveliacujinae vajatëpaejavabelianexa, bajarapacuenia cuaicuajiaitsi. Dovathi vajanaacaitorobijava vajajumecovënëtsixae, cuaicuajiaitsi pibisiacuena. ⁷ Pacanaëjère mapacueneye. Jivi caëjëpatsi penaitajuaniaexanaenexa daxitaviriadajubiyajuvënëvi. Caëjëpatsinua penaitajuaniaexanaenexa unupijivi ata, pepunaevi ata. Caëjëpatsinua penaitajuaniaexanaenexa pecotobëxëta pejinavanapaevi ata, manuamenepijidujuai ata. Itsamonae bajarapacuenia naitajuaniaexana baja pejumecovënëtsinexatsi. ⁸ Itsiata baitsi jane itsajivi ata apo caëjëpaetsi penaebaretoitavetsinexa jumejemabiaya pibisiacuena pecuaicuajijava pecopatsinexa. Vajaebarëto cajena bitso abeje. Apo nacacaëjëpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajeabarëto. ⁹ Vajaebarëtota pexaniacuena jumaittsi vaxa Diosojavabelia: “Xamë bitso ayaijamatabëcuenenëmë,” jaitsi. Vajaebarëtota icatsia pibisiacuena cuaicuajiaitsi itsamonaejavabelia. Bajarapamonae picani beyaiyatanetsi. Tsipaji Dioso nacuenecataeya pexanaevitsi. ¹⁰ Caebarëtota pexaniacuena cuaicuajiaitsi Diosojavabelia. Pibisiacuena ata cuaicuajiaitsi itsamonaejavabelia. Tajamonae, apo bexanaetsi cajena bajarapacuenia. ¹¹ Pacanaëjère mapacueneye. Mera pepitsapaemëthëatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higeranaejavaverena apo pitsapae saicayacuai. Uvanaejavaverena ata apo pitsapae saicayacuai. Jume cajena. Bajara pijinia itsi mera pepitsapaemëthë. Caejavatsina apo pitsapae pexaniara, piatsaxara yajava. Bajara pijinia itsi vajeabarëto ata. Caebarëtota apo becuacuajiaitsi pibisialivaisi, pexanialivaisi yajava. Nexata becuacuajiaitsi ëpexanialivaisi.

Pacuenia Dioso pijajivi yapëtaeyaexana pexanaenexa pexaniacuene yabara pelivaisi

¹³ Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuene bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuene Dioso pejumelivaisi. ¹⁴ Itsiata baitsi jane bitso itsa pacuenecaëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tsipaji saya panajamatabëcuene capaebijitsipame xaniavaetsia Dioso pejumelivaisi paneyapëtaejava. ¹⁵ Dioso pejumelivaisi itsa payapëtaejitsipame xaniavaetsia, nexata apo panajamatabëxainamë tsipae bajarapacuenia. Dovathi rajane pejamatabëcueneta pacaitoroba panenajamatabëxainanexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. ¹⁶ Itsajota jivi cuenecaëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuenejëpaeaya apo jinavanapae. Daxitacuene pibisiacuene ata exanavanapa. ¹⁷ Biji rajane Dioso itsa nacayapëtaeyaexana

pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatanetsi vajaexanaeyaniva bajarapamonaejavabelia apo pejitsipaecuenia. Najamatabëxainatsi itsamonae ata vajanacamuxujiobilivaisi vajajumeyapëtaenexa. Itaxutotsoniatanetsi itsamonae ata. Pexaniacuene exanatsi. Apo najamatabëcuene epatajërërëcaetsi. Apo yamaxëitorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana. ¹⁸ Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuenua exanavanapaenatsi.

4

Pacuenia jamatabëcueneitsi pajivi jitsipa mapanacuapijicueneje yabara pelivaisi

¹ ¿Detsa xuajitsia paxamëyajuvënëvi anaeya namataenetsia pijanajumenotabiabi pecanabeyabiabi? Bajarapacuenia najumeanaenotabiaba tsipaji pejamatabëëthëtota bitso jitsipa pexanaenexa daxita xua pibisiacuene. Bajaraxuata nabeyabiaba. ²⁻³ Paxamë picani pajitsipame itsacuenejava panexainaenexa. Itsiata apo pacacaëjêpae panepitsinexa. Bajaraxuata nexata pexainaeivi payabarabeyaxuababiabame. Pacobecaëbabiabame itsamonae pexainaejava. Nexata pexainaeivi payabarabeyabiabame paneyacajërëtsinexa pecobecovë. Paxamë apo paxainaeivë panejitsipaecuenie. Tsipaji pavajëcabiabi atamë Diosojavabelia, itsiata apo pacarajutabiabi xua pavajëcame. Tsipaji saya bajaraxua pavajëcabiabame paneexanaenexa daxita xua pibisiacuene. ⁴ Caejamatabëcuene Diosojavabelia apo paxainaeivë. ËDioso pijacuene apo pajitsipaemë. Mapanacuata pexainaeuene ata bitso payajavajitsipame. Bajarapacuenia panenajamatabëxainaexae, pacuenia petiriva jamatabëcueneitsi, pova pamonavecua jaita itsanë, bajarapajamatabëcueneitsimë. Payapëtaneme rabaja mapanacuapijicuene bitso pejitsipaevi, bajarapamonae Dioso bepijavajabitsaë naexana. Bajara pijinia paxamë ata paitsimë. ⁵ Bajarapajamatabëcuene yabara Dioso pejumelivaisibaxutota jumaitsi mapacueniaje vajacanaëjëtsinexa xaniavaetsia Diosojavabelia: “Espíritu Santo, ponë nacatsijamatabëeca, bajaraponë bitso nacaasiva. Bitso nacatojitsipa vajaasivanexa ëDioso,” jai Dioso pejumelivaisibaxutota vajajitsipaeyaniva mapanacuapijicueneje. ⁶ Dioso cajena nacayavenona vajanajamatabëcuene cataitsinexa pibisiacuene vajaexanaeyaniva. Dioso pejumelivaisibaxutota jumaitsi mapacueniaje: “Dioso yavenona pamona beveliajamatabëcuenevi natane. Pamona pijinia beayajamatabëcuenevi natane, Dioso apo yavenonae,” jai Dioso pejumelivaisibaxutota. ⁷ Nexata beveliajamatabëcuenevi nataeya paexanavanapare pacuenia Dioso pacatojitsipa. Panavecuaaitavere dovathi. Nexata dovathi pacavecuanajetabajiraviana. ⁸ Pavajëre Diosojavabelia. Nexata Dioso pacayavenonaena. Paxamë pibisiacuene paneexanaevi, pacopare bajarapacuenie. Paxamë anijajamatabëcuenebeje panexainaeivi, Dioso pijalivaisi, pibisiajamatabëcuene yajava. Pacopare bajarapajamatabëcuene Dioso papecajamatabëcuene xaniavaetsinexa

pibisiajamatabëcuenevecua. ⁹ Pibisiacuene paneexanaeconi yabara, bitso panatsinajamatabëxainare. Bitso payaauramërenua. Pëtsa payabarëyamë. ¹⁰ Beveliajamatabëcuenevi panataema Dioso pitabarata. Nexata pibisiacuene paneexanaeconimivecua, Dioso pacajamatabëcueneyavenonaena. Nexata panajamatabëcueneyotsianame Diosojavabelia.

Pacuenia nacaitaveta itsamonae Dioso pejumecovënëtsivi pibisiacuenia vajabaracuaicuajiyayana yabara pelivaisi

¹¹ Tajamonae, pëtsa najumetsënëtsia namataenetsia panabaracuaicuajiamë. Pajivi najumetsënëtsia baracuaicuajiai Dioso penajuajumecovënëtsivi, bajarapajivi naneconita Diosojavabelia. Dioso penajuajumecovënëtsivi, pibisiacuene pexanaejava xaniavaetsia cueneyapëtaenejeva, itsa jamatabëjumaitsinua: “Bajarapamonae Diosovecua naxuabiana pibisiacuene pexanaexae,” itsa jamatabëjai, nexata bajarapajivi ata naneconita Diosojavabelia. Dioso penajuajumecovënëtsivi, najumetsënëtsia itsa baracuaicuajiai, nexata apo jumecovënëtsi pacuenia Dioso itorobatsi. Pacuenia Dioso itorobatsi, itsa apo jumecovënëtsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenë natane. ¹² Caenë Dioso nacatonajumecopata vajajumecovënëtsinexa. Bajara jane ponë nacaneconitsiaexanaena pibisiacuene vajaexanaeconi yabara. Bajaraponë caenë cajëjëpatsinua pejumaitsinexa itsajiviyojavabelia: “Xamë pepacuene naneconitame. Nexata nevecuanaxuabianame infernojavabelia,” pejinexa. Itsa jume, cajëjëpatsi pejumaitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepenatsi,” pejinexa. Bajaraxuata paxamë Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejinexa.

Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi

¹³ Panenamuxunaevere mapalivaisije. Paxamë abaxë xaniavaetsia payapëtaenejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamë tsabiabi. ¹⁴ Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsi-paji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyota jinavanapatsi vajatëpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. ¹⁵ Nexata saya bepajumaitsimë: “Itsa Dioso nacatocopatsiana abaxë vajaasaëtsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamë saya. ¹⁶ Paxamë saya bepaayaijamatabëcuenevimë panataeyabiabame. Nexata paneexanaejavanexa, abaxë tajëvelia panavajunupaebabiabame panatsivajënaeyapëtaenejevamë xua Dioso pacatocopatsijitsia paneexanaenexa.

Bajarapacuenia ayaijamatabëcuenenë nataeya panenavajunupaebabi-abijava, pibisiacuene. Tsipaji panajamatabëxainabiabame bepanijacuata itajara panexanaejavanexa. Apo pacanaëjêtsimë bajaraxua Dioso papecatocopsijava, bajarapacuenia paneexanaenexa. ¹⁷ Pajivi yapëtae ata pacuenia picani bexana, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxujibatsi yabara pelivaisi

¹ Bitso panexainaevi, ipanenamuxunaevere mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. ² Bitso panexainaecuene panexaniavaetsijavami, pacatotsabanaena. Pexaniavirijavanë, panenaxatabijavanëmi ata, daxita pacatoucubaxaena. ³ Palatanëanë ata, bitso penamatamotsinëanë, pacatotasibianatsi. Nexata nayapëtaena bajarapapalata apo panecanacuenebijaava. Bajarapapalatata apo paneyavenonaexae itsamonae, pacatotasibianatsi. Isoto pacaveriajaviana daxita panexainaejava yajava. Pacaetuatoname picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajënae tsaponae pecopiapatsinexa. Dioso pacananeconitsiaexanaena. Tsipaji ëpaxamënexa panatoxaniavaetame panexainaecuene. ⁴ Panejumetaema. Pamona pacatonacueneba panijacuene, bajarapamona tsipaeba itsamonaejavabelia paneyamaxëitojorobjava. Apo pamatamotsimë xaniavaetsia pacuenia picani pamatamotsiapaebame. Nexata vajatuxanenë Dioso, daxita athëbënacuatatsia pevetsinë, jumetanetsi bajarapamona pepaebijava xaniavaetsia apo panematamotsijava. ⁵ Mapanacuata picani panatsitajinavanapame xaniavaetsia. Pacabarëyamë tsavanapae panexainaecuene. Paexanavanapame panejitsipaecuena. Pacuenia baca bitso penasitsiepatota beyaxuabatsi, bajara pijinia pacuenia paxamë ata pacatoimoxoyo baja Dioso papecananeconitsia exanaematacabinexa, bitso pananeconitsixae Diosojavabelia. ⁶ Jivi pananeconitsiaexanabiabame. Pabeyaxuababiabamenua planeconijibivi ata. Bajarapacuenia paexanabiabame pamonaejavabelia apo caëjëpaetsi papacanayajiviitavetsinexa.

Pacuenia icatsia petuxanenë patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopi-aevetavanapaejava vajatuxanenë matapania icatsia pepatsimat-acabitsicajavabelianexa. Pabi penacuenebinë, vajënaeeveta ema peubinexa peubijava. Peubiveretsicujinae peubijava, bajayajebi ajamatabëcuenesaëya evetaponapona petonaveretsijavabelianexatsi. ⁸ Bajara pijinia pacuenia paxamë ata bajayajebi itsamonae pibisiacuene pacaexanae ata, pajamatabëcuenesaëmë tsane. Pëtsa pajamatabëcuenefaefaname. Tsipaji rabaja imoxoyo pevajënae tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuacuaijamë Diosojavabelia pananeconitsiyaniva. Tsipaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënae tsaponae pepatsinexatsica. Bajaraponë pacaëjivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjëre profetavimi,

pamonaemi bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainaë.¹¹ Pamonaë ajamatabëcuenesaë, bajayajebi bejiobiaexanae atatsi, bajarapamonaë aeconoxae baja topexaniacuenetsi tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcueneëjëtsicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuene.

¹² Tajamonaë, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuajamë itsamonaejavabelia, pexaniajailivaisi pacuaicuajamë tsabiabi tsane. Pëtsa Dioso pevënë pacuaicuajamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaittsi mapacueniaje Dioso pitabarata,” pajamë pëtsa. Tsiipaji baja pexaniajailivaisi itsa pacuaicuajamë tsabiabi tsane, itsamonae ata pacacueneyapëtaena apo panenajumetsënëtabiabicuene. Nexata itsa pacayanijoba itsacueneyavayo yabara, roviaia pajumaitsimëre pacuenia panajamatabëxainame. Itsa pajejamëjitsia, pajejamëre roviaia. Itsa jume, “¡Jume!” pajamëre roviaia. Bajarapacuenia roviaia itsa paxaniajamë tsabiabi tsane, nexata apo pananeconitsimë tsane Diosojavabelia. Tsiipaji Dioso pevënë apo pacuaicuajamë tsabiabi tsane papecajumexaniataenexa itsamonae.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. ¹⁵ Petovajëcaejavata, daxita ancianovi itsa jamatabëjumaitsi: “Dioso cajena pepacueene jamatejemayaexanaenatsi mapajivije,” itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi. ¹⁶ Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitaneemënu, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëëthëtojavavetsina itsa vajëta, bajaraponë jumenamatamota Diosojavabelia. Ayaiacuenia Dioso pexaniacuene toexanaenatsi. ¹⁷ Diosojumepaebinëmi, profeta Eliáspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaëyata Eliáspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

¹⁹ Tajamonaë, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarap-

palivaisi. ²⁰ Bepayapëtaneme mapacueneje. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxu-abiyaniwa pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeneconimi.

Mapabaxutoje San Pedro copiaya toyaquina Dioso pejumecovënëtsivjavabelia

Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi

¹Xanë Pedronë, Jesucristo taneitorobinë. Nitoroba jivi tatsipaebapon-aenexa Jesucristo pelivaisi. Pacatoyaquinatsi mapabaxutoje paxamë pepo panijatamaravecua, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ²Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espíritu Santo pejamatabëcueneta pacatsata Jesucristo panejumecovënëtavapanaxena. Dioso pacaitapeta papecavecuaajibiaexanaenexa, daxita pibisiacuene paneexanaeconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevenecua.

Pacuenia Jesucristo pelivaisi pejumecovënëtsivi Dioso rajutsianatsi matakabi apo peverevereaejava yabara pelivaisi

³Vaxaitsi vajatuxanenë Jesucristo paxa Diosojavabelia jumaitsitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matakabi apo peverevereaejava. ⁴Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. ⁵Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajjinavanapaepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacacapanepaenexa. Pamatakabi mapanacuaje vereverecaena, nayapëtaena jane baja xua Dioso nacarajutsiana.

⁶Bajaraxuata paxamë Dioso papecacapanepaejavanexa, pasivajamatabëcuenebarëyamëre tsavanapae. Aeconoxae abaxë mapamatakabitaje pacajamatabëcuenebejiobitsi ata daxitacuenepajamatabëcuenejëtsijava, itsiata pasivajamatabëcuenebarëyamëre tsavanapae. ⁷Pacajamatabëcuenejëtapona papecajamatabëcueneyapëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenejëtaponaena papecajamatabëcueneyapëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuapanepaname papecajamatabëcuenejëtsijava,

panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata pamatacabi vajatuxanenë Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinau pacayaiyataena.

⁸ Paxamë abaxë Jesucristo apo patae atamë, itsiata pajitsipame. Aconoxae apo patae atamë Jesucristo, itsiata panajamatabëcuenecopatame bajaraponëjavabelia. Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevajunupaebame itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuene vajunupaebinexa itsamonaejavabelia peyapëtaenexa pacuenia bëpënëa pajamatabëcuenebarëyamë. ⁹ Jesucristo papecasivatëpaexae, panajamatabëcuenecopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaeconimi yabara.

¹⁰ Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. ¹¹ Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamonae Cristo bejiobiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebapona?” jamatabëjai tsabiabi. ¹² Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamona. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcuenecopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. ¹⁴ Pajumecovënëtavanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabi abaxë

Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinxamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamonae jumecovënëtatsi, ayaijamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bajaraxuata Dioso cujunaviaya bepajinavanapame pamatacabibeje abaxë pasaemë tsavanapae mapanacuataje. ¹⁸ Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaemë tsavanapae. Itsiata baitsi jane aeconoxae baja bajarapacueenevecua Dioso baja pacacapanepa. Payapëtaneme rabaja Dioso ayaimatamota papecaneconimatamotsijava papecacapanepaenexa. Apo pacacomuatsi baja cajena peverevereceaevata, pacuenia oro itsi, palata ata. ¹⁹ Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bajarapajivi oveja, pejanapebito, peperabëxanepanaenë, beyaxuaba ofrendacuenia pevi perajutsinexa Diosojavabelia. Nexata bajarapajivi pijaneconi Dioso baja vecuaajibiaexanatsi bajarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinxatsi. Nexata Cristo petëpaejamatabëcueneta, pacavecuajibiaexana panijaneconimi. ²⁰ Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. ²¹ Itsiata baitsi jane Cristo petëpaecujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujanenia, Cristo ecaëyaexanatsi. Bajaraxuata panajamatabëcuenecopatame Diosojavabelia papecarajutsinexa matacabi apo peverevereceaevata.

²² Nexata baja aeconoxae paxamë pajumecovënëtame pexaniajailivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeneconimi, Dioso pacavecuajibiaexana. Nexata xaniavaetsia pasivamë tsavanapae itsamonae ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëëthëtovetsina. ²³ Pacuenia pejananaexanaenacuetoyo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bajarapapejanajamatabëcuene paneaxajivi apo pacarajutsi. Dioso raja pejumelivaisi, apo peverevereacelivaisinexa panejumecovënëtsixae, pejanajamatabëcuene baja paxainame. ²⁴ Dioso pejumelivaisi apo peverevereceaevanexa yabara, Dioso pejumelivaisibaxutota jumaitsi mapacueniaje:

Pacuenia vayafopijipona bepijia tsaquena, petsaquenaecujinae tēpa, bajara pijinia saya itsi jivi ata. Bepijia tēpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabëcuene pexainaenë ata. Bepijia tēpa. ²⁵ Itsiata baitsi jane

Dioso pejumelivaisi apo vereverecae tsane daxitamatacabijavabelianexa,
jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuenē paneexanabiabijava itsamonaejavabelia. Pacoparenua paneyamaxēitojorobabiabijava. Pacoparenua saya yamaxēitojorobiaya panecuaicuaijaisabiabijava. Tsipaji paxamē yamaxēitojorobiaya pacuaicuaijamē tsabiabi itsamonae bepapexaniajamatabēcuenevimē papecataenexa. Pacoparenua panecuenecaēbabiabijava itsamonae. Pacoparenua panebaracuaicuaijaisabiabijava pibisiacuenia itsamonae. ² Pacuenia pejananaexanaenacueto bitso bajitsipa mitobarēmene piapaenexa, bajara pijinia pacuenia paxamē bitso pajitsipare Dioso pejumelivaisi. Bajarapalivaisi baja cajena bevaxaxaejava tanetsi vajajamatabēēthētonexa. Nexata bajarapalivaisi panelebabiabixae, pacatsijamatabēcuenevitsabaponaena pevajēnaeyabelia. Nexata bajarapalivaisi pejamatabēcueneta Dioso pacajamatabēcuene naveretsiaexanaena pacuenia Dioso pacatojitsipa. ³ Nexata baja pepacuene pajamatabēcuenepapētaename vajatuxanenē pexaniajamatabēcuenenēcuene. Bajaraxuata pajitsipaponare orijibia panevājēnaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenē daxitamatacabijavabelianexa yabara pe-livaisi

⁴ Vajatuxanenē Cristo raja bepiatajaiboto tsaponaponae. Apo pevereverecaenē daxitamatacabijavabelianexa. Nexata paimoxoyore bajaraponē. Vajatuxanenē Cristo itsamonae apo pejumecovēnētsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamē ata rabaja Jesucristojavabelia panenajamatabēcuenecopatsixae, bepaibotonēmē Dioso pacatane. Nexata padaxitamē Cristo papijajivixamē, Dioso pacatane bepijatemplobo, ibotonēta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu Santo pacatsijamatabēeca. Paxamē rabaja cajena Dioso panetonacuenebavana-paevi, baitsi papijasacerdotevimē. Nexata Jesucristo pejamatabēcueneta aneconijibia papecataexae, Diosojavabelia najamatabēcuenerajutsiaya pavajētabiabianame Dioso papecasivajamatabēcuenebarēyanexa. ⁶ Cristo, ponē athēbēvetsica Dioso itorobijitsiatsica jivi pecapanepaenexa, bajaraponē yabara tajēvelia Dioso jumaitsi: “Ponē itorobianajē, beiboto tsane,” jai. Nexata tajēvelia Dioso pejumaitsijava, Dioso pejumelivaisibaxutota jumaitsi mapacueniaje:

Taitapetsinē netoponaponaena Jerusalén tomarata. Bajaraponē beiboto tsane. Nexata pacuenia ibota bo pexanaevi, itsaiboto bitso tsitaxanepanatsi daxitaibotonēvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabēcuenecopatsiana bajaraponējavabelia, bajarapajivi apo nacueratsi tsane,

jai mapacueniaje Dioso pejumelivaisibaxutota tajëvelia Dioso pejumait-sijava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepi-atajaiboto tsaponaponae, bitso bepenamatamotsiibotonua. Itsiata baitsi jane pamonaë Cristo pelivaisi apo pejumecovënëtsivi, bajarapamonae bepiabejiboto tanetsi Cristo. Tsipaji baja copiajopa pacue-nia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi ma-pacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaet-sia yaëta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejume-covënëtsijavanexatsi yabara. ⁸ Copiajopanua jane baja Dioso pejumelivaisibaxutota tajëvelia Cristo yabara pejumait-sijava mapacueniaje: “Bajarapaiboto jivi pefirapecaeyaexanaeiboto tsane,” pejaijava Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëthane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinexamë. Dioso baja papijasacerdotevimë tsavanapaenua, daxitacuene pepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaiacuene pexanaejavanë. Dioso baja cajena pacajunata pibisia-jamatabëcuenevecua, mapanacuataje pitaquirijamatabëcuenevecua. Nexata baja pajunuame pexaniajamatabëcuenejavabelia, Dioso pitayotsijamatabëcuenejavabelia. ¹⁰ Paxamë abaxë Cristo pane-jumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacueneba-nanapaenexa yabara pelivaisi

¹¹ Tajamonae bitso patacaasivavi, mapanacuataje abaxë pajinavana-pae atamë, athëbëtatsia baja Dioso pijanacuatatsia bepanejinavana-paevi panataema. Saya raja caeapatoyonexa mapanacuataje pa-jinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajara-pitsijamatabëcuene jamatabënacanajamatabëcuene bijianaeyaexana vaja-jamatabëcuenejavavetsina. ¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapaename. Aeconoxae pacabaracuaicuajai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata

bajarapamonae jumaitsi tsane Diosojavabelia: “Diosomë, bitso ayaijamatabëcuenenëmë,” jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamonaе Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamonaе nacua pevetaванapaеvi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë.

¹⁴ Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaеvi. Itorobatsinua pejumaitsinexa pexaniacuene pexanavanapaеvijavabelia: “Xanepana rabaja xua paexaname,” pejainexa. ¹⁵ Bajarapamonae pajumecovënëre. Tsipaji raja Dioso pacatojitsipa xaniavaetsia panejivanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajava, pamonaе apo pejumecovënëtsivi pexanialivaisi, Cristo pelivaisi.

¹⁶ Paxamë picani pajumecovënëtavanapame Dioso Moisëspijinëta penajumecopatsilivaisi. Nexata picani paexanabiabame pacuenia pacaitoroba Dioso Moisëspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moisëspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. ¹⁷ Daxitajivi yaiyataeya pajinavanapare. Itsamonae ata, pamonaе Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponaponae, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pijamatabëcuenesaë tsavanapaenexa, yabara pelivaisi

¹⁸ Paxamë itsamonae panetonacuenebavanapaеvi, pacamuxujiobatsi mapacueniaje. Pajumeyaiyataeyabiabare pacuenia pacaitorobabibababa panijatuxanevi. Ëpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. ¹⁹ Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabiabijitsipa. Nexata panijatuxanevi papecabebiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa. ²⁰ Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabebiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabebiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa. ²¹ Bajarapacuenia itsacueneneconi

apo paxainaenejevamë, itsamonaë pacabejiobiaexanaponaena. Tsi-paji Dioso bajarapacuenia pacatocopata itsamonaë papecabejiobiaex-anaponaenexa. Payapëtanemë rabaja mapacuenije. Cristo itsa paca-sivatëpa, bejiobiaexanatsi itsacueneneconi xainaenejeva. Nexata pax-amë ata Dioso pacatocopata itsamonaë papecabejiobiaexanaenexa.²² Itsacuenëjava ata pibisiacuene apo exanaë Cristo. Apo yamaxëitojorobi cajena itsajiviyojavabelia ata.²³ Pibisiacuena Cristo bijataë atatsi itsa-monaë, itsiata juya pibisiacuena apo jumecanaviatsi. Bejiobiaexanaë atatsi jivi, “Neyamatamotsiana Dioso,” apo jai Cristo bajarapamon-aejavabelia. Biji rajane bajarapamonaejavabelia Cristo cujirucanavi-atsinejeva, copata bajarapamonae Dioso penaneconitsiaexanaenex-atsi pamatacabi Dioso naneconitsiaexanaena pijaneconi pexainaevi.²⁴ Cristo cruzata itsa tëpa, tsijumaxuabatsi vaxaitsi pibisiacuene va-jaexanaeneconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananua vajavajënaeyabelia vajajinavanapaenexa Dioso pejitsipaecuena. Cristo pacasivavajënrubatsi paxamë papecajamatabëcuene xaniavaetsinexa pibisijamatabëcuenevecua, xaniavaetsia panejinavanapaenexa Dioso pitabarata.²⁵ Paxamë picani Diosovecua naxuabiaya pajinavanapame. Pacuenia oveja pevetsinëtsivecua naxuabiaya jinavanapa, bajara picani paitsimë. Itsiata baitsi jane aeconoxae baja Cristo pejamatabëcueneta panaviabame Diosojavabelia. Pacuenia pijaoveja pevetsinë xaniavaet-sia baevetaponapona pijaoveja, bajara pijinia pacuenia Cristo pacaevet-aponapona. Panejamatabëcuene ata Cristo evetaponapona.

3

Pacuenia penacojiobivi xaniavaetsia benabarëjinavanapa yabara peliv-aisi

¹ Paxamë papetiriavimë, pacamuxujiobatsi mapacueniaje. Pacaevamë canacujitsia paneamonajivi jumecovënëtsiaya pajinavanapare. Pova pamona abaxë apo jumecovënëtsi Jesús pelivaisi, bajarapova xaniavaetsia tsitaponaponaë pamona, pamona ata Jesús pelivaisi pejumecovënëtsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovënëtsiana Jesús pelivaisi xaniavaetsia petsitaponaponaexae pamona.² Bajarapacuenia pamona ata Jesús pelivaisi jumecovënëtsiana, pijava itsa cuenetaena Dioso paneyaiyataejava, itsa cuenetaenanua pijava Dioso pitabarata aneconijibia peponaponaejava.³ Papetiriavimë, pëtsa pajamatabëjumaitsimë mapacueniaje: “Bepexaniavanë jivi tanetaenexa, naxatatsianajë naitabëtsiaya. Namatafaratsianajë naitabëtsiaya. Oronanita pexanaejavanëta naitabëtsianajë. Itsa jume, nexata bitso pexaniaviriana naxatatsianajë,” pajamatabëjamë pëtsa. Pëtsa bajarapacuenia panajamatabëxainame saya naniavelia pane-naitabëtsinexa.⁴ Biji rajane bëpënëaverena panajamatabëcueneitabëre. Bëpënëaverena panenajamatabëcueneitabëtsinexa, xaniavaetsia aneconijibia pajinavanapaename Dioso pitabarata. Nexata itsamonaë pacaitsacueniabi ata, pëtsa pacuenecanaviatame. Nexata xua bëpënëaverena panajamatabëcueneitabëtime, apo pacatoverevereceaë tsane. Bajarapitsijamatabëcuene pexainaeva tonamatamotsianatsi Diosojavabelia.⁵ Pamonaemi petiriavi bajayatami Dioso

pejitsipaecuenia exanavanapa, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcuenecopata Diosojavelia. Jumecovēnētavanapanua pamonajivi.⁶ Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavelia. Papetiriavimē, panajamatabēcuenecopatavanapare Diosojavelia. Paexanavanaparena pexaniacuene. Pētsa pacujunavamenua pacaitsacueniabijitsia ata itsajivi papecaitoaxae. Nexata bajarapacuenia itsa paexanavanapaename, pajamatabēcuenejēpaename Sarapijivami.

⁷ Paxamē papebijivimē, pacamuxujiobatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonaē vaxaitsi pebijivitsi nacavecuasaējibi. Payaiyataema tsipaji raja bajarapamonaē ata yajava Dioso pacarajutsiana matababi apo pevereverecaēja. Bajarapacuenia panijavajivi yaiyataeya pabarējinavanapare paneajumeurayaniva panenavajētsijava Diosojavelia.

Pacuenia pexaniacuene pexanaevi ata itsamonae bejiobiaexanaenatsi yabara pelivaisi

⁸ Tajamonae bitso patacaasivavi, pematatsēnēa pacamuxujiobatsi mapacueniaje. Najamatabēcuenejēpaeya pajinavanapare. Paxamēyajuvēnējivi itsacuene itsa tocopiapatatsi, nexata bajarapacuenie yabara bitso itsa najamatabēxaina, paxamē ata pacobenana-jamatabēxainare. Daxita Dioso panenajuajumecovēnētsivixae, namataenetsia panaasivamēre. Naitaxutotsoniataeyanua pajinavanapare. Beveliajamatabēcuenevinua nataeya pajinavanapare.⁹ Itsajivi pibisiacuene itsa pacaexana, pētsa pacuene canaviatame. Pibisiacuenia itsa pacabijatanenua, pētsa pajumecanaviatame. Biji rajane bajarapajivi patovajēre Diosojavelia Dioso peyavenon-aenexatsi. Tsipaji pamatababi Dioso pacajunata papijajivinxamē, bajarapacuenia paneexanaenexa, pacaitoroba. Nexata juya paxamē Dioso pacaitaxutotsoniataena pacuenia najumecapanepaeya pacajumaitsi papecaiyavenonaenexa.¹⁰ Bajarapacuenie yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabēcuenebarēyaya, bajarapajivi benaebarētoeveta pibisialivaisi pecuaicuajaiyaniva. Benaebarētoevetanua penajumetsēnētsiyaniva ata.¹¹ Bajarapajivi becopata pibisiacuene pexanabiabijavami pexanaponaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi.¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajētsijavatsi bajaraponējavavelia. Dioso cajena baranaepana pamonaē pibisiacuene pexanavanapaevi, jai Dioso pejumelivaisibaxutota.

¹³ Itsa pajamatabēcuenesaēmē tsavanapae tsane pexaniacuene paneexanavanapaēja, nexata itsamonae pacabejiobiaexanae

ata, itsiata apo pacajamatabëcuene bijianaecapanepae tsane. ¹⁴ Itsa pacabejiobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tsipaji raja Dioso pacayavenonaena. Pëtsa pacujunavame bajarapamona. Pëtsa panasivajamatabëcuenebëjamënuua papecabejibiaexanaejava yabara. ¹⁵ Biji rajane panejamatabëethëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xuajitsia xamë jumecovënëtame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame. ¹⁶ Cristo papijajivixaemë, pexaniacuenia pajinavanapaename. Nexata payapëtaename Dioso pitabarata aneonijibia panejinavanapaejava. Nexata itsamonae najumetsënëtsiaya pacabaracuaicuaijai tsabiabi ata tsane, bajarapamona belia najumecopatsiana papecabaracuaicuaijajava. Naurabiana papecabaracuaicuaijajitsabiabijava yabara. ¹⁷ Pexaniacuenie paexanabiabi atamë, Dioso itsa pacatocopatsiana itsamonae papecabejibiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanaejitsipa pibisiacuenie paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatëpa pibisiacuenie va-jaexanaeneconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuenie pexanaenë. Itsiata bejiobiaexanatsi vaxaitsi yabara, pibisiacuenie va-jaexanaevi, vajanacacapanepaenexa Diosojavabelia. Peperabëtomie baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi. ¹⁹ Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanialivaisi petsipaebinexa. Tsipaji bajarapamona naneconitsia jinavanapa petëpaevi pijanacuata. ²⁰ Bajarapamonaemi bajayata jinavanapa, pamatacabi Noépijinë ponapona. Bajarapamonaemi petëpaevajënae Dioso apo jumecovënëtsi. Noépijinë abaxë itsa exanabuatapona pini-jibarcoxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noépijinë, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuenie pexanaejavavecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuenie vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuenie. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanaexaetsi, nexata yapëtanetsi pepacuene Dioso vajanacacapanepaejavaneja. ²² Jesucristo Dioso pi-

asaëyaexanaecujinaetsi, pona jane baja athëbëabetsia. Nexata athëbëtatsia Jesucristo eca paxa Dioso pecujanenia. Daxita ángelevi Jesucristo jamatabëcueneevetatsi pitorobinexa.

4

Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi

¹ Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo pelivaisi pejumecovënëtsixae, bajarapajivi pevajënaeyabelia ajamatabëcuenesaë baja tsaponae. Copata baja pibisiacuene pexanaejava. ² Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipaecuenia baexana. ³ Dioso panejumecovënëtsivajënaeya, pibisiacuene paneexanavanapaeneconi yabara, ayaicuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënu tsabiabi panijabonëjava. Paitajibimënu tsabiabi fiestajava ata. Jumapecataeya pexanaenëanëjavabelia ata panavajëcabiabame. Itsiata baitsi jane aeconoxae baja daxita bajarapacuenie pacopabame. ⁴ Nexata pamona Dioso apo peyapëtaevi, pibisiacuene panenajuaxanabiabivimi, aeconoxae baja pacasivajamatabëcuenenabenajaca. Tsipaji papibisiacuene bajarapamonae exana, paxamë baja apo pajamatabëcueneyavenonaemë. Bajaraxuata bajarapamonae pibisiacuenia pacabaracuaicuaijai. ⁵ Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. ⁶ Petëpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonaemi. Itsiata daxita bajarapamonaemi apo jumecovënëtsi Cristo pelivaisi. Itsiata bajarapamatacabi itsamonae baja jumecovënëta Cristo pelivaisi. Nexata xuacujinae daxita bajarapamonaemi tēpaponae. Itsiata baitsi jane pamonae baja pepuajumecovënëtsi Cristo pelivaisi, tēpa, bajarapamonae xaina baja matacabi apo pevereverecejava.

⁷ Imoxoyo rabaja pevajënae pevereverecaenexa mapanacuaje. Bajaraxuata itsacuenejava ata pibisiacuene paexanaenejevamë, xaniavaetsia pajinavanapare. Namataenetsianua najamatabëcueneevetsiaya xaniavaetsia pajinavanapare panenajuavajëtabiabinexa Diosojavabelia. ⁸ Namataenetsia panaasivamëre tsavanapae. Bajarapacuenie dexitacuene matatoxenetsia bitso nacatoxanepana vajaexanaenexa. Tsipaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabësitecaetsi. ⁹ Namataenetsia xaniavaetsia panacopiapire panijaboyaberena jamatabëcuenexanepanaeya. ¹⁰ Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacuene panetonacuenebavanapaenexa. Nexata namataenetsia panajamatabëcueneyavenonare xua Dioso

pacaenēmē canacujitsia pacajamatabēcuene caējēpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. ¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapētaeyaexanatsi. Itsajivi pijinia itsa yavenonaejitsia itsanē, bajarapajivi beyavenona pacuenia Dioso jamatabēcuenecaējēpaeyaexanatsi peyavenonaenexa. Daxita xua paexanaejitsiamē Jesucristo papijajivixae, paexanare jivi peyaiyataenexa Dioso. Dioso baja cajena daxitacuene pitorobinē, penivenivenaecotia pexainaenē daxitamatacabijavabelianexa. Bajara itsi tsane.

Pacuenia Jesucristo pelivaisi pejumecovēnētsivi itsamonae bejiobiaexanaponatsi yabara pelivaisi

¹² Tajamonae bitso patacaasivavi, pētsa pajamatabēcuenenabenajacame, itsamonae bitso pacabejiobiaexanaponaē ata. Bajarapacuenie patocopiapatsiana papecajamatabēcueneējētsinexa papecajamatabēcuene yapētaenexa pepacuenie panenajamatabēcuene copatsijava Dioso javabelia. Nexata pētsa pajamatabējumaitsimē: “Xanē cajena Dioso tajumecovēnētsinē. Nexata bajarapacuenia caenēnē netocopiapatapona,” pajamatabējamē pētsa. Tsipaji raja daxita Dioso pejumecovēnētsivi bajarapacuenia tocopiapataponatsi pejamatabēcueneējētsinexatsi pejamatabēcuene yapētaenexatsi pepacuenie penajamatabēcuene copatsijava Dioso javabelia. ¹³ Nexata saya panasivajamatabēcuene barēyamēre tsavanapae paxamē ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabēcuene barēyamē tsane. ¹⁴ Pibisiacuenia itsamonae itsa pacabijatane Jesucristo pelivaisi panejumecovēnētsivixae, pasivajamatabēcuene barēyamēre. Tsipaji raja paepatota itsamonae pacabijatane, ayajamatabēcuene nē Espiritu Santo, ponē pacayajavaponapona, ayaicuenia pacayavenonaena. ¹⁵ Pētsa jivitonē pabeyaxuabame. Pētsa panacobetoxotame. Pētsa paexaname itsacuenejava ata pibisiacuene. Pētsa patoebetame itsamonae pijacuene pacajunatsinejeva panetoevetsinexa, bajarapacuenia itsamonae panejamatabēitonotsiyaniva. Pētsa bajarapitsicuene paexaname itsajivi ata paxamē yabara pejumaitsiyaniva: “Pibisiacuene pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae. ¹⁶ Pajivi bejiobiaexanatsi Jesucristo pelivaisi pejumecovēnētsixae, bajarapajivi apo benacaura pebejiobiaexanaejavatsi. Pexaniajamatabēcuene berajuta Dioso javabelia Jesucristo pelivaisi pejumecovēnētsixae.

¹⁷⁻¹⁸ Dioso yapētane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamē xaniavaetsia panetojinavanapame. Pexaniacuene nua patoexanabiabame itsamonaejavabelia. Nexata pacasivajamatabēcuene barēyatsi,” pejainexa Dioso, pexaniacuene pijajivi itsa toexanavanapatsi. Itsiata pamonaē Dioso pijajivi ata, xaniavaetsia Dioso apo tojinavanapae, pexaniacuene nua apo toexanabiabi itsamonaejavabelia, bajarapamonaejavabelia Dioso jumaitsi tsane: “Paxamē apo pacasivajamatabēcuene barēyatsi. Tsipaji tajitsipacuenua apo paexanavanapaemē,” jai tsane. Bajarapacuenia Dioso itsa jumaitsi

tsane pejumecovënëtsivitsijavabelia ata, ¿detsa nexata Dioso jumaitsi tsane Dioso apo pejumecovënëtsivitsijavabelia? Nexata Dioso ayaicuenia naneconitsiaexanaena bajarapamonae. Pamonaejavabelia Dioso jumaitsi tsane: “Pacasivajamatabëcuenebarëyatsi,” jai tsane, bajara-pamonae Dioso capanepaena pijanacuayabetsia. Pamonaejavabelia ata Dioso jumaitsi tsane: “Paxamë apo pacasivajamatabëcuenebarëyatsi,” jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovënëtsivitsijavabelia ata, nexata biji pamona apo jumecovënëtsi Dioso pejumelivaisi, pamona pibisiacuen pexanaevi, Dioso apo capanepae tsane pijanacuayabetsia. ¹⁹ Nexata paxamë Dioso pacatocopatsi ata itsamonae papecabejiobiaexanaponaenexa, pëtsa pajamatabëcuenebëjamë. Tsiteca panevajënaeyabelia pexaniacuen paexanavanapare. Panajamatabëcuene copare papecaexanaenë, Dioso javabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovënëtsivi muxujjobatsi yabara pelivaisi

¹ Aeconoxae ancianovi papecayajavajinavanapaevi, muxujjobijitsianë. Xanë ata rabaja ancianonënë. Pacuenia itsi bajarapaancianovi, xanë ata rabaja itsinë. Taniji pacuenia Cristo cruzata bejiobiaexanatsi. Pamatacabi icsatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana. ² Pacuenia oveja pevetsivi xaniavaetsia baevetavanapa, bajara pijinia pacuenia paxamë ata xaniavaetsia paevetavanapare Dioso pejumecovënëtsivi, pamona Dioso pacatocopata panetoevetsinexa. Jamatabëcuenebarëyaya Dioso pejitsipaecuenia patoevetavanapare Dioso pejumecovënëtsivi. Pëtsa pajamatabëjumaitsimë: “Apo jitsipae atanë tatoevetsinexa Dioso pejumecovënëtsivi, itsiata toevetsianajë. Tspiji Dioso netojitsipa tatoevetsinexa,” pajamatabëjamë pëtsa. Pëtsa pajamatabëjumaitsimënuu: “Tanematamotsinexa toevetsianajë,” pajamatabëjamë pëtsa. Paxamë panejamatabëëthëtojavavetsina panejitsipaexae Dioso pejumecovënëtsivi panetoevetsinexa, patoevetavanapare. ³ Pamona Dioso pacatocopata panetoevetsinexa, bajarapamonae pëtsa bepapijatuxanevimë panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapaenexa. ⁴ Nexata pamatacabi icsatsia Cristo patsianica, ponë jane baja pepo vajanacaevetsinënexa, nacarajutsiana pinijicuen. Xua Cristo nacarajutsiana, apo vereverecae tsane daxita matabijavabelianexa.

⁵ Paxamë papevëjëavimë, pacuenia ancianovi pacaitoroba, pajumecovënëtabiabarë. Pacaejivimë canacujitsia namataenetsia panayavenonabiabianame beveliajamatabëcuenevi nataeya. Bajarapacuenia panataema tspiji raja Dioso pejumelivaisibaxutota jumaitsi mapacueniaje:

Dioso apo yavenonae pamona beayaijamatabëcuenevi penataevi. Itsiata baitsi jane Dioso pitaxutotsoniataexae, pexaniajamatabëcuenia yavenona pamona beveliajamatabëcuenevi penataevi,

jai Dioso pejumelivaisibaxutota.

⁶ Nexata saya paxamë beveliamatabëcuenevi panataema ayajamatabëcuenenë Dioso pitabarata. Nexata Dioso pecaëjêtsimatacabita, paayaijamatabëcuenevimë pacaexanaena. ⁷ Dioso papecaasivaxae, pacaevetaponapona. Bjaraxuata daxita panejamatabëcuenebëjajjava, pacopare. Pavajëre Diosojavabelia papecayavenonaenexa.

⁸ Nayajivitaeyanua pajinavanapare panijavajabitsaënë, dovathi, papecayamaxëitojorobianiva. Pacuenia nevëthë itsa piajani, jaitaponapona pexaeyabuatsinënexa, bajarajamatabëcueneitsi dovathi papecayamaxëitojorobinexa.

⁹ Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava. Diosojavabelia najamatabëcuenecopatsiaya dovathi panayajiviitavere. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjava dovathi pejamatabëcueneta bejiobiaexanaponatsi. ¹⁰ Itsiata baitsi jane saya caeapatoyo Dioso pacacopatsiana papecabejiobiaexanaenexa. Bjaraxuacujinae Dioso pacajamatabëcueneasaëyaexanaena. Bjaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëtatsia vajanacayajavaecaenexa, penivenivenaenacuatatsia, daxitamatacabijavabelianexa. ¹¹ Dioso baja cajena daxitacuene pevetsinë daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi

¹² Silvano betajuyapijinë taniji bajaraponë ata Dioso pejumecovënëtsixae. Silvano yaquinaeyaexanajë palivaisi pacatoitorobijitsiatsilia. Bjaraponë ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabiabixae, yapëtanetsi baja xaniajai pepacuene Dioso vajanacaasivacuene. Bjaraxuata pacabejiobiaexanabiabi ata, pajamatabëcuenesaëmëre tsavanapae paneyapëtaexae baja bajarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinexamë, bajara pijinia pacuenia bajarapamonae ata Dioso itapetatsi pijajivinexa. Marcos, ponë betaxënatocuenia tataenë, bajaraponë ata pacajamatabënajina. ¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenexanepanaeya panejinavanapaaenexa Jesucristo papijajivixaemë. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

¹ Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacacapanepaenë, nacaneconimatamota baja. ² Pacatovajëtatsi Diosojavabelia bitso papecayavenonaponaenexa daxitacuene yabara. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

Pacuenia Dioso pejumecovënëtsivi jamatabëcueneitsi tsavanapae yabara pelivaisi

³ Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanaejavaenë pexanaexae mapanacuataje, nexata yapëtanetsi Dioso xaniajai vajanacacapanepaejavanexa pacuenia najumecapanepaeya jumaitsi. Dioso vajanacacapanepaejavanexa pinijicuene bitso. Jumecovënëtsi Dioso vajanacacapanepaejavanexa. Nexata Dioso nacayjavapona. Bajaraxuata Dioso pesaëta nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponapona, bajara vaxaitsi ata jamatabëcueneitsi tsavanapae tsane. ⁵ Nexata pacuenia Dioso jamatabëcueneitsi tsaponapona, bajara panejamatabëcueneitsinexa, asaëyata Dioso pajumecovënëtaaponare. Asaëyata Dioso itsa pajumecovënëtaeponaename, nexata icatsia itsajava payapëtaeponaename. Asaëyata paexanavanapare epexaniacuene. Asaëyata itsa paexanavanaponaename epexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa.

6 Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecataitsinexa pibisiacuene panenajamatabëxainaeayaniva. Paneyapëtaecujinae panenajamatabëcuenecataitsinexa pibisiacuene panenajamatabëxainaeayaniva, icatsia payapëtaename dovathi pejamatabëcueneta bajayajebi pacajamatabëcueneëjëtaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcueneëjëtaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. 7 Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

8 Daxita bajaraxua asaëyata panevajënaeyabelia itsa paexanavanapaename, nexata pacuenia Dioso jamatabëcueneitsi tsaponaponae, bajara pajamatabëcueneitsimë tsane. Bajarapacuenia asaëyata itsa paexanavanapaename, nexata pajamatabëcuenevitsabaponaename Dioso panejumecovënëtsijava. Nexata Dioso ata tsitanexanepanaenatsi xua patonacuenebavanapame. Nexata vajatuxanenë Jesucristo panejamatabëcueneypëtaejava, apo panacueratsimë tsane. 9 Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeconimi. 10 Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinxamë. Nexata bajarapacuenia itsa paexanavanapaename, Dioso panejumecovënëtsijavavecu, apo pajopaemë tsane. Pacapanepaena Dioso. 11 Nexata Dioso pacatocopatsiana panejonenexa vajatuxanenë Jesucristo vajanacapanepaenënexa, pijanacuayabetsia, apo peverevecaenacuayabetsia, paneyajavajinavanapaenexa.

12 Daxita rabaja bajaraxua payapëtaneme. Pajamatabëcuenesaëmënuu baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. 13 Abaxë tasaëtsaponaponaepato mapanacuataje, netsitanexanepana patacamuxujjobinexa, bajarapacuenia patacanajamatabënapitsia exanaponaenexa. 14 Tsipaji baja vajatuxanenë Jesucristo tajëvelia neypëtaeyaexana bepijia tatëpaejavanexa. 15 Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniva. Nexata itsa tēpajë, paxamë tavënamuto panenajamatabënapitabiabinexa pacuenia pacamuxujjobatsi.

Pacuenia Jesucristo pijajivijavabelia tsitanajamatabëcueneitajëta ayai-jamatabëcuene pexainanëcuene yabara pelivaisi

16 Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi

pejamatabēcueneta penajumetsēnētsilivaisi, apo pacatsipaebitsi. Tsi-paji baja pataitaxutota pataniji vajatuxanenē ayaijamatabēcuenē pex-ainaenēcuenē. ¹⁷ Xaniavaetsia baja cajena pajumetaniji pamata-cabi paxa Dioso athēbēvetsica barēcuaicuaijaisi. Bajarapaepatota dax-itanē Cristo nivenivenareca. Athēbēvetsica paxa Dioso jumait-sica mapacueniaje: “Mara ponē taxēnatoje, tasivanē. Bitso sivaja-matabēcuenēbarēyanē,” jaitsica paxa Dioso athēbēvetsica. ¹⁸ Vajatuxanenē Jesucristo payajavanubenajē petsutojumata, itsajota jane baja paxa Dioso athēbēvetsica barēcuaicuaijaisitsica. Nexata bajarapatsutojumata paxanē patajacuata pajumetaniji vajatuxanenē Jesucristo paxa Dioso athēbēvetsica pebarēcuaicuaijajavatsitsica.

¹⁹ Nexata pataniji. Payapētāninjua. Xua bajayata Diosojumepae-bivimi profetavi tajēvelia vajunupaeba pecopiapatsinexa, bajaraxua jane baja aeconoxae copiapata. Paxamē pibisiacuene panenayajiv-itaenexa, pajumecovēnēre profetavimi pepaebilivaisi. Profetavimi pepaebilivaisi, pexaniajailivaisixae, belámpara picani. Pacuenia lámpara itayota pitaquirijavā, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovēnēre xaniavaetsia profetavimi pepaebilivaisi. Nexata bajarapalivaisi paca-jamatabēcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabēcueneyavenonaena mat-apania icatsia Jesucristo pepatsimatacabitsicajavabelianexa. Nex-ata bitso pabarēyamē tsane pamatacabi icatsia Jesucristo patsianica. ²⁰ Xaniavaetsia pacanaējēre daxitacuenevecua paneyapētaenexa mapali-vaisije. Daxita xua copiapatsijitsia mapanacuataje, tajēvelia Dioso pe-jumelivaisibaxutota vajunupaeba. Itsajivi ata cajena apo caējēpaetsi saya pejamatabēcueneta bajaraxua xaniavaetsia pevajunupaebinxā it-samonaejavabelia, itsamonaē ata peyapētaenexa pajamatabēcuenelivaisi xaina bajaraxua. Matapania pajivi Espiritu Santo yapētaeyaxanatsi, caējēpatsi xaniavaetsia pevajunupaebinxā bajaraxua. ²¹ Bajayata Diosojumepaebivimi profetavi tajēvelia itsa vajunupaeba daxita xua copiapatsijitsia mapanacuataje, pejamatabēcueneta apo exanae ba-jarapalivaisi. Profetavimi Dioso pijajivixae, pacuenia Espiritu Santo yapētaeyaxanatsi, paebabiaba.

2

Pacuenia Dioso pejumecovēnētsivi muxujibatsi penajumetsēnētsilivaisi pepsipaebaponaevi pejumecovēnētsiyaniva yabara pelivaisi (Jud 4-13)

¹ Bajayata itsamonaē tsipaebapona penajumetsēnētsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamējava. Itsamonaē pacatsipaebiana penajumetsēnētsilivaisi. Bajarapamonae yamaxēitojorobiaya pacatsipaebiana penajumetsēnētsilivaisi. Nexata bajarapalivaisita pacacopabiaexanaena Dioso panejumecovēnētsijavami. Bajarapamonae apo pejumecovēnētsivi tsane vajatuxanenē Jesucristo, ponē picani sivatēpatsi pecapanepaenexatsi. Bajarapacuenia pexanaexae tsane bajarapamonae, nexata bepījia Dioso verebiabiana bajarapamonae. ² Bajarapamonae pevitota pibisiacuene exanavanapaena. Nexata ba-jaraxua yabara jumaitsi tsane: “Apo itsacuene itsiata, bajaraxua exanae

atatsi," jai tsane bajarapamonae. Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonaë Dioso apo pejumecovënëtsivi pibisiacuena baracuaicuajjai tsane pexanialivaisi, Jesucristo pelivaisi. ³ Nexata pamonaë penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

⁴ Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infernojavelia. Nexata bajarajota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaevi. ⁵ Dioso cajena aneconijibia apo copatsi bajayatami ata pamonaë pibisiacuene exana. Dioso ira bubutsiaexana bajarapamonae penaxuabinexa. Caenë, Noépijinë, Dioso capanepa pijamonae yajava, siete pajiviyobeje. Noépijinë picani itavetabiaba jivi pibisiacuene pexanaeyaniva. ⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata ëpumana. Bajarapacuenia Dioso verebiaba bajarapamonaemi, pamonaë cotocaevi jinavanapa, peyapëtaenexa, bajarapamonae ata pibisiacuene pexanaeyaniva. ⁷ Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonaemi bitso pibisiacuene pexanaejava, nexata bitso sivanajamatabëxainabiaba. ⁸ Lotpijinë pexaniacuene pexanaenë, bajarapamonaemi tuatuajëta naponapona. Nexata caematacabi canacujitsia Lotpijinë bitso sivanajamatabëxainabiaba, itsa tane bajarapamonaemi pibisiacuene pexanaejava, itsa vënëlivaisitanenua pibisiacuene pexanaejava. ⁹ Bajaraxuata vaxaitsi baja yapëtanetsi mapacuneje. Vajatuxanenë caëjëpatsi pejamatabëcueneasaëyaexanaenexa pajivi najamatabëcuene copata vajatuxanenëjavavelia. Nexata pajivi najamatabëcuene copata vajatuxanenëjavavelia, dovathi itsa jamatabëcuenejëtatsi, vajatuxanenë jamatabëcueneasaëyaexana. Vajatuxanenë caëjëpatsinua pibisiacuene pexanaevi, nabejibitsiaya pejinavanapaeyaexanaenexa, mapanacutaaje abaxë itsa asaë tsavanapae. Bajarapacuenia vajatuxanenë nabejibitsiaya jinavanapaeyaexanaena penaneconitsiaexanaenexa icatsia petëpaecujinae ata, pamatacabi naneconitsiaexanaena daxita pijaneconi pexainaevi.

¹⁰ Pamonaë bitso casaë tsavanapae pibisiacuene pexanaejava pijacuata penatojitsipaecuenia, bajarapamonae bitso ayaicuenia Dioso naneconitsiaexanaena itsamonae penaneconitsiaexanaejava matatox- enetsia. Pamonaë ata apo jumecovënëtsi vajatuxanenë pevetsicuenetsi,

bajrapamonae ata Dioso bitso ayaicuenia naneconitsiaexanaena. Pamonaē penajumetsēnētsilivaisi petsipaebaponaēvi, apo yayyataē itsamonaē ata. Ajamatabēcuenetajanua. Apo jumejunavinua bajrapamonae pibisiacuenia pebaracuaicuaijainexa ángelevi. ¹¹ Angelevi biji picani bitso piasaēvi penajumetsēnētsilivaisi petsipaebaponaēvi matatoxenetsia. Nexata ángelevi vajatuxanenē pitabarata pejinavanapaexae, bitso piasaēvi ata penajumetsēnētsilivaisi petsipaebaponaēvi matatoxenetsia, itsiata pibisiacuenia apo baracuaicuaijai penajumetsēnētsilivaisi petsipaebaponaēvi.

¹² Pamonaē penajumetsēnētsilivaisi petsipaebaponaēvi, beveliajamatabēcuenevi saya. Pacuenia saya jinavanapa unupijidujuai, bajara saya jamatabēcueneitsi bajrapamonae. Apo najamatabēxainae pexanialivaisi. Saicaya xua jamatabēexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaē penajumetsēnētsilivaisi petsipaebaponaēvi, pibisiacuenia baracuaicuaijai tsabiabi xaniavaetsia apo peyapētaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajrapamonae. ¹³ Nexata Dioso bajrapamonae juya bejiochia jinavanapaeyaexanaena. Tsipaji bajrapamonae itsamonaē bejiochiaexanabiaba. Bajrapamonae pibisiacuene itsa exanabiaba, barēya tsabiabi. Bajrapamonae apo pacajamatabēcuenejēpae ata, nanacaetuatsiana itsa panacaetuatame. Nexata yamaxēitojorobiaya pacayajavanabanebiabiana fiesta paneexanaematacabi. Bajrapamonae pibisiacuene pexanabiabixae tsane, nexata panetuatuajēta bepiauxuirajava tsane.

¹⁴ Bajrapamonae itsa tane petiriva, pibisiacuene jamatabēexanabiaba pevitota bejarapovajavabelia. Apo yabaracueranae pibisiacuene pexanaejava. Penajumetsēnētsilivaisi petsipaebaponaēvi, pibisiacuene exanaeyaexanabiaba pamonaē abaxē apo ajamatabēcuenesaē Dioso pejumecovēnētsijava. Bajrapamonae bitso jitsipa daxitacuene pexainaejava ēpamonaenexa. Bitso yapētanenua pepitsinexa xua jitsipa. Nexata bajrapamonae Dioso bitso ayaicuenia naneconitsiaexanaena. ¹⁵ Bajrapamonae baja Diosovecua naxuabiaya jinavanapa. Tsipaji baja copaba pexaniajailivaisi pejumecovēnētsijavami. Apo jumecovēnētsi Dioso. Nexata bajrapamonae cuenejēpa Diosojumepaebinēmi, profeta Balaampijinēmi, Beorpijinēmi pexēnato. Balaampijinēmi bajayata itsamonaē tsipaebatsi palata pibisiacuene picani pexanaenexa. Nexata baja picani Balaampijinēmi jejai pibisiacuene pexanaenexa. ¹⁶ Itsiata baitsi jane Balaampijinē Dioso itavetatsi bajarapapibisiacuene bitso pexanaeyaniva Dioso pitabarata. Balaampijinē pijaburrota yanajetaruca. Dioso cuaicuaijaiyaexana burro. Nexata pacuenia jivitonē bacuaicuaijai, bajarapacuenia Balaampijinē pijaburro barēcuaicuaijaitsi pitavetsinexatsi pibisiacuene pexanaeyaniva. Nexata picani xua Balaampijinē jamatabēexana, copata baja.

¹⁷ Pamonaē penajumetsēnētsilivaisi petsipaebaponaēvi, apo jumenamatamotsi. Yapētanetsi pacuenia baitsi meramatathaibēmi itsa tseveca. Meramatathaibēmi itsa tseveca, apo jamatabēcuene yavenonaē itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaē petsipaebaponaēvi penajumetsēnētsilivaisi. Itsajivi ata apo jamatabēcuene yavenonaē

bajarapamonae petsipaebilivaisita. Pacuenia itarērēbo ata jovibota xaniavaetsia caecovēta apo rucae, bajara jamatabēcueneitsi bajarapamonae. Caejamatabēcuene apo xainae. Nexata Dioso bajarapamonae bitso ayaicuenia naneconitsiaexanaena. Bajarapamonae pitaquirinacuata naneconitsia jinavanapaena daxitamatacabijavabelianexa. ¹⁸ Bajarapamonae ayaijamatabēcuenevi nataeya cuaicuaijai tsabiabi. Itsiata baitsi jane saya natsiquejemalivaisi cuaicuaijai tsabiabi. Bajarapamonae yamaxēitojorobiaya jumai tsabiabi: “Apo itsacuene raja apo payaiyatae atamē petiriva. Pibisiacuene itsa jamatabēpaexaname panevitota petirivajavabelia, paexanare,” jai tsabiabi bajarapamonae. Bajarapacuenia bajarapamonae othopaeyaexanapona pamonaē pejanajumecovēnētsivi Dioso. Tspaji pibisiacuene exanaeyaexanapona. ¹⁹ Bajarapamonae yamaxēitojorobiaya jumai tsabiabinua: “Itsa panejumecovēnētsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonaē penajumetsēnēsilivaisi petsipaebaponaevi. Itsiata baitsi jane bajarapamonae apo jamatabēcuene caējēpaetsi daxita xua pexaniacuene pexanaenexa. Saya ēpibisiacuene exanabiaba. Bajaraxuata Dioso bajarapamonae verebiabiana. Tspaji bajarapamonae pibisiacuene exanabiaba pijacuata penatojitsipaecuenia, pacuenia pejamatabēcuene itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabēcuene beprijavitonētsi naexanatsi. Tspaji pacuenia vajajamatabēcuene nacaitoroba, exanaponatsi. ²⁰ Pamonaē baja yapētane vajatuxanēnē Jesucristo, ponē capanepaejitsiatsi pibisiacuene pexanaeneconimivecua, bajarapamonae baja Dioso vecuaajibiaexanatsi pibisiacuene pexanaeneconimi. Pajamatabēcuenemi ata jitsipaeyaexanabiabatsi pibisiacuene pexanaenexa, bajarapajamatabēcuenemi ata baja vecuaajibiaexanatsi. Itsiata baitsi jane bajarapamonaeyajuvēnēvi icatsia pibisiacuene itsa exanapona, nexata icatsia bajarapajamatabēcuene pejumecovēnētaponaeaxae, bitso naneconitsiana Diosojavabelia. Nexata jane baja copiaya pexainaeneconimi matatoxenetsia, bitsoyo ayaineconi natsixainaena. ²¹ Pamonaē copaba pexaniajailivaisi pejumecovēnētsijavami, bitso ayaineconi natsixaina Diosojavabelia. Bajarapamonae itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tspaji apo yapētae tsipae bajarapalivaisi. Nexata baja peyapētaexae bajarapalivaisi, pecopabixaenua pejumecovēnētsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia. ²² Bajayatapijilivaisi jumaiti mapacueniaje: “Aviri peyacabicujinae, icatsia nayacabixane. Marrano pijinia tsorobota pebocaecujinae, itsa matavanetsi pexaniamerata, pematavaecujinaetsi, icatsia caevēalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabēcueneitsi pamonaē icatsia caevēalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

1 Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxotoje cotocaevi pacatoyaquinatsi. Pacatoyaquinatsi bajarapabaxutobeje patacamuxujiobinexa nexata xaniavaetsia panenajamatabëxainænexa.

2 Panajamatabënapire pacuenia Diosojumepaebivimi profetavi bajayata tajëvelia jumaitsi. Panajamatabënapirenuua pacuenia baja cajena apóstolevi pacatsipaeba vajatuxanenë Cristo pelivaisi. Cristo, ponë papecacapanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba.

3 Xaniavaetsia panamuxunaevere daxitacuenevenexa paneyapëtaenexa mapacueneye. Nacua pecopiarucaevajënaeyotanexa, najetarubenaena itsamonae pecapocaponaevinexa pexaniajailivaisi. Bajarapamonae exanavanapaena pibisiacuene pacuenia pijacuata natojitsipa.

4 Bajarapamonae Cristo pepatsijavanexatsica apo pejumecovënëtsixae, najumegenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamonaë jumecovënëta Cristo pepatsijavanexatsica, vajënaevetavanapa picani. Itsiata Cristo apo patsitsica. Nexata bajarapamonaemi belia baja tēpa Cristo patsinejevatsica. Daxitanacua abaxë itsiata tsitecanuca Dioso pexanaecujinae,” jai tsane saya bajarapamonae apo pejumecovënëtsixae Cristo pepatsijavanexatsica.

5 Bajarapacuenia jumaitsi tsane tsipaji bajarapamonae apo canaëjëtsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuumene tuatuajëatsina Dioso ira jumapitsapaeyaexanaina.

6 Bajayata pijinia mapanacuaje Dioso itsa bubutsiaexana, daxitajivi Dioso verebiaba merata.

7 Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanuca. Dioso abaxë xaniavaeta itsamatacabi isotota peveriapaenexa. Dioso isotota veriapaena mapanacuaje, itaboxo yajava, pamatacabi naneconitsiaexanaena daxita pijaneconi pexinaevi. Bajarapamatacabi Dioso naneconitsiaexanaena pibisiacuene pexanaevi. Dioso verebiabiana daxitacuene.

8 Tajamonae bitso patacaasivavi, pëtsa panacofënëtame mapacueneye. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenë.

9 Itsamonae jamatabëcuenenavëxaniabiaya jamatabëjumaitsi: “Dioso bitso cuenenajemata pexanaenexa pacuenia najumecapanepaeya jumaitsi,” jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabijava, penajamatabëcuenepënëyorotsinexa Diosojavabelia.

10 Vajatuxanenë baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayajume najumetsiana. Daxita athëbëpijicuene vereverecaena isotota. Mapanacumije,

daxita xua tanetsi mapanacuataje, yajavatajuena isotota.

¹¹ Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuenia!
¹² Bepacopiaevetavanapame vajatuxanenē pepatsijavanexatsica. Vajatuxanenē pijacuene bepatonacuenebavanapame bepajia pepatsinexatsica. Pamatacabita vajatuxanenē patsianica, itaboxo vereverecaena isotota. Daxita athēbēpijiacuene veriajaviana isotocotiata.
¹³ Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajēvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ēpexaniacuene exanavanapaena, xua Dioso tojitsipatsi.

¹⁴ Tajamonae bitso patacaasivavi, pejanaitaboxo, pejanairanua, pane-taenexa, panecopiaevetavanapaeepato xaniavaetsia pajinavanapae-name. Nexata pamatacabi vajatuxanenē icatsia patsianica, pacasivabarēya tsane. Bajarapacuenia pacasivabarēya tsane itsa pacacaxi-tajarabiana jamatabēcuenexanepanaeya aneconibia panejinavanapaeja-vata. ¹⁵ Pacanaējēre xua yabara abaxē vajatuxanenē apo patsitsica. Abaxē raja apo patsitsica daxitajivi apo pejumecovēnētsixae Dioso. Tsi-paji daxitatsi vajatuxanenē jamatabēnacacapanepa pijanacuayabetsia. Pacuenia daxitatsi vajatuxanenē jamatabēnacacapanepa pijanacuayabet-sia, bajaraxua vajaasivanē, vajabananē Pablo, peyapētaenexa Dioso yavenonatsi. Nexata Pablo peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuaya-betsia. ¹⁶ Pablo baja cajena peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuayabet-sia. Pablo peyaquinaelivaisianē, itsalivaisi ayapēbeje tsabiabi vaja-jumeyapētaenexa xua yabara Pablo yaquina. Nexata palivaisi apo jumeyapētaetsi, apo yapētaetsi pajamatabēcuenelivaisi xaina. Nexata pa-monae xaniavaetsia apo jumeyapētae Pablo peyaquinaelivaisianē, juya tsipaebabiaba itsamonaejavabelia apo jumeyapētae ata. Pamonaē ata caejamatabēcuene apo xinae Dioso pejumecovēnētsijava, juya itsamon-aejavabelia tsipaebabiaba Pablo peyaquinaelivaisianē. Nexata bajara-pamonae itsamonaejavabelia itsa tsipaebabiaba, Pablo peyaquinaeli-vaisianē mataropotsia saicayacuenia tsipaebabiaba. Bajarapacuenia itsabaxutonēta ata, perubenaelivaisianē ata, bajarapamonae saicay-acuenia mataropotsia tsipaebabiaba. Bajarapamonae itsamonaejav-abelia itsa tsipaebabiaba, apo tsipaebabiabi pacuenia Dioso pejume-livaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷ Tajamonae bitso patacaasivavi, paxamē baja cajena tajēvelia payapētaneme bajaraxua yabara. Bajaraxuata panayajivitaema pibisi-acuene pexanaevi penajumetsēnētsilivaisi papecatsipaebiyanima. Tsi-paji papecatsipaebilivaisita, pacajopaeyaexanaejitsipa Dioso panejume-covēnētsijavavecua. ¹⁸ Pacatojitsipatsi panejamatabēcuenesaē tsavana-paenexa Dioso panejumecovēnētsijava Jesucristo papecaitaxutotsoni-ataexae. Panevajēnaeyabelia payapētaeponarenua vajatuxanenē Jesu-cristo, ponē pacacapanepaejitsia pibisiacuene paneexanaeconive-cua. Jesucristojavabelia daxitajivi jumai tsabiabi tsane: “¡Xamē Je-

sucristomë, bitso cajena ayaijamatabëcuenenëmë!” jai tsabiabi tsane
daxitamatacabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivjavabelia

Cristo vajanacajamatabëcuene asaëyaexanaenë yabara pelivaisi

¹⁻² Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuu patacobeta. Nexata bajaraponë pelivaisi pacatsipaebatsi. Bajaraponë maticabi apo peverevereaejava pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo piagamatabëcueneitaquirinë. ⁶ Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcueneapaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vajaexanaejava ata. ⁷ Itsiata vaxaitsi xaniavaetsia itsa jumecovënëtavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapae-natsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuaajibiaexanaena daxita vajapibisiajamatabëcuenemi.

⁸ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneonijibitsi. Tsipaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëecae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuaajibiaexana pibisiacuene vajaexanaeneconimi. Nacavecuaajibiaexananua daxita pibisiajamatabëcuene vajaxainaejavami. ¹⁰ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo

nacatsijamatabëecae. Bajarapacuenia itsa jumaitsitsi, nexata Dioso tanetsi bepenajumetsënëtsinë. Tshipaji Dioso pejumelivaisibaxutota jumaitsi pacuenia daxitatsi pibisiacuene ëvajaexanaevi.

2

Cristo vajanacatocuaicuaijainë Diosojavabelia yabara pelivaisi

¹ Tajamona, pacatoyaquinatsi mapalivaisije patacamuxujobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijainë Diosojavabelia. Bajaraponë cajena caeto ata pibisiacuene apo pexanaenë. ² Jesucristo vajanacasivatëpaexae, nacavecuaajibiaexana baja daxita pibisiacuene vajaexanaeneconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaeneconi pevecuaajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. ⁴ Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëecaetsi. ⁵ Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëtavanapaenatsi Dioso, nexata nayapëtaevanapaenatsi vajayajavajinavanapaejava Dioso. ⁶ Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷ Tajamona, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa. ⁸ Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtavanapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tshipaji bajarapalivaisita Jesucristo nacajamatabëcueneitayotapona.

⁹ Itsajivi jumaitsi ata: “Xanë raja Dioso pitorobicuenia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneitaquiri tsaponapona. ¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneitayotatsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi. ¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneitaquiri tsaponapona. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeneconi yabara. Bajara jamatabëcueneitsi tshipaji pevajënaeyabelia dovathi yaajamatabëcueneitaquiriaya exanaponatsi piajamatabëcueneitaquirixae.

¹² Tajamonae, pacatoyaquinatsi mapalivaisije. Tshipaji baja Dioso pacavecuajibiaexana pibisiacuene paneexanaeconimi Jesucristo papecasivatêpaexae. ¹³ Patavajênaepijivimê, pacatoyaquinatsi mapalivaisije. Tshipaji baja payapêtaneme Jesucristo, ponê baja cajena athêbêtatsia ponapona pepo bajayatami ata, Dioso daxitacuene mapanacuata pexanaevajênaeya. Paxamê ata papevêjêavimê, pacatoyaquinatsi mapalivaisije. Tshipaji baja dovathi pajamatabêcueneamoneyabame.

Bepataxicueniamê patacataevi, imata baja cajena itsabaxuto pacatoyaquinatsi. Tshipaji baja vaxa Dioso payapêtaneme. ¹⁴ Patavajênaepijivimê, imata baja cajena itsabaxuto pacatoyaquinatsi. Tshipaji baja payapêtaneme Jesucristo, ponê baja cajena athêbêtatsia ponapona pepo bajayatami ata, Dioso daxitacuene mapanacuata pexanaevajênaeya. Paxamê ata papevêjêavimê, imata baja cajena itsabaxuto pacatoyaquinatsi. Tshipaji baja pajamatabêcuenesaêmê Dioso panejumecovênêtsijava. Pacatsijamatabêca baja Dioso pejumelivaisi. Nexata baja dovathi pajamatabêcueneamoneyabame.

¹⁵ Pêtsa pajitsipame mapanacuapijicueneje. Pêtsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemê tsipae Dioso. ¹⁶ Pajamatabêcuene jivi jitsipaeyaexanabiabatsi pibisiacuene pexanaenexa, bajarapajamatabêcuene apo pitsapae Diosojavaverena. Bajarapajamatabêcuene pitsapa mapanacuataje. Pajamatabêcuene ata jivi najamatabêxainaeayaexanabiabatsi penaxainaeabinexa xua itajitsipa, bajarapajamatabêcuene ata pitsapa mapanacuataje. Pajamatabêcuene ata jivi najamatabêxainaeayaexanabiabatsi beayaijamatabêcuenevi penataenexa, bajarapajamatabêcuene ata pitsapa mapanacuataje. Daxita bajarapajamatabêcuene pitsapa mapanacuataje. Bajarapajamatabêcuene apo pitsapae vaxa Diosojavaverena. ¹⁷ Imoxoyo rabaja pevajênae tsaponae pevereverecaenexa mapanacuaje. Nexata daxita pajamatabêcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamona exanavanapa Dioso pitorobicueniatsi, jinavanapaena daxitamatacabijavabelianexa.

Pexaniajailivaisi, penajumetsênêtsilivaisi ata, yabara pelivaisi

¹⁸ Tajamonae, imoxoyo rabaja pevajênae tsaponae pevereverecaenexa mapanacuaje. Pavênêlivaisitaneme rabaja pacuenia najetarucaejitsia ponê cueneitoyatsi Cristo. Pata rabaja cajena ayaibitsaêto, pamona Cristo cueneitoyatsi. Bajarapamonaepatsixae, yapêtanetsi imoxoyo baja pevajênae tsaponae pevereverecaenexa mapanacuaje. ¹⁹ Pamona Cristo cueneitoyatsi, bajarapamonaevaxaitsiyajuvênêvimi picani. Itsiata baja nacavecuapitsapa. Bajarapamonaepacuene apo vaxaitsiyajuvênêvi cajena. Itsa peneta bajarapamonaevaxaitsiyajuvênêvi tsipae, nexata tsitecaeya najinavanapaejitsipa vaxaitsita. Bajaraxuata bajarapamonaenacavecuapona baja. Nexata daxitajivi xaniavaetsia yapêtane bajarapamonaepacuene Dioso apo pejumecovênêtsivicuene.

²⁰ Cristo rabaja pacarajuta Espiritu Santo. Bajaraxuata daxita paxamê payapêtaneme baja pexaniajailivaisi, Dioso pejumelivaisi. ²¹ Pacatoyaquinatsi mapabaxutoje tshipaji baja payapêtaneme pexaniajailivaisicuene Jesu pelivaisi. Nexata apo pacatoyaquinaetsi

matapania patacayapëtaeyaexanaenexa pexaniajailivaisicuene
 Jesús pelivaisi. Tsipaji baja bajaya payapëtaneme bajarapalivaisi
 pexaniajailivaisicuene. Payapëtanemenua baja Jesús pelivaisijavaverena
 acuenebi pepitsapaejava penajumetsënëtsilivaisi. Tsipaji pexaniajaili-
 vaisijavaverena acuenebi pepitsapaejava penajumetsënëtsilivaisi.

²² ¿De jane peneta jumaitsi pepo penajumetsënëtsijivi? Pajivi peneta
 pepo penajumetsënëtsijivi, jumaitsi mapacueniaje: “Jesús raja apo Cristo,
 ponë Dioso athëbëvetsica itorobijitsiatsica vajanacacapanepaenexa,” jai.
 Bajara peneta pejumaitsiijivi, pepo penajumetsënëtsijivi jane baja. Ba-
 jarapajivi Cristo pijavajabitsaëjivi. Bajarapajivi apo jumecovënëtsi
 Dioso. Apo jumecovënëtsinua Dioso pexënato ata. ²³ Pajivi peneta
 jumaitsi: “Jesús raja Dioso apo pexënato,” jai, bajarapajivi Dioso apo
 yjavaponaponatsi. Pajivi pijinia peneta jumaitsi: “Jesús raja Dioso
 pexënato,” jai, bajara jane pajivi Dioso yjavaponaponatsi.

²⁴ Bjaraxuata paxamë baja palivaisi pajumetaneme pane-
 jumecovënëtsijavaverenacujinae, panevajënaeyabelia tsiteca pacaji-
 navanapare. Bajarapalivaisi tsiteca itsa pacatsijamatabëecaena,
 nexata panevajënaeyabelia payajavajinavanapaenama Dioso.
 Payajavajinavanapaenamenua Dioso pexënato ata, Cristo. ²⁵ Jesucristo
 rabaja najumecapanepaeya jumaitsi vajanacarajutsinexa matacabi apo
 peverevereaejava.

²⁶ Pacatoyaquinatsi mapabaxutoje patacayapëtaeyaexanaenexa
 panenayajivitaenexa pamonaë jamatabëpacayamaxëitojoroba.

²⁷ Paxamë rabaja Espiritu Santo pacatsijamatabëeca, ponë
 pacarajuta Jesucristo. Bjaraxuata apo panamatavenonaemë
 baja itsajivi ata papecatsipaebinxaxa paneyapëtaenexa daxitacuene.
 Tsipaji baja daxita xua Espiritu Santo pacayapëtaeyaexanapona,
 pexaniajaicuene baja cajena. Penajumetsënëtsicuene baja cajena
 Espiritu Santo apo pacayapëtaeyaexanapona. Pacuenia Espiritu Santo
 pacayapëtaeyaexanapona, bajarapacuenia pajumecovënëtaponare
 panevajënaeyabelia paneyajavajinavanapaenexa Cristo.

²⁸ Tajamonae, ajamatabëcuenesaëya yjavajinavanapaenatsi
 Cristo. Bajarapacuenia yjavajinavanapaenatsi vajacujunaviyaniva
 pamatacabi bajaraponë patsianica. Nexata apo aura tsanetsi
 bajaraponëjavabelia pamatacabi patsianica. ²⁹ Paxamë rabaja
 payapëtaneme Jesucristo, Dioso pexënatoxae, pexaniacuene
 pexanabiabijava. Nexata bepayapëtaneme mapacuenije. Pamonaë
 peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaëjère vaxa Dioso vajanacaasivacuene. Nacaasiva bitso. Ba-
 jaraxuata Dioso pexicueniatsi nacatane. Xaniajai rabaja. Dioso pex-
 itsi. Mapanacuapijivije Dioso apo peyapëtaexae, nexata bajarapamonae
 vaxaitsi ata apo nacayapëtae Dioso pexicuenetsi. ² Tajamonae bitso
 patacaasivavi, aeconoxae rabaja vaxaitsi daxitatsi Dioso pexitsi. Apo
 yapëtaetsi abaxë pacuenia itsamatacabi vaxaitsi cueneitsijitsiatsi. Itsiata
 Cristo itsamatacabi itsa patsianica, vaxaitsi cuenetaenatsi Cristo pacue-
 nia cueneitsi. Nexata vaxaitsi itsa cuenetaenatsi Cristo, cuenejëpaenatsi.
 Tsipaji cuenetaenatsi pacuenia Cristo cueneitsi. ³ Cristo pibisiacuene

apo pexanaenë caeto ata. Bajaraxuata daxita pamonaē copiaeveta-
vanapa Cristo pepatsijavanexatsica, pevajēnaē tonajamatabēcuene xani-
avaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovēnētsinexa. Pibisiacuene itsa exana, nexata
Dioso pitavetsijava exana. ⁵ Payapētaneme rabaja mapacueneje. Cristo
patsica mapanacuayabetsicaje vajanacavecuaajibiaexanaenexa pibisi-
acuene vajaexanaeconomics. Cristo baja cajena caeto ata pibisiacuene
apo pexanaenë. ⁶ Bajaraxuata pajivi baja Cristo yjavaponapona, pibisi-
acuene apo exanaponapona. Pajivi tsiteca pevajēnaeyabelia pibisi-
acuene exanaponapona, bajarapajivi apo tae baja cajena Cristo. Apo
yapētaenua cajena. ⁷ Tajamonae, pētsa panacopatame itsajivi ata pa-
pecayamaxēitorobinexa. Pajivi exanabiaba pexaniacuene, Dioso pe-
jitsipaecuene, bajarapajivi Dioso aneconijibia tanetsi. Pacuenia Cristo
jamatabēcueneitsi, bajarajamatabēcueneitsi bajarapajivi. ⁸ Pajivi tsiteca
pevajēnaeyabelia pibisiacuene exanaponapona, bajarapajivi dovathi pi-
jajivitonē tsaponapona. Dovathi pibisiacuene pexanaecujinae, apo co-
patsi. Tsiteca pevajēnaeyabelia pibisiacuene exanaponapona mapanacu-
ataje. Bajaraxuata Dioso pexēnato patsica mapanacuayabetsicaje dax-
itajivi dovathi pejamatabēcueneta pibisiacuene pexanabiabijavami pia-
jibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo
exanaponapona. Tsipaji baja Dioso najamatabēcuenerajutatsi. Bajara-
pajivi baja copata pibisiacuene pexanabiabijava. Tsipaji baja Dioso pex-
ijivi exanatsi. ¹⁰ Bajarapacuenia xaniavaetsia yapētanetsi pajivi Dioso
pexijivi exanatsi. Pajivi pijinia dovathi pexijivi exanatsi, yapētanetsi.
Tsipaji pajivi Dioso pexijivi apo exanaetsi, pexaniacuene apo exanae.
Apo asivanua itsamonae ata.

*Pacuenia vaxaitsi namataenetsia benaasivatsi tsavanapae yabara pe-
livaisi*

¹¹ Dioso baja cajena panejumecovēnētsijavaveliacujinae, pajumetaeyabi-
abame pejumaitsilivaisi mapacueniaje: “Vaxaitsi namataenetsia be-
naasivatsi tsavanapae,” pejailivaisi. ¹² Vaxaitsi nexata apo bitoy-
atsi itsamonae ata. Pacuenia bajayatami Caīnpijinē itoya pejuyapi-
jinēmi, bajara apo bitsitsi vaxaitsi. Caīnpijinē dovathi pijajivitonē
tsaponapona. Nexata beyaxuaba pejuyapijinēmi. Pacatsipaebijitsiatsi
pacuene yabara Caīnpijinē beyaxuaba pejuyapijinēmi. Caīnpijinē dovathi
pitorobicueniatsi, pibisiacuene exanaponapona. Pejuyapijinēmi pijinia
pexaniacuene, Dioso pitorobicueniatsi, exanaponapona. Bajaraxuata
Caīnpijinē beyaxuaba pejuyapijinēmi.

¹³ Tajamonae, pētsa pajamatabēcuenenabenajacame paxamē ata
itsa pacaitoya mapanacuapijivije. ¹⁴ Vaxaitsi picanī bajayata Dioso
pitabarata jamatabēcuenetēpavanapatsi. Itsiata baja aeconoxae
Dioso nacajamatabēcueneasaēyaexana vajanajamatabēcuenecopatsixae
bajaraponējavabelia. Yapētanetsi baja cajena Dioso vajanaca-
jamatabēcuene asaēyaexanaejava. Tsipaji itsamonae ata Dioso
vajanajuajumecovēnētsivi, asivatsi tsavanapae. Pajivi apo asiva
itsamonae ata, Dioso penajuajumecovēnētsivi ata, bajarapajivi Dioso
pitabarata jamatabēcuenetēpaponapona. ¹⁵ Pajivi itoya itsajivi, Dioso
penajuajumecovēnētsivi ata, bajarapajivi jamatabēcuenetēpaponapona

jivibenë. Paxamë rabaja payapëtaneme mapacueneje. Jivibenë baja cajena apo xainae tsane matakabi apo pevereverecejava. ¹⁶ Yapëtanetsi baja cajena mapacueneje. Jesucristo vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitsitsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjajitsi. ¹⁷ Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsijava: “Xanë bitso Dioso jitsipajë tajamatabëëthëtöjavavetsina,” pejaijava. ¹⁸ Tajamonae, “Asivanë raja itsamonae ata,” apo bejajitsi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jinavanapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. ²⁰ Dioso baja cajena bitso ayaijamatabëcuenenë. Dioso pepapëtaenë daxitacuene. Bajaraxuata vaxaitsi jamatabëjumaitsi atatsi: “Xanë bitso ajamatabëcuenebejenë pibisiacuene taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. ²² Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavanapatsi pacuenia nacaitoroba. Pacuene yabara Dioso sivajamatabëcuenebarëya, bajarapacuene ata vaxaitsi exanavanapatsinua. ²³ Dioso raja nacaitoroba vajajamatabëjumaitsinexa mapacueneje: “Jesús baja patsica, ponë copiaevetavanapatsi vajanacapanepaenexa. Bajaraponë Dioso baja cajena pexënato,” vajajamatabëjainexa. Nacaitorobanua namataenetsia vajanacayavapanepaenexa. ²⁴ Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaexana pepacuene Dioso vajanacayajavaponaponaejava.

4

Espiritu Santo yabara, Cristo pijavajabitsaë ata, yabara pelivaisi

¹ Tajamonae bitso patacaasivavi, itsamonae itsa pacajumai tsane mapacueniaje: “Espiritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtame. Copiaya abaxë pajamatabëcueneëjëbianame paneyapëtaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabëcueneëjëbianame tsipaji

raja daxitajava mapanacuajavaje yacaējēpa penajumetsēnēsilivaisi petsipaebanajetarubenaevi. Bajarapamonae penajumetsēnēsilivaisi daxitajivijava tsipaebanajetarubena. BeDioso itajara pejumelivaisi petsipaebivicuenia, tsipaebanajetarubena. ² Nexata bajarapacuenia copiaya itsa pajamatabēcueneējēbianame, payapētaename pamonae tsijamatabēecatsi Espíritu Santo. Pamonae raja peneta pepacuenie Espíritu Santo tsijamatabēecatsi, jumaitsi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonae pepacuenie Espíritu Santo tsijamatabēecatsi. ³ Pamonae peneta jumaitsi mapacueniaje: “Jesucristo raja Dioso apo pexēnato,” jai, bajarapamonae cajena apo tsijamatabēecaetsi Espíritu Santo. Bajarapamonae tsijamatabēecatsi ponē cueneitoyatsi Cristo. Ponē baja pavēnēlivaisitaneme pepatsijavanexa, ponē Cristo cueneitoyatsi, bajaraponē pata baja. Ponapona rabaja mapanacuajavaje. ⁴ Tajamonae, paxamē rabaja Dioso papijajivimē. Nexata baja penajumetsēnēsilivaisi papecatsipaebivi, apo pacayamaxēitojorobicapanepae. Apo caējēpaetsi papecayamaxēitojorobijava. Tsipaji ponē pacatsijamatabēeca, bajaraponē bitso piasaēnē, ponē ponapona mapanacuajavaje, matatoxenetsia. ⁵ Pamonae tsipaebapona penajumetsēnēsilivaisi, bajarapamonae saya Dioso apo peyapētaevi. Bajaraxuata mapanacuapijicuenie cacuaicuaijai. Nexata pamonae bitso jitsipa maēpanacuapijicuenieje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapētane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapētane pajivi tsijamatabēecatsi Espíritu Santo. Espíritu Santo baja cajena jivi pexaniajailivaisi petsipaebinē. Bajara pijinia pacuenia nayapētane pajivi ata tsijamatabēecatsi dovathi. Dovathi baja cajena penajumetsēnēsilivaisi jivi petsipaebinē.

Dioso vajanacaasivanē yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabēcuene. Pajivi peneta asiva Dioso penajuajumecovēnētsivi, bajarapajivi Dioso pexijivi. Bajarapajivi yapētane Dioso. ⁸ Pajivi apo asiva itsamonae ata, bajarapajivi apo yapētae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapētaeayaexana mapacueniaje. Dioso athēbēvetsica nacatoitorobica pepo caenē pexēnato mapanacuayabetsicaje. Bajarapacuenia Dioso pexēnato nacatoitorobica matababi apo pevereverecejava vajaxainaenexa pexēnato vajanacasivatēpaexae. ¹⁰ Bajarajamatabēcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexēnato cruzata vajanacasivatēpaenexa. Nexata Jesús vajanacasivatēpaexae, Dioso baja nacavecuajibiaexana daxita pibisiacuene vajaexanaeconimi.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxē Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayajavaponapona. Dioso vajanacatojitsipaecuenia itsamonae ata vajasivanexa,

Dioso nacajamatabëcueneasaëyaexanapona. ¹³ Vaxaitsi yajavajinavana-patsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicue Dioso vajanacayajavaponaponejava. Tsipaji baja Dioso nacarajuta Espíritu Santo. ¹⁴ Vaxaitsi baja cajena tanetsi Dioso pexë nato. Nexata vaxaitsi tsipaebabiabatsi itsamonae-javabelia Dioso pexë nato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵ Pajivi jumaitsi mapacuenia-aje: “Jesús raja Dioso pexë nato,” jai, bajarapajivi Dioso yajavaponapona. Bajarapajivi pijinia Dioso ata yajavaponaponatsi.

¹⁶ Nexata vaxaitsi jamatabëcuenyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonae itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa. ¹⁷ Nexata pacuenia Dioso nacatojitsipa itsamonae ata vajanasivatsavanapaenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacue pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸ Itsa yapëtanetsi Dioso vajanacaasivajava, apo cjunavitsi itsacuenejava ata. Tsipaji Dioso itsa nacaasiva, nacavecuaajibiaexana vajajunavijavami. Pajivi Diosojavabelia naneconita, yapëthane Dioso penaneconitsiaexanaejavanexatsi. Bajaraxuata daxitacuene cjunava. Pajivi cjunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cjunava.

¹⁹ Vaxaitsi Dioso asivatsi tsipaji Dioso copiyaya nacaasiva. ²⁰ Pajivi jumaitsi ata mapacuenia-aje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. ²¹ Pajivi asiva Dioso, bajarapajivi biasiva itsajivi ata, Dioso penajuajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcueneamoneyabatsi yabara pelivaisi

¹ Pajivi jumecovënëta: “Jesús raja Cristo, ponë Dioso athëbëvetsica itorobijitsiatsica vajanacacapanepaenexa,” pejaillivaisi, bajarapajivi Dioso pexijivi exanatsi. Pajivi asiva itsajivi ata, caejivi apo bisiva. Nexata bajarapajivi daxita pexi beyajavaasiva. ² Bajara pijinia pacuenia vaxaitsi ata hexanatsi itsa asivatsi Dioso. Itsa jumecovënëtatsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tsipaji bajarapamonae Dioso pexi exanatsi. ³ Vaxaitsi itsa asivatsi Dioso, nexata pacuenia Dioso nacaitoroba, jumecovënëtatsi. Pacuenia Dioso nacaitorobapona vajatoexanaenexa, apo nacatsitaayapëbeje. ⁴ Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacaëjëpaeyaexanapona vajaexanaenexa pacuenia Dioso

nacaitorobapona. Najamatabëcuene copatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcueneamoneyabaponatsi.⁵ Pajivi jumecovënëta Jesús Dioso pexënatocuene, bajarapajivi caëjêpatsi dovathi pejamatabëcueneamoneyabinexa.

Pacuenia yapëtanetsi Jesús pepacuene Dioso pexënatocuene yabara pelivaisi

⁶ Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espiritu Santo ata nacayapëtaeyaexana Jesucristo pepacuene Dioso pexënatocuene. Espiritu Santo baja cajena pexaniajainë. Nexata Espiritu Santo vajanacayapëtaeyaexanaejava, Jesús Dioso pexënatocuene, bejumecovënëtatsi.⁷ Athëbëtatsia jinavanapa acueyabi ponëbeje, penajamatabëcuenejêpaevi, pevajunupaebivi Jesucristo Dioso pexënatocuene. Pamonae jinavanapa athëbëtatsia, mapamonaeye: Dioso, Jesucristo, Espiritu Santo. Bajarapamonae acueyabi ponëbeje, penajamatabëcuenejêpaevi, caenë rabaja picani tsaponaponae.⁸ Mapanacuata ataje acueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. Yapëtanetsi Espiritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Yapëtanetsinua Jesús cruzata pebeyaxuabijavatsi ata pejamatabëcueneta. Bajarapaacueyabi xuabeje pejamatabëcueneta yapëtanetsi Jesucristo pepacuene Dioso pexënatocuene.⁹ Dioso baja cajena nacayapëtaeyaexana Jesús Dioso pexënatocuene. Mapanacuapijivi ata, itsa nacatsipaeba itsacuenelivaisiyo, nexata jumecovënëtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtatsi xaniaveatsia pacuenia nacatsipaeba. Tsipaji Dioso bitso pejumenamatamsinë. Bitso pexaniajainë.¹⁰ Pajivi jumecovënëta Jesús Dioso pexënatocuene, bajarapajivi pejamatabëëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tsipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene.¹¹ Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matakabi apo peverevereaejava. Nexata Dioso pexënato pejamatabëcueneta xainanatsi matakabi apo peverevereaejava.¹² Pajivi yajavaponaponaena Dioso pexënato, bajarapajivi xainaena matakabi apo peverevereaejava. Pajivi apo yajavaponapona tsane Dioso pexënato, bajarapajivi apo xinae tsane matakabi apo peverevereaejava.

Pacuenia Juan muxujioba pecopatsivajënae baja petoyaquinaelivaisi mapabaxutotaje yabara pelivaisi

¹³ Pacatoyaquinatsi mapalivaisije panejumecovënëtsivi Dioso pexënato. Pacatoyaquinatsi paneyapëtaenexa matakabi apo peverevereaejava panexainaejavanexa.

¹⁴ Yapëtanetsi Dioso vajanacajumetaejava itsa vajëtatsi vajanacatojit-sipaecuena. Bajaraxuata apo jumejunavitsi vajavajëtsinexa Diosojavabelia. Jamatejematsi Dioso pitabarata. ¹⁵ Yapëtanetsi Dioso vajanacajumetaejava itsa vajëtatsi. Nexata yapëtanetsi Dioso vajanacarajutsijavanexa xua vajëtatsi.

¹⁶ Dioso panenajuajumecovënëtsivi itsa pataename pibisiacuene pexanaejava, patovajëtsianame Diosojavabelia, Dioso pejamatabëcuenexaniavaetsinexatsi pibisiacuene pexanaejivi. Bajarapacuena Diosojavabelia patovajëtsianame itsa payapëtaename paneconi yabara abaxë Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacuene jivi Diosovecua naxuabiana. Nexata baja itsa payapëtaename paneconi yabara pepacuene baja bajarapajivi Diosovecua naxuabijitsia, pëtsa patovajëtime Diosojavabelia. Bajarapitsineconi baja pexinaevi panetovajëtsinexa Diosojavabelia, apo pacaitorobitsi. ¹⁷ Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸ Yapëtanetsi baja cajena mapacueneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexënato, Jesucristo, evetatsi bajarapajivi. Nexata dovathi apo itsacueniabitsi.

¹⁹ Yapëtanetsi daxita vaxaitsi Dioso pexicuenetsi. Yapëtanetsinua itsamonae dovathi pitorobabiabijavatsi pibisiacuene pexanaenexa.

²⁰ Yapëtanetsinua baja Dioso pexënato, Jesucristo, athëbëvetsica pepat-sijavatsica. Patsica vajanacajamatabëcuene yapëtaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexënato, Jesucristo. Bajaraponë ata pepo Dioso baja cajena, vajanacarajutsinënexa matacabi apo pevereverecaejava. ²¹ Tajamonae, panayajiviitavere papecatsipaebiyaniya palivaisi tsipaebapona pamonaе vajëcabiaba jumapecataeya pexanaenëanëjavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonënë, pacatoyaquinatsi mapabaxutoje Dioso peccaitapetsiva, nexi yajava. Xanë bitso pacaasivatsi. Itsamonae ata, pamonaе jumecovënëta Dioso pejumelivaisi, bajarapamonae ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenonabiabinexa, papeccaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcuenebarëyanë itsa caxitajarabaxuabajë nexiyajuvënëvi, pejumecovënëtavanapaevi pacuenia vaxa Dioso nacaitoroba. ⁵ Tajabanava, aeconoxae catsipaebatsi namataenetsia vajasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavanapatsi. Bajarapalivaisi papeccatsipaebijavaveliacujinae, pacaitoroba baja cajena namataenetsia panenasivatsavanapaenexa.

Penajumetsënëtsilivaisi daxitanacuanëjava petsipaebanajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaevi peyamaxëitojorobivi baja cajena. Bajarapamonae Cristo pijavajabitsaë. ⁸ Panayajivitaevanapare papecavecuaxuabiyanova xua pasivanacuenebavanapame Dioso papeccarajutsinexa. Bajarapacuenia panayajivitaevanapare Dioso papeccarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponaetsi. ¹⁰ Nexata bajarapitsijivi itsa pona paxamëjavabelia livaisi papeccatsipaebinexa, pëtsa pacajunuame panijaboyaberena. Pëtsa pabajacobamenua bajarapitsijivi. ¹¹ Pajivi bajacobijitsipa bajarapitsijivi, jamatabëcueneyavenonaëjitsipa pibisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujiobinexa. Itsiata abaxë apo jitsipañë bajarapalivaisi patacatoyaquinaenexa mapabaxutotaje. Evetajë abaxë taponaejava paxamëjavabelia patacataenexa, patacabarëcuaicuaijainexanua, vajajamatabëcuenebarëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënënë yabara pelivaisi

¹ Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtime.

² Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë.

³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenebarëyatsi.

⁴ Pamonaes tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtanapapajava, nexata bitso sivajamatabëcuenebarëyanë tsabiabi. Itsacuenejava ata pematatsënëa bajarapacuenia apo nejamatabëcuenebarëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname.

⁶ Pamonaes Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane.

⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonaes Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacetane bajarapamonaeta Dioso pijacuene bevajatonanacuenebivi.

Pacuenia Diótréfes pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótréfes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa.

¹⁰ Bajaraxuata itsa patsianajë xamëjavata, catsipaebianatsi daxita pacuenia Diótréfes exana. Bajaraponë pibisiacuene tanebaracuaicuaijajava, taneyabaranajumetsënëtsijava ata, catsipaebianatsi. Itsacuenejavanënu pematatsënëa pibisiacuene exanabiaba. Diótréfes apo copiapitabiabi xaniavaetsia pamonaes Dioso pejumecovënëtsivi. Itsamonae ata itaveta pecopiapitsiyanima pepatsivi.

Nexata picani pamonae Diótfrefes itaveta, itsiata copiapitabiaba Dioso pejumecovênëtsivi. Nexata pamonae Diótfrefes itavetsi ata, itsiata copiapitabiaba, bajarapamonae Diótfrefes jamatabêvecuacapitsapa Dioso pejumecovênëtsivi penacaetuatsibovecua bajarapamonae pematatsënëa penajoneyaniva bajarapabota.

¹¹ Gayo, pëtsa exanaponaponame pacuenia pibisiajamatabêcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuenia Demetrio vênëlivaisipaebatsi pexaniacuene pexanaponaponaejava. Espíritu Santo baja cajena pexaniajailivaisi jivi peyapëtaeyaexanaenë. Nexata Espíritu Santo jivi yapëtaeyaexanaponatsi pexaniacuene Demetrio pexanaponaponaejava. Paxanë ata baja cajena payapëtaniji Demetrio pexaniacuene pexanaponaponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujibinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. ¹⁴ Tsipaji jamatabëcatanetsi bepíjia. Nexata abaxë tajacuata cabarëcuacuajajitsi tsane.

¹⁵ Catovajëtatsi Diosojavabelia pecayavenonaenexa jamatabêcuenexanepanaeya neponaponaeenexa. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecayajavaponaponaexae. ² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi

(2 Pe 2.1-7)

³ Tajamonae bitso patacaasivavi, jamatabëpacatoyaquinatsi picani matavëjêa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsiyaniva bajarapamonae papecatsipaebilivaisi. Tshipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. ⁴ Tshipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

⁵ Payapëtaneme rabaja mapacueneye. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacuenene, itsiata jitsipajë panenajamatabënapitsinexa icatsia bajarapacuenene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tshipaji bajarapamonae apo jumecovënëtsitsi. ⁶ Panajamatabënapirenuu pacuenia Dioso exana ángelevijavabelia ata. Ángelevi Dioso tonacuenebavanapa

athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapaenua itsajota picani Dioso tocopata pejinavana-paenexa. Bajaraxuata Dioso angeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota angelevi copiaevetavana-paeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamona naneconita Dioso javabelia, bajarapamatacabi Dioso bajarpaängelevi ata naneconitsiaexanaena daxitamatacabijavabelianexa.

⁷ Panajamatabënapirenuua Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua angelevi ata. Bajarapamonaemi pevitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamona cotocaevi jinavanapa mapamatacabitaje, peyapëtaenexa. Nexata bajarapamonaemi ata pibisiacuene pexanaeyaniva, apo pevereverecaesitojavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanae ata pamonaemi bajayata pibisiacuene exanavanapa, itsiata pamona penajumetsënëtsilivaisi pacatsipaebavanapa, apo cansajëtsi Dioso penaneconitsiaexanaejavanexatsi. Pamona penajumetsënëtsilivaisi pacatsipaebavanapa, pibisiacuene exanabiaba. Bajarapamonaemi pina majitsinaebota tane papibisiacuene bajarapamonaemi exanaejitsia. Bajaraxuata nexata bajarapamonaemi pibisiacuene exanabiaba pevitota. Apo jumecovënëtsi pacuenia Dioso itorobatsi. Dioso pijaängelevi ata bajarapamonaemi pibisiacuena baracuaicuaijai tsabiabi.

⁹ Angelnë Miguel, angelevi penamatacaitorobinë. Angelnë Miguel bitso ayaijamatabëcuenenë ata, yayiatane dovathi. Pibisiacuenia apo baracuaicuaijai. Apo bijataenua. Bajayata Moiséspijinë petëpanucaenë jamatabëpitatsi picani dovathi. Nexata angelnë Miguel apo copatsi Moiséspijinë dovathi pepitsinexatsi. Nexata dovathibeje, angelnë Miguelbeje, najumenotabeje Moiséspijinëmi yabara. Itsiata bajarajota angelnë Miguel pibisiacuenia apo bijata dovathi. Saya xaniavaetsia angelnë Miguel jumaitsi dovathijavabelia: “Dioso raja cabijataena,” jai. ¹⁰ Itsiata baitsi jane pamona penajumetsënëtsilivaisi pacatsipaebavanapa, xaniavaetsia angelevi apo tae ata, apo yapëtae atanua, pibisiacuenia baracuaicuaijai tsabiabi. Nexata pacuenia unupijidujuai apo cujarubi atatsi, itsiata pijacuata yapëtae pexanaejavanexa, bajara pijinia pacuenia bajarapamonaemi ata saya pijacuata yapëtae mapanacuapijicuene pexanaenexa. Nexata exanavanapa pibisiacuene pacuenia jamatabëexana. Nexata itsamatacabi Dioso verebiabiana bajarapamonaemi bajarapapibisiacuene pexanaexae.

¹¹ Bitso bejiobi tsane pamona penajumetsënëtsilivaisi pacatsipaebavanapa! Bajarapamonaemi Dioso naneconitsiaexanaena. Tsipaji pacuenia bajayata Caínpijinë jamatabëcuenetsi, bajarapamonaemi ata jamatabëcuenetsi tsavanapae. Bajayata Caínpijinë pibisiacuene exanaponapona pacuenia jamatabëexana. Pacuenia bajayata Balaampi-

jinē ata jamatabēcueneitsi, bajarajamatabēcueneitsi tsavanapae pamonae penajumetsēnētsilivaisi pacatsipaebavanapa. Bajayata Balaampijinē Dioso apo jumecovēnētsi pacuenia itorobatsi. Balaampijinē palata pepitsinexa, jivi matacapona pibisiacuene pexanaenexa. Pacuenia bajayata Corépijinē ata jamatabēcueneitsi, bajara jamatabēcueneitsi tsavanapae pamonae penajumetsēnētsilivaisi pacatsipaebavanapa. Bajayata Corépijinē apo jumecovēnētsi pacuenia Moiséspijinē itorobatsi. Nexata Corépijinē beyaxuabatsi Dioso. Bajara pijinia pacuenia pamonae penajumetsēnētsilivaisi pacatsipaebavanapa, pibisiacuene pexanaexae, nexata Dioso verebiabiana bajarapamonae. ¹² Pamonae penajumetsēnētsilivaisi pacatsipaebavanapa, payajavanacaetuatabiabame itsa panacaetuatabiabame panenabaninexa. Paxamē panacaetuatabiabame namataenetsia panenasivaxae. Nexata bajarapamonae nājoneyabiaba panenacaetuatsijavata. Bajarapamonae pibisiacuene pexanabiabixae, bepiauxuirajava paxamē tuatujēta. Bajarapamonae aurajibia ayaijava xaeyabiaba. Petocopatsinexa itsamonae ata penaxaenexa, apo najamatabēxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Ēpamonae saya naeveta. Bajarapamonae pexanaejava, itsacuenejavayonexa ata apo xanepanae. Yapētanetsi pacuenia itsi vaita. Vaita itarērēbo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi totsaquenae atatsi, apo jamatabēcuenejavayonae. Bajara saya jamatabēcueneitsi tsavanapae pamonae penajumetsēnētsilivaisi pacatsipaebavanapa. Tsipaji apo jamatabēcuenejavayonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae apo xanepanae itsacuenejavayonexa ata. Bajara saya jamatabēcueneitsi tsavanapae pamonae penajumetsēnētsilivaisi pacatsipaebavanapa. Tsipaji apo jamatabēcuenejavayonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae peubinē yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonae penajumetsēnētsilivaisi pacatsipaebavanapa pibisiacuene pexanabiabixae. Nexata bajarapamonae Dioso xubianatsi infernojavabelia. ¹³ Pacuenia malataca caecovēta apo rucae, caponanua piaxuirapērē pitapayabelia, bajara saya jamatabēcueneitsi tsavanapae pamonae penajumetsēnētsilivaisi pacatsipaebavanapa. Caejamatabēcuene apo xainabiabi. Bajarapamonae piauracuene pexanabiabixae, nexata bepiauxuirajava paxamē tuatujēta. Bajarapamonae pejamatabēcueneta jamatabēcuenebijianabiaba itsamonae Dioso pejumecovēnētsivi. Pacuenia athēbēvetsica tulupu othopaena peverececaenexa, bajara pijinia pacuenia bajarapamonae ata vereverececaena. Diosovecua naxuabiana. Tsipaji copaba pejumecovēnētsijavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pitaquirinacuata jinavanapaena daxitamatacabijavabelianexa.

¹⁴ Enocpijinē bajayata ponapona. Bajaraponēmi Adánpijinē pemomoxiyajuvēnēnē. Nexata Enocpijinē Dioso pejamatabēcueneta bajayata tajēvelia vajunupaeba, pamonae aeconoxae mapamatacabitaje penajumetsēnētsilivaisi pacatsipaebavanapa. Enocpijinē baja cajena bajayata tajēvelia bajarapamonae yabara jumaitsi mapacueniaje: “Va-

jatuxanenë Cristo, pijajivi ángelevi, ayaibitsaëtoxaneto yajava, najetarucaena. ¹⁵ Najetarucaena penaneconitsiaexanaenexa daxita pamonaee apo exanae Dioso pitorobcueniatsi. Najetarucaena penaneconitsiaexanaenexanua daxita pamonaee pibisiacuenia baracuaicuajijai Dioso,” jai baja cajena bajayata tajëvelia Enocpijinë. ¹⁶ Pamonaee penajumetsënëtsilivaisi pacatsipaebavanapa, apo sivajamatabëcuenebarëya it-sacuenejavayo ata. Nexata pibisiacuenia baracuaicuajijai tsabiabi daxita xua bajarapamonae tocopiapataponatsi. Apo jumecovënëtsi pacuenia Dioso itorobatsi. Nexata bajarapamonae exanavanapa pijacuata penatojitsipaecuenia. Bajarapamonae ayaijamatabëcuenevi nataeya navajunupaebabiaba xua exana. Itsamonaejavabelia itsa cuaicuajijai, pexaniacuenia cuaicuajijai tsabiabi. Bajarapacuenia pexaniacuenia cuaicuajijai tsabiabi saya pebarëyataenexatsi, perajutsinexatsinua penamatavenonaeejavané.

Pacuenia Dioso pejumecovënëtsivi muxujibatsi pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi

¹⁷ Tajamonae bitso patacaasivavi, panajamatabënapire pacuenia baja cajena tajëvelia pacatsipaeba apóstolevi, vajatuxanenë Jesucristo pijajivi. Apóstolevi baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa. ¹⁸ Apóstolevi baja cajena tajëvelia pacajumaitsi mapacueniaje: “Nacua pecopiarucaevajënaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuenie, pacuenia pijacuata natojitsipa,” pacajai baja cajena tajëvelia apóstolevi. ¹⁹ Pamonaee penajumetsënëtsilivaisi pacatsipaebavanapa, bajarapamonae papecatsipaebilivaisita, Dioso panejumecovënëtsivi pacanavecuanatsanaeyaexanapona. Bajarapamonae saya najamatabëxaina ëmapanacuapijijamatabëcueneje. Nexata pibisiacuenie exanavanapa pacuenia pijacuata natojitsipa. Bajarapamonae Espíritu Santo apo tsijamatabëecaetsi.

²⁰ Tajamonae bitso patacaasivavi, asaëyata Dioso pajumecovënëtavanapare. Pacuenia Espíritu Santo pacaitoroba, pavajëtabiabarë Diosojavabelia. ²¹ Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuenie paneexanaeyaniva. Bajayajebi pacopatsinejevamë, pacopiaevetavanapare matacabi apo pevereverecejava papecarajutsinexa vajatuxanenë papecaitaxutotsoniataexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeaebapona. Bajarapitsivi payavenonare xaniavaetsia pejumecovënëtsinexa bajarapalivaisi. ²³ Bajarapamonae isotojavabelia bepejopaevinexa. Tsipaji pibisiacueniejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuenie exanavanapa. Bajarapapibisiacuenie paitoyamëre. Bajarapamonae itsiata paitaxutobejiobiataema. Payavenonaponare bajarapapibisiacuenie pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuenie panaexaname.

Pacuenia apóstolenë Judas itoroba daxita Dioso pejumecovënëtsivi: “Dioso, bitso ayaijamatabëcuenenëmë,” pejainexa Diosojavabelia yabara pelivaisi

²⁴Dioso caējēpatsi papecaevetsinexa pibisiacuene paneexanaeyaniva. Nexata pamatacabi Dioso naneconitsiaexanaena daxita pijaneconi pexainaeivi, paxamē ata pacanubenaeyaexanaena bajaraponē Dioso, penivenivenaecotia pexainaeñē, pitabarata. Itsiata baitsi jane paxamē paneconijibimē tsane. Bitso pabarēyamē tsane. ²⁵Bजारaponē pepo caenē Dioso. Bजारaponē Dioso nacacapanepaena vajatuxanenē Jesucristo cruzata vajanacasivatēpaexae vajaneconi yabara. Bजारaxuata daxitajivi bejumaitsi Diosojavabelia: “Diosomē, bitso ayaijamatabēcuenenēmē,” bejai. Betsipaebaponanua itsamonaejavabelia Dioso bitso ayaijamatabēcuene pexainaeñēcuene. Dioso cajena daxitanacua pevetsinē. Betsipaebaponanua itsamonaejavabelia Dioso pecaējēpaejavatsi pevetsinexa daxitajivi. Bजारapacuenia Dioso jamatabēcueneitsi tsaponaponae mapanacuaje pexanaevajēnaeya, mapamatacabi ataje, daxitamatacabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë. ² Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

³ Pajivi tsmuxulebiana mapabaxutoje Dioso pejumecovënëtsivi penacatuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabejepijivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecayavenonaenexanua. ⁵ Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja namataxainaeya Dioso asaëyaexanatsi petëpaejavavecua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuajibiaexana daxita pibisiacuene vajaexanaeconimi. ⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabinexa. Nexata vaxaitsi daxitamatacabijavabelianexa ayajamatabëcuene rajutabiabianatsi Jesúsjavabelia. ¡Apo vereverecea tsane Jesús daxitacuene pevetsijava! Bajara itsi tsane.

7 ¡Panenamuxunaevere mapalivaisije! Cristo raja najetarucaena athëbëvetsica itarëëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yencacuatatsi, bajarapamonaë ata taenatsi. Daxita nacuanëpïjivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

8 Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtsi yabara pelivaisi

9 Xanë Juannë, panijabananënë. Tsipaji najujumecovënëtavanapatsi Jesucristo. Nexata pacuenia paxamë ata itsamonae pacabejiochiaexanapona Dioso papijajivixaemë, bajara pijinia pacuenia xanë ata itsamonae nebejiochiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaexae, pacaasaemë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. ¹⁰ Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji. ¹¹ Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejipijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tataenexa ponë tapënëverena nebarëcuaicuaijai. Nexata taenubajë sietë xuabeje orota pexanaejavanë. Bajaraxuanë pematatuta naitayotanubena. ¹³ Bajaraxuanë petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorbëcëtanuca orota pexanaepana. ¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. ¹⁵ Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banajumeta jonca. ¹⁶ Pecujanenia cobenanuca sietë patuluputobeje. Pecuibuatsina pitsapa anijabarëneniabeje pexiujaiespada. Pacuenia matacabipijijuameto itsa aitavajënae, xaniavaetsia baitayota, bajarapacuenia itabaranaitayota.

¹⁷Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxu-abinë. Daxitacuene icatsia tacopiarucaeyaexanaenënexa. ¹⁸Xanë rajane baja pepo tasaëtsaponaponanë daxitamatacabijavabelianexa. Xanë picani tēpajë. Itsiata baitsi jane icatsia asaënë tatēpaecujinae. Nexata baja asaënë tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infernojavabelia. Netocopatanua tananeconitsiaexanaenexa pijaneconi pexinaevi peponaenexa infernojavabelia. ¹⁹Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. ²⁰Xuanë, siete patuluputobeje, tacujuanenia cobenanucajë, mapajamatabëcuenelivaisi xainajë. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainajë. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenu-tajë, siete xuabeje orota pexanaejavanë tuatujëta penucaenë.

2

Pacuenia Juan vajatuxanenë Jesús itorobatsi petoyaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi

¹Jesús icatsia nejumaitsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujanenia cobenanuca, siete xuabeje orota pexanaejavanë pematatuta penaitayotanubenaejavanë tuatujëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ²“Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaejava. Yapëtanijinua panacueneataejitsibijava pibisiacuene pexanaevi. Yapëtanijinua nayajivitaeya panejinavanapaejava itsamonae papecaya-maxëitojorobianiva. Itsamonae picani papecayamaxëitojorobinexa, pacajumai tsabiabi: ‘Paxanë raja paapóstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae. ³Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panenacuenebavanapaexae, pacasivajamatabëbarëyatsi. ⁴Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata copiaya panejitsipame. ⁵Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia pacuenia bajayata xaniavaetsia

panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane. ⁶ Itsiata baitsi jane pacasivajamatabëcuenebarëyatsi patanejamatabëcuenejêpaexaemë mapacueneyabaraje. Pacujiruitoyamë nicolaïtavi pibisiacuene pexanaponaejava. Bajaraxua pexanaejava xanë ata cujiruitoyanë. ⁷ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia. Jumaiti mapacueniaje: ‘Pajivi Cristo jumecovënëtaaponapona êpetêpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espiritu Santo,” pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

⁸ Jesús icatsia nejumaiti:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tëpa. Itsiata baitsi jane icatsia asaë petêpacujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitisilivaisije: ⁹ “Yapëtaniji daxita xua paexanavanapame. Yapëtanijinua itsamonae pacabejiobiaexanaponaejava. Yapëtanijinua bepanejioibiviciene. Itsiata baitsi jane itsamatacabi Diosojavatatsia bitso panexainaeivi tsane. Yapëtanijinua pibisiacuena papecabaracuaicuaijajava judíovi, Dioso apo pejumecovënëtsivi. Bajarapamonae cajena saya dovathi pijajivi. ¹⁰ Pëtsa pacujunavame itsamonae, pacabejiobiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenejêbinexa, papecajamatabëcueneyapëtaenexa xaniajai pepacuene patanejumecovënëtsijavamë. Pacabejiobiaexanaponaena diez pamatacabibeje. Bajarapacuenia pacaexanae ata tsanë, itsiata panejumecovënëtsianame matapania panetêpaejavabelianexa. Nexata xanë pacarajutsianatsi matakabi apo peverevereaejava. ¹¹ Itsa pamuxuvojorubename, panatojumetaema jucuenia Espiritu Santo jumaiti Dioso pejumecovënëtsivijavabelia. Jumaiti mapacueniaje: ‘Pajivi Cristo jumecovënëtaaponapona êpetêpaejavabelianexa, bajarapajivi apo itsacueniabi tsanetsi cotocaeivi patêpaejava,’ jai Espiritu Santo,” pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi

¹² Jesús icatsia nejumaiti:

—Pérgamo tomarata peecaenë, Dioso pejumecovënétavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaiespada.

Jesús nitoroba Pérgamo tomarata peecaenë, Dioso pejumecovënétavanapaevi penamatacaitorobinëjavabelia, tatoyaquinaenexa mapejumaitsilivaisije: ¹³ “Yapëtaniji daxita xua paexanavanapame. Yapëtanijinua dovathi pijajivi tuatujëta panejinavanapaejava. Itsiata baitsi jane pajamatabëcuenesaëmë tsavanapae patanejumecovënétavanapaejavamë. Bajayata Antipaspijinë tajumelivaisi jivijavabelia tsipaebabiaba. Nexata Antipaspijinë paxamë tuatujëta dovathi pijajivi pebeyaxuabijavatsi, patae atamë, itsiata apo pacopatsimë patanejumecovënétavanapaejavamë. Bajarapacuenia patanejumecovënétavanapaexaëmë, pacasivajamatabëcuenebarëyatsi. ¹⁴ Itsiata baitsi jane itsajamatabëcuenejavaxi yabara pananeconitame xanëjavaberena. Bajarajota Pérgamo tomarata paxamëyajuvënëvi muxubijiapenetapona itsamonae pibisiacuene pexanaenexa. Bajayata Balaampijinëmi jivi peyamaxëitojorobabiabinëmi ponapona. Nexata Israelpijinë pemomoxi penaneconitsinexa Diosojavabelia, Balaampijinëmi itoroba Balacpijinëmi pemuxubijiapenetaponaenexa Israelpijinë pemomoxijavabelia. Nexata Balacpijinëmi muxubijiapeneta Israelpijinë pemomoxi penaponaenexa fiestajavabelia. Nexata fiestajavata itsamonae dajubinë itsa beyaxuaba, jumapecataeya pexanaenëanëjavabelia ofrendacuenia perajutsiyajuvënëvi naxane Israelpijinë pemomoxi. Balacpijinëmi muxubijiapenetanua Israelpijinë pemomoxi pibisiacuene pexanaenexa pevitota. Bajara pijinia pacuenia aeconoxae paxamëyajuvënëvi ata exanapona. Pérgamo tomarapijivi pibisiacuene pexanaenexa, muxubijiapenetapona. ¹⁵ Itsamonae pijinia paxamëyajuvënëvi nicolaítavi petsipaebaponaelivaisi jumecovënétavanapa. Nexata tanejumecovënëtsivi pibisiacuene pexanaenexa, bajarapamonae muxubijiapenetapona. ¹⁶ Bajaraxuata paxamë xaniavaetsia panajamatabëcuenepeñëyorore Diosojavabelia. Itsa jume, xanë nexata naxanitsiayo ponaenajë paxamëjavabereca tabarënenenexa bajarapamonae tacuibuatsina pepitsapaeespadata. ¹⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënétaponapona ëpetëpaejavabelianexa, bajarapajivi rajutsianajë pexaenexa manávënëjava, athëbëpijijava, pejamatabëcuene asaëyaexanaejavanexatsi. Rajutsianajënu penioponaeboto. Bajarapai-boto pijumata bajarapajivi vënërutsianajë pejanavënë. Itsajivi ata apo vënëyapëtae tsanetsi. Caejivi, bajarapai-boto pepitsijivi, navënëyapëtaena,’ jai Espíritu Santo,” pejailivaisi toyaquinare Pérgamo tomarata peecaenë, Dioso pejumecovënétavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Tiatira tomarata Dioso pejumecovënétavanapaevi penamatacaitorobinëjavabelia yabara pelivaisi

¹⁸ Jesús icatsia nejumaitsi:

—Tiatira tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Dioso pexēnato, ponē pitaxutobeje naitayota. Pacuenia isotocotia bacotia itsi, bajara pitaxutocotiaitsinē, ponē petaxubebenivenivena ata pacuenia banivenivena broncevēnējava pesetsijava, beoronanitomi.

Jesús nitoroba Tiatira tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: ¹⁹ “Yapētaniji daxita xua paexanavanapame. Yapētanijinua itsamonae ata paneasivatsavanapaejava. Yapētanijinua patanesivanajamatabēcuene copatavanapaejavamē. Yapētanijinua panetonacuenebijava Dioso. Yapētanijinua paneajamatabēcuenesaē tsavanapaejava, itsamonae pacaitsacueniababiabi ata. Yapētanijinua pacuenia panetonacuenebavanapame pamatacabi ajena panejumecovēnētame. Yapētanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaxae pacasivajamatabēbarēyatsi. ²⁰ Itsiata baitsi jane itsajamatabēcueneyo yabara pananeconitame xanējavaberena. Tsipaji apo pacujiruitavetsimē Jezabelvēnēva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimē bajarapova pacayajuvēnyamaxēitorobapona baja. Bajarapova papeyayajuvēnyamaxēitorobinexa jumai tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanē jaitsi ata pamonavecua, itsiata apo itsacuene. Bajara pijinia itsi pevi ata. Dajubinē itsa beyaxuaba ofrendacuenia pevi perajutsinexa jumapecataeya pexanaenēanējavabelia, bajarapaviyajuvēnējava xae atatsi, itsiata apo itsacuene,’ jai tsabiabi bajarapova patajajivimē papeyayajuvēnyamaxēitorobinexa. ²¹ Bajarapova picani pecopatsijava pibisiacuene pexanabiabijavavecua, bajayajebi evetaponaponajē. Itsiata baitsi jane apo jamatabēcopatsi pevitota pibisiacuene pexanabiabijava. Apo najamatabēcuenepeñēyorotsi xanējavaberena. ²² Bajarapova nexata avitaniaexanaenajē camata pebobocaenexa. Nexata pamonae paxamēyajuvēnēvi itsa apo copatsi tsane bajarapova pitorobicueniatsi pexanavanapaejava, pamatabēxēyo pevitota pibisiacuene exana bajarapova pitorobicueniatsi, nexata bajarapamonae ata bitso nabejibitsiaexanaenajē. ²³ Bajarapova pexi ata verebianajē. Nexata daxita Dioso pejumecovēnētsivi nejamatabēcueneyapētaena. Nejamatabēcueneyapētaena daxitajivi bēpēnēa pejamatabēēthētota, penajamatabēxainaecuene ata, tayapētaenēcuene. Pacaejivimē canacujitsia xuavajēto panetonacuenebavanapame, bajara pijinia pitsijavavajēto pacarajutsianatsi. Xuavajēto pijinia panijaneconi paxainame, bajara pijinia paneconivajētota pacananeconitsiaexanaponaenatsi. ²⁴ Paxamē apo panejumecovēnētsivi, Jezabel pacaitorobi ata pibisiacuene picani paneexanaenexa, mapacuenia pacajumaitssijsije. Paxamē apo pajumecovēnētsimē dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevajēnaeyabelia peyapētaeyaexanaponaenexa. Bajaraxuata apo pacaitorobitsi panejumecovēnētsinexa pematatsēnēa itsalivaisi, piyapēbejelivaisi. ²⁵ Nexata pacaasaēmēre tsavanapae panejumecovēnētsijava Dioso pejumelivaisi matapania ētapatsimatacabitsica

javabelianexa. ²⁶ Itsamonae èpetèpaejavabelianexa, catsitecavanapaena tanesivanajamatabècuene copatavanapaejava. Tajitsipaecueene ata netoexanavanapaena. Bajarapamonae itsamatacabi tocopatsianajè pevetsinexa daxitanacuapijivi. ²⁷ Bajarapamonae itsamatacabi daxitanacuapijivi itsa evetsiana, ajumesaèya itorobabiabiana pejumecovènètsinexatsi. Pacuenia xanè ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajè. Pacuenia atsananito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamonaè Dioso apo pejumecovènètsivi. Tajajivi verebiabiana daxita Dioso apo pejumecovènètsivi. ²⁸ Pamonaè tajajivi, rajutsianajè pexainaenexa papiniijcotia xainajè ayaijamatabècuenevinexa. ²⁹ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovènètsivijavabelia, pejailivaisi toyaquinare Tiatira tomarata peecaenè, Dioso pejumecovènètavanapaevi penamatacaitorobinèjavabelia, nejai Jesús, siete xuabeje orota pexanaejavanè tuatujèta penucaenè.

3

Pacuenia Juan vajatuxanenè Jesús itorobatsi petoyaquinaenexa Sardis tomarata Dioso pejumecovènètavanapaevi penamatacaitorobinèjavabelia yabara pelivaisi

¹ Jesús icatsia nejumaitsi:

—Sardis tomarata peecaenè, Dioso pejumecovènètavanapaevi penamatacaitorobinèjavabelia, toyaquinare pijajivi yajava peyapètaenexa mapalivaisije, nejai Jesús, ponè xaina siete paespíritubeje, Dioso pijaespíritu, ponè cobenanuca siete patuluputobeje.

Jesús nitoroba Sardis tomarata peecaenè, Dioso pejumecovènètavanapaevi penamatacaitorobinèjavabelia, tatoyaquinaenexa mapejumaitsilivaisije: “Yapètaniji daxita xua paexanavanapame. Yapètanijinua itsamonae papecasivajamatabèjumai tsabiabijava: ‘Bajarapamonae hitso tonacuenebavanapa Dioso pijacuene,’ papecasivajamatabèjai tsabiabijava. Itsiata baitsi jane xanè yapètaniji pibisiacuene paneexanaejava. Yapètanijinua bèpènèa panejamatabècuenefaefaenaejava patanejumecovènètsijavamè.

² Nexata namataenetsia panajamatabècueneasaèyaexanare. Panajamatabècueneitsamonae papecasivajamatabèjumai tsabiabijava: ‘Bajarapamonae hitso tonacuenebavanapa Dioso pijacuene,’ papecasivajamatabèjai tsabiabijava. Itsiata baitsi jane xanè yapètaniji pibisiacuesaèya exanaenamenua itsamonae ata, pamonaè pijinia jamatabècuenefaefaenapona tanejumecovènètsijava. Tsipaji baja bajarapamonae imoxo pecopatsi tanejumecovènètsijavami. Xua paexanavanapame, bajaraxua picani paxamè pacatsitapexaniacuene. Itsiata baitsi jane bajaraxua Dioso apo tsitapexaniacuentsi.

³ Panajamatabènapire palivaisi baja copiaya itsamonae pacatsipaeba xanè patacapanepaejavanexa yabara. Pacaasaèmère tsavanapae bajarapalivaisi panejumecovènètavanapaejava. Pacopabare pibisiacuene paneexanabiabijava. Panajamatabècuenepeñèyorore Diosojavabelia. Namataenetsia itsa apo panajamatabècueneasaèyaexanaemè tsane patanejumecovènètsijavamè, nexata jemata patsiarecajè

patacananeconitsiaexanaenexa. Apo payapëtaemë tsane paepatota patsijitsianëreca. Tsipaji paepatota apo panejamatabënajinaemë, jemata patsiarecajë. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itsinë tsane. ⁴ Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamonaevi apo toxuiratsi penaxatabijavanë, bajara pijinia jamatabëcueneitsi tsavanapae bajarapamonaevi Dioso pitabarata aneconijibia pejinavanapaexae. Itsamatacabi bajarapamonaevi xanëjavata jinavanapaena. Bajarapamonaevi itsamatacabi xanëjavata itsa jinavanapaena, planeconijibixae, naxatabiana penioponaevajanë. ⁵ Pamonaevi nejumecovënëtavanapaena epetëpaejavabelianexa, bajarapamonaevi naxatabiana penioponaevajanë. Bajarapamonaevi apo vënëiquinaenë tsane pabaxutota vënërübena pamonaevi matacabi apo pevereverecaejava pexainaevinexa. Biji rajane pamonaevi tajajivi, vënëyapëtaeyaexanaponaenajë taxajavabelia, taxa pijaängelevijavabelia ata. ⁶ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaevajanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanapaevi penamatacaitorobinëjavabelia yabara pelivaisi

⁷ Jesús icatsia nejumaitsi:

—Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë planeconijibinë, ponë copiaevetavanapatsi icatsia pepatsijavanexatsica vajanacacapanepaenexa.

Pacuenia bajayata Davidpijinë eveta Israelnacia, bajara pijinia pacuenia Jesús evetsiana mapanacuaje. Evetsiana athëbëtatsia ata, Dioso pijanacia. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubena Diosojavabelia pecapanepaelivaisinexatsi. Nexata itsajivi ata apo caëjëpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubenaevi tsane. Nexata itsajivi ata apo caëjëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ⁸ “Yapëtaniji daxita xua paexanavanapame. Apo pasaemë. Itsiata panejumecovënëtavanapame. Apo panayavajunuaxainaemë patajajivicuenemë. Bajaraxuata paca-tocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo caëjëpaetsi tsane papecacopatsiaexanaenexa

talivaisi jivi panetsipaebaponaejava. ⁹ Panejumetaema. Itsamonae rabaja judiovi ata, dovathi pijajivi. Tsipaji apo nejumecovënëtsi. Bajarapamonaie jamatabëcuenenavëxaniabiaya jumai tsabiabi: ‘Paxanë raja pajudiovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tsipaji apo nejumecovënëtsi. Bajarapamonaie itsamatacabi paneitabarata pematabacabëta pacatonubenaeyaexanaenatsi. Nexata bajarapamonaie yapëtaena paxamë patacaasivacuene. ¹⁰ Pacaitorobatsi patanejumecovënëtsijavamë bajayajebi panecasaëtsavanapaenexa. Nexata baja bajarapacuenia panejumecovënëtavanapame. Bajaraxuata nexata pamatacabi daxitanacuapijivi piayaicuene taeponaena, paxamë pacaevetsianatsi. Nexata paxamë apo pacaitsacueniabi tsane. ¹¹ Naxanitsiayo rabaja ponaenajë paxamëjavabereca. Xaniavaetsia baja pacaasaëmëre tsavanapae patanejumecovënëtavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. ¹² Pamonaie nejumecovënëtavanapaena ëpetëpaejavabelianexa, bajarapamonaie taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso piajamatabëcuenesaë tsavanapaxae tsane tanejumecovënëtavanapaejava. Bajarapamonaie taxa Dioso athëbëtatsia yajavajinavanapaena daxitamatacabijavabelianexa. Nexata taxa Dioso pevënë yaquinarutsianajë bajarapamonaiejavabelia. Yajavayaquinarutsianajë taxa Dioso pijatomara pevënë. Bajarapatomara, pejana Jerusalëtomara. Bajarapatomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajë bajarapamonaiejavabelia. ¹³ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Laodicea tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁴Jesús icatsia nejumaitsi:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacapanepaenexa.

Bajaraponë pexaniajailivaisi jivi tsipaebabiaba. Pexanaenënuaxaxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹⁵“Yapëtaniji daxita xua paexanavanapame. Yapëtanijinua patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijinua bevelia patanetonacuenebavanapaejavamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë. Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonaie apo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi

pamonae xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji roviaia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. ¹⁶ Nexata pacuenia mera perëbënaera apo cainejebi, bitso apo atajunua, bajara pajamatabëcuenitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuaepatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënëa panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bajaraxuata pacanavecuaxuabianatsi. ¹⁷ Paxamë pajamatabëjumaitsimë tsabiabi: 'Xanë baja cajena bitso daxitacuene taxainenë. Daxita xua nacuenebaponaponajë taxainaejavanexa, netocapitsapapona. Nexata itsacuenejava ata apo namatavenonaenë,' pajamatabëjamë tsabiabi. Itsiata baitsi jane Diosojavabelia apo panejamatabëcuenexanepanaexae, pepacune apo pajamatabëcuenebarëyamë tsavanapae. Apo payapëtaemënuua bitso bepanejiobicuene Dioso pitabarata. Paxamë cajena Dioso pacatane bepaneitaxutotsëcënaevi bitso, bepanejumasaajinaevinua. ¹⁸ Bajaraxuata pacamuxujiobijitsiatsi. Panevecuapire bitso penamatamotsijava paricovinexamë jane baja Diosojavatatsia. Panevecuapirenuua penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavavecua. Panevecuapirenuua paneitaxutotsëcënaeväe panetaenexa jane baja xaniavaetsia. Nexata dovathi pijacuene panayajivitaename papeccayamaxëitojorobiyaniva. ¹⁹ Daxita pamonae tasivavi, muxujiobajë peyapëtaenexa. Naneconitsiaexanajënuua pecopatsinexa apo tajitsipaecuene pexanaejava. Nexata asaëyata panejumecovënëre. Pacopabare pibisiacuene paneexanabiabijava. Panajamatabëcuenepënëyorore Diosojavabelia. ²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa panetobaupatsianame, pacatsijamatabëjonenatsi. Nexata pacayajavaponaponaenatsi daxitamatacabijavabelianexa. ²¹ Xanë baja cajena taxa Dioso taneitorobicuenia jumecovënëtaaponaponajë ètatëpaejavabelianexa. Nexata baja aeconoxae yajavaecajë taxa peccaejavata, pijatronovënëjavata. Pamonae pijinia nejumecovënëtavanapaena èpetëpaejavabelianexa, bajarapamonae pijinia tocopatsianajë tayajavaecaenexa tronovënëjavata. ²² Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia," pejailivaisi toyaquinare Laodicea tomarata peccaenë, Dioso pejumecovënëtavanapaevi panamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

4

Pacuenia Juan tane Dioso pijajivi Dioso pijanacuatatsia yabara pelivaisi

¹ Icatsia taniji baupa penabaupatanucaejava athëbëtatsia. Ponë baja copiaya jumetaniji pecuaicuajijajava betrompetajume, bajaraponë icatsia pecuaicuajijajava jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuajijajava.

²Nexata bajarapaepatota nayapëtaniji athëbëtatsia Espíritu Santo pesaë tayajavaponaponaejava. Athëbëtatsia taniji tronovënëjava. Bajarapatronota Dioso taeyetajë. ³Dioso, ponë eca bajarapatronota, itabaracotiabatsi. Pacuenia cotiaitsi penamatamotsiibotonë, bajara itabaracotiaitsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bajarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucæ bajarapaaravalibo. ⁴Bajarapatrono matatoyorotsia taenubajënuua veinticuatro patronobeje. Caetronota canacujitsia ecapona ancianonëanë. Bajarapaancianovi naxatabena penioponaevanë. Orota pexanaecoronanë mataena. ⁵Patronota eca Dioso, bajarapatronojavaverena yamaxë binebinejai. Najumetajunujunua. Siete xuabeje pitayotanubenaevanë taenubajë bajarapatronoitabarata. Bajarapaitayotanubenaevanë mapajamatabëcuenelivaisi xainaje. Siete rabaja pijinia patomarabepijivi, Dioso pejumecovënëtavanapaevi, Espíritu Santo peyavenonabibijavanexatsi. ⁶Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaithiavi, ayainëanë. Trono matatoyorotsia nubena. Bajarapamonæ pitabarayareca, pejumareca ata, itaxutorubenaponareca. ⁷Copiaya ponë, benevëthë petsobianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. ⁸Ponëanë, cuatro ponëbeje piaithiavi taniji, xinaepona seis pacorofetobeje caenë canacujitsia. Bajarapamonæ daxitanëanëreca itaxutorubenaponareca. Bëpënëaverena ata bajarapacuenia itaxutorubenaponareca. Matababijebi, meravijebi ata, apo copatanubenaevajumaitsanubenaevajava Diosojavabelia.

Bitso nianeconijibinë. Bitso ayaijamatabëcuenenëmë. Nexata cacaëjëpa daxitacuene nexanaenexa. Ajena, mapamatacabitaje, ponaponame. Mapanacuaje nexanaevajënaeya ata, ponaponame. Daxitamatababijavabelianexa ata ponaponame, jai tsanubenaevajumaitsanubenaevajava Diosojavabelia.

⁹Pamonæ cuatro ponëbeje piaithiavi, pexaniajamatabëcuenenua rajutabiaba Diosojavabelia. Bajarapamonæ pexaniajamatabëcuene itsa rajutabiaba Diosojavabelia, jumai tsabiabi mapacueniajaje:

—¡Diosomë, nenivenivenaecotia bitso pinijicuene! ¡Ayaijamatabëcuenenëmë bitso! jai tsabiabi.

Bajarapacuenia jumai tsabiabi tronota pecaenëjavabelia, daxitamatababijavabelianexa peponaponænëjavabelia. ¹⁰Pamonæ cuatro ponëbeje piaithiavi, bajarapacuenia itsa jumai tsanubenaevajumaitsanubenaevajava Diosojavabelia, nexata pijinia bajarapaepatota pamonæ veinticuatro ponëbeje ancianovi pematabacabëta tonubenajunua Dioso pitabarata, daxitamatababijavabelianexa peponaponænë pitabarata. Bajarapacuenia tonubenajunua Dioso pitabarata peyayataexæ. Bajarapaancianovi Dioso pija-

tronojavabelia topenelia pijacoronanë. Bajarapaancianovi Diosojavabelia jumai tsanubenaë:

¹¹ Patajatuxanenëmë, patajaDiosonëmë. Xanepana itsamonaëjavabelia patacavajunupaebaponaëjava nenivenivenaëcotia pexainaëjava. “Diosomë, bitso ayaijamatabëcuenenëmë,” pacajai tsaponaëtsinua. Xanepanana patajumaitsaponaëjava: “Diosojajena bitso piasaënë,” patajaitsaponaëjava. Tspaji baja daxitacuene nexanaënë. Nejitsipaëcuenia daxitacuene exaname. Mapamatacabijavaberena ata abaxë tsiteca daxitacuene nexanaëjava nexanaëcujinaë. Bajarapacuenia abaxë tsiteca daxitacuene nexanaëjava xamë nejamatabëcueneta, jai tsanubenaë ancianovi Diosojavabelia.

5

Pacuenia Juan athëbëtatsia cobetaeyeta Dioso pequionaëcuyalatobaxuto pecobenaëcaëjava yabara pelivaisi

¹ Athëbëtatsia taeyetajë Dioso. Tronota eca. Pequionaëcuyalatobaxuto cobenaëca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete paselotabeje upicatsanaruba. ² Nexata taenutajë bitso piasaëángelnë. Bajara-paángelnë pinijijumeta jumaitsi mapacueniaje:

—¿Jipatsa nexata jamatabëcuenecaëjëpatsi Dioso petocopatsinexatsi pesaracaenexa sellövënëjavaxi, bajarapacuyalatobaxuto piupicatsanarubiselloxi? jai.

³ Itsiata baitsi jane ajibi pejamatabëcuenecaëjëpaejivitsi bajarapacuyalatobaxuto piupicatsanarubiselloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Dioso apo tocopatsi pesaracaenexa bajarapacuyalatobaxuto piupicatsanarubiselloxi bëpënëa paitane rubena petaenexa. ⁴ Nexata xanë bajaraxua itsa taniji, bitso cajena nuajë. Bitso nuajë tspaji baja ajibi pejamatabëcuenecaëjëpaejivitsi bajarapacuyalatobaxuto pequionaëjava pebaxuisinaenexa pelebinaenexa. ⁵ Nexata itsanë ancianoviyajuvënëne nejumaitsi:

—Pëtsa baja nuame. Caenë raja jamatabëcuenecaëjëpatsi bajarapacuyalatobaxuto pequionaëjava pebaxuisinaenexa. Bajaraponë Judápijinë pemomoxiyajuvënëne. Piasaënë bitso. Nexata bajaraponë yabara itsamonaë jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënëne. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjëpatsi pesaracaenexa bajarapacuyalatobaxuto piupicatsanarubiselloxi, nejai ancianoviyajuvënëne Jesucristo yabara.

⁶ Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaë cuatro ponëbeje piaitothiavi pitabarata. Cordero nayapëtane pebeyaxuabinëmitsicuene. Tspaji cruzajavabelia pecobematabiabarut-sivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapamatabëcuenelivaisi xainaje. Siete rabaja pijinia paespíritubeje, Dioso

pijaespirituanë. Bajarapasiete paespiritubeje Dioso baja itoroba daxitanacuanëjava. ⁷ Nexata jane baja Dioso, ponë eca tronota, ponë pequionaecuyalatoxuto cobenaeca pecujanenia. Corderonë cujitalia. Corderonë jane baja vecuapita bajarapacuyalatoxuto. ⁸ Corderonë baja itsa pita bajarapacuyalatoxuto, nexata pamonaecuatroponëbeje piatothiavi, Corderonë pitabarata pematocabëta tonubenajunua. Bajara pijinia pacuenia pamonaecuatroponëbeje ancianovi, Corderonë pitabarata pematocabëta tonubenajunua. Caeanciano canacujitsia saicaya xainapona pijaarpa. Bajarapaancianovicapona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëta ponaecjavami Diosojavabelia, Dioso tane bajarabepitsituxujuvijava. ⁹ Nexata pamonaecuatroponëbeje piatothiavi, pamonaecuatroponëbeje ancianovi, daxita bajarapamonaecuatroponëbeje ancianovi, daxita bajarapamonaecuatroponëbeje ancianovi, naxëana Corderojavabelia mapapejanavajije. Penaxëanaecjavata vajita jumaitsi Corderojavabelia mapacueniaije:

Cajamatabëcuenecaëjëpa rabaja Dioso pecatocopatsixae nepitsinexa mapacuyalatoxutoje. Nexata baja cajamatabëcuenecaëjëpanua bajarapacuyalatoxuto piupicatsanarubiselloxi ata nesaracaenexa. Bajarapacuenia cajamatabëcuenecaëjëpa baja tsipaji baja cabeyaxuaba pataneneconimatamotsinexamë. Nexata padaxitaviriajumevi atanë, padaxitanacuanëpijivi atanëna, nijanata baja panecomuatame Diosonexa. ¹⁰ Paneexanamenua baja Dioso papijajivinë itsamatacabi Dioso patanebarëevetsinexa daxitacuene. Paneexanamenua baja pasacerdotevinë jivi patatocuaicuajiaitsabiabivinexa Diosojavabelia. Paneexanamenua baja nacuanë pataevetsivinexa,

jai ancianovi Corderonëjavabelia penaxëanaecjavata mapapejanavajije.

¹¹ Trono matatoyorotsia nubena cuatro ponëbeje piatothiavi. Nexata piatothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Ángelevi bitso ayaiBITSaëto, millones paánglebeje nubena. Nexata bajarapaánglelevi pecuaicuajiajava jumetaniji. ¹² Ángelevi ayaijumeta jumaitsi mapacueniaije:

Corderonë, ponë picani beyaxuabatsi, bitso ayaijamatabëcuenenë. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapëtaenexa. Tocopatatsinua pinijisaë pexainaenexa. Tocopatatsinua itsamonae pejumaitsinexatsi: “Xamë bitso ayaijamatabëcuenenëmë,” pejainexatsi. Tocopatatsinua pevajunupaebinxatsi penivenivenaetia pexainaecjavava. Tocopatatsinua daxita pamonaecuatroponëbeje ancianovi, pexaniajamatabëcuenenë perajutsinexatsi bajaraponëjavabelia. Bajarapacuenia tocopatatsi tsipaji ayaijamatabëcuenenë bitso,

jai tsanubenaecjavata mapacueniaije ángelevi Jesús yabara.

¹³ Jumetanijinua icatsia daxita Dioso pexanaevetsinexa pecuaicuajiajava. Athëbëpijivi cuacuajia. Mapanacuapijivi ata cuacuajia. Petëpaevimi ata cuacuajia. Manuamenianëpijivi ata cuacuajia. Nexata daxita bajarapamonaecuatroponëbeje Jesúsbeje yabara jumaitsi mapacueniaije:

Diosomē, tronota neecaenē. Xamē pijinia Corderonēmē. Paxamēbejejavabelia pexaniajatabēcuene pacarajutatsi. Paxamēbeje bitso ayaijamatabēcuene panexainaenēbeje. Panenivenivenaecotiabeje paxainamebeje. Nexata panenivenivenaecotiabeje panexinaejavabeje itsamonaejavabelia pacavajunupaebaponatsi. Pinijsaē bitso panexainaenēbeje. Bajarapajamatabēcuene panejamatabēcuenetsitecaenēbeje daxita matacabijavabelianexa,

jai daxita Dioso pexanaevi Diosobeje Jesúsbeje yabara.

¹⁴ Pamonaē pijinia cuatro ponēbeje piaitothiavi jumaitsi tsaponae mapacueniaje:

—¡Bajara itsi tsane! jai bajarapamonaē.

Nexata pamonaē veinticuatro ponēbeje ancianovi, pematatabacabēta tonubenajunua Dioso pitabarata. Pexaniajatabēcuene rajutanubena Diosojavabelia, daxitamatacabijavabelianexa peponaponaenējavabelia.

6

Siete pasellobeje yabara pelivaisi

¹ Corderonē taenutajē. Penamataxainaesello sarananua. Nexata pamonaē cuatro ponēbeje piaitothiaviyajuvēnēnē, caenē pecuaicuaijajava ayaijumeta, jumetaniji. Pecuaicuaijajava, beyamaxējume najumeta. Nexata jumetaniji: “¡Naxanitsia!” pejaijava caballojumata peponaenējavabelia.

² Nexata bajaraxuacujinae icatsia taniji perenajava peniopoanecaballota peyanajetarucaenē. Caballojumata peecaenē, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaē pebarēnabenexa. Nexata pijavajabitsaē cueneamoneyabanajetaruca pepacuene ēpecopiarucaeya exanaejavabelianexa.

³ Bajaraxuacujinae icatsia Corderonē sarananua itsasello, pecotocaevijava. Nexata pamonaē cuatro ponēbeje piaitothiaviyajuvēnēnē, icatsia itsanē: “¡Naxanitsia!” pejaijava, jumetaniji.

⁴ Nexata bajaraxuacujinae icatsia taniji perenajava petsobiacaballota peyanajetarucaenē. Caballojumata peecaenē, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanējava.

⁵ Bajaraxuacujinae icatsia Corderonē sarananua itsasello, acueyabijava. Nexata pamonaē cuatro ponēbeje piaitothiaviyajuvēnēnē, acueyabinē icatsia: “¡Naxanitsia!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenē. Caballojumata peecaenē, cobenaeca pepesabaponaejava. ⁶ Icatsia jumetaniji pamonaē cuatro ponēbeje piaitothiavijavata pejumaitsijava mapacueniaje: “Janibomatacabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajaraparanē bitso namatamota,” pejaijava, jumetaniji.

⁷ Bajaraxuacujinae icatsia Corderonē sarananua itsasello, cuatrojava. Nexata pamonaē cuatro ponēbeje piaitothiavi, pecopiarucaenē jane baja: “¡Naxanitsia!” pejaijava, jumetaniji.

⁸ Nexata bajaraxuacujinae icatsia taniji perenajava pevayanaecaballota peyanajetarucaenë. Caballojumata peecaenë, pevënë Jivi Petëpaeyaexanaponaenë. Itsanë pënaponatsi. Bajaraponë pijinia ponë pevënë Infiernonë. Bajaraponëbeje Dioso tocopatsianatsibeje jivi ayaibitsaëto pebeponaenexabeje. Pitsibitsaëtovajëto beponaenabeje, bajarapitsibitsaëtovajëto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponëbeje pejamatabëcueneta beyaexanaponaenabeje jivi vajabitsaëcuenia, janibocuenia ata, piavitanecuenia ata. Unupijinëanë piayainëanë pitsapaena. Nexata bajarapapiayainëanë jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonë sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajë pebobenaëjava altarjavabëxëpanata. Bajarapamonae mi bajayata beyejebatsi apo pecopatsixae Dioso pejumelivaisi jivi petsipaebaponaëjava. ¹⁰ Daxita pamonaemi bajayata beyejebatsi, Diosojavabelia pinijijumeta jumai tsanubenaë:

—Diosomë, pepo pexanijamatabëcuenenëmë. Pacuenia najumecapanepaeya jumaitsimë, bajarapacuenia exanabiabame. ¿Detsa pamatacabibeje abaxë saica nenaneconitsiaexanaenexa mapanacuata pejinavanapaevije, pamonaë panebeyejeba? jai tsanubenaë altarjavabëxëpanata pebobenaëvi.

¹¹ Nexata jane baja bajarapamonae Dioso rajutatsi penioponaenaxatabijavanë. Abaxë Dioso itorobatsi bajarapamonae penacueraeventanubenaenexa. Tsipaji abaxë saica itsamonae Dioso pijajivi, Jesucristo ata petonacuenebivi, pebeyejebinxatsi. Bajaraxuata bajarapamonae abaxë nacueraevetsiaexanejebatsi Dioso.

¹² Bajaraxuacujinae icatsia Corderonë sarananuca itsasello, seisjava. Nexata icatsia taniji bitso ira penajëabijava. Matacabipijijuumeto bitso itaxutotsaëbia. Pacuenia meravivi bitso itsa aitaquiri, bitso batsaëbia, bajara itaxutoitsi. Meravipijijuumeto pijinia bitso itaxutotsobia. Pacuenia pijana batsobia, bajara itaxutoitsi. ¹³ Nexata tulupu irabetsica othopaica. Pacuenia naejavacuai baothopaica, naëjava itsa najëaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonëmi, petunaetonëmi ata, najëaba. ¹⁵ Nexata daxita mapanacuanëjavaje jivi pevetsivi, namatayaba ibovajuanëjava. Namatayaba ibotoxanetonë tuatujëjava ata. Daxita ayaijamatabëcuenenëanë, bitso riconëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajara pacuenia daxita namatayaba. ¹⁶ Nexata penamatayabivi jumaitsi ibotsutonëjavabelia, ibotoxanetonëjavabelia ata:

—Panetsimataothopare. Dioso, ponë eca tronota, bajaraponëvecua panematayatsianame. Pinijicuenia raeta panenaneconitsiaexanaena Corderonë. Bajaraxuavecua panematayatsianame, jai picani pamonaë penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaematacabitsi. Itsajivi ata cajena apo caejëpaetsi pevecuapanepaenexa Dioso penaneconitsiaexanaecuenetsi.

7

Pacuenia Juan tane athëbëtatsia pacuenia itsamatacabi itapaitanerubijitsiatsi Israel nacuapijivi Dioso pijajivixae yabara pelivaisi

¹ Icatsia taniji cuatro ponëbeje ángelevi. Bajarapaángelevi nacua matatoyotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajëabiyaniva jovibota, caranatanubena ángelevi. ² Tanijnua icatsia itsaángelnë penajetarucaenë orientejavavetsina. Bajarapaángelnë caponapona piasaenë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejejavabelia. Pamonaes cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejejavabelia jumaitsi mapacueniaje:

³ —Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

⁴ Bajaraxuacujinae jumetaniji jivi ayaibitsaëttoxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonaes itapaitanerubatsi Dioso pijasellota, daxita bajarapamonae Israelpijinëmi pexi doce ponëmibeje pemomoxiyajuvënëvi. ⁵ Nexata Dioso pijasellota itapaitanerubatsi doce mil pajivibeje, Judápijinëmi pemomoxiyajuvënëvi. Doce mil pijinia pajivibeje, Rubépijinëmi pemomoxiyajuvënëvi. Doce mil pijinia pajivibeje, Gadpijinëmi pemomoxiyajuvënëvi. ⁶ Doce mil pijinia pajivibeje, Aserpijinëmi pemomoxiyajuvënëvi. Doce mil pijinia pajivibeje, Neftalípijinëmi pemomoxiyajuvënëvi. Doce mil pijinia pajivibeje, Manasépijinëmi pemomoxiyajuvënëvi. ⁷ Doce mil pijinia pajivibeje, Simeónpijinëmi pemomoxiyajuvënëvi. Doce mil pijinia pajivibeje, Levípijinëmi pemomoxiyajuvënëvi. Doce mil pijinia pajivibeje, Isacarpípijinëmi pemomoxiyajuvënëvi. ⁸ Doce mil pijinia pajivibeje, Zabulónpijinëmi pemomoxiyajuvënëvi. Doce mil pijinia pajivibeje, Josépijinëmi pemomoxiyajuvënëvi. Doce mil pijinia pajivibeje, Benjamínpijinëmi pemomoxiyajuvënëvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpípijinëmi pexi doce ponëmibeje pemomoxiyajuvënëvi.

Pacuenia Juan athëbëtatsia tane jivi ayaibitsaëttoxanetonë, penioponaejavanë penaxatabivi, yabara pelivaisi

⁹ Icatsia taniji jivi ayaibitsaëttoxanetonë. Bajarapamonae daxitanacuanëpijiviyajuvënëvi, daxitaviriajumeviyajuvënëvi. Bajarapamonae nubena Dioso peecaetrono pitabarata, Corderonë ata pitabarata. Jivi cajena ayaibitsaëttoxanetonë bitso. Itsajivi ata cajena apo caejëpaetsi penamataëjëtsicapanepaenexa bajarapajivibitsaëttoxanetonë. Daxita bajarapamonae ëpenioponaejavanë penaxatabivi. Cobenanubena

benaxarebobaxutonë. ¹⁰ Daxita bajarapajivibitsaëtoxanetonë vavajai tsanubenaeyaijumeta. Jumaitsi tsanubenaeyamapacueniajaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeconomics. Bajarapacuenia nacacapanepa Corderonë pejamatabëcueneta, jai tsanubenaeyabajarapajivibitsaëtoxanetonë.

¹¹ Trono matatoyorotsia nubena cuatro ponëbeje piatothiavi. Nexata piatothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabëcuene rajutanubena Diosojavabelia. ¹² Bajarapaángelevi ira taenubenaeya jumai tsanubenaeyamapacueniajaje:

¡Bajara itsi tsane! PatajaDiosomë, pexaniajamatabëcuene pacarajutabiabianatsi daxitamatacabijavabelianexa. Nenivenivenaecotia nexainaejava, daxitacuene neyapëtaenëcuene ata, pacavajunupaebaponaenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaëné daxitamatacabijavabelianexa. Cajamatabëcuenecaëjëpa nexanaenexa daxitacuene ata daxitamatacabijavabelianexa. Bajara itsi tsane,

jai tsanubenaeyairataeya daxita bajarapaángelevi Diosojavabelia.

¹³ Nexata itsanë ancianonë nejumaitsi:

—¿Detsa mapamonae penioponaeyajava penaxatabivije? ¿Detsa verena pata bajarapamonae? nejai ancianonë.

¹⁴ Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeye nacua pecopiarucaevajënaeya, piyajijunavixaneto pecanicabanubenaevimije. Corderonë pesivatëpaexaetsi, bajarapamonae pibisiacuene pexanaeconomics vecuaajibiaexanatsi baja. Bajaraxuata penioponaeyavanë naxataba. ¹⁵ Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyajavajinavanapaexae. ¹⁶ Bajarapamonae baja apo namatavenonae tsane pexaejava. Apo namatavenonae tsane mera ata. Icotia ata apo tsajavi tsanetsi. Icotia piatajuyava ata apo jamatabëitonotsi tsanetsi. ¹⁷ Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë mataponabiabianatsi itsabelia rubena iravetsina pepitsaparubenaemeranë, jivi piatavayaexanaemeranëjavabelia. Daxita bajarapamonae Dioso pijanacuatatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniajaje.

8

Sietejava sello yabara pelivaisi

1 Icatsia Corderonē sarananuca cuyalatobaxuto piupicatsa-tarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. 2 Bajaraxuacujinae icatsia taniji siete ponëbeje angelevi. Dioso pitabarata nubena. Nexata bajarapaängelevi rajutatsi siete patrompetabeje. 3 Icatsia xuacujinae itsanë ángelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvënëjava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëabijava. Nexata bajarapatuxujuvijava ángelnë buata altarjumata. Bajarapaaltar, orota pexanaealtar, nuca Dioso peecaetrone pitabarata. 4 Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaponaejumemi Diosojavabelia. 5 Bajaraxuacujinae ángelnë altarjumavecu nota pitatsajaviitaire. Bajarapaitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëaba.

Siete patrompetabeje yabara pelivaisi

6 Siete paángelbeje canaveretanubena pijatrompetanë piobinexa.

7 Nexata jane baja penamataxainaeángelnë oba pijatrompeta. Nexata bito pecainejebimatarejetonë othopareca irabereca. Bajara pacainejebimatarejetonë matajërëaba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, pairavajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxita naejavanëmi, pejuvijavanëmi ata, yajavatajuepona.

8 Bajaraxuacujinae icatsia pecotocaeviángelnë oba pijatrompeta. Taniji bepinijitsutoxaneto petajueyecaajava. Bajaraxua jopareca manuameniareca. Manuamenemi nexata pijana. Pamenevajëto ëpijanamene tsarucae, bajarapamenevajëto matatoxenetsia itsiata pijananejeva yajuvënënacopata. 9 Pamanuamene ëpijanamene tsarucae, bajara pamanuamenepijidujuaimi tëpa baja. Pamanuamene pijinia pijananejeva nacopata, bajara pamanuamenepijidujuai apo tëpae. Pamanuamene ëpijanamene tsarucae, bajarapamanuameneta perubenaebarcoxanetonëmi ata napeneta. Pamanuamene pijinia pijananejeva nacopata, bajarapamanuameneta perubenaebarcoxanetonë apo napenetsi.

10 Bajaraxuacujinae icatsia acueyabiángelnë oba pijatrompeta. Nexata pinijituluputoxaneto jopareca irabereca. Bajarapatuluputoxaneto tajuerucaponareca. Pacuenia bepinijiisotocotiaxaneto bacotia itsi, bajaracotia itsi tsarunaereca. Panacuata jopa bajarapatuluputo, bajarapanacuata daxita perubenaemenianëmi, bijiana baja. Iravetsina mera pepitsaparubenaevajanëmi ata, bijiana baja. Nexata baja abeje daxita bajarapameranëmi. Panacuata apo jopae bajarapatuluputo, bajarapanacuata perubenaemenianë, apo bijiana. Nexata xanepana daxita

bajrapameranë. Mera iravetsina pepitsaparubenaëjavanëjava ata, xanepanarubena. ¹¹ Bajrapatuluputo pevënë Ajenjo. Pamerajavareca jopareca bajrapatuluputo, bajrapamera atsaxa baja. Jivi ayaibitsaëtoxanetonë tēpa penatsiapaexae bajrapamera.

¹² Bajraxuacujinae icatsia cuatroángelnë oba pijatrompeta. Nexata jane baja itaxutobijiana matcabipijjuameto. Itaxutobijiana meravipijjuameto ata. Itaxutobijiana tuluputonë ata. Nexata matcabipijjuameto bijiaya naitayota. Meravipijjuameto ata bijiaya naitayota.

¹³ Bajraxuacujinae icatsia taniji itsanë ángelnë pepunanajetarucaenë. Pepunanajetarucaenë ángelnë jumai tsanajetarucæ ayaijumeta:

—¡Toabejtsi baja tsaponae tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucæ ángelnë pepunanajetarucaenë.

9

¹ Bajraxuacujinae icatsia cincoángelnë oba pijatrompeta. Nexata taniji athëbëvereca ángelnë perunaëjavareca irabereca. Nexata bajarapaángelnë Dioso rajutatsi llave, iravetsina pepitsapaemëthëxaneto pijallave. ² Nexata jane baja bajarapallaveta ángelnë mëthëxaneto vëpacasarana. Ángelnë jane baja vëpata mëthëxaneto. Nexata bajarapamëthëxanetojavatsina pitsapaina ëtsëxëxaneto. Pitsitsëxëxaneto bapitsapa pinijipabixaneto itsa tajuita, bajarapitsitsëxëxaneto pitsapaina bajarapamëthëxanetojavatsina. Nexata bajarapatsëxëta matcabipijjuametomi itaxutoaitaquiriayaexana. Itaboxo ata aitaquiriayaexana. ³ Bajrapatsëxëjavaverena pitsapa bosesë. Bajrapabosesë daxitanacuanëjava punanajetarubena. Bajrapabosesë caëjëpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa. ⁴ Bajrapabosesë apo itorobitsi pebijianaenexa itsacuenëjava ata xua pejuvijava. Nexata bajarapabosesë apo bijianaponae pona. Apo bijianaponae naëjavanë ata. Tsipaji itorobatsi pecacuatsinexa saya ëjivi. Nexata pamonaë Dioso pijaselleta apo itapaitanerutsitsi, bajarapamonae pecacuatsinexa. ⁵ Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajumetobeje. Nexata bajarapabosesë jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. ⁶ Nexata pamonaë cacuatsianatsi bajarapabosesë, jitsipaena picani petëpaenexa bajayajebi penavixaetaeyaniva. Itsiata baitsi jane bajarapamonae Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

⁷ Bajrapabosesë ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojororonaeyanivatsi, bajara itsanubenaë bajarapabosesë. Beorota pexanaecoronanë namataxatabanubena. Pacuenia pebi itabaraitsi, bajaraitabaraitsi. ⁸ Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë. ⁹ Bajrapamonae pejumabocotonë yajavanaexana baja cajena behierrojumabocotonë pejororonaeyanivatsi itsajivi ata. Pecorofë najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta

bosese pecorofe. ¹⁰ Bajarapabosese pebosotonēcopiata xaina peetonē jivi pecacuatsinexa. Pacuenia aqueto pebosotocopiata xaina peeto, bajnia benevēthēvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. ¹¹ Bosese cajena xaina ángelnē pitorobinēnexatsi, pinijimēthēxaneto pevetsinē. Bajarapaángelnē hebreojumeta pevēnē Abadón. Griegojumeta pijinia Apolión, “Peverebiabinē,” pejajjume.

¹² Bajarapapiayaicuene penamataxainaejava. Itsiata baitsi jane abaxē saica anijajavabeje.

¹³ Bajaraxuacujinae icatsia seisángelnē oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayajjume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucazona. Bajarapamataetonē tuatuajetā jumepitsapa. ¹⁴ Bajarapaaltarjavaverena jumaitsi seisángelnē trompeta pexainaenējavabelia mapacueniaje:

—Isicare cuatro ponēbeje ángelevi, pamonaē cēbejebatsi pinijimenejavata, Eufratesvēnē menejavata, jai bajarapaaltarjavaverena.

¹⁵ Nexata jane baja pecēbejebiángelēvimitsi isicatsi. Isicatsi bajarapaángelēvi pebenexa jivi. Bajarapaángelēvi jivi ayaibitsaētonē beponaejitsia daxitanacuanējava. Bajara saya cajena ēxuanexa, paángelēvi Dioso jamatabēcueta pexainaenējavabelia mapacueniaje:

—Isicare cuatro ponēbeje ángelevi, pamonaē enevetanubena Dioso pitorobinexatsi jivi pebeponaenexa paepatota tocaējētatsi. ¹⁶ Nexata icatsia jumetaniji bajarapaángelēvi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

¹⁷ Bemajitsinaebota taniji bajarapamonae caballota peponaejava. Vajabitsaēvi namēpabēxataba hierropananē pejorojoronaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejejavata. Itabēta mapaviriabejejavataje. Itabēta petsobiajavata. Itabēta perajenaējavata. Itabēta pevayanaējavata. Bajarapaviriabejejavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicotia, ētsēxē yajava, azufre ata yajava. ¹⁸ Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxonetonē yatēpazona daxitanacuanējava. Pabitsaētovajēto tēpa, bajarapabitsaētovajēto mata-toxenetsia nacopata mapanacuataje. ¹⁹ Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē pebosotonēupianē bejomomatabocotonē. Pacuenia jomo pematabocotota caējēpatsi jivi pesininexa pebeyaxuabinexa, bajara itsi bajarapacaballuanē pebosotonēupianē.

²⁰ Itsiata baitsi jane pamonaē peyajuvēnētēpaēvi, pamonaē penacopabivi, bajarapamonae tsiteca pibisiacuene exanavanapa. Apo copatsi dovathivijavabelia penavajēcabiabijava. Apo copatsinua pecobeta jumapecataeya pexanaenēanējavabelia ata penavajēcabiabijava. Bajaraxuanē saya pexanaenēanē oronanitonēta, platananitonēta ata, broncejavanēta ata, ibotonēta ata, naejavanēta ata. Nexata bajaraxuanē apo caējēpaetsi petaenexa. Apo caējēpaetsi pejumetaenexa ata. Apo caējēpaetsi peponaenexa ata. ²¹ Pamonaē peyajuvēnētēpaēvi, pamonaē penacopabivi, bajarapamonae apo copatsi jivi pebejava. Apo copatsi

penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

10

Pacuenia Juan tane ángelenë pecobenanucaejava cuyalatobaxutoyo yabara pelivaisi

¹ Icatsia taniji itsaángelnë athëbëvetsica perunaejavatsica. Runaica mapanacuayabetsicaje. Bajarapaángelnë bitso piasaëángelnë. Itarërëbo tuatujëta najetaruca. NatsimatatsënërutanaJETARUCA aravalibo. Itabaranaitayotanajetaruca. Pacuenia matacabipijiuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia.

² Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Petsavenonenia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevëthë itsa fiaba ayaijume, bajarapacuenia ayaijume. Pevavajacujinae siete payamaxëbeje najumeta athëbëtatsia. ⁴ Yamaxë penajumetsicujinae, yaquinaejitsianë picani pajamatabëcuene yabara yamaxë penajumetsijava neyapëtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

—Muetsia saya xainare pajamatabëcuene yabara yamaxë penajumetsijava, cayapëtaeyaexana. Pëtsa yaquiname bajarapalivaisi, nejai athëbëvetsica.

⁵ Bajaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanutuca athëbëabetsia pecujanenia pacobe. ⁶ Bajarapaángelnë nacobeyotsiaya jumai tsanucæ:

—Dioso, daxitamatacabijavabelianexa peponaponaenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponë pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajëvelia najamatabëxaina pexanaenexa. ⁷ Itsa rabaja paepatota siete ángelnë obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivijavabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumaitsi profetavimijavabelia, jai tsanucæ nacobeyotsiaya ángelnë.

⁸ Copiaya pajume jumetaniji athëbëvetsica tanejumaitsijava, bajarapajume icatsia jumetaniji. Nejumaitsi icatsia athëbëvetsica mapacueniaje:

—Ponë ángelnë nataxunutanuca manuameneboxovereca, irajumavereca ata, bajarapaángelnë cujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

⁹ Nexata culliajë ángelnë. Vajëtajë nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

—Ájã, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnë.

¹⁰ Nexata baja ángelnë bajarapacuyalatobaxutoyo vecuapitajë. Xaniji jane baja. Nexata jane baja cuiboxaicajë. Pacuenia jabëra xaica, bajara itsi. Itsiata baitsi jane taquijonicujinae tacotsorotuaabereca atsaxa. ¹¹ Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpijivi. Tsipaebare pacuenia Dioso sivanajamatabëxaina daxitaviriajumevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

11

Pacuenia itsamatacabi anijanëbeje jivi tsipaebaponaenabeje palivaisi Dioso yapëtaeyaexanaenatsibeje yabara pelivaisi

¹ Icatsia taniji ángelnë. Nerajuta piapianaabo. Nejumaitsi mapacueni-aje:

—Nonotapunare. Caponare mapanaeboje necaëjëbinexa Dioso pijatemplobo, necaëjëbinexa altarvënëjava ata. Namataëjëtsianamenua pajivibeje bajarapatemplobota navajëca Diosojavabelia. ² Itsiata pëtsa caëjëtame templobopanabo. Tsipaji bajarapapanabo tocopata baja Dioso apo pejumecovënëtsivinexa, pamonaë saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yayiatae tsane judíovi pijatomara. ³⁻⁴ Bajayata profetanëmi peyaquinaebaxutota, comparacióncuenia tajëvelia jumaitsi mapacueni-aje: “Anijanaebeje, olivonaebeje, anijjavabeje pijinia pitayotanucaejavabeje, nubenaena mapanacuapijivi pijatuxanenë Dioso pitabarata,” jai. Bajarapacuenia comparacióncuenia tajëvelia itsa jumaitsi, tajëvelia vajunupaeba anijanëbeje jivi petsipaebanajetarucavejanexabeje palivaisi Dioso yapëtaeyaexanaenatsibeje. Nexata anijanëbeje Dioso itorobiana jivi petsipaebanajetarucaenexabeje palivaisi Dioso yapëtaeyaexanaenatsibeje. Palivaisi bajaraponëbeje Dioso yapëtaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaëbërëjava. Bajarapacuenia naxatatsianabeje bitso pesivajamatabëcuenebëjaixaabeje tsane pamonaë apo peyayataevi Jerusaléntomara, nejai ángelnë.

⁵ Itsajivi itsa jamatabëitsacueniabianatsibeje, bajaraponëbeje nayajivitajuitsianabeje pecuibovojotovetsina pepitsapacotiata, pitarunutsicotiata. ⁶ Bajaraponebanajetarucaenabeje. Naxatatsianabeje piayopapaëbërëjava. Bajëbeje caëjëpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapëtaeyaexanaenatsibeje, bajarapamatacabibeje abaxë ema apo jopaeyaexanaeabeje tsane. Caëjëpaenatsibejenua mera ata pijanara pexanaenexabeje. Caëjëpaenatsibejenua daxitaviria piayaicuepecapitsapaenexabeje pamatacabita jitsipaenabeje. ⁷ Bajaraponëbeje itsa veretsianabeje palivaisi Dioso yapëtaeyaexanaenatsibeje jivi petsipaebanajetarucavejavabeje, bitso piayainë pitsapaenina pinijimëthëxanetojavatsina. Bitso piayainë pitsapaenina pebenexatsibeje bajaraponëbeje. Nexata amoneyabianatsibeje. Nexata baja beyaxuabianatsibeje. ⁸ Nexata petëpaenëbeje bocaenabeje Jerusalén tomaraxaneto callejavata. Bajarapatomarata bajayatami vajatuxanenë

ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacue ne exana. ⁹ Nexata bajaraponēbeje, Jerusaléntomara callejavata petēpaenēbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemēthēsinexatsibeje bajaraponēbeje. Nexata daxitaviriajumevi, daxitanacuanēpijivi ata, taeyabuatsianatsibeje. ¹⁰ Dioso apo pejumecovēnētsivi sivajamatabēcuenebarēyatsibeje tsane petēpanucaejavabeje. Bitso cajena barēya tsane Dioso apo pejumecovēnētsivi. Nexata pebarēyajamatabēcuene fiesta exanaena. Namataenetsia narajutsiana amoneya itsacuenējavānē. Bajarapacuenia exanaena Dioso apo pejumecovēnētsivi bajaraponēbeje petēpaejavabeje yabara. Tsipaji Dioso apo pejumecovēnētsivi jumaitsi tsane: “Copiaruca rabaja maponēbeje livaisi vajanacatsipaeabiabijavaje. Copiaruca baja vajanacajamatabēitonotabiabijava,” jai tsane. ¹¹ Itsiata baitsi jane petēpaecujinaebeje, acueyabi pamatacabibejecujinae itsamatacabi epatua, icatsia Dioso piasaējumali rajutsianatsibeje. Nexata petēpaejavabejevecua namatacotsianabeje. Daxita cajena pamonaē taeyabuatsianatsibeje petēpanucaejavabeje, bitso cujunavianatsibeje. ¹² Bajaraxuacujinae bajaraponēbeje jumetaenabeje athēbēvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponēbeje junaeniabeje athēbēabetsia itarērēbo tuatujējavabetsia. Daxita pitoyavitsibeje pētaenubenaenatsibeje. ¹³ Bajara jane paepatota ira najēabiana. Nexata Jerusalén tomarata, itsajota diez pabobeje najuaenaena, caebo yajuvēnējopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajēabita tēpaena. Jerusalén tomarapijivi, pamonaē nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomē, ayaijamatabēcuenenēmē bitso, jai tsane pecajunavi Diosojavabelia, athēbētatsia peecaenējavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejava bepijia najetarucaena, acueyabijava.

Sietenē baja ángelnē pijatrompeta piobijava yabara pelivaisi

¹⁵ Sietenē jane baja ángelnē oba pijatrompeta. Nexata athēbēvetsica pinijijumeta pejumaitsijava, jumetaniji. Jumaitsi mapacueniaje: Daxitanacuanēpijivi rajane baja vajatuxanenē Cristobeje, Diosobeje, evetaponaponaenabeje. Bajaraponēbeje evetaponaponaenabeje daxitamatacabijavabelianexa, pejaijava athēbēvetsica, jumetaniji.

¹⁶ Nexata pamonaē veinticuatro ponēbeje ancianovi, pamonaē ena pijatronota Dioso pitabarata, daxita bajarapamonae irataeya hobena.

¹⁷ Bajarapamonae ancianovi irataeya jumai tsanubenaē Diosojavabelia: Xamē Diosonēmē, niajamatabēcuenesaēnē daxita mapanacuanē pevetsivivecuaje. Ajena, pamatacabi, ponaponame. Bajayata mapanacuaje nexanaevajēnaeya ata, ponaponame. Pexaniajamatabēcuene pacarajutatsi. Tsipaji baja taxuxuabame pinijisaēta nevetaponaponaenexa daxita mapanacuanēpijivije. ¹⁸ Daxita

mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonae. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamonaecatotsipaebavanapa nijumelivaisi itsamonaejavabelia, bajarapamonae jane baja rajutsianame xua toxainame bajarapamonae nerajutsinexa. Pamonaeyaijamatabëcuene pexainaevi ata, cavënëlivaisiyaiyatane. Pamonaebveliajamatabëcuene pexainaevi ata, cavënëlivaisiyaiyatane. Bajarapamonae ata jane baja rajutsianame xua toxainame bajarapamonae nerajutsinexa. Tocopiapatatsinua baja pijinia neverebiabinexa daxita pamonaebijiana mapanacuae, pamonaeta jamatabëcuenebijiana pecajumecovënëtsivi,

jai tsanubenaerataeya ancianovi Diosojavabelia.

¹⁹ Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenaepacuenia Dioso najumecapanepaeya jumaitsi pijajivi pecapanepaenexa pijaneconivecua. Yamaxë binebinejai. Najumetanua. Ira najëabanua. Bitso pecainejebimatarejetonë irabetsica othopaica pinijicuenia.

12

Pacuenia Juan athëbëtatsia tane dragón bitso pianaepanaejava yabara pelivaisi

¹ Athëbëtatsia ayaicuene naitajëta vajanacayapëtaeyaexanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtatsia petiriva taenutajë. Petiriva jumanava naitayotanuca. Pacuenia matcabipijijuameto baitayota, bajarapacuenia jumanava naitayotanuca. Meravipijijuametojavavelia nataxunutanuca. Namataxatatatanuca doce patuluputobeje pexainae corona. ² Bajarapova petiriva penacueto peyacotajinaeva. Pevixaenotsijavatatsi bitso yaaëajai. ³ Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. ⁴ Bajaraponë, dragón, nabosovebabia. Nexata penabosovebabejavata tulupu ayaijava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtatsia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxixaenexatsi picani. ⁵ Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuata jivi pepo pevetsinë tsane. Itsa evetsiana, ajumesaëya itorobabiabiana pejumecovënëtsinexatsi. ⁶ Nexata petiriva penacuetonëyo pevecuanaexanaecujinaetsi, najetabajirava petusato nacuyabelia, itsabelia Dioso tsivajënaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

⁷ Bajaraxuacujinae athëbëtatsia vajabitsaë exana. Angelevi penamata-caitorobinë, Miguelvënënë, pijaängelevi yajava, barënabia dragónjavabelia. Dragón pijinia, pijaängelevi yajava, barënabia Migueljavabelia. ⁸ Itsiata baitsi jane dragón cujiruumoneyabatsi. Nexata apo tocopatsitsi caenë ata dragón pijajivitonë penacopatsinexa athëbëtatsia. ⁹ Dragón cajena ayainëxaneto. Itsiata baitsi jane xuabocatsi athëbëvetsica daxita pijajivi yajava. Nexata bajaraponë pevënë Dovathi. Itsavënë Satanás. Bajaraponë bajayata itsa naitajëta jivijavabelia, naitajëta bejomocuenia. Bajaraponë jivi yamaxëitojorobabiaba daxitanacuanëjjava.

¹⁰ Nexata jumetaniji pinijijumeta athëbëvetsica pejumaitsijava. Jumaitsi mapacueniaje:

—Copiapata rabaja Dioso vajanacacapanepaejavanexa vajanekonivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacueni tsipaji baja ponë neconitabiaba Diosojavabelia Dioso vajanajuajumecovënëtavanapaevi, bajaraponë baja xuabocatsi athëbëvetsica. Baitsi dovathi. Bajaraponë picani Dioso pitabarattatsia nuca. Nexata bajaraponë daxita matabijebi, daxitameravijebi ata, Diosojavabelia neconitabiaba Dioso vajanajuajumecovënëtavanapaevi. ¹¹ Dioso vajanajuajumecovënëtavanapaevi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuacovënëtavanapaevi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi. ¹² Athëbënacuatatsia panejinavanapaevi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajjobimë tsane. Paxamë ata, manuameneta panejinavanapaevi, bitso cajena bepajjobimë tsane. Bajarapacuenia bitso bepajjobimë tsane tsipaji baja panetuatuajëatsica dovathi xuabocatsi. Nexata baja aeconxae bitso bajaraponë anaepanaponapona. Tsipaji baja yapëtane caematacabibeje saya peponacopatsijavatsi pexuabinexatsi infiernojavabelia, pejaijume athëbëvetsica pinijijumeta, jumetaniji.

¹³ Nexata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo. ¹⁴ Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponaponaenexa. Nexata bajarajotalia Dioso rajutabiabatsi pexaejava acueyabi pavaibeje epatua. ¹⁵ Dragón pecuibovojojuatsina capitsapa mera, ayaira. Pecuibovojojuatsina pepitsapaemera naexana pepamene pecaponaenexatsi picani petiriva. ¹⁶ Itsiata baitsi jane petiriva Dioso yavenonatsi. Ira nexata navoconareca ayajava. Nexata pamerami dragón pecuibovojojuatsina pitsapaina, bajarapamëthëareca joneca. ¹⁷ Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyebinexa. Bajarapamonae jumecovënëtavanapa Dioso pejumelivaisi pitorobicueniatsi. Bajarapamonae caasaë tsavanapaenua penavajunupaebijava Jesucristo pejume-

covënētavanapaejava. Nexata bajarapamonae dragón tsimaxëponatsi pe-beyejebinxatsi.

13

Pacuenia piayainëbeje pelivaisi Juan yaquina yabara pelivaisi

¹ Nucajë manuamene tajetabota. Nexata taenucajë manuamenejavatsina pepitsapaejavatsina piayainë. Siete pamatabocotobeje diez pamataetobeje pexainaenë. Caemataeto canacujitsia xainapona corona. Caematabocoto canacujitsia Dioso apo pejitsipaevënëanë itanerubena. ² Ponë piayainë taenucajë pepitsapaejavatsina, benevëthë picani. Itsiata petaxu betsonëtaxu. Pecuibovojoto pijinia benevëthë petso-bianëcuibovojoto. Bajaraponë nasaërajutatsi dragón. Pijatrono ata rajutatsi. Jamatabëcuene caëjëpaeyaexanatsinua ayaicuenia pitorobinexa daxitajivi mapanacuajavaje. ³ Piayainë caematabocoto matabocovajënëbatsi apo bepeyaasaëvajënënexa itajara. Itsiata baja bajarapavajënë matanacëta. Nexata daxitanacuanëpijivi itsa tane bajaraponë pematavajënënacëtsijava, bitso jamatabëcuenenabenajaca. Nexata bajarapamonae jumecovënëta bajaraponë. ⁴ Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematatabacabëta navajëcabiaba dragónjavabelia. Pematatabacabëta navajëcabiabanua piayainëjavabelia ata. Bajarapamonae najumaitsi mapacueniaje:

—Ajibi cajena itsanë ata pejamatabëcuenecaëjëpaenëtsi pacuenia itsi mapapiayainëje. Ajibi cajena itsanë ata pecaëjëpaenëtsi pebarënabenexa maponëje pecueneamoneyabinexa, najai bajarapamonae piayainë yabara.

⁵ Piayainë tocopatatsinua pibisiacuenia Dioso pebaracuaicuaijainexa. Tocopatatsinua pejumaitsiabinexa: “Xanë cajena bitso ayaijamatabëcuenenë Dioso matatoxenetsia,” pejaitsiabinexa. Tocopatatsinua pitorobinexa jivi mapanacuajavaje cuarenta y dos pajumetobeje, baitsi acueyabi pavaibeje epatua. ⁶ Bajaraponë exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athëbëtatsia pejinavanapaevi ata pibisiacuenia baracuaicuaijai tsabiabi. ⁷ Tocopatatsinua vajabitsaë pexanaenexa Dioso pijajivijavabelia. Tocopatatsinua pecueneamoneyabinexa vajabitsaë itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanëpijivi ata. ⁸ Nexata daxita mapanacuapijivije pematatabacabëta navajëcabiaba piayainëjavabelia. Dioso nacua pexanaevajënaeya, Dioso nacua pexanaecujinae ata, bajarapamonae apo vënërubenae Corderonë pijacuyalatobaxutota. Corderonë jivi rajuta maticabi apo pevereverecaejava pesivatëpaexae cruzata.

⁹ Itsa pamuxuvojorubename, panatojumetaema mapalivaisije. ¹⁰ Pamona Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamona pijinia Dioso pijajivi espadata bona, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejibiaexanabiabi atatsi, xanepana xaniavaetsia penajamatabëcuenecopatsinexa Diosojavabelia epatua copatsinejeva.

11 Bjaraxuacujinae icatsia taenucajè iravetsina pepitsapaejava itsanè piayainè. Anijamataetobeje pexainenè. Pacuenia oveja pebito mataeitsi, baja pemataeitsinè. Itsiata baitsi jane pecuaicuaijajava, pacuenia dragón pecuaicuaijajava jumeitsi, bajarajumeitsi. 12 Papiayainè copiaya pitsapaina manuamenejavatsina, bajaraponè yjavaponapona. Nexata papiayainè copiaya pitsapaina manuamenejavatsina, nasaerajuta iravetsina papiayainè cotocaevi pitsapainajavabelia. Nexata papiayainè cotocaevi iravetsina pitsapaina, daxita mapanacuapijivi itoroba papiayainè copiaya manuamenejavatsina pitsapainajavabelia pematatabacabèta penavajècaenexa. Baitsi ponè apo bepeyaasaèvajènènexa itajara matavajènènacèta baja, bajaraponèjavabelia daxita mapanacuapijivije pematatabacabèta penavajècaenexa. 13 Nexata papiayainè iravetsina cotocaevi pitsapaina, ayaicuene pexanaejava jivi tsitaexanapona. Pitatsajaviitairè ata athèbèvetsica othopaeyaexana irabetsica daxitajivi petaenubenaevata. 14 Bjarapacuenia ayaicuene pexanaejava pexanaponaexae, yamaxèitojoroba mapanacuajava pejinavanapaevi. Bjarapaayaicuene exanapona, papiayainè copiaya manuamenejavatsina pitsapaina, pitabarata. Bjaraxuacujinae, papiayainè cotocaevi iravetsina pitsapaina, itorobapona Dioso apo pejumecovènètsivi pexanaenexa pejumapecataenè. Nexata Dioso apo pejumecovènètsivi, papiayainè copiaya manuamenejavatsina pitsapaina, bajaraponè jumapecataeya exana jane baja. 15 Nexata papiayainè cotocaevi iravetsina pitsapaina, caèjèpatsi piasaèyaexanaenexa Dioso apo pejumecovènètsivi jumapecataeya pexanaenè. Nexata asaèyaexana. Bjarapacuenia asaèyaexana papiayainè copiaya manuamenejavatsina pitsapaina Dioso apo pejumecovènètsivi jumapecataeya pexanaenè pecuaicuaijainexa. Pamonaè pematatabacabèta apo nanavajècae bajarapajumapecataenèjavabelia, beyaxuabiaexanapona. 16 Papiayainè cotocaevi iravetsina pitsapaina, bajaraponè jane baja pejamatabècueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponè pejamatabècueneta itanerubaponatsi daxitajivi. Itanerubaponatsi beveliajamatabècuenevi. Itanerubaponatsi ayaijamatabècuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaè ata dajubicuenia canajetatsi itsamonaejavabelia amoneya petonacuenebabiabinexa. Itanerubaponatsi pamonaè ata dajubicuenia apo canajetsitsi itsamonaejavabelia amoneya petonacuenebabiabinexa. 17 Nexata pajivi aitanèjibi, apo tocopatsitsi itsacuenèjavayo ata pecomuatsinexa. Apo tocopatsitsinua itsacuenèjavayo ata pecanajetsinexa. Paitanetota jivi itanerubaponatsi, papiayainè copiaya manuamenejavatsina pitsapaina, bajaraponè pevènè. Itsa apo pevènè, nexata pijanúmero. 18 Mapajamatabècuenelivaisi bepacanaèjètameje xaniavaetsia paneyapètaenexa. Pajivi yapètane, canaèjètsi piayainè pijanúmero. Tsipaji bajaraponè panúmero xaina pevènènexa. Panúmero bajaraponè xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxèanaejava

yabara pelivaisi

¹ Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonae pitapathaitota itanerubena Corderonë pevenë, Corderonë paxa ata pevenë. ² Bajaraxuacujinae jumentaniji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijijonca. Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta, ayaibitsaëtoxaneto itsa najuaracata. ³ Corderonë pijajivi naxëanaubena pejanavaji trono pitabarata, cuatro ponëbeje piaithiavi pitabarata ata, ancianovi ata pitabarata. Itsajivi ata cajena apo cajëpatsi pecujaninexatsi bajarapavaji. Pamonaeciento cuarenta y cuatro mil pajivibeje, ëbajarapamonae, cajëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapebijivi penaexanaejavaverenacujinae apo naperabëquenetsiatae petirivajavelia. Apo jamatabëcuenebijianaetsi itsajivi ata. Bajarapamonae pënanjavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavelia mapanacuavecuaje. Bajarapamonae baja namataxaineya capanepatsi Dioso pijajivinexa, Corderonë ata pijajivinexa. ⁵ Bajarapamonae caeto ata apo najumetsënëtsi. Aneconijibi tsavanapae Diosojavelia.

Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnë taniji pepunanajetarucaejava. Canajetaruca pexanialivaisi, apo pevereverecaelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanëpijivi, daxitaviriajumevi ata. ⁷ Ángelnë pinijijumeta jumai tsanajetarucæ:

—Dioso cujunaviaya pajinavanapare. “Xamë bitso ayaijamatabëcuenenëmë,” pajamëre tsabiabi Diosojavelia. Copiapata rabaja Dioso penaneconitsiaexanaponaenexa daxitajivi. Ponë itaboxo exana, ira ata, manuamene ata, mera pepitsaparubenaiejavanë ata, bajaraponëjavavelia panematabacabëta panavajëtabiabare, jai tsanajetarucæ ángelnë pinijijumeta.

⁸ Icatsia cotocaevi taniji itsanë ángelnë pepunanajetarucæejava. Jumai tsanajetarucæ bajarapaángelnë:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajëcabiaba jumapecataeya pexanaenëanëjavavelia. Nexata belia daxitanacuanëpijivi ata navajëcabiaba jumapecataeya pexanaenëanëjavavelia. Babilonia tomarapijivimi jumapecataeya pexanaenëanëjavavelia penavajëcaejamatabëcueneta, jamatabëcuenebijianapona daxitanacuanëpijivi. Nexata pacuenia pevitota pibisiacuene pexanabiabiva pejamatabëcueneta, daxitajivi jamatabëcuenebijianapona, bajara pijinia pacuenia Babilonia tomarapijivimi ata jumapecataeya pexanaenëanëjavavelia penavajëcabiabijamatabëcueneta, jamatabëcuenebijianapona daxitanacuanëpijivi. Bajaraxuata bajarapacuenia verebiabatsi, jai tsanajetarucæ ángelnë, ponë cotocaevi taniji pepunanajetarucæejava.

⁹ Bajaraxuacujinae icatsia taniji acueyabiángelnë pepunanajetarucaeva. Bajarapaángelnë pinijijumeta jumai tsanajetarucaeva:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainë pevenëta pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia.

¹⁰ Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaicuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabëfaenaena Dioso pijaánglevi pitabarata, Corderonë ata pitabarata.

¹¹ Athëbëabetsia bajarapaisototsëxë junaenia daxitamatacabijavabelianexa. Ayaicuenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabëfaenaevava, caeapatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi itsa nacopatanua piayainë pevenëta pitanerutsinexatsi, bajarapacuenia Dioso naneconitsiaexanaenatsi. ¹² Bajaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Becaasaënuva tsavanapae Jesúsjavabelia penajamatabëcuenecopatsijava, jai tsanajetarucaeva acueyabi ángelnë pepunanajetarucaevavata.

¹³ Bajaraxuacujinae jumetaniji athëbëvetsica tanejumaitsijava. Nejumaitsi athëbëvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenebarëya baja tsavanapae tsane pamonae tëpapona Dioso pepua pejumecovënëtsivi,” pejaiitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenebijava. Pamatacabi abaxë bajarapamonae asaë tsavanapae mapanacuataje, daxita xua pexaniacuene exanavanapa, bajaraxuajamatabëcuene Dioso athëbëtatsia matamotsianatsi. Bajaraxuata jamatabëcuenebarëya tsavanapae tsane bajarapamonae, nejai Espiritu Santo.

Pacuenia itsamatacabi Dioso naneconitsiaexanaejitsia daxita pamonae pijaneconi pexainaevi yabara pelivaisi

¹⁴ Icatsia taniji penioponaeitarërëbo. Bajarapaitarërëbo tuatujëta jivitonë eca. Itarërëbo tuatujëta peecaenë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Namataxatateca orocorona. Cobenaeca bemasete pexiujaijava pecacubinea penaveretsiruanë. ¹⁵ Nexata icatsia itsanë ángelnë pitsaparena temploboënëverena. Bajarapaángelnë asaëyata vavajai itarërëbo tuatujëta peecaenëjavabelia. Jumaitsi bajarapaángelnë:

—Caucubare jane baja penaveretsiruanë mapanacuayaberecaje. Copiapata rabaja pecaatuatsinexa penaveretsixu mapanacuatarecaje, jai ángelnë, ponë pitsaparena temploboënëverena.

¹⁶ Nexata bajaraxuacujinae ponë eca itarërëbo tuatuajëta, bemasete pexiujaijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

¹⁷ Bajaraxuacujinae icatsia athëbëtatsia itsaángelnë pitsaparena temploboënëverena. Bajaraponë ata capona bemasete pexiujaijava pecaucubinexa penaveretsiruanë. ¹⁸ Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje:

—Mapanacuayaberecaje caucubaremeca daxita uvaruanë, penaveretsiruanë, jai.

¹⁹⁻²⁰ Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pemarëbeneyujubataxuabijavata, pinijianaraxaneto pitsapapona. Nexata bajarapajaraxaneto navotanucapona. Bajarapajaraxaneto penavotanucaponaejava, piapiajava xaina trescientos pakilómetrobeje. Piavajubuajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxuabinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaibitsaëttoxanetonë tēpaena. Nexata bajarapacuenia ayajiana xuabiana.

15

Pacuenia Juan tane athëbëtatsia siete ponëbeje ángelevi, siete xuabeje piayajavanë pecaponaevi peverebiabinexa mapanacuaje, yabara pelivaisi

¹ Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenajacajë bitso. Siete paángelnëbeje capona siete xuabeje piayajavanë peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaejava, copiarucaena baja.

² Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonae nubena bajarapamene boxojumavereca, itorobi atatsi bajaraponëbejejavabelia pematatabacabëta pevajëcaenexa, apo jume-covënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi. ³ Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata

pevaji. Penaxëanaejavata, bajarapamonae vajita jumai tsanubenae mapacueniaje:

Xamë Diosomë, nijamatabëcuenesaënë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë. ⁴ Daxitajivi xamë pecacujunavinë tsane. “Dioso cajena bitso ayaijamatabëcuenenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberena patsiana pematabacabëta xamëjavabelia penavajëcaenexa. Bajarapacuenia catoitsane tsipaji baja daxitajivi tane ëpexaniacuene nexanaponaponaejava,

jai tsanubenae Diosojavabelia bajarapamonae penaxëanaejavata.

⁵ Bajaraxuacujinae icatsia taniji athëbëtatsia templobo ënëtuatuajëalia peyatuucutsipana penapatsijava. Bajara paënëyatuucutsijavaënëta bajayatami Dioso Moiséspijinëta penajumecopatsilivaisi peyaquinaei-bopananë xaniavaetejeba. ⁶ Bajarapatemploboënëverena pitsaparena siete paángelnëbeje. Bajarapamonae capona siete xuabeje piyaijavanë, bajaraxuanëta mapanacuaje peverëbiabinexa. Bajarapaánglelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë. ⁷ Bajaraxuacujinae pamonaе cuatro ponëbeje piaithiaviyajuvënënë, ángelevijavabelia rajuta copanë. Piayainë caeángelnë canacujitsia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponaenë, ayaicuenia anaeya naneconitsiaexanaena pamonaе naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. ⁸ Bajarapatemplobo tuatuajëmi bitso vënëca ëtsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo caëjëpaetsi pejonenexa bajarapatemplobo ënëtuatuajëabelia. Xuanë siete paángelnëbeje capona, piyaijavanë, itsa baja panepaena, matapania jivi caëjëpaenatsi pejonenexa bajarapatemplobo ënëtuatuajëabelia.

16

Pacuenia Juan tane athëbëtatsia pacuenia itsamatacabi Dioso naneconitsiaexanaejitsia daxita pijaneconi pexainaeви yabara pelivaisi

¹ Icatsia jumetaniji templobojavaverena pinijijumeta pejumaitsijava. Siete paángelnëbejejavabelia jumaitsi mapacueniaje:

—Paponare baja iranëjavabereca paneepacaponaenexa jane baja xuanë siete pacopabeje vënëca, piyaijavanë. Dioso jane baja anaeya ayaicuenia penaneconitsiaexanaenexa, daxita pamonaе naneconita bajaraponëjavabelia, pejaijava, templobojavaverena jumetaniji.

² Nexata jane baja pona penamataxainaeángelnë. Pecaponaera epatajaraba iranëjavabereca. Nexata daxita pamonaе piayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane bajarapamonae. Bajarapamonae bajarapapiayainë jumapecataeya pexanaenëtsijavabelia ata pematabacabëta penavajëcaevi.

3 Bjaraxuacujinae icatsia pecotocaeviángelnē pijacopapijira epatajaraba manuamenejavabereca. Manuamenemi nexata naexana bepetēpaenē pijanara. Daxita baja tēpa manuamēneta pejinavanapaevimi.

4 Bjaraxuacujinae icatsia acueyabiángelnē pijacopapijira epatajaraba menianējavabereca mera, iravetsina pepitsaparubenaējavanējavabereca ata. Nexata daxita bajarapameranēmi naexana ēpijanaranē. 5 Bjaraxuacujinae jumetaniji mera pevetsiángelnē pejumaitsijava Diosojavabelia. Jumaitsi mapacueniaje:

—Diosomē, caeto ata pibisiacuene apo nexanaenē. Ajena, pamat-acabi, ponaponame. Bajayata mapanacuaje nexanaevajānaeya ata, ponaponame. Pibisiacuene pexanaevi, paneconivajēto xaina, bajarapaneconivajētota naneconitsiaexaname. Bjaraxuata meranēmi pijanaranē naexanaeyaexaname. Tobijianame meranē piayainē pijajivi bajarapameranē penatsiapaenexa. 6 Bjarapamonae bajayata beyejeba nijajivimi. Pamonaē ata cavajunupaebapona, beyejeba. Bjaraxuata bajarapacuenia meranē pijanaranē naexanayaexaname penatsiapaenexa bajarapamonae, jai Diosojavabelia mera pevetsiángelnē.

7 Icatsia jumetaniji itsaángelnē altarjavaverena pejumaitsijava. Jumaitsi mapacueniaje:

—Xamē Diosomē, niajamatabēcuenesaēnē daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajēto xaina, bajarapaneconivajētota bananeconitsiaexaname. Itsa aneconijibi tsipae, nexata cajena apo naneconitsiaexanaemē tsipae, pejajjava itsaángelnē altarjavaverena jumetaniji.

8 Bjaraxuacujinae icatsia cuatroángelnē pijacopapijira epatajaraba. Epatajaraba matabibipijijuametojavabetsica. Nexata matabibipijijuameto pecotiata jivi bitso ayaicuenia tsajavatsi. 9 Itsiata bajarapamonae apo copabi pibisiacuene pexanabiabijava. Apo najamatabēcuenepēnēyorotsi Diosojavabelia. “Xamē bitso ayaijamatabēcuenenēmē,” apo jai ata cajena Diosojavabelia. Biji rajane Dioso, ponē caējēpatsi daxitacuene pexanaenexa, bajaraponē caranata pibisiacuenia baracuaicuijai.

10 Bjaraxuacujinae icatsia cincoángelnē pijacopapijira epatajaraba. Epatajaraba piayainē pijatronojavabereca. Piayainē jane baja pevetsinacuami aitaquiri tsanucae. Piayainē jane baja pijajivi bitso penavixaetaexae, navonosine. 11 Itsiata baitsi jane bajarapamonae apo copabi papibisiacuene exanavanapa. Apo najamatabēcuenepēnēyorotsi Diosojavabelia. Biji rajane Dioso, ponē athēbētatsia peecaenē, bajaraponē caranata bajarapamonae pibisiacuenia baracuaicuijai. Bjarapacuenia bajarapamonae Dioso pibisiacuenia baracuaicuijai penavixaetaexae, bitso peperabētsabanaexaenua.

12 Bjaraxuacujinae icatsia seisángelnē pijacopapijira epatajaraba. Epatajaraba pinijimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranē pevetsivi penicabinexa, penajetarubenaēvi orientejavavetsina.

13 Bjaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanē pitsapa dragón pecuibovojotuatsina. Itsanē pitsapa piayainē pecuibovojotuatsina.

Itsanë pitsapa peyamaxëitojorobiprofetanë pecuibovojotuatsina. ¹⁴ Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatuona jivi vajabitsaë pebarëexanaenexa Diosojavabelia. Dioso pijamatabëcuenesaënë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaitsi. ¹⁵ Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcueneaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejajjava Jesús, jumetaniji. ¹⁶ Nexata jane baja dovathi pijajivi caetuatsi daxitanacuanë pevetsivi. Caetuatsi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteanğelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatuajëta Dioso pecaetronojavaverena pinijijumeta jumaitsi:

—Daxita rajane baja vereta, jai athëbëtatsia templobo ënëtuatuajëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarpacuenia itsanacuanëpijitomaranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. ²⁰ Itsa ira najëaba, daxitatunaetonëmi, daxitatsutonëmi ata, ajibi baja. Ira namatajëpa baja. ²¹ Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejava cuarenta pakilobeje. Nexata mapanacuapijivi pibisiacuenia Dioso baracuaicuaijai. Tsipaji athëbëvetsica piothopaejava, bitso pecainejebimatarejetonë, bitso piayaicuene.

17

Pacuenia itsamatacabi Dioso naneconitsiaexanaena pamonae navajëcabiaba jumapecataeya pexanaenëanëjavabelia yabara pelivaisi

¹ Pamonae siete paanğelnëbeje, siete pacopabeje pecaponaevi, bajarapaanğelevijajuvënënenë, caenë rena xanëjavaberena. Bajarapaanğelnë nejumaitsi:

—Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxoyojavata. Bajarapatomarapijivi Diosojavabelia apo navajëcabiabi. Caranata saya navajëcabiaba jumapecataeya pexanaenëanëjavabelia. Nexata pacuenia petiriva pevitota bitso

pibisiacuene pexanabiabiva jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabëcueneta jamatabëcuenebijiana itsamonae ata. Bajara pijinia pacuena Babilonia tomarapijivi ata pexanabiabijava pejamatabëcueneta, jamatabëcuenebijiana ayaibitsaëtoxaneto itsanacuanëpijivi ata. ² Tsipaji itsanacuanë pevetsivi patabiaba Babilonia tomaraberena. Nexata bajarapamonae ata copaba Diosojavabelia penavajëcabiabijava. Caranata saya Babilonia tomarapijivi cuenejëpaeya navajëcabiaba jumapecataeya pexanaenëanëjavabelia. Nexata jamatabëcuenebijianatsi bajarapamonae ata, nejai bajarapaángelnë.

³ Bajaraxuacujinae Espíritu Santo netsijamatabëvënëca. Nexata bema-jitsinaebota ángelnë nebarëpona petusato nacuayabelia. Bajarajotalia taeyetajë petiriva. Bajarapova eca piayainë, petsobianë, pejumata. Bajaraponë peperabëtuareca, Dioso apo pejitsipaevënëanë, itanerubena. Bajarapapiayainë xaina siete pamatabocotobeje diez pamataetobeje. ⁴ Nexata bajarapova penaxatatsijavareca itsajava pabanaeya saëjai. Itsajava tsohia. Naitabëteca orojavanëta, perlavënëjavanëta ata, penamatamotsiibotonëta ata. Cobenaeca orocopa. Pibisiacuene bitso pexanaejava pevitota, bajarapajamatabëcuenelivaisi vënëca bajarapacopata. ⁵ Bajarapova pitapathaitota vënëyaquinarutatsi. Pajamatabëcuenelivaisi yabara bajarapova pitapathaitota vënëyaquinarutatsi, itsajivi ata apo yapëtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabëcuenebijianaejavatsi, jumapecataeya pexanaenëanëjavabelia penavajëcabiabinexa. Bajarapatomaraverena pitsapanua jivi pejamatabëcuenebijianaejavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vënëyaquinarutatsi. ⁶ Taeyetajë icatsia bajarapova. Aitajibi tsecae Dioso pijajivimi pijanarata. Pamonaе ata beyejebatsi pevajunupaebixae Jesús, bajarapamonaemi ata pijanarata aitajibi tsecae bajarapova. Bajarapítsecaejava itsa taniji, bitso baja cajena jamatabëcuenenajunaviacajë. ⁷ Nexata ángelnë nejumaitsi:

—¿Detsa xuajitsia jamatabëcuenenajunaviacame? Cayapëtaeyaexanaenatsi pajamatabëcuenelivaisi xaina mapovaje. Ponë piayainë siete pamatabocotobeje diez pamataetobeje pexainaenë, ponëjumata bajarapova eca, bajaraponë ata pajamatabëcuenelivaisi xaina, cayapëtaeyaexanaenatsi. ⁸ Mapapiayainë tanemeje, bajaraponë picani bajayata ponapona mapanacuataje. Itsiata baja aeconoxae bajaraponë ajibi. Itsiata baitsi jane itsamatacabi pinijimëthëxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponëmi beyaxuabianatsi pepacuene jane baja bajaraponë pecopiarucaenexa. Daxita mapanacuapijivije, pamonaе Corderonë pijacuyalatobaxutota apo vënërubenaе Dioso nacua pexanaevajënaeya, Dioso nacua pexanaecujinae ata, bajarapamonae matacabi apo pevereverecejava apo xinae tsane. Bajarapamonae jamatabëcuenenajunaviacaena piayainë itsa pitsapaenina pinijimëthëxanetojavatsina, nejai ángelnë.

⁹ Icatsia ángelnë nejumaitsi:

—Pamonaе baja peyapëtaevi, pamonaе baja caëjëpatsi pejumeyapëtaenexa, bajarapamonae pejumeyapëtaenexa mapalivaisije.

Papiayainē xaina siete pamatabocotobeje, ponējumata taeyetame petiriva, anijajamatabēcuenelivaisibeje itajēta. Bajaraponē pematabocotonē, siete pamatabocotobeje, mapajamatabēcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabēcuenelivaisi yajavaxainaje. ¹⁰ Siete rabaja pijinia ponēbeje Babiloniatomara pevetsivi. Nexata Babiloniatomara pevetsiviyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi pevetsinexa. Itsiata sietenē itsa evetsiana, bajayajebi apo evetsi tsane. ¹¹ Papiayainē, petsobianē, taneme, mapajamatabēcuenelivaisi xainaje. Bajaraponē picani bajayata eveta Babiloniatomara. Itsiata baja aeconoxae bajaraponē apo evetsi. Tsipaji baja tēpa. Itsiata baitsi jane icatsia bajaraponē pinijimēthēxanetojavavetsina pitsapaenina Babiloniatomara icatsia pevetsinexa. Nexata icatsia bajaraponē itsa evetsiana, ochonē baja evetsiana Babiloniatomara. Bajaraponē abaxē bajayata itsa ponapona, siete ponēbeje Babiloniatomara pevetsiviyajuvēnēnēmi baja cajena. Bajaraponē icatsia Babiloniatomara itsa evetsiana, pevetsicujinae bajaraponēmi beyaxuabianatsi pepacuene jane baja bajaraponē pecopiarucaenexa, nejai ángelnē.

¹² Icatsia ángelnē nejumaitsi:

—Ponē piayainē pemataetonē taneme diez pamataetobeje, mapajamatabēcuenelivaisi xainaje. Diez rabaja pijinia ponēbeje, itsamatacabi nacuanē evetsiana. Nexata bajarapamonae itsamatacabi nacuanē itsa evetsiana, evetsiana diez panacuabeje. Tsipaji caenē canacujitsia evetaponaena caenacua. Bajarapamonae abaxē apo taxuxuabi bajarapanacuanē pevetavanapaenexa. Itsiata baitsi jane itsa taxuxuabijitsia nacuanē jane baja pevetavanapaenexa, copatsianatsi pijanacuanējava pevetsinexa saya caeepatoyovajēto. Bajarapamonae itsa evetsiana pijanacuanējava, piayainē barēevetsianatsi. ¹³ Pamonae diez ponēbeje, diez pijinia panacuabeje itsamatacabi itsa evetsiana, barēhajamatabēcuenējēpaenatsi piayainē. Nexata bajarapadieze ponēbeje jumaitsi tsane piayainējavabelia:

—Xamē pacatocopatsianatsi patanematacaitorobinēnexamē, jai tsane.

¹⁴ Pamatacabi bajarapadieze ponēbeje evetavanapaena pijanacuanē, piayainē vajabitsaē barēexanaenatsi Corderonējavabelia. Daxita pamonae Corderonē pijajivi, pamonae Dioso pejunatsivi, bajarapamonae pijinia Corderonē barēbena piayainējavabelia. Nexata Corderonē cueneamoneyabiana piayainējavabelia. Cueneamoneyabiana tsipaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai ángelnē.

¹⁵ Angelnē icatsia nejumaitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinavanapa jivibitsaētoxanetonē daxitaviriajumevi, daxitanacuanēpijivina. Bajarapajamatabēcuenē yabara taneme bajarapamanuamene. ¹⁶ Pamonae diez panacuabeje pevetsivinexa, bajarapamonae piayainē barēitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae

tajuitsiana isotota. ¹⁷ Pamonae diez ponëbeje itsamatacabi nacuanë ita evetsiana, bajarapamonae najamatabëcuenejëpaena petocopsinexa piayainë pijanacuanë petoevetsinexatsi. Bajarapacuenia najamatabëcuenejëpaena tsipaji baja cajena Dioso jamatabëcueneitorobatsi bajarapacuenia pexanaenexa bajarapamonae. Nexata piayainë bajarapamonae pijanacuanë bajayajebi toevetsianatsi matapania pecopiapatsijavabelianexa daxita pacuenia Dioso tajëvelia najumecapanepaeya jumaitsi. ¹⁸ Pova pibisiacuene pexanaeva taeyetame manuameneboxovereca, bajarapova mapajamatabëcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabëcueneta mapanacuanë pevetsivi pibisiacuene exanapona, nejai ängelnë.

18

Pacuenia Babilonia tomaraxanetomi copiaruca yabara pelivaisi

¹ Icatsia itsaängelnë taniji perunaejavatsica athëbëvetsica. Caëjëpatsi pinijicuenia piayaicueene pitobinexa. Bajarapaängelnë pinijicotia yajavarunaica. Ira itayota daxitanacuanëjava. ² Ayaijumeta vavajai. Jumaitsi mapacueniaje:

—Verebiabijtsiatsi rabaja Babilonia tomaraxanetota pejinavana-paevi. Nexata baja ëjoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiavirivai pepunaevi, pamonae daxitajivi apo itajitsipae petaenexa, juya bajarapatomarata jinavanapaena. ³ Babilonia tomarapijivi navajëcabiaba jumapecataeya pexanaenëanëjavabelia. Nexata belia daxitanacuanë pevetsivi ata, pijajivi yajava, navajëcapona jumapecataeya pexanaenëanëjavabelia. Nexata Babilonia tomarapijivi jumapecataeya pexanaenëanëjavabelia penavajëcabiabijamatabëcueneta, daxita xua pibisiacuene pexanaejamatabëcuenetanua, jamatabëcuenebijanapona daxitanacuanëpijivi. Babilonia tomarapijivi bitso xainapona ayaijava palata pibisiacuene pexanaejamatabëcueneta. Nexata pijinia pamonae Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijtsiatsi, jai ängelnë.

⁴ Bajaraxuacujinae icatsia athëbëvetsica jumetaniji itsajume. Jumaitsi mapacueniaje:

—Paxamë patajajivimë, papitsapare baja Babilonia tomaravecua. Papitsapare baja pibisiacuene paxamë ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayaijava xaina. Pijaneconi ita napebetsipa, ita najumaetaponaejitsipa, nexata copiapatsipa itaboxojavabetsia. Dioso cajena yapëtane daxita Babilonia tomarapijivi pibisiacuene pexanaejava. ⁶ Bajarapamonae bejiobiaexanabiaba itsamonae. Nexata Dioso ita naneconitsiaexanaena, bajarapamonae bitso ayaicuenia bejiobiaexanaena. ⁷⁻⁸ Babilonia tomarapijivi bitso beayaijamatabëcuenevi natane. Natocomuacabiaba ayaijava penamatamotsijavanë pibisiacuene

pexanabiabimatamota. Bajarapamonae pejamatabëethëtota jamatabëjumaitsi tsabiabi: “Xanë raja majota ecajë nacua betaevetsinë. Nexata apo jamatabëcuenebëjanë tsane itsacuenejavayo ata yabara. Apo namatavenonaenë tsane itsacuenejavayo ata,” jamatabëjai tsabiabi bajarapamonae pejamatabëethëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuene, pematanueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenë Dioso bitso piasaënë.

⁹ Babilonia tomarapijivi pejamatabëcueneta daxitanacuanë pevetsivi jamatabëcuenebijiapanona. Nexata daxitanacuanë pevetsivi copaba Dioso pejumecovënëtsijavami. Natocomuacabiabanua ayaijava penamatamotsijavanë. Nexata bajarapamonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. ¹⁰ Bajarapamonae pecajunavi, tajë vecuanubenaena Babilonia tomarapijivimi itsa tajuenatsi. Bajarapamonae najumai tsane:

—¡Bitso baja rovia bejiobi mapamonaeje! ¡Pinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonae pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. ¹² Bajarapamonae capatabiaba oronanita pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petsobiajavanë. Capatabiabanua daxitavirianaajava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatotsinaejavanë ata, broncenani ata, hierronani ata, mármolvënëibo ata. ¹³ Capatabiabanua canelavënëjavanë, especiavënëjavanë ata, inciensovënëjavanë ata, mirravënëjavanë ata. Capatabiabanua petuxujviranë, vinoranë ata, aceiteranë ata, pexaniaviriatrigobenonë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa. ¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuenë pejetsipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxë itsa apo tajuettsi, pamonae pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. ¹⁶ Bajarapamonae daxita najumai tsanubena tsane:

—¡Bejiobitatsi bitso pinijitomaraxanetota pejinavanapaevimi! Bajarapatomarapijivimi naxatabiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavanëta, perlavënëjavanëta ata, penamatamot-siibotonëta ata. ¹⁷ ¡Caepatoyocujinae saya verevereca baja bitso pexainaevavami! najai tsanubena tsane daxita bajarapamonae.

Daxita pamona barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubena tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubena tsane.

¹⁹ Pamona tsëxëtaenubenaena, natsimataothocaena atsabenonë, bitso pesivanajamatabëxainaexae Babilonia tomarapijivimi. Yaitaxutonueya najumai tsanubena tsane:

—¡Bitso pinijicuenia bejiobitatsi pinijitomaraxanetomita pejinavana-paevimi! Babilonia tomarapijivimi ayaijava palata pexainaexae, bitso pexainaevi naexana daxita pamona barco pexainaevi, pecanajetabi-abixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubena tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecajava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëángelnë yotaxuaba ibotoxaneto. Bajara-paiboto pinijiibotoxaneto bitso. Nexata ángelnë manuameniabereca asaëyata xuabareca bajarapaibotoxaneto. Ángelnë jumaitsi mapacueni-aje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. ²² Ajumejibi baja tsane pijacallejava arpa peracatabiabijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiabijava pecaquiatabiibotoxanetota. ²³ Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaicuaijitsabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexainaejava pecanajetababavanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi

daxitanacuanējava yamaxëitojorobiaya penajorobabiabijava, jai bajarapaángelnē.

²⁴Dioso yapētane pacuenia Babilonia tomarapijivi pejamatabēcueneta, Diosojumepaebivimi profetavi beyejebiabatsi. Babilonia tomarapijivi pejamatabēcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹Bajaraxuacujinae jumetaniji jivi ayaibitsaētoxfaneto athëbētatsia. Pini-jijumeta jumai tsaponae mapacueniaje:

“Diosomē, ¡ayajamatabēcuenenēmē bitso!” jaitsi vaxaitsi Diosojavabelia. Bajaraponē nacacapanepa vajaneconivecua. Penivenivenaectia pexainaenē. Pijamatabēcuenesaenē bitso. Daxitacuene pexanaenexa pecaējēpaenētsi. ²Itsa naneconitsiaexana jivi, paneconivajēto xaina bajaraponējavabelia, bajarapaneconivajētota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabēcueneta jamatabēcuenebijianapona daxitanacuanēpijivi. Bajarapamonaemi pejamatabēcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamonaē,

jai jivi ayaibitsaētoxfaneto athëbētatsia.

³Bajaraxuacujinae bajarapamonaē icatsia jumaitsi:

—“¡Diosomē, ayajamatabēcuenenēmē bitso!” jaitsi vaxaitsi Diosojavabelia. Athëbëabetsia petsëxëjunaejavatsia Babilonia tomarapijivimi petajuetsëxëtsi, apo vereverecanucuae tsane daxitamatacabijavabelianexa, jai bajarapamonaē.

⁴Pamonaē veinticuatro ponëbeje ancianovi, pamonaē pijinia cuatro ponëbeje piaithiavi, daxita bajarapamonaē Dioso yayataeya irata bobena. Ira taenubena. Bajarapamonaē irata jumai tsanubenae Diosojavabelia, tronota peecaenējavabelia:

—¡Xanepana rabaja nexanaejava! ¡Bitso ayajamatabēcuenenēmē! jai tsanubenae irata bajarapamonaē Diosojavabelia.

⁵Bajaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayajamatabēcuene panexainaevi, bevelijamatabēcuene panexainaevinua, pexaniajamatabēcuene parajutabiabare vajaDiosojavabelia, jai tronojavaverena.

Corderonē penacasabifiesta yabara pelivaisi

⁶Icatsia jumetaniji ayaibitsaētoxfaneto jivi pecuaicuaijajava. Bajarapamonaē pecuaicuaijajava, jumetaniji bepinijijoncajume. Beyamaxëjume ata, ayajume, najumeta. Jumai tsaponae bajarapamonaē mapacueniaje:

VajaDioso pijamatabēcuenesaenē daxita mapanacuata jivi pevetsivi matatoxenetsia. Taxuxuaba rajane baja daxitanacuanējava Dioso jivi pevetsinexa. Bajaraxuata vaxaitsi jumaitsi: “Diosomē, ¡ayajamatabēcuenenēmē bitso!” jaitsi vaxaitsi Diosojavabelia.

⁷Sivajamatabēcuenebarëyatsi Dioso. Nexata tsipaebatsi

itsamonaejavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumaitsitsi tsipaji baja copiapata fiesta pexanaematacabinexa, Corderonë penacasabifianexa. Petiriva rabaja naxaniavaeta Corderonë penacasabivanexa. ⁸ Bajarapova rajutatsi bitso pexaniaviriapapaëbërëjava penaxatatsinexa, piaxuirajibijava, bitso peniojajjava, jai bajarapamonae.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparacióncuenia pejumaitsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconi yabara,” pejainexa picani. Bajarapajamatabëcuenelivaisi: “Bajarapova rajutatsi bitso pexaniaviriapapaëbërëjava penaxatatsinexa,” pejaijava comparacióncuenia.

⁹ Nexata bajaraxuacujinae ángelnë nejumaitsi:

—Yaquinare mapejumaitsilivaisije: “Jamatabëcuenebarëya pamonae junatatsi Corderonë penacasabifistajavaberena,” pejailivaisi. Daxita xua catsipaebatsi, bajaraxua pepacuenie Dioso taneitorobijava, nejai ángelnë.

¹⁰ Nexata tamatabacabëta tonucajunuajë ángelnë pitabarata. Pexaniajatabëcuene picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, Dioso panenajua-jumecovënëtsivi xaniavaetsia pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaexanatsi pamonae jivijavabelia tsipaebapona Dioso pejumelivaisi.

Pacuenia athëbëatsia Juan tane Cristo penioponaecaballojumata pecaejava yabara pelivaisi

¹¹ Taniji itaboxo penapatsijava. Tanijinua penioponaecaballo. Bajara-pacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. ¹² Pitaxutobeje naitayota. Pacuenia isoto bacotiatsobia, bajara itaxutocotiaitsi. Bajaraponë matapona ayaijava coronanë. Pitapata vënëruca. Itsiata baitsi jane itsajivi ata apo vënëyapëtaetsi. Eëbajaraponë pijacuata navënëyapëtane. ¹³ Penaxatatsijavareca tsobia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë. ¹⁴ Bajaraponë pënaponatsi vajabitsaë ayaibitsaëttoxaneto, athëbëpijivi. Bajarapamonae naxataba bitso pexaniaviriapapaëbërëjavanë, piaxuirajibijavanë, bitso peniojajjavanë. Bajarapamonae ata yapona penioponaecaballuanëta. ¹⁵ Ponë vajabitsaë barëexana, bajaraponë pecuibuatsina pitsapa pexiujaiespada penaneconitsiaexanaenexa daxitanacuanëpijivi. Bajaraponë daxitanacuanëjava jivi pevetsinënexa. Itsa evetsiana, ajumesaëya itorobabiabiana pejumecovënëtsinexatsi. Pacuenia uvaruanë itsa barëmeneyubataxuaba, ayailbarëmene pitsapa pexanaenexa vinoranë,

bajara pijinia pacuenia daxitanacuanëpijivi, pijaneconi pexainaevi, Dioso itša verebiabiana, ayaijana xuabiana. Dioso, ponë piajamatabëcuenesaenë daxitanacuanë pevetsivi matatoxensia, ayaicuenia naneconitsiaexanaena bajarapamonae pebaraanaepanaexae. ¹⁶ Ponë vajabitsaë barëexana, bajaraponë pijacamisajumavelia penaxatatsijavata, pevënëitanebërëtoyo ruca. Pethaëtojumata ata pevënëitanebërëtoyo ruca. Jumai tsarucae bajarapaitanebërëtoyo: “Maponëje daxitanacuanë pevetsivi ata pepo pevetsinë. Daxita petuxanevi ata pijatuxanenë,” jai tsarucae.

¹⁷ Bajaraxuacujinae taenutajë ángelnë, icotiata penucaenë. Piniijumeta vavajai tsanucae daxita quequeremonaejavabelia. Jumai tsanucacae mapacueniaje:

—Naxanitsia. Panacaetuanare payaibitsaëtoxanetomë ayaijava panenabaninexa Dioso pejamatabëcueneta. ¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piaitatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaemi dajubicuenia pecanajetsivimitsi itsamonaejavabelia amoneya petonacuenebinexa, apo pecanajetsivimitsi ata, bevelijamatabëcuene pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucacae ángelnë quequeremonaejavabelia.

¹⁹ Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënabia penioponaecaballota peponaenëjavabelia, bajaraponë pijajivijavabelia ata. ²⁰ Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevënëitanetota pitanerubaponaenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaenëbeje isotopucabelia. Bajarapapuca tajueyabiaba azufre yajava. ²¹ Nexata daxita bajaraponëbeje pijajivi, pamonaenacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonaemi pevi.

20

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

¹ Icatsia taniji ángelnë perunaejavatsica athëbëvetsica. Cobenarunaica pinijimëthëxaneto pijallave. Cobenarunaicanua ayaicadenamaëtoxaneto. ² Bajarapaángelnë vaetaba dragón, ponë pevënë Dovathi. Itsavënë Satanás. Bajaraponë dovathi bajayata itša naitajëta jivijavabelia, naitajëta bejomocuenia. Nexata ángelnë cëtabuata

dovathi mil pavaibejenexa. ³ Pinijimëthëxanetojavareca xuareca. Yavëpaxatabuata bajarapamëthëxanetojavareca. Pematatsënëa icatsia sellovëñëjavata yamëthëvëpajumacatsata. Nexata dovathi apo cajëpaetsi tsane peyamaxëitojorobinexa mapanacupijivi mil pavaibeje. Bajaraxuacujinae icatsia isinaenatsi caepatoyo icatsia jivi peyamaxëitojorobaponaponaenexa.

⁴ Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaex-anaenexa jivi, pijaneconi pexainaevi. Tanijinua itsamonae ata, pamonae bajayata vësiucubejebatsi. Bajarapacuenia bajarapamonaemi bajayata vësiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bajarapamonae apo navajëcae pematabacabëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevëñëitanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonaemi icatsia Dioso piasaëyaexanaejavatsi, taniji. Pacuenia ata bajarapamonae mil pavaibeje Cristo barëvetatsi mapanacuaje, taniji. ⁵⁻⁶ Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caecuenia ayaibitsaëto. ¡Pamonae copiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, pianeconijibivinua! Cotocaevi patëpaejavanexa, acuenebi baja itsacuene pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinexa, jivi petocuaicuajitsabiabivinexa Diosojavabelia. Bajarapamonae Cristo barëvetsianatsi mapanacuaje mil pavaibeje. Itsamonae petëpaevimi, pamonae abaxë nacopabanubena, Dioso icatsia asaëyaexanaenatsi bajarapamil pavaibejecujinae.

⁷ Itsa baja panepaena mil pavaibeje, dovathi icatsia isinaenatsi mëthëvecua pepitsapaenexa. ⁸ Pitsapaena icatsia jivi peyamaxëitojorobinexa daxitanacuanëjava. Bajarapacuenia yamaxëitojorobiana jivi ayaibitsaëtoxanetonë, Dioso apo pejumecovëñëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. ⁹ Bajarapamonae vajabitsaë copiata jivi benajetarubenaena daxitanacuanëjava. Bajaraxuacujinae matatoyoronaena jane baja Jerusaléntomara peverebabinexa picanì Dioso pijajivi, Dioso piasivatomarata, Jerusalén tomarata, pejinavanapaevi. Itsiata bailsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. ¹⁰ Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaëjava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaejitsia penioponaetrono pitabarata Dioso penaneconitsiaexanaenexatsi yabara pelivaisi

¹¹ Icatsia taniji penioponaetronoxanetojumata peecaenë. Bajaraponë nacua baja vereverecaeyaexana. Itaboxo ata baja vereverecaeyaexana. ¹² Taenubajë daxita petëpaevimi penubenaejava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabëcuene pexainaevimi. Itsamonae beveliajamatabëcuene pexainaevimi. Taeyejebajënuua cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonëta itanerubena daxita petëpaevimi pacuenia exanavanapa petëpaevajënaeya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamona matacabi apo pevereveceajava pexainaevinexa. Nexata caejivi canacujitsia Dioso pijaneconi petorutaponaexaetsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi. ¹³ Manuameneta petëpaevimi ata, daxita pitsapaina. Jivi ata petëpaecujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi. ¹⁴ Bajaraxuacujinae jivi petëpaeyaexanaejamatabëcuenemi, jivi petëpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patëpaejava petëpaeyaexanaepuca. ¹⁵ Pamona apo vënërubena, pabaxutota vënërubena pamona matacabi apo pevereveceajava pexainaevinexa, bajarapamonae peneliatsi bajarapapucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

¹ Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. ² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi. ³ Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. ⁴ Dioso itaxutobarëmeneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani vereverecaeyaexanajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipae-batsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumaitsi Dioso, tronojumata pecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë matababi apo pevereverecaejava. Tocopatsianajë bajarapamonae amoneya pexainaenexa matababi apo pevereverecaejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë. ⁷ Pajivi tsiteca jumecovënëtaponapona tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapajivi pijinia taxënatojiviyo tsane. ⁸ Itsiata baitsi jane pamonaë pejunavivi tajumelivaisi yabara itsamonae pebejiobiaexanaeyanivatsi, pamonaë ata apo tanejumecovënëtsivi, pamonaë ata pitoyavi itsamonae, pamonaë ata pevitota pibisiacuene pexanaevi, bajarapamonae ponaena petajueyabiabipucajavabelia. Pamonaë ata penajorobivi, pamonaë ata jumapecataeya pexanaenëanëjavabelia penavajëcaevi, pamonaë ata penajumetsënëtsivi, daxita bajarapamonae ponaena petajueyabiabipucajavabelia. Bajarapapuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata pecaenë.

Pacuenia Juan tane pejana Jerusaléntomara pacuenia itsamatababi itsijitsia yabara pelivaisi

⁹ Nexata jane baja rena caenë ängelnë. Bajarapaängelnë siete paängelnëbeje siete pacopabeje piayaijavanë pevënëcaecopanë pepacae-viyajuvënënë. Bajarapaängelnë nexata nejumaitsi:

—Naxanitsia. Catsitajëtsianatsi pova Corderonë pijavanexa, nejai ängelnë.

¹⁰ Bajaraxuacujinae Espiritu Santo netsijamatabëvënëca. Nexata bemajitsinaebota ängelnë nebarëpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ängelnë netsitajëta Dioso pijatomara, pinijitomaraxaneto, Jerusaléntomara. Athëbëvetsica Diosojavavetsica runaica bajarapatomara.

¹¹ Bajarapatomara cotianiveniveneca Dioso pijavenivenivenenaecotiata. Pacuenia penamatamotsiiboto jaspevënëiboto cotianivenivenena, bajarapacuenia cotianiveniveca. Nasabanua pacuenia nasaba vidriojava.

¹² Bajarapatomara matatoyorotsia yacaranata piatayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ängelevi, caenë canacujitsia, nucapona caebaupa canacujitsia. Bajarapabaupanëjava Israelpijinë pexi, doce ponëmibeje, pevënëanë vënërubena.

¹³ Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Survënënenia pijinia payenepana xaina acueyabi pabaupabeje.

Oestevēnēnēnia pijinia payenepana xaina acueyabi pabaupabeje. ¹⁴ Jerusaléntomara matatoyorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonē sasavia jebapona, doce paibotoxanetobeje. Bajarapaibotoxanetonē, caeibotoxaneto canacujitsia pejumavelia, Corderonē pijajivi doce ponēbeje, apóstolevi, pevēnēanē rubena.

¹⁵ Paángelnē nebarēcuaicuaijai, cobenaponapona oronaebo. Bajarapaoronaebota pecaējēbinexa Jerusaléntomara, pecaējēbinexa baupanē ata, pecaējēbinexa Jerusaléntomara matatoyorotsia peyacaranatsiibopanaxaneto ata. ¹⁶ Jerusaléntomara matatoyorotsia peyacaranatsiibopanaxaneto, daxitayenepananē namatajēpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajērētsialia ata payenepanabeje. Nexata jane baja ángelnē pecaējēbinaebota caējēba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajērētsialia ata xaina bajarapacuenia, dos mil doscientos pakilómetrobeje. Athēbēabetsia ata piapiajava bajarapacuenia xaina, dos mil doscientos pakilómetrobeje. ¹⁷ Bajaraxuacujinae ángelnē caējēba Jerusalén tomara matatoyorotsia peyacaranatsiibopanaxaneto peyapētaenexa paitayaētovajēto xaina. Jerusaléntomara matatoyorotsia peyacaranatsiibopanaxaneto, piaitayaējava xaina sesenta y cuatro pametrobeje. Pavirianaebota mapanacuapijivi bacaējēba, bajarapavirianaebota ángelnē caējēba.

¹⁸ Jerusaléntomara matatoyorotsia peyacaranatsiibopanaxaneto, exana jaspevēnēibota. Jerusaléntomara éorojavanēta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividrijava, bajara itsi. ¹⁹ Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonē sasavia tsivajēnaejeba. Bajarapaibotoxanetonē itabētsiaya jumacatsanaruba daxitaviria ibotonēta, bitso penamatamot-siibotonēta. Penamataxainaeibotoxaneto itabēta jaspevēnēibotonēta. Pecotocaeviiibotoxaneto itabēta zafirovēnēibotonēta. Acueyabiibotoxaneto itabēta ágatavēnēibotonēta. Cuatroibotoxaneto itabēta esmeraldavēnēibotonēta. ²⁰ Cincoibotoxaneto itabēta ónicevēnēibotonēta. Seisibotoxaneto itabēta cornalinavēnēibotonēta. Sieteibotoxaneto itabēta crisólitovēnēibotonēta. Ochoibotoxaneto itabēta berilovēnēibotonēta. Nueveibotoxaneto itabēta topaciovēnēibotonēta. Diezibotoxaneto itabēta crisoprasavēnēibotonēta. Onceibotoxaneto itabēta jacintovēnēibotonēta. Doceibotoxaneto itabēta amatistavēnēibotonēta. ²¹ Doce rabaja pabaupabeje. Doce rabaja pijinia paperlavēnējavatabeje, bitso penamatamot-sijavanēta, exana caebaupa canacujitsia. Bajarapatomarata caecalle ruca daxitallevecua bitso ayaicallexaneto. Bajarapacalle éorojavanēta pexanaecalle. Nasaba bitso. Pacuenia nasaba vidrijava, bajara itsi.

²² Bajarapatomarata apo taenē templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevetsivi matatoxenetsia piajamatabēcuenesaēnē, Corderonēbeje, ponaponabeje bajarapatomarata. ²³ Dioso ayaijamatatabēcuenenē pijapenivenivenaecotiata itayota bajarapatomara. Corderonē ata itayota pijapenivenivenaecotiata bajarapatomara. Bajaraxuacujinae apo namatavenonae bajarapatomarata pitayotsinexa matacabipijjuameto, meravipijjuameto ata.

24-26 Daxitanacuanëpijivi, pamonaе baja Dioso capanepatsi pijaneconivecua, bajarapamonae itsamatacabi jinavanapaena Diosobeje Corderonëbeje pijapenivenivenaеcotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaiyataeya perajutsinexa. Daxitamatacabijavabelianexa, bajarapatomara baupatanutsiana. Bajarapatomarata ajibi tsane meravi. ²⁷ Itsiata baitsi jane bajarapatomaraberena pibisiajamatabëcuene pexainaеvi, apo jone tsane. Piauracuene pexanaеvi, penajumetsënëtsivi ata, apo jone tsane. Jonena êpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonaе matacabi apo peverevereцаjava pexainaevinexa.

22

¹ Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petëpaejavavecua piatavayaexanaemene. Bajarapamene pitsaparena Diosobeje Corderonëbeje pijatronojavaverena. ² Bajarapamene bocapona ayaicallexaneto tuatuajëareca. Bajarapamene itapayareca anijamuxubërëneniabeje nubena naejavanë, jivi petëpaejavavecua piatavayaexanaenaenë. Bajaraponaenë caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenë pebaxuta xanepana daxitanacuanëpijivi penavaëbinexa, pejamatejemanexa piavitanejavavecua. ³ Nexata bajarapatomarata ajibi tsane jivi pejamatabëcuenebijianaеjavanexatsi. Nexata jivi pibisiacuene apo exanae tsane. Diosobeje Corderonëbeje pijatronota ecaenabeje pijajivi pitorobabiabinexabeje daxitamatacabijavabelianexa bajarapatomarata. Nexata daxita pamonaе Dioso pijajivi, pexaniajamatabëcuene rajutsiana Diosojavabelia. ⁴ Bajarapamonae Dioso itabarataena. Dioso pevënë ata rucaena bajarapamonae pitapathaitota. ⁵ Bajarapatomarata ajibi tsane meravi. Pepo petuxanenë Dioso pijapenivenivenaеcotia itayotsiana. Nexata bajarapatomarata pejinavanapaеvi apo namatavenonae tsane lámparacotia, matacabipijijuametocotia ata. Pamonaе jinavanapaena Dioso pijanacuata, Dioso pijanacua barëevetsianatsi daxitamatacabijavabelianexa.

Pacuenia baja imoxoyo pevajënae Jesucristo pepatsijavanexatsica yabara pelivaisi

⁶ Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumlahtsi:

—Jesús raja jumaitsi: “¡Bepijia patsianicajè!” jai. ¡Nexata pajivi jume-covënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. ⁹ Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonaë ata, pamonaë Diosojumepaebivi profetavi, pacuenia ata pamonaë jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumaitsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënaë pecopiarucaenexa mapanacuaje. Pacuenia baja cajena Dioso tajëvelia najumecapanepaeya jumaiti, bajarapacuenia Dioso exanaena. ¹¹ Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Èpibisiacuene yabara penajamatabëxainaeivi ata, tocopare pecatsitecaenexa penajamatabëxainaejava èpibisiacuene yabara. Itsiata baitsi jane pijinia pamonaë pexaniacuene pexanavanapaevi, catsitecae pevajënaeyabelia pexaniacuene pexanavanapaejava. Pamonaë ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaxenexa, nejai ángelnë.

¹² Icatsia ángelnë nejumaitsi:

—Jesús raja jumaiti: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamonaë xaniavaetsia netonacuenebavanapa. Pamonaë pijinia pibisiacuene exanavanapa, naneconitsiaexanaenajë. ¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

¹⁴ Icatsia ángelnë nejumaitsi:

—Jamatabëcuenebarëya baja pamonaë pibisiacuene pexanaeconimi Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonaë itsamatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua piavitavayaexanaenae pecuaixaenexa. ¹⁵ Itsiata baitsi jane daxita pamonaë Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamonaë bitso èpibisiacuene pexanaevi, penajorobivi ata, pevitota pibisiacuene pexanaevi ata, jivibeivi ata, jumapecataeya pexanaenëanëjavabelia penavajëcabiabivi ata, bitso penajumetsënëtsivi ata. Daxita bajarapamonaë nacopabanubenaena Dioso pijatomarajumavelia, nejai ángelnë.

¹⁶ Nexata Jesús nejumaitsi:

—Xanë rabaja Jesúsnë. Itorobajë tajaángelnë pecatsipaebinexa palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaángelnë catsipaeba. Xanë rabaja nacuaevetsinëmi Davidpijinë pemomoxiyajuvënë. Xanë rabaja tajamatabëcueneitayotsinë daxitajivi pexaniajailivaisita, nejai Jesús.

¹⁷ Espíritu Santo jumaitsi. Petiriva ata, pova Corderonë pijavanexa, bajarapova ata jumaitsi. Jumaitsibeje Jesúsjavabelia mapacueniaje:

—Naxanitsiayo patsianimica, jaibeje.

Pamonae jumetane bajarapacuenia pejumaitsijavabeje Jesúsjavabelia, bajarapamonae ata bejumaitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonae Dioso rajutsianatsi matababi apo peverevereceajava. Tocopatsianatsi bajarapamonae amoneya pexainaenexa matababi apo peverevereceajava itsa jumecovënëta Cristo pesivatëpaejavatsi. Tsipaji Cristo jivi petëpaejavavecua piavitavayaexanaenë.

¹⁸ Daxita pamonae leba Dioso pejumelivaisi, tayaquinaelivaisi mapabaxutotaje, jamatabëcuenereviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicue ne yabara jumaitsi mapabaxutotaje, bajarapacue ne Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonae matababi apo peverevereceajava pexainaevinexa, matababi apo peverevereceajava apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matababi apo peverevereceajava pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponë itoroba pijaángelnë tanetsipaebinexa pacuenia itsamat-
acabi itsijitsia mapanacuataje, bajaraponë nejumaitsi mapacueniaje:

—Bepijia patsianicajë, jai.

Nexata xanë jumaitsinë:

—Je. Xanepana rabaja. Jesús pepo petuxanenëmë, ¡naxanitsiayo patsianimica! janë.

²¹ Pacatovajëtatsi daxita paxamë vajatuxanenë Jesucristo papecayavenonaenexa. Bajara itsi tsane.